


Diža' güen che
ancho Jesucristo



New Testament in Zapotec, Zoogocho (MX:zpq:Zapotec,
Zoogocho)

Diža' güen che ancho Jesucristo
New Testament in Zapotec, Zoogocho (MX:zpq:Zapotec, Zoogocho)

copyright © 1987 Wycliffe Bible Translators, Inc.

Language: Zapotec, Zoogocho

Translation by: Wycliffe Bible Translators, Inc.

Zapoteco, Zoogocho [zpq], Mexico

Copyright Information

© 1987, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Zoogocho

© 1987, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 22 Feb 2024 from source files dated 29 Jan 2022
de7d40fb-3909-53d8-8bea-744cf1ce0e41

Contents

San Mateo	1
San Marcos	59
San Lucas	94
San Juan	153
Hechos	196
Romanos	250
1 Corintios	274
2 Corintios	297
Gálatas	311
Efesios	320
Filipenses	328
Colosenses	334
1 Tesalonicenses	340
2 Tesalonicenses	345
1 Timoteo	348
2 Timoteo	355
Tito	360
Filemón	363
Hebreos	365
Santiago	384
1 Pedro	390
2 Pedro	397
1 Juan	401
2 Juan	407
3 Juan	408
Judas	409
Apocalipsis	412

DIŽA' GÜEN DAN' BZOJ SAN MATEO

Ķozxtao' Jesucriston' (Lc. 3:23-38)

¹ Nga nyoj la bene' gosac Ķozxtao' Jesucriston' chzolaon len da' Ķozxta'ocho Abraham. Le Jesúsen' goque' xi'in diaža che da' David, na' da' Davin' goque' xi'in diaža che da' Abrahanna'.

² Abrahanna' goque' xa Isaac, na' Isaaquen' goque' xa Jacob, na' Jacoben' goque' xa Judá len yezica'chle bene' biše' ca'. ³ Judán' na' Tamar gosaque' Ķaxna' Fares na' Zara. Na' Faresen' goque' xa Esrom, na' Esronna' goque' xa Aram. ⁴ Na' Aranna' goque' xa Aminadab, na' Aminadaben' goque' xa Naasón, na' Naasónna' goque' xa Salmón. ⁵ Salmónna' na' Rahab gosaque' Ķaxna' Booz. Na' Boozen' na' Rut gosaque' Ķaxna' Obed. Na' Obeden' goque' xa Isái. ⁶ Na' Isáin' goque' xa rey David, na' rey Davin' goque' xa Salomón. Na' xna' Salomónna' goque' xo'ol da' Urías cate' za' yeca'a rey Davin' le' par gaque' xo'ole'.

⁷ Na' Salomónna' goque' xa Roboam, na' Roboanna' goque' xa Abías, na' Abíasen' goque' xa Asa. ⁸ Na' Asan' goque' xa Josafat, na' Josafaten' goque' xa Joram, na' Joranna' goque' xa Uzías. ⁹ Uzíasen' goque' xa Jotam, na' Jotanna' goque' xa Acaz, na' Acazen' goque' xa Ezequías. ¹⁰ Na' Ezequíasen' goque' xa Manasés, na' Manasésen' goque' xa Amón, na' Amónna' goque' xa Josías. ¹¹ Josíasen' goque' xa Jeconías len yezica'chle biše' ca' gosenita' ca' tiemp caten' bene' Babilonia ca' gosezene' bene' Israel ca' na' goseche'Ķoxje' legaque' Babilonian'.

¹² Gwde goc ca', golje Salatiel xi'in Jeconíasen'. Na' Salatielen' goque' xa Zorobabel. ¹³ Na' Zorobabelen' goque' xa Abiud, na' Abiuden' goque' xa Eliaquim. Na' Eliaquinna' goque' xa Azor. ¹⁴ Na' Azoren' goque' xa Sadoq, na' Sadoquen' goque' xa Aquim. Aquinna' goque' xa Eliud. ¹⁵ Na' Eliuden' goque' xa Eleazar, na' Eleazaren' goque' xa Matán. Na' Matánna' goque' xa Jacob. ¹⁶ Nach Jacoben' goque' xa José ben' goc bene' che María. Na' Marían' goque' xna' Jesús ben' nzi' Cristo, zeje diža' ben' gwlej Diosen' cont yedenabi'e.

¹⁷ Na' gwzolaon tiemp che da' Abraham bžinte tiemp che da' David gosac žta' diaža chen', na' ca' tiemp che da' David bžinte ca' tiemp caten' gosezene' bene' Israel ca' goseche'Ķoxje' legaque' Babilonia, lecze gosac yežta' diaža chen', na' ca' tiempen' bžinten ca' žan' golje Criston' ben' gwlej Diosen' cont yedenabi'e, gosac yežta' diaža chen'.

Can' goc cate' golje Jesucriston' (Lc. 2:1-7)

¹⁸ Na' quingan' goc cate' golje Jesucriston'. Ba naquen gwšagna' Marían' len José, na' za' ca'a Josén' le' par gaque' xo'ole' cate' gocbe'ede' ba noa' Marían' bdao'. Goc ca' dan' ben Spiritw che Diosen' cont bchendao' bdao'na' lo' le'e. ¹⁹ Na' Joséna' ben' ba naquen si'e Marían' par gaque' xo'ole', goque' to bene' ben da' güen lao Diosen'. Na' bene' xbab cuejyichje' Marían' šižize cont nono gacbe'e na' cont bi gwsie le' zto'. ²⁰ Šlac chone' xbab gone' ca' gwtase' na' to angl bene' gwseła' Ķancho Diosen' blo'elagüe' le' lo' bišgal. Na' gože' le':

—José, le' goljo' lo' diaža che da' rey David. Bitw žebo' si'o Marían' par gaque' xo'olo'. Spiritw che Diosen' benen cont no'e bdao'na'. ²¹ Na' sane' to bi' byo dao' na' gwsio' labe' Jesús, le' len' yeque'e xtola' bene' gualaž che' ca' bene' yesejnilaže'ne'.

²² Goc yogo' da' ca' cont goc can' gwna Diosen' dan' bzoj to ben' be'e xtižen' caní', gwne':

²³ To no'ol güego' no'ole ne' napši'ichgua cuine' güe'e to bi' byo dao' na' sane'be'. Na' si' labe' Emanuel.

Na' Emanuel zeje diža': Diosen' zoacze' len chio'.

²⁴ Na' cate' beban Josén' beyož gwñede' yelen', bene' can' gož angl che Xancho Diosen' le', jaXi'e Marían' liže' par goque' xo'ole'. ²⁵ Perw bi gwzoalene' le' ca xo'ole' san gwzoacze' le' respetw bžinte ža gwxane' to bi' byo dao', xi'ine' nechw. Na' gwxi' labe' Jesús.

2

Magos ca' jasene'e Jesúsen'

¹ Ca tiempen' cate' gwnabia' rey Herodes, golje Jesúsen' Belén, to yež gan' mbane distritw Judea. Na' besežin to chope magos Jerusalén, za'aque' to nación zito' dan' chi' do ga chla' gwbiž. ² Na' gosenabde' bene' lo ciudan' gose'ene':

—¿Gan' rey che bene' Israel, ben' ba golje? Nezeto' ba golje', le ba ble'eto' beljw chen' cate' blan' lažto' dan' zoa gan' chla' gwbiž. Na' za'to' gonxento'ne'.

³ Cate' gwneze rey Herodesen' can' gosenen', gocchgüe' tole, na' lecze ca' yogo'lol' bene' lo ciuda Jerusalénna'. ⁴ Nach reyna' btobe' yogo'lol' bXoz gwnabia' che chio' bene' Israel na' lecze yogo' bene' ca' chososed chosolo'e dan' bzoj da' Moisésen'. Na' gwñabde' legaque' gan' naquen galje Criston' ben' gwlej Diosen' cont yedenabi'e. ⁵ Nach gose' bene' ca' Herodesen':

—Galje' Belén, gan' mbane distritw Judea, le can' ža dan' bzoj to bene' be' xtiža' Diosen' caní'. Quinga žan:

⁶ Ca nac yež Belén gan' že' diaža che da' Judá, nacczen yež da' zaca'chgua lao yež gwnabia' ca' zjachi' Judean'. Le to bene' Belén gaque' bene' gwnabia',

na' le' güia ne'e nación Israel chian'.

⁷ Nach Herodesen' goxe' magos ca' bagaše'ze cont ja'aque' lagüen' na' gwnabde' legaque' batyañen' besele'ede' bla' beljon'. ⁸ Nach gwsele' legaque' Belénna', gože' legaque':

—Le šja'ac na' le šjaydiljw bidao'na' tcho'a. Na' cate' yeželebe' le yeda yedyedixjue'ele neda' cont lecze ša'a šjexena'be'.

⁹ Beyož bosozenag magos ca' can' gož reyna' legaque', nach gosa'aque'. Na' beljon' dan' besele'ede' do gan' chla' gwbižen' cate' bina' yesa'ac lažgaquen', zejen le'e yaban' žialaon laogaque' bžinten yo'o gan' zoa bidao'na', na' gwlezen.

¹⁰ Na' magos ca' besyebede' juisyw cate' besele'ede' beljon' da' yoble. ¹¹ Nach cate' besežine' yo'o gan' zoa bidaon', goso'e lo' yo'ona' na' besele'ede' bidao'na' len xna'be' Marían'. Nach bosozoa xibgaque' gosonxene'be'. Na' gosesaljo caj chegaquen' gosebeje' oro, yal na' to nechw da' chla' zix da' nzi' mirra na' gosoen' chebe'. ¹² Na' šlac ne' nita' magos ca' Belénna', Diosen' gwduxjue'ede' legaque' lo bišgal bich yesyedie' gan' zoa rey Herodesen'. Da'nan' besyeque'e yeto nez yoble jaya'ac laže'.

Bosoxnje' ja'aque' Egipto

¹³ Na' cate' ba besyeya'ac magos ca', to angl che Xancho Diosen' blo'elagüe' Josén' lo bišgal, na' gože'ne':

—Gwyas, gwche' bidaon' na' xna'ben' le šja'ac nación Egipto na' soale na'ze, na' cate'ch nia' le'e, cana' guaque yeza'le, le Herodesen' ba nžie' bia' yeyiljue' bidao'na' cont gote'be'.

¹⁴ Nach *ne'* ze *bxin* gwyas *Josén'*, *gwche'e* bida'ona' len *xna'ben'* zja'aque' Egipton'. ¹⁵ Nach gosenite' Egipto na'ze šlac bžin ža got Herodesen'. Na' dan' gosone' ca' goc can' gwna Diosen' dan' bzoj to bene' be' xtiže'na' cani', gwne': "Čixjue'eda' Xi'inan' yeze'e Egipton'."

Herodesen' gwsele' soldadw cont gosote' yogo' bi' byo dao'

¹⁶ Na' rey Herodesen', cate' gocbe'ede' gosonle magos ca' le' dan' bich besyedie' gan' zoe'na', leca bže'e. Na' bsaque' con can' gwyejni'ide' cate' gwñabde' legaue' batcan' bla' beljon', na' gwsele' soldadw che' ca' par jasete' yogo'lol' bi' byo che'eñ dao' zelao bi' chop ize, bi' ca' gosalje Belénna' na' yezica'chle yež ca' zjanyechj zjambi'i Belénna'. ¹⁷ Na' lagüe dan' gosote' bi' byo dao' ca', goc can' bzoj da' Jeremías ben' be' xtiža' Diosen' cani', žan:

¹⁸ Nente ši'i bene' Ramá,
chesebežchgüe' nita'chgüe' yela' güine'.
No'ole ca' zjanaque' xi'in diaža che da' Raquel chesyeyaše' chesyegüine'de' che
xi'in da'ogaue' ca',
na' bitw chesaclaže' no yeyoexenlaže' legaue', le ba gosatben'.

¹⁹ Cate' got Herodesen', *Josén'* *ne'* zoe' Egipton'. Nach to angl che Xancho Diosen' blo'elagüe' *Josén'* lo bišgal, na' gože'ne':

²⁰ —Gwyas, beče' bidaon' len *xna'be'na'* na' le šjaya'ac Israel. Ba gosat bene' ca' besyeyiljw bidao'na' cont yesote'be'.

²¹ Nach gwyas *Josén'* beče'e bidaon' len *xna'ben'* jaya'ac lažgaue' Israel.
²² Perw *Josén'*, cate' bende' Arquelao bezoe' chnabi'e latje che da' xe' Herodesen', bžebe' yeyeje' gan' mbane distritw Judean'. Na' Diosen' gwdixjue'ede' le' lo bišgalen' bi cheyala' šjaya'aque' distritw Judean', san šjaya'aque' gan' mbane distritw Galilean'. ²³ Da'n'an' besyežine' ciuda Nazaret na' jasenite'. Na' dan' jasenite' Nazareten' goc can' bosozoj da' bene' goso'e xtiža' Diosen' cani', gosene': "Yososi'e Jesúsen' bene' Nazaret."

3

Juan ben' bzoa bene' nis gwdixjue'ede' diža' güen che Diosen'
(Mr. 1:1-8; Lc. 3:1-9, 15-17; Jn. 1:19-28)

¹ Na' gwde zan iz, Juan ben' bzoa bene' nis gwyeje' latje daš gan' mbane distritw Judean'. ² Na' gwdixjue'ede' bene', gože' legaue':

—Le yetinje xtoła'le ca', le ba bžin ža cate' Diosen' ben' zoa yaban' nabi'e yichjlaždao' bene' yosozenague' che'.

³ Čhe Juanna' bzoj da' Isaíasen' caten' bzoje' Xtiža' Diosen' cani', gwne':
Bena' chne' zižje latje dašen', že':

"Le gonšagüe' yichjlažda'olen' cont soale lez gwzenagle che Xanchon' cate' yide'.

Le cuejyichj da' malen' chonle cont yichjlažda'olen' gaquen ca to nez da' ba gosonšagüe'."

⁴ Na' Juanna', xalane' goquen de yiša' xa camello. Na' da' bchej lsinen' goquen de yid, na' gwdagüe' biše'zo len šina' beser yixe'. ⁵ Bene' že' ciuda Jerusalénna' na' bene' že' yogo' yež ca' gan' mbane distritw Judean', na' lecze bene' že' yež ca' nyechj mbi'i yegw Jordánna' gosa'aque' ja'aque' gan' zoa Juanna' cont bosozenague' xtiže'na'. ⁶ Na' cate' gosexoadole' bi da' xinj zjanone', Juanna' bzoe' legaue' nis lo yegw Jordánna'.

⁷ Na' lecze ja'ac zan bene' Israel bene' ca' zjanzi' fariseo na' bene' ca' zjanzi' saduseo. Ja'aque' cont bzoa Juanna' legaue' nis. Nach Juanna' cate' ble'ede' legaue' gože'ne':

—ǝLe'e nacchgualē beñe' zgot na' beñe' gwxiye! ¿Chaquele guac yelale lao castigw dan' seǝa' Diosen' caten' gone' yelǝa' justis che beñachen'? ⁸ Še da' ǝi ba betinjele xtoǝa'len', cheyala' gonǝe da' nac gūen cont yesache'e beñe' ba boša' yichjlažda'olen'. ⁹ Na' bitw gonǝe xbab gaquele Diosen' bitw gone' le'e castigw che xtoǝa'len' lagūe dan' nacle xi'in diaža che da' Abrahanna'. Bitw nacho ǝeca chyažje Diosen' le'e. Guac gone' cont yej quinga yesyeyaquen xi'in diaža che da' Abrahanna'. ¹⁰ Ca nac le'e, še bi chonǝe can' chazlaže' Diosen', zaca'leble ca to yag frut da' bibi chbia. Na' yogo'te yag frut da' bibi chbia, chog xan yaga' ǝen na' gwzeyen'. ¹¹ Neda' da' ǝi chzoa' le'e nis neche ba betinje xtoǝa'le, perw coža'na' za' yid ben' gon cont soa Spiritw che Diosen' ǝo' yichjlažda'olen' nabian' le'e. Na' beñe' ca' bi yeson can' chazlaže' Diosen', seǝe' ǝegaque' ǝo' yi' gabilen'. Na' ben' za' za' coža'na' zaca'che' ca neda' na' da' nacchgūe' beñe' zaca', bi zaca' gona' xmandadoe' ǝechja' no xele'. ¹² Benan' gone' ǝen beñachen' can' choncho cate' chdecho trigon' ǝo' rner. Chotobcho trigon' chgo'ošagūe'chon na' chzeycho yix beben'. Na' beñe' bi chesejnlaže' Diosen', seǝe' ǝegaque' ǝo' yi' gabilen' dan' cbi cheyol chenit.

Cate' gwzoa Jesúsen' nis

(Mr. 1:9-11; Lc. 3:21-22)

¹³ Na' gwza' Jesúsen' gan' mbane Galilea na' gwyeje' gan' zoa Juanna' cho'a yegw Jordánna' cont Juanna' bzoe' ǝe' nis. ¹⁴ Na' Juanna' ben cho'alagūe' gague goclaže' gwzoe' Jesúsen' nis, gože'ne':

—Chyažjda' gwzo' neda' nisen' na' le' zedenabo' gwzoa' le' nis.

¹⁵ Nach Jesúsen' gože' Juanna':

—Bzoa neda' nisen'. Cheyala' goncho ca' cont gac yogo'ǝoǝ dan' non Diosen' mandadw gac.

Nach gwcheb Juanna' bzoe'ne' nis. ¹⁶ Na' cate' beyož gwzoa Jesúsen' nisen', bechoje' ǝo' nisen', na' ǝa' byaljwte yaban' gan' zoa Diosen'. Na' ble'ede' Spiritw che Diosen' betjen ca to ngolbex na' bžinen gwzoan ǝen ǝe'. ¹⁷ Na' gosende' gwne Dios ben' zoa yaban', gwne':

—Bengan' Xi'ina' beñe' chacda' na' chebe chezaquelaže' chgūeda' che'.

4

Goclaže' gwxiyen' co'oyelǝn' Jesúsen' gone' da' mal

(Mr. 1:12-13; Lc. 4:1-13)

¹ Na' Spiritw che Diosen' benen cont gwyej Jesúsen' latje dašen' gan' Satanás dan' chnabia' da' xigūe' ca' goclažen' co'oyelǝn' ǝe' cont gone' da' mal.

² Na' bitwbi gwdagw Jesúsen' lao choa ža choa yel, na' cate' gwde da' choa žana' gwdone'. ³ Na' Satanásen' gwbigan' gan' zoa Jesúsen', gožen ǝe':

—Še ǝe' naco' dogualje Xi'in Diosen', gož yej quinga yesyeyaquen yetextil.

⁴ Nach gož Jesúsen' ǝen:

—Nyojczē Xtiža' Diosen' žan: “Gague yelǝa' guagw na'zen' chyažje chio' beñach cont gac bancho, san ǝecze chyažjecho yogo'ǝoǝ diža' dan' ža Diosen'.”

⁵ Nach gwche' Satanásen' ǝe' ciuda Jerusalén dan' nac ciuda che Dios. Na' bcuen ǝe' yichjo' yodao' blao gan' nac ǝa'zelagūe' sibe, ⁶ na' gožen ǝe':

—Še ǝen' naco' dogualje Xi'in Diosen', nga boslažo' cuino', ǝe' nyojczēn ǝe' Xtiža' Diosen', žan:

Seǝa' Diosen' beñe' ca' zjanac angl che' yesaclene' le', na' yesoxe' le' cont bi chego' no yej.

⁷ Na' gož Jesúsen' gwxiye'na':

—Lecze can' nyojen Xtiža' Diosen', žan: “Bitw goncho Xancho Diosen' prueba še lede' can' že'na'.”

⁸ Da' yoble gwxiye'na' gozche'en le' to lo ya'a da' nacchgua sibe, na' blo'en le' yogo' nación dan' zjachi' doxen yežlion' len yela' zaca' yela' xdan čhegaquen.

⁹ Nach gožen le':

—Yogo' da' quinga chle'edo' nga gonan' lo nao' še gwzoo xibo' lagua' nga gonxeno' neda'.

¹⁰ Nach gož Jesúsen' len:

—Beyej ca'ale Satanás. Nyojczen le'e Xtiža' Diosen' žan: “Cheyala' šejnilaže'cho Xancho Diosen' na' toze le' gonxenko.”

¹¹ Na' becuase Satanásen' cuite'na' beyejen ga yoble nach besežin to čhope angl čhe Diosen' jasaclene' le'.

*Jesúsen' gwzologüe' chyixjue'ede' diža' güen čhe Diosen' distritw Galilea
(Mr. 1:14-15; Lc. 4:14-15)*

¹² Na' Jesúsen' beze'e distritw Judean' na' beyeje' distritw Galilea cate' bende' ba de Juanna' ližya. ¹³ Na' gwze'e yež Nazareten' jasoe' ciuda Capernaum dan' chi' cho'a nisdaon' do gan' zjachi' distritw dan' zjanzi' Zabulón na' Neftalí. ¹⁴ Na' dan' jayzoe' ciudan' goc can' gwna da' Isaías ben' be' xtiža' Diosen' cani' caten' bzoje' dan' ža:

¹⁵ Ca nac distritw Galilea gan' že' zan beže' cbi zjanaque' beže' Israel, gan' nita' distritw Zabulón na' distritw Neftalí dan' zjambane yešla'ale nisdaon' na' yegw Jordán,

¹⁶ nčhol' yichjlaždao' beže' ca' že' na'.

Perw Diosen' gwsele' to beže' gwlo'o to be'ni' xen lo' yichjlažda'ogaquen'.

Gosaque' ca beže' guat len yichjlažda'ogüen' le' gosone' da' malen',

perw bena' gwseła' Diosen' ba bocobe' yichjlažda'ogaquen'.

¹⁷ Cana' gwzolao Jesúsen' gwduxjue'ede' gwne':

—Le yetinje xtola'len', le ba bžin ža cate' Diosen' ben' zoa yaban' nabi'e yichjlaždao' beže' yosozenague' čhe'.

*Jesúsen' gwleje' tap beže' gwxcen bel' cont gosaque' txen len le'
(Mr. 1:16-20; Lc. 5:1-11)*

¹⁸ Na' zej Jesúsen' cho'a nisdao' čhe Galilea cate' ble'ede' čhope beže' gwxcen bel', Simón Pedro na' beže' biše' Andrés, na' zjanite' chosozale' yixjw dan' chesezende' belen' lo' nisa'. ¹⁹ Nach gože' legaque':

—Le šo'o len neda'. Nacle beže' gwxcen bel', na' chbejle bel' lo' nis, perw na'a gona' cont gaxle beže' yesyechoje' lo' da' malen'.

²⁰ Na' la' gosebejyichjte' yixjw čhen' nach ja'aclene' Jesúsen'.

²¹ Na' Jesúsen' gwze'e yelate' na' ble'ede' Jacobon' xi'in Zebedeo na' len beže' biše' Juan, zjajo'e to lo' barcw len xagaque', chesyeyonšagüe' yixjw čhegaquen'. Na' lecze gox Jesúsen' legaque' šja'aclene' le'. ²² Na' la' gosontie' barcon' lo' na' xagaque' Zebedeon' na' ja'aclene' Jesúsen'.

*Jesúsen' bsed blo'ede' beže' zan
(Lc. 6:17-19)*

²³ Na' Jesúsen' gwyeje' yogo' yež ca' zjachi' gan' mbane Galilea, bsed blo'ede' beže' ca' zjaže' to to yodao' čhe chio' beže' Israel. Na' gwduxjue'ede' diža' güen can' nabi'a Diosen' yichjlaždao' beže' yosozenag čhe'. Na' Jesúsen' beyone' beže' ca' chese'e bite'teze yižgüe'. ²⁴ Na' doxen nación Siria gwxcna diža' yogo' da' güen da' ben Jesúsen'. Nach beže' Siria ca' jasesane' yogo' beže' chesacšene lagüe'na', beže' chese'e zan yižgüe', beže' chesey chesela, beže' zjajo'o zjanyaz da' xigüe' yichjlažda'ogaque' len beže' chesaz šon na' beže'

natsi' cuerp chegaquen'. Na' beyone' legaque'. ²⁵ Na' zan bene' gosao' le', bene' za'ac distritw Galilea na' distritw Decápolis, na' bene' za'ac ciuda Jerusalén, na' bene' za'ac yezica'chle yež da' zjachi' distritw Judea, na' bene' za'ac yešla'a yegw Jordán.

5

Diža' dan' bsed blo'e Jesúsen' to lo ya'a

(Lc. 6:20-23)

¹ Na' Jesúsen' cate' ble'ede' bene' zan zjanžag, na' gwloe' gwchi'e to lo ya'a. Na' bene' ca' zjanaque' le' txen gosebigue' gan' chi'ena'. ² Nach gwzolao bsed blo'ede' legaque', gwne':

³ —Mbalaz zoa le'e chacbe'ele chyažjele gaclen Diosen' le'e, le ba chzenagle che Diosen' cont chnabi'e yichjlažda'olen'.

⁴ 'Mbalaz soa le'e chacyaše'laže'le, le Diosen' yeyoe'xenlaže' le'e.

⁵ 'Mbalaz zoa le'e chzexjwlaže'le len Diosen' na' len benachen', le gon Diosen' cont gac lo na'le doxen yežlion' can' gwne'.

⁶ 'Mbalaz zoa le'e chzelaže'chgualé gacle bene' güen len Diosen', le ba cheyon Diosen' le'e bene' güen lagüen'.

⁷ 'Mbalaz zoa le'e cheyaše'le bene' yoble, le lecze ca' Diosen' yeyaše' yeži'ilaže'de' le'e.

⁸ 'Mbalaz zoa le'e ba nacle bene' laždao' xilaže', le šjayzoale txen len Diosen'.

⁹ 'Mbalaz zoa le'e chego'ole yela' chxenlaže' che bene' chesedile, le Diosen' ne' nacle xi'ine'.

¹⁰ 'Mbalaz zoa le'e chosochi chososaca' bene' le'e lagüe dan' chonle dan' nac güen lao Diosen', le chzenagle che Diosen' cont chnabi'e yichjlažda'olen'.

¹¹ 'Na' mbalaz soale še dan' chejnlaže'le neda' chesezi'diža' bene' le'e na' chososaca'zi'e le'e na' chosoxie' diža' güenlaže' chele. ¹² Le yebechgüe na' le soa mbalaz, le Diosen' gone' cont gacchgua da' güen chele cate' yežinle gan' zoe'na'. Can' chesonde' le'e, ca'czen' goson da' xozxta'ocho len da' bene' ca' goso'e xtiža' Diosen' cani'.

Naccho ca zede' na' ca be'ni' len bene' že' yežlio nga

(Mr. 9:50; Lc. 14:34-35)

¹³ 'Le'e nacle ca zede', le zede' chaclenen cont bi cuiayi' no yid bela', na' le'e chonle cont benachen' cbi chesontequé da' mal. Perw še zeden' bich bi zxi' naquen, ¿nacxe goncho cont yeyaquen zxi' da' yoble? Na' bich bi zacan', lete cho'onchon na' gwlej gwšošj bene' len. Na' le'e še cbich gonle can' chazlaže' Diosen', nacle ca zede' dan' bich bi zxi' naquen.

¹⁴ 'Na' le'e nacle ca be'ni' dan' chaclenle bene' cont chesenezde' nac chaclaže' Diosen' yesone'. Na' dan' chonle can', nacle ca to ciuda da' chi' to lo ya'a, le yogo'ze bene' chesele'eden'. ¹⁵ Notno gwguala' to yi' na' gw dosen' to caj, san chde'en le'e ze'e cont chsenin' len yogo' bene' že' lo' yo'ona'. ¹⁶ Na' ca nac le'e, cheyała' soateze soale gonle da' güenna' cont yesele'e bene' na' yesonxene' Xacho Dios ben' zoa yaban'.

Jesúsen' bsed blo'ede' can' ža ley dan' bzoj da' Moisés

¹⁷ 'Bitw gaquale še neda' za'a zedeyena' cont ley dan' bzoj da' Moisésen' na' dan' bosozoj yezica'chle bene' ca' goso'e xtiža' Diosen' cani' bich yesonen žin. Za'a cont gac can' ža yogo'loł Xtiža' Diosen' dan' bosozoj bene' ca'. ¹⁸ Da' li žia' le'e, te che yežlio nga len da' ca' chle'echo le'e yaban', perw ne to letr dao' ne to punt dao' dan' nyoj le'e ley na' bi gac yexin, san gac yogo'loł dan' nžia' bia' Diosen' gac. ¹⁹ Da'nana' note'tezle še bi gonle can' žanna', la'czla' še naquen la'zelagüe to da' dao', na' še lecze gwlo'ele bene' yoble bi yosozenague'

chen, Dios ben' zoa yaba chnabi'e ne' bi nacle bene' blao len le'. Na' note'tezle še gonle can' žanna', na' še lecze gwlo'ele bene' yoble yesone' ca', Diosen' ben' zoa yaba chnabi'e ne' nacle bene' blao len le'. ²⁰ Chnia' le'e, bene' fariseo ca' na' bene' ca' chososed chosolo'e dan' bzoj da' Moisés bitw zjanac yichjlažda'ogaquen' güen lao Diosen'. Na' še yichjlažda'olen' bi gacchen güen lao Diosen' clal ca' che bene' ca', bitw yežinle yaban' gan' zoa Diosen' chnabi'e.

*Da' malen' choncho še chža'a lježcho
(Lc. 12:57-59)*

²¹ Na' lecze bsd blo'e Jesús'en' legaue' gože'ne':

—Ba nezele can' bzejni'i Moisés'en' bene' ca' gosenita' cani', gwne': “Nono gotle. Na' še no got ljež benache', justis ca' yesechoglagüe' che' cheyala' gate'.”

²² Na' neda' žia' le'e, note'tezle še chža'a ljež benachle, zacan' yesechoglagüe' gata' castigw chele. Na' note'tezle še chzi'diža' lježle, zacan' yeson bene' blao ca' chesenabia' nación Israel chechon' castigw chele. Na' note'tezle še chado'diža' lježle, zaca'czen' yesela' Diosen' le'e lo yi' gabil.

²³ 'Cheyala' soacho binlo len ljež benachcho. Na' la'czla' cate' ba zoale lo' yodao' cont gwnežjwle bi dan' gwnežjwle gonxenle Diosen', še šjasa'laže'le ba benle da' mal contr to bene' lježle, ²⁴ na'ze cheyala' gwcua'anle šlož dan' noxe'len' na' šjenle cont yezoale binlo len bene' lježlen'. Yeyoža' guaque šjasanle dan' ba gwlejlle cont gonxenle Diosen'.

²⁵ 'Cate' to bene' gagüe' xya chele na' che'e le'e lao justis, šlac ngo'ole nezen' le yeyiljwlaže' nac gonle cont yezoale binlo len le' cont bi che'e le'e lao justisen'. Še bitw gonle ca', cate' žinle lao justisen', nach gone' le'e lo na' bene' ca' yoseyjue' le'e ližya. ²⁶ Da' li žia' le'e, bitw yebeje' le'e še bina' chixjwle doxen dan' čala'le.

Da' malen' choncho še chzoa xtocho

²⁷ 'Ba nezele ley dan' bzoj da' Moisés'en' žan: “Bitw gata'lenle no'ole bi nac no'ol chele o bene' byo bi nac bene' chele.” ²⁸ Na' neda' žia' le'e, note'tezle še chna'le to no'ole na' chzelaže'lene', ba naple doła'. Le tozeczce ca malen' ba chonle lo' lažda'olen' len dan' chon bene' chzoa xtoe'.

²⁹ 'Na' še yejlaolen' chonen cont gonle da' xinj, cheyala' cuejyichjle da' malen' chonle. Yejni'a cuiayi' yejlaolen' clal ca cuiayi'le lo yi' gabilen' neche len. ³⁰ Na' še na'le chonen cont gonle da' xinj, cheyala' cuejyichjle da' malen' chonle. Yejni'a cuiayi' na'le clal ca cuiayi'le lo yi' gabil neche len.

*Bene' ca' zjanšagna' bitw cheyala' yesyele'e
(Mt. 19:9; Mr. 10:11-12; Lc. 16:18)*

³¹ 'Lecze nezele ley dan' bzoj da' Moisés'en' žan: “Note'teze bene' yele'e len no'ol che', cheyala' chas to yiš ga güen' diža' le besyele'ena'.” ³² Na' neda' žia' le'e note'teze bene' chele'e len no'ol che', len neztede' no'ole chen' bitw naque' to no'ole chzoa xtoe', chone' cont gague' ca to no'ole bene' chzoa xto. Na' note'teze yošagna'lene' to no'ole bene' bela'a len bene' che', lecze tozcze ca da' xinj gone' len dan' chon bene' chata'lene' no'ol che bene' yoble.

Jesús'en' bzejni'ide' cheyala' güe'cho diža' li

³³ 'Na' lecze ba nezele can' bzejni'i da' Moisés'en' da' xozxta'ocho ca': “Cate' gwzoale testigw Xancho Diosen', cheyala' gonle con can' ba gwnalen'.”

³⁴ Perw neda' žia' le'e gwbat nale quinga che bite'teze: “Yabana' zoan testigw chia' cho'a diža' li”. Bi nale ca' le yaba nan' zoa Diosen' chnabi'e. ³⁵ Na' neca nale: “Yežlion' zoan testigw chia' cho'a diža' li”, le yežlion' den xni'a Dios. Neca nale: “Ciuda Jerusalénna' zoan testigw chia' cho'a diža' li”, le naquen ciuda che Dios ben' naque' la'zelagüe bene' chnabia'. ³⁶ Na' neca nale: “Yichja' zoan

testigw chia' cho'a diža' li", le bitw gac gonle cont yiša' yichjlen' yesyeyaquen da' šiš o yesyeyaquen da' gasj. ³⁷ Še žale guaquen, gacczen; še žale bi gac, bi gacczen. Le bichle diža' da' nale cont yesejle'e chele, zan' che Satanás dan' chnabia' da' xigüe' ca'.

Bitw co'olaže'cho bene' chesegue'ede' chio'
(Lc. 6:29-30)

³⁸ Nezele ley dan' bzoj da' Moisésen' žan: "Še to bene' gone' zi' yejlaolen', guac gonle zi' yejlagüen', na' še to bene' xope' to layle, guac xople to layen'." ³⁹ Perw neda' žia' le'e, bitw gwžonle gwsaca'zi' bene' le'e. Še to bene' cape' šla'a xaga'le, le güe' dan' yešla'a. ⁴⁰ Še to bene' chagüe' xya na' che'nde' que'e xcamisle, le güe' latje que'e len xadon chelen'. ⁴¹ Na' še to bene' blao gone' byen šejlenlene' gua'le yoa' chen' do gašj hor, le šejlene' le guan' chop ca'te'le. ⁴² Na' še bi dan' chnabe bene' le'e, le güen'. Na' le cuej še bi da' chnabe' cuejlene'.

Cheyała' gaquecho bene' chgue'e chio'
(Lc. 6:27-28, 32-36)

⁴³ Na' lecze ba nezele ley chelen' žan: "Cheyała' gaquele bene' migw chele na' gue'ele bene' chgue'ede' le'e." ⁴⁴ Perw neda' žia' le'e, cheyała' gaquele bene' chgue'ede' le'e, na' cheyała' nabele Diosen' gac güen che bene' chesezi'diže' le'e. Le gon binlo len bene' chesegue'ede' le'e, na' le yol güiž Diosen' cont gac güen che bene' ca' chososacazi'e le'e. ⁴⁵ Še gonle ca', gwlo'ele nacle xi'in Diosen' ben' zoa yaban'. Len' chone' chla' gwbižen' cont chsenin' che bene' zjanaque' bene' güen lente che bene' zjanaque' bene' mal. Na' lecze chone' yejw par bene' zjanaque' bene' güen len bene' zjanaque' bene' mal. ⁴⁶ Še chaquele šinze bene' chacde' le'e na' bi chaquele bene' yoble žbixchen' chbezle gon Diosen' da' güen chele? Con can' cheson bene' güechixjw ca' chonle, bene' ca' žale zjanaque' bene' xi'achgua. ⁴⁷ Na' še con chguaple tiox bene' biše' lježle ca'ze žchaquele güenna' chonle da' chonle ca'? Bitw chonle güen, le ca'czen' cheson bene' ca' bi zjanombi'e Diosen'. ⁴⁸ Cheyała' gacle bene' šagüe' bene' güen len note'teze bene' con can' nac Xacho Diosen' ben' zoa yaban' bene' šagüe' bene' güen.

6

Jesúsen' blo'ede' naquen' cheyała' goncho da' chazlaže' Diosen'

¹ Cate' gonle to da' güen, bitw gonlen cont yesele'e bene' can' chonlen' na' yesonxene' le'e, le še chonle ca', Xacho Dios ben' zoa yaba bitw gone' ga gac güen chele. ² Da'nan' cate' gwnežjwle to bene' da' chyažjde', bitw gwnežjwlen par yeseneze bene' ca' dan' chonlen'. Bene' gwxiye' ca' chosonežjue' bi da' chosonežjue' do lo' yodao' na' do chanez par yeseneze bene' na' yesene' güen chegaque'. Da' li žia' le'e, ba gosacxencze' lagüe da' chesone' ca', perw Diosen' bitw gone' ga gac güen chegaque' še ca'. ³ San le'e, še bi da' gwnežjwle to bene', le gwnežjon šižize. ⁴ Gonlen ga cbi yesache'e bene' na' cbi yesonxene' le'e, nach Xacho Diosen' ben' chle'ede' yogo' dan' choncho gone' ga gac güen chele ga yesele'e yogo' bene'.

Bsed blo'e Jesúsen' nac cheyała' yol güižcho Dios
(Lc. 11:2-4)

⁵ Cate' yol güižle Diosen', bitw gonle can' cheson bene' gwxiye' ca'. Legaque' chesyebede' chesezeche' chosol güiže'ne' lo' yodao' chegaque', na' do squin chanez. Chesone' ca' cont yesele'e bene' can' chesone'na'. Da' li žia' le'e, ba gosacxenczen' lagüe da' chesone' ca', perw Diosen' bitw gone' ga gac güen chegaque' še ca'. ⁶ Na' cate' yol güižle Diosen', le yeyo'o lo' yo'o chele na'

gwseyjwle puerten' na' güe'le diža' len Diosen' ben' cbi chle'echo la'czla' zoe' len chio'. Na' Xacho Diosen' ben' chle'ede' yogo' dan' chonle gone' ga gac güen chele.

⁷ 'Na' cate' yol güižle Diosen' bi güe'le diža' zan can' cheson bene' ca' bi zjanombia' Diosen'. Legaque' chesacde' lagüe' dan' cheso'e diža' zan Diosen' gwzenague' chegaque'. ⁸ Bitw gonle can' chesone'na'. Ca nac Xacho Diosen', cate' za' nabelenen' ba nezczede' bi dan' chyažjele. ⁹ Quinga yol güižlene': Xato' bene' zoa yaba, chnabto' yogo'lol bene' yesonxene' le'.

¹⁰ Zelaže'to' nabi'o yichjlaždao' yogo' neto' benach.

Gacšca can' chazlažo' yežlio nga can' chac yabana'.

¹¹ Ca nac dan' che'ej chagwto' tža tža, beňscan na'a.

¹² Na' bezi'xenšca cheto', le lencze neto' chezi'xento' che ljež benachto' bite'teze da' chesonde' neto'.

¹³ Na' bitw go'o latje soa da' gwžigan' neto' gonto' da' mal, san bcuas bcue'ejšca neto' len da' mala'.

Le'na' chnabi'o na' napo' yela' guac na' naco' bene' zaca' juisyw toli tocanē.

Ca'czen' gacšca.

¹⁴ 'Na' še chezi'xenle che ljež benachlen' bite'teze da' chesonde' le'e, lecze Xacho Diosen' ben' zoa yaban' yezi'xene' xtoła'len'. ¹⁵ Perw na' še le'e bi chezi'xenle che ljež benachle, lecze ca' Xacho Diosen' bitw yezi'xene' chelen'.

Jesúsen' bzejni'ide' nac goncho gwbas

¹⁶ 'Cate' le'e gonle gwbas cont gonxenle Diosen', bitw gon cho'alaolen' ca che bene' chegüine'chgüe', can' cheson bene' gwxiye' ca'. Legaque' chesone' ca' contze chesele'e bene' le chesone' gwbas na' yesonxene' legaque'. Da' li žia' le'e, ba gosacxencze' lagüe da' chesone' ca', perw Diosen' bitw gone' ga gac güen chegaque' še ca'. ¹⁷ San le'e cate' gonle gwbas, le gwpa'a yichjle na' le chib cho'alaole. ¹⁸ Le gon ca' cont bi yesache'e bene' chonle gwbas, san gacbe'e toz Xacho Dios ben' zoa len chio' la'czla' bi chle'echone'. Na' Xacho Diosen' ben' chle'e yogo' da' choncho gone' cont gacxenle.

Da' ca' zjazaca'chgua yaba gan' zoa Diosen'

(Lc. 12:33-34)

¹⁹ 'Bitw co'ošagüe'le da' zcha'o da' zjanac da' zaca' da' zjade yežlio nga, le yesebiayin'. Bał da' zjade yežlio nga chesaljen be dao' chesagwban', na' yebalen chesezen xche'en, na' lecze chaš bene' gwban na' yeseque'en. ²⁰ San le gaque Diosen' cont gone' da' šagüe' da' güen chele da' bi te chen cate' yežinle yaban' gan' zoe'na', da' bi šo'ba', na' neca sen xche'en, na' neca gac šo' bene' gwban yeseque'en. ²¹ Le gan' de dan' chaquelen' na' zoa yichjlažda'olen'.

Žia yejlaochi cont chle'echo

(Lc. 11:34-36)

²² Žia yejlaole cont chle'ele. Še bitw bi chaquen, chle'eczele binlo. ²³ Perw še yejlaolen' bi naquen binlo, bitw chle'ele. Ca'czen' naquen len yichjlažda'olen'. Da' licze leca nchol yichjlažda'ole še bi chzenagle che Diosen'.

Bitw gac gaquecho Diosen' na' gaquetecho mechw

(Lc. 16:13)

²⁴ 'Notno gac gon žin len chope xane' to ši'ize, le še gone' ca', gue'ede' to xan žinna' na' gacde' yetoe'; o gone' žin che toe' do yichj do laže' na' che ben' yeto gonen' to chža'alaže'ze. Lecze ca' le'e bitw gac gonle xšin Diosen' do yichj do laže'le na' gonte xšinle cont gacle bene' gwñi'a.

Diosen' chapši'e xi'ine' ca'

(Lc. 12:22-31)

25 'Da'nan' žia' le'e, bi gacžejlaže'le bi da' ye'ej gagwle šlac mbanle, na' lecze ca' bi gacžejlaže'le che xalana'le. Zaca'ch yela' mban chelen' ca yela' guagw. Lecze ca' cuerp chelen', zaca'chen ca xalana'le. 26 Le gon xbab ca nac be ca' zjažia xil ben' chesaš lo be', bitw chesazba', bitw cheselapba', neca zoa da'a xoa' chegacba', perw na' Xacho Diosen' ben' zoa yaba chguagwcze'ba'. ¡Nacchle zaca' le'e ca be ca' zjažia xilen'! 27 Na' ne tole bi gac yoston cuinle gašje metr še con cue' yichjle tonle.

28 'Na' ¿bixchen' chbec yichjle xalana'le? Le gon xbab ca nac yej ca' da' zjaze yixe' chesecha'oczen'. Bibi žin chesonen, neca chesaljen do. 29 Na' žia' le'e, da' rey Salomón gocue' lache' güen juisyw, perw bitw bežinlaže' xalane'na' ca yela' xdan che yej ca'. 30 Diosen' none' xdan da' ca' ze yixen' la'czla' to chop žaze nitan' na' chosozeyen'. Nacchxe gon Diosen' len le'e gwleccze yichje' gone' yogo' da' chyažjele, le'e late' lasze chejle'le che'. 31 Da'nan' bitw cuec yichjle che bi dan' chyažjele, nale': "¿Bin' ye'ej gagwcho na' bin' gacwcho?" 32 Bene' ca' bi chesonxene' Diosen' con chesoe'laže' bi da' gata yese'ej yesagüe' na' che xalana'gaque'. Perw Xacho Diosen' ben' zoa yaban' nezcede' bi da' ca' chyažjele. 33 Cheyala' güe'laže'le gwzenagle che Diosen' cont nabi'e yichjlažda'olen' na' cont gacle bene' güen len le', lenna' naquen da' žialaoch, na' yogo' da' ca' chyažjele, goncze Diosen' len. 34 Bitw cuec yichjle che bi dan' gac gwxe güižj, le decze da' cuec yichjcho tža tža. Da'nan' to to ža con cuec yichjcho che dan' chac ca hora'.

7

Bitw zaca'cho nacho zjanap bene' dola' (Lc. 6:37-38, 41-42)

1 'Bitw gonle xbab zaca'le nale bene' zjanape' dola'. Še nale che bene' zjanape' dola', ca'cze Diosen' ne' le'e naple dola'. 2 Can' chosbaga'le bene' žale zjanape' dola', lecze can' yosbaga' Diosen' le'e ne' naple dola'. Con can' chonle len bene', lecze can' gon Diosen' len le'e. 3 ¿Bixchen' chna'le beb dao' dan' yo'o lo' yejlao bene' lježle na' bi chache'ele naquech beb xen dan' yo'o lo' yejlaolen'? 4 Na' še le'e yo'o to da' xench lo' yejlaolen' ¿nacxechen' che'le bene' lježlen': "Ben' yebeja' beb dao' dan' yo'o lo' yejlaguon'?" 5 ¡Bene' güexoayag! Žgua'tec le yebej beb xen dan' yo'o lo' yejlaolen', nach le'ele binlo cont yebejle dan' yo'o lo' yejlao bene' lježle.

6 'Perw bitw güe'tezle xtiža' Diosen' len bene' ca' cheson yichjlaogüe' cbi chesaclaže' yosozenaguen', le xož yesonde' le'e znia ca cheson bal' beco' še bi chazlaže'ba' bi da' chosonežjue'ba'. Na' še güe'tezle xtiža' Diosen' len bene' ca' cheson yichjlaogüe', xož yosolej yosošoje' diža' dan' güe'lenlene'. Ca' cheson coš len da' cbi chesaclaže'ba' yesagwba'.

Le nabe Diosen' bi dan' nabelene', le gonczen' (Lc. 11:9-13; 6:31)

7 'Še žan bi da' chyažecho, chnabchon. Še žan to da' chaclaže'cho želecho, chyljwchon. Še žan chaclaže'cho saljw bene' puert che' na' necho cho'a puert' cont saljue'. Na' ca'cze cheyala' ye'le Diosen' cate' bi da' chyažjele, o bi da' chaclaže'le gone'. 8 Na' note'tezle še bi da' chnabelene', gonczen'. Na' še bi dan' che'nele nezele, gwzejni'iczdlen' le'e. Na' še žan chaclaže'le gac to da' gac, yol güižle Diosen' can' chon to bene' chnie' cho'a puert, nach Diosen' gone' cont gacczen.

9 'Na' le'e xa' bidao', še xi'inle nabebe' le'e yetextil ¿gwnežjwlebe' to yej? 10 Na' še nabbe' yid bel' gagwbe', ¿gwnežjwlebe' to be xigüe'? 11 La' nacle bene' mal,

nezele chnežjo xi'inle to da' güen. Nacchxe güen gon Xacho Diosen' ben' zoa yaban' len bene' chnab lagüe'na' bi dan' chyažjde'.

¹² 'Na' con yogo' da' güen da' chaclaže'le yeson benachen' len le'e, lecze ca' cheyala' gonle len legaue', le can' zejen da' nyoj le'e ley dan' bzoj da' Moisésen' na' dan' bosozoj da' bene' ca' goso'e xtiža' Diosen' cani'.

*Nez da' yežin yaban' zaca'leben ca to nez las
(Lc. 13:24)*

¹³⁻¹⁴ 'Lao yela' mban checho chope nez de, to nez güen na' to nez mal. Nez malen' zaca'leben ca to nez yo to nez laga' dan' chaquele leca mba naquen cont talen, na' bene' zan cheseque'en. Perw cheyala' gonle byen šo'le nez güenna' la'czla' chaquele naquen ca to nez las, to nez zdebe, le nez malen' chežinen gabil gan' saca'zi'le toli tocaņe. Na' nez güenna' chežinen yaba ga banle toli tocaņe.

*Dan' choncho chlo'en bin'yo'o lo' yichjlažda'ocho
(Lc. 6:43-44)*

¹⁵ 'Cheyala' gwsaca'le cont bi šejle'le xtiža' bene' ca' chesonlaže' chesene' xtiža' Diosen' cheseyixjue'ede'. Xdanchgua cheso'e dižan', le chesaclaže' gonle xbab zjanaque' bene' güen. Perw zjanaque' bene' laždao' xi'a na' chesaclaže' yosožiaye'e le'e. ¹⁶ Con can' nac da' chbia to to yaguen' nezecho bi yaga'. Ca nac yag yeše' bitw chbian uvas na' neca yag lay chbian yixgüigw. Ca'czen' cheyala' gacbe'ele bene' ca' yeseziye'e le'e cate' le'ele dan' chesone'na'. ¹⁷ Yag dan' nac yag güen, frut güencze chbian, na' yag da' bi nac güen, lecze frut da' bi nac güen chbian. ¹⁸ Bitw nacho to yag frut güen chbian frut da' bi nac güen, na' neca nacho dan' bi nac güen chbian da' nac güen. ¹⁹ Na' yogo'te yag frut da' bibi chbia, chog xan yaga' len na' gwzeyen'. ²⁰ Na' can' nac dan' cheson to to bene', nezecho še zjanaque' bene' güen o bene' mal.

*Gague yogo' bene' yesyežine' gan' zoa Diosen' chnabi'e
(Lc. 13:25-27)*

²¹ 'Bene' zan chese'e neda': "Naco' Xana'", perw gague yogüe' yesyežine' yaban' gan' zoa Diosen' chnabi'e. Bene' ca' cheson can' chazlaže' Xa' Diosen' ben' zoa yaban', legaczen' yesyežine' yaban' gan' zoe'na'. ²² Cate' žin ža yosodie' cuent lao Diosen', bene' zan yesi'e neda': "Xana', goclen neto' na'a, le ba gwdixjue'eto' xtižo'na'. Na' lecze ca' bza' bzetjto' lao' bebejto' da' xigüe' ca' zjajo'o zjanyaz yichjlaždao' bene'. Na' lecze bza' bzetjto' lao'na' bento' da' zan yela' guac." ²³ Perw na' yapa' legaue': "Bitw nombi'a le'e. Le šjaya'ac ca'ale le'e bene' güen da' xinj."

*Chope bene' na' yo'o da' chon to toe'
(Mr. 1:22; Lc. 6:47-49)*

²⁴ 'Bene' chzenag xtiža'na' na' chone' can' žia'na' zaca'lebde' ca to bene' sina' bene' ben liže' na' gwdixjue' lenen len yej gual. ²⁵ Na' goc yejw zil juisyw na' betj yegw gwyechjen liže'na' na' gwyechj be' bdono'. Perw bitw gosezoen yosochixen len dan' gwdixjue' lenen de yej. ²⁶ Na' bene' chzenag xtiža'na' perw bitw chone' can' žia'na', zaca'lebde' ca to bene' tont bene' bzoa ližen' lo yox. ²⁷ Na' goc yejw zil juisyw na' na' betj yegon' gwyechjen liže'na' na' gwyechj be' bdono'. Nach ližen' bebixen gwžiyin'.

²⁸ Na' cate' beyož be' Jesús en' diža' ca', bene' ca' že' na' besyebande' can' bsed blo'eden'. ²⁹ Le can' bzejni'ide' nachbia' nezde' cayanen' nac xbab che Diosen', gague bzejni'ide' can' chosozejni'i bene' ca' chosed chosolo'e ley dan' bzoj da' Moisésen'.

8

Jesúsen' beyone' to bene' che'ede' yižgüe' dan' nzi' lepra
(Mr. 1:40-45; Lc. 5:12-16)

¹ Bene' zan zesyenagüe' Jesúsen' cate' beyetje' ya'ana'. ² Nach to bene' che'ede' yižgüe' dan' nzi' lepra gwbigue' lao Jesúsen' na' bzoa xibe' lagüe'na' gože'ne':

—Xana', še chaclažo' guac yeca'o yižgüe' dan' che'eda'.

³ Nach Jesúsen' bli ne'e na' gwxoen' yichje' na' gože' le':

—Chaclaža' yeyacdo'. Beyaque.

Nach la' beyactie' ca nac yižgüe' dan' che'ede'. ⁴ Nach Jesúsen' gože' le':

—Notno yo'o can' ba beyona' le'. Con gwyej ja'na' bxoza' cont le'ede' bach beyacdo'. Na' bnežjw da' cheyala' gwnežjo' dan' non Moisésen' mandadw cont yeyaco' xilaže' len ley che Diosen'. Ben ca' cont yogo' bene' yesenezde' ba beyacdo'.

Jesúsen' beyone' xmos to soldadw
(Lc. 7:1-10)

⁵ Na' cate' bežin Jesúsen' Capernaum to xan soldadw bene' Roma la' bšagte' le'. Na' gota'yoede' Jesúsen', ⁶ gože'ne':

—Xana', xmosan' die' ližan' chacšenchgüede'. Natsi' cuerp chen' na' chžaglaochgüe'.

⁷ Nach Jesúsen' gože' xan soldadoa':

—Sa'lena' le' na' yeyona'ne'.

⁸ Perw na' xan soldadoa' gože'ne':

—Xana', bitw naca' bene' zaque' par sa'o liža'na'. Ngateze ben mandadw yeyac xmosan' na' yeyaccze'. ⁹ Neda' zoa bene' chnabi'e neda', perw lecze nita' soldadw chia' na' chnabia'gaca'ne'. Cate' chapa' toe': “Gwyej”, na' cheje', na' cate' chapa' yetoe': “Da”, na' chide', na' cate' chapa' xmosa': “Da' nga gono”, na' chonen'. Nan' nezda' con nao' yeyac xmosan' na' yeyaccze'.

¹⁰ Na' Jesúsen' cate' bende' xtiža' xan soldadoa' bebande' na' gože' bene' ca' zjanagüe' le'na':

—Da' licze žia' le'e, ne toze bene' Israel bi'na' šejnilaže'chgüe' neda' ca benga bi naque' bene' Israel. ¹¹ Žia' le'e, bene' zan za'ac doxen yežlion' šjasyenite' txen len da' xozxta'ocho Abraham, Isaac na' Jacob yaban' gan' zoa Diosen' chnabi'e na' yesebi'e cho'a mes yesagüe'. ¹² Na' ca nac bene' nación Israelen' ben' gwlej Diosen' cont yesenite' len le', choj bene' zan bitw yesejnilaže' neda'. Da'nan' sele' legaque' lo' yi' gabil gan' nac chol na' yesebežyaše' na' yesagwxejte laye' dan' yesežaglaochgüe'.

¹³ Beyož gwna Jesúsen' ca' nach gože' xan soldadoa':

—Guac yeyejo'. Yeyaque xmoso'na', con can' chejli'o gac che'.

Na' xmos xan soldadoa' la' beyactede'.

Jesúsen' beyone' taobi'in che Pedroa'
(Mr. 1:29-31; Lc. 4:38-39)

¹⁴ Na' gwyej Jesúsen' liž Pedroa', na' ble'ede' taobi'in che Pedroa' die' yo'e da' la. ¹⁵ Jesúsen' bexue' ne'e na' la' bechojtie' da' lan'. Nach la' gwyste no'olen' bsini'e da' gose'ej gosagüe'.

Jesúsen' beyone' bene' zan
(Mr. 1:32-34; Lc. 4:40-41)

¹⁶ Na' cate' ba gwxin, besežin bene' gan' zoa Jesúsen' zjanči'e bene' zan zjajo'o zjanyaz da' xigüe' yichjlažda'ogaquen'. Jesúsen' con bene' mandadw na' besyechoj da' xigüe' ca'. Lecze beyone' yogo' bene' ca' chesacšene. ¹⁷ Bene'

ca' cont goc can' ža Xtiža' Diosen' dan' bzoj da' Isaías che' cani', žan: "Le'na' yeque'e yela' chžaglaŋo checho na' yeque'e yogo' yižgüe' chechon'."

Can' gož Jesúsen' bene' ca' gosaclaže' yesa'ogüe' le'
(Lc. 9:57-62)

¹⁸ Gwde na' ble'e Jesúsen' ba besežin bene' zan zjanyechjde' le', nach bene' mandaw len bene' ca' zjanaque' le' txen cont yeselague' yešla'a nesdaon'.

¹⁹ Na' bchoj to bene' chsed chlo'ede' dan' bzoj da' Moisésen' nach gwbigue' lao Jesúsen' na' gože'ne':

—Maestrw, sa'lena' le' gate'tez šejo'.

²⁰ Nach gož Jesúsen' le':

—Nita' xišna' beza' na' lecz chesyežin xišna' be dao' ca' zjazoa xil, be chaš le'e yaba, perw bibi xišna' neda' de ga yezi'laža', neda' naca' ben' gwseła' Diosen' golja' benach.

²¹ Na' bchoj yeto ben' naque' Jesúsen' txen na' gože'ne':

—Xana', sa'lena' le' perw za' got xa'. Bešca latje zgua'tec šjaycuaša'ne'.

²² Jesúsen' gože'ne':

—Yo'o len neda'. Bene' ca' zjanac yichjlažda'ogüe' ca che bene' guat, legaque' guacze yosocuaše' yezica'chle bene' guat.

Jesúsen' bcueze' to be' bdono' lo' nisdao'
(Mr. 4:35-41; Lc. 8:22-25)

²³ Beyož be' Jesúsen' diža' ca', gwyo'e lo' barcon' len bene' ca' zjanaque' le' txen. ²⁴ Na' šlac zej barcon' lo' nisen' gwzolao gwyečj to be' bdono' na' nesdaon' leze chas chatan' na' gwzolao cheyož nis lo' barcon', perw ba chtas Jesúsen'.

²⁵ Nach bosyosbane' le' gosi'ene':

—¡Xanto'! ¡Bosla chio'! ¡Bach chbiayi'cho!

²⁶ Nach Jesúsen' gože' legaque':

—¿Bixchen' chžebtecle ca'? ¿Nacxečhen' bi chejle'le chia'?

Na' gwyase' na' gwdile' be' bdonon' len nesdaon', na' la' gosebe'žiten.

²⁷ Na' bene' ca' zjanaque' Jesúsen' txen besyebande' can' bene'na', nach gose' lježgaque':

—¿Noxe benga? lente be' bdono' na' len nesdaon' chosozenaguen che da' že'.

Chope bene' Gadara zjajo'o zjanyaze' da' xigüe'
(Mr. 5:1-20; Lc. 8:26-39)

²⁸ Na' besežine' yešla'a nesdaon' gan' chi' laž bene' Gadara ca'. Na' cate' bechoj Jesúsen' lo' barcoa' bosošag chope bene' le', bene' zjajo'o zjanyaz da' xigüe' yichjlažda'ogaque'. Bene' quinga ba nite' capsantw na' gosacchgüe' bene' znia juisyw len bene' chesyežague' na' gague no chac ta tnez. ²⁹ Na' bososye'e gose'e Jesúsen':

—¿Bixchen' chgoša' chlaže' chio' len neto', Jesús? Naco' dogualje Xi'in Dios. ¿Zao' gwsaco' neto' na'a cate' bina' žin ža si'to' castigw?

³⁰ Na' gała'ze chesaš zan coš chesagwba'. ³¹ Nach da' xigüe' ca' gosata'yoen Jesúsen' gose'en le':

—Še yebejo' neto' yichjlaždao' bene' quinga, gwseła' neto' gan' nita' coš ca' na' ben latje šjajo'oto' yichjlažda'oban'.

³² Nach gož Jesúsen' legaquen:

—Le šjajo'o.

Nach besyechojen yichjlaždao' bene' ca' na' jaseyo'on yichjlaždao' coš ca'. Na' besyeyetjes coš ca' le'e ya'a gan' nita'ban', na' jasełažo'ba' lo' nesdaon' ga gosatba' gose'ejba' nis.

³³ Na' bene' ca' chosoyoe' cošen' besele'ede' dan' ba goquen na' bosyoxonje' jasyeyeže' bene' lagüe' yež yogo' can' ba goquen' na' can' ba besyeyac bene' ca' goso'o gosaz da' xigüen' yichjlažda'ogaquen'. ³⁴ Nach yogo' bene' ca' že' yeža' jasešague' Jesúsén' na' cate' besele'ede'ne' gosata'yoede' le' yeze'e lažgaquen'.

9

Jesúsén' beyone' to bene' bi chda šla'a ni'a ne'e

(Mr. 2:1-12; Lc. 5:17-26)

¹ Nach Jesúsén' beyo'e lo' barcon' len bene' ca' zjanaque' le' txen besyelaque' yešla'a nisdan' par besyežine' Capernaum gan' ba gwzoacze' sša. ² Na' besežin xonj bene' zjanlene' to bene' xinj bene' bi chda šla'a ni'a ne'e, zjanxoe' le' to lo cam dao'. Cate' goche'e Jesúsén' le' gosejnilaže'ne' nach gože' bene' güe'na':

—Bebe xi'ina'. Ba bezi'xena' xtolon'.

³ Na' bal bene' ca' chososed chosolo'ede' dan' bzoj da' Moisésén' gosende' dan' gož Jesúsén' bene' güe'na' na' gosone' xbab lo' yichjlažda'ogaquen' gosene': “Benga chnie' diža' bya' che Dios chne' ca', le chon cuine' ca Dios.” ⁴ Jesúsén' goche'ede' ca' nac da' cheseza'laže', na' gože' legaque':

—¿Bixchen' chza'laže'le ca' lo' yichjlažda'olen'? ⁵ Še yapa'ne': “Ba bezi'xena' xtolo'na',” bi nezele še napa' yela' gwnabia' cont yezi'xena' xtolen'. San še yapa'ne': “Gwyas na' gwda”, na' nachbia' še napa' yela' guac gac can' gwnian'. ⁶ Perw neda' naca' bene' gwsela' Dios golja' benach gwlo'eda' le'e na'a zoa' yežlio nga napa' yela' gwnabia' cont yezi'xena' xtola' benachen'.

Nach gože' bene' xinja':

—Beyas, beyoa' xcamon' na' beyej ližo'.

⁷ Na' beyas bena', beze'e zjayde' liže'. ⁸ Na' bene' ca' besele'ede' can' goquen' besežebchgüe'. Na' gosonxene' Diosén' dan' be'e yela' guac che Jesúsén'.

Jesúsén' gwleje' Mateo cont goque' txen len le'

(Mr. 2:13-17; Lc. 5:27-32)

⁹ Na' Jesúsén' gwdie' latje gan' chi' Mateo chchixjue' impuesto. Na' cate' ble'ede' le' na' gože'ne':

—Da len neda'.

Na' gwzoža' Mateon' gwyejlene' le'.

¹⁰ Ca' goquen' ba chi' Jesúsén' liž Mateon' ba che'ej chagüe' txen len zan bene' güechixjw na' len yebale bene' güen da' xinj na' len bene' ca' zjanaque' txen len le'. ¹¹ Na' bene' fariseo ca' cate' besele'ede' chi' Jesúsén' txen len bene' ca', gose'e bene' ca' zjanaque' le' txen:

—¿Nacxechen' ben' chsed chlo'ede' le'e che'ej chagwlene' txen bene' güechixjw na' yebale bene' güen da' xinj?

¹² Na' cate' Jesúsén' bende' xtiža'gaquen' na' gože' legaque':

—Bene' cbi chesacšene bitw cheseyažjde' bene' güen rmed. Bene' chesacšende', legaquen' cheseyažjde' bene' güen rmed. ¹³ Le šjased bi zeje Xtiža' Diosén' dan' nyojen žan: “Chaclaža' yeyaše' yeži'ilaže'le bene', gague con gotle beyixe' gonxenle neda'.” Gague bene' ba zjanaque' bene' güen len Diosén' zedeneyoeda' cont yesyetinjde' xtolen', san bene' güen da' xinjen'.

Gosenabde' Jesúsén' bixchen' bene' ca' zjanaque' le' txen bi gosone' gwbas

(Mr. 2:18-22; Lc. 5:33-39)

¹⁴ Nach bene' ca' chesone' txen len Juan ben' bzoj bene' nis gosebigue' lao Jesúsén' na' gose'ene':

—Neto' na' len bene' fariseo ca' chonchguato' gwbas, perw bene' ca' zjanaque' le' txen bi chesone' gwbas. ¿Bixchen'?

¹⁵ Nach gož Jesúsén' legaque':

—¿Guac yesezoa bene' yela' güine' bene' chesaxe' to ga chac yela' güešagna' šlac ben' bšagnan' zoalene' legaue'? Še zoa ben' bšagnan' bi gac yesegüine'de'. Perw žin ža cate' bich soe' len legaue', cana'ch yesone' gwbas. Na' ca'cze naquen len neda' na' len bene' ca' zjanaque' neda' txen.

¹⁶ 'Nono zoa bene' chchine' lache' cobe cont yoda' xe' da' de'exo', le lache' coben' yeben' cate' chiben' na' chezan' lache'exon', na' gan' nchezan' gacchen da' xen. ¹⁷ Na' lecze neca zoa bene' chgue'e vino cobe lo' bzod yide'exo', le vino coben' chšon' yide'exon' na' lalje vino na' yesebiayi' chopen. San chesegue'e vino coben' lo' yid cobe cont bitw cuiayi' vinon' len yiden'.

Jesúsen' beyone' xi'in Jairo na' beyone' yeto no'ole bene' gwdane' xe'
(Mr. 5:21-43; Lc. 8:40-56)

¹⁸ Na' ne' choe'te Jesúsen' dižan', bžin to bene' gwnabia' bzoa xibe' lao Jesúsen' na' gože'ne':

—Za' gotte to xi'ina' no'ole. Yo'ošca xoa taco' yichjbe' cont yebambe'.

¹⁹ Na' gwzoža' Jesúsen' na' gwche'e bene' ca' zjanaque' le' txen ja'aclene' bene' gwnabian'. ²⁰ Na' šlac zja'aque' liž bene' gwnabian' zej to no'ole nagüe' legaue', bene' ba goc šižinw iz chzoe' gwbao', na' bene' byen gwbigue' cože' Jesúsen' gwdane' lox xen'. ²¹ Le bene' xbab lo' yichjlažda'ogüen', gwne': "Con še ba gwdana' xen' nach yeyacda'." ²² Na' gwyečhj Jesúsen' ble'ede' no'olen', gože'ne':

—Bendiplažo' xi'ina'. Ba beyacdo' dan' chejnilažo' neda'.

Na' la' beyactede'.

²³ Cate' bžin Jesúsen' liž bene' gwnabian' na' ble'ede' bene' zan zjaže' chesone' sšag chesebežchgüe' na' ba nita' bene' chosocuež bžejo par yosocuaše'be'. ²⁴ Na' gože' legaue':

—Le yechoj ngale. Bi' no'ole daon' bina' gatbe', san chtasben'.

Na' bene' ca' bosoxiže' gosonle' che'. ²⁵ Na' beyož bešaše' yogo'lol bene' ca', nach gwyo'o Jesúsen', bexae' taca' bi' no'ol guaten', na' beyasbe'. ²⁶ Na' ca' nac yela' guac dan' ben Jesúsen', gwxxoa diža' chen yogo' yež dan' zjachi' do na'.

Jesúsen' beyone' chope bene' lchol

²⁷ Cate' beza' Jesúsen' len bene' ca' zjanaque' le' txen, ja'aclen chope bene' lchol legaue' na' gosene' žižje:

—Le' naco' xi'in diaža che da' rey David, beyaše'laže'šca neto'.

²⁸ Na' cate' Jesúsen' len bene' ca' zjanaque' le' txen besežine' yo'o gan' zjanite' na' besyeyo'e, na' lecze goso'o bene' lchol ca'. Nach Jesúsen' gože' legaue':

—¿Chejle'le guac gona' cont yele'ele?

Nach gose'ene':

—Chejle'to' Xanto'.

²⁹ Nach Jesúsen' gwdane' yejlaogaquen', na' gože' legaue':

—Yele'ele, le chejnilaže'le neda'.

³⁰ Nach besyeyac yejlaogaquen' besyele'ede'. Na' Jesúsen' gože' legaue' bicze yeso'e diža' can' goc besyeyac yejlaogaquen'.

³¹ Na' besyeya'aque' na' gate'tez ja'aque' doxen distritw Galilean' goso'e diža' ca' nac dan' ben Jesúsen' len legaue'.

Jesúsen' beyone' to bene' bi goc nie'

³² Na' cate' besyeya'ac bene' ca', la' besežinte bene' yoble zjanči'e to bene' bi goc nie', na' yo'o yaz da' xigüen' yichjlažda'ogüen'. ³³ Jesúsen' bebeje' da' xigüen' na' la' benete bena'. Na' bene' zan besele'ede' can' goquen' besyebanchgüede', na' gosene':

—Chio' bene' Israel, da' nechon' za' ble'echo yela' guac dan' nac ca'.

³⁴ Perw na' beñe' fariseo ca' gosene':

—Satanás dan' nac xan da' xigüe' ca' chaclenen le' cont chebeje' da' xigüen' zjajo'o zjanyaz yichjlaždao' beñe'.

Jesúsen' cheyaše' cheži'ilaže'de' beñachen'

³⁵ Na' Jesúsen' len beñe' ca' zjanaque' le' txen ja'aque' to to yež na' to ciuda da' zjachi' do na' bzejni'ide' beñe' Israel lo' yodao' čhegaque' ca', gwdixjue'ede' diža' güen can' nabia' Diosen' yichjlaždao' beñe' yosozenag čhe'. Na' Jesúsen' beyone' beñe' ca' chese'e bite'teze yižgüe' na' bite'teze da' chesac čhegaque'. ³⁶ Na' ble'ede' ba besežag beñe' zan na' beyaše' beži'ilaže'de' legaue', le gocbe'ede' chesacžejlaže' nac yesone' na' gague no zoa yesaclen legaue' len yogo' dan' chesežaglaogüe'. Nite' ca nita' no xila' be nono de gwyoe legacba'. ³⁷ Nach gože' beñe' ca' zjanaque' le' txen:

—Chyažje beñe' zan yeseyixjue'ede' xtiža' Diosen', perw to čhoga beñe' nita' yeseyixjue'eden'. Na' beñe' yosozenague' čhe Diosen' zjazaca'lebe' ca to coseš xen da' chyažjen yedoben. ³⁸ Da'n'an' le nabe Xancho Diosen' sela'che' beñe' yesaclene' chio' yotobcho coseš čhen'.

10

Jesúsen' gwleje' beñe' šižinw ca' gosaque' txen len le'

(Mr. 3:13-19; Lc. 6:12-16)

¹ Jesúsen' botobe' beñe' šižinw ca' zjanaque' le' txen na' bnežjue' legaue' yela' gwnabia' cont besyebje' da' xigüe' lo' yichjlaždao' beñe', na' cont besyeyone' beñe' bite'teze yižgüe' da' chese'ede' na' bite'teze da' chesac čhegaque'.

² Quinga zjale beñe' šižinw ca': Simón ben' lecze le' Pedro ben' goque' beñe' blao, na' Andrés beñe' biše' Pedroa', na' xi'in Zebedeon' Jacobo len Juan, ³ na' Felipe, na' Bartolomé, na' Tomás, na' Mateo ben' goc beñe' güechixjw, na' Jacobo xi'in Alfeo, na' Lebeo ben' lecze le' Tadeo, ⁴ na' Simón ben' ben' txen len partidw cananista, na' Judas Iscariote ben' bdie' Jesúsen' lo' na' ben' besegue'ede' le'.

Jesúsen' gwsele' beñe' šižinw ca' jasedixjue'ede' xtiža' Diosen'

(Mr. 6:7-13; Lc. 9:1-6)

⁵ Na' Jesúsen' gwsele' beñe' šižinw ca' jasedixjue'ede' xtiža' Diosen', gože' legaue':

—Bitw šejle laž beñe' cbi zjanaque' beñe' Israel, na' neca šejle yež ca' zjachi' distritw Samaria. ⁶ Le šja'ac gan' že' beñe' Israel beñe' ba zjambiyi' dan' bitw na' yesombi'e Diosen'. ⁷ Le šja'ac le šjatixjue'ede' ba bžin ža Diosen' ben' zoa yaban' nabi'e yichjlaždao' beñe' yosozenag čhe'. ⁸ Le yeyon beñe' chesacšene, le yeyon beñe' ca' chese'e yižgüe' dan' nzi' lepra, le yosban no beñe' ba gosat, na' le yebej da' xigüe' ca' zjajo'o zjanyaz lo' yichjlaždao' beñe'. Diosen' bibi bchixjue' le'e da' ba beñe' le'e yela' guac čhen' cont gonle da' quinga, da'n'an' le gaclen beñe' na' bibi gwčhixjwlene'.

⁹ Bitw gua'le mechw de oro, de plata o de cobre šlac co'ole nez. ¹⁰ Na' neca gua'le bzod, o yeto xcamisle, neca gua'le yel, na' neca goxe'le xis da' gwčhiše'le. Ca nac le'e chonle xšinan' zaca'le par gon beñe' da' ye'ej da' gagwle gan' sela' le'ena'.

¹¹ Na' gate'tez ciuda o yež ga žinle, le nab še zoa to beñe' güen beñe' yebede' gwlebe' le'e ližen'. Na' še gwlebe' le'e, na'teze soale. Cate'ch žin ža šejle ga yoble, cana'ch yeza'le. ¹² Na' cate' žinle liže'na', le gwguape' tiox, na' le nabraže' soa cueze' binlo len yichjlažda'ogüe'. ¹³ Na' še nita' beñe' chesaclaže' yesezoa yesebeze' binlo len yichjlažda'ogaquen', na' gac can' gwñabraže'le par yesezoa

yesebeze' binlo. Perw še nono zoa bene' chesaclaže' yesezoa yesebeze' binlo len yichjlažda'ogaque', bi gac dan' ba gwṇablaže'len'. ¹⁴ Na' še zoa ga bi yosolebe' le'e neca yosozenague' chele, cate' yeza'le na', le cuibe ni'alen' yo bište cont nacia' bi checa'ale chegaque'. ¹⁵ Da' mal xen goson bene' ciuda Sodoma na' bene' ciuda Gomorra cani', perw da' li žia' le'e, cate' žin ža gac juisyw bene' ca' bi bosolebe' le'e ližen' yesale'chde' clcl ca bene' Sodomān' na' bene' Gomorran'.

Gac da' saca'zi'cho

¹⁶ 'Neda' sela' le'e šjatixjue'ele xtižan' len bene' ca' chesegue'ede' le'e. Zaca'leble ca xila' dao' ben' chja'ac gan' že' beco'yo. Da'nān' cheyała' gacle bene' yo'ochgua xbab na' bene' xenlaže' len legaque'. ¹⁷ Le gwsaca' len bene' ca' chesegue'ede' le'e. Nita' bene' yesone' le'e lo na' bene' gwnabia' ca' cont yesot yeseyine' le'e lo' yodao' chegaquen'. ¹⁸ Nach lecze dan' chejnilaže'le neda' nita' bene' yeseche'exoxje' le'e do lao rey, do lao nochle bene' gwnabia'. Na' can' güe'lenle legaque' xtižan', lecze can' güe'lenle xtižan' len bene' bi zjanaque' bene' Israel. ¹⁹ Perw cate' yesezene' le'e na' yeseche'e le'e lao bene' ca', bi cuec yichjle nac yoži'ile xtiža'gaquen' o nacle nale. Lo hor na'teze Diosen' gwzejni'ide' le'e bin' cheyała' nale. ²⁰ Le gague le'eczen' nele, san Spiritw che Xacho Diosen' gonen ga nale bin' cheyała' nale.

²¹ 'Cana' bal' beṇačh yesechje' yesone' bene' biše' golje' lo na' bene' yesote' legaque', na' nita' bene' yesone' xi'ingaque' lo na' bene' yesot legacbe', na' nita' bene' yesone' xaxne'e lo na' bene' yesote' legaque'. ²² Yogo'ze bene' yeseque'ede' le'e dan' chejnilaže'le neda', perw note'tez le'e gwyo gwchejlaže'le cont bi cuejyichjle dan' chejnilaže'le neda' žinten gatle, nach šjayzoale len Diosen'. ²³ Še bene' že' to yež yosyolague' le'e, le yeza'teze na' yeyejle ga yoble. Biṇa' yeyož šjatixjue'ele xtižan' yogo' yež gan' že' bene' Israel ca' cate' yida' da' yoble, neda' naca' ben' gwsela' Diosen' golja' beṇačh.

²⁴ 'Ca nac cate' to bene' chsede' len to maestrw, bitw nācho naque' bene' blaoch ca maestroa'. Na' to mos bitw naque' blaoch ca xānen'. ²⁵ Con cheyała' chazlaže' ben' chseda' še yežinlaže' gague' ca maestrw che' na' cheyała' chazlaže' mosen' še yežinlaže' gague' ca xānen'. Neda' naca' Xānle, na' bene' chesegue'ede' neda' chesene' chona' txen len Beelzebú dan' nac xān yogo' da' xigüe', na' naquechxe yesene' che le'e nacle neda' txen.

*Cheyała' žebcho castigw dan' gon Diosen' che bene' güen da' xinj
(Lc. 12:2-9)*

²⁶ 'Bitw žeble bene' bite'teze da' yesonde' le'e, le bitwbi de da' ngaše' da' nācho cbi gwlo'elaon, neca de da' nono na' neze da' nācho cbi yeseṇezden'. ²⁷ Da' zan dan' chsed chlo'eda' le'e dan' bi chsed chlo'eda' yezica'chle bene'. Na' le'e le gwsed le gwlo'en yogo'lol bene', na' le gon cont bene' zan yesejni'iden'. ²⁸ Bitw cheyała' žeble bene' ca' yesot le'e. Legaque' bitw gac bi yesonde' yichjlažda'olen'. Cheyała' žeble Diosen', le len' nape' yela' gwnabia' cont gwžiaye'e cuerp chelen' len yichjlažda'olen' lo yi' gabilen'.

²⁹ 'Nezecho byine dao' ca' bitw bi zjazaca'tecba', perw bitw nācho toba' gat sin cbi güe' Xacho Diosen' latje. ³⁰ Na' ca nac chio', chaquechgüe Diosen' chio' na' neztede' bal' yiša' yichj to tocho žia. ³¹ Da'nān', bitw žeble, le zaca'chle clcl ca zan byiṇ dao' ca'.

*Cheyała' güe'cho diža' len bene' ye'cho legaque' nombia'czcho Jesucriston'
(Lc. 12:8-9)*

³² 'Na' note'teze bene' še cho'e diža' len beṇačhen' che'ene' chejle'e chia', lecze ca' neda' gua' diža' len Xa' ben' zoa yaban' yapa'ne' bena' naque' neda' txen.

³³ Na' note'teze bene' še cho'e diža' len benačhen' che'ene' bitw chejle'e chia', lecze ca' neda' gua' diža' len Xa' ben' zoa yaban' yapa'ne' bena' bi naque' neda' txen.

Yesedile bene' neche dan' bid Jesúsén'
(Lc. 12:51-53; 14:26-27)

³⁴ Bitw gonle xbab bene' že' yežlio nga yesezoa yesebeze' binlo len lježgaque' na'aba bida'. Bitw yesezoa yesebeze' binlo san yesedile'. ³⁵ Lagüe dan' ba bida' yesedil bene' byo len xe' na' no'olen' len xne'e, na' yesedil xo'oliž no'ole len le'. ³⁶ Bene' lo' yo'oze yesegue'e lježe'.

³⁷ 'Note'tez bene' še chaquechde' xe' o xne'e clél ca chacde' neda', bitw zaque' gone' txen len neda'. Lecze ca' še chaquechde' xi'ine' clél ca neda' bitw zaque' gone' txen len neda'. ³⁸ Na' note'teze' še bi chzenague' chia' lagüe' dan' chacde' yosoči yososaca' bene' le', bitw zaque' cont gague' neda' txen še ca'. ³⁹ Note'teze bene' chacde' gone' cont bi či saque' o cont nono yesot le', benan' cuiayi'. Na' note'teze bene' chzanlaže' cuine' saca'zi'e o gate' ne chia' neda, ba de yela' mban che' toli tocaņe.

Bene' ca' yesenita' mbalaz cate' yesyežine' yaba
(Mr. 9:41)

⁴⁰ 'Note'teze bene' chosolebe' le'e chosolebe' neda', lecze chosolebe' Dios ben' gwsele' neda'. ⁴¹ Na' note'teze bene' yebede' gwlebe' bene' cheso'e xtiža' Diosen', mbalaz soe' cate' yežine' yaban' lecze ca' mbalaz soa ben' cheso'e xtiža' Diosen'. Na' mbalaz gac che bene' ca' cheson can' chazlaže' Diosen' caten' yesyežine' yaban'. Na' note'teze bene' yebede' gwlebe' legaque' da' chesone' can' chazlaže' Diosen', lecze mbalaz soe' caten' yežine' yaban'. ⁴² Note'teze bene' gwnežjue' la' to xiga'ze nis ye'ej bene' chejniłaže' neda', la' gwnežjuen' bene' bi naque' bene' blao, da' licze gona' cont soe' mbalaz caten' yežine' yaban'.

11

Juanna' gwsele' chope bene' zjanaque' txen len le' gan' zoa Jesúsén'
(Lc. 7:18-35)

¹ Cate' beyož ben Jesúsén' mandadw can' yeson bene' šižinw ca' gwleje' cont gosaque' le' txen, beze'e latjen'. Na' gwyeje' yež ca' zjachi' do na' jased jalo'ede' xtiža' Diosen' len bene' ca' že'na'.

² Juanna' ben' bzoe' bene' nis, cana' ba die' ližya. Na' bende' diža' che yogo' dan' chon Criston' ben' gwseła' Diosen' cont yedenabi'e. Nach Juanna' gwsele' chope bene' zjanaque' txen len le' gan' zoa Jesúsén', ³ jaseže'ne':

—¿Len' naco' ben' chbezto' seła' Diosen', še cheyala' cuezchto' yid bene' yoble?

⁴ Nach Jesúsén' gože' legaque':

—Le šjaya'ac na' le šjayež Juanna' doxen da' ca' ba ble'ele na' da' ca' ba benele. ⁵ Ba ble'ele chona' cont chesyete'e no bene' lchol, na' chesyeda no bene' zjanxinj ni'e. Na' lecze bene' gose'e yižgüe' dan' nzi' lepra besyeyacde', na' chesyeyene no bene' cuež. Ba ble'ele bosbana' no bene' guat, na' ba benele choa' diža' güen chia' len bene' yaše' ca'. ⁶ Mbalaz zoa bene' chejle'e chia' na' bi chdebde'.

⁷ Na' cate' besyeya'ac bene' ca' zjanaque' txen len Juanna', nach Jesúsén' be'lene' bene' ca' zjandoben' xtiža' Juanna', gože' legaque':

—¿Nacxe nac ben' jale'ele latje dašen'? ¿Chaque' quil ca'ale? Bi naque' ca'.

⁸ ¿Nac naque' caten' jale'elne'? ¿Nyaze' lache' šagüe'? ¿še bitw? le bene' zjanyaz lache' šagüe' nite' yo'o güenchgua ca no liž bene' gwnabia'. ⁹ ¿Noxen' jale'ele?

¿to ben' choe' xtiža' Diosen'? Da' li cho'e xtiža' Dios, perw žia' le'e, zaca'che' ca note'teze beṇe' choe' xtiža' Diosen'. ¹⁰ Che benga nyojen le'e Xtiža' Diosen', žan:

Neda' Dios seḷa' to beṇe' cuialagüe' laguo' güe'e xtižon' cont cate' šejo' ba zjanita' beṇe' yosozenague' čhio'.

¹¹ Da' li žia' le'e notoch no beṇač ṇa' soa beṇe' naquech beṇe' blao ca Juanna' ben' bzoe' beṇe' nis. Perw na' note'tez beṇe' chzenague' che Diosen' cont ṇabia' Diosen' yičhjažda'ogüen', la'czla' naque' beṇe' la'zelagüe beṇe' bibi zaca', ba chejni'ichde' čhia' clal ca Juanna'.

¹² 'Gwzolaon caten' Juanna' gwdixjue'ede' xtiža' Diosen' na' bzoe' beṇe' nis na' chžinten ṇa'a, beṇe' zan chesone' ga zelao chesezaquede' cont ṇabia' Diosen' yičhjažda'ogaque'. ¹³ Na' lecz gwzolaon cani'te bžinten cate' bla' Juanna' gwdixjue'ede' xtiža' Diosen', ley dan' bzoj da' Moisés na' dan' bosozoj yezica'chle beṇe' goso'e xtiža' Diosen' bzejni'in chio' che yela' gwnabia' che Diosen'. ¹⁴ Na' Xtiža' Diosen' dan' nyojen žan yid yeto beṇe' yedeyene' can' ben Elías ben' be' xtiža' Diosen' cani'. Che Juanna' žan ca', con še šejle'le. ¹⁵ Le'e žia nagle da' chene, le gwzenag xtiža'na'.

¹⁶ '¿No gwsaca'lebda' le'e zoale ṇa'a? Gwsaca'lebda' le'e ca bidao' dan' bicze bi chlebele. Nacle ca bidaon' nita' gan' chac ya'a chese' lježbe': ¹⁷ "Ba bcuežto' bžejo, ṇeca bya'ale, na' ba bilyaše'to', ṇeca gwchežle." ¹⁸ Juan ben' bzoe' beṇe' nis bide' laole nga, bitw güe'ej gwdagwšagüe' can' chese'ej chesagw beṇe' yoble, nach gwnale che': "Yo'o yaz da' xigüen' yičhjažda'ogüe'." ¹⁹ Na' neda', Diosen' gwsele' neda' golja' beṇač, na' chle'ele che'ej chagua' can' chese'ej chesagw beṇe' yoble, na' žale čhia' naca' beṇe' lia na' beṇe' borrašw. Na' lecz žale čhia' naca' xmigw beṇe' güe'chixjw ca' na' xmigw yezica'chle beṇe' güen da' xinj. Perw nacbia' yela' sina' che Diosen' dan' napto' naquen da' güen, le ba ble'eczele can' chon neto' napton'.

Yež ca' gan' bitw bosozenague' che Jesúsén'
(Lc. 10:13-15)

²⁰ Nach Jesúsén' be'e xtiža' beṇe' ca' že' yež ca' gan' bene' da' zan da' zaca' yesyebande', na' gwdile' legaque' dan' bitw besyetiṇjde' xtoḷa'gaquen'. Nach gwne':

²¹ —¡Nyaše'chguaze gac che le'e beṇe' Corazín! ¡Nyaše'chguaze gac che le'e beṇe' Betsaida! Beṇe' ca' nita' Tiro na' Sidón ba besyetiṇjde' xtoḷa'gaque' šaca' blo'egacda'ne' yela' guac čhia' ca dan' ba blo'eda' le'e. Na' bosose'e ca gosone' šaca' bena' ca', chesazlje' to lache' gasj da' naquen zeše' na' chosože'elja cuine' no de cont yesacbe'e beṇe' ba boša' yičhjažda'ogaquen'. ²² Žia' le'e, saca'zi'chle clal ca beṇe' že' Tiro na' Sidón cate' žin ža gac juisyw. ²³ Na' le'e nita'le Capernaum chonle xbab šeca Diosen' gone' gacxenchgualé cate' yežinle yaba gan' zoe'na'. Bi gone' ca', san seḷe' le'e lo yi' gabil. Šeca' bena' da' zaca' yesyebane beṇe' ca' gwnita' Sodoman' can' ba bena' laole nga, zesyetiṇjde' xtoḷa'gaquen', na' ṇe' chi' ciudan' šeca'. ²⁴ Žia' le'e, gale'chle clal ca beṇe' Sodoman' cate' žin ža gac juisyw.

Bene' ca' yesejnilaže' Jesúsén' nite' mbalaz
(Lc. 10:21-22)

²⁵ Nach Jesúsén' boḷ güiže' Diosen', gwne':

—Xa', le' naco' Xan yežlio nga na' Xan yaba, chnabi'o doxen. Na' chona' yela' choxcen chio' ba bzejni'ido' bal beṇe' diža' güen chio' quinga. Bzejni'ido' beṇe' ca' gosacbe'e cheseyažjde' no gwsed gwlo'e legaque'. Na' bitw bzejni'ido'

beñe' ca' cheson xbab zjanaque' beñe' sina' na' beñe' zjanejni'i. ²⁶ Beno' ca' Xa', le can' gwnalažo'.

²⁷ Na' gože' beñe' ca' že'na':

—Xan' ba bene' lo na' gona' cont chombia' beñe' le'. Le' nombia'yane' neda', na' neda' nombia'yaña' le'. Na' beñe' ca' ba gwleja' ba zjanombi'e Xan'. Na' noch no zjanita' beñe' zjanombi'e Xan', ne neda' ca' zjanombi'e. ²⁸ Le'e chjaxaque'laže'le na' chacyaše'laže'le da' chaquele nac gonle cont soale binlo len Diosen', chata'yoeda' le'e, le šejnilaže' neda'. Neda' gona' ga soale mbalaz. ²⁹ Le gwzenag chia' na' gwzejni'ichda' le'e. Neda' naca' beñe' xenlaže' na' beñe' šagüe' na' gona' ca soale mbalaz lo' yichjlažda'olen'. ³⁰ Dan' žia' cheyała' gonle bitw naquen zed, na' can' chsed chlo'eda' bitw naquen zdebe.

12

Ža che Dios beñe' ca' zjanaque' Jesúsen' txen goselechje' trigon' da' gosagüe'
(Mr. 2:23-28; Lc. 6:1-5)

¹ Ca tiempen' gozac to ža che Diosa' cate' Jesúsen' gwdie' len beñe' ca' zjanaque' le' txen gan' nyaž trigw. Nach beñe' ca' gosedone', na' goselechje' dao che trigon' cont gosagüe' xsenna'. ² Na' besele'e beñe' fariseon' can' gosone', na' gosi'e Jesúsen':

—Gwnašč ¿bixchen' beñe' ca' zjanaque' le' txen chesone' žin da' bi de lsens goncho ža che Dios?

³ Na' Jesúsen' gože' legaque':

—¿Biña' gwlable can' ben da' rey Davin' to ža cate' le' na' beñe' lježe' ca' gosedone'? ⁴ Gwyo'o Davin' ga nac liž Dios na' gwdagüe' yetextil da' nac che Dios da' bi chac gagw beñe' bi nac bxož, na' lecze bnežjue' che beñe' zja'ac len le'. ⁵ Na' ¿biña' gwlable le'e ley dan' bzoj da' Moisés gan' žan bxož ca' chesoncze' mandadw che yodao' blaon' yogo' ža che Diosen'? Na' bitw nacho zjanape' doła' dan' chesone' žin ža che Diosen'. ⁶ Žia' le'e, neda' zoa' nga zaca'cha' clal ca yodao' blaon'. ⁷ Xtiža' Diosen' dan' nyojen žan: “Chaclaža' yeyaše' yeži'ilaže'le beñe', gague con gotle beyixe' par gonxenle neda'.” Šaca' chejni'ile bi zejenna' žan ca', bilja nale beñe' quinga zjanape' doła', le bibi da' mal chesone'. ⁸ Žia' le'e, naquen' lo na' nia' bi da' nac güen goncho cate' nac ža che Diosen', neda' naca' ben' gwseła' Diosen' golja' beñach.

Beyac to beñe' nxo'on šla'a taque'

(Mr. 3:1-6; Lc. 6:6-11)

⁹ Na' cate' Jesúsen' beze'e latjen', na' gwyo'e to lo' yodao' che chio' beñe' Israel. ¹⁰ Na' lo' yodaon' zoa to beñe' nxo'on šla'a taque', nach beñe' fariseo ca' gose'e Jesúsen':

—¿De lsens yeyoncho beñe' xinj ža che Diosen'?

Gose'ene' ca' cont de da' yosode'ede' yesagüe' xya.

¹¹ Nach Jesúsen' gože' legaque':

—Še nita' xila' dao' chele na' lažo' toba' to lo' yechw zitjw ža che Diosen' cate' bi de lsens goncho žin, ¿cbi la' yebejteleba' lo' yechon' lo žana'? ¹² Da'na'na' žia' le'e de lsens gaclencho beñe' ža che Diosen'. Le zaca'ch to beñe' clal ca to xila' dao'.

¹³ Nach Jesúsen' gože' ben' nxo'on taque'na':

—Bli naon'.

Na' blien' na' taquen' beyaquen binlo can' nac dan' yešla'a. ¹⁴ Nach beñe' fariseo ca' besyežaše' yodaon' na' bosoxi'e nacle yesone' yesote' Jesúsen'.

To dan' bzoj da' Isaías che Jesúsen'

15 Gocbe'e Jesúsen' can' bosoxi'a bene' fariseo ca' na' gwze'e gwyeye' ga yoble. Bene' zan ja'aclene' le', nach beyone' yogo' bene' ca' chesacšene. 16 Na' bene' mandadw nono yeso'lene' diža' non' beyon legaque'. 17 Bene' ca' cont goc can' ža Xtiža' Diosen' dan' bzoj da' Isaíasen', žan:

18 Bengan' naque' xmosa', ben' gwleja' cont gone' can' chazlaža'.

Chacchgüeda' le', na' chbeda' che'.

Na' neda' sela' Spiritw chian' soateze soan len le'.

Na' chixjue'ede' yogo' lo' bene' can' chazlaža' yesone'.

19 Bitw gacyože' len bene', neca yosye'e,

na' neca nie' zižjo lo nez cont yesene bene' bin' že'.

20 Bi gwzoe' ca' ale bene' chesejnlaže' le' late' lasze.

Soe' gaclene' legaque'.

Nach žin ža gone' cont gac con da' zej to licha lo yežlion'.

21 Na' bene' že' yogo' naciōnna' yesebeze' gaclene' legaque'.

Gosene' Jesúsen' bebeje' da' xigüe' len yela' guac che Beelzebú

(Mr. 3:19-30; Lc. 11:14-23; 12:10)

22 Na' zoa to bene' lcho' na' neca goc nie', na' yo'o nyaz da' xigüe' yichjlažda'ogüe' na' jasesane'ne' lao Jesúsen'. Na' Jesúsen' bebeje' da' xigüen' yo'o nyaz yichjlaždao' ben' na' la' bele'etede' na' gocte benie'. 23 Na' yogo' bene' ca' besele'ede' can' goca' besyebanchgüede'. Nach gose'e lježe':

—¿Nac benga ben' chbezcho yide' lao diaža che da' rey David?

24 Perw cate' bene' fariseo ca' gosende' diža' quinga gosene':

—Bitwbi yela' guac nap benga. Le Beelzebú dan' nac xan da' xigüe' ca' chaclenen le' cont chebeje' da' xigüe' zjayo'o zjanyaz yichjlaždao' bene'.

25 Gocbe'e Jesúsen' can' goson bene' fariseo ca' xbaben', nach gože' legaque':

—Note'teze gobiern še choje' chop šon cuen na' yeyoža' yesedile' legacze', cuiayi' gobierna'. Na' lecze še bene' že' bite'teze yež yesaque' chople na' yesedile' legacze', lecze bi sibia' yež chegaquen' še ca'. Na' še bene' lo' bite'teze yo'o yesechoje' chople na' yesedile' legacze', gague sša yesenite' txen. 26 Lecze ca' še Satanásen' yebejen yeto da' xigüe' yo'o nyaz yichjlaždao' bene', cuiayi' yela' chnabia' chen, le chdillen cuinen še ca'. 27 Le'e žale Beelzebún' chaclenen neda' cont chebeja' da' xigüe' ca'. Šaca' naquen can' žalen', lecze zejen Beelzebú dan' chnabia' da' xigüen' chaclenen bene' lježle chesybeje' da' xigüe' zjayo'o zjanyaz yichjlaždao' bene'. Na' bene' lježle ca'ze chosolo'e clelen' chnele.

28 Spiritw che Diosen' chonen neda' yela' guac cont chebeja' da' xigüe' ca', na' da' chona' ca' chlo'en ba bžin ža nabia' Diosen' yichjlaždao' bene' yosozenag che'.

29 '¿Nac gac šo' bene' gwban liž to bene' gual na' que'e bi da' de che' še bi zgua'tec gwcheje' bene' guala'? Lete gone' ca' nach gac que'e bi da' de che'.

30 Bene' bi chone' neda' txen, chone' contr neda'. Na' bene' bi chaclene' cont yosozenag bene' yoble chia', zeje diža' chone' par bi yosozenague' chia'.

31 'Da'nán' žia' le'e, yogo' da' xinj da' chon beñach, na' yogo' diža' bya' dan' chesene' che Diosen', Diosen' yezi'xene' chen, perw note'teze bene' chne' yela' ya' che Spiritw che Diosen', gwbat yezi'xen Diosen' che'. 32 Na' note'teze bene' še ne' yela' ya' chia' neda' naca' ben' gwsela' Diosen' golja' beñach, Diosen' yezi'xene' che', perw note'teze bene' še ne' yela' ya' che Spiritw che Diosen', gwbat yezi'xen Diosen' che' na'a na' bate'teze.

Diža' da' güe'cho chlo'en bin' yo'o lo' yichjlažda'ochon'
(Lc. 6:43-45)

³³ 'Ca nac yag frut ca', yag dan' nac yag güen, frut güencze chbian, na' yag da' bi nac yag güen, lecze frut da' bi nac güen chbian. Con can' nac da' chbia to to yaguen' nezecho bi yaga'. ³⁴ Na' ca'czen' nac len le'e nacchgualē beñe' zgot na' beñe' gwxiye'. Bitw gac güe'le diža' šagüe' dan' nacle beñe' laždao' xi'a. Le yogo'te diža' da' chchoj cho'achon', lo' yichjlažda'ocho nan' za'aquen. ³⁵ To beñe' laždao' xilaže' cho'e diža' šagüe', le can' nac lo' yichjlažda'ogüe' nan' cho'e dižan'. Na' to beñe' laždao' xi'a cho'e diža' xi'a, le can' ža lo' yichjlažda'ogüen'. ³⁶ Na' žia' le'e, cate' žin ža gon Diosen' yesežaglao yogo' beñe' cheson da' xinj toli tocañe, cana' yogo'lol beñe' yosodie' cuent che yogo' diža' dan' ba goso'e da' bitwbi zjazacan'. ³⁷ Na' con ca diža' dan' choe'le, Diosen' choglagüen' chele še naple doła' o še bi naple doła'.

Bene' bi bosozenag che Diosen' gosenabe' gon Jesúsēn' to yela' guac
(Mr. 8:12; Lc. 11:29-32)

³⁸ Nach bal beñe' ca' chososed chosolo'e dan' bzoj da' Moisés, na' beñe' fariseo ca' gose'e Jesúsēn':

—Maestrw, chaclaže'to' gono' to yela' guac da' le'eto' cont nezeto' še da' licze Diosa' gwsele' le'.

³⁹ Nach Jesúsēn' gože' legaque':

—Le'e zoale na'a nacchgualē beñe' laždao' xi'a na' ba gwlejyichjle Diosen'. Na' chñable gona' yeto yela' guac da' le'ele cont nezele še Diosa' gwsele' neda', perw bi gona' can' chñablēna', le ba ble'ele da' ca' chona'. Dan' gon Diosen' len neda' cont nezele le'na' gwsele' neda' naquen ca da' bene' len da' Jonás ben' be' xtižen' cani'. ⁴⁰ Cate' za' šej Jonásēn' Nínive, Diosen' bene' cont to bel xen be yo'o lo' nisdaon' gwdebba' le' na' šone ža šone yel gwyo'e lo' le'eban'. Na' ca nac neda', gata' na' gaša', na' yeyoža' šo'a lo' ba šone ža šone yel. ⁴¹ Na' cate' žin ža gon Diosen' cont yogo' beñe' cheson da' mal yesežaglagüe' toli tocañe, žana' beñe' Nínive beñe' ba gosat yedesecuiše' le'e mbanle na'a lao Diosen', le legaque' besyētinjde' xtolen' cate' da' Jonásēn' gwduxjue'ede' xtiža' Diosen' len legaque'. Na' neda' zoa' nga naccha' beñe' blao clēl ca da' Jonásēn', na' bitw chzenagle chia'. ⁴² Na' lecze žana' cate' gon Diosen' cont yogo' beñe' cheson da' mal yesežaglaogüe' toli tocañe, da' no'olen' gwnabia' beñe' Seba ca' yedecuiše' le'e mbanle na'a. Le le'na' gwze'e Seba gan' nac zito'chgua na' bide' nga cont bzenague' diža' sina' dan' be' da' rey Salomón. Na' neda' zoa' nga naccha' beñe' blao clēl ca da' rey Solomónna', na' bitw chzenagle chia'.

Da' xigüen' cheyo'on da' yoble lo' yichjlaždao' beñe'
(Lc. 11:24-26)

⁴³ Na' še to da' xigüe' da' yo'o nyaz lo' yichjlaždao' beñe' yechojen, nach lažen nile nale yeyiljon ga soan mbalaz. Na' še bibi latje želen, nach nan: ⁴⁴ "Da' yoble šjajo'a lo' yichjlaždao' ben' gan' ba gwyo'a." Nach yeyejen da' yoble gan' zoa ben'. Cate' le'en bač beyacde', na' ba zoache' binlo, na' gague no yo'o nyazech yichjlažda'ogüe' da' gwžon yeyo'on da' yoble, ⁴⁵ nach šjaytoben yegaže da' xigüe' da' zjanaquech mal ca len, na' txen yeso'on lo' yichjlažda'ogüen'. Na' še ba gosonen ca', na' gaquech mal che bena' clēl ca goc che' cana'. Can' goc che bena', lecze ca' gac che le'e mbanle na'a dan' nactecle beñe' laždao' mal.

Xna' Jesúsēn' len beñe' biše' ca' besežine' ga zoe'
(Mr. 3:31-35; Lc. 8:19-21)

⁴⁶ Ne' choe'te Jesúsēn' diža' len beñe' quinga, cate' bžin xne'e len biše' ca'. Gosaclaže' yeso'e yesoelene' le' diža' na' beñe' zan nita' lagüe' na'ate. ⁴⁷ Beñe' ca' že' na', toe' gože' Jesúsēn':

—Xna'o len beñe' bišo' ca' zjanite' chyo'o na' chesaclaže' yesoelene' le' diža'.

48 Nach Jesúsen' gože' le':

—¿Nezele no nac xna'a na' no zjanac biše' lježa'?

49 Nach bli ne'e blo'e bene' ca' zjanaque' le' txen na' gože' bena':

—Bene' quinga zjanaque' xna'a na' zjanaque' biše' lježa'. 50 Le note'teze bene' chone' da' chnaláže' Xa' Diosen' ben' zoa yaban', bena' nac bene' biša', bene' zana', lecze naque' xna'a.

13

Jempl che bene' goz trigon'

(Mr. 4:1-9; Lc. 8:4-8)

1 Na' lo žana' gwza' Jesúsen' yo'o gan' zoen' jachi'e cho'a nesdaon'. 2 Nach catec bene' zan juisyw besedobe' gan' chi'en' na' benten byen gwyo'e gwchi'e to lo' barcw. Na' yogo' bene' ca' besedoben' gosenite' cho'a nesdaon' ga nac yo biž. 3 Nach da' zan da' bsd blo'e Jesúsen' legaque' len jempl da' bi'e. Na' be'e to jempl, gwne':

—To bene' güen žin jeze' trigw, 4 na' šlac zej chose' trigon' late' bin che trigw dan' chazen' jasechazen chanez, nach be ca' žia xil be chaš le'e yaba gosagwban'. 5 Yelaten' jasechazen ga nac lo yej ga bibi yotec zoa, na' da' nga byob blan' le bi jasechazen ga nac sitjw. 6 Perw na' cate' bla' gwbiža' na' bzeyen len na' gosebižen, le gague zjajo'otec loenṇa' sitjw. 7 Yelaten' jasechazen ga nac lo yag yeše', na' yag yešen' gosecha'on na' bosololen len. 8 Perw na' yelaten' jasechazen ga nac yo šagüe' na' beselan'. Na' balen' gosebian to gayoa güeje to ton, na' yebalen gosebian gayon güeje, na' yebalen šichoa güeje. 9 Le'e žia nagle da' chene, le gwzenag xtižan'.

Jesúsen' be'e diža' bixchen' bzejni'ide' bene' jempl

(Mr. 4:10-12; Lc. 8:9-10)

10 Nach bene' ca' zjanaque' Jesúsen' txen gosebigue' lagüen', na' gose'ene':

—¿Bixchen' chsed chlo'edo' bene' quinga len jempl?

11 Na' gož Jesúsen' legaque':

—Nono na' neze can' nac yela' gwnabia' che Diosen', na' ba chone' cont le'e chejniláže'lene' nezelen. Perw bi chon Diosen' ca' len bene' bi chesaclaže' yesejniláže'ne'. 12 Note'teze bene' chosozenague' xtiža' Diosen', gwzejni'ich Diosen' legaque' cont šanch dan' yesejni'ide'. Perw na' note'teze bene' bi chosozenague', da' daon' ba zjanезде', yeca'a Diosen' len. 13 Da'nan' chsed chlo'eda' bene' quinga len jemplen', le chesele'ede' dan' chona' perw bitw chesacbe'ede' bi zejen, na' chesende' xtižan' perw bitw chesejni'iden'. 14 Len bene' quinga ba chac can' bzoj da' Isaías, žan:

Da' li yenele, perw bitw šejni'ile bi zeje dan' yenelen'.

Na' da' li le'ele, perw bi gacbe'ele bi zejen dan' le'elen'.

15 Nacle bene' güedenag na' bač natcze yichjlažda'olen'.

Bi chazlaže'le gwzenagle dan' chenele na' dan' chle'ele;

con nacle bene' güedenag.

Šaca' bi nacle bene' güedenag, šejni'ile bi zejen dan' chenele na' dan' chle'ele.

Nach yetinjele xtola'le cont yeca'an na' yocoba' yichjlažda'olen'.

16 'Perw le'e nacle neda' txen, leca mbalaz zoale dan' chle'ele da' ca' chona' na' chacbe'ele bi zejen, na' chzenagle xtižan' na' chejni'ilen. 17 Da' li žia' le'e, zan da' bene' ca' gosoe' xtiža' Diosen' cani' na' zan da' bene' ca' yezica'chle bene' bosozenag che Diosen' cani', gosaclaže'chgüe' yesele'ede' dan' chle'ele na'a, perw bitw goła' yesele'eden'. Na' gosaclaže'chgüe' yesende' dan' chenele na'a, perw bitw goła' yesenden'.

Jesúsen' bzejni'ide' bi zejen jempl che ben' goz trigon'
(Mr. 4:13-20; Lc. 8:11-15)

¹⁸ Na' le gwzenag, quinga zejen jempl che ben' goz trigon'. ¹⁹ Ca dan' byažen zejen xtiža' Dios da' chzejni'i che yela' gwnabia' che'. Na' biñ dan' beselažo' chanezen', zejen bene' ca' chesende' xtiža' Diosen' perw bi chesejni'iden'. Na' ca cheyoža' chžin gwxiyen' chebejen xtiža' Diosen' lo' yichjlažda'ogaquen'. ²⁰ Na' biñ dan' beselažo' ga nac lo yej na' bi ben loen, zjanaquen ca bene' la' chesyebetede' xtiža' Diosen' cate' chesenden', ²¹ perw zjanaque' ca da' bibi loe chontec, šložga chesejle'e che xtiža' Diosen', na' cate' chac bi da' mal chegaquen' o cate' chesegue'e bene' legaque' dan' chosozenague' xtiža' Diosen', la' chesebejyichjte' xtižen'. ²² Na' biñ dan' beselažon' ga nac lo yag yeše', zejen ca bene' ca' ba zjanende' xtiža' Diosen', perw šlac zjambane' chesyela' chesyěžejde' na' da' chesaclaže' yeseni'e chziye'en legaque'. Yogo' da' qui bi choen' latje yega'an xtiža' Diosen' lo' yichjlažda'ogüen', na' da'n'an' bi chesejnilaže' le' ca cheyala'. ²³ Na' biñ dan' beselažo' lo yo šagüe' zejen ca bene' chesende' xtiža' Diosen' na' chesejni'iden' na' chosozenague'. Bañen gosebjan to gayoa güeje, na' yebañen gosebjan gayon güeje, na' yebañen šichoa güeje.

Jempl che trigon' na' yixe'

²⁴ Na' gozoe'len Jesúsen' bene' ca' yeto jempl, goze'e legaque':
—Yela' gwnabia' che Diosen' ben' zoa yaban' zaca'leben ca dan' goquen' cate' to bene' jeze' trigw lo yežlio che'na'. ²⁵ Na' do šeže'le gwyej to bene' chgue'e le' šlac chesetas bene' ca' yezica'chle na' jeze' xsa yixe' gan' ba naz xan yežlion' trigon', nach beze'e. ²⁶ Na' to ši'ize trigon' len yixe' ca' beselan', na' trigon' gwzolao chbian. ²⁷ Na' bene' güen žin che xan yežlion', cate' gosache'ede' nach jaya'aque' gan' zoa xangaque' jasyeyeže'ne': "Bene', žgague biñ trigon' goz yežlio chion? ¿Bixchen' nchixen len yixe'?" ²⁸ Nach xangaquen' gože' legaque': "To bene' chgue'e neda' jen ca'." Nach xmosen' gose'ene': "¿Che'ndo' lažo'to' yixen'?" ²⁹ Na' gože' legaque': "Bitw lažo'len. Le xož lažo'le lente trigon'. ³⁰ Jaseyenna'. Guac yesecha'on txen. Na' cate' ba gole' yotoble cosešen', cana' gona' mandadw zgua'tec lažo'le yixen' na' gonlen manoj cont yeseyen. Nach šjaytoble trigon' co'ošagüe'len."

Yela' gwnabia' che Diosen' naquen ca biñ che xomdas
(Mr. 4:30-32; Lc. 13:18-19)

³¹ Nach gozo'e yeto jempl, gozne':
—Šanch bene' yosozenag che Diosen' cont nabi'e yichjlažda'ogaque'. Da'n'an' yela' gwnabia' che Diosen' ben' zoa yaban' zaca'leben ca to biñ che xomdas dan' goz to bene' yežlio chen'. ³² Biñ che xomdasen' chnabia' nac da' dao' len biñ ca' chazcho. Perw na' cate' chlan' chcha'ochen ca bichle yixe' cuan na' chaquen ca to yag cha'o, nach byiñ dao' ca' chjasen ližda'ogacba' lo xozenna'.

Yela' gwnabia' che Diosen' naquen ca levadura
(Lc. 13:20-21)

³³ Nach gozoe' Jesúsen' yeto jempl, gozne':
—Yela' gwnabia' che Diosen' ben' zoa yaban' zaca'leben ca levadura dan' gwlec no'olen' len to rob yezj cont gwcha'o doxenen.

Jesúsen' bzejni'ide' bene' len jempl
(Mr. 4:33-34)

³⁴ Yogo' da' quinga bsed blo'e Jesúsen' bene' ca' besežag gan' zoe'na'. Bsed blo'ede' legaque' be'e jempl, bitwbi bzejni'ide' legaque' sin ca be'e jempl.
³⁵ Bene' ca' cont goc can' bzoj da' bene' be' xtiža' Diosen' cani', žan:

Gwsed gwlo'egacda'ne' len jempl,
na' yapegaca'ne' dan' nono na' neze da' ba ngaše' cate' gwxcete yežlion'.

Jesúsen' bzejni'ide' bi zeje jempl che trigon' na' yixe'

³⁶ Nach beyož bsed blo'e Jesúsen' bene' ca' zjaže' na', beze'e txen len bene' ca' zjanaque' le' txen jaya'aque' yo'o gan' nite'na'. Na' cate' ba besyeyo'e lo' yo'on' bene' ca' zjanaque' le' txen gosebigue' cuite'na' gose'ene':

—Bzejni'išque neto' bi zejen jempl che trigon' na' yixen'.

³⁷ Nach Jesúsen' gože' legaque':

—Quinga zejen: Diosen' gwsele' neda' golja' beñach na' zaca'lebda' ca ben' goze' biñ che trigon'. ³⁸ Na' doxen yežlio nga zaca'leben ca pedas yežlio gan' goze' trigon'. Na' bene' ca' chosozenague' che Diosen' cont nabie yichjlažda'ogaque' zaca'lebde' ca biñ che trigon'. Na' bene' ca' chosozenague' che Satanás dan' chnabia' da' xigüe' ca' zjazaca'lebde' ca xsa yixen'. ³⁹ Satanásen' zaca'leben ca bene' chxi'a ben' goze' xsa yixen'. Na' žan' gac juisyw zaca'leben ca žan' yosyotobe' trigon'. Na' angl ca' zaca'lebegaque' ca bene' ca' yosyotobe' cosešen'. ⁴⁰ Na' can' šey yixen' yosyotoben', can' gac che bene' ca' chosozenag che Satanásen' cate' žin ža gac juisyon'. ⁴¹ Diosen' gwsele' neda' golja' beñach na' cate' žin ža, neda' sela' angl chia' ca' cont yosyotobe' yogo' bene' ca' chese'go'oyele' bene' yoble yesone' da' mal na' lecze yosyotobe' yezica'chle bene' cheson da' mal. Na' angl ca' yesyebeye' legaque' cont bich yesenite' txen len bene' ca' chosozenague' che Diosen' cont nabie yichjlažda'ogaquen'. ⁴² Nach yesyesele' legaque' lo' yi' gabil gan' yeseye' toli tocanē. Na' yesebežyaše' yesagwxejte laye' tantw yesežaglaochgüe'. ⁴³ Cana'ch Xacho Diosen' gone' cont bene' ca' cheson da' güen nite' len le', le' zjanaque' xi'ine' na' yesaque' ca be'ni' che gwbižen' cate' yesežine' yaban' gan' zoa Diosen' chnabi'e. Le'e žia nagle da' chene, le' gwzenag xtiža'na'.

Jempl che mechw xen dan' ngaše' lo' yo

⁴⁴ 'Yela' gwnabia' che Diosen' ben' zoa yaban' naquen ca to mechw xen dan' ngaše' lo' yo. To bene' bželde' mechw xen da' ngaše' to lo' yežlio. Nach bocuašen' da' yoble lecze na'ze na' chebechgüede' beze'e jayete' yogo'lol bi da' de che' cont gwxi'e yežlion' gan' ngaše' mechua'.

Jempl che to perla da' zaca'chgua

⁴⁵ 'Na' yela' gwnabia' che Diosen' ben' zoa yaban', lecze zaca'leben ca da' nga goc. Zoa to comerciant bene' cha'o perla dan' zjanacchgua xdan. ⁴⁶ Na' bželde' to perla da' leca zacan'. Na' beyote' yogo'lol bi da' de che' na' gwxi'e perlan'. Ca'czen' zaca'lebe bene' ca' chesache'e zaca'chguan yosozenague' che Diosen'.

Jempl che yixjw bel

⁴⁷ 'Na' yela' gwnabia' che Diosen' ben' zoa yaban' zaca'leben ca da' nga goc. Gwnita' bal bene' gwxcen bel na' bosozale' yixjw bel chegaquen' lo' nisdaon' na' gwxcenen zan cuen bel. ⁴⁸ Nach cate' ba gwža' lo' yixjon', besyebeyen' yo biž, na' gosebie' be ca' zjanac güen par yesagüe' na' gosegüe'eba' lo' žome. Na' be ca' bi zjanac güen, gosecho'one'ba'. ⁴⁹ Ca'czen gac che yogo' bene' cate' žin ža te che yežlion'. Angl ca' yesyebeye' bene' mal ca' ladjo bene' ca' zjanaque' bene' güen lao Diosen' ⁵⁰ na' yosozale' legaque' lo' yi' gabil gan' yesebežyaše' na' yesagwxejte laye' dan' leca yesežaglagüe'.

Xtiža' Diosen' dan' byoj cani' len da' chsed chlo'e Jesúsen'

⁵¹ Nach Jesúsen' gože' bene' ca' zjanaque' le' txen:

—¿Zyejni'ile yogo' da' ca' ba blo'eda' le'e?

Nach gose'ene':

—Zyejni'iton'.

⁵² Nach gož Jesúsen' legaque':

—Note'tezle še chac chsed chlo'ele Xtiža' Diosen' dan' byoj cani', še lecze chzenagle can' chsed chlo'eda' che yela' gwnabia' che Diosen', nachen' zaca'leble ca to xan yo'o bene' nape' yogo'lol da' zaca' dan' chyažj chchinde', balen zjanaquen da' cobe na' balen zjanquen da' gole.

Beñe' yež Narzaret bi gosejle'e che Jesúsen'

(Mr. 6:1-6; Lc. 4:16-30)

⁵³ Nach cate' beyož be' Jesúsen' jempl ca', beze'e latjen' len beñe' ca' zjanaque' le' txen ⁵⁴ jaya'aque' laže'. Na' jaysed jaylo'ede' bene' gualaž che' ca' lo' yodao' chegaquen'. Na' leca besyebande' len xtižen' na' gose' lježe':

—¿Ga jasede' yela' sina'? na' ¿nacxečen' chac chone' yela' guac ca'?

⁵⁵ Nombia'chone', le naque' xi'in ben' chonšagüe' yag. Na' xne'ena' lie' María, na' Jacobo, José, Simón na' Judas zjanaque' beñe' biše'. ⁵⁶ Na' lecze beñe' zane' ca' nite' lažcho nga. ¿Nacxe chaquen' cho'e diža' ca' na' chacte' chone' yela' guac?

⁵⁷ Na' dan' gosone' xbab nac Jesúsen' con to beñe' gualaž chegaque', bi gosaclaže' yesejle'e che'. Na' gož Jesúsen' legaque':

—Yogo'ze beñe' chonla'ane' beñe' choe' xtiža' Diosen', perw beñe' gualaž che' na' beñe' lo' yo'o che' bi chesonla'ane' le'.

⁵⁸ Na' to chopze yela' guac ben Jesúsen' Nazareten' dan' bitw gosejle'e che'.

14

Quingan' goc gosote' Juan ben' bzoa beñe' nis

(Mr. 6:14-29; Lc. 9:7-9)

¹ Na' ca tiempen' Herodes ben' naque' gobernador che distritw Galilean', bende' diža' ca nac yogo'lol dan' chon Jesúsen'. ² Nach gože' xmose' ca':

—Bengan' da' Juanna', ben' bzoa beñe' nis. Ba bebane' ladjo beñe' guat ca', da'n'an' chaque' chone' yela' guac.

³⁻⁴ Herodesen' gwne' ca' dan' bene' mandadw gosote' da' Juanna'. Quingan' goc: Herodesen' beque'e Herodías ca xo'ole' la'czla' Herodías naque' xo'ole' beñe' biše' Felipe. Na' Juanna' gože' Herodesen':

—Bi cheyała' soalen no'ol che beñe' bišon'.

Na' dan' gož Juanna' Herodesen' ca', da'n'an' Herodesen' bene' mandadw gosezene' Juanna' na' bosocheje' ni'a ne'e len gden lo' ližya gan' gosegüe'ene'.

⁵ Herodesen' goclaže' gote' Juanna', perw bitwbi bende' le', le gwnezde' beñe' zan chesejle'e Juanna' cho'e xtiža' Diosen', na' bžebe' bi yeson beñe' ca'. ⁶ Perw na' cate' gosone' lñin' ža la Herodesen', bi' no'ol che Herodías bya'abe' lao beñe' ca' ja'ac lñin'. Na' leca bebe Herodesen' can' bya'a no'ol güegon', ⁷ na' bzoe' Diosen' testigw che' gwnežjue'be' bite'teze nabebe' le'. ⁸ Na' gwlo'oyela' xna'ben' lebe' cont gožbe' Herodesen':

—Beñ neda' to lo platw yichj Juan ben' chzoa beñe' nis.

⁹ Ne late'ze bi gwyazlaže' rey Herodesen' gone' can' gož no'ol güegon' le', perw bachle bzoe' Diosen' testigw che' lao beñe' ca' jasa'ac lñin' gwnežjue'be' bite'teze nabebe' le', da'n'an' benšaze' mandadw gac can' gwñabebe' le'. ¹⁰ Ca' goquen' bene' mandadw jasechogue' yen Juanna' lo' ližya gan' yo'ena'.

¹¹ Na' bosožie' yichjen' to lo platw cont bosonežjuen' no'ol güegon' na' lebe' bnežjwben' xna'be'.

¹² Nach beñe' ca' zjanaque' txen len da' Juanna' jasyexi'e cuerp chen' na' jasecuašen'. Gwde na' ja'aque' gan' zoa Jesúsen' jaseže'ne' can' ba goquen'.

*Bguagw Jesúsen' gayo' mil bene'**(Mr. 6:30-44; Lc. 9:10-17; Jn. 6:1-14)*

¹³ Na' cate' bene Jesúsen' can' goc che da' Juanna', beze'e latjen' len bene' ca' zjanaque' le' txen na' besyeyo'e to lo' barcw par ja'aque' to latje daš na' nono nochle ja'aclen legaque'. Perw bene' ca' že' yež ca' zjachi' cho'a nesdaon' cate' gosende' ba zjada Jesúsen', na' gosa'ac lažgaque' ja'aque' yo biž jasešague' Jesúsen'. ¹⁴ Na' cate' bžin Jesúsen' cho'a nesdaon', ble'ede' nita' bene' zan na' beyaše' beži'ilaže'de' legaque'. Na' beyone' yogo' bene' ca' chesacšene. ¹⁵ Na' cate' ba chxoa gwbiž gosebiga' bene' ca' zjanaque' le' txen lagüen', na' gose'ene':

—Zoacho to latje ga bibi de, na' ba nac bagwže' par gagwcho xgüe. Bze bene' quinga diža' cont šjaya'aque' yež dao' ca' dan' zjachi' gała'ze šjasediljue' da' yese'ej yesagüe'.

¹⁶ Nach Jesúsen' gože' legaque':

—Bitw cheyala' šjaya'aque', san le'e güe'elne' da' yesagüe'.

¹⁷ Nach gose'ene':

—Chopga bel ya'a chechon' de na' gayo'ga yetextil dao'.

¹⁸ Nach Jesúsen' gože' legaque':

—Le šjaxin' ni.

¹⁹ Nach ben Jesúsen' mandadw gosebe' bene' zan ca' lo yixyen'. Na' gwxi'e yetextil ca' gayo' na' bel ya'a ca' chope, na' gwne'e yabale be'e yela' choxcen che Diosen', na' bzoxyen' be'en bene' ca' zjanaque' le' txen cont goseyisen' len to to bene' ca'. ²⁰ Na' yogüe' gosagüen' na' goseljde'. Na' bososše'e šižinw žome len yetextil bixjw len late' güeje bel dan' bega'anna'. ²¹ Na' bene' ca' gosagw da' ca' zjanaque' ca do gayo' mil bene' byo, bi cuent no'ol ca' len bidao'.

*Jesúsen' gwze'e lo nesdaon'**(Mr. 6:45-52; Jn. 6:16-21)*

²² Gwde na' Jesúsen' bene' byen besyeyo'o bene' ca' zjanaque' le' txen lo' barcon' cont gosebialagüe' besyelaque' yešla'ale nesdaon' šlac bega'an le' besele' bene' ca' ližgaque'. ²³ Na' beyož besele' bene' ca' ližgaque', gwloe' to lo ya'a jal güiže' Diosen' toze'. Na' cate' goł, toz Jesúsen' zoe' lo ya'an. ²⁴ Na' ca nac barcon' gan' zeseyo'o bene' ca' zjanaque' Jesúsen' txen, ba zejen do gachol nesdaon' nžiga'ses nisen' len dan' chas chata' nesdaon', le ben' chechjen clele. ²⁵ Na' do šbal beyetj Jesúsen' ya'ana' na' gwze'e lo nesdaon' na' ba zejgale' gan' zja'aquen'. ²⁶ Nach cate' besele'ede' le' zeje' lo nesdaon' leca besežebe', na' bososye'e gosene':

—iše da' chda chelen' chle'echo!

²⁷ Na' la' bol güižte Jesúsen' legaque', gože'ne':

—Le gonchach laže'le. Neda'na'. Bitw žeble.

²⁸ Nach Pedroa' gože'ne':

—Xanto', še da' li le'na', ben mandadw sa'a lo nesdaon' yida' gan' zon'.

²⁹ Nach gož Jesúsen' le':

—Da, Pedro.

Na' la' bchojte Pedroa' lo' barcon' gwzolao gwze'e lo nesdaon' zeje' gan' zoa Jesúsen'. ³⁰ Perw na' cate' gocbe'ede' chechjchgua ben', bžebe' na' gwzolao chebe' lo' nisen'. Nach bosye'e, gože' Jesúsen':

—Xana', bosla neda'.

³¹ Na' la' blite na' Jesúsen' bexae'ne', na' gože'ne':

—¿Bixchen' chac chopdo'? Gweyje'le'ch chia'.

³² Nach cate' beyo'o Jesúsen' len Pedroa' lo' barcon', la' gwlezte be'na'. ³³ Na' bene' ca' že' lo' barcon' bosozoa xibe' lao Jesúsen' gosonxene'ne', gose'ene':

—Da' licze len' naco' doguale Xi'in Diosen'.

Jesúsen' beyone' bene' chesacšene ben' nita' Genesaret
(Mr: 6:53-56)

³⁴ Na' goselague' nesdaon' na' besežine' yežlio gan' nzi' Genesaret. ³⁵ Na' cate' bene' Genesareten' besyeyombi'e Jesúsen', goseyise' diža' yogo' yež ca' dan' zjachi' gała'ze cont gosenezde' ba bžin Jesúsen' lažgaque'. Na' bene' ca' že' yež ca' goseče'e yogo' bene' chesacšene lao Jesúsen'. ³⁶ Na' goseneyoede' Jesúsen' gwnežjue' latje yesoxe' la' ch late'ze xni'a xen'. Na' yogo' bene' gosoxen' besyeyaquede'.

15

Diža' mal dan' chchoj cho'achon' chonen cont lažda'ochon' bi naquen xilaže' len Diosen'
(Mr: 7:1-23)

¹ Na' bal' bene' fariseo ca' na' bene' ca' chososed chosolo'e dan' bzoj da' Moisésen' gosa'aque' Jerusalénna' na' besežine' gan' zoa Jesúsen', na' gose'ene':

² —¿Bixčen' bene' ca' zjanaque' le' txen bitw zjana'ogüe' da' cheson bene' gol ca'? ¿Bixčen' cbi chosyone'e zan ni'a cate' za' yesagüe'?

³ Nach Jesúsen' gože' legaque':

—Na' le'e ¿bixčen' chbejyichjle cbi chonle can' ža Diosen' cheyała' goncho san chonxen costumbr chelen'? ⁴ Diosen' none' mandadw can' goncho, gwne': "Le gap bala'an xaxna'le", na' "Note'teze' še chnešaše' len xaxne'e cheyała' gate'." ⁵ Perw le'e žale guaque ye' to bene' xaxne'e: "Bibi de gona' gaclena' le'e, le yogo' da' de chia' ba bnežjuan' lo na' Dios." ⁶ Na' žale bich bi cheyała' gwnežjue' xaxne'en še ca'. Na' dan' žale ca', chzoale ca'ale dan' ža Diosen' na' con na'ole costumbr gole che da' xozxta'ole ca'. ⁷ Le'e nacle bene' gwxiye'. Chonle cayanen' bzoj da' Isaiásen' chele, gan' žan:

⁸ Bene' qui chesonxene' neda' len diža' cho'a, perw bi chesonxene' neda' len lažda'ogaque'.

⁹ Bibi zejen dan' chesonxene' neda',

le dan' chososed chosolo'eden' naquen da' chnalaže' benachze.

¹⁰ Nach Jesúsen' bozoł güiže' bene' ca' zjanžaguen' cont gosebigue' lagüen' na' gože' legaque':

—Le gwzenag da' nga nia' le'e na' le šejni'i. ¹¹ Bitw nacho dan' che'ej chagw benachen' chonen cont lažda'ogüen' bi naquen xilaže' len Diosen'. Perw diža' mal dan' chchoj cho'e, lenna' chonen cont lažda'ogüen' bi naquen xilaže'.

¹² Nach gosebiga' bene' ca' zjanaque' Jesúsen' txen lagüen' gose'ene':

—¿Bi goche'edo' bene' fariseo ca' beseže'e cate' gosende' xtižo'na'?

¹³ Na' gož Jesúsen' legaque':

—Gwžin ža cate' Xa' Diosen' ben' zoa yaban' gwžiaye'e yogo'lol' bene' bi chosozenag che'. Gwžiaye'e legaque' can' choncho cate' chlažo'cho yixe' ca' chesela'ac lo yel. ¹⁴ Jaseye bene' fariseo ca'. Zjanaque' ca' to bene' lchol' bene' che'nde' cue'e nez yeto bene' lchol'. Nezecho to bene' lchol' bitw gac cue'e nez yeto bene' lchol', le txen šjasebixe' to lo' yechw.

¹⁵ Nach Pedroa' gože' Jesúsen':

—Bzejni'isque neto' bi zejen can' gwnaon'.

¹⁶ Nach gož Jesúsen' legaque':

—¿Lencze le'e bitw chejni'ile da' quinga ba gwnia'? ¹⁷ ¿Bi nezele yogo' dan' che'ej chagw benachen' cho'on lo' li'e na' chžin hor cheden? ¹⁸ Perw yogo' diža' dan' chesoe' benachen' chesechojen lo' yichjlažda'ogüen'. Na' še choe' bene' diža' mal, len chonen cont bi nac lažda'ogüen' xilaže' len Diosen'. ¹⁹ Le

lo' yichjlaždao' beṇachen' nan' chchoj yogo' xbab mal cate' žan yesone' da' mal quinga: yesote' beṇe', yesata'lene' no'ol bi nac xo'olgaque' o beṇe' byo bi nac beṇe' čhegaque', na' yesone' gwban, yeso'e diža' güenlaže' čhe lježgaque', na' yeseneye'e čhe beṇe'. ²⁰ Xbab mal ca' chesonen cont bi nac laždao' beṇe' xilaže' len Diosen', gague dan' bi chone'e zan ṇi'a cate' za' gagüe'.

To no'ole bi naque' beṇe' Israel chejnilaže' Jesúsen'

(Mr: 7:24-30)

²¹ Beza' Jesúsen' latjen' len beṇe' ca' zjanaque' le' txen jaya'aque' distritw Galilea gala'ze gan' mbane ciuda Tiro na' ciuda Sidón. ²² Na' to no'ole zoa do na', ben' bi naque' beṇe' Israel, gwze'e laže' cont bžine' gan' zoa Jesúsen' na' jašague'ne'. Na' gwṇe' zižje, gože'ne':

—Xana', le' naco' xi'in diaža čhe da' rey David. Beyaše'sque neto'. To bi' no'ol chia' yo'o nyaz da' xigüe' yichjlažda'obe' na' leca chžaglaobe'.

²³ Perw Jesúsen' bitw boži'e xtiža' no'olen'. Nach beṇe' ca' zjanaque' Jesúsen' txen gosebigue' cuite'na' na' gosata'yoede' le' gose'ene':

—Boži'išca no'olen', le con nagüe' chio' choḷ güiže' le' zižje cont gacleno'ne'.

²⁴ Nach gož Jesúsen' legaque':

—Diosen' gwsele' neda' cont chaclena' beṇe' Israel gualaž čecho na'ze, le legaque' zjazaca'lebe' ca xila' dao' be zjanacžeje.

²⁵ Nach no'olen' gwbigue' bzoa xibe' lao Jesúsen', na' gože'ne':

—Xana', goclenšca neda'.

²⁶ Nach gož Jesúsen' le':

—Bitw naquen güen yeca'acho yela' guagw čhe xi'incho na' gwnežjwchon gagw beco' ca'.

²⁷ Nach gože'ne':

—Leczdo' Xana'. Perw beco' ca' guac yesagwba' bla'a dao' da' cheselažo' lo yo.

²⁸ Nach Jesúsen' gože'ne':

—No'ole, leca chejnilažo' neda'. Guaclencza' le' can' chaclažon'.

Na' la' beyacte xi'in no'olen'.

Jesúsen' beyone' beṇe' zan beṇe' chesacšene

²⁹ Beza' Jesúsen' latjen' len beṇe' ca' zjanaque' le' txen goso'e nezen' dan' chde gala'ze cho'a nisdao' Galilean'. Nach gosepe' to lo ya'a jasechi'e lo ya'ana'.

³⁰ Na' besežin beṇe' zan lo ya'a gan' zoa Jesúsen' len beṇe' ca' zjanaque' le' txen. Zjanče'e no beṇe' nxinj ṇi'e, beṇe' lchol, beṇe' bi chac ṇie', beṇe' bi zoa ṇi'a na'gaque', na' len beṇe' chese'e gwde gwdele yižgüe', na' bosonite' legaque' xṇi'a Jesúsen'. Na' Jesúsen' beyone' yogüe'. ³¹ Na' leca besyebane beṇe' ca' cate' besele'ede' can' besyene beṇe' ca' bi gosac yesene, na' besyeyac beṇe' bi zjazoa ṇi'a na'gaque', na' besyeda beṇe' nxinj ṇi'e, na' besele'e beṇe' lchol ca'. Nach gosonxene' Diosen' ben' chonxen chio' beṇe' Israel.

Jesúsen' bguagüe' tap mil beṇe'

(Mr: 8:1-10)

³² Gwde na' Jesúsen' goxe' beṇe' ca' zjanaque' le' txen na' gože' legaque':

—Cheyaše'da' beṇe' qui, le ba goc šone ža zjanite' nga len neda', na' bibi de da' yesagüe'. Na' bi chaclaža' yosa'ane' sin cbi yesagüe' cont bi yesecholde' chanez.

³³ Nach legaque' gose'ene':

—Gan' zoacho nga naquen to latje daš ga bibi de. ¿Gaxe želecho da' yesagw yogo' beṇe' quinga?

³⁴ Nach gož Jesúsen' legaque':

—¿Gaca' yetextilen' de chele?

Nach gose'ene':

—Gažga yetextil dao' zjade na' to chopga bel ya'a dao'.

³⁵ Nach Jesúsen' bene' mandadw yesebe' bene' zan ca' lo yon'. ³⁶ Na' gwxi'e yetextil ca' gaže na' len bel ya'a dao' ca', nach be'e yela' choxcen che Diosen', nach bzojjen' bnežjuen' bene' ca' zjanaque' le' txen na' legaque' bosonežjue' che yogo' bene' nita' na'. ³⁷ Na' yogüe' gosagüe' goseljde'. Gwdena' bososše'e yegaže žome len late' güeje yela' guagw dan' bega'anna'. ³⁸ Na' bene' ca' gosagw yetextilen' len belen' nac tap mil bene' byo, na' bi cuent no'ole ca' len bidao' ca'. ³⁹ Nach beyož besela' Jesúsen' bene' ca' ližgaque', na' beyo'e to lo' barcw len bene' ca' zjanaque' le' txen na' ja'aque' distritw gan' nzi' Magdala.

16

Gosenabde' Jesúsen' gone' to da' yesele'ede' le'e yaba

(Mr. 8:11-13; Lc. 12:54-56)

¹ Na' goquen' bal' bene' fariseo ca' na' bene' saduceo ca' gosebigue' gan' zoa Jesúsen', na' cont yesagüe' xya che' gosenabe' gone' to yela' guac da' yesele'ede' le'e yaban' cont yeseñezde' še da' licze Diosa' gwsele' le'. ² Nach Jesúsen' gože' legaque':

—Cate' chle'ele chexna le'e yaban' šeže'le nach žale: “Yeža'a gwxe dan' chexna le'e yaban'.” ³ Na' cate' chle'ele zete bejw xna le'e yaban' do cheni' nach žale: “Guac yejw zag, le ze bejw xna le'e yaban'.” Nacle bene' gwxiye', le nezele še guac yejw zag o še guac zeye' caten' chle'ele can' nac le'e yaban', perw bi chacbe'ele bi zejen da' ca' chon Diosen' tiemp nga zoacho na'a. ⁴ Le'e zoale na'a nacchguale bene' laždao' xi'a na' ba gwlejyichjle Diosen'. Da'nan' chnable gona' yeto yela' guac da' le'ele cont nezele še Diosen' gwsele' neda'. Perw bitw gona' can' chnablen', le ba ble'ele da' chona'. Dan' gon Diosen' len neda' cont nezele le'na' gwsele' neda' naquen ca' dan' bene' len da' Jonás ben' be' xtiža' Diosen' cani'.

Nach beyož gwna Jesúsen' ca', beze'e len bene' ca' zjanaque' le' txen gan' nita' bene' ca'.

Dan' chsed chlo'e bene' fariseo ca' na' bene' saduceo ca' zaca'leben ca levadura

(Mr. 8:14-21)

⁵ Na' cate' besežine' yešla'a nisdao' Galilean', bene' ca' zjanaque' Jesúsen' txen gosache'ede' gosanjaže' yetextil da' yesagüe'. ⁶ Nach Jesúsen' gože' legaque':

—Le gon xbab, le gwsaca' len levadura che bene' fariseo ca' na' che bene' saduceo ca'.

⁷ Nach gose' lježgaque':

—Gwne' ca' le gague bi yetextilen' noa'chon'.

⁸ Na' Jesúsen' gocbe'ede' xbab dan' gosone', na' gože' legaque':

—¿Bixchen' chacžejlaže'le da' bibi yetextil de? ¿Bi chejle'le napa' yela' guac par gwguagua' le'e? ⁹ ¿Biña' šejni'ile? na' ¿ba gonlaže'le can' bguagua' gayo' mil bene' byo len gayo'ze yetextil dao'? na' lecze ¿bitw zalaže'le do yebal žome pedas yetextil botoble dan' becho'onen? ¹⁰ Na' ¿chixe tap mil bene' byo ca' bguagua' len gažze yetextil dao'? ¿Zalaže'le yebal žome pedas yetextil can' botoble dan' becho'onen? ¹¹ ¿Bixchen' con benle xbab che yetextilen' cate' gwnia' le'e gwsaca'le len levadura che bene' fariseo ca' na' che bene' saduceo ca'?

¹² Nach bene' ca' zjanaque' Jesúsen' txen gosache'ede' gague be'e diža' che levadura dan' chosochine' par chcha'o yetextilen' san be'e dižan' ca' cont bi

yosozenague' che dan' chososed chosolo'e bene' fariseo ca' na' bene' saduceo ca'.

Pedroa' gwne' Jesús'en' naque' bene' gwsela' Diosen' cont nabi'e
(Mr. 8:27-30; Lc. 9:18-21)

¹³Nach Jesús'en' len bene' ca' zjanaque' le' txen besežine' gala'ze to ciuda dan' nzi' Cesarea de Filipino. Nach Jesús'en' gože' bene' ca' gosa'aclene' le':

—Diosen' gwsele' neda' golja' benačh. Perw čbi chesena bene'? čnon' naca' neda'? čBi chesene'?

¹⁴Na' gose'ene':

—Bale' chesene' naco' da' Juan ben' bzoa bene' nis. Na' yebale' chesene' naco' Elías ben' be' xtiža' Diosen' cani'. Na' yebale' chesene' naco' da' Jeremías o yeto bene' be' xtiža' Diosen' cani'te.

¹⁵Nach gože' legaque':

—čChixe le'e? čNo žale naca'?

¹⁶Nach Simón Pedroa' gože'ne':

—Len' naco' Cristo ben' gwlej Diosen' cont nabi'o, na' naco' dogualje Xi'in Dios, Dios ben' zoa toli tocaṇe.

¹⁷Nach Jesús'en' gože'ne':

—Simón xi'in Jonás, mbalaz zo' dan' gwnao' ca'. Notno benačh bzejni'i le' nao' ca'. Toz Xa' Dios ben' zoa yaba, len' ba bzejni'iden' le'. ¹⁸Na' neda' žia', len' lio' Pedro na' zeje dižan' yej. Na' ca to bene' güen yo'o chbeje' yej gual cont gonen žin cate' cueque' len yo'on, ca'cze chbeja' le' gono' xšina', gaco' bene' nechw yotobo' bene' yesonxene' neda'. Na' bitwbi gac yeson da' xigüe' ca' yosolej yosošošen bene' ca' yesonxene' neda'. ¹⁹Na' gona' lo nao' zgua'tec le' go'o xtižan' len bene' zan cont yosozenague' che Dios ben' zoa yaban' na' nabi'e yichjlažda'ogaque'. Na' lecze naquen lo nao' yo'o bene' ca' yesonxene' neda' bica' da' ca' nac güen yesone' na' bica' da' ca' cbi nac güen yesone'. Na' Diosen' gwzejni'ide' le' naquen' ye'gaco'ne' cont yežaguen len dan' ža Diosen'.

²⁰Nach Jesús'en' gože' legaque' nono yese'e še naque' Cristo ben' gwlej Diosen' cont nabi'e.

Jesús'en' gwdixjue'ede' gate'
(Mr. 8:31-9:1; Lc. 9:22-27)

²¹Na' žana' Jesús'en' gwzolağüe' bzejni'ide' bene' ca' zjanaque' le' txen cheyala' šeje' Jerusalenna'. Na' gože' legaque' bene' gole blao ca' chesenabi'e nación chechon', na' bχoz gwnabia' ca' na' bene' ca' chososed chosolo'ede' dan' bzoj da' Moisés yosoči yososaque' le' na' yesote' le'. Perw yeyon ža yebane' ladjo bene' guat ca'. ²²Nach Pedroa' gwče'e Jesús'en' gan' nac lchojiže na' gwzolağüe' be'lene' le' diža' gwdile' le', gože'ne':

—Xana', Diosen' gaclene' le'. Bitw gac čchio' ca' dan' žo' nga.

²³Perw Jesús'en' gwyečhje' gwne'e Pedroa' gože'ne':

—čGwcuas ca'ale Satanás! Chgo'oyelo' neda' bi gona' can' nžia' bia' Diosen' gona'. Bi nsa'o xbab che Dios, san nsa'o xbab che benačh.

²⁴Gwde na' Jesús'en' gože' bene' ca' zjanaque' le' txen:

—Note'teze bene' še chaclaže' gaque' neda' txen, cheyala' cuejyichj cuine' la'czla' žaglagüe' na' con gone' can' nia' neda'. ²⁵Note'teze bene' chacde' gone' cont bi žaglagüe' o cont nono yesot le', benan' cuiayi'. Na' note'teze bene' chzanlaže' cuine' žaglagüe' o gate' ne' chia' neda', ba de yela' mban che' toli tocaṇe. ²⁶čBixe zejenna' to bene' nabi'e doxen yežlion' na' cuiaye'e bi gata' yela' mban che' toli tocaṇe? Le bi zoa nacle gon benačhen' chixjue' cont gata' yela' mban che' toli tocaṇe. ²⁷Diosen' gwsele' neda' golja' benačh na' cate' yida' yežlio nga da' yoble nsa'a yela' zaca' juisyw che Xa' Diosen' na' nchi'a angl

chia' ca', cana'ch gona' cont to to benachen' nite' mbalaz o yesezaca'zi'e neche da' goson to toe'. ²⁸ Na' da' li žia' le'e, balle nita'le nga na'a bina' gatle cate' žin ža le'ele neda' yida' gwlo'a yela' gwnabia' chian', neda' naca' ben' gwsela' Diosen' golja' benach.

17

Jesúsen' goque' ca to be'ni'

(Mr. 9:2-13; Lc. 9:28-36)

¹ Gwde xop ža Jesúsen' gwchi'e Pedroa' len Jacobo na' Juan bene' biše' Jacobo na' ja'aque' to lo ya'a sibe. Na' nono nochle ja'aclen legaue'. ² Na' lao legaue' bža' ca goc Jesúsen', cho'alagüen' goctiten ca gwbiž, na' xalanen' beyaquen šiš xila' ca be'ni'. ³ Na' concze besele'ede' da' Moisésen' len da' Elíasen' na' chosošalje' len Jesúsen'. ⁴ Nach Pedroa' gože' Jesúsen':

—iXanto', leca güenna' zoacho nga! Še chaclažo', gonto' šone ranšw, to chio', na' to che Moisés, na' yeto che Elías.

⁵ Ne' choe'te Pedron' dižan' ca' cate' to bejw da' chactiten gwyechjen legaue' na' ladjo bejon' gosende' gwna Diosen':

—Benga Xi'ina' ben' chacda'. Chbe chezaquelaže' chgüeda' che'. Le gwzenag che'.

⁶ Na' cate' bene' ca' nche'e Jesúsen' gosende' diža' ca' besežebchgüe', con gosaze' coscho'ale lo yon'. ⁷ Nach gwbiga' Jesúsen' gwxo'a ne'e yichjgaquen' na' gože'ne':

—Le yeyas. Bitw žeble.

⁸ Na' cate' besyechis lagüen', noch no besele'ede' san toze Jesúsen' zie'.

⁹ Na' gwde na' šlac chesyeyetje' lo ya'an Jesúsen' gože' legaue':

—Nono ye'le can' nac dan' ba ble'ele nga. Cate'ch ba bebana' ladjo bene' guat ca', neda' naca' ben' gwsela' Diosen' golja' benach, cana'ch güe'le diža' chen.

¹⁰ Nach bene' ca' zja'aclen Jesúsen' gose'ene':

—Bene' ca' chososed chosolo'e dan' bzoj da' Moisésen' chososedde' neto' chesene' zgua'tec da' Elías ben' gwzoa cani' cheyala' yide' da' yoble cate' za' yedenabia' ben' sela' Diosen'. ¿Bixchen' chesene' ca'?

¹¹ Nach Jesúsen' gože' legaue':

—Da' licze zgua'tec yid da' Elíasen' na' yeyonšagüe' yogo'lol. ¹² Perw žia' le'e, Elías ba bide' na' bi gosacbe'e bene' še nac le'. Na' gosonde' le' con ca gosaclaže'. Na' ca'czen' yosochi yososaque' neda' naca' ben' gwsela' Diosen' golja' benach.

¹³ Nach bene' ca' zja'aque' len Jesúsen' gosacbe'ede' cho'e diža' che da' Juan ben' bzoe' bene' nis.

Beyon Jesúsen' to bi' chazbe' šon

(Mr. 9:14-29; Lc. 9:37-43)

¹⁴ Na' cate' besežine' gan' zjanžag bene' zan, to bene' bšague' Jesúsen' na' bzoa xibe' lagüe'na' gože'ne':

¹⁵ —Xana', beyaše'laže'šca xi'ina' nga. Chazbe' šon na' leca chžaglaobe' len len. Na' zan ni'a ba jačazbe' lo yi' na' lecze zan ni'a ba blažo'be' lo nis.

¹⁶ Ba bedesana'be' lao bene' ca' zjanaque' le' txen, perw bitw gosaque' yesyeyone'be'.

¹⁷ Nach Jesúsen' gože' bene' ca' že'na':

—iLe'le bene' bi chejnilaže', chonchgualle clele! ¿Batca' zelao na'lagua' le'e? Bedesan bidaon' ni.

¹⁸ Nach Jesúsen' bene' mandadw yechoj da' xigüen' yo'o nyazen yichjlaždao' bidaon' na' la' bechojten. Na' la' beyaquetebe'.

¹⁹ Na' gwde goc ca', be_{ne}' ca' zjanaque' Jesúsen' txen gosebigue' lagüen' cate' zoe' toze', na' gose'ene':

—¿Bix_{chen}' bi goc neto' yebejto' da' xigüen'?

²⁰ Jesúsen' gože' legaque':

—Bitw goc yebejlen dan' bitw gwejele'le Diosen' gone' yechojen. Xsa xomdasen' naquen da' dao' riz. Na' da' li žia' le'e, la'czla' dan' chejnilaže'le Diosen' naquen ca' to xsa xomdas lagüe dan' bi chejnilaže'teclene', še šejnilaže'lné', guaque ye'le ya'a nga: “Gwcuas nga, na' jayzoa na'ate”, na' gac can' nalen'. Bitw bi de dan' bi gac gonle con še chejele'le Diosen' gone' gaquen. ²¹ Na' cont yebejle da' xigüe' ca' dan' zjanac ca' dan' bebeja' yichjlaždao' bidao'na', cheyała' gwyo gwchejele gonle gwbas na' zoatezle yoł güižle Diosen'.

Da' yoble Jesúsen' gwdixjue'ede' gate'

(Mr. 9:30-32; Lc. 9:43-45)

²² Na' šlac zjayda Jesúsen' len be_{ne}' ca' zjanaque' le' txen do gan' mbane distritw Galilea, Jesúsen' gože' legaque':

—Diosen' gwsele' neda' golja' be_{nach}, na' yosodie' neda' lo na' be_{ne}' chesegue'ede'nda', ²³ na' yesote'nda'. Perw na' yeyon ža yosban Diosen' neda' ladjo be_{ne}' guat ca'.

Nach be_{ne}' ca' zjanaque' Jesúsen' txen cate' gosende' xtiže'na' gosacyaše'chgüede'.

Jesúsen' gwdixjue' da' chosočhixjue' che yodao'

²⁴ Na' cate' besyežine' Capernaum, be_{ne}' ca' chosočhixjue' che gastw che yodao' blaoc che chio' be_{ne}' Israel ja'aque' lao Pedroa'. Na' gose'ene':

—¿Bi chyixjw maestrw chelen' da' cheyała' chixjue' che yodaon'?

²⁵ Nach gož Pedroa' legaque':

—Chyixjuen'.

Gwde gwna Pedroa' ca' gwyo'e lo' yo'ona'. Nach Jesúsen' la' gožtie' le':

—¿Bi xbab chono', Simón? Ca' nac be_{ne}' gwnabia' ca' nita' yežlio nga, ¿non' chacdo' chosočhixjue'? ¿be_{ne}' gualaž che' o še be_{ne}' zito'?

²⁶ Nach Pedroa' gože'ne':

—Chosočhixjue' be_{ne}' zito'.

Nach Jesúsen' gože' le':

—Be_{ne}' zjanaque' biše' lježe' bitwbi cheseyixjue'. Na' chio' naccho xi'in Dios ben' zoa yaba chnabi'e, bitw cheyała' chixjwcho che yodaon'. ²⁷ Perw cont nono yeson xbab chgue'echo yodao' blaon', na' chixjwcho. Gweje cho'a nisaon', na' bzala' yixjw chion' na' bel nechw be seno', lo cho'aba'na' želdo' to mechw. Na' yeyoxon' šjadixjo' chechon'. Guaqueczen par šjadixjo' che chopcho.

18

Gosacyož be_{ne}' ca' zjanaque' Jesúsen' txen noe' nacch blaoc

(Mr. 9:33-37; Lc. 9:46-48)

¹ Nachen' be_{ne}' ca' zjanaque' Jesúsen' txen gosebigue' cuite'na', na' gose'ene':

—¿No neto' gacchto' blaoc cate' Diosen' ben' zoa yaban' gone' cont nabi'o?

² Na' Jesúsen' goxe' to bidao' na' bzeche'be' gachol legaque'. ³ Na' gože'ne':

—Da' li žia' le'e, note'tezle še bi gwša' xbab chelen' cont gwzenagle che Diosen' ca' chon to bidao' cate' chzenagbe' che xaxna'be', gwbat nabia' Diosen' ben' zoa yaban' yichjlažda'ole. ⁴ Na' note'teze be_{ne}' še yeyaque' ca' bidao' nga na' gwzexjwlaže' lao Diosen', nach gaque' be_{ne}' blaoc len neda' cate' Diosen'

ben' zoa yaba gone' cont solao nabi'a. ⁵ Note'teze bene' chone' güen len to bidao' ca bi' nga neche da' chejnilaže' neda', choncze' güen len neda'.

Bitw cheyala' goncho cont gon bene' da' xinj
(Mr. 9:42-48; Lc. 17:1-2)

⁶ 'Note'teze bene' chon cont lažo' to bene' za' gwzolagüe' chejnilaže' neda' gone' da' xinj, yejni'acle yosocheje' yene' to yiše xen na' yosozale'ne' lo' nisdaon' clal ca da' gone' cont lažo' bene' yoble gone' da' xinjen'. ⁷ Nyaše'chguaze gac che benachen' da' zjade da' zan yežlio nga da' chesonen cont yesone' da' xinj. Bia'cze gata' dan' yeson cont lažo' bene' yesone' da' xinj, perw nyaše'chguaze gac che bene' chon cont lažo' bene' yoble gone' da' xinjen'.

⁸ 'Na' da' li žia' le'e, še ni'a na'len' chonen cont gonle da' xinj, cheyala' cuejyichjle da' malen' chonle. Yejni'a bibi ni'a na'len' soa clal ca gonle da' xinjen' len len. Na' yejni'a šjayzoale len Diosen' toli tocanē bi zoa šla'a taca'len' o nchog šla'a ni'alen' clal ca yeyejle lo yi' gabil nya' cuerp chelen'. ⁹ Na' še yejlaolen' chonen cont gonle da' xinjen', cheyala' cuejyichjle da' malen' chonle. Yejni'a bibi yejlaolen' cuia clal ca gonle da' xinjen' len len. Na' yejni'a šjayzoale len Diosen' toli tocanē zoa šla'aze yejlaole clal ca yežinle lo yi' gabil žia chop la'a yejlaolen'.

Jempl che xila' be gocžeje
(Lc. 15:3-7)

¹⁰ 'Bi gonle note'teze bene' chejnilaže' neda' ca bene' bibi zaca'tec, la'czla' bitec zaque' len benach. Žia' le'e, angl ca' chesape' legaque' lecze nite' lao Xa' Diosen' yaban' gan' zoe'na'. ¹¹ Na' ca naca' neda', Diosen' gwsele' neda' golja' benach cont gwnežjua' yela' mban toli tocanē che bene' ba zjambiayi'.

¹² '¿Bixe chonle xbab? Še nita' to gayoa xila' chele na' yexjw toba' ¿bi yocua'anle be ca' yetaplalj togalj do lo ya'a na'ze na' šjajdiljwle ben' bexjua'? ¹³ Na' da' li žia' le'e, cate' yeželeleba' yebechle dan' beželban' clal ca can' chebele che be ca' taplalj togalj ben' bi gosacžeje. ¹⁴ Ca'czen' naquen len bene' ca' chesejnilaže' neda' bene' ca' bitec bi zjazaque' len benachen'. Xacho Diosen' ben' zoa yaban' bitw che'nde' cuiayi' ne toe'.

Cheyala' yezi'xencho che bene' lježcho bene' chesejnilaže' Diosen'
(Lc. 17:3)

¹⁵ 'Še to bene' lježle gone' mal contr to le'e, šejle šje'elenlene' diža' chopzle can' nac dan' chonen' cont yetinjden'. Na' še gwzenague' diža' dan' šje'elenlenen', yezoe' binlo len Diosen' da' yoble. ¹⁶ Perw še bi gwzenague' diža' dan' šje'elenlenen', güenč che'ele yeto o yechope bene' lježle cont yesaque' testigw ba gota'yoele ben' yoša' xbab chen'. ¹⁷ Na' še bitwcze gwzenague' chele, le güe' diža' can' chonen' lao yogo'le gan' chdop chžagle chonxenle Diosen'. Na' še neca gwzenagcze' che yogo'le, cbich gonlne' cuent len le'e chdop chžagle chonxenle Diosen'. Perw le gon cuent naque' txen len bene' ca' bi chesejnilaže' Diosen', ca no bene' güechixjw bene' chesonchgüa da' xinj.

¹⁸ 'Da' li žia' le'e, naquen lo na'le ye'le bene' ca' yesonxene' neda' bica' da' nac güen yesone' na' bica' da' ca' bi nac güen yesone'. Na' Diosen' gwzejni'ide' le'e naquen' ye'gaclene' cont yežaguen len dan' ža Diosen'.

¹⁹ 'Na' da' yoble žia' le'e, še chople nita'le yežlio nga gwxi'ale bin' nabele Diosen', Xa' Diosen' ben' zoa yaban' goncze' dan' nabelenen'. ²⁰ Na' gan' nžag chope šonle chonxenle neda', zoacza' txen len le'e.

²¹ Nach Pedroa' gwbigue' gože' Jesús'en':

—Xana', še bene' lježa' chone' da' mal contr neda', ¿bal ni'a cheyala' yezi'xena' che'? ¿zelao do gaž ni'a?

²² Nach Jesúsen' gože'ne':

—Žia' le', gague cheyała' yezi'xen che lježle zelao do gaž ni'a, san yogo'te ni'a cheyała' yezi'xen che lježle.

Jempl che ben' bi bezi'xene' che dan' čala' bene' lježe'

²³ 'Na' yela' gwnabia' che Diosen' ben' zoa yaban' zaca'leben ca da' nga goc. Zoa to bene' gwnabia' ben' chesala' xmose' ca' xmechue'. Na' goclaže' yebeje' cuent len legaue'. ²⁴ Na' cate' gwzolagüe' bezi'e cuent che to toe', da' nechw bžin to xmose' ben' čala' zan millón. ²⁵ Na' mosen' bitwbi xmechue' gota' par yonežjue'. Da'nan' bene' gwnabian' bene' mandadw ta'ogaue' len xo'ole', len xi'ine' ca' na' len doxen da' zjade che' cont yeyaxjw dan' čale' čen'. ²⁶ Nach mosen' bzoa xibe' lao bene' gwnabian' gota'yoede' le' gože'ne': “Xana', gwdapešca yela' chxenlaže' len neda', na' yeyona' doxen dan' čala' čion'.” ²⁷ Nach bene' gwnabian' beyaše'de' le' na' bezi'xene' che doxen dan' čale' na' bsane' le'. ²⁸ Perw na' cate' bechoj mosen' liž xanen', la' bežagtie' yeto mos lježe' bene' čala' late' xmechue'. Nach la' gwnizte' yene' gože'ne': “Yeyono' dan' čalo' čian' netec na'a.” ²⁹ Nach mos lježen' la' bzoate' xibe' lagüen', gože'ne': “Gwdapešca yela' chxenlaže' čia' na' yeyona' doxen dan' čala' čion'.” ³⁰ Perw na' mos nechon' bitw bzenague' che mos lježen'. La' gwyejte' jene' mandadw goseyixjue'ne' ližya na' bi yechoje' še biña' yonežjue' dan' čale' čen'. ³¹ Na' mos ca' yezica'chle cate' besele'ede' can' ben' mos nechon', leca gosacde' zi'. Na' ja'aque' lao bene' gwnabian' jaseže'ne' yogo'lo' can' goca'. ³² Nach bene' gwnabian' goxe' mos nechua' da' yoble lagüe'na', gože'ne': “Le' naco' to bene' xi'achgua. Neda' bezi'xena' čio' doxen dan' čalo' čian' dan' gota'yoedo' neda' yezi'xena' čion'. ³³ ¿Bixchen' bi beyaše'do' mos lježo' ben' čale' čion' can' beyaše'da' le'?” ³⁴ Na' bža'achgua bene' gwnabian' na' bdie' le' lo na' bene' goseyixjue'ne' ližya ga žaglaogüe', na' bi yechoje' še biña' yeyixjue' doxen dan' čale' čen'.

³⁵ Nach Jesúsen' gože' bene' ca' zjanaque' le' txen:

—Can' gon Xa' Diosen' ben' zoa yaban' len note'tezle še bi chezi'xenle che lježle do yichj do laže'le bite'teze dan' chesonde' le'e.

19

*Bi cheyała' yela'acho len no'ol chechon' cont soalencho no'ole yoble
(Mr. 10:1-12; Lc. 16:18)*

¹ Na' Jesúsen' cate' beyož gwne' da' ca' beze'e distritw Galilean' na' gwlague' yegw Jordánna' beyeje' gan' mbane distritw Judean'. ² Na' bene' zan ja'aclen le', na' beyone' bene' ca' chesacšene.

³ Na' ba' bene' fariseo ja'aque' gan' zoe'na', le gosaclaže' yesebeje'ne' diža' da' yosočhine' cont gosožie'ne' xya chol, nach gose'ene':

—¿Guac to bene' nšagna' yele'e len xo'ole' še bite'teze dan' chone' cbi cholaže' bene' čen'?

⁴ Nach gože' legaue':

—¿Biña' gwlable can' nyoj Xtiža' Diosen'? Žan cate' gwxe yežlion' Diosen' bene' bene' nechw ca' to bene' byo na' to no'ole. ⁵ Na' gwna Diosen': “Da'nan' bene' byon' gwsane' xaxne'e cont soalene' no'ole čen' na' chope' yesaque' ca toz bene'.” ⁶ Na' ca' bich yesac čope' san toze'. Da'nan' bi cheyała' yesyele'e, le Diosen' ba bcode' legaue'.

⁷ Nach gose'ene':

—Še naquen ca' ¿bixchen' ben da' Moisésen' mandadw cate' to bene' ye'le' len no'ol chen' cheyalá' chas to yiš da' gwnežjue' no'ol chen' ga güen' diža' besyele'ena'?

⁸ Jesús'en' gože' legaue':

—Da' Moisésen' be'e latje yela'ale len no'ol chele lagüe dan' nacle bene' güedenag len Diosen'. Perw cate' Diosen' bene' bene' nechw ca' bitw nacho goclaže' yesyele'e. ⁹ Žia' le'e, note'teze bene' chele'e len no'ol che' na' cheque'e no'ole yoble, len neztede' no'ol chen' bitw naque' to no'ole chzoa xtoe', toz ca da' xinjen' chone' ca nac dan' chon ben' chata'lene' no'ol che bene' yoble. Na' note'teze bene' yošagna'lene' to no'ole bene' bela'a len bene' che', lecze tozcze ca da' xinj gone' ca nac da' chon bene' chata'lene' no'ol che bene' yoble.

¹⁰ Nach bene' ca' zjanaque' Jesús'en' txen gose'ene':

—Še can' naquen che bene' byo na' no'ole, güen'ch nono gwšagna'.

¹¹ Jesús'en' gože' legaue':

—Gague yogo' bene' yesejni'ide' da' nga, šinze bene' ca' ba bzejni'i Diosen' legaue' bi zejen. ¹² Nita' bene' bi žan yosošagne'e dan' gosajje' bi zjanya' cuerp che', na' lecze nita' bene' bi chosošagne'e lagüe dan' gosone bene' legaue' cont bi zjanya' cuerp chegaue'. Na' lecze ca' nita' bene' cbi chosošagne'e lagüe dan' chesazlaže'che' yesone' xšin Diosen' ben' zoa yaban' chnabi'e. Le gwzenag che dan' ba gwnian' še ba ben Diosen' cont chejni'ilen.

Jasesane' bidao' lao Jesús'en'

(Mr. 10:13-16; Lc. 18:15-17)

¹³ Na' ja'ac bene' jasesane' bidao' lao Jesús'en' cont xoa ne'e yichjgacbe' na' nabe' lao Diosen' gaclene' legacbe'. Perw bene' ca' zjanaque' le' txen gosedi'e' bene' ca' zjanche'ebe'. ¹⁴ Nach Jesús'en' gože'ne':

—Le güe' latje yesid bidao' ca' lagua' nga, na' bi gwžonle, le bene' ca' zjanac ca bidao' quinga, legaue' chosozenague' che Diosen' ben' zoa yaba cont chnabi'e yichjlažda'ogaue'.

¹⁵ Na' beyož gwxo' na' Jesús'en' yichjgacbe' gwñabe' lao Diosen' gaclene'be', nach gwyeje' ga yoble.

Bene' güego' bene' goc bene' gwñi'a

(Mr. 10:17-31; Lc. 18:18-30)

¹⁶ Na' goquen', to bene' güego' bžine' gan' zoa Jesús'en', na' gože'ne':

—Maestrw, le' naco' bene' güen. ¿Bi da' güen cheyalá' gona' cont gata' yela' mban chia' toli tocañe'?

¹⁷ Nach Jesús'en' gože'ne':

—¿Bixchen' žo' naca' bene' güen? Toz bene' güen zoa, na' len' naque' Dios. Perw na' še chaclažo' gata' yela' mban chio' toli tocañe, cheyalá' gono' can' non Diosen' mandadw goncho.

¹⁸ Nach gože' Jesús'en':

—¿Bica' da' ca'?

Nach Jesús'en' gože' le':

—Nono gotle, bi gata'lenle no'ol bi nac no'ol chele o bene' byo bene' bi nac bene' chele, bi cuanle, bitw güe'le diža' güenlaže' che bene' lježle. ¹⁹ Le gap bala'an xaxna'le, na' le gaque lježle can' chaque cuinle.

²⁰ Nach bene' güegon' gože' Jesús'en':

—Yogo'loł da' quinga gwzolagua' chonczan' cate' ne' nactia' bidao'. ¿Bixe dan' chyažjech gona'?

²¹ Jesús'en' gože'ne':

—Še chaclažo' gaco' cayanen' chazlaže' Diosen', jayete' yogo' da' de chio', na' da' le'edo' chen bnežjon bene' yaše'. Nach še gono' ca', cate' yežino' yaba gan' zoa Diosen', da' zaca'ch gata' chio'. Na' še ba beyož beno' can' žia' le', nach sao' gaco' neda' txen.

²² Perw na' bene' güegon' cate' beyož bende' diža' can' gož Jesúsen' le', beza'yaše', le bene' gwñi'achgua goque'.

²³ Gwde na' Jesúsen' gože' bene' ca' zjanaque' le' txen:

—Da' li žia' le'e, leca zdebe naquen to bene' gwñi'a gwzenague' che Dios ben' zoa yaba cont Diosen' nabi'e yichjlažda'ogüe'. ²⁴ Da' yoble žia' le'e, bedao'ch te to be xen be nzi' camello to lo' nag yeše' clél ca to bene' gwñi'a gwzenague' che Dios cont Diosen' nabi'e yichjlažda'ogüe'.

²⁵ Na' bene' ca' zjanaque' Jesúsen' txen leca besyebande' cate' gosende' xtižen', nach gosene':

—¿Noxen' šjayzoa len Diosen' še ca'?

²⁶ Jesúsen' gwne'e legaque', nach gože'ne':

—Bibi de da' gac yeson benachen' cont šjasyenite' len Diosen', perw bi zoa da' nacho da' bi gac gon Dios.

²⁷ Nach Pedroa' gože' Jesúsen':

—Neto' ba gwlejyichjto' yogo' da' de cheto' cont nacto' le' txen. ¿Bi da' güen gata' cheto' dan' ba gwlejyichjto' da' ca'?

²⁸ Jesúsen' gože' legaque':

—Da' li žia' le'e, Diosen' gwsele' neda' golja' benach na' cate' yocobe' yežlion', neda' cui'a nabi'a güen juisyw can' chnabia' Dios ben' zoa yaba. Na' le'e šižinwle cue'le cuita'na' nabi'a'le šižinw cuen bene' ca' zjanaque' xi'in diaža che da' Israel. ²⁹ Na' note'teze bene' ba gwlejyichje' liže', biše', zane', xaxne'e, xo'ole', xi'ine' o yežlio che', dan' chzenague' chia', Diosen' gwnežjue' le' da' zaca'ch da' xench ca yogo' da' ca'. Na' lecze gata' yela' mban che' toli tocané. ³⁰ Perw zan bene' zjanaque' bene' žialao na'a, gwžin ža cate' yesaque' bene' bzebe. Na' bene' zjanaque' bene' bzebe na'a, gwžin ža cate' yesaque' bene' žialao.

20

Jempl che bene' güen žin ca'

¹ Nach Jesúsen' gože' legaque': —Yela' gwnabia' che Diosen' ben' zoa yaban' zaca'leben ca da' nga goc. To bene' nape' to yežlio gan' že'chgua yag uvas. Na' gwze'e ližen' to zil do cheni' gwyeje' gan' chac ya'a jatiljue' bene' güen žin cont yesone' žin yežlio chen' žana'. ² Na' gosexenlaže' bene' güen žin ca' to denario chixue' to toe' con ca chac mosen' tža žin. Nach gwsele' legaque' gan' jasene' žinna'. ³ Na' do cheda ga gozeje' gan' chac ya'an, na' ble'ede' nita'ch bene' bibi žin de yesone'. ⁴ Na' gože' legaque': “Lencze le'e le šja'ac gan' že' yag uvas chian' le šjen žin na' chixjwca' le'e ca cheyala'.” Nach ja'ac bene' ca'. ⁵ Na' da' yoble gwyeje' do guagwbiž na' do cheda šone. Bezle'ede' nita'ch bene' bibi žin chesone' nach gwsele' legaque' cont yesone' žin gan' že' yag uvas chen'. ⁶ Na' ca do cheda gayo' šeže'le gozeje' da' yoble ble'eczde' nita'ch bene' bibi žin chesone'. Na' gože' legaque': “¿Bixchen' bi gwyejle žin?” ⁷ Nach gose'ene': “Notno gwne' neto' šjento' xšine'.” Nach goze'e legaque': “Lencze le'e le šja'ac le šjen žin gan' že' yag uvas chian'. Na' chixjwca' le'e ca cheyala'.” Nach ja'ac bene' ca'. ⁸ Na' cate' bžin hor bosa' xan yag uvasen' bene' güen žin ca', nach gože' mos blao chen': “Beyax bene' güen žin ca' cont chixjo'ne', solao chixjo' bene' ca' besela'ac bzebe, na' yeyožle len bene' ca' besela'ac da' nechw.” ⁹ Nach mos blaon' zgua'tec gwdixjue' bene' ca' gosezolagüe' gosone'

žin cheda gayo' šeže'le tgüje denario to toe'. ¹⁰ Na' cate' gwdixjue' bene' ca' gosezolagüe' gosone' žin šezildao', gosacde' chixjochē' legaque' da' zcha'och dan' gosezolagüe' gosone' žin šezildao'. Perw tozcze can' gwdixjue' yogo'lolte'. ¹¹ Na' cate' beyož gosezi' laxjw bene' ca' gosezolao žinna' šezildao', gosadoe' diža' xan žinna'. ¹² Gose'ene': "Do ža bžaglaochguato' lo da' zeye' bento' žin chion'. Na' tozcze can' gwdixjo' neto' len bene' ca' besela' bzebe, len to hor güejgan' gosone' žin." ¹³ Perw na' xan žinna' gože' toe': "Migw chia', bitwbi da' mal chona' len le'. ¿Gague gw Xenlažo' to denario chixjua' to tole? ¹⁴ Laxjon' ba gwxi'o, guac yeyejo'. Chaclačža' gwnežjua' bene' ca' to denario güje con can' beña' le'e la'czla' besela'aque' bzebe. ¹⁵ ¿Bixchen' chxi'o neda' neče dan' naca' bene' šagüe'? Naquen lo na' gona' con ca' chaclačža' len da' de chia'."

¹⁶ Nach Jesúsen' gože' bene' ca' bosozenag jemplen':

—Can' naquen, nita' bene' zjanaque' bene' bzebe na'a, perw lecze gwžin ža cate' legaque' yesaque' bene' žialao. Na' nita' bene' zjanaque' bene' žialao na'a, perw gwžin ža yesaque' bene' bzebe. Diosen' chaxe' yogo'lol bene' cont yesejle'e che', perw bal guen' chosozenague' che', na' legacze' chbeje' cont chesaque' xi'ine'.

Da'yoble chyixjue'e Jesúsen' gate'

(Mr. 10:32-34; Lc. 18:31-34)

¹⁷ Jesúsen' len yezan bene' zja'aque' Jerusalénna'. Na' šlac zjangüe'e nezen' gwlejiže' bene' šižinw ca' gwleje' cont zjanaque' txen len le' na' gože' legaque':

¹⁸ —Na'a ba zejcho Jerusalénna' gan' yesone' neda' lo na' bxoz gwnabia' ca' na' lo na' bene' ca' chososed chosolo'ede' dan' bzoj da' Moisés, na' yesechoglagüen' chia' yesote' neda', neda' naca' ben' gwsela' Dios golja' benach. ¹⁹ Na' yesone'nda' lo na' bene' bi zjanaque' bene' Israel cont yesonle' chia', na' yesot yeseyine' neda', na' yesote'nda' yosode'e neda' le'e yag cruz, perw yeyon ža yebana' ladjo bene' guat ca'.

Xna' Jacobo na' Juanna' gwnabe' yesebe' xi'ine' ca' cuit Jesúsen' gan' nabi'ena'

(Mr. 10:35-45)

²⁰ Na' ja'ac xi'in Zebedeo, Jacobo len Juan, na' len xna'gaque' lao Jesúsen'. Na' xna'gaquen' bzoa xibe' lao Jesúsen' gože'ne':

—Chnabda' le' to goclen.

²¹ Nach Jesúsen' gože'ne':

—¿Bi goclen chaclačžo' gona'?

Nach xna'gaquen' gože'ne':

—Chaclačža' gono' cont xi'ina' quinga yesebi'e šla'a güje cuito'na' cate' žin ža nabi'o.

²² Jesúsen' gože' Jacobo na' Juanna':

—Le'e cabi nezele bi dan' chnable. ¿Gwchejlaže'le tele yela' zi' yela' ya' ca dan' tia' neda' na' gac chele can' gac chia'?

Nach bosyoži'e xtižen' gose'ene':

—Gwchejlaže'to'.

²³ Nach Jesúsen' gože' legaque':

—Da' licze tele yela' zi' yela' ya' ca dan' tia' neda' na' gac chele can' gac chian', perw bi naquen lo na' nia' non' cue' cuitan' cate' žin ža nabi'a, san yesebe' bene' ba mbej Xa' Diosen' gaquen' che'.

²⁴ Nach cate' yeši bene' ca' zjanaque' le' txen gosende' can' gosena bene' ca' chope, beseloque' legaque'. ²⁵ Nach Jesúsen' goxe' yogüe' cont gosebigue' lagüen' na' gože' legaque':

—Nezeczele bene' gwnabia' che to to nación na' bene' blao ca' chesone' byen chosozenag bene' chegaque'. ²⁶ Perw bi naquen ca' len le'e. San

note'tezle chaclaže'le gacle bene' blao, cheyala' gwzexjwlaže'le gaclen bene' lježle. ²⁷ Na' še note'tezle chaclaže'le gacle bene' žialao, cheyala' gon cuinle ca xmos bene' lježle. ²⁸ Ca'cze naquen len neda' naca' ben' gwseła' Diosen' golja' beṇačh. Gague za'a cont yesaclen bene' neda' san za'a cont gaclena' bene', na' chzanlaže' cuina' yesote' neda' neche xtoła' beṇačhen'.

Jesúsen' bene' cont chope bene' lchol besyele'ede'

(Mr. 10:46-52; Lc. 18:35-43)

²⁹ Nach cate' besyeya'aque' ciuda Jericó, bene' zan zjasenagüe' Jesúsen' len bene' ca' zjanaque' le' txen. ³⁰ Na' chope bene' lchol zjachi' chanez gan' zjayda Jesúsen'. Na' cate' gosacbe'ede' Jesúsen' zej gan' zjachi'ena' nach chososya'adie' gose'e le':

—Xanto', len' naco' xi'in diaža che da' rey Davin'. Beyaše'laže'sca neto'.

³¹ Nach bene' ca' chesyede gan' zjachi'ena' gosedile' legaque' cont yesenite' šize. Perw na' gosenē' zižjech gose'ene':

—iXanto', len' naco' xi'in diaža che da' rey Davin', beyaše'laže'sca neto'!

³² Jesúsen' gwleze' gan' nite'na', nach goxe' legaque' gosebigue' lagüen'. Nach gože'ne':

—¿Bin' chaclaže'le gonda' le'e?

³³ Nach gose'ene':

—Xanto', chaclaže'to' yele'eto'.

³⁴ Jesúsen' beyaše'laže'de' legaque' na' gwdane' yejlaogaquen', nach la' besyele'etede', na' gosa'ogüe' le'.

21

Gosonxene' Jesúsen' cate' beyo'e Jerusalén

(Mr. 11:1-11; Lc. 19:28-40; Jn. 12:12-19)

¹ Na' cate' ba zoa yesežine' Jerusalénna' besežine' gan' chi' yež Betfagé, gan' zoa ya'a dan' nzi' Ya'a Olivos. Na' Jesúsen' gwsele' mandadw chope bene' ca' zjanaque' le' txen, ² gožgaque'ne':

—Le šja'ac yež dan' chi' gála'ze, na' cate' žinlen' na' yeželele to burr be no'ole da'ba' yag na' nche'te to xi'inda'oba'. Le sežgacba' na' le che'gacba' nga.

³ Na' še bi ye' bene' le'e na' ye'lnē': “Xanto'na' chyažjde' legacba'.” Na' la' yedyesantecze'ba' len le'e.

⁴ Goc yogo' da' qui cont goc can' bzoj to ben' bzoj Xtiža' Diosen' cani', gwne':

⁵ Gož bene' ca' nita' Jerusalénna':

“Le na'šc, ba za' rey chelen',

žie' cože' to burr dao', xi'in beyixe' be choa' yoa'.

Ze'e ca to bene' bi naque' bene' blao.

⁶ Na' ja'ac bene' ca' yež dao' dan' gož Jesúsen' legaque' ca', na' gosone' can' ben Jesúsen' mandadw. ⁷ Na' besyeche'e burro' len xi'inba' lao Jesúsen' na' gosexoa no xagaque' cože'ban' na' gwžia Jesúsen' be daon' cont gwyeje' Jerusalénna'. ⁸ Na' bene' zan gosonxene' Jesúsen' goseyixjw no xagaque' lo nez cont blej burron' len na' yebale' gosechogue' xoze' yag na' goseyixjuen' lo neza'. ⁹ Na' bene' zjažialao na' lecze bene' za'ac cože' bososye'e gosene':

—iLeca bene' zaca' benga nac xi'in diaža che da' rey David! iMbalaz ben' za' nga gwseła' Xancho Diosen' le' cont nabi'e! iLeca bene' zaca' ben' zoa yaban'!

¹⁰ Na' cate' bžin Jesúsen' Jerusalénna' yogo' bene' ca' že' ciudan' besyebande', na' gosene':

—¿No benga bla' nga?

¹¹ Na' bene' ca' nžag Jesúsen' bosyoži'e xtiža'gaque' gosene':

—Bengan' Jesús be_{ne}' za' yež Nazaret gan' mbane distritw Galilea na' cho'e xtiža' Dios.

Jesúsen' bebeje' be_{ne}' ca' cheson ya'a yodao' blaon'
(Mr. 11:15-19; Lc. 19:45-48; Jn. 2:13-22)

¹² Na' Jesúsen' gwyo'e chyo'o yodao' blaon' na' bešaše' yogo' be_{ne}' ca' chesote' na' be_{ne}' chesa'o na'. Nach bchixe' xmes be_{ne}' ca' chosoša' mechw, na' yag ga chesebe' be_{ne}' ca' chesote' ngolbex. ¹³ Na' gože' lega_{que}':

—Nyoj_{cze} Xtiža' Diosen' žan: “Yesene' ližan' naquen to latje gan' yeso_l güiž be_{ne}' neda’”, perw le'e chon_{len} ca to latje ga že' be_{ne}' gwban.

¹⁴ Na' be_{ne}' l_{cho}l ca' na' len be_{ne}' ca' n_{xinj} ni'e gosebigue' lao Jesúsen' šlac zoe' chyo'o yodaon'. Nach beyone' lega_{que}'. ¹⁵ Perw na' b_{xoz} gwnabia' ca' na' be_{ne}' ca' chososed chosolo'e dan' bzoj da' Moisésen' leca beseže'e cate' besele'ede' ye_{la}' guac ca' dan' ben Jesúsen'. Na' le_{cze} beseže'e cate' gosende' can' bososya'a bi' bixjw ca' chyo'o yodao' blaon', gosenabe': “Le_{ca} be_{ne}' zaca' benga nac xi'in diaža che da' rey David.” ¹⁶ Nach gose'e Jesúsen':

—¿Zendo' bin' gosena bidao' ca'?

Jesúsen' boži'en gože' lega_{que}':

—Zenda'. ¿Bi_{na}' gwlable can' nyoj Xtiža' Diosen'?, žan:

Ba beno' cont bi' bixjw ca' na' len bi' ne' chesaže' chesonxembe' le'.

¹⁷ Na' bechoje' gan' nita' be_{ne}' ca' na' beze'e ciudan'. Na' že'na' jayga'ane' Betania.

Ben Jesúsen' cont gwbiž yag yixgüigw
(Mr. 11:12-14, 20-26)

¹⁸ Na' zil beteyo besyeya'aque' Betanian' jaseya'aque' Jerusalénna' da' yoble. Na' šlac zjangüe'e nezen' gwdon Jesúsen'. ¹⁹ Na' ble'ede' to yag yixgüigw zoan cho'a nezen' na' ja_{ne}'e še žia yaguen' yixgüigw. Perw bibi bželde', con xlaguen' na'ze žia. Nach gožen':

—Bich bi yixgüigon' cuio'.

Na' la' gwbižte yaguen'. ²⁰ Nach be_{ne}' ca' zjanaque' le' txen besyebande' cate' besele'ede' can' goquen', nach gose'ene':

—¿Nac goquen' la' gwbižte yaguen'?

²¹ Na' Jesúsen' gože' lega_{que}':

—Da' li žia' le'e, še chejnilaže'le Diosen' na' bitw gacžejlaže'le, guaque gon_{le} can' ba benan' cont gwbiž yaguen'. Na' le_{cze} ca' guac ye'le ya'a nga: “Gwcuase nga na' jaso_a lo' nesdaon’”, na' gac can' na_{len}'. ²² Na' še chejnilaže'le Diosen', bite'teze dan' nabelene' cate' yo_l güižlene', gon_{cen}' le'e.

Ye_{la}' chnabia' che Jesúsen'
(Mr. 11:27-33; Lc. 20:1-8)

²³ Nach Jesúsen' gozeje' yodao' blaon' da' yoble. Na' šlac chsed chlo'ede' be_{ne}' ca' že' na', b_{xoz} gwnabia' ca' na' be_{ne}' gole blao ca' chesenabi'e nación chechon' gosebigue' cuit Jesúsen'. Nach gosen_{abde}' le':

—¿Bi ye_{la}' gwnabia' napo' chono' da' qui? ¿No be_n ye_{la}' gwnabian' cont chono' da' qui?

²⁴ Nach Jesúsen' boži'e xtiža'gaquen', gwne':

—Le_{cze} de to da' na_{bda}' le'e. Še yoži'ile xtižan' nach ni'a le'e bi ye_{la}' gwnabia' chon_{lend}an'. ²⁵ Le našc neda': ¿non' gwse_{la}' da' Juanna' bzoe' be_{ne}' nis? ¿Dios nan' gwse_{le}'ne', še ben_{achen}'?

Nach legacze' gose' lježe':

—Še ye'chone' Dios gwseła' le', na' ye'e chio': “¿Bixchen' ca gweyjele'le che'?”
 26 Na' bi gac ye'chone' benach gwseła' le', le yogo'te bene' že' nga chesejle'e Diosen' gwsele' da' Juanna' be'e xtiže'na', na' xož bi yesonde' chio'.

27 Nach gose'e Jesúsen':

—Bi nezeto'.

Nach gože' legaque':

—Lecze neda' bi yapa' le'e bi yela' gwnabian' chonlenda' da' ca'.

Jempl che chope xi'in bene'

28 Na' Jesúsen' gože' legaque':

—Le gon xbab bi zeje jempl nga: Gwzoa to bene' gwnita' chope xi'ine'. Na' gože' tobe': “Xi'ina', chaclaža' šejo' güen žin na'aža gan' že' yag uvas chia' ca.” 29 Nach xi'inen' gožbe' le': “Bitw ša'a.” Perw gwdele beyombe' xbab nach gweyjebe'. 30 Nach gozeje' gan' zoa xi'inen' yeto, na' ježe'be' can' gože' bi' biše'ben'. Na' la' gožte bin' le': “Guaccze, na' ša'a.” Perw bitw gweyjebe'.

31 Gwnašc neda', žno bi' ca' chope ben can' gwnalaže' xabe'?

Nach gose'ene':

—Bi' nechoa'.

Nach Jesúsen' gože' legaque':

—Ca'cze naquen. Na' da' li žia' le'e, bene' güechixjw ca' na' no'ole ca' chja'aclen note'teze bene' byo yobech yosozenague' che Diosen' cont nabi'e yichjlažda'ogaque' clal ca le'e. 32 Ca nac Juanna' ben' bzoe' bene' nis, bide' laolen' na' gwduxjue'ede' le'e naquen' cheyala' gonle cont yebe Diosen' le'e. Perw bitw gweyjele'le che'. Na' bene' güechixjw ca' na' no'ole zle' ca' gosejle'e che'. Na' cate' gocbe'ele bene' ca' ba gosejle'e che', bitw betinjele xtoła'le ca' cont šejle'le che dan' bsede da' Juanna'.

Jempl che mos mal ca'

(Mr. 12:1-12: Lc. 20:9-19)

33 Le gwzenag yeto jempl nga. Gwzoa to bene' na' goze' to cue' xen yag uvas lo yežlio che' na' gwlo'en le'ej. Na' na'teze bene' to ga yesesie' uvasen' cont choj xisen'. Na' lecze bene' to da' sibe ca to campanaryw ga yesecua' bene' yosogüia yesene'e yag ca'.

'Na' bcua'ane' yežlion' lo na' bene' yesonši'e yag uvasen' na' gwze'e gweyje' zito'. 34 Cate' bžin ža yosyotobe' cosešen', gwsele' to chope xmose' gan' že' bene' ca' nac lo na'gaque' yag uvasen' cont šjasyexi'e to tlaw cosešen' dan' cheyala' si'e. 35 Perw na' bene' ca' nac lo na'gaque' yag uvasen' gosezene' mos che' ca'. Goseyine' toe', na' yetoe' bosožie'ne' yej, nach yetoe' gosote'ne'. 36 Nach gossela' xan yag uvasen' mos zanch clal ca bene' ca' gwsele' da' nechw, perw lecze can' gosonde' bene' nechw ca', lecze ca' gosonde' legaque'.

37 'Nach gwdena' xan yežlion' gwsele' cuincze xi'inen', gocde' yesezi'e xtižen'. 38 Perw na' bene' ca' nac lo na'gaque' yag uvasen' cate' besele'ede' xi'ine'na', nach gose' lježe': “Bengan' yega'anlene' yežlio nga cate' gat xen'. Le šo'o gotchone' cont yega'anlenchon.” 39 Nach gosezene'ne', besyebeje'ne' gan' že' yag ca' na' gosote'ne'.

40 Beyož be' Jesúsen' jempl nga, gozne':

—¿Nacxe chaquele gon xan yežlion' len bene' ca' bocua'anlene' yag uvas chen' cate' yežin cuine'?

41 Nach bosyoži'e xtižen' gosene':

—Šeje' šjetoe' bene' mal ca', na' yodie' yežlion' lo na' bene' yoble bene' yeson güen yosyonežjue'ne' to tlaw cosešen' cate' žin ža yosyotoben'.

42 Jesúsen' gože' legaque':

—Ca'czen'. ¿Biña' gwlable ga nyoj Xtiža' Diosen', žan quinga?:

Yej dan' bi gosaclaže' bene' güen yo'o ca' yosoçhine',
len ba naquen yej squin.

Da' nga ben Xancho Diosen',
na' naquen to da' yežejecho.

⁴³ Da' nan' žia' le'e, da' bi chzenagle che Diosen', cuejyichje' le'e na' cueje' bene' yoble bene' yosozenag che' cont nabi'e yichjlažda' ogaque'. ⁴⁴ Na' ca' nac yejen', note'teze bene' lažo' lo yeja' na' cue' žošje', na' note'teze bene' chiže' yeja' cate' lažon' na' gwšošjen le'.

⁴⁵ Na' bçoz gwnabia' ca' na' bene' fariseo ca', cate' gosende' jempl ca' dan' be' Jesúsen', gosacbe'ede' be'e diža' che legaque' dan' bi chesejnilaže' le'. ⁴⁶ Nach gosaclaže' yesezene' le', perw besežebe' bi yesone bene' ca' nžague' legaque', le yogüe' gosejle'e gwsela' Diosen' Jesúsen' cont cho'e xtiže' na'.

22

Jempl che ben' bene' lni cate' bšagna' xi'ine'

¹ Na' da' yoble bsd blo'e Jesúsen' bene' ca' len jempl, gozne':

² —Yela' gwnabia' che Diosen' zaca'leben ca' da' nga goc. Gwzoa to bene' gwnabia' na' bene' gastw cate' bšagna' xi'ine'. ³ Na' cate' bžin hor solao lnin' gwsele' xmore' ca' cont jasexi'e bene' ca' ba bol güiže' šja'ac lnina', perw notno goclaže' šja'ac lni chen'. ⁴ Nach gože' yeto xonj xmore' ca': “Le šjež bene' ca' ba bol güižan' ye'ln'e ba bsiñi'a dan' gagwchona'. Ba betua' be dao' be chesañe' na' ba bsiñi'a dan' gagwcho lo lnin'. Na' ye'ln'e yeside' gagwcho dan' ba bsiñi'an'.” ⁵ Perw bene' ca' ba gosata'yoede' cont šja'aque', bitw gosone' cuent dan' gose' mos ca' legaque'. Toe' gwyeje' jane'e yežlio che', na' yetoe' gwyeje' jene' negosyw. ⁶ Na' yebale' gosenize' mos ca' gwsela' bene' gwnabian' na' gosonde' legaque' zi' na' gosote' legaque'. ⁷ Na' leca bža'a bene' gwnabian'. Na' gwsele' soldadw che' ca' jasete' bene' ca' gosot xmosen' na' bosozeye' lažgaquen'. ⁸ Nach bene' gwnabian' gože' xmosen': “Ba bsiñi'a dan' gagwcho lo lnin', perw bene' ca' ba bol güiža' nachia' bitw zjazaque' yeside'. ⁹ Le šja'ac le šjata yogo' nez na' ye'le yogo' bene' yežagle yeside' lnin'.” ¹⁰ Na' mos ca' ja'aque' yogo' nez na' jasetobe' con yogo' bene' besežague', no bene' naque' bene' güen na' no bene' naque' bene' mal, cont beža' yo'o gan' chac lnin'.

¹¹ Perw cate' gwyo'o bene' gwnabian' jane'e bene' ca' že'na' na' ble'ede' to bene' bi nyaze' lache' da' bnežjue' yesaze' lo lnin'. ¹² Nach gože' le': “Migw chia', žnac goquen' gwyo'o nga bitw nyazo' lache' dan' bena' chazo'?” Nach bena' bitw beželde' bi ye'ene'. ¹³ Nach bene' gwnabian' bene' mandadw yosoçej xmore' ca' ni'a na' bena' cont yesyebeje'ne' na' yesebeque'ne' gan' nac çhol, ga cuežyaše' na' gan' gagwxejte laye' tantw žaglagüe'. ¹⁴ Can' naquen, Diosen' chaxe' yogo' bene' cont yesejle'e che', perw bal guen' chosozenague' che' na' legacze' chbeje' cont yesaque' xi'ine'.

Ca nac dan' cheyala' gaxjw

(Mr. 12:13-17; Lc. 20:20-26)

¹⁵ Nach bene' fariseo ca' besežague' na' bosoxi'e naclen' yesone' cont yesebeje' Jesúsen' diža' da' yosode'ede' cont yesagüe' xya che'. ¹⁶ Na' bene' fariseo ca' gosesele' bal bene' zjanaque' txen len legaque' na' yebal bene' chesone' txen len Herodesen' cont jaseže' Jesúsen':

—Maestrw, nezeto' zoatezo' cho'o diža' li. Na' nezeto' diža' li cho'o chsed chlo'edo' bene' can' chazlaže' Diosen' goncho. Na' bi chono' cuent bi ža bene', le toz can' chono' len note'teze bene'. ¹⁷ Da' nan' zedenabeto' le' cont nao' neto' can' chacdo' cheyala' gonto'. ¿Naquen binlo no chixjw da' cheyala' chixjwcho lao ben' nac la'zelagüe bene' gwnabia' ben' chi' Roma, še bi?

- 18 Jesús'en' gocbe'ede' yela' xi'a chęgaquen', nach gože' legaque':
 —¡Nacle bene' gwxiye'! ¿Bixchen' chaclaže'le yoslažo'le neda' len xtižan'?
- 19 Le gwlo'e neda' to mechw dan' chyixjwle che gobiernen'.
 Nach gosone' to mechw dan' nzi' denario. 20 Nach Jesús'en' gože' legaque':
 —¿No lao dan' da' le'e mechw nga? na' ¿no la da' nyoj le'en ni?
- 21 Nach gose'ene':
 —Che César ben' nac la'zelagüe bene' gwnabia' ben' chi' ciuda Roman'.
 Nach Jesús'en' gože' legaque':
 —Le gwnežjo bene' gwnabian' da' nac che bene' gwnabia', na' le gwnežjo
 Dios da' nac che Dios.
- 22 Nach cate' gosende' xtiža' Jesús'en' besyebande'. Nach besyeya'aque' gan' zoe'na'.

Cate' yesyeban bene' guat ca'

(Mr. 12:18-27; Lc. 20:27-40)

- 23 Na' lo ža na'teze besežin bal bene' saduceo gan' zoa Jesús'en'. Bene' ca' chesene' bene' guaten' bi yesyebane'. Nach gosenabde' le', gose'ene':
 24 —Maestrw, da' Moisés'en' gwne': “Še to bene' byo nšagne'e na' gate' sin nono xi'ine' zoa, bene' biše' ben' ba goten' cheyała' yošagna'lene' no'ol güezeba' cont yesenita' xi'in diaža che da' bišen'. 25 Na' len neto' gosanita' bene' gosac gaž biše'. Na' bene' nechua' bšagne'e, na' gote' nono xi'ine' gwnita'. Na' bene' gwchopen' bošagna'lene' no'ol güezeba'. 26 Na' lecze gote' nono xi'ine' gwnita'. Lecze ca' goc len bene' gwyona', bžinten bene' gaža' yogo'lole' gosac che' ca'. 27 Na' gwde gosat yogo'lol bene' ca', nach got len no'ola'. 28 Na' cate' yesyebane' ladjo bene' guat ca', ¿nox bene' ca' soalene' no'ola' ca' xo'ole'?, le yoguen' bosyošagna'lene' le'.

- 29 Na' gož Jesús'en' legaque':
 —Clelen' chonle xbab dan' žale ca', le bi nezele can' ža Xtiža' Dios dan' nyojen, neca nombia'le yela' guac chen'. 30 Caten' yesyeban bene' guat ca', bich yosošagne'e, neca yosonežjo xi'ine' no'ol gwšagne'e, le yesaque' ca' angl bene' zjazoa yaba. 31 Na' ca' nac dan' yesyeban bene' guat ca', ¿bina' gwlable da' nga can' nyoj Xtiža' Diosen'? žan: 32 “Neda' naca' Dios ben' chonxen Abraham, ben' chonxen Isaac na' ben' chonxen Jacob”. Bene' guat ca' bi chesonxene' Diosen', san bene' zjamban.

- 33 Na' bene' ca' zjanžaguen' besyebande' cate' gosende' diža' dan' bsd blo'ede' legaque'.

Dan' nac da' blaoch dan' ža Diosen' cheyała' goncho

(Mr. 12:28-34)

- 34 Na' cate' gosene' bene' fariseo ca' can' bzoaži Jesús'en' bene' saduceo ca', nach besedobe' jasa'aque' lagüen'. 35 Na' to ben' nsedchgüe' ley dan' bzoj da' Moisés lecze goclaže' cueje' Jesús'en' diža' da' gwchine' contr le', gože'ne':

- 36 —Maestrw, lo ley che Diosen', ¿non' nacch da' žialao da' zjanyojen da' ža Diosen' cheyała' goncho?

- 37 Nach gož Jesús'en' le':
 —“Cheyała' gaquecho Xancho Diosen' con ca' zelao chejni'icho do yichj do laže'cho.” 38 Lenña' naquen da' žialaoch na' da' blaoch lagüe da' ca' ža Diosen' cheyała' goncho. 39 Na' da' gwchopen' zejgalan' ca', žan: “Cheyała' gaque lježcho ca' chaque cuincho.” 40 Chope da' ca' ža Diosen' cheyała' goncho chzejni'in chio' can' zeje doxen dan' bzoj da' Moisés'en' na' dan' bosozoj bene' ca' gosone' xtiža' Diosen' cani'.

Criston' naque' xi'in diaža che da' rey David

(Mr. 12:35-37; Lc. 20:41-44)

⁴¹ Na' šlac ne' zjanžag bene' fariseo ca', ⁴² Jesúsen' gože' legaque':
—¿Bixe xbab chonle che Criston' ben' gwlej Diosen' cont yedenabi'e? ¿No xi'in diaža che naque'?

Na' gose'ene':

—Xi'in diaža che da' rey Davin'.

⁴³ Nach Jesúsen' gože' legaque':

—Še ca' naquen, ¿bixchen' cate' da' David bzoje' can' blo'e Spiritw che Diosen' le', gwne' Criston' naque' Xane'? Quinga bzoje':

⁴⁴ Xancho Dios gože' Xanan':

“Gwche'edo' cuita' nga nabia'cho txen,

na' gona' cont yogo' no chesegue'e le' yosozexjw yichje' yosozenague' chio'.”

⁴⁵ ¿Nacxe gac nacho Criston' xi'in diaža che da' rey David? le' cuin Davin' gože' le': “Xana”.

⁴⁶ Na' notoch no goc yosyoži'e xtižen'. Na' gwzolao žana' notoch no besyeyaxje bi yesenabde' Jesúsen'.

23

Xtola' bene' fariseo ca' na' bene' ca' chososed chosolo'e leyna'

(Mr. 12:38-40; Lc. 11:37-54; 20:45-47)

¹ Nach Jesúsen' gwzolao be'e diža' len bene' ca' zjanaque' le' txen na' len bene' ca' zjanžague' gan' zoe'na', gwne':

² —Bene' ca' chososed chosolo'e ley na' bene' fariseo ca' ba zjanlane' xlatje da' Moisésen' cont chosozejni'ide' bene' ley che Diosen'. ³ Na' da'nana' cheyala' gwzenagle chegaque' cate' chosozende' le'e can' ža leyna', na' cheyala' gonle can' chosozejni'ide' le'e. Perw bitw gonle can' cheson legaque', le legaque' bitw chesone' dan' chesene' cheyala' gac. ⁴ Legaque' chosozanche' dan' ža leyna'. Chesonen' ca to yoa' da' nono soe gua' na' chesaclaže' gua' bene' yoble len na' bitw chesaclaže' yeso'en legaque'. ⁵ Ca nac bene' ca', yogo' dan' chesonen', chesonen' ga yesele'e bene' can' chesonen' contze yesonxene' legaque'. Chio' bene' Israel nchejcho caj dao' de yid do na'cho na' do loxgacho na' lo' caj dao'na' chgo'ošagüe'cho to pedas yiš gan' nyoj late' güeje Xtiža' Diosen'. Perw ca nac bene' ca' chososed chosolo'e ley che Diosen' na' bene' fariseo ca', zjanonche' caj dao' chegaque' da' xench ca yezica'chle bene'. Na' lecze chesone' lox xagaque' da' tonech clal ca che bene' yezica'chle. ⁶ Chesyebede' chesebi'e gan' chesebe' bene' blao cate' chja'aque' gan' chac no lni na' cate' chja'aque' yodao' chegaque'. ⁷ Chesyebede' chesap bene' legaque' bala'an cate' chesyežague' lagüe ya'a. Na' chesyebede' yese' bene' legaque' maestrw.

⁸ Perw žia' le'e, bi gonle byen ye' bene' le'e maestrw, le toz neda' Cristo naca' Maestrw chele. Na' yogo' le'e chejnlaže'le neda' nac biše' lježle tole yetole.

⁹ Na' lecze bitw gonxenle note'teze bene' blao ye'ine': “Xato”. Toze Diosen' ben' zoa yaba naque' Xacho. ¹⁰ Na' bitw güe'le latje ye' bene' le'e: “Xana”, le toz neda' Cristo naca' Xanle. ¹¹ Še no le'e nacle bene' blaoch, cheyala' gwzexjw yichje' gaclen lježle. ¹² Le note'teze bene' chonxen cuine', Diosen' gone' cont si'e zto' lagüen'. Na' note'teze bene' chzexjwlaže' lagüen', Diosen' gone' cont gaxene'.

¹³ ;Nyaše'chguaze gac che le'e chsed chlo'ele ley dan' bzoj da' Moisésen' na' le'e bene' fariseo! Chziye'le bene' cont bi yosozenague' che Diosen', le bi chaclaže'le nabia' Diosen' yichjlažda'ogaque', na' lecze le'e bi chzenagle che Diosen' cont nabi'e yichjlažda'olen'.

14 'iNyaše'chguaze gac che le'e chsed chlo'ele ley dan' bzoj da' Moisésen' na' le'e bene' fariseo! Chziye'le no no'ole güezebe cont checa'ale yo'o chegaque'. Na' cate' chol güižle Diosen', sša choe'le diža' cont yesaque bene' leca chonx-en'ne'. Gacchle castigw clal ca yezica'chle bene' güen da' xinj.

15 'iNyaše'chguaze gac che le'e chsed chlo'ele ley dan' bzoj da' Moisésen' na' le'e bene' fariseo! iNacle bene' gwxiye'! Chejtez chejle chjatiljwle bene' zito' bene' yeson txen len dan' chsed chlo'elen'. Na' cate' chželelene' chzejni'ilne' cont yesaque' bene' xi'ach clal ca le'e.

16 'iNyaše'chguaze gac che le'e! iNacle ca bene' lchol bene' chesacde' guac yesegüe'e nez bene' yoble! Žale note'teze bene' še ne': "Yodao' blaon' zoan testigw chia' gona' can' ba gwnia'", bitwbi zejen dan' chnen'. Perw še že': "Oro dan' de lo' yodaon' zoan testigw chia' gona' can' ba gwnia'", nach cheyała' gone' can' gwnen'. 17 iLe'e nacle ca to bene' lchol na' bitw chejni'ile! Oron' bitec bi zacan'. Yodao'na' gan' yo'o oron' lenna' zaca'chen, le dan' yo'o oron' lo'ennan', da'nan' oron' naquen che Dios. 18 Na' lecze žale še to bene' že': "Mes gan' chosozeye' beyixe' ca' chesonxene' Diosen', zoan testigw chia' gona' can' ba gwnia'", bitwbi zejen xtižen'. Perw na' še že': "Dan' xoa lo' mes lo' yodaon' zoan testigw chia' gona' can' ba gwnia'", nachen' cheyała' gone' can' gwnen'. 19 iLe'e nacle ca bene' lchol na' bitw chejni'ile! Dan' chosozeye' chesonxene' Diosen' bitec bi zacan'. Mes gan' chesexoe' dan' chosonežjue' Diosen', lenna' zaca'chen, le naquen che Dios. 20 Še bene' že': "Mes dan' zoa lo' yodaon' zoan testigw chia' gona' can' ba gwnia'", lencze dan' xoa lo' mesen' zoan testigw che'. 21 Na' še bene' že': "Yodaon' zoan testigw chia' gona' can' ba gwnia'", lecze zejen Diosen' naque' testigw che', le yodaon' naquen che Dios na' nan' zoe'. 22 Na' še bene' že': "Yaban' zoan testigw chia' gona' can' ba gwnian'", zejen Diosen' naque' testigw che', le nan' zoa Diosen' chnabi'e.

23 'iNyaše'chguaze gac che le'e chsed chlo'ele ley dan' bzoj da' Moisés na' le'e bene' fariseo! iNacle bene' gwxiye'! La'czla' chnežjwle Diosen' to part lao ši part che yixegüej, che oreg, che comin, na' che bichle cuan chele, bibi zejen dan' bitw chzenagle che da' ca' zjanac da' žialaoch dan' ža leyna'. Leyna' žan cheyała' gonle da' nac güen lao Diosen', na' cheyała' yeyaše'laže' ljež benachle na' cheyała' gonle can' ba gwlo'o cho'ale gonle. Da' ca' zjanaquen da' zejehen gonle, perw lecze bitw cheyała' cuejyichjle bi gwnežjwle da' ca' chnežjwle Diosen'. 24 iNacle ca to bene' lchol bene' chesacde' guac yesegüe'e nez bene' yoble! Zaca'lebele ca to bene' chebej yogo' beb dao' riz da' nchixe' da' che'eje' perw bitw chache'ede' še yo'o to da' xen juisyw da' zaca' yebeje'. Le chi' yichjle che da' ca' bitec bi zaca' da' ža ley chechon' cheyała' goncho, na' bi chonle da' ca' zjazaca'chguan.

25 'iNyaše'chguaze gac che le'e chsed chlo'ele ley dan' bzoj da' Moisés na' le'e bene' fariseo! iNacle bene' gwxiye'! Zaca'leble ca ye'en dan' chchin bene' na' chyibe' cožen' perw bi chyibe' lo'en. Chonle cont chesaque bene' nacle bene' güen, perw leca chzelaže'le bi da' de che bene' na' chbechgüele chca'alén. 26 iLe'e bene' fariseo, nchol yichjlažda'olen'! Le yetinje xtola'le cont da' licze gacle bene' güen can' chaclaže'le yeson bene' xbab nacle. Nach gacle ca to ye'en dan' nyibe' cožen' na' lo'en.

27 'iNyaše'chguaze gac che le'e chsed chlo'ele ley dan' bzoj da' Moisés na' le'e bene' fariseo! iNacle bene' gwxiye'! Zaca'leble ca to ba dan' zjanone' xdanchgua lagüen perw lo'en že' žit che bene' guat na' chi'chgua da' zban. 28 Chonle cont chesaque bene' nacle bene' güen, perw len yichjlažda'olen' nacle bene' gwxiye' na' bene' malchgua.

²⁹ 'iNyaše'chguaze gac che le'e chsed chlo'ele ley da' bzoj da' Moisés na' le'e bene' fariseo! ¡Nacle bene' gwxiye'! Chonšagüe'le cho'a ba che da' bene' gosoe xtiža' Diosen' cani', na' chonšagüe'le cho'a ba che yezica'chle bene' goson da' güen. ³⁰ Na' žale: "Šaca' chio' ba zoacho ca tiemp che da' xozxta'ocho ca', bitw bencho txen len legaque' cate' gosote' bene' ca' gosoe xtiža' Diosen' cani'." ³¹ Perw na' yogo'lołte dan' chonle chlo'en tozcze can' nacle len da' xozxta'ole ca' bene' gosot da' bene' ca' gosoe xtiža' Diosen' cani'. ³² Le gwza'laošaze le gon bica'ch da' zgot dan' bitw goła' yeson da' xozxta'ole ca'.

³³ 'Le'e nacchgualle bene' zgot na' bene' gwxiye'. Bitw gac yelale lao castigw dan' gon Diosen' le'e, le sele' le'e lo yi' gabilen'. ³⁴ Na' da' gona', neda' sela' no bene' yesoe xtiža'na' len le'e na' no bene' sina' na' nochle bene' yososedde' le'e xtižan'. Na' gotle bale' gwda'gaclene' to le'e yag cruz, na' yebale' chinle do lo' yodao' chelen', na' yebale' gwlaglene' gate'teze yež šja'aque'. ³⁵ Na' dan' gonle ca' gaple doła' che yela' got che yogo' bene' ca' goson da' güen, ben' gosot da' xozxta'ole ca' gwzolaozen len da' Abel ben' naque' bene' güen lao Diosen' na' beyožen len da' Zacarías xi'in da' Berequías. Zacaríasen' gosote'ne' do gan' zoa yodao' blaon' na' do gan' ze mes gan' chosozeye' beyixe' chesonxene' Diosen'. ³⁶ Na' da' li žia' le'e, le'e mbanle na'a si'le castigw che yela' got che yogo' bene' ca' gosot da' xozxta'ole ca'.

Begüine' Jesúsén' che xtoła' bene' Jerusalén
(Lc. 13:34-35)

³⁷ 'Le'e bene' Jerusalén, chotle bene' ca' chsela' Diosen' cont chesoe'lene' le'e xtižen' chchellene' yej. Zan ni'a ba goclaža' yotoba' le'e ca' to jed xcaca' ben' nche' xi'in na' chyežba' legacba', perw bitw goclaže'le. ³⁸ Na' na'a ba gwlejšyichj Diosen' le'e. ³⁹ Na' žia' le'e, bich le'ele neda' na'a, perw cate'ch žin ža le'ele neda' yeto nach nale: "Mbalaz ben' za' nga nselā' Xancho Diosen' le' nabi'e".

24

Gwžin ža yosyočinje' yodao' blaon'
(Mr. 13:1-2; Lc. 21:5-6)

¹ Na' ba cheza' Jesúsén' yodao' blaon' šeje' ga yoble cate' bene' ca' zjanaque' le' txen gosebigue' gan' zoe'na' na' gosezolagüe' gosoe diža' catec xdan nac yodaon' na' lecze ca' yo'o ca' zjanyechjen. ² Nach Jesúsén' boži'e xtiža'gaque' gwne':

—Ca nac yogo' da' quinga chle'ele, da' li žia' le'e, ne to yej da' zjancua' nga ca yega'an zjancua' cože' lježen. Yogon' yosyočinje'.

Dan' gac cate' ba za' bagwze yeyož yežlio nga
(Mr. 13:3-23; Lc. 21:7-24; 17:22-24)

³ Na' ja'aque' Ya'a Olivos. Na' cate' Jesúsén' ba chi'e lo ya'an, bene' ca' zjanaque' le' txen gosebigue' lagüen' gose'ene' šižize:

—Che'neto' nao' neto' batcan' gac da' ca'. Na' ¿nac gac nezeto' cate' ba zoa bagwze yido' na' ba zoa yeyož yežlion'?

⁴ Nach Jesúsén' boži'e xtiža'gaquen' gwne':

—Le gwsaca' cont notno siye' le'e. ⁵ Le zan bene' yesaš yežlio nga bene' yesaclaže' yosolane' xlatja' nga. Na' yesene': "Nedan' Cristo ben' gwlej Diosen' cont nabi'e." Na' yeseziye'e bene' zan. ⁶ Na' yenele chac gwdiłe nile nale, na' yenele guac gwdiłe, perw bi žeble, le can' cheyała' gac. Perw gague lenna' nacho ba bžin ža yeyož yežlion'. ⁷ Le yesedił to yež len yeto yež yoble na' to nación len yeto nación yoble. Na' cue' yižgüe', na' gata' gwbin na' zan cuen ga xo'chgua lo yežlion'. ⁸ Perw na' yogo' da' qui gac cate' za' solao gata' yela' zi'.

⁹ 'Nach bene' ca' že' yogo' nación yesegue'ede' le'e dan' chejnilaže'le neda' na' yesone' le'e lo na' bene' ca' chesegue'e le'e na' yososaca'zi'e le'e nach yesote' le'e. ¹⁰ Cana' bene' zan bene' ba chesejnilaže' neda' yesebejyichje' bich yesejnilaže' neda'. Na' legacteze' yesechje' yeson lježgaque' lo na' bene' da' chesegue'ede' legaque'. ¹¹ Na' bene' zan yesonlaže' yesene' xtiža' Diosen' cheseyixjue'ede' na' yeseziye'e bene' zan. ¹² Na' lagüe dan' šanch bene' ca' yeson da' malen', bene' zan juisyw bene' ba chesejnilaže' neda' bich yesacde' lježe'. ¹³ Perw na' note'tezle gwyo gwchejlaže'le cont bi cuejyichjle dan' chejnilaže'le neda' žinten gatle, nach šjayzoale len Diosen'. ¹⁴ Na' šja'ac bene' doxen lo yežlion' yesejixjue'ede' diža' güen cont yeseneze beňachen' cheyala' yosozenague' che Diosen' nach nabi'e yichjlažda'ogaque'. Na' cate' bene' že' yogo' nación ba zjanezde' da'na', cana'ch yeyož yežlion'.

¹⁵⁻¹⁶ 'Da' Daniel ben' gwdixjue'ede' xtiža' Dios can' bzoje' che da' zbanchgua da' gwxiñjen latje gan' chonxencho Diosen'. Na' cate' le'e le'ele ba zoa dan' gan' zoa yodao' blao, cana' bene' yesenita' distritw Judea cheyala' yosoxonje' šja'aque' do ya'adao'. (Bene' gwlaben' cheyala' šejni'iden'.) ¹⁷ Na' bene' chda do yichjo'o che ližen', bi yeyetje' yotobe' xšinlaze' že' ližen', con yoxonje'. ¹⁸ Na' bene' chda yixe' bi yeyej liže' šjayxi'e xalane'. ¹⁹ ¡Nyaše' chguaze zjanac no'ol ca' zjanao' xi'ñ na' no'ol ca' ne' chosoguaže' bidao' lo ža ca'! ²⁰ Na' le nab lao Dios bi yažjen gwxonjle cate' chac zag o lo ža che Dios. ²¹ Le yesaquen ža da' leca yesale' bene'. Cate' gwxete yežlion' na' ža na'aža nono na' gale' ca', neca žinlažen' yesale'de' ca' da' yoble. ²² Na' šaca' Xancho Diosen' bi yozaše' žan' yesac ca', notno yela, perw yozašen' neche chacde' bene' ca' chesejnilaže' le', bene' ba gwleje' zjanaque' xi'ine'.

²³ 'Cana' še no ye' le'e: "Le na'šc, nga zoa Criston' ben' gwlej Diosen' cont nabi'e", o "Le na'šc, na' zoe", ne ca'cze bi šejle'le. ²⁴ Yesaš bene' gwxiye' bene' yesaclaže' yosolane' xlatja' nga, na' yeson cuine' ca' bene' chesoe' xtiža' Dios. Na' yesone' yela' guac da' yesele'e bene' na' bichle da' zaca' yesyebande' cont yeseziye'e legaque'. Na' len bene' ca' ba gwlej Diosen' zjanaque' xi'ine' yesaclaže' bene' gwxiye' ca' yeseziye'e šaca' gac yeseziye'e legaque'. ²⁵ Ba nezele can' gac, le ba gwdixjue'eda' le'e yogo' can' gac. ²⁶ Na' še yese'e le'e: "Zoa Criston' latje dašen'", bitw gwzenagle chegaque', bitw šejle. Na' še yese'e le'e: "Zoa Criston' lo' yo'ona'", bitw šejle'le chegaque'. ²⁷ Can' chac cate' chep yes chsenin' doxen le'e yaban' zejzenez, lecze can' gac cate' žin ža yida' da' yoble, Diosen' gwsele' neda' golja' beňach. Yida' zejzenez na' yogo'lol bene' yesele'ede' neda'. ²⁸ Nga chonen che ben' že': "Gan' de be guat nan' chesežag šod ca'."

Can' gac caten' yid Jesucriston' da' yoble

(Mr. 13:24-37; Lc. 21:25-33; 17:26-30, 34-36)

²⁹ 'Na' cate' la' yeyožte saca'zi' beňachen', gwbižen' yeyaquen chol, na' bion' bich gwseñin'. Nach beljw ca' yeselažon' le'e yaban', na' yogo' da' chle'echo le'e yaban' yesaquen ca' chac yežlion' cate' chxo'. ³⁰ Na' cana'ch bene' že' yežlion' yesele'ede' neda' naca' ben' gwsela' Diosen' golja' beňach za'a ladjo bejon' len yela' guac xen na' yela' bene' zaca' juisyw chia'. Na' bene' že' yogo' nación che yežlion' yesebežyaše', bene' bi gosejnilaže' neda'. ³¹ Na' caten' yida', to trompeta' cuežen žiže, na' seła' angl chia' ca' doxen yežlion' yosyotobe' bene' ca' ba gwleja' cont zjanaque' neda' txen gate'teze nite' doxen lo yežlio ga zelao nac zito'.

³² 'Le gwzenag che jempl nga che yag yixgüigw: Cate' ba chzolao chebešjw yaguen' na' chelan' laga' che'eñ dao', chacbe'ele bach zoa yela' tiemp yejon'. ³³ Na' lecze cate' le'ele ba chac da' mal ca' ba gwnian', cana'ch nezele ba za'

juisyw, ba zoa gala'. ³⁴ Da' li žia' le'e, bina' yenit diaža che le'e nita'le na'a cate' ba goc yogo'lol da' ca'. ³⁵ Le'e yaba na' yežlion' yesede chen, perw ca nac xtižan', gague da' te cbi gac can' žanña'.

³⁶ 'Perw nono neze bi ža bi horen' gac ca', ne angl ca' nita' yaba, neca neda' naca' Xi'in Diosen' bi nezda'. Toz Xa' Dios neze.

³⁷ 'Diosen' gwsele' neda' golja' benač, na' can' goc tiemp che da' Noé, lecze can' gac caten' neda' yida' da' yoble. ³⁸ Bene' ca' gosenita' tiemp che da' Noén' gosenite' chese'ej chesagüe' na' chosošagne'e na' chosošague' na' no xi'ingaque'. Ne' chesonte' ca' caten' bžin ža gwyo'o Noén' lo' barcon'. ³⁹ Bitw gosache'ede' bin' gac. Cate'ch goc yejw sio' juisyw na' bia' nisen' yogo'lole' cana'ch gosache'ede'. Lecz can' gac, con cate'ch yida' da' yoble cana'chen' yesache'e bene' bin' gac. ⁴⁰ Quingan' gac caten' yida' da' yoble: Chope bene' nite' do yixe', toe' yezi' yeca'a, na' yetoe' yocua'ana'. ⁴¹ Na' chope no'ole nite' chesote', toe' yezi' yeca'a na' yetoe' yocua'ana'.

⁴² 'Da'nan' le soa le cueze, le bi nezele bi ža bi horen' yida' da' yoble, neda' naca' Xanle. ⁴³ Le gon xbab che da' nga, šaca' neze xan yo'on' do bi hor lo yelen' žin bene' gwbanña' ližen', na'ze' cont bitw güe'e latje šo' ben' ližen' cuane' xšinlazen'. ⁴⁴ Da'nan' le soa le cueze batcan' yida' da' yoble, le cate' bi chonle xbab yida', cana' yida', neda' naca' ben' gwseła' Diosen' golja' benač.

Mos ben' chon güen, na' mos ben' bi chon güen

(Lc. 12:41-48)

⁴⁵ 'Note'tezle še zoale lez bate'teze, zaca'leble ca to mos bene' naque' bene' sina' na' bene' chon da' cheyala' gone'. Na' še to bene' mos chonchgüe' güen, nach xanen' cue'e lo ne'e ližen' cate' se'e cont mosen' gwnežjue' da' yesagw yogo' mos ca' cate' ba gole' yesagüe' tža tža. ⁴⁶ Še to bene' mosen' chonteze' can' gož xanen' le', mbalaz soe' cate' yežin xanen'. ⁴⁷ Da' li žia le'e, xanen' cue' lo na' mosen' yogo'lol da' de che'. ⁴⁸ Perw še mosen' naque' bene' zgot na' gone' xbab ne': "Ba gwže xanan'". ⁴⁹ Nach solagüe' tile' mos ca' yezica'chle na' ye'ej gagwxate' len no bene' borrašw, ⁵⁰ nach xane'na' yežine' to ža senyale' le' to hor bi nache'ede'. ⁵¹ Na' dan' bi chon mosen' ca cheyala' gone', xane'na' chinchgüe' le' ca gatte'. Gac che' can' chac che note'teze bene' gwxiye', chjaya'aque' gabilen' gan' chesebežyaše' na' chesagwxejte laye' dan' leca chesežaglagüe'.

25

Jempl che ši no'ole güego' ja'aque' to yela' güešagna'

¹ Nach Jesús'en' goze'e bene' ca' zjanaque' le' txen:

—Cheyala' soale lez batcan' yedenabi'a, can' gwnita' no'ole chesejni'i no'ol ca' za' gua'a diža' chen'. Goc to yela' güešagna', na' nita' ši no'ol güego' zjanaque' migw che bene' ca' chosošagnan'. Na' zjanxobe' lintern čegaque' ja'aque' jaseleze' yesyechoj bene' ca' liž no'olen' par šja'aque' liž bene' byon' txen. ² Na' gayo' no'ol ca' gosaque' bene' chejni'i na' yegayoe' bibi xbab gosone'. ³ Cate' no'ol ca' bibi xbab goson gosa'ac liže', zjanxobe' lintern čegaquen', perw bitw gosoxe' botey gan' yože set dan' yosočhine' cate' yebiž dan' yože lo' lintern čegaquen'. ⁴ Na' no'ol ca' chesejni'i, zjanxobe' lintern čegaque' lente botey seten' dan' yosočhine' cate' yebiž dan' yože lo' lintern čegaquen'. ⁵ Na' bene' güešagna' ca' gosežede' na' no'ole ca' gosebeze' legaque' gosetase' šlac chesebeze'ne'. ⁶ Na' do chel, to bene' gwne' zižje, gože' legaque': "Ba chesyechoj bene' güešagnan'. Le šo'o šjašagchone'." ⁷ Na' cate' gože' legaque' ca', yogo' no'ol ca' gosezeche' na' gosečogue' mešw dan' gwyey che lintern

na' bosyogualen' da' yoble. ⁸ Na' no'ol ca' bibi xbab cheson gose'e no'ol ca' yegayo': "¿Bi gonle late' dan' yože botey chelen' neto'? le ba chebiž cheton'." ⁹ Nach no'ol ca' gose'e legaque': "Bitw gac gonto' late' chele, le dan' de cheton' bitw gaquen par yogo'cho. San le šja'ac le šjaxi' chelen' ga choten'." ¹⁰ Nach no'ol ca' bi goson xbab ja'aque' jasexi'e seta'. Na' šlac zja'aque' besyežin bene' ca' chosošagna' liž bene' byon'. Na' no'ol ca' gosaque' bene' chejni'i, goso'e txen len bene' ca' chosošagnan' lo' yo'o gan' chesone' lnin'. Nach mos ca' bososeyjue' puerten'. ¹¹ Na' cate' besyežin no'ol ca' bi goson xbab, gosene' cho'a puerten', gose'e ben' zoa lo' yo'on: "Bene', gwsaljwšca puerta' cont šo'to'." ¹² Perw na' gože' legaque': "Da' li žia' le'e, bitw saljua' šo'le le bitw nombi'a le'e."

¹³ Nach gož Jesúsen' bene' ca' zjanaque' le' txen:

—Ca'czen' cheyala' soale lez batcan' yedenabi'a, le bitw nezele bi ža bi hor yida' yežlio nga da' yoble, neda' naca' ben' gwsela' Diosen' golja' benach.

Jempl che ben' bocua'anlene' xmose' ca' mechon'

¹⁴ Na' dan' yida' yežlio nga da' yoble yedenabi'a zaca'leben ca da' nga goc. To bene' gwyeje' nación zito'. Na' za' se'e goxe' mos che' ca' na' gwlo'e lo' na'gaque' xmechue' cont gosone' delgens. ¹⁵ Toe' bocua'anlene' gayo' mil. Na' yetoe' bocua'anlene' chop mil. Na' yetoe' bocua'anlene' to mil. Bnežjue' legaque' con ca ble'ede' da' chac yeson to toe'. Beyož bene' ca' na' gwze'e. ¹⁶ Na' ben' bocua'anlene' gayo' mil la' gwzolaote chone' delgens len mechon' na' bene' gan lecze gayo' mil. ¹⁷ Lecze ca' ben' ben' bocua'anlene' chope mil, na' bene' gan yechope mil. ¹⁸ Na' ben' bnežjue' to mil gwyeje' jacuaše' xmechw xanen' to lo' yechw da' gwche'ene' lo' yo.

¹⁹ Goc šsa gwza' xan mos ca' cate' bežine', nach bene' mandadw ja'ac xmose' ca' lagüen' cont bosyodie' cuent. ²⁰ Mosen' ben' bocua'anlene' gayo' mil bžine' lagüen' na' gože'ne': "Xana', ni de da' gayo' mil dan' beno' neda'. Na' ba bena' gan yegayo' mil." ²¹ Na' xane'na' gože'ne': "Ba beno' da' güen. Naco' mos güen na' ba beno' ca' cheyala' gono'. Na' dan' beno' can' cheyala' gonon' len da' daon' bocua'anlena' len', da'nan' gona' lo' nao' da' xench. Gwyo'o cont so' mbalaz len neda'." ²² Nach cate' bžin ben' bocua'anlene' chope mil, bena' gože'ne': "Xana', ni de da' chope mil dan' bocua'anlene' neda', na' ba bena' gan yechope mil." ²³ Nach gož xanen' le': "Ba beno' da' güen. Naco' mos güen na' ba beno' ca' cheyala' gono'. Na' dan' beno' can' cheyala' gonon' len da' daon' bocua'anlena' le', da'nan' gona' lo' nao' da' xench. Gwyo'o cont so' mbalaz len neda'." ²⁴ Nach cate' bezžin ben' bocua'anlene' to mil, nach gože' xane'na': "Nga de xmecho' dan' bocua'anlene' neda'. Nežda' naco' to bene' znia. Chelapo' da' gosaz bene' yoble, na' chotobo' coseš ga goson bene' yoble žin. ²⁵ Da'nan' gwy'a ja'che'ena' to yechw na' bcuaša' xmechon', le bžeba' še gwñitan'. Na' na'a bežišcan'." ²⁶ Nach xanen' gože' le': "iNaco' mos mal, na' naco' xagüed! Neždo' chelapa' ga gosaz bene' yoble, na' chotoba' coseš ga goson bene' yoble žin. ²⁷ Na' lagüe da' neždo' chona' ca' ¿bixchen' bi gwlejo' xmechuan' bene' yoble cont yezi'an len yichjen na'a ba bela'a?" ²⁸ Nach gože' xmose' ca' yezica'chle: "Yeca'ale mechon' dan' bocua'anlena' benga na' gwnežjwlen ben' ba noxe' ši mil. ²⁹ Can' naquen, note'teze bene' chon güen len dan' chnežjo xanen' le', xanen' gwnežjochcze' che', cont gata' da' zcha'och che'. Perw na' note'teze bene' bi chgone' žin dan' chnežjo xanen' le', yeca'a xanen' da' daon' noxe'na'. ³⁰ Na' ca' nac mos xagüed nga, le yebeje' le che'exoxje' gan nac chol' na' cuežyaše' na' gagwxejte laye' dan' leca žaglagüe'."

Can' gac cate' Jesúsen' gone' yela' justis che yogo' nación

31 'Diosen' gwsele' neda' golja' benach, na' cate' yida' da' yoble nsa'a yela' zaca' juisyw chia' na' nchi'a yogo' angl chia' ca', cana'ch cui'a nabi'a guen juisyw can' chnabia' Dios ben' zoa yaba. 32 Na' yapa' yogo' bene' che yogo' naci6n ca' yeside' laguan'. Na' cate' ba nita' yogue' na' la'ane' can' chon to bene' gueye xila' cate' chebeje' partle xila' ca' na' partle sib ca'. 33 Na' bene' ca' zjanac bene' guen lao Diosen' dan' ba gosejnilaze' neda', gwnita' legaque' cuitan' sla'a licha. Perw bene' mal ca', gwnita' legaque' cuitan' sla'a robes. 34 Na' neda' naca' rey yapa' bene' ca' nita' sla'a lican': "Ba ben Xa' Diosen' cont le'e soale mbalaz. Le da nga cont gona' nabi'a'le txen len neda' can' ba nzia bia' Diosen' cate' gwxcete yežlio. 35 Gona' cont nabi'a'cho txen, le cate' gwdona' le'e benle dan' gwdagua'. Na' cate' gwbiłda' nis, le'e benle da' gue'aja'. Na' cate' goca' ca' bene' zito' le'e bleble neda' ližlen'. 36 Na' cate' bi gota' da' chaza', le'e benle da' gwyaza'. Na' cate' gocšenda', le'e bedetiple laža'. Na' cate' gota' ližya, le'e bedena'le neda'." 37 Na' bene' guen ca' yese'e neda': "Xanto', žbaten' ble'eto' le' gwdono' na' bento' da' gwdago'? Na' žbaten' gwbiłdo' na' bento' da' gue'ajo'? 38 Na' žbaten' goco' ca' bene' zito' na' blebto' le'? Na' žbaten' ble'eto' le' bi de da' chazo' na' bento' da' gwyazo'? 39 Na' žbaten' gocšendo' o goto' ližya na' bedena'to' le'?" 40 Na' neda' naca' rey yape'gaca'ne': "Da' li žia' le'e, bene' ca' chesejnilaze' neda' zjanaque' ca' biša' na' ca' zana'. Na' yogo' ni'a cate' beyaše'laže'le legaque', la'czla' bitec bi zjazaque' len benachen', lencze nedan' beyaše'laže'le."

41 'Nach bene' ca' nita' sla'a robesle, bene' mal ca', yape'gaca'ne': "Le cuas ca'ale. Ba žia bia' chele cuiayi'le yela' guen da' mal chelen'. Le šja'ac lo yi' gabil dan' bi cheyol, yi' dan' bxcen Diosen' cont saca'zi' Satanás toli tocaņe len da' xigüe' ca' cheson xšinen. 42 Le šja'ac lo yi' gabilen', le cate' gwdona' bitw benle dan' gagua'. Cate' gwbiłda' bitw benle da' ye'aja'. 43 Cate' goca' ca' bene' zito' bitw bleble neda' ližle. Cate' bi gota' da' chaza' bitw benle da' chaza'. Cate' gocšenda' na' cate' gota' ližya, bitw bedena'le neda'." 44 Nach legaque' lecze yosyoži'e xtižan' yesene': "Xanto', žbaten' bi beyaše'to' le' cate' gwdono' o gwbiłdo', o goco' bene' zito', o bi gota' da' chazo', o gocšendo', o goto' ližyan'?" 45 Na' yeyož yese'e neda' ca' nach yape'gaca'ne': "Lagüe' dan' bi beyaše'laže'le bene' ca' chesejnilaze' neda', la'cze bibi zjazaque' len benachen', da'nan' lencze nedan' bi beyaše'laže'le." 46 Nach bene' mal ca' yesezaca'zi'e toli tocaņe. Perw bene' ca' chesone' guen lao Diosen' yesezoe' mbalaz toli tocaņe.

26

Bosoxi'e nac yesone' yesezene' Jesúsen'
(Mr. 14:1-2; Lc. 22:1-2; Jn. 11:45-53)

¹ Cate' beyož be' Jesúsen' diža' ca', gože' bene' ca' gwleje' cont zjanaque' txen len le':

² —Ba nezele yechope žazen' gała' lni pascw chechon'. Na' cana' gaca' lo na' bene' ca' chesegue'ede' neda' na' yesote' neda' yosode'e neda' to le'e yag cruz, neda' naca' ben' gwseła' Diosen' golja' benach.

³ Nach bxoz gwnabia' ca' na' bene' ca' chososed chosolo'e dan' bzoj da' Moisésen' na' bene' gole blao ca' chesenabi'e naci6n Israel chechon' besedobe' chyo'o liž bxoz blao ben' le Caifás. ⁴ Na' cheseyiljwlaže' naclen' yesone' yeseziye'e Jesúsen' cont yesezene'ne' yesote'ne'. ⁵ Na' gosene':

—Bi senchone' lo lnin' cont ca' yesebec bene' žaš.

To no'ole bzoe' set zix yichj Jesúsen'
(Mr. 14:3-9; Jn. 12:1-8)

⁶ Nach goquen' Jesúsen' len bene' ca' gwleje' cont zjanaque' txen len le' nite' Betania liž Simón ben' güe'e yižgüe' da' nzi' lepra. ⁷ Na' šlac chi' Jesúsen' cho'a mesen', bžin to no'ole noxe' to de yejese ga chož set da' chla' zix da' leca chzaca' la'ay. Na' no'olen' bzoačhochje' seten' yichj Jesúsen'. ⁸ Na' bene' ca' zjanaque' txen len Jesúsen' cate' besele'ede' can' ben no'olen' beseže'e na' gosene':

—¿Bixchen' con benditjde' set zix nga? ⁹ Ša no bete' len, yesonen mechw xen na' yosonežjuen' gaclenen bene' yaše'.

¹⁰ Jesúsen' goche'ede' bin' gosene' nach gože' legaque':

—¿Bixchen' chnele che no'olen'? Dan' bene' len neda' nga naquen güen. ¹¹ Le bene' yaše' ca' bate'teze nita'cze' len le'e, san nedan' bich soa' yesša len le'e. ¹² Dan' bguazje'nda' set zixen' bene' dan' cheyała' yesone' len neda' cate' gaša'. ¹³ Da' li žia' le'e, doxen yežlio gate'teze šjasedixjue'e bene' diža' güen dan' chzejni'in chia', decze de yesene' can' ben no'ol nga, cont šjasyeze'ede'ne'.

Judas Iscariote bene' Jesúsen' lo na' bene' chesegue'ede' le'

(Mr. 14:10-11; Lc. 22:3-6)

¹⁴ Gwde da' quinga, Judas Iscariote ben' goque' txen len bene' šižinw ca' ben' gwlej Jesúsen' cont zjanaque' txen len le', gwyeje' jane'e bžox gwnabia' ca'.

¹⁵ Na' ježe' legaque':

—¿Gaca'te' gonle neda' cont gwdia' Jesúsen' lo na'le?

Nach bosoxi'a bene' ca' yosonežjue'ne' šichoa mechw plata na' bosonežjue'nen'. ¹⁶ Nach cana' Judasen' gwzolagüe' gw diljwlaže' nac gone' gw die' Jesúsen' lo na'gaquen'.

Jesúsen' blo'ede' legaque' can' yesone' šjasyeza'laže' yela' got chen'

(Mr. 14:12-25; Lc. 22:7-23; Jn. 13:21-30; I Co. 11:23-26)

¹⁷ Na' bžin ža chala' lni caten' chesagüe' yetextil dan' bibi levadura yo'o, na' ža nechw che lnin' bene' ca' zjanaque' Jesúsen' txen ja'aque' gan' zoe' na' gose'ene':

—¿Gan' che'ndo' šjasiñi'ato' cont gagwcho xše' che pascon'?

¹⁸ Nach Jesúsen' gože' legaque':

—Le'e šja'ac ciudan' gan' zoa to bene' byo ben' nombia'cho na' ye'lné: “Maestron' že' ba zoa žin ža gac da' cheyała' gac che', na' ližo' nga che'nde' gagwlento'ne' xše' lni pascon'.”

¹⁹ Nach bene' ca' gosone' can' gož Jesúsen' legaque', jasesiñi'e xše' že' lñina'.

²⁰ Na' cate' beyož gw xoa gwbiž, Jesúsen' len bene' šižinw ca' gwleje' cont zjanaque' le' txen gosebi'e cho'a mesen' gosagüe'. ²¹ Na' šlac chesagüen' gož Jesúsen' legaque':

—Da' li žia' le'e, to le'e gwdele neda' lo na' bene' ca' chesegue'e neda'.

²² Nach legaque' besyeyaše'laže'de', nach gosezolagüe' tgüeje tgüeje' gosenabde' le' gose'ene':

—Xana', ¿nedan' gona' ca'?

²³ Nach gože' legaque':

—To ben' chagw len neda' txen tož lo' ye'eñ, le' gw die' neda' lo na' bene' ca'. ²⁴ Na' gac chia' can' nyoj le'e Xtiža' Diosen', neda' naca' ben' gwsel'a' Diosen' golja' benač, perw nyaše'chguaze nac ben' gw die' neda' lo na' bene' ca'. Yejni'acle ša bi golje'.

²⁵ Nach Judasen' ben' za' gw die' Jesúsen' lo na' bene' ca' gože'ne':

—Maestrw, ¿nedan' gw dia' le' lo na' bene' ca'?

Jesúsen' gože'ne':

—Le len'.

26 Na' šlac chesagüen', Jesúsen' gwxi'e to yetextilen' na' beyož be'e yela' choxc̄clen che Dios, bzojjen' na' bnežjuen' bene' ca' zjanaque' le' txen, gože' legaque':

—Le gagon'. Lenna' cuerp chian'.

27 Nach beꝛue' to vas gan' yože nis uvasen', na' beyož be'e yela' choxc̄clen che Dios boznežjuen' legaque', goze'ene':

—Yogo'le, le ye'ej late' güeje dan' yože lo' vas nga. 28 Da' nga xchena' na' chzanlažan' laljen neche xtola' yogo'lol benach. Na' laljen cont solao gac da' cob dan' gwna Diosen' gone' gaclene' benachen'. 29 Chnia' le'e, bich ye'aja' nis uvas na'a. Cate'ch žin ža ba zoacho txen gan' zoa Xa' Diosen' chnabi'e, cana' ye'ejan' da' yoble.

Jesúsen' gwne' Pedroa' bi chebe' še nombi'e le'

(Mr. 14:26-31; Lc. 22:31-34; Jn. 13:36-38)

30 Na' beyož gosonxene' Diosen' len to da' gosole', nach gosa'aque' ja'aque' Ya'a Olivos. 31 Na' šlac zjangüe'e nezen' Jesúsen' gože' legaque':

—Na'aže' yogo'le cuejyichjle neda' neche dan' gac chian'. Le nyojzen le'e Xtiža' Diosen' žan: “Gota' bene' güeye' xilan' na' xila' ca' yesaslasba.” 32 Perw na' cate' yosban Diosen' neda' ladjo bene' guat ca', yobch yeya'a Galilea ca' le'e.

33 Nach Pedroa' gože' Jesúsen':

—La' yogo' bene' quinga yesebejyichje' le', neda' gwbat gona' ca'.

34 Jesúsen' gože' le':

—Da' li žia' le', biņa' cuež jean' na'aže' cate' gac šon ni'a bi chchebo' še nombi'o neda'.

35 Nach Pedroa' gwne':

—La'czla' še chonen byen guatlencza' le', gwbat nia' bi nombi'a le'.

Na' lecze ca' yogo' bene' šižinw ca' zjanaque' Jesúsen' txen gosene' ca'.

Jesúsen' bol güiže' Diosen' to latje dan' nzi' Getsemaní

(Mr. 14:32-42; Lc. 22:39-46)

36 Nach besežine' latje gan' nzi' Getsemaní, na' Jesúsen' gože' bene' ca' zjanaque' le' txen:

—Ngaze le cue' šlac ša'a na'le šjal güiža' Diosen'.

37 Na' gwche'e Pedroa' len chop xi'in Zebedeo, Jacobon' len Juanna'. Na' Jesúsen' gwzolao gocyaše' chgüede', na' benchgüe' xbab. 38 Nach gože' legaque':

—Lo' yichjlažda'oguan' chacyaše' chgüeda', chacda' con gatca' catequen' chžaglagua'. Nga le yega'an bi tasle, le na' txen len neda'.

39 Nach Jesúsen' gwžialagüe' yelate' na' jachaze' lo yon' coscho'ale nach bol güiže' Diosen', gwne':

—Xa', še guac ten ca'ale, benšca cont bi saca'zi'a na' bi yesote'nda' can' ba zoa gaca'. Perw bi chnaba' gac da' nia' neda', san gac can' nao' le'.

40 Nach beyeje' gan' nita' bene' ca' šone na' ble'ede' zjanite' chesetase'. Na' gože' Pedroa':

—¿Ne šlož dao' ca' goc cuejle bišgal len neda'? 41 Bi tasle na' le yol güiž Dios cont bi gon gwxiyen' le'e gan'. Nežda' che'nele na'zle len neda' perw bi chzoale.

42 Na' gosze'e gan' nite' na' da' yoble jal güiže' Diosen', gwne':

—Xa', še gac ten ca'ale, benšca cont bi saca'zi'a na' bi yesote'nda', perw gac con can' che'ndo' le'.

43 Na' bezyeje' gan' niten' na' da' yoble ble'ede' chesetase' le ba chesežode' yejlagüen' bišgal. 44 Na' gwze'e da' yoble gan' nite'na' jal güiže' Diosen' da' gwyone ni'a, na' goznacze' da' yoble can' ba gwnen'. 45 Na' bezžine' gan' nita' bene' ca' šone nach gože' legaque':

—Na'ach gwaque tasle na' yezi'laže'le. Ba gole gwde to bene' neda' lo na' bene' güen da' xinj ca', neda' naca' ben' gwsela' Diosen' golja' benach. ⁴⁶ Le chas. Le yeyo'o. Ba za' ben' gon neda' lo na'gaque'.

Judasen' bdie' Jesúsēn' lo na' bene' chesegue'ede' le'

(Mr. 14:43-50; Lc. 22:47-53; Jn. 18:2-11)

⁴⁷ Ne' choe'te Jesúsēn' dižan' ca' cate' bžin Judas ben' goque' txen len bene' šižinw ca' gwlej Jesúsēn' cont zjanaque' le' txen. Na' zan bene' zja'ac len le' zjanoxe' no yag, no spada, bene' gosesela' bχoz gwnabia' ca' na' bene' gole blao ca' chesenabi'e nación Israel chechon'. ⁴⁸ Na' Judas ben' bdie' le' lo na' bene' ca', gože' legaque' nac yesenezde' non' yesezene', gwne':

—Ben' gwnopa' xague', le'na' Jesús. Le sene'.

⁴⁹ Nach la' gwbiga'te' cuit Jesúsēn', gože'ne':

—Patiox, Maestrw.

Na' bnopē'ne'. ⁵⁰ Jesúsēn' gože'ne':

—Migw chia', ¿bixchen' zao' nga?

Nach la' gosebiga'te' bene' ca' gosezene' Jesúsēn' na' goseche'ene'.

⁵¹ Na' to ben' nac txen len Jesúsēn' gwleje' spada chen' na' gwddinen' mos che bχoz blaon' gwchogte' šla'a naguen'. ⁵² Nach Jesúsēn' gože'ne':

—Bego'o spada chion' lo' liženna', le yogo' bene' chesote' bene' len spada, lecze len chesatlēne'. ⁵³ ¿Bi nezdo' guac nabda' Xan' cont la' sela'te' angl zan juisyiw bene' yesaclēne' neda'? ⁵⁴ Perw še gona' ca' ¿nacxe gac dan' cheyala' gac dan' nyoj Xtiža' Diosen' žan quinga gaquen'?

⁵⁵ Nach Jesúsēn' gože' bene' ca' zjasezen le':

—¿Bixchen' nonle neda' ca to bene' gwban za'acle zedexi'le neda' len spada len yag? Yogo' ža gwchi'a chyo'o yodao' blaon' bsd blo'eda' bene' že'na' na' bi gwzenle neda'. ⁵⁶ Perw chac da' qui cont chac can' ža Xtiža' Diosen' dan' bosozoj da' bene' goso'e xtižen' cani'.

Nach yogo' bene' ca' zjanaque' Jesúsēn' txen bosoxonje' gosebejyichje'ne'.

Goseche'e Jesúsēn' lao bene' ca' chesenabia' nación Israelen'

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Na' bene' ca' gosezen Jesúsēn' goseche'ene' lao Caifás ben' nac bχoz blao, gan' ba zjanžag bene' ca' chososed chosolo'e dan' bzoj da' Moisésēn' na' len bene' gole blao ca' chesenabi'e nación chechon'. ⁵⁸ Nach Pedroa' na'ogüe' Jesúsēn' zito' zito'le bžinte' liž bχoz blaon', na' gwyo'e chyo'ona' gwchi'e len bene' ca' chesape' yodao' blaon', le goclaže' le'ede' naquen' zelao gac che Jesúsēn'.

⁵⁹ Nach yogo' bχoz gwnabia' ca' na' yezica'chle bene' gole blao ca' chesenabi'e nación chechon' cheseyiljwlaže' bi diža' güenlaže' yeso'e che Jesúsēn' cont yesote'ne'. ⁶⁰ Perw goc šša bitw besyeželde' bi diža' güenlaže' yosode'ede' le' cont gosožie'ne' xya la'czla' bene' zan gosenite' gosene' diža' güenlažen' contr le'. Gwde na' besechoj yechope bene' na' bedilen can' gosenen'. ⁶¹ Quinga gosene':

—Benga gwne': "Neda' guac yochinja' yodao' blao gan' chonxencho Diosen', na' šone žaze yeyonan'."

⁶² Nach gwzoža' bχoz blaon' gože' Jesúsēn':

—¿Bibi de bi nao' ca nac da' nga chosocuiš bene' quinga le'?

⁶³ Bitwbi gwna Jesúsēn'. Nach gož bχoz blaon' le':

—Chnia' le' gwna neto' še le len' Cristo ben' nac dogualje Xi'in Diosen', ben' gwleje' cont yedenabi'e. Na' Diosen' ben' zoa toli tocañe cue'e da' baļi še ledō' can' žon'.

⁶⁴ Jesúsēn' gože'ne':

—Le can' žale nan' naca'. Diosen' gwsele' neda' golja' benach. Na' chnia' le'e, gwžin ža le'ele neda' chi'a cuit Diosen' ben' nape la'zelagüe yela' guac xen, na' nabi'a txen len le', na' le'ele yetja' yaban' to lo' bejw.

⁶⁵ Cate' bene b̄xoz blaon' xtiža' Jesúsen', gwšo' gwčeza'te xen', le par le' da' mal juisyon' gwna Jesúsen' cui'e cuit Diosen' nabi'e. Nach gwne':

—Ba benecho na'a ba gwne' che Diosen' dan' gwne' ca'. Noch no chyažje no gagw xya che'. ⁶⁶ ¿Nac žale che'?

Nach bene' ca' bosyoži'en gose'ene':

—Cheyala' gate' dan' chon cuine' ca' Dios.

⁶⁷ Nach bosyoži'e xene' cho'alao Jesúsen', na' gosebaže'ne', na' bale' gosegape' xague'na'. ⁶⁸ Nach gose'ene':

—Še len' naco' Criston', gwneya'ašč, gwna neto', ¿non' chgapa' le'?

Pedroa' bi gwchebe' še nombi'e Jesúsen'

(Mr. 14:66-72; Lc. 22:56-62; Jn. 18:15-18, 25-27)

⁶⁹ Na' šlac chac da' quinga, chi' Pedroa' chyo'ona', cate' bžin to no'ole güen žin che Caifásen', gože'ne':

—Lencze le' naco' txen len Jesús bene' Galilean'.

⁷⁰ Na' lao yogo' bene' ca' že' na', Pedroa' bitw gwchebe' še naque' txen len Jesúsen', na' gože' no'olen':

—Bi nezda' bi dižan' cho'o.

⁷¹ Gwde beyož gože' no'olen' ca' beyeje' cho'a puert na'le, na' bezle'e yeto no'ole güen žinna' le', na' goze'e bene' ca' že'na':

—Lecze len bengna naque' txen len Jesús bene' Nazareten'.

⁷² Da' yoble bitw gwchebe' še naque' txen len Jesúsen', nach gwne':

—Na' zoa Diosen' cue'e da' bali bitw nombi'a bena' žo' ca'.

⁷³ Na' goczze šlož, gosebiga' bene' ca' že'na' goseze'e Pedroa':

—Da' licze, naco' txen len legaque', le nachbia' chnio' can' chesene bene' Galilea ca'.

⁷⁴ Nach Pedroa' chop šone ni'a gwne':

—Diosen' gone' ga saca'zi'a še chonlaža' dan' žia' bi nombi'a bena'.

Na' la' gwchežte to jea. ⁷⁵ Nach jayze'e Pedroa' can' gož Jesúsen' le': “Bina' cuež jean' cate' gac šone ni'a bi chchebo' še nombi'o neda'.” Nach beze'e leca gwchežyaše'.

27

Goseche'e Jesúsen' lao Pilaton'

(Mr. 15:1; Lc. 23:1-2; Jn. 18:28-32)

¹ Na' cate' gwyeni', yogo' b̄xoz gwnabia' ca' na' bene' gole blao ca' chesen-
abia' nación chechon' besyedobe' na' gosechoglagüen' yesote' Jesúsen'. ² Nach
bosocheje'ne' na' goseche'ene' jasesane'ne' lo' na' gobernador Poncio Pilato.

Judasen' beyot cuine'

³ Na' Judasen' ben' bdie' Jesúsen' lo' na' bene' ca', cate' gocbe'ede' ba
gosechoglagüen' yesote' Jesúsen', betinjde' dan' bdie' le' lo' na' b̄xoz gwnabia'
ca' na' bene' gole blao ca'. Nach gwyeje' laogaquen' par bonežjue' legaque'
šichoa mechw platan'. ⁴ Nach gože' legaque':

—Malen' bena' bdia' lo' na'len' to bene' bi nape' doła'.

Na' gose'ene':

—Bitwbi doła' nap neto' dan' beno' ca'.

⁵ Nach Judasen' bozale' mechw ca' lo' yodao' blaon', nach beze'e na' jaylo'o
do yene' beyot cuine'.

⁶ Beyož beza' Judasen', bꞑoz gwnabia' ca' bosyotobe' mechon'. Na' gose' lježe':

—Bitw gac co'ochon lo' caj gan' yo'o mechw che yodaon', le naquen mechw dan' gwdixjwcho cont yega'a yela' mban che to bene'.

⁷ Na' bosoxi'e yesezi'e len mechon' to yežlio dan' de che to bene' güen yeso'. Na' gosezi'en par to capsantw ga yosocuaše' bene' zito'. ⁸ Na' yežlion' ne' nzin' Yežlio Chen ža na'aža, le gosezi'en len mechw dan' goseyixjue' cont gosote' Jesúsen'. ⁹ Can' goc cont goc can' bzoj da' Jeremías ben' be' xtiža' Diosen' cani', gan' žan: “Besyezi'e šichoa mechw platan', dan' gosena bene' Israel zaca' bena'. ¹⁰ Na' gosezi'e yežlio che to bene' güen yeso', can' gwna Xancho Diosen' neda'.”

Bosocuiše' Jesúsen' lao Pilaton'

(Mr. 15:2-5; Lc. 23:3-5; Jn. 18:33-38)

¹¹ Na' goseche'e Jesúsen' lao gobernadoren' na' šlac zeche' lagüen', gbernadoren' gože'ne':

—¿Len' naco' rey che bene' Israel?

Nach Jesúsen' boži'e xtižen', gwne':

—Can' gwnao'na', can' naquen.

¹² Na' cate' bꞑoz gwnabia' ca' na' bene' gole blao ca' chesenabia' nación chechon' bosocuiše' Jesúsen', bitw bi gwne'. ¹³ Nach Pilaton' gože'ne':

—¿Bi chendo' catec da' zan xya nga chesagüe' chio'?

¹⁴ Perw Jesúsen' ne' to xtiže'na' bitw boži'e, na' bebanechgüe gobernadoren'.

Gosechoglagüen' yesote' Jesúsen'

(Mr. 15:6-20; Lc. 23:13-25; Jn. 18:38-19:16)

¹⁵ Na' gota' costumbr, gobernadoren' gwsane' to bene' de ližya cate' čala' lni pascw checho, con bene' yesenab bene' gualaž chechon'. ¹⁶ Na' ližya na' de to bene' chzechgua che' naque' bene' güen da' xinj, na' le' Barrabás. ¹⁷ Nach Pilaton' gože' bene' ca' zjanžaguen':

—¿Noe' bene' quinga chaclaže'le gwsana'? ¿Gwsana' Barrabás še Jesús nga ben' chesene' naque' Cristo ben' gwlej Diosen' cont yedenabi'e?

¹⁸ Goche'e Pilaton' dan' chesacxi'a bꞑoz gwnabia' ca' Jesúsen', da'nan' bosodie' le' lo' ne'en.

¹⁹ Ca' čhi' Pilaton' gan' chone' yela' justisen', cate' bžin to rson da' gwsela' no'ol čen', gože'ne': “Bitw bi gondo' bena', le bibi doła' nape'. Nže'e gwñeda'ne' yel na' bžaglaochgua' neče dan' chac che bena'.”

²⁰ Na' bꞑoz gwnabia' ca' na' bene' gole blao ca' chesenabi'e nación chechon' gosego'oyele' bene' ca' že'na' cont yesenabe' gwsane' Barrabásen' na' yesenabe' yesote' Jesúsen'. ²¹ Nach gobernadoren' gože' legaque' da' yoble:

—¿No bene' quinga čhope chaclaže'le gwsana'?

Nach gose'ene':

—Barrabásna'.

²² Pilaton' gože' legaque':

—¿Bixe gona' len Jesús nga ben' chesene' naque' Cristo ben' gwlej Diosen' cont yedenabi'e?

Na' yogüe' gose'ene':

—¿Bde'e le'e yag cruz!

²³ Nach gož gobernadoren' legaque':

—¿Bixe da' xinj nonen'?

Na' legaque' da' yoble bososya'achgüe' gose'ene':

—¿Bde'e le'e yag cruz!

²⁴ Goche'e Pilaton' bicze bi gac gone'. Ba čyala'ch chesone' žaš juisyw. Nach gwsele' to bene' jaxi'e nis cont bone'e lao bene' ca' že'na' na' gože' legaque':

—Bibi da' xinj non benga. Bitw naquen xbagā' dan' gotlene', xbagā' le'e naquen še ba betwlene'.

²⁵ Nach yogo' beṇe' ca' gose'ene':

—Xbagā' neto' na' xbagā' xi'into' naquen che yela' got che benga.

²⁶ Nach bsan Pilaton' Barrabásen' can' gosenaben'. Perw na' bene' mandadw gosot goseyin soldadw che' ca' Jesúsēn', nach bene' le' lo na'gaque' cont yosode'ene' le'e yag cruzēn'.

²⁷ Nach soldadw che gobernadoren' goseche'e Jesúsēn' lo' yo'o che gobernadoren', nach bosyotobe' yogo' soldadw ca'. ²⁸ Na' goseyiṇe' xalana' Jesúsēn' na' bosoguacue'ne' to lache' xṇa ca dan' chesaz rey ca'. ²⁹ Na' gosone' to corona de xis yeše' bosozoen' yichjen', na' ne'e licha bosogoxe'ne' to xis. Na' bosozoa xibe' lagüēn' par gosonle' che', nach gose'ene':

—¡Viva rey che beṇe' Israel!

³⁰ Nach bosožī'ene' xene', na' besyeque'e xis dan' noxen' na' bosozeten' yichje'. ³¹ Na' beyož gosonle' che', besyeque'e lache' xṇan' dan' bosoguacue'nen' na' bosyoguacue'ne' xacze'. Nach goseche'ene' cont jasede'ene' le'e yag cruzēn'.

Bosode'e Jesúsēn' le'e yag cruzēn'

(Mr. 15:21-32; Lc. 23:26-43; Jn. 19:17-27)

³² Nach besechoje' ciudan' na' besyežague' to beṇe' Cirene le Simón na' gosone' byen bosogüē'ene' yag cruz che Jesúsēn'.

³³ Na' besežine' to latje gan' nzi' Gólgota, zeje diža' latje che žit yichj beṇe' guat. ³⁴ Na' bosonežjue' Jesúsēn' vino da' nchixe to da' zla' par ye'ejen', perw le' con bnixēn', bitw güē'ejen'.

³⁵ Na' cate' beyož bosode'ene' le'e yag cruzēn', soldadw ca' gosone' rifa cate' besyele'e xalane' cont gota'bia' noe' yechelen'. Na' dan' gosone' ca' goc can' bzoj da' ben' be' xtiža' Diosēn' cani', gwne': "Yesyele'e xalanan' na' yesezi' che che', yesonen' rifa." ³⁶ Nach gosebi'e gosape'ne'. ³⁷ Na' yichj yag cruzēn' gan' de'ena' bosozoje' dan' bcuiš le', na' žan: "Benga Jesús rey che beṇe' Israel ca'."

³⁸ Na' lecze cana' bosode'e chope beṇe' gwban le'e yechope yag cruz. Toe' gwda' cuit Jesúsēn' licha na' yetoe' cuite' robes. ³⁹ Na' beṇe' ca' gosede gan' da' Jesúsēn' goson yichjlagüē' dan' leca besegue'ede' le', na' gosezi'diže' le', ⁴⁰ gose'ene':

—Len' gwnao' yochinjo' yodao' blaon' na' šone žaze yeyonon', bosla cuino'. Še len' naco' doguale Xi'in Diosēn', beyetj le'e yag cruzēn'.

⁴¹ Na' len bxož gwnabia' ca' na' len beṇe' ca' chososed chosolo'e dan' bzoj da' Moisésēn' na' len beṇe' fariseo ca', na' len beṇe' gole blao ca' chesenabi'e nación chechon', yogüē' gosezi'diže'ne' na' gosene':

⁴² —¡Yezica'chle beṇe' bosle' na' bi chac yosla cuine'! Še naque' rey che chio' beṇe' Israel, yeletj cuine' le'e yag cruzēn' na'a na' šejle'cho che'. ⁴³ Le' chejnilaže' Diosēn', le gwne': "Dogualje Xi'in Dios neda'." ¡Na' le'echo yosla Diosēn' le' na'a še chacde' le'!

⁴⁴ Na' beṇe' gwban ca' zjada' le'e yag cruzēn' chop la'a cuiten', lecze gosezi'diže' le'.

Can' goc cate' got Jesúsēn'

(Mr. 15:33-41; Lc. 23:44-49; Jn. 19:28-30)

⁴⁵ Na' do guagwbiž doxen yežlion' goc chol bžinte cheda šone. ⁴⁶ Na' do cheda šone Jesúsēn' bosye'e zižje gwne':

—Elí, Elí, ¿lama sabactani? (Zeje diža': Dios chia', Dios chia', ¿bixchen' ba gwlejjichjo' neda'?)

⁴⁷ Na' ba_l be_ne' ca' zjanita' na' gosende' na' gosene':

—Le gwzenag, benga chol_l güiže' da' Elías ben' be' xtiža' Diosen' cani'.

⁴⁸ Nach la' bchojte to be_ne' gwyejsese' jaxi'e to esponja na' bzažeden' vino zichj na' bzoen' to lao xis tone nach jažiguen' cho'a Jesúsen' cont xopen'. ⁴⁹ Na' yebale' gose'e bena':

—Cuezcho, yešc še güide Elíasen' yosle'ne'.

⁵⁰ Nach da' yoble Jesúsen' bosye'e zižje na' gote'. ⁵¹ Na' ca hora' lache' da' ze lo' yodao' blaon' bcheza' gacholen gwza'te yichjen bžinte che'e_le. Na' gwxo'chgua gosoxjte yej ca'. ⁵² Na' lecze beseyaljo ba che be_ne' ba gosat. Na' zan da' be_ne' ca' gosejnilaže' Diosen' besyebane' ladjo be_ne' guat ca'. ⁵³ Nach caten' ba beban Jesúsen' ladjo be_ne' guat ca', besyechoje' lo' ba chegaquen' na' jaya'aque' jaselo'elagüe' ciuda Jerusalén. Na' zan be_ne' besele'ede' legaque'.

⁵⁴ Na' ca nac xan soldadw ca' na' be_ne' ca' nche'e, be_ne' nita' chesape' Jesúsen', cate' besele'ede' can' gwxo' na' bichle da' ca' goc, besežebhgüe', na' gosene':

—Da' li le benga goc dogualje Xi'in Dios.

⁵⁵ Na' lecze nita' zan no'ole ladjo be_ne' ca' na' goseze' zito' chesene'e can' chaquen'. No'ol ca' gosa'ogüe' Jesúsen' cate' beze'e distritw Galilean' par chesaclene' le' len bi da' chyažjde'. ⁵⁶ Na' len no'ol ca' María be_ne' Magdala, na' lecze María ben' nac xna' Jacobo na' José, na' lecze ca' xna' Jacobo na' Juan, xi'in Zebedeo.

Bosocuaše' Jesúsen'

(Mr. 15:42-47; Lc. 23:50-56; Jn. 19:38-42)

⁵⁷ Na' gwzoa to be_ne' gwni'a be_ne' ciuda Arimatea le' José na' ba gwzolao chzenague' che Jesúsen'. Na' cate' ba chxoa gwbiž ⁵⁸ Josén' gwyeje' lao Pilaton' jaynabe' cuerp che Jesúsen'. Na' Pilaton' bene' mandadw bosyonežjue'ne' cuerp chen'. ⁵⁹ Nach Josén' bego'o lo' ne'e cuerp che Jesúsen' na' blaže'ne' to lache' xen da' nyach. ⁶⁰ Na' gwlo'e cuerp chen' to lo' bloj cobe che' da' gwche'ene' le'e yej. Na' blole' to yej xen cho'a blojen' cont bseyjon len. Nach beze'e. ⁶¹ Na' María be_ne' yež Magdalan' na' yeto María yoble jasechi'e cho'a blojen'.

Bosozoe' be_ne' chesape' gan' jasecuaše' Jesúsen'

⁶² Na' beteyo, gwde žan' caten' chososini'e par ža che Diosen', besedobe bxoz gwnabia' ca' na' be_ne' fariseo ca' na' ja'aque' gan' zoa Pilaton'. ⁶³ Na' gose'ene':

—Be_ne', ba jaysalaže'to' can' gwna da' be_ne' gwxiyen' cate' ne' mbane', gwne': “Yeyon ža yebana' ladjo be_ne' guat ca'.” ⁶⁴ Da'nan' gwse_la'šca be_ne' šjasedape' cho'a blojen' gan' jasecuaše'nen' cont bi šja'ac be_ne' ca' gosaque' Jesúsen' txen šeže'le šjasyeleje' cuerp chen' na' yese'e be_ne' le' bebane' ladjo be_ne' guat ca'. Le še yesaque be_ne' ba bebane' ladjo be_ne' guat ca', gonchen malech clal ca' len diža' dan' gwdisse' gwne' Diosen' gwse_le' le'.

⁶⁵ Nach Pilaton' gože' be_ne' ca':

—Gona' le'e soldadw ca'. Le che'e cont yesape' ga zelao yesezoede'.

⁶⁶ Nach ja'aque' len soldadw ca' na' bosochiše' sey le'e yej dan' da' cho'a blojen', na' bosonite' soldadw ca' gosapen'.

28

Jesúsen' bebane' ladjo be_ne' guat ca'

(Mr. 16:1-8; Lc. 24:1-12; Jn. 20:1-10)

¹ Na' cate' beyechj ža che Dios, ba_l dmigw María be_ne' Magdala len María ben' yeto ja'aque' jasene'e gan' bosocuaše' Jesúsen'. ² Na' leca gwxo', le angl

che Xanchon' betje' yaban', na' bžine' gwque'e yej dan' nseyjw cho'a blojen', na' gwchi'e lo yeja'. ³ Na' anglen' leca chactit cho'alagüen' cacze ga chep yes na' xalanen' naquen šiš xila' juisyw ca nac beye'. ⁴ Na' cate' besele'e bene' gop ca' le', leca gosexize' besežebe' na' gosebixē' gosatte' šlat. ⁵ Perw na' anglen' gože' no'ol ca':

—Bitw žeble. Neda' nezda' Jesúsēn' ben' bosode'e le'e yag cruz nan' chey-iljwle. ⁶ Nono de nga. Ba bebane' ladjo bene' guat ca', can' gwnacze'. Na' le da, le na' latje nga gan' gosegüe'e cuerp chen'. ⁷ Bedao' le šjaya'ac le šjaydixjue'e bene' ca' zjanaque' Jesúsēn' txen ye'gaclene' ba bebane' ladjo bene' guat ca'. Na' ye'gaclene' gwyobech Jesúsēn' yežine' Galilean' clēl ca' legaque', na' Galilean' na' yesele'ede'ne'. Can' gwna Diosen' zedetixjue'eda' le'e.

⁸ Nach no'ol ca' la' besyeya'actie' cho'a blojen' do chesežebe' perw leca chesyebede', zjaya'acsese' zjasyedixjue'ede' bene' ca' zjanaque' Jesúsēn' txen can' goca'. ⁹ Na' šlac zjaya'aque' besyežague' Jesúsēn' chanez. Nach bguape' legaque' tiox.

Na' no'ol ca' gosebigue' gan' zoa Jesúsēn' bosozoa xibe' lagüen', na' goseyele' ni'e tantw besyebede', na' gosonxene' le'. ¹⁰ Jesúsēn' gože' legaque':

—Bitw žeble. Le šjaydixjue'e bene' lježcho ca', cheyala' šjaya'aque' Galilean' cont yesele'ede' neda'.

Bene' gop ca' jasyedixjue'ede' bχoz ca' can' ba goca'

¹¹ Na' šlac zjaya'ac no'ol ca' ciudan', ba soldadw ca' bene' ca' gosape' gan' bosocuaše' Jesúsēn' jaya'aque' ciudan' jasyedixjue'ede' bχoz gwnabia' ca' doxen can' ba goquen'. ¹² Nach besedobe bχoz gwnabia' ca' len bene' gole blao ca' chesenabia' nación chechon' na' bosoxi'e nac yesone' ca' nac dan' gose' soldadw ca' legaque'. Na' bosonežjue' soldadw ca' da' zcha'o mechw. ¹³ Gose'e legaque':

—Še no nabe le'e bin' goquen', na' ye'gaclene' šeže'le šlac chtasle bene' ca' gosaque' le' txen besyebeye' cuerp chen' lo' blojen' na' besyeyo'en ga yoble. ¹⁴ Na' še gobernadoren' yende' diža' quinga, neto' šjašaljilento'ne' cont bi že'e le'e na' cont bi gote' le'e.

¹⁵ Na' soldadw ca' gosezi'e mechon' dan' bosonežjue' legaquen', nach gosone' con can' gose'e legaque'. Na' ža na'aža yogo' can' gosena soldadw ca' ne' chesene' doxen gan' nita' bene' Israel gualaž chechon'.

Jesúsēn' gože' legaque' yeso'e xtiže'na' yogo' nación (Mr. 16:14-18; Lc. 24:36-49; Jn. 20:19-23)

¹⁶ Nach bene' ca' zjanaque' Jesúsēn' txen, bene' ca' šnej, jaya'aque' Galilean' cont jasyešague' Jesúsēn' to lo ya'a gan' gože' legaque' yesyežague'. ¹⁷ Na' cate' besele'ede' Jesúsēn' gosonxene'ne'. Perw bia'cze to chope' gosacžejlaže' še le'na'. ¹⁸ Nach gwbiga' Jesúsēn' gan' nite'na' na' gože' legaque':

—Ba ben Diosen' lo na' doxen yela' chnabian' dan' de yaban' na' yežlion'. ¹⁹ Da'nan' le šja'ac le šjased le šjalo'e bene' ca' že' yogo'lol nación cont yesejnilaže' neda'. Na' le gwzoe' nis cont yosolo'e le chesejnilaže' Xacho Diosen', na' chesejnilaže' neda' naca' dogualje Xi'ine', na' lencze Spiritw che'na'. ²⁰ Na' gwsed gwlo'elne' cont yesone' yogo'lol dan' ba bena' mandadw gonle. Neda' zoacza' len le'e yogo' ža, na' ca'cze ne' soa' len le'e cate'ch te che yežlion'. Da' na'zen' chzoja' na'a.

DIŽA' GÜEN DAN' BZOJ SAN MARCOS

*Juan ben' bzoa bene' nis gwđixjue'ede' diža' güen che Diosen' latje daš
(Mt. 3:1-12; Lc. 3:1-9, 15-17; Jn. 1:19-28)*

¹ Qui goc cate' gwxe xtiža' Jesucristo ben' nac dogualje Xi'in Dios.

² Da' Isaias ben' be' xtiža' Diosen' cani' bzoje' da' nga, žan:

Chseła' to bene' cuialagüe' laoguoñ' güe'e xtižon',
cont ba zjanita' bene' yosozenague' chio' cate' šejo'.

³ Beña' chñe' zižje latje dašen' že':

“Le gonšagüe' yichjlažda'olen' cont gwzenagle che Xanchon' cate' yide';
le cuejyichj da' malen' chonle cont yichjlažda'olen' gaquen ca to nez da' ba
gosoňagüe'.”

⁴ Ca' goquen', Juan ben' chzoa bene' nis bžine' latje dašen' na' gože' bene'
ca' besežag na' cheyala' yesyetiñde' xtoła'gaque' na' yesezoe' nis cont ñitlao
xtoła'gaque'. ⁵ Zan bene' za'ac do distritw Judea na' ciuda Jerusalén
bosozenague' che diža' dan' chyixjue'ede'. Na' cate' gosexoadole' bi da' xinj
zjanone', Juanna' bzoje' legaue' nis lo' yegw Jordán.

⁶ Xalana' Juanna' goquen de yiša' xa camello na' da' bchej lsine' goquen de
yid, na' gwđagüe' biše'zo len šina' beser yixe'. ⁷ Na' gwđixjue'ede' bene' xtiža'
Diosen', gwne':

—Coža' na' za' za' to bene' zaca'che' ca neda', na' da' nacchgüe' bene' zaca', bi
zaca' gona' xmandadoe' lechja' no xelet'. ⁸ Neda' ba bzoa' le'e nis, perw ben' za'
zan' gone' cont soa Spiritw che Diosen' lo' yichjlažda'olen' ñabian' xbab chele.

*Jesúsen' gwzoe' nis
(Mt. 3:13-17; Lc. 3:21-22)*

⁹ Ca tiempa' Jesúsen' gwze'e lagüe yež Nazaret da' chi' ga mbane distritw
Galilea, na' Juanna' bzoje' le' nis lo' yegw Jordán. ¹⁰ Na' šlac chechoj Jesúsen'
lo' nisen', Jesúsen' ble'ede' byaljw yaban' gan' zoa Diosen', na' Spiritw che
Diosen' betjen jasoan len le', na' ca hora' Spiriton' naquen ca nac ngolbex.

¹¹ Na' gosende' gwne' Dios ben' zoa yaba gwne':

—Len' naco' Xi'ina' bene' chacchgüeda', na' chebe chezaque'laže'chgüeda'
chio'.

*Satanásen' goclažen' co'oyelan' Jesúsen' cont gone' da' mal
(Mt. 4:1-11; Lc. 4:1-13)*

¹² Nach Spiritw che Diosen' benen cont la' gwyejte Jesúsen' latje daš. ¹³ Na'
gwzoe' latje dašen' choa ža ladjo be znia ca'. Na' Satanás dan' chnabia' da'
xigüe' ca' goclažen' co'oyelan' le' cont gone' da' mal. Nach beyoža' jasacñen
angl che Diosen' le'.

*Jesúsen' gwzolao chyixjue'ede' xtiža' Diosen' distritw gan' nzi' Galilea
(Mt. 4:12-17; Lc. 4:14-15)*

¹⁴ Beyož gosegüe'e Juanna' ližya, Jesúsen' beze'e beyeje' Galilea gan'
jatixjue'ede' diža' güen, gwne' Diosen' ñabi'e yichjlaždao' bene' ca' yosozenag
che'. ¹⁵ Jesúsen' gwne':

—Ba bžin ža cate' Diosen' ñabi'e yichjlaždao' bene' yosozenagüe' che'. Le
yetiñje xtoła'len' na' le šejle' diža' güen che Diosen' da' chyixjue'eda'.

*Jesúsen' goxe' tap bene' gwxcen bel šja'acñene' le' txen
(Mt. 4:18-22; Lc. 5:1-11)*

¹⁶ Jesúsen' chde' do cho'a nisdao' che Galilean' cate' ble'ede' chope bene' gwxcen bel, Simón na' bene' biše' Andrés. Na' zjanite' chosozale' yixjw dan' chesezende' belen' lo' nisa'. ¹⁷ Na' gož Jesúsen' legaue':

—Le šo'o len neda'. Nacle bene' gwxcen bel na' chbejle belen' lo' nisen', perw na'a gona' cont gaxle bene' yesyechoje' lo da' malen'.

¹⁸ Nach la' bosocua' ante yixjw chen' na' jasa'aclene' le'.

¹⁹ Na' Jesúsen' gwze'e yelate' na' ble'ede' Jacobon' xi'in Zebedeo na' len bene' biše' Juan, zjajo'e lo' barcw chesyeyonšagüe' yixjw chegaquen'. ²⁰ Na' Jesúsen' lécze goxe' legaue' šja'aclene' le' na' bosocua'ane' Zebedeon' ben' nac xagaque lo' barcon' len bene' ca' chesaclen le', nach ja'aque' len Jesúsen'.

To bene' gwyo'o gwyaze' da' xigüen'

(Lc. 4:31-37)

²¹ Besežine' yež da' nzi' Capernaum, na' ža che Dios Jesúsen' gwyo'e lo' yodao' da' zoa na' na' gwzologüe' bsd blo'ede'. ²² Bene' ca' že' na' besyebande' can' bsd blo'ede', le can' bzejni'iden' nachbia' nezde' cayanen' nac xbab che Diosen', gague bzejni'ide' can' chosozejni'i ben' chosolo'e ley dan' bzoj da' Moisés. ²³ Na' lo' yodaon' zoa to bene' yo'o nyaze' da' xigüen', na' bosye'e gwne':

²⁴ —¿Bixchen' chgoša' chlaže' chio' len neto', Jesús bene' Nazaret? ¿Zedežiayo'o neto'? Neda' nombi'a le' na' nezda' naco' bene' laždao' xilaže' juisyw bene' gwseła' Dios.

²⁵ Nach Jesúsen' gože' da' xigüen':

—ššago', bechoj lo' yichjlaždao' bengal

²⁶ Na' da' xigüen' benen cont gwchole bena', nach chosya'adiachguan bechojen lo' yichjlažda'ogüen'. ²⁷ Yogo' bene' ca' že' na' besyebande' na' gose' lježe':

—¿Bixen' chac? ¿Bixe da' coben' chlo'e bengal? ¡Nachbia' nape' yela' chnabia' na' yela' guac, le da' xigüe' ca' chesonen da' že'!

²⁸ Na' ca' nac dan' ben Jesúsen' bedao'nez gos gwłalje dižan' doxen lagüe yež ca' gan' mbane Galilea.

Jesúsen' beyone' taobi'in che Simón Pedro

(Mt. 8:14-15; Lc. 4:38-39)

²⁹ Cate' besyechoje' lo' yodaon', Jesúsen' len Jacobo na' len Juan ja'aque' liž Simón na' Andrés. ³⁰ Na' taobi'in che Simónna' die' che'ede' xla; na' gose'e Jesúsen':

—Bengal die' che'ede'.

³¹ Nach jabiga' Jesúsen' na' bežue' taquen' gwłise'ne'. Na' la' beyactede', nach bsiñi'e da' gose'ej gosagüe'.

Jesúsen' beyone' zan bene' chese'ede'

(Mt. 8:16-17; Lc. 4:40-41)

³² Cate' ba gwxcia gwbižen' na' ba gwxcin, jasesane' lao Jesúsen' zan bene' chese'ede' na' bene' zjajo'o zjanyaze' da' xigüen'. ³³ Na' do yež bene' besedop besežague' cho'a yo'o gan' zoa Jesúsen'. ³⁴ Na' Jesúsen' beyone' bene' chese'ede' gwde gwdele yižgüe' na' bebeje' zan da' xigüe' da' zjajo'o zjanyaz bene', perw bitw bi'e latje bi yesenan, le legaquen zjanenzen non' nac le'.

Jesúsen' chyixjue'ede' xtiža' Diosen' Galilea

(Lc. 4:42-44)

³⁵ Šbal' cate' ne' nac choljesúsen' gwyase' na' gwze'e gwyeje' ga nono nla' na' bol güiže' Diosen'. ³⁶ Simón na' bene' lježe' ca' ja'aque' jasyediljue'ne'. ³⁷ Na' cate' besyeželde'ne' gose'ene':

—Yogo'ze bene' chesyeyiljue' le'.

³⁸ Perw Jesúsen' gože'ne':

—Le šo'o ga yoble ga nac gala'ze cont lecze šjatixjue'eda' xtiža' Diosen' na', le da'nan' ba gwza'a.

³⁹ Can' goc, Jesúsen' gwde' doxen gan' mbane Galilea gwdixjue'ede' xtiža' Diosen' to to yodao' che neto' bene' Israel, na' bebeje' da' xigüe' da' yo'o nyaz bene'.

Jesúsen' beyone' to bene' che'ede' lepra

(Mt. 8:1-4; Lc. 5:12-16)

⁴⁰ To bene' che'ede' yižgüe' dan' nzi' lepra jabigue' gan' zoa Jesúsen' na' bzoa xibe' gože'ne':

—Še chaclažo', guac yeca'o yižgüe' dan' che'edan'.

⁴¹ Na' Jesúsen' beži'ilaže'de' le' na' bexue'ne' gwne':

—Chaclaža' yeyacdo'. Beyaque.

⁴² Cate' gwne' ca' la' bega'ate yižgüen' na' beyacde'. ⁴³ Nach Jesúsen' besele'ne' liže', bene' mandadw, gože'ne':

⁴⁴ —Notno yo'o can' ba beyona' le', con gwyej jaṇa' bxoza' cont le'ede' bač beyacdo', na' bnežjw da' cheya'la' gwnežjo' dan' non Moisésen' mandadw cont yeyaco' xilaže' len ley che Diosen'. Ben ca' cont yogo' bene' yesenezde' ba beyacdo'.

⁴⁵ Perw ben' bi bchejde', yogo'ze bene' gože' can' goca'. Da'nan' Jesús'a bich goc šeje' con ca nla'ze gate'teze yež, san con gwde' do yixe', na' bia'cze bene' za'ac yogo'ze yež jaseṇe'e le'.

2

Jesúsen' beyone' to bene' bi chda šla'a ni'a ne'e

(Mt. 9:1-8; Lc. 5:17-26)

¹ Gwde to chop ža, Jesúsen' beyeje' da' yoble yež dan' nzi' Capernaum, na' bene' Capernaum ca' goseṇezde' bežine' to yo'o ga ba gwzoacze'. ² Na' bedao'nez besežag bene' zan, necach gosezaque' yesenite' lo' yo'ona' ne cho'a yo'on, nach Jesúsen' gwdixjue'ede' xtiža' Diosen' len legaque'. ³ Nach besežin xonj bene' cont jasesane' lao Jesúsen' to bene' xinj bene' bi chda šla'a ni'a ne'e; tap bene' zjano'ene'. ⁴ Perw bi chac yesežine' gan' zoa Jesúsen' catec chy. Nach goseque'e tej dan' ncu'a yichj yo'on na' beseletje' le' na'le to lo cam dao'. ⁵ Na' cate' Jesúsen' gocbe'ede' can' chesejnilaže'nen', gože' bene' güe'na':

—Xi'ina', ba bezi'xena' xtolon'.

⁶ Baḷ bene' chososed chosolo'e ley dan' bzoj da' Moisésen' zjachi'e na', na' gosone' xbab: ⁷ “¿Bixchen' chna benga ca? le chon cuine' ca Dios. Nono zoa bene' gac yezi'xene' xtol'a' beṇač. Toz Diosen' gac yezi'xenen'.” ⁸ Perw Jesúsen' chache'eczede' can' nac xbab čhegaquen', na' gože' legaque':

—¿Bixchen' chza'laže'le ca? ⁹ Še yapa'ne': “Ba bezi'xena' xtol'o'na'”, bi nezele še napa' yela' gwnabia' cont yezi'xena' xtole'na', san še yapa'ne': “Gwyas, beyoa' xcamon'”, na' nachbia' še napa' yela' guac gac can' gwnian'. ¹⁰ Perw neda' naca' ben' gwsela' Dios golja' beṇač, gwlo'eda' le'e na'a zoa' yežlio nga napa' yela' gwnabia' cont yezi'xena' xtol'a' beṇač.

Nach gože' bene' xinja':

¹¹ —Chapa' le', beyas, beyoa' xcamon' na' beyej ližo'.

¹² La' beyaste bene' xinja' chesena'te bene' ca' nita'na' na' beyoa' xcamen'. Da'nan' yogo' bene' ca' besyebande' na' goso'e yela' choxcen che Diosen', gosene':

—Biṇa' le'echo yela' guac dan' nac ca'.

Jesúsen' goxe' Leví cont gwejlene'ne'
(Mt. 9:9-13; Lc. 5:27-32)

¹³ Da' yoble gwej Jesúsen' cho'a nisdao' na' bene' zan besedobe' gan' zeje' na' bsd blo'ede' legaque' xtiža' Diosen'. ¹⁴ Na' Jesúsen' gwdie' latje gan' chi' Leví xi'in Alfeo chchixjue' impuesto, na' cate' ble'ede' le' na' gože'ne':

—Da len neda'.

Nach gwzoža' Levín' na' gwejlene'ne'.

¹⁵ Na' gwdena' goquen' chi' Jesúsen' liž Levín' na' güe'ej gwdagwlene'ne' txen len zan bene' güechixjw na' len yebał bene' güen da' xiñj, na' len bene' ca' zjanaque' Jesúsen' txen, le zan bene' zja'ac zjanao' le'. ¹⁶ Perw na' bene' ca' chososed chosolo'e ley dan' bzoj da' Moisés na' bene' fariseo ca' cate' besele'ede' che'ej chagüe' txen len bene' ca', gose'e bene' ca' zjanaque' Jesúsen' txen:

—¿Nacxechen' ben' chsed chlo'e le'e che'ej chagwlene' txen bene' güechixjw na' yebał bene' güen da' xiñj ca'?

¹⁷ Cate' Jesúsen' bende' can' gosene' na' gože' legaque':

—Bene' bi chesacšene bi cheseyažjde' bene' güen rmed. Bene' chesacšende', legaquen' cheseyažjde' bene' güen rmed. Gague bene' ba zjanaque' bene' güen len Diosen' zedeneyoeda' cont yesyetinjde' xtolen', san bene' güen da' xiñj. Legaquen' zjazaca'lebe' ca' bene' cheseyažje bene' güen rmed.

Gosenabde' Jesúsen' bixchen' bene' zjanaque' le' txen bi chesone' gwbas
(Mt. 9:14-17; Lc. 5:33-39)

¹⁸ To ža cate' bene' ca' zjanaque' txen len Juanna' na' bene' zjanaque' txen len bene' fariseo ca' gosezoe' gwbas, bał bene' jasa'aque' jasenabde' Jesúsen':

—Bene' ca' zjanaque' txen len Juanna' na' bene' ca' zjanaque' txen len bene' fariseo ca' chesone' gwbas, na' bene' ca' zjanaque' txen len le' bi chesone' gwbas. ¿Bixchen'?

¹⁹ Na' Jesúsen' gože' legaque':

—¿Guaque yesezoa gwbas bene' chaxe' to ga chac yela' güešagna' šlac ben' bšagnan' zoalene' legaque'? Še zoa ben' bšagnan', bi gac yesone' gwbas. ²⁰ Perw žin ža cate' bich zoe' len legaque', cana'ch yesone' gwbas. Na' ca'czen' naquen len neda' na' len bene' ca' zjanaque' neda' txen.

²¹ 'Nono zoa bene' yode'e to lache'exo' na' yezoen' to lache' cobe, le lache' coben' yeben' cate' chiben' na' šon' lache' golen', na' gan' žon'na' gacchen da' xen. ²² Neca zoa bene' chgue'e vino cobe lo' bzod yide'exo', le vino coben' chšon' yide'exon' na' chbiayi' vinon' len yida'. San chesegue'e vino coben' lo' yid cobe cont bibi gaquen.

Bene' ca' zjanaque' Jesúsen' txen chesalje' dao ža che Dios
(Mt. 12:1-8; Lc. 6:1-5)

²³ To ža che Dios Jesúsen' gwdie' to ga nyaž trigw, na' bene' ca' zjanaque' le' txen gosezolagüe' chesalje' dao che trigon' šlac gosodie' gan' nyaženna'.

²⁴ Nach bene' fariseon' gose'e le':

—Gwna'šc ¿bixchen' cheson bene' ca' zjanaque' le' txen žin da' bi cheyała' yesone' ža che Dios?

²⁵ Na' Jesúsen' gože' legaque':

—¿Biña' gwlable can' ben da' rey David to ža cate' le' na' bene' lježe' ca' gosodone'? ²⁶ Gwyo'o Davin' ga nac liž Dios cate' da' Abiatar goque' bxož blaó, na' gwdagüe' yetextil da' nac che Dios da' bi chac gagw bene' bi nac bxož, na' lecze bnežjue' che bene' zja'ac len le'.

²⁷ Lecze gož Jesúsen' legaque':

—Diosen' gwleje' to ža cate' bi yeson benachen' žin cont gaclenen benach, gague gwleje' benachen' cont yesonxene' ža chen'. ²⁸ Da'nan' naquen lo na' nia' bi da' nac güen goncho lente cate' nac ža che Dios, neda' naca' ben' gwsela' Diosen' golja' benach.

3

Jesúsen' beyone' to bene' nxo'on šla'a taque'

(Mt. 12:9-14; Lc. 6:6-11)

¹ Yeto ža che Dios Jesúsen' gwyo'e da' yoble to lo' yodao' che neto' bene' Israel na' ca hora' ba chi' to bene' nxo'on šla'a taque'. ² Na' bene' ca' že' lo' yodao' na' chosogüia chesene'e Jesúsen' še yeyone' bena' žan' nac ža che Dios cont de da' yosode'ede' yesagüe' xya che'. ³ Nach Jesúsen' gože' ben' nxo'on taquen':

—Gwzoža' na' gwzecha nga.

⁴ Nach gwnabde' bene' ca' yezica'chle:

—¿Bi da' cheyala' goncho ža che Dios? ¿Goncho da' güen, še goncho da' mal? ¿Cheyala' yoslacho bene', še cheyala' gotchone'?

Perw na' legaque' gosente' šizize. ⁵ Nach Jesúsen' gwne'e legaque', bže'e can' gosone' xbab, na' lecze gocyaše'laže'de' dan' bi gosejle'e che', nach gože' ben':

—Bli naon'.

Na' blien', na' taquen' beyaquen binlo. ⁶ Nach besyežaš bene' fariseo ca' na' gosezolagüe' chosoxi'e len bene' ca' zjada' Herodes naquen' yesone' yesote' Jesúsen'.

Zan bene' nita' cho'a nisaon'

⁷ Nach Jesúsen' gwyeje' cho'a nisaon' len bene' ca' zjanaque' le' txen, na' zan bene' Galilea ja'ac len le'. ⁸ Na' zan bene' za'aque' Judea, na' Jerusalén, na' Idumea, na' yešla'a yegw Jordán, na' gan' mbane Tiro na' Sidón goside' bedesene'e le' cate' gosenezde' yela' guac da' chonen'. ⁹ Da'nan' Jesúsen' gože' bene' ca' zjanaque' le' txen yeseyiljue' to barcw dao' gan' cuie' cont bi yosochi bene' ca' zjanžaga' le', ¹⁰ le' bene' zan ba beyone', na' bene' ca' ne' chese'ede' chosožiga' lježe' nac gac yesoxe'ne'. ¹¹ Na' bene' ca' zjajo'o zjanyaz da' xigüen' cate' chesele'ede' Jesúsen' chosozoa xibe' lagüen' na' da' xigüe' ca' chososya'an chese'en le':

—Len' naco' dogualje Xi'in Dios.

¹² Perw Jesúsen' gwdile' legaquen na' bene' mandadw bi yesenan no nac le'.

Jesúsen' gwchie' bene' šižinw ca' gosaque' txen len le'

(Mt. 10:1-4; Lc. 6:12-16)

¹³ Beyoža' Jesúsen' gwloe' to lo' ya'a na' goxe' bal' bene' goclaže' šja'aclene' le', nach gosa'aque' ja'aque' gan' zoen'. ¹⁴ Nach gwleje' šižinw bene' yesenita' len le', cont sele' legaque' šjasedixjue'ede' xtižen'. ¹⁵ Na' bnežjue' legaque' yela' guac cont yesyeyone' bene' güe' na' yela' gwnabia' cont yesyebeje' da' xigüe' da' yo'o nyaz bene'. ¹⁶ Šižinw bene' quin' gosac: Simón ben' lecze gože'ne' Pedro; ¹⁷ Jacobo len bene' biše' Juan bene' ca' zjanac xi'in Zebedeo, na' bsi'e legaque' Boanerges, zeje diža' bene' zjanac ca' yi' gwzio' cate' chašjw chtinen; ¹⁸ nach Andrés, na' Felipe, na' Bartolomé, na' Mateo, na' Tomás, na' Jacobo xi'in Alfeo, na' Tadeo, na' Simón ben' gwde'e bene' ca' zjanzi' cananista, ¹⁹ na' Judas Iscariote ben' gwdechle bdie' Jesúsen' lo' na' bene' ca' chese'ede' le'.

Gosene' Jesúsen' bebeje' da' xigüe' len yela' guac che Beelzebú

(Mt. 12:22-32; Lc. 11:14-23; 12:10)

Beyoža' Jesúsen' len bene' ca' zjanaque' le' txen goso'e lo' yo'o gan' zoe' ca' hora', ²⁰ na' da' yoble besežagchua bene', neca' goc yese'ej yesagw Jesúsen' len

bene' ca' zjanaque' le' txen. ²¹ Na' cate' goseneze biše' ljež Jesúsen', ja'aque' cont yesyeche'ene', le gosene' chactonte'.

²² Nach bene' ca' bososed bosolo'ede' ley dan' bzoj da' Moisés gosa'aque' Jerusalén na' ja'aque' distritw Galilea gan' chsed chlo'e Jesúsen' na' gose'e bene' ca' že'na':

—Benga yo'o nyaze' Beelzebú dan' chnabia' da' xigüe' ca', na' Beelzebún' chaclenen le' cont chebeje' da' xigüe' zjajo'o zjanyaz bene'.

²³ Nach Jesúsen' goxe' bene' ca' na' bsed blo'ede'ne' gwne':

—¿Nac gon Satanás dan' chnabia' da' xigüe' ca' yebejen lecze da' xigüe'? ²⁴ Še to gobiern' choje' chop šon cuenle na' yeyoža' yesedile legacze', gobiern'na' bi sibi'e. ²⁵ Na' še bene' že' toz yo'o yesechoje' chople na' yesedile legacze', gague sša yesenite' txen. ²⁶ Na' še Satanásen' len da' xigüe' chen yesechojen chople na' yesedilen, lecze bi sibian', san na' yeyož yedon.

²⁷ 'Nono gac šo'e lo' yo'o che to bene' gual na' que'e bi da' de che' še cbi zgua'tec gwcheje' bene' gual na', lete gone' ca' nach gac que'e bi da' de che'.

²⁸ Da' li žia' le'e, yogo' da' xinj da' chon beñač na' yogo' diža' bya' da' yesene', Diosen' yezi'xene' chen še yesyetenjde'. ²⁹ Perw note'teze bene' ne' yela' ya' che Spiritw che Dios, gwbat yezi'xen Diosen' che', san de dola' che' toli tocanē.

³⁰ Gwne' ca' dan' gosene' che' yo'o nyaze' da' xigüe'.

Xna' Jesúsen' na' bene' biše' gosaxe'ne'

(Mt. 12:46-50; Lc. 8:19-21)

³¹ Na' bžin xna' Jesúsen' len bene' biše', na' gosenite' chyo'ole gosaxe' le'.

³² Na' bene' ca' zjanita' cuit Jesúsen' gose'ene':

—Xna'o len bene' bišo' ca' zjanite' chyo'o na' chesyeyiljue' le'.

³³ Nach Jesúsen' gože' legaque':

—¿Nezele non' nac xna'a na' no zjanac biše' lježa'?

³⁴ Nach gwne'e bene' ca' zjachi' cuite'na', na' gwne':

—Bene' quin' zjanac xna'a na' zjanaque' biše' lježa'. ³⁵ Le note'teze bene' chone' da' chna'laže' Dios, bena' nac bene' biša', bene' zana', lecze naque' xna'a.

4

Jempl che bene' goz trigo

(Mt. 13:1-9; Lc. 8:4-8)

¹ Yeto ža yoble gwzola' Jesúsen' chsed chlo'ede' cho'a nesdaon', na' be-sežagchgua bene' zan juisyw gan' chi'ena'. Na' da' besežagchgua bene' zan, benten byen gwyo'o Jesúsen' to lo' barcw dao' da' chda' lo' nesdaon' cho'a yo bižen' na' gwchi'e lo'enna', na' yogo' bene' ca' gosenite' cho'a nesdaon' ga nac yo biž. ² Nach da' zan da' bsed blo'ede' legaque' len jempl da' bi'e. Na' bzejni'ide' legaque', gwne':

³ —Le gwzenag da' nga: To bene' güen žin jeze' trigw. ⁴ Na' šlac zeje' chose' trigon', late' biñ che trigw dan' chazen' jasechazen chanez nach be ca' žia xil be chaš le'e yaba gosagwban'. ⁵ Yelaten' jasechazen ga nac lo' yej, ga bibi yotec zoa, na' da' nga byob blan' le bi jasechazen ga nac sitjw. ⁶ Perw cate' bla' gwbiža' na' bzeyen len na' gwbižen, le gague yo'otec loenna' sitjon'. ⁷ Yelaten' jasechazen ga nac lo' yag yeše', na' yag yešen' gosecha'on na' bosololen' len, na' bibi gosebian. ⁸ Perw na' yelaten' jasechazen ga nac yo šagüe'. Da' nga beselan' na' gosecha'on na' leca güen gosebian, balen gosebian do šichoa güeje to ton, balen gayon, na' yebalen do to gayoa.

⁹ Na' gože' legaque':

—Le'e žia nagle da' chene, le gwzenag xtiža'na'.

*Bichen' bzejni'ide' bene' len jempl
(Mt. 13:10-17; Lc. 8:9-10)*

¹⁰ Gwdena' cate' ba besyeya'ac bene' zan ca', bene' ca' zjanita' gala'ze len le' na' len bene' šižinw ca' zjanaque' le' txen, gosenabde' le' bi zejen jempl dan' bi'en. ¹¹ Na' gože' legaque':

—Nono na' neze can' nac yela' gwnabia' che Diosen', perw ba chone' cont le'e chejnilaže'lene' nezelen. Na' bene' bi chesaclaže' yesejnilaže' Diosen', choe'lengaca'ne' xtižen' len jempl. ¹² Chona' ca' cont yesele'ede' can' chonan' na' bitw yesache'ede' bi zejen, na' cont yesende' xtižan' na' bi yesejni'iden', na' neca yesyetinjde', neca yezi'xen Diosen' xtolen'.

*Jesúsen' bzejni'ide' bi zejen jempl che ben' ben goza'
(Mt. 13:18-23; Lc. 8:11-15)*

¹³ Nach gože' legaque':

—¿Bi chejni'ile jempl nga? ¿Nacxe gac šejni'ile jempl yoble da' güe'lena' le'e? ¹⁴ Ben' ben goza' naque' ca ben' choe' xtiža' Diosa'. ¹⁵ Na' bal' bene' zjanaque' ca biñ dan' beselažo' chanez, le chosozenague' cate' chas chlalje xtiža' Diosen', na' ca cheyoža' la' chžinte Satanásen' dan' chnabia' da' xigüe' ca' na' chebejen xtiža' Diosen' dan' ba yo'o yichjlažda'ogüen'. ¹⁶ Yebal' bene' zjanaque' ca biñ dan' beselažo' ga nac lo yej na' bi ben loen. Legaque' chesyebede' chosozenague' xtiža' Diosen', ¹⁷ perw šložga chesezibi'e, na' cate' chesac bi da' mal chegaque' o bichle chesone bene' legaque' neche da' chosozenague' xtiža' Diosen', la' chesebejyichjten'. ¹⁸ Na' yebale' zjanaque' ca biñ dan' besego'onen ga nac lo yag yeše'. Chosozenague' xtiža' Diosen', ¹⁹ na' šlac zjambane' chesyelal' chesyžejde', na' da' chesaclaže' yeseni'e chziye'en legaque' na' chesezelaže' yogo'ze da' de yesata' che'. Yogo' da' qui bi choen' latje yega'an' xtiža' Diosen' lo' yichjlažda'ogüen' na' da'nan' bi chesejnilaže' le' ca cheyala'. ²⁰ Perw na' nita' bal' bene' chosozenague' xtiža' Diosa' na' chesejnilaže' le' do yichj do laže', bene' qui zjazaca'lebde' ca biñ dan' beselažo' lo yo šagüe'. Bale' zjanaque' ca biñ dan' gosebian šichoa güeje to ton, na' yebale' ca da' ca' bexoen' gayon, o ca no da' ca' bexoen' to gayoa güeje to ton.

*Jempl che yi' dan' chguala'cho
(Lc. 8:16-18)*

²¹ Lecze gože' legaque':

—Cate' chguala'cho to yi' ¿gw dosa'chon to caj o gwzoachon xan cam? Bi choncho ca', san chguala'cho yin' na' chzoachon sibe cont gwšenin'. ²² Na' da' ngaše' chia' neda' na'a, lenna' gwlo'elaon, na' da' nono na' neze chia', žin ža yesenezden'. ²³ Le'e žia nagle da' chene, le gwzenag xtižan'.

²⁴ Lecze gože' legaque':

—Le gwzenag da' quingan' da' chzejni'ida' le'e. Le con can' chonle len len, can' gon Diosen' len le'e. Na' gonchcze' cont soachle mbalaz da' chzenagle che'. ²⁵ Le še chzenagle xtižen' gwzejni'ichde' le'e, perw na' še bi chzenaglen, da' daon' ba nezele yeyanlaže'len.

Jempl che biñ dan' chlan' na' chcha'on

²⁶ Lecze gwna Jesúsen':

—Yela' gwnabia' che Diosen' zaca'leben ca dan' chac cate' to bene' chaze' bite'teze biñ lo yo. ²⁷ Chjaytase' na' chebane' cheyase', chde ža yel, na' chla' dan' gozen' na' chcha'on, perw le' bi nezde' naquen' chac. ²⁸ Le to gualazze yežlio nan' chonen len, zgua'tec chla' lbe'edagüen', nach chlan' dao, na' cheyoža' chbian da' cheyala' cuian. ²⁹ Na' cate' ba goł dan' chbianna' na' chja'aque' chjasyexi'en, le ba bžin cho'a gwlap.

Jempl che bin che xomdas
(Mr. 13:31-32; Lc. 13:18-19)

³⁰ Nach lecze gwna Jesúsen':

—Gonchcho xbab bi ca da' zaca'lebe yela' gwnabia' che Diosen' na' güe'cha' jempl cont nezele šanch bene' yosozenag che' cont nabi'e yichjlažda'ogaque'.

³¹ Naquen ca to bin che xomdas da' chyaž lo yo. Len chnabia' nac da' dao' len bin ca' chazcho lo yežlion'. ³² Perw cate' bačh nyažen, chcha'on na' chaquen da' xench lao yixe' cuan ca', na' da' xenchgua chac xol che xozenna', na' lente byin dao' ca' chesyezi'laže'ba' lo xozenna'.

Jesúsen bgone' žin jempl
(Mt. 13:34-35)

³³ Can' blo'e Jesúsen' xtiža' Diosen' yogo' ni'a, bi'e zan jempl ca che ben' goza' na' che bin ca', con ga zelao goc gosejni'ide'. ³⁴ Bitwbi bzejni'ide' legaque' sin ca be'e jempl, nach cate' bich nita' bene' zan ca', bzejni'ide' bene' ca' zjanaque' le' txen bi zejen yogo' da' ca'.

Jesúsen' bebecžie' be' bdono' len nisdao'
(Mt. 8:23-27; Lc. 8:22-25)

³⁵ Leze lo žana' cate' gwxin, Jesúsen' gože' bene' ca' zjanaque' le' txen:

—Le šo'o laga'cho yešla'a nisdaon'.

³⁶ Nach bosyocua'ane' yezica'chle bene' ca' že' gan' ba bsed blo'ede' na' gosa'aque' lo' barcw daon' gan' ba yo'ocze Jesúsen'. Na' yebał bene' lecze ja'aclene' legaque' len yeto chop barcw dao'. ³⁷ Na' gwzolao gwyechjchgua to be' bdono' na' nisdaon' leze chas chatan', na' gwzolao cheyož nis lo' barcon'. ³⁸ Jesúsen' ba chtase' xante barcon' to lo xcogue' caten' goc ca'. Na' bosyosbane' le' gose'ene':

—¡Maestro! ¿Bibi de chza'lažon' še ba gwdebe nisdaon' chio'?

³⁹ Nach gwyas Jesúsen' na' gwdile' be' bdonon' na' gože' nisdaon':

—¡Šižize! ¡Šižize!

Na' bebežiči be' bdonon' na' beyata'ži nisdaon'. ⁴⁰ Nach Jesúsen' gože' bene' ca' zjanaque' le' txen:

—¿Bixchen' chžebtecle? ¿Nacxečen' bi chejle'le chia'?

⁴¹ Legaque' besežebchgüe' na' gose' lježe':

—¿Noxe benga? lente be' bdono' na' len nisdaon' chosozenaguen che da' že'.

5

Bene' Gadara yo'o nyaze' da' xigüe'
(Mt. 8:28-34; Lc. 8:26-39)

¹ Besežine' šla'a nisdaon' gan' mbane Gadara, ² na' cate' bechoj Jesúsen' lo' barcon' to bene' yo'o nyaz da' xigüen' bchoje' lo' capsantw na' jašague' le'. ³ Bena' ba zoacze' capsantw na'le na' nono chzoe goxe' le', ne len gden ca gosezoede' le'. ⁴ Da' zan ni'a bosocheje' ni'a ne'e gden, perw bia'cze gwchoguen', con bzojx btinen', na' nono gwzoe le'. ⁵ Yogo' ža yogo' yel gwde' bosya'adie' do lo ya'a na' do ladjo ba ca' na' tža tža chone' zi' cuine' len yej. ⁶ Na' cate' ble'ede' Jesúsen' zito' gwyajsese' jazoa xibe' lagüen', ⁷ na' da' xigüen' benen cont bosya'adie' gože' le':

—¿Bixchen' chgoša' chlaže' chio' len neda', Jesús? Naco' dogualje Xi'in Dios bene' nape la'zelagüe yela' chnabia' xen. Neche Dios chneyoeda' le' bi gwsaco' neda'.

⁸ Da' xigüen' benen cont gwna ben' ca' dan' gož Jesúsen' len:

—Da' xigüe', bsan benga.

⁹ Na' gwñabe Jesúsen' len:

—¿Bi lio'?

Na' boži'in xtižen':

—Legión lia', le nac zanto'.

¹⁰ Na' goseneyoen Jesúsa' bi yeselen' zito' cate' yesyežašen' yichjlaždao' ben'.

¹¹ Na' gała'ze lo ya'ana' chesaš zan coš chesagwba'. ¹² Nach da' xigüen' goseneyoen le':

—Gwsela' neto' gan' nita' coš ca' na' ben latje šjajo'oto' lo' yichjlažda'oban'.

¹³ Nach Jesúsen' bnežjue' latje, na' besyechoj da' xigüen' lo' yichjlaždao' bena' na' jasyeyo'on yichjlaždao' coš ca'. Nac ca do chop mil cošen'. Na' besyeyetjes coš ca' le'e ya'a gan' nita'ban' na' jaselažo'ba' lo' nisdao' ga gosatba' gose'jba' nis.

¹⁴ Nach bene' ca' chosoyoe' cošen' bosyoxonje' jasyeyeže' bene' lagüe yež len bene' chaš yixe' can' goca'. Na' ja'ac bene' jasene'e bixen' goc. ¹⁵ Cate' besežine' gan' zoa Jesúsen' besele'ede' ben' ba gwyo'o gwyaz da' xigüen', na' na'a ba chi'e nyaz xalane' na' ba bezoa yichjlažda'ogüen' binlo. Na' besežebe'. ¹⁶ Na' bene' ca' besele'ede' can' goquen' goso'e diža' che dan' goc len ben' gwyo'o gwyaz da' xigüen', lez ca' dan' goc len coš ca'. ¹⁷ Nach gosezolagüe' gosata'yoede' Jesúsen' yeze'e lažgaquen'.

¹⁸ Na' cate' beyo'o Jesúsen' lo' barcon' ben' ba gwyo'o gwyaz da' xigüen' gota'yoede' Jesúsen' šejlene' le'. ¹⁹ Perw Jesúsen' bi be'e latje, san gože' le':

—Beyej ližo' na' jayež bene' lo' yo'o chio' na' no bene' migw chio' yogo' da' güen da' ba ben Xancho Diosen' len le' na' catec ba beyaše' beži'ilaže'de' le'.

²⁰ Na' beza' ben' na' gwzologüe' cho'e diža' yež ca' gan' mbane distritw Decápolis yogo' can' ben Jesúsen' len le', na' yogo' bene' gosene xtižen' besyebande'.

Bi' no'ol che Jairo, na' no'ol ben' gwdane' xa Jesúsen'

(Mt. 9:18-26; Lc. 8:40-56)

²¹ Cate' bežin Jesúsen' cho'a nisdan' zeze'e lo' barcw daon' dan' zeza' šla'a nisdan', bene' zan ja'aque' gan' bežinen', na' Jesúsen' bega'ane' cho'a nisdao' na'ze. ²² Nach bžin to ben' nac bene' gwnabia' che yodao' che yežna', lie' Jairo. Cate' ble'ede' Jesúsen' bzoa xibe' lagüen' ²³ na' gota'yoechgüede'ne' gože'ne':

—Xi'ina' no'ole ba chatbe'. Benšca goclen yo'o xoa taco' yichjbe' cont yeyaquebe' na' bi gatbe'.

²⁴ Nach Jesúsen' gwyejlene' le'. Na' bene' zan ja'acch, na' bosochichgüe' le'.

²⁵ Ladjo bene' ca' len to no'ol che'ede', ba goc šižinw iz chzoe' gwbao'. ²⁶ Ba bžaglaochgüe' jen cuine' rmed len zan bene' güen rmed ca', na' ba benditje' yogo' xmechue' da' de, perw bitwbi gwxi'czen, san chyała'len. ²⁷ Cate' bende' cheso'e xtiža' Jesúsen', no'olna' gwdie' ladjo bene' ca' na' bžine' cože'le Jesúsen' na' gwdane' xen'. ²⁸ Le bene' xbab, gwne': "Con še ba gwdana' xen' nach yeyactecza'." ²⁹ Na' da' li cate' gwdane' xen' la' gwlezte gwbao' dan' zoen', na' no'olen' gocbe'ede' ba bega'a yižgüe' chen'. ³⁰ Na' Jesúsen' la' gocbe'etede' to bene' ba beyacde' len yela' guac chen', nach gwyechje' gwne'e bene' ca' nita' cože'le, na' gwñabde' legaque':

—¿Non' gwdan xan'?

³¹ Nach bene' ca' zjanaque' Jesúsen' txen gose'ene':

—Ba ble'eczedo' ca chosochie' le', ¿bixchen' chñabo' non' gwdan xaon'?

³² Perw Jesúsen' chne'e nile na'le cont le'ede' non' gwdan xen'. ³³ Nach no'olen' nezde' can' ba goc che' na' do chaž chžebe' gwyeye' jaoa xibe' lagüen' na' gože'ne' yogo' da' li. ³⁴ Na' Jesúsen' gože'ne':

—Xi'ina', ba beyacdo' dan' chejnilažo' neda'. Beyej binlo, na' bich bi gacdo' len yižgüe' chion'.

³⁵ Ne' choe'te Jesúsen' dižan' ca' cate' besežin beņe' gosa'ac liž xan yodaon', na' gosi'e xa bi' no'ol daon':

—Ba got bi' chion', ¿bixchen' choncho' zed Maestro nga?

³⁶ Perw Jesúsen' bi bene' cuent dan' chesena beņe' ca', na' gože' xan yodaon':

—Bitw žebo', con gwejle' chia'.

³⁷ Na' bi bi'e latje šja'aclen beņe' zan le' gan' xoa bi' no'olen', san Pedro, Jacobo na' Juan beņe' biše' Jacobo, beņe' ca'ze ja'aclen le'. ³⁸ Na' cate' besežine' liž xan yodaon', ble'ede' ba chi' žaš chesosye'e chesebeže'. ³⁹ Nach gwyo'e na' gože' legaque':

—¿Bixchen' mbecle žaš chbežle? Bi no'ol daon' biņa' gatbe', san chtasben'.

⁴⁰ Perw bosoxiže' gosonle' che'. Nach Jesúsen' bešaše' yogo'lolle', na' gwche'e xaxna'be' na' beņe' ca' zja'aclen le' na'ze na' goso'e len le' gan' de bi' no'ol daon'.

⁴¹ Na' bexue' taca'ben' na' gože'be':

—Talita, cumi —zeje diža': Bi' no'ole, chapa' le' beban na' beyas.

⁴² Nach bi' no'ol daon' la' beyastebe' na' goc beza'be', le šižinw izegueben'. Na' beņe' ca' besele'e leca besyežejde' can' goca'. ⁴³ Perw Jesúsen' gože' legaque' nono yese'e ca', na' gože' legaque' yeso'e bi' no'ol daon' da' gagwbe'.

6

Jesúsen' bežine' distritw gan' chi' yež Nazaret

(Mt. 13:53-58; Lc. 4:16-30)

¹ Na' beza' Jesúsen' na' bežine' laže', na' beņe' ca' zjanaque' le' txen ja'aclene' le'. ² Na' cate' bžin ža che Dios, Jesúsen' gwzologüe' bsd blo'ede' lo' yodaon'. Na' beņe' zan beņe' gosende' xtižen' besyebande' na' gosene':

—¿Nacxe chaquen' cho'e diža' ca'? ¿Bi yela' sinan' nezde'? na' ¿nacxečen' chac chone' yela' guac ca'? ³ Benga chonšagüe' yag na' naque' xi'in María. Nombia'chwne' na' beņe' biše' Jacobo, José, Judas na' Simón, na' lecze beņe' zane' ca' nite' lažcho nga.

Na' da' zjanombi'ene' nan' bi gosaclačže' yesejle'e che'. ⁴ Nach Jesúsen' gože' legaque':

—Yogo'ze beņe' chesonxene' beņe' choe' xtiža' Diosen', perw beņe' gualaž che', beņe' biše' lježe' na' beņe' lo' yo'o che' bi chosozenague' che'.

⁵ Na' ne to yela' guac ca' goc gone' na', lete gwxo'a taquen' yichj to chop beņe' güe' na' beyone' legaque'. ⁶ Na' bebande' dan' bi gosejle' beņe' che'. Na' gwdechle gwda Jesúsen' bsd blo'ede' to to yež dao' ca' nita' gała'ze.

Jesúsen' gwsele' beņe' ca' zjanaque' le' txen jasedixjue'ede' xtiža' Diosen'

(Mt. 10:5-15; Lc. 9:1-6)

⁷ Na' goxe' beņe' šižinw ca' na' gwsele' chop güeje' to to yež, na' bnežjue'ne' yela' gwnabia' cont goc besyebeje' da' xigüe' lo' yichjlaždao' beņe'. ⁸ Na' cate' za' yesa'aque' gože' legaque' bibi yesoxe' chanez, ne bzod, ne yetextil, ne mechw, con yesoxe' to xis da' yosočiše'. ⁹ Na' yosoleje' yel perw bi yesoe' yeto xcamise'. ¹⁰ Na' lecze gože' legaque':

—Cate' žinle to liž beņe', na'ze yega'anle šlac zoale lagüe yeža', cate'ch yeza'le yeža' cana'ch yeza'le latja'. ¹¹ Na' še zoa ga bi yosolebe' le'e neca yosozenague' chele, cate' yeza'le na' le cuibe ni'alen' yo bište cont nacbia' malen' chesone' bi chosozenague' xtiža' Diosen'. Da' li žia' le'e cate' žin ža gac juisyw beņe' ca' bi yosolebe' le'e yesacche' castigw clal ca beņe' Sodoma na' beņe' Gomorra.

¹² Nach gosa'aque', na' goseyixjue'ede' cheyala' yesyetinje xtoła' beņachen'. ¹³ Lecze besyebeje' da' xigüe' da' yo'o nyaz beņe', na' zan beņe' güe' goseye'ne' set na' besyeyacde'.

Gosote' Juan ben' bzoe' bene' nis
(Mt. 14:1-12; Lc. 9:7-9)

¹⁴ Na' ca nac rey Herodes, gwneзде' can' chesone', le yogo'ze bene' gosende' can' ben Jesúsén'. Na' Herodesen' gwne':

—Juan ben' bzoe' bene' nisen' ba beban ladjo bene' guat ca'. Da'nan' chaque' chone' yela' guac.

¹⁵ Yebale bene' gosene':

—Naque' ben' be' xtiža' Diosen' cani', ben' le Elías.

Na' yebale' gosene':

—Naque' con to bene' choe' xtiža' Dios ca bene' ca' gosoe' xtiža' Diosen' cani'te.

¹⁶ Cate' Herodesen' bende' dižan' nac ca' na' gwne':

—Bengan' Juan ben' gwchogbi'an gosechogue' yene', na' na'a ba bebane' ladjo bene' guaten'.

¹⁷⁻¹⁸ Le Herodesen' beque'e Herodías na' gwzoalene' le' goque' xo'ole' la'czla' Herodíasna' naque' xo'ole Felipe biše'na'. Na' Juanna' gože' Herodesen':

—Bi cheyała' soalen no'ol che bene' bišon'.

Da'nan' Herodesen' gwchogbi'en gosezene' Juanna' na' bosocheje'ne' len gden lo' yo'o ližya gan' gosegüe'ene'.

¹⁹ Can' goc Herodíasna' bgue'ede' Juanna' na' goclaže' gote'ne', perw bi goc.

²⁰ Le Herodesen' gwneзде' Juanna' naque' to bene' chon da' zej to licha na' to bene' yo'o lo' na' Dios, nachen' Herodesen' bžebe' Juanna' na' bi be'e latje bi gone Herodíasen' le'. Na' la'czla' bi gwejni'iteque Herodesen' dan' bšalj Juanna', con bebede' bzenague' che'. ²¹ Perw Herodíasen' beyiljwlaže' nac bene' cate' ben Herodesen' lni goła' ža le', bsini'e xše' da' gwdagüe' len bene' gwnabia' che' ca' na' no xan soldadw ca' na' nochle bene' blao že' distritw Galilean'. ²² Bi' no'ol che Herodíasen' gwyo'obe' bya'abe' gan' gosagüe' xšen' na' beca'a Herodesen' can' bya'aben', lez ca' ben' gosagw len le' xšen'. Na' reyna' gože' bi' no'ola':

—Gwnabe neda' con da' žan chio' na' gonan'.

²³ Na' lecze gože'be':

—Diosen' naque' testigw chia' goņa' le' con da' nabdo'nda', la' gašjo yež ca' gan' mbanda' chnabi'a.

²⁴ Na' bechojbe' na' gožbe' xna'ben':

—¿Bi nabda'ne'?

Na' le' gože'be':

—Gwnab yichj Juan ben' chzoe' bene' nis.

²⁵ Na' la' beyo'otebe' gan' chi' reyna' na' gožbe'ne':

—Che'nda' netecna'a goņo' neda' to lo' platw yichj Juan ben' chzoa bene' nis.

²⁶ Na' ne late'ze bi gwyazlaže' reyna' gone' can' gož no'ol güegon' le', perw bačhle gwne' lao bene' ca' jasa'ac lnin' Diosen' naque' testigw che' gwnežjue'be' bite'teze nabebe' le', da'nan' bi bžone' gac dan' gwnabebe' le'.

²⁷ Nach la' gwsela'te reyna' to soldadw na' gože'ne' šjaxi'e yichj Juanna'. ²⁸ Na' gwey soldadon' lo' yo'o ližyan' na' jachogue' yen Juanna', na' bžie' yichje' to lo' platw jasanen' bnežjuen' bi' no'ola', na' bi' nga bnežjwben' xna'be'.

²⁹ Cate' goseneze bene' ca' zjanaque' txen len Juanna', jasexi'e cuerp chen' cont bosocuaše'ne'.

Jesúsen' bguagüe' gayo' mil bene'

(Mt. 14:13-21; Lc. 9:10-17; Jn. 6:1-14)

³⁰ Beyoža' postlw ca' besyežague' len Jesúsén' na' gose'ene' bica' da' ba gosone' na' da' ba bosolo'ede'. ³¹ Na' Jesúsén' gože'ne':

—Le da, le šo'o ga nac lchojiže' yezi'laže'cho late'.

Gwne' ca' le chep chetj chac bene', neca chac latje yesagüe'. ³² Nach Jesúsen' len postlw che' ca' gosa'aque' ja'aque' legacze' to lo' barcw, ja'aque' ga nac lchojiže'. ³³ Perw zan bene' besele'ede' gosa'aque' na' besyeyombi'e Jesúsen', na' zan yež bene' ca' bosoxonjsese' na' byobch besežine' ca' Jesúsen'. ³⁴ Na' cate' Jesúsen' bchoje' lo' barcon' ble'ede' ba besežag bene' zan na' beyaše' beži'ilaže'de' legaque', le nite' ca nita' no xila' be nono de gwyoeba'. Nach gwzolaogüe' bsd blo'ede' legaque'. ³⁵ Cate' ba zoa xin, bene' ca' zjanaque' le' txen gose'ene':

—Ba zoa xin, na' latj gan' zoacho nga naquen latj daš. ³⁶ Na' besela' bene' quinga cont šja'aque' ga že' bene' do ranšw na' do yež dao' ca' dan' nyečj mbi'i šjasexi'e da' yesagüe', le bibi de yesagüe'.

³⁷ Na' Jesúsen' gože'ne':

—Le'e le güe'e da' yesagüe'.

Na' legaque' gose'ene':

—Bi de laxjwto' che chop gayoa ža žin cont šjaxi'to' da' güe'to' legaque' yesagüe'.

³⁸ Jesúsen' gože'ne':

—¿Gaca' yetextilen' de chele? Le šja'ac le šjana'.

Cate' gosenezde' na' gose'ene':

—De gayo' yetextil na' yechop bel ya'a.

³⁹ Nach gože' bene' ca' yesebi'e to xonj güeje' lo' yixyen'. ⁴⁰ Na' gosebe' to gayoa güeje' na' yebale' šiyon güeje'. ⁴¹ Nach Jesúsen' gwxi'e yetextil ca' gayo' na' bel ya'an chope, na' gwne'e le'e yaba bi'e yela' choxcen che Dios na' bzojje' yetextilen' bi'en bene' ca' zjanaque' le' txen cont goseyisen' len bene' ca'. Leze gwdise' bel ya'a ca' chop lao yogo'lol bene' ca'. ⁴² Na' yogüe' gosagüen' na' goseljde'. ⁴³ Beyoža' bososše'e yešiziw žome yetextil bixjw na' len late' güeje' bel da' bega'añ. ⁴⁴ Na' bene' ca' gosagw yetextilen' gosaque' gayo' mil bene' byo, bi cuent no'ol ca' len bidao'.

Jesúsen' gwze'e lo nis

(Mt. 14:22-27; Jn. 6:16-21)

⁴⁵ Gwdena' Jesúsen' bene' byen besyeyo'o bene' ca' zjanaque' le' txen lo' barcon' cont yesyelaga'zegue' nisdaon' na' yesežine' Betsaida, šlac le' za' chesele' bene' ca' žena' ližgaque'. ⁴⁶ Na' cate' beyož bzede' bene' ca' diža', gwyeje' lo' ya'an bol güiže' Dios. ⁴⁷ Na' ca' nac barcon', cate' goc chol ba zejen gachol nisdaon', na' toze Jesúsen' ne' zie' ga nac yo biž. ⁴⁸ Na' ble'ede' bi chac yosyose'en binlo, le ben' chečjen clele na' bi choen' latje sa' barcon'. Na' šbał beyetj Jesúsen' ya'ana' na' gwze'e lo nisen' ba zej gale' gan' zja'aquen', na' ba zoa teze' gan' zjaya'aquen' ⁴⁹ cate' besele'ede' le' chze'e lo nisen'. Na' gosacde' še da' chda chelen'. Na' bososye'e. ⁵⁰ Le yogüe' besele'ede'ne' na' besežebe'. Perw le' la' bol güižte' legaque', gože'ne':

—Le gončach laže'le; nedan', bitw žeble.

⁵¹ Nach gwyo'e lo' barcw gan' zjaya'ac bene' ca', nach gwche'ži ben'. Na' legaque' leca besyebande' na' besyežejde', ⁵² le bi gosejni'ide' dan' bene' yela' guac len yetextil ca', na' biña' yesejni'laže' le'.

Jesúsen' beyone' bene' güe' ca' že' Genesaret

(Mt. 14:34-36)

⁵³ Na' goselague' nisdaon' na' besežine' yežlio gan' nzi' Genesaret, na' bosocheje' barcon' cho'a nisdaon'. ⁵⁴ Na' cate' beyož besyechoje' lo' barcon' bene' ca' la' besyeyombia'te' Jesúsen'. ⁵⁵ Na' ja'acsese' doxen gan' mbane

Genesaret, na' do lo cam dao' zjanxoe' bene' güe' ca' jasesane'ne' gan' zjanezde' zoa Jesúsén'. ⁵⁶ Na' gate'teze gwyey Jesúsén', do yixe', do yež, con goseyixjue' bene' güe' ca' do chanez na' goseneyoede' Jesúsén' gwnežjue' latje yesoxe' la'ch late'ze xni'a xen', na' yogo' bene' gosoxen' besyeyacde'.

7

Dan' chchoj lo' laždao' benachen' chonen cont laždagüen' bi naquen xilaže' len Diosen'

(Mt. 15:1-20)

¹ Nach bene' fariseo ca' na' len bene' ca' bososed bosolo'e dan' bzoj da' Moisés gosa'aque' Jerusalénna' na' ja'aque' gan' zoa Jesúsén'. ² Na' besele'ede' bal' bene' ca' zjanaque' Jesúsén' txen con gosagüe' neca bosyone'e zan ni'a can' chesacde' cheyała' yesone', na' da'nán' gosezi'diže' legaque'. ³ (Le bene' fariseo ca' na' yogo' bene' Israel gualaž cheto' ca' chesonxene' costumbr ca' da' bosyocua'anlen da' xozxta'oto' ca' neto' bi yesagüe' še biña' yosyone'e zan ni'a. ⁴ Na' cate' yesyežine' lagüe ya'a, bi yesagüe' še biña' yosyone'e, na' da' zanch costumbr da' zjana'ogüe', ca' no yeseyibe' xiga' ga chese'eje' nis, no yeso' xguague, no yeso' ya na' no xcame'.) ⁵ Nach bene' fariseo ca' na' bene' ca' bososed bosolo'ede' dan' bzoj da' Moisésén' gosenabde' le':

—¿Bixchen' bi cheson bene' ca' zjanaque' le' txen can' goson bene' gol ca'? san con chesagüe' sin cbi chosyone'e zan ni'a.

⁶ Jesúsén' gože' legaque':

—Chonle cayanen' bzoj da' Isaíasén' che le'e nacle bene' gwxiye' gan' bzoje', žan':

Bene' qui chesonxene' neda' len diža' cho'a,
perw bi chesonxene' neda' len lažda'ogaque'.

⁷ Bibi zejen dan' chesonxene' neda',

le dan' chososed chosolo'eden' naquen da' chnalaže' benachze.

⁸ Bi chonle ca' chnalaže' Dios, san na'ole can' ža benachen' cheyała' gonle, chyible no yeso' xguague, no xiga' ga che'eje' nis, na' da' zanch da' chonle.

⁹ Qui gožch Jesúsén' legaque':

—Chbejyichjle da' non Diosen' mandadw gonle cont na'ole costumbr che benach. ¹⁰ Da' Moisésén' gwne': “Le gap bala'an xaxna'le”, na' “Note'teze še chžia chnite' xaxne'e, cheyała' gate'.” ¹¹ Perw le'e žale to bene' guac ye'e xaxne'e: “Bibi de gona' gaclena' le'e, le yogo' da' de chia' naquen Corbán” (zeje diža', ba bnežjuen' lo na' Dios). ¹² Na' žale cate' to bene' že' ba naquen lo na' Diosen' nach bich cheyała' gaclen xaxne'e. ¹³ Dan' žale ca' chzoale ca'ale dan' ža Diosen' na' con chonxenle costumbr gole che da' xozxta'ole ca'. Na' da' zanch dan' nac ca' chonle.

¹⁴ Da' yoble gox Jesúsén' bene' ca', na' gože' legaque':

—Yogo'le le gwzenag chia', na' le šejni'i. ¹⁵ Bite'teze da' ye'ej gagw benachen', bi nacho len chonen cont lažda'ogüe' bi naquen xilaže' len Diosen'. Dan' chchoj lo' lažda'ogüen', lenna' chonen cont lažda'ogüe' bi naquen xilaže' len Diosen'.

¹⁶ Le'e žia nagle da' chene, le gwzenag xtiža'na'.

¹⁷ Cate' bsan Jesúsén' bich bšaljlene' bene' ca' na' beyo'e lo' yo'o, nach bene' ca' zjanaque' le' txen gosenabde' le' bi zejen dan' gože' legaque'. ¹⁸ Na' Jesúsén' gože' legaque':

—¿Lecze len le'e bi chejni'ile? ¿Bi chejni'ile gague da' ye'ej gagw benachen' chonen cont lažda'ogüe' bi naquen xilaže' len Diosen'? ¹⁹ Le da' che'ej chagw benachen' gague cho'on lo' lažda'ogüen', san lo' li'en cho'on, na' chžin hor cheden.

Na' da' gwne' ca' zeje diža' bite'teze yela' guagw nacczen xilaže'. ²⁰ Na' lecze gwne':

—Xbab da' yo'o lo' yichjlaždao' beṇachen', lenṇa' chonen cont lažda'ogaque' bi zjanaquen xilaže' len Diosen'. ²¹ Le lo' yichjlaždao' beṇachen' chchoj xbab mał ca' da' žan yesone' da' quinga: yesata'lene' no'ole bi nac xo'olgaque' o bene' byo bi nac bene' chegaque', gwzoa xtogaque', yesote' bene', ²² yesone' gwban, yesezelaže' gata' chegaque' da' de che bene' yoble, yesone' da' mał, yeseziye'e bene', yesone' bichle da' nac da' yela' zto', yesacxi'ede' bene', yesene'e che bene', yesaque' bene' ya'laže', yesone' xbab da' bi zaca'. ²³ Yogo' da' mał qui chesechojen lo' laždao' beṇač na' chonen cont bi nac lažda'ogaque' xilaže' len Diosen'.

To no'ol zito' gwejnilaže' Jesúsen'
(Mt. 15:21-28)

²⁴ Na' beza' Jesúsen' na' gweyje' distritw gan' mbane ciuda Tiro na' ciuda Sidón. Na' gwyo'e to lo' yo'o na' goclaže' nono neze, perw bi goc gone' cont bi gosenezde'. ²⁵ Cate la' gwnezete xṇa' to bi' no'ole bi' yo'o nyazbe' da' xigüen', na' gweyje' na' bzoa xibe' xṇi'a Jesúsen'. ²⁶ No'olen' goque' bene' zito', no'ole Sirofencia. Gweyje' gwṇabde' Jesúsen' yebeje' da' xigüe' yo'o nyaz bi' no'ol chen'. ²⁷ Na' Jesúsen' gože'ne':

—Yogo'ze bene' zgua'tec chnežjue' da' chagw xi'ine'. Bi naquen güen yeque'e yela' guagw che xi'ine' na' gwnežjuen' yesagw beco' ca'.

²⁸ Na' no'olen' gože'ne':

—Leczedo' can' gwnaon' Xana', perw lecze guaque gagw beco' be chi' xan mes bla'a da' chlažo' lo' yo.

²⁹ Nach Jesúsen' gože'ne':

—Nacczen can' gwnaon', guac yeyejo', ba bechoj da' xigüen' yo'o nyaz bi' no'ol chion'.

³⁰ Cate' bežin ližen' ble'ede' de bi' no'ol daon' to lo' cam, na' ba bechoj da' xigüen' yo'o nyazbe'.

Jesúsen' beyone' to bene' cuež, bene' lecze bi goc nie'

³¹ Jesúsen' bezse'e gan' mbane Tiro na' gwdie' gan' nzi' Sidón na' yež ca' gan' mbane Decápolis, na' bežine' cho'a nisdao' che Galilea. ³² Na' jasesane' to bene' byo bene' cuež na' bi goc nie', na' gosenabe' xoa na' Jesúsen' yichje'. ³³ Nach Jesúsen' gwche'ene' late' lchojiže' ga nono bene' nita', na' bde xbene' lo' nague' na' bži'en xene' na' gwdane' ložen'. ³⁴ Nach gwne'e le'e yaba, bebande', na' gwne':

—¡Efata! —zeje diža': ¡Byaljo!

³⁵ Nach nag bena' besyeyaljon na' goc bende', na' lecze beyac ložen' na' goc gwṇie' binlo. ³⁶ Na' Jesúsen' gože' bene' ca' nono yese'e ca', perw la'czla' gože' legaque' ca', nachle goso'e diža' can' goca'. ³⁷ Na' leca besyebande', na' gosene':

—Yogon' chone' binlo; chacte chone' cont chesyeyene bene' cuež ca' na' bene' ca' bi chac yesene' chesyenie'.

8

Jesúsen' cho'e da' chagw tap mil bene'
(Mt. 15:32-39)

¹ Ca tiempa' besežagchgua bene' zan na' bibi de yesagüe'. Nach Jesúsen' goxe' bene' ca' gwleje' cont zjanaque' txen len le' na' gože' legaque':

2 —Cheyaše'da' bene' qui, le ba goc šone ža zjanite' nga len neda' na' bibi de yesagüe'. 3 Še yesela'ne' ližgaque' na' biña' yesagüe', chanez yesego'one' yesečholde', le bale' za'aque' zito'.

4 Nach bene' ca' zjanaque' le' txen gose'ene':

—¿Nacxe goncho güe'chone' da' yesagüe' latje nga ga nono bene' nita'?

5 Na' Jesús'en' gwñabde' legaque':

—¿Gaca' yetextilen' de chele?

Na' legaque' gose'ene':

—Gažen.

6 Nach bene' mandadw yesebe' yogo'lol ben' nitan' lo yo, na' gwxi'e da' gaž yetextil ca' na' be'e yela' choxcen che Dios, nach bzoxjen' bnežjuen' bene' ca' zjanaque' le' txen na' legaque' goseyisen' che yogo'lol bene' nita' na'. 7 Leze zjano'e to chop bel ya'a, na' Jesús'en' be'e yela' choxcen che Diosen' che bel ya'a ca' na' leze goseyisen' che yogo'lol bene'. 8 Na' yogüe' gosagüe' na' goseljde'. Gwdena' bososše'e yegaže žome len late' güeje yela' guagw da' bega'an. 9 Bene' ca' gosagon' zjanaque' ca do tap mil bene'. Cate' ba besyedagüe', Jesús'en' gože' legaque': —“Nayežagcho”, 10 na' gwyo'e lo' barcon' len bene' ca' zjanaque' le' txen na' gwyeje' do gan' mbane yež da' nzi' Dalmanuta.

Bene' fariseo ca' gosaclačže' gon Jesús'en' to yela' guac da' yesele'ede' le'e yaba (Mt. 16:1-4; Lc. 12:54-56)

11 Na' bene' fariseo ca' gosezolagüe' chesedildiže' len Jesús'en'. Na' da' gosaclačže' yesagüe' xya che' nach gosenabde'ne' gone' to yela' guac da' yesele'ede' le'e yaba cont yesenezde' še da' licze Diosa' gwsele' le'. 12 Jesús'en' bebanchgüede' na' gwne':

—Ba ble'ele chona' yela' guac. ¿Bixchen' chñable to yela' guac da' le'ele cont nezele še Diosen' gwsele' neda'? Da' li žia' le'e, bitwbi gona' da' le'ele.

13 Nach bcua'ane' legaque' na' beyo'e lo' barcon' beze'e beyeje' yešla'a nesdaon'.

Levadura che bene' fariseo ca' (Mt. 16:5-12)

14 Bene' ca' zjanaque' Jesús'en' txen gosanclačže' yeso'e da' yesagüe', na' totec yetextil zjano'e lo' barcon'. 15 Na' Jesús'en' gože' legaque':

—Le gon xbab, le gwsaca' len levadura che bene' fariseo ca' na' len levadura che Herodes.

16 Nach gosenabe lježe' bixchen' gwne' ca', na' gose' lježe':

—Gwne' ca' le gague bi yetextil checho den'.

17 Jesús'en' goche'ede' xbab dan' chesone' na' gože'ne':

—¿Bixchen' chacžejlaže'le da' bibi yetextil de? ¿Biña' šejni'ile, neca chacbe'ele? ¿Nac chač lažda'olen' bi chejle'le? 18 ¿Bi chle'ele len yejlaole, neca chenele len nagle? ¿Bi chjayze'ele? 19 Gwdisa' gayo' yetextil na' goquen che gayo' mil bene', na' ¿bi chjayze'ele yebale žome goc da' becho'onen da' botoble?

Na' legaque' gosene':

—Šižinw žome becho'onen da' botobto'.

20 —¿Chixe caten' gwdisa' gaže yetextilen' lao tap mil bene'? ¿Yebale žome gwža'te dan' botoblen'?

Na' gosene':

—Gaže žomen'.

21 Nach gože' legaque':

—¿Biña' šejni'iczele na'a cho'a diža' che dan' chososed chosolo'e bene' fariseo ca'?

Jesúsen' beyone' to bene' lchol bene' Betsaida

²² Gwdechle besežine' Betsaida na' jasesane' to bene' lchol lao Jesúsen', na' gosata'yoede' le' yeyone' le'. ²³ Na' bexue' taca' bene' lchola' na' gwleje'ne' yež. Nach gwdebe' xene' yejlagüen' na' gwıoa taquen' yichje' na' gwıabde'ne' še chle'ede' late'. ²⁴ Bene' lchola' gwne'e na' gwne':

—Chle'eda' bene', na' chle'eda'ne' ca yag, perw chesa'aque'.

²⁵ Nach Jesúsen' bexoa taque' yejlagüen' da' yoble, na' gwıa'yan' ben' na' beyaque', bele'etede' yogo' binlo. ²⁶ Nach Jesúsen' besele' le' liže', gože'ne':

—Bi yeyo'o lagüe yežen', nēca no yo'o da' nga.

Pedron' gwne' Jesúsen' naque' Cristo ben' gwlej Diosen' cont nabi'e
(Mt. 16:13-20; Lc. 9:18-21)

²⁷ Gwdena' gwyej Jesúsen' len bene' ca' zjanaque' le' txen yež dao' ca' zjachi' do ga mbane ciuda da' nzi' Cesarea de Filipino. Na' chanez gwıabde' bene' ca' zja'aclen le':

—¿Bi chesena bene'? ¿Non' naca' neda'?

²⁸ Legaque' gose'ene':

—Bale' chesene' naco' Juan ben' bzoa bene' nis, yebale' chesene' naco' Elías, na' yebale' chesene' naco' yeto bene' be' xtiža' Dios cani'.

²⁹ Na' gwıabde' legaque':

—¿Chixe le'e? ¿no žale naca'?

Pedron' gože' le':

—Len' naco' Cristo ben' gwlej Diosen' cont nabi'o.

³⁰ Nach Jesúsen' gože' legaque' nono yese'e ca'.

Jesúsen' gwıixjue'ede' gate'
(Mt. 16:21-28; Lc. 9:22-27)

³¹ Na' gwıolao Jesúsen' bzejni'ide' legaque' can' gac chen', gože'ne':

—Da' zan da' saca'zi'a neda' naca' ben' gwsela' Diosen' golja' beıach. Na' bene' blao ca' chesenabia' naciön chechon' na' bıoz gwıabia' ca' na' bene' ca' chososed chosolo'e dan' bzoj da' Moisés bi yesele'ede' neda' güen da' bi chesejle'e chia', na' yesote' neda', perw gacch šone ža yebana' ladjo bene' guat ca'.

³² Da' nga gwınen' zaca'laon. Na' Pedron' gwche'e Jesúsen' ga nac lchojiže' na' gwıolagüe' chdıle' le' dan' gwne' ca'. ³³ Perw Jesúsen' gwıechje' na' gwne'e bene' ca' zjanaque' le' txen, na' gwdıle' Pedron', gože'ne':

—ıGwıuase ca'ale Satanás! Bi nsa'o xbab che Diosen' san nsa'o xbab che beıach.

³⁴ Nach Jesúsen' goxe' bene' ca' zjanaque' le' txen na' yezica'chle bene' na' gože'ne':

—Note'teze bene' še chaclaže' gaque' neda' txen, cheyala' chojyichj cuine', la'czla' saca'zi'e, na' gone' can' nia' neda'. ³⁵ Note'teze bene' chacde' gone' cont bi saca'zi'e o cont nono yesot le', benan' cuiayi', na' note'teze bene' chzanlaže' cuine' saca'zi'e o gate' ne' chia' neda' o neche xtiža' Diosen', ba de yela' mban che' toli tocaıe. ³⁶ ¿Bixe zejenna' to bene' nabi'e doxen yežlion' na' cuiaye'e bi gata' yela' mban che' toli tocaıe? ³⁷ Le' bi zoa nacle gon beıachen' chıxjue' cont gata' yela' mban che' toli tocaıe. ³⁸ Bene' ca' že' na'a bi chesejnılaže' Diosen' na' chesonchgüe' da' xınj. Na' note'teze bene' še cheto'ede' par ye'e lježe' chejnılaže' neda', na' še cheto'ede' par gwzenague' xtižan', lecze ca' neda' yeto'eda' che' par nia' naque' neda' txen, neda' naca' ben' gwsela' Dios golja' beıach. Yeto'eda' che' cate' yida' da' yoble nsa'a yela' zaca' juisıyw che' Xa' Diosen' na' nchia' bene' ca' zjanac angl che'.

9

¹ Lecze gož Jesúsen' legaque':

—Da' li žia' le'e, ba_lle nita'le nga na'a bina' gatle cate' žin ža le'ele Diosen' gwlo'e yela' guac xen chen' can' chnabi'en'.

Bša' Jesúsen' ca goque'

(Mt. 17:1-13; Lc. 9:28-36)

² Gwde xop ža, Jesúsen' gwche'e Pedro, Jacobo na' Juan na' ja'aque' to lo ya'a sibe, na' nono nochle ja'ac len legaque'. Na' nite' besele'ede' bža' ca goc Jesúsen'.

³ Xalane' goquen da' šiš xila', gecten ca da' chactite; la' chibcho lache' yežlio nga bi yechojen gaquen šiš xila' catequen' goc xalanen'. ⁴ Na' concze besele'ede' da' Elías na' da' Moisés chosošalje' len Jesúsen'. ⁵ Nach Pedron' gože' Jesúsen':

—Maestro, įleca güenna' zoacho nga! Gonto' šone ranšw, to chio', to che Moisés, na' yeto che Elías.

⁶ Le bene' ca' zja'ac len Jesúsen' besežebchgüe', na' Pedroa' bi chacbe'ede' bin' že'. ⁷ Nach gwche' to bejw gan' niten' gwyečhjen legaque', na' lo' bejon' gosende' gwna Diosen':

—Bengan' Xi'ina' bene' chacda'; le gwzenag che'.

⁸ Na' cate' gosene'e cue'ej cuiten' notno besele'ede', san toze Jesúsen' zie'.

⁹ Na' šlac chesyeyetje' lo ya'an, Jesúsen' gože' legaque' notno yesi'e ca nac dan' besele'eden'. Gože'ne':

—Cate'ch ba bebana' ladjo bene' guat ca', nedan' naca' ben' gwseła' Dios golja' benach, cana' güe'le diža' chen.

¹⁰ Da'nan' gosezoe' šize, nono gose'e ca', perw na' gosenabe lježe' bi zejen dan' gwne' yebane' ladjo bene' guat ca'. ¹¹ Nach gose'e Jesúsen':

—Bene' ca' chososed chosolo'e dan' bzoj da' Moisés chososedde' neto' chesene' zgua'tec da' Elías ben' gwzoa cani' cheyala' yide' da' yoble cate' za' yedenabia' ben' seła' Diosen'. ¿Bixchen' chesene' ca'?

¹² Na' boži'e xtižen':

—Da' liczen' zgua'tec Elíasna' yide' na' yeyo'e xneze yogo'lol da' de yežlio nga. ¿Nezele bin' ža gan' nyoj Xtiža' Diosen' chia' neda' naca' ben' gwseła' Dios golja' benach? Žan saca'zi'a na' bene' zan bi yesejnilaže' neda'. ¹³ Na' žia' le'e, Elías ba bide' na' gosonde' le' con ca gosaclaže', can' nyoj le'e Xtiža' Diosen' žan can' cheyala' gac che'.

Jesúsen' beyone' to bi'yo'o nyazbe' da' xigüe'

(Mt. 17:14-21; Lc. 9:37-43)

¹⁴ Gwdena' besyežine' gan' nita' yezica'chle bene' ca' zjanaque' Jesúsen' txen, na' besele'ede' bene' zan zjanita' zjanyečhjde' legaque', na' len bene' ca' chososed chosolo'ede' dan' bzoj da' Moisés chesedildiže' len legaque'. ¹⁵ Na' cate' bene' ca' besele'ede' Jesúsen', yogüe' besyežejde' na' ja'acse'e bosoguape' le' tiox. ¹⁶ Nach gwnabde' legaque':

—¿Bin' chdildiža'le len bene' ca'?

¹⁷ Na' to bene' nchixe bene' ca' boži'e xtižen', gwne':

—Maestro, zedesana' bi' chia' nga, yo'o nyazbe' da' xigüe' na' benen cont bi chac nebe'. ¹⁸ Gate'teze chdabe' chzenen lebe' na' chcho'onen lebe' lo yo, na' chbia bžina' cho'abe' na' chagwxej laybe'. Na' ca' zej chedo fuerz chebe'. Na' ba gwnaba' lao bene' qui zjanaque' le' txen yesyebeje' da' xigüe' yo'o nyazbe', perw bitw gosaque'.

¹⁹ Na' Jesúsen' gože' bene' ca' že'na':

—įLe'e bene' bi chejnilaže'! ¿Šna chyažjen soalena' le'e cont šejnilaže'le? ¿Batca' zelao na'lagua' le'e? Le yedesambe' nga.

²⁰ Na' jasesane'be', na' cate' da' xigüen' ble'en Jesúsén', benen gwyazbe' šon, na' gwbiḅbe' lo yo, chbiḅ chtolbe' na' chbia bžina' cho'abe'. ²¹ Nach Jesúsén' gwḅabde' ḅaben':

—¿Baḷ iz ba goc chacbe' ca'?

Na' ḅaben' gwne':

—Cate' nache' bida'ote gwzolao chacbe' ca'. ²² Na' zan ḅi'a da' xigüen' chžalan' lebe' lo yi' na' lo nis cont goten lebe'. Da'nán' še guac yeyono'be', beyaše'šque neto' na' beyombe'.

²³ Jesúsén' gože'ne':

—Cheyaḷa' šejnilažo' neda', le yogo' da' chzelaže' beḅe' chesejnilaže' neda' chaquen.

²⁴ Nach ḅaben' gwne' zižje:

—¿Chejnilaža' le', goclen neda' šejnilaže'cha'!

²⁵ Na' cate' Jesúsén' ble'ede' chesežagchgua beḅe', gwdiḷe' da' xigüen' gožen':

—Da' xigüe', le' chono' cont bi' nga bi chenebe' na' bi chac ḅebe', neda' žia' yechojo'. Bsan bi' nga, na' bich yeyo'o yichjlažda'oben'.

²⁶ Na' da' xigüen' benen ga bosya'abe' na' benen ga gwyazbe' ca yeto šon, nach bechojen. Na' bin' bega'anbe' ca bi' guat, na' zan beḅe' gosene' gotben'.

²⁷ Perw Jesúsén' beḅue' taca'ben' cont beyasbe', nach gwzechabe'.

²⁸ Nach cate' Jesúsén' gwyo'e to lo' yo'o, beḅe' ca' zjanaque' le' txen gosebeje' le' ca to lchojiže' na' gosenabde' le':

—¿Bixchen' bi goc neto' yebejto' da' xigüen'?

²⁹ Na' gože'ne':

—Cont yechoj da' xigüen' nac ca' cheyaḷa' gonle gwbas na' soatezle yoḷ güižle Dios.

Da' yoble Jesúsén' gwne' gate'

(Mt. 17:22-23; Lc. 9:43-45)

³⁰ Cate' besyeya'aque' na', besyedie' distritw Galilea. Na' Jesúsén' goclaže' nono yeseneze, ³¹ le chzejni'ide' beḅe' ca' zjanaque' le' txen, che'e legaque':

—Nedan' naca' ben' gwseḷa' Dios golja' beḅaḅ, yosodie' neda' lo na' beḅe' yesote'nda', perw yeyon ža yebana' ladjo beḅe' guat ca'.

³² Perw bi gosejni'ide' bin' gože' legaque', na' besežebe' yesenabde'ne'.

Gosedildiže' gosene' noen' nac beḅe' blaoch

(Mt. 18:1-5; Lc. 9:46-48)

³³ Na' besežine' ciuda da' nzi' Capernaum, na' cate' besežine' yo'o gan' zoa Jesúsén' gwḅabde' legaque':

—¿Bixchen' chdildiža'le chanez?

³⁴ Perw con gosenite' šižize, le chanezan' gosedildiže' gosene' noen' nac beḅe' blaoch. ³⁵ Nach Jesúsén' gwchi'e na' goxe' beḅe' šižinw ca' zjanaque' le' txen, na' gože' legaque':

—Še no le'e chaclaže'le gacle beḅe' žialao, cheyaḷa' gonle xbab bibi zaca'teclé, na' cheyaḷa' gon cuinle ca xmos yogo' beḅe' lježle.

³⁶ Nach beḅue' to bidao' na' bzeche'be' gachol legaque', na' gwlene'be' na' gože' legaque':

³⁷ —Note'teze beḅe' chone' güen len to bidao' ca bi' nga neḅe' da' chejnilaže' neda', choncze' güen len neda'; na' noteze' chon güen len neda', choncze' güen len Dios ben' gwseḷa' neda'.

Bene' bi chon chio' contr, txencza' chone' chio'

(Mt. 10:42; Lc. 9:49-50)

³⁸ Nach Juanna' gože'ne':

—Maestro, bežagto' to bene' cho'e lao' na' chebeje' da' xigüe' da' yo'o nyaz bene', na' bžonto' gone' ca', le bi chone' chio' txen.

³⁹ Na' Jesús'en' gwne':

—Bi gwžonle gone' ca', le gague zoa to bene' gone' yela' guac cho'e lan', yeyoža' ne' yela' ya' chia'. ⁴⁰ Le bene' bi chone' chio' contr, txencza' chone' chio'. ⁴¹ Chnia' le'e to da' zejen, note'teze bene' gone' le'e la' to xiga'ze nis da' ye'ejele neche chejnilaže' neda' na' neche nezde' le'e nacle txen len neda', Diosen' gone' cont soacze' mbalaz da' ba goclene' le'e.

Bitw co'yela'cho bene' gone' da' xinj

(Mt. 18:6-9; Lc. 17:1-2)

⁴² 'Note'teze bene' chon cont lažo' to bene' za' gwzologüe' chejnilaže' neda' gone' da' xinj, yejñi'acle yosocheje' yene' to yiše xen na' yosozale'ne' lo' nisaon' clal ca da' gone' cont lažo' bene' yoble gone' da' xinjen'. ⁴³ Na' še yena'len' chonen cont gonle da' xinj, cheyala' cuejyichjle da' malen' chonle. Yejñi'a bibi na'le zoa clal ca gonle da' xinjen' len len. Na' yejñi'a šjayzoale len Diosen' toli tocanē bi zoa šla'a taca'le clal ca yeyejle lo' yi' gabil dan' bi cheyol chenit nya' cuerp chelen'. ⁴⁴ Na' gabilen' neca chesat bzogan', neca cheyol yin'. ⁴⁵ Na' še ni'alen' chonen ga gonle da' xinj, lecze cheyala' cuejyichjle da' malen' chonle. Yejñi'a bibi ni'alen' zoa clal ca gonle da' xinjen' len len. Na' yejñi'a šjayzoale len Diosen' toli tocanē bi zoa šla'a ni'alen', clal ca yeyejle lo' yi' gabil dan' bi cheyol chenit nya' cuerp chelen'. ⁴⁶ Na' gabilen' bzoga' ca' bi chesatba', neca cheyol yin'. ⁴⁷ Na' še yejlaolen' chonen cont gonle da' xinj, cheyala' cuejyichle da' malen' chonlen'. Yejñi'a bibi yejlaolen' žia clal ca gonle da' xinjen' len len. Na' yejñi'a šjayzoale len Diosen' toli tocanē zoa šla'aze yejlaole clal ca yežinle lo' yi' gabilen' žia chop la'a yejlaolen'. ⁴⁸ Ca nac gabilen', bi chesat bzogan', neca cheyol yin'.

⁴⁹ 'Le dan' chyi chzaca'le yežlio nga chzejni'in le'e cont bi yeyejle lo' yi' gabil. Na' da' chyi chzaca'le zaca'leben ca zede' da' cheyala' chixe' yezj yogo' ni'a cate' chjasesane' yezj lao Diosen'. ⁵⁰ Na' zeden' naquen güen, perw še bich bi zxi' naquen, žnacxe goncho cont yeyaquen zxi' da' yoble? Na' le'e cheyala' gwyo gwchejlaže'le dan' chyi chzaca'le na' cheyala' soale binlo tole yetole, na' še soale ca', zaca'leble ca to yela' guagw da' yo'o zede'.

10

Jesús'en' bzejni'ide' bi cheyala' yela'acho len no'ol checho

(Mt. 19:1-12; Lc. 16:18)

¹ Jesús'en' beze'e Capernaum na' gwyejche' gan' mbane distritw Judean' na' yešla'a yegw Jordánna'. Na' da' yoble besežag bene' zan gan' zoen' na' lecze da' yoble bsd blo'ede' legaque' con can' choncze'. ² Nach bal bene' fariseo ca' ja'aque' gan' zoa Jesús'en' gosaclačže' yesebeje'ne' diža' da' yosochine' cont yosožie'ne' xya chol, na' gosenabde'ne' še guac to bene' yele'e len no'ol che'.

³ Na' Jesús'en' boži'e xtižen', gwne':

—Ca nac dan' bzoj da' Moisés'en', žnac bene' mandadw gonle?

⁴ Legaque' gosene':

—Moisés'en' gwne' cate' to bene' yele'e len no'ol chen' cheyala' chas to yiš da' gwnežjue' no'ol che' ga güe'en diža' besyele'ena'.

⁵ Nach Jesús'en' gože' legaque':

—Moisés'en' gwne' gac gonle ca' lagüe dan' nacle bene' güedenag len Diosen'.

⁶ Perw cate' gwxe yežlion', cate' bxe Diosen' yogo' da' de, bi goquen ca'. Le nyojen žan: "Bene' legaque', to bene' byo na' to no'ole." ⁷ "Da'nan' bene' byon' gwsane' xaxne'e cont soalene' no'ol chen', ⁸ na' chope' yesaque' ca toz bene'."

Na' ca' bich yesac chope' san toze'. ⁹ Da'n^{an}' bi cheyala' yesyele'e, le Diosen' ba bcode' legaque'.

¹⁰ Cate' besyežine' yo'o, bene' ca' zjanaque' le' txen da' yoble gosenabde'ne' bi zejen dan' ba gwne'. ¹¹ Na' Jesúsen' gože' legaque':

—Note'teze bene' chele'e len no'ol che' na' cheque'e no'ol yoble, chone' da' xinj, le toz ca naquen šaca' gata'lene' no'ol che bene' yoble. ¹² Na' še no'olen' chsane' bene' chen' na' cheque'e bene' yoble, lecze toz can' nac da' xinj da' chonen'.

*Jesúsen' gwnabde' Diosen' gac güen che bidao' ca' besežag
(Mt. 19:13-15; Lc. 18:15-17)*

¹³ Nach jasesane' bi' bixjw lao Jesúsen' cont xoa ne'e yichjgacbe', perw bene' ca' zjanaque' le' txen gosedile' bene' ca' zjanche'ebe'. ¹⁴ Na' cate' ble'e Jesúsen' can' gosonen' na' bže'e legaque' na' gože'ne':

—Le güe' latje yesid bidao' ca' lagua' nga na' bi gwžonle, le bene' ca' zjanac ca bidao' quinga, legaque' chosozenague' che Diosen' cont chnabi'e yichjlažda'ogaque'. ¹⁵ Da' li žia' le'e, note'teze bene' cheyala' yosozenague' che Diosen' ca cheson bidao' cate' chosozenagbe' che xaxna'be', le bene' bi yosozenague' ca', gwbat nabia' Diosen' yichjlažda'ogaque'.

¹⁶ Nach gwlene' to to bidao' ca' na' gwnabde' Diosen' gac güen chebe', gwxoa taquen' yichjbe'.

*To bene' güego' bšajlene' Jesúsen'
(Mt. 19:16-30; Lc. 18:18-30)*

¹⁷ Cate' Jesúsen' gwze'e ngüe'e nez, chxonjses to bene' jazoa xibe' lagüen' na' gwnabde'ne':

—Maestro, le' naco' bene' güen. ¿Bi cheyala' gona' cont gata' yela' mban chia' toli tocane'?

¹⁸ Jesúsen' gože'ne':

—¿Bixchen' žo' naca' bene' güen? Toze bene' güen zoa, na' len' Dios. ¹⁹ Le' nezdo' da' none' mandadw goncho: “Bi gata'lenle no'ol bi nac no'ol chele o bene' byo bene' bi nac bene' chele; nono gotle; bi cuanle; bi güe'le diža' güenlaže' che bene' lježle; bi siye'le bene'; le gap bala'an xaxna'le.”

²⁰ Na' boži'e xtižen':

—Maestro, yogo' da' quinga chzenaga', gwzolagua' chonczan' cate' ne' nactia' bidao'.

²¹ Jesúsen' gwne'e bene' güegon' na' chacde' le', na' gože'ne':

—Zoa to da' ne' chyažjen gono': šjayeto' yogo' da' de chio' na' da' le'edo' chen bnežjon bene' yaše'. Nach še gono' ca', cate' yežino' yaba gan' zoa Diosen' da' zaca'ch gata' chio'. Na' še ba beyož beno' can' žia' le', nach yo'o gaco' neda' txen la' saca'zi'o.

²² Na' cate' bene ben' dan' gwna Jesúsen', gocde' leca zdebe naquen gone' can' gože'ne', na' beza'yaše', le bene' gwni'achgua goque'.

²³ Nach Jesúsen' gwne'e do cue'ej cuite' na' gože' bene' ca' zjanaque' le' txen:

—Leca zdeb naquen to bene' gwni'a gwzenague' che Diosen' cont Diosen' nabi'e yichjlažda'ogüe'.

²⁴ Na' bene' ca' zjanaque' le' txen besyebande' can' gwnen', perw Jesúsen' goze'e legaque':

—Xi'ina', bene' chesacde' zaca'chgua yela' gwni'a chegaquen', leca zdebe naquen yosozenague' che Diosen' cont nabi'e yichjlažda'ogaquen'. ²⁵ Bedao'ch te to be xen be nzi' camello to lo' nag yeše' clel ca to bene' gwni'a gwzenague' che Dios cont Diosen' nabi'e yichjlažda'ogüe'.

²⁶ Cate' gosende' dan' gwne', leca besyebande' na' gose' lježe':

—¿Noxen' šjayzoa len Diosen' še ca'?

²⁷ Jesús'en' gwne'e legaque' na' gože'ne':

—Bibi de da' gac yeson beñachen' cont šjasyenite' len Diosen', perw Diosen' guac gonen'; le bi zoa da' ñacho da' bi gac gon Dios.

²⁸ Nach Pedron' gože'ne':

—Neto' ba gwlejiychjto' yogo' da' de cheto' cont nacto' le' txen.

²⁹ Jesús'en' boži'e xtižen':

—Da' li žia' le', note'teze beñe' ba gwlejiychje' liže', beñe' biše', zane', xē', xne'e, no'ol che', xi'ine', o yežlio che' ne chia' neda' na' neche chzenague' xtižan', ³⁰ yežlio nga yonežjo Diosen' le' to gayoa ca'te'le, yo'o, biše', zane', xne'e, xi'ine' na' yežlio, la'czla' yesebe'na'ogüe' le'. Na' cate' yežine' yaban' gata' yela' mban' che' toli tocanē. ³¹ Perw zan beñe' zjanaque' beñe' žialao ña'a, gwžin ža cate' yesaque' beñe' bzebe; na' beñe' zjanaque' beñe' bzebe ña'a, gwžin ža cate' yesaque' beñe' žialao.

Da'yoble Jesús'en' gwne' yesote'ne'

(Mt. 20:17-19; Lc. 18:31-34)

³² Zjangüe'e nez zja'aque' bso dan' zoa gała'ze Jerusalénna' na' Jesús'en' žialagüe' lao beñe' ca' zjanaque' le' txen. Legaque' chesyebande' na' do chesežebze' zjana'ogüe' le'. Nach da' yoble Jesús'en' goxe' beñe' šižinw ca' ca'ale ga nac lchojiže' na' gože' legaque' can' gac chen'. ³³ Gože'ne':

—Ña'a ba zejcho Jerusalén gan' yesone' neda' lo na' bꞑoz gwnabia' ca' na' lo na' beñe' ca' chososed chosolo'ede' dan' bzoj da' Moisés, na' yesechoglagüen' chia' yesote' neda' na' yesone'nda' lo na' beñe' bi zjanaque' beñe' Israel, nedan' naca' ben' gwseła' Dios golja' beñach. ³⁴ Yesezi'diže' neda', yesot yeseyine' neda', gosoži'enda' xene', na' yesote' neda', perw yeyon ža yebana' ladjo beñe' guat ca'.

Jacobo na' Juan goseñabe' to goclen lao Jesús'en'

(Mt. 20:20-28)

³⁵ Nach Jacobo len Juan, beñe' ca' zjanac xi'in Zebedeo, gosebigue' cuit Jesús'en' na' gose'ene':

—Maestro, chaclaže'to' gono' to goclen da' ñabto'.

³⁶ Na' gwñabe Jesús'en' legaque':

—¿Bi che'nele gona'?

³⁷ Na' gose'ene':

—Ben cont cue'to' šla'a güeje cuito'na' cate' solao ñabi'o.

³⁸ Nach Jesús'en' gože'ne':

—Le'e cabi ñezele bi dan' chñable. ¿Gwchejlaže'le tele yela' zi' yela' ya' ca dan' tia' neda' na' gac chele can' gac chia'?

³⁹ Legaque' gose'ene':

—Gwchejlaže'to'.

Na' Jesús'en' gože' legaque':

—Da' licze tele yela' zi' yela' ya' ca dan' tia' neda' na' gac chele can' gac chian'.

⁴⁰ Perw bi naquen lo na' ñia' non' cue' cuitan' cate' žin ža ñabi'a, san yesebe' beñe' ba mbej Diosen' gaquen che'.

⁴¹ Cate' yeši beñe' ca' zjanaque' le' txen gosende' xtiža'gaquen', beseloque' Jacobon' na' Juanna'. ⁴² Perw Jesús'en' goxe' yogüe' cont gosebigue' laogüen' na' gože' legaque':

—Ñezeczele beñe' zjambeje' cont chesenabi'e to to nación na' beñe' blao ca' chesone' byen chosozenag beñe' chegaque'. ⁴³ Perw bi naquen ca' len le'e. San note'tezle chaclaže'le gacle beñe' blao, cheyała' gwzexjwlaže'le gaclenle

beṇe' lježle. ⁴⁴ Na' note'tezle chaclaže'le gacle beṇe' žialao, cheyaḷa' gon cuinle ca xmos yogo' beṇe' lježle. ⁴⁵ Le lencze neda', gwsela' Diosen' neda' golja' beṇaḥ, gague za'a cont yesaclen beṇe' neda', san za'a cont gaclena' beṇe', na' gwnežjw cuina' yesote' neda' neḥe xtoḷa' beṇaḥen'.

Jesúsen' beyone' to beṇe' lḥoḷ ben' gože' Bartimeo
(Mt. 20:29-34; Lc. 18:35-43)

⁴⁶ Nach besežine' Jericó. Na' cate' Jesúsen' ba beze'e ciudan' len beṇe' ca' zjanaque' le' txen na' len yezanch beṇe', do cho'a ciudan' chi' to beṇe' lḥoḷ chanez chṇabe' yosonežjo beṇe' le' con gaca' da' chesezande'. Bena' le' Bartimeo na' naque' xi'in to beṇe' le' Timeo. ⁴⁷ Na' beṇe' lḥoḷa' cate' goḥbe'ede' gwde Jesús beṇe' Nazaret gan' chi'ena', gwzolaḡüe' gwne' zižje gwne':

—¡Jesús, xi'in diaža ḥe da' rey David, beyaše'laže'šca neda'!

⁴⁸ Beṇe' zan gosediḷe' le' cont bich yosye'e, perw bosya'adiache' gwne':

—¡Xi'in diaža ḥe da' rey David, beyaše'laže'šca neda'!

⁴⁹ Nach Jesúsen' gwleze' na' gwne':

—Le gaxe'.

Nach gosaxe' beṇe' lḥoḷa' na' gose'ene':

—Benḥaḥlažo', gwzoža', le chaxe' le'.

⁵⁰ Nach gwcho'one' lache' da' nḥoa cože' na' bxite' jabigue' lao Jesúsen'.

⁵¹ Nach Jesúsen' gwṇabde' le':

—¿Bi chaclažo' gonda' le'?

Beṇe' lḥoḷa' boži'e xtižen':

—Maestro, che'nda' yele'eda'.

⁵² Nach Jesúsen' gože'ne':

—Guac yeyejo'. Dan' chejnilažo' neda' ba beyac yejlaguon'.

Na' la' bele'ete beṇe' lḥoḷa', na' gwda'ogüe' Jesúsen'.

11

Jesúsen' gwyo'e ciuda Jerusalén
(Mt. 21:1-11; Lc. 19:28-40; Jn. 12:12-19)

¹ Cate' ba zoa yesežine' Jerusalén, besežine' gan' zjachi' yež dan' zjanzi' Betfagé na' Betania na' gan' zoa ya'a da' nzi' Ya'a Olivos. Na' Jesúsen' gwsele' ḥop beṇe' ca' zjanaque' le' txen mandadw, ² gožgaque'ne':

—Le šja'ac yež dan' chi' gaḷa'ze, na' cate' žinlen' na' yeže'lele to burr dao' da'ba' yag be nono na' cuia. Le sežba' na' le ḥe'ba' nga. ³ Na' še no chṇab biḥen' chonle ca', le ye'e: “Xanto' chyažjde'ba'”, na' la' gwzantecze'ba'.

⁴ Nach gosa'aque', na' besele'ede' burron' da'ba' yag to cho'a yo'o cuit ga xoa to nez, na' goseseže'ba'.

⁵ Na' baḷ beṇe' ca' nita' na' gose'ene':

—¿Bixen' chonle? ¿Bixḥen' chsežle burron'?

⁶ Nach bosyoži'e xtižen' can' gož Jesúsen' legaque', na' goso'e latje goseseže'ba' cont goseḥe'eba'. ⁷ Nach goseḥe'e burron' lao Jesúsen' na' goseḥoa xagaque' cože'ban' na' gwžia Jesúsen' leba'. ⁸ Na' beṇe' zan gosonxene' Jesúsen' goseyixjw no xagaque' lo nez cont blej burron' len na' yebaḷe' goseḥogue' xoze' yag na' goseyixjwen' lo neza'.

⁹ Beṇe' zjažialao na' lecze beṇe' za'ac cože' gosezolaḡüe' bososye'e, gosene':

—¡Leca zaca'chgua bengal! ¡Mbalaz ben' za' nga nseḷa' Xancho Diosen' le' cont nabi'e! ¹⁰ ¡Mbalaz yela' gwnabia' ḥe' da' nse'e, le' nabi'e ca da' xozxta'ocho David! ¡Leca zaca'chgua Dios ben' zoa yaban'!

11 Can' goc, Jesúsen' gwyo'e Jerusalén, na' lecze gwyo'e chyo'o che yodao' blaon'. Na' beyož gwne'e yogo'lol da' de na', beyeje' Betania len bene' šižinw ca' ba gwleje' cont zjanaque' le' txen, le ba zoa gal.

Jesúsen' gwne' gacxi'a yag yixgüigw da' bibi žia

(Mt. 21:18-19)

12 Beyečhj ža cate' besyeya'aque' Betania, Jesúsen' gwdone'. 13 Na' zito' ble'ede' to yag yixgüigw da' žia laga', na' jane'e še žia yaguen' yixgüigw, na' bibi bželde', san laga'ze ca' da' žian, le gague canan' chesebia yixgüigon'. 14 Nach Jesúsen' bol güiže' yag yixgüigon', gožen':

—Noch no gagw da' chbio' le'.

Na' bene' ca' zjanaque' le' txen gosende' can' gwnen'.

Jesúsen bešaše' bene' ca' cheson ya'a chyo'o yodaon'

(Mt. 21:12-17; Lc. 19:45-48; Jn. 2:13-22)

15 Gwdena' besežine' Jerusalén. Na' cate' gwyo'o Jesúsen' chyo'o yodao' blaon', gwzologüe' bešaše' bene' ca' chesote' na' bene' chesa'o na'. Na' bchixe' xmes bene' ca' chosoša' mechw na' yag ga chesebe' bene' ca' chesote' ngolbex. 16 Na' bi be'e latje yesexoa xnez bene' zjanao' yoa' chyo'o yodaon'. 17 Na' bsd blo'ede' bene' ca' že' na', gože'ne':

—Nyojczy Xtiža' Diosen' žan: “Yesene' ližan' naquen latje gan' šja'ac bene' yogo' nación yosol güiže'nda”, perw le'e ba benlen ca to latje ga že' bene' gwban.

18 Na' bžoz gwnabia' ca' na' bene' ca' chososed chosolo'e dan' bzoj da' Moisés gosende' can' gwnen', na' goseyiljwlaže' nacle yesone' yesote'ne'. Ba chesežebe' Jesúsen', le yogo' bene' besyežejde' can' bsd blo'eden'. 19 Perw na' cate' gol, Jesúsen beze'e ciudan'.

Gwbiž yag yixgüigon'

(Mt. 21:20-22)

20 Beyečhj ža šezil, gosodie' na' besele'ede' yag yixgüigon' ba gwbižen lente loen. 21 Nach Pedron' jayze'ede' na' gože' Jesúsen':

—Maestro, gwna' yag yixgüigw dan' gwnao' gacxi'an, ba gwbižen.

22 Jesúsen' boži'e xtižen':

—Le šejnilaže' Dios. 23 Da' li žia' le'e, note'teze bene' ye'e ya'a nga: “Gwcuase nga na' jayzoa lo' nisdao”, še bi chacžejlaže' lo' yichjlažda'ogüe', san chejnilaže' Diosen', guacczen. 24 Da'nana' žia' le'e, yogo'te da' nable cate' chol güižle Dios, le šejle' guaquetzen, na' le gacczen. 25 Na' cate' chol güižle Dios, še zoa da' chac chele len bene' yoble, le yezi'xen che', cont lecze ca' Xacho Dios ben' zoa yaba yezi'xene' che xtoła'le. 26 Perw še le'e bi yezi'xenle che bene', Xacho Dios bene' zoa yaba bi yezi'xene' che xtoła'le.

Yela' gwnabia' che Jesúsen'

(Mt. 21:23-27; Lc. 20:1-8)

27 Nach ja'aque' Jerusalén da' yoble, na' šlac chda Jesúsen' chyo'o yodao' blaon' jasebiga' bžoz gwnabia' ca' na' bene' ca' chososed chosolo'e dan' bzoj da' Moisés na' len bene' gole blao' ca' chesenabi'e naciónna'. 28 Na' gosenabde' le':

—¿Bi yela' gwnabia' napo' chono' da' qui? ¿No ben yela' gwnabian' cont chonon'?

29 Jesúsen' boži'e xtižen', gwne':

—Leze de to da' nabda' le'e na' še yoži'ile xtižan', nach nia' le'e bi yela' gwnabia' chonlendan'. 30 ¿No gwseła' da' Juanna' bzoe' bene' nis? ¿Dios nan' gwsele'ne' še benachen'? Le yoži'i xtižan'.

31 Nach legacze' gose' lježe':

—Še ye'chone' Dios gwsele' le', na' ye'e chio': “¿Bixchen' ca gweyle'le che'?”

32 Bi gac ye'chone' beñach gwseła' le'.

Gosene' ca' da' besežebe', le yogo'te bene' že' na' gosejle'e Diosen' gwsele' da' Juanna' be'e xtiže'na'.

33 Nach gose'e Jesúsen':

—Bi nezeto'.

Nach Jesúsen' gože' legaque':

—Lecze neda' bi yapa' le'e bi yela' gwnabian' chonlenda' da' ca'.

12

Jempl che bene' güen žin ben' gosaque' bene' mal

(Mt. 21:33-46; Lc. 20:9-19)

1 Nach Jesúsen' gwzomagüe' choe'lene' legaque' diža' chzoe' jempl, na' gože' legaque':

—Gwzoa to bene' goze' to cue' xen yag uvas na' gwlo'en le'ej. Na' bene' to ga yesesie' uvasen' cont choj xisen', na' bene' yeto da' sibe ca to campanario ga yesecua' bene' yosogüia yesene'e yag ca'.

'Nach bcua'ane' yežlion' lo na' bene' yesonši'e yag uvasen', na' gwze'e gweje' zito'. 2 Na' cate' bžin ža yosytobe' cosešen', gwsele' to xmose' lao bene' ca' nac lo na'gaque' yag uvasen' cont yosonežjue'ne' to tlaw coseš dan' yesyezi'en. 3 Perw na' bene' ca gosezene' mosen' gosot goseyine'ne', na' to ga'alze' bosyose'ene' bibi goso'ene'. 4 Nach xan yežlion' da' yoble gwsele' yeto xmose'; perw benga bosožie'ne' yej, gosone' güe' yichje' na' gosonde' le' zgot. 5 Nach xan yežlion' gwseła'che' yetoe', na' benga gosottecze'ne'. Gwdena' gwseła'che' bene' zan, na' bale' gosot goseyine' le' na' yebale' gosottecze'ne'.

6 'Ne' zoa yeto bene' biña' sele', bena' xi'ine' bene' chacchgüede', na' bzebte gwsele' le', le bene' xbab: “Yesezi'e xtižen'.” 7 Perw bene' ca' gose' lježe': “Bengan' yega'anlene' yežlio nga cate' gat xen'. Le da gotchone' cont yega'anlenchon.” 8 Na' gosezene'ne', gosote'ne', na' besyebeje' cuerp chen' gan' že' yag ca', bosozalen' ga yoble.

9 Nach Jesúsen' gwñabe':

—¿Bi chaquele? ¿Nacxe gon xan yežlion' len bene' ca' bocua'anlene' yag uvas chen'? Šeje' šjetoe' legaque', na' yodie' yežlion' lo na' bene' yoble.

10 '¿Biña' gwlable ga nyoj Xtiža' Diosen'? žan quinga:

Yej dan' bi gosacłaze' bene' güen yo'o ca' yosochine', len ba naquen yej squin.

11 Da' nga ben Xancho Dios, na' naquen to da' yežejecho.

12 Nach gosacłaze' yesezene' Jesúsen', le gosacbe'ede' be'e jemplna' neche dan' bi chesejnlaže' le'. Perw besežebe' še bi yesone bene' ca' nžaguen' legaque', da'nana' bosocua'ane'ne' na' besyeya'aque'.

Ca nac che dan' cheyala' gaxjw

(Mt. 22:15-22; Lc. 20:20-26)

13 Gwdena' gosesele' bal bene' fariseo na' bal bene' ca' goseda' Herodes cont yesebeje' Jesúsen' diža' da' yosode'ede' cont yesagüe' xya che'. 14 Bene' ca' ja'aque' na' gose'ene':

—Maestro, nezeto' zoatezo' cho'o diža' li na' bi chono' cuent bi ža bene', le toze can' chono' len note'teze bene'. Na' nezeto' diža' li cho'o chsed chlo'edo' bene' can' chazłaze' Diosen' goncho. Da'nana' zedenabeto' le' ¿naquen binlo no chixjo da' cheyala' chixjo che ben' nac la'zelagüe bene' gwnabia' ben' chi' Roma? ¿Gwdixjwton', še bi chixjwton'?

15 Jesúsen' gocbe'ede' gague do lažen' chese'ene' ca', san chesaclaže' yesonlede' le' len xtiža'gaquen', nach gože'ne':

—¿Bixchen' chaclaže'le yoslažo'le neda' len xtižan'? Le gon neda' to mechw cont na'an.

16 Na' gosoben', na' cate' ble'eden' na' Jesúsen' gwñabde' legaue':

—¿No lao dan' da' le'e mechw nga? na' ¿no la dan' nyoj le'en ni?

Nach bosoyoži'en gose'ene':

—Che César ben' nac la'zelagüe bene' gwnabian' ben' chi' ciuda Roman'.

17 Nach Jesúsen' gože'ne':

—Le gwnežjo bene' gwnabian' da' nac che bene' gwnabia', na' le gwnežjo Dios da' nac che Dios.

Na' besyebande' can' boži'e xtižen'.

Gosenabde' le' bi zejen dan' yesyeban bene' guat ca'
(Mt. 22:23-33; Lc. 20:27-40)

18 Nach besežin bal bene' saduceos gan' zoa Jesúsen'. Bene' ca' chesene' bene' guaten' bich yesyebane'. Nach gosenabde' le', gose'ene':

19 —Maestro, da' Moisésen' bzoje' can' cheyala' goncho, gwne' še to bene' byo gate' na' chzeb no'ol chen' perw na' nono bi' güezeb chga'an, na' bene' biše' ben' ba got cheyala' yošagna'lene' no'ol güezeba' cont yesenita' xi'in diaža che da' bišen'. 20 Gosenita' bene' gosac gaž biše'. Na' bene' nechua' bšagne'e, na' gote' nono xi'ine' gwnita'. 21 Na' bene' gwchopa' bošagna'lene' no'ol güezeba', na' lecze gote' nono xi'ine' gwnita'. Lecze ca' goc len bene' gwyona'. 22 Na' ca' goc gosedaš bene' gaža' bosošagna'lene' no'ola', na' ne toe' ca' gosezoa xi'ine' len le'. Gwde gosat yogo'lol bene' ca', ca' beyožen got len no'ola'. 23 Gož neto', cate' yesyebane' ladjo bene' guat ca' ¿nox bene' ca' soalene' no'ola' ca' xo'ole'? le yogo' bene' gaža' bosošagna'lene' le'.

24 Nach Jesúsen' boži'e xtižen', gwne':

—Clelen' chonle xbab dan' žale ca', le bi nezele can' ža Xtiža' Dios da' nyojen, neca nombia'le yela' guac chen'. 25 Cate' yesyeban bene' guat ca' bich yosošagna' bene', neca yosonežjo xi'ine' no'ol gwšagne'e, le yesaque' ca' angl bene' zjazoa yaba. 26 Na' ca' nac dan' yesyeban bene' guat ca', ¿bina' gwlable gan' bzoj da' Moisés, can' gož Diosen' le' caten' bol güiže'ne' to lo yag yeše' dao' da' chey? Gože'ne': “Neda' naca' Dios ben' chonxen Abraham, ben' chonxen Isaac, na' ben' chonxen Jacob.” 27 Bene' guat ca' bi chesonxene' Diosen', san bene' zjamban. Na' ca' nac le'e, leca clelen' chonle xbab.

Da' nac da' žialao da' cheyala' goncho
(Mt. 22:34-40)

28 Leze bžin to bene' bsed blo'ede' ley dan' bzoj da' Moisés, bene' bende' caten' chesežeše' len Jesúsen', na' nezde' boži'icze Jesúsen' xtiža'gaquen' binlo. Na' bena' gwñabde'ne':

—¿Non' nacch da' žialao da' zjanyojen da' ža Diosen' cheyala' goncho?

29 Jesúsen' boži'e xtižen' gože'ne':

—Da' nga nacch da' žialao lao yogo'lolen, žan: “Le gwzenag bene' Israel gualaž chia', toze Xancho Dios naque' bene' zaca' gonxencho. 30 Da'n'an' cheyala' gaguecho Xancho Diosen' con ca' zelao chejni'icho, do yichj do laže'cho, do fuerz valor checho.” Lenña' naquen da' žialao lagüe da' ca' ža Diosen' cheyala' goncho. 31 Na' da' gwchopen' zejgalan' ca', gan' žan': “Cheyala' gague lježcho ca' chaque cuincho.” Bich bi de da' že' cheyala' goncho da' zaca'ch ca' da' qui.

32 Nach ben' chsed chlo'e dan' bzoj da' Moisésen' gwne':

—Ca'yanen' naquen, Maestro. Da' licze can' gwnaon'. Toze Xancho Dios zaque' gonxenchone', na' noch no zoa bene' zaca'ch ca le'. ³³ Na' še gaquecho Dios, con ca zelao chejni'icho, do yichj do laže'cho, do fuerz valor checho, na' gaque lježcho ca chaque cuincho, lenna' zaca'chen ca yogo' da' choncho chotcho no beyixe' na' chzeychoba' chonxencho Diosen'.

³⁴ Nach cate' gocbe'e Jesús'en' boži'licze' xtižen' to licha, gože'ne':

—Gague da' xen chyažjen cont nabdo' Diosen' nabi'e yichjlažda'oguoñ'.

Na' ne yetoe' bich beseyaxjde' bichle yesenabde' Jesús'en'.

Criston' naque' xi'in diaža che da' rey David

(Mt. 22:41-46; Lc. 20:41-44)

³⁵ Jesús'en' bsed blo'ede' chyo'o yodaon', gwne':

—¿Nacxechen' bene' ca' chososed chosolo'e dan' bzoj da' Moisés chesene' Criston' ben' gwlej Diosen' cont yedenabi'e naque xi'in diaža che da' rey David? ³⁶ Cuin Daviden' gwne' can' blo'e Spiritw che Diosen' le':

Xancho Dios gože' Xanan':

“Gwche'edo' cuita' nga nabi'acho txen,

na' gona' cont yogo' no chesegue'e le' yosozexjw yichje' yosozenague' chio'.”

³⁷ ¿Nacxe gac nacho Criston' naque' xi'in diaža che da' David? le' cuin Davin' gože' le': “Xana”.

Na' zjanyanchgua bene' ca' chosozenag xtižen', na' besyebede' xtižen'.

Jesús'en' bcuiše' bene' ca' chososed chosolo'e ley dan' bzoj Moisés

(Mt. 23:1-36; Lc. 11:37-54; 20:45-47)

³⁸ Jesús'en' caten' chsed chlo'ede' legaque' gwne':

—Le gwsaca' cont bi gonle can' cheson bene' ca' chososed chosolo'e dan' bzoj da' Moisés, le chesyebede' chesaše' zjanyaze' lache' ton, na' chesyebede' chesap bene' legaque' bala'an cate' chesyěžague' lagüe ya'a. ³⁹ Chesyebede' chesebi'e gan' chesebe' bene' blao cate' chja'aque' yodao' na' cate' chac lni.

⁴⁰ Legaque' cheseque'e yo'o che no'ol güezeb ca', na' cate' chosol güiže' Dios, sša cheso'e diža' cont yesaque bene' leca chesonxene' Diosen'. Bene' can' yesacche' castigw clal ca yezica'chle bene' güen da' xinj.

To no'ol güezebe be'e Diosen' xmechue'

(Lc. 21:1-4)

⁴¹ Na' šlac zoa Jesús'en' chyo'o yodaon', gwchi'e gala'ze gan' xoa caj gan' chesegüe'e mechw che yodaon', na' chne'e can' chesego'o bene' mechw. Na' zan bene' gwñi'a ca' chesegüe'e da' zcha'o mechw. ⁴² Ca' chac, cate' bžin to no'ol güezebe bene' yaše', gwlo'e chop mechw dao' da' bibi zaca'tec. ⁴³ Nach Jesús'en' goxe' bene' ca' zjanaque' le' txen na' gože'ne':

—Da' li žia' le'e, no'ol güezebe yaše' nga ba gwlo'oche' mechw da' zaca'ch len Diosen' clal ca yogo' bene' ca' chesego'o mechw lo' cajen', ⁴⁴ le yogo' legaque' chesegüe'e da' checho'onen lo yela' gwñi'a chegaquen', perw no'ol nga, lo yela' yaše' yela' zi' che' gwlo'e yogo' da' de che' da' chacbanlende'.

13

Jesús'en' gwne' gwžin ža yosyočinje' yodao' blaon'

(Mt. 24:1-2; Lc. 21:5-6)

¹ Cate' cheza' Jesús'en' yodao' blaon' to bene' ca' zjanaque' le' txen gože'ne':

—¡Maestro, gwñna'šc catec xdan zjanac yej qui na' yo'o qui!

² Na' Jesús'en' boži'e xtižen', gože'ne':

—Ca nac yo'o xen qui chle'echo, žin ža cate' ne to yej da' zjancua' nga ca yega'an zjancua' cože' lježen. Yogon' yosyočinje'.

Can' gac cate' ba zoa yeyož yežlion'
(Mt. 24:3-28; Lc. 21:7-24; 17:22-24)

³ Nach ja'aque' Ya'a Olivos gan' nla' yodao' blaon'. Na' cate' ba chi' Jesúsen' lo ya'an len Pedro na' Jacobo, na' Juan na' Andrés, bene' ca' zjanaque' le' txen, legaue' gose'ene' šižize:

⁴ —Che'neto' nao' neto' batcan' gac da' ca'. ¿Nac gac nezeto' cate' ba zoa gac yogo' da' ca'?

⁵ Jesúsen' boži'e xtižen', gwne':

—Le gwsaca' cont nono siye' le'e. ⁶ Le bene' zan yesaš yežlio nga yesaclaže' yosolane' xlatja' nga, yesene': “Nedan' naca' Cristo ben' gwlej Diosen' cont nabi'e.” Na' yeseziye'e bene' zan.

⁷ Na' cate' yenele chac gwdile nile nale, o yenele guac gwdile, bi žeble, le can' cheyala' gac. Perw gague lenna' nacho ba bžin ža yeyož yežlion'. ⁸ Le yesedil to yež len yeto yež yoble na' to nación len yeto nación yoble, na' zan cuen ga xo'chgua lo yežlion', na' gata' gwbin na' yesebec bene' žaš. Na' da' qui gac cate' za' solao gata' yela' zi'.

⁹ Na' le gwsaca' can' gonle, le yesone' le'e lo na' bene' gwnabia' ca' cont yesot yesejine' le'e lo' yodao' chegaquen', na' dan' chejnilaže'le neda' nita' bene' yeseche' exoxje' le'e no lao rey no lao nochle bene' gwnabia', na' can' güe'lenle legaue' xtižan'. ¹⁰ Le za' te che yežlion', xtiža' Diosen' cheyala' gas lajjen doxen yežlion'. ¹¹ Na' cate' yesezene' le'e na' yeseche'e le'e lao bene' gwnabia' ca', bi cuen yichjle nac yoži'ile xtiža'gaquen', naca gonlen xbab. San le na con da' ye' Diosen' le'e nale lo hor na'teze, le gague le'eczen' nele, san Spiritw che Diosen' gonen ga nale bin' cheyala' nale. ¹² Cana' bal' benach yesechje' yesone' bene' biše' golje' lo na' bene' yesot legaue', na' nita' bene' yesone' xi'ingaque' lo na' bene' yesot legacbe', na' nita' bene' yesone' xaxne'e lo na' bene' yesot legaue'. ¹³ Yogo'ze bene' yesegue'ede' le'e dan' chejnilaže'le neda', perw note'tez le'e gwyo gwchejlaže'le cont bi cuejyichjle dan' chejnilaže'le neda' žin žate gatle, nach šjayzoale len Diosen'.

¹⁴ 'Da' Daniel ben' gwdixjue'ede' xtiza' Dios bzoje' che da' zbanchgua da' gwxinjen latje gan' chonxenko Diosen'. Na' cate' le'e le'ele ba zoa dan' gan' bi cheyala' soan, cana' bene' yesenita' distritw Judea cheyala' yosoxonje' šja'aque' do ya'adao'. (Bene' gwlaben' cheyala' šejni'iden'.) ¹⁵ Na' bene' chda do yichjo' che liže' žana', bi yeyetje' yotobe' xšinlaze' ca' že' ližen', con yoxonje'. ¹⁶ Na' bene' chda yixe' bi yeyej liže' šjayxi' xalane'. ¹⁷ ¡Nyaše'chguaze zjanac no'ol ca' zjanao' xi'in, na' no'ol ca' ne' chosoguaže' bidao' lo ža ca'! ¹⁸ Le nab lao Dios bi yažjen gwxonjle caten' chac zag, ¹⁹ le yesaquen ža da' leca yesale' bene'. Cate' bxete Diosen' yežlio na' ža na'aža nono na' gale' ca', naca žinlažen' yesale'de' ca' da' yoble. ²⁰ Na' šaca' Xancho Diosen' bi yozaše' žan' yesac ca', notno yela, perw yozašen' neche chacde' bene' ca' chesejnilaže' le', bene' ba gwleje' zjanaque' xi'ine'.

²¹ 'Cana' še no ye' le'e: “Le na'šc, nga zoa Cristo ben' gwlej Diosen' cont nabi'e”, o “Le na'šc, na' zoe”, bi šejle'le. ²² Le yesaš bene' gwxiye' bene' yesaclaže' yosolane' xlatja' nga, na' yeson cuine' ca' bene' chesoe' xtiža' Dios. Na' yesone' yela' guac da' yesele'e bene' na' bichle da' zaca' yesyebande' cont yeseziye'e legaue', na' len bene' ca' ba gwlej Diosen' zjanaque' xi'ine' yesaclaže' bene' gwxiye' ca' yeseziye'e šaca' gac yeseziye'e legaue'. ²³ Perw ca nac le'e, le gwzenag, le ba gwdixjue'eda' le'e yogo' can' gac.

Can' gac cate' ben' gwsela' Diosen' golje' benach yide' da' yoble
(Mt. 24:29-35, 42-44; Lc. 21:25-36)

24 'Perw ca nac ža ca' cate' yeyož gale'le can' gwnia', gwbižen' yeyaquen chōl na' bion' bich gwsen'in'. 25 Na' beljw ca' yeselažon' le'e yaban', na' yogo' da' chle'echo le'e yaban' yesaquen ca' chac yežlion' cate' chxo'. 26 Nach bene' že' yežlion' yesele'ede' neda' naca' ben' gwsela' Diosen' golja' benač za'a ladjo bejon' len yela' guac xen na' yela' bene' zaca' juisyw chian'. 27 Nach sela' angl chian' yosytobe' yogo' bene' ca' ba gwleja' cont zjanaque' neda' txen gate'teze nite' doxen lo yežlion', ga zelao nac zito'.

28 'Le gwzenag che jempl nga che yag yixgüigon': Cate' ba chzolao chebešjw yaguen' na' chelan' laga' che'en dao', nezele ba za' lagüe ba. 29 Na' lecze cate' le'ele ba chac da' mal ca' ba gwnia', cana'ch nezele ba za' juisyw, ba zoa gala'. 30 Da' li žia' le'e, bina' yenit diaža che le'e nita'le na'a cate' yeyož gac yogo'lol da' ca'. 31 Le'e yaban' na' yežlion' yesede chen, perw ca nac xtižan', gague da' te cbi gac can' žanna'.

32 'Perw nono neze bi ža bi horen' gac ca', ne angl ca' nita' yaba, neca neda' naca' Xi'in Diosen' bi nezda'. Toze Xa' Dios neze.

33 'Da'nan', le soa le cueze, le güia le na', na' le soateze yol güižle Dios, le nono neze batcan' žin ža. 34 Naquen ca nac che to bene' šeje' zito', na' cate' za' se'e chon liž xlatje' lo na' bene' güen žin che', cho'e žin da' yeson to toe', na' chzoe' bene' chape' cho'a yo'ona'. 35 Le soa le cueze ca bene' chesape' liže'na', le bi zjanezde' batcan' yela' xan yo'on, še cate' ba zoa gal, še chel, še cate' chbež jea, še cate' ba gwyeni'. 36 Le xož yele'e zejzenez na' yedole'de' legaque' chesetase'. 37 Da' nga žia' le'e leze žiczan' par yogo'lol bene'. Le soa le cuez batcan' žin ža.

14

Bosoxi'e yesezene' Jesúsen'

(Mt. 26:1-5; Lc. 22:1-2; Jn. 11:45-53)

1 Yečhop ža za' gala' pascw na' lni dan' chesone' caten' chesagüe' yetextil dan' bibi levadura yo'on. Na' bxož gwnabia' ca' na' bene' ca' chososed chosolo'e dan' bzoj da' Moisés cheseyiljwlaže' nac yesone' yeseziye'e Jesúsen' cont yesezene'ne' yesote'ne'.

2 Perw gosene':

—Bi senchone' lo lnin' cont ca yesebec bene' žaš.

To no'ole bzoe' set zix yichj Jesúsen'

(Mt. 26:6-13; Jn. 12:1-8)

3 Na' goquen' Jesúsen' zoe' Betania liž Simón ben' güe'e yižgüe' da' nzi' lepra. Na' šlac chi' Jesúsen' cho'a mes, bžin to no'ole noxe' to de yejese ga chož set da' chla' zix, naquen dogualje da' bchoj lo yag yej da' nzi' nardo, na' zaca'chguan la'ay. Na' bzojje' gan' yož seta' na' bzoačočje' seta' yichj Jesúsen'. 4 Na' bal bene' ca' zjanita' na' beseže'e, na' gose' lježe':

—¿Bixchen' benditjde' set zix nga? 5 Ša no bete' len güesonen ca no laxjw mos da' gone' gan tgüiz, na' gwnežjuen' gaclenen bene' yaše'.

Na' beseloque' no'ola'.

6 Perw Jesúsen' gwne':

—Jayen'. ¿Bixchen' chnele che no'olen'? Dan' bene' len neda' nga naquen güen. 7 Le bene' yaše' ca' bate'teze nita'cze' len le'e, na' guaque gonle len legaque' da' güen cate' žan chele, san neda' bich soacza' yesša len le'e. 8 No'ole nga bene' da' zelao gwzaque'de'. Ba bguazje' neda' set zix can' cheyala' yesone' len neda' cate' gaša'. 9 Da' li žia' le'e, doxen yežlio gate'teze šjasedixjue'e bene' diža' güen dan' chzejni'in chia', decze de šjasyeze'ede' can' ben no'ol nga.

Judas gwchoglaže' gwdie' Jesúsen' lo na' bene' ca' chesegue'e le'

(Mt. 26:14-16; Lc. 22:3-6)

10 Nach Judas Iscariote, ben' goque' txen len bene' ca' šižinw ben' gwlej Jesúsén' cont zjanaque' le' txen, gwyeje' jane'e b̄xoz gwnabia' ca' cont yosoxi'e nac gone' gwdie' Jesúsén' lo na'gaque'. 11 Cate' gosende' xtiža' Judasen', besyebede' na' gose'ene' yeso'ene' mechw. Nach Judasen' gwzologüe' gwdiljwlaže' nac gone' gwdie' Jesúsén' lo na'gaque'.

Xše' dan' gosagüe' len Xanchon'

(Mt. 26:17-29; Lc. 22:7-23; Jn. 13:21-30; 1 Co. 11:23-26)

12 Na' bžin ža čala' l̄ni caten' neto' bene' Israel chagwto' yetextil dan' bibi levadura yo'o. Naquen ža nechw che l̄ni pascw cate' chotto' xila' dao', cont šjayza'laže'to' can' bosla Diosen' da' xozxta'oto' ca' lo na' bene' Egipto ca'. Na' bene' ca' zjanaque' Jesúsén' txen gosenabde' le':

—¿Ga che'ndo' šjasini'ato' cont gagwcho xše' che pascon'?

13 Nach gwsele' chop bene' ca' na' gože'ne':

—Le šja'ac ciudan', na' yežagle to bene' byo no'e to che'e nis. Le šejlene', 14 na' gan' yežinen', le ye' xan yo'on: "Maestrona' že': Gonšco' to yo'o gan' gagwto' xše' ža l̄ni nga len bene' ca' zjanaque' neda' txen." 15 Nach gwlo'ede' le'e to quart xen dan' zoa yichjen na'ale gan' de yogo' da' chyažjecho. Na' le gwsini'a cont gagwcho na'.

16 Na' gosa'ac bene' ca' čope, na' besežine' ciudan', na' yogo' can' gož Jesúsén' legaque' goc, na' bososini'e xše' že' l̄nin'.

17 Cate' beyož gwxxoa gwbiž, bžin Jesúsén' len bene' šižinw ca' gwleje' cont zjanaque' le' txen. 18 Na' gosebi'e gosagüe' xše'. Na' šlac chesagüen', Jesúsén' gože' legaque':

—Da' li' žia' le'e, to le'e chagwle len neda' txen, gwdele neda' lo' na' bene' ca' chesegue'e neda'.

19 Nach legaque' besyeyaše'laže'de' na' gosezologüe' tgüejje tgüejje' gosenabde' le' gosene':

—¿Nedan' gona' ca'?

Na' yetoe' leze gwne':

—¿Nedan' gona' ca'?

20 Na' Jesúsén' gože'ne':

—Ladjo le'e bene' šižinw, to bene' chagw len neda' txen toze lo' ye'eñ gon ca'. 21 Na' gac čhia' can' nyoj le'e Xtiža' Diosen', neda' naca' ben' gwsela' Diosen' golja' beñaç. Perw įnyaše'chguaze nac ben' gwdie' neda' lo na' bene' ca'! Yejni'acle ša bi goljen'.

22 Na' šlac chesagüe', Jesúsén' gwxi'e to yetextilen', na' beyož be'e yela' choxclen che Dios, bzojjen', na' bnežjuen' legaque', gwne':

—Le gagon'. Lenna' cuerp čhia'.

23 Nach bexxue' to vas gan' yože nis uvasen' na' beyož be'e yela' choxclen che Dios, be'en legaque', na' yogüe' gose'eje' late' güej dan' yože lo' vassen'. 24 Na' gože' legaque':

—Da' ngan' xčhena' na' chzanlažan' laljen neče yogo'lol beñaç. Na' laljen cont solao gac da' coben' da' gwna Diosen' gone' gaclene' beñaç. 25 Da' li žia' le'e, bich ye'eja' xis uvas na'a. Cate'ch žin ža ba zoacho txen gan' chnabia' Diosen', canan' ye'ejan' da' yoble.

Jesúsén' gwne' Pedroa' bi čebe' naque' le' txen

(Mt. 26:30-35; Lc. 22:31-34; Jn. 13:36-38)

26 Beyož gosole' gosonxene' Diosen' nach gosa'aque' ja'aque' Ya'a Olivos. 27 Nach Jesúsén' gože'ne':

—Na'aže' yogo'le cuejyichjle neda' neche dan' gac chian'. Le nyojzen le'e Xtiža' Diosen', žan: "Gota' bene' güeyoe xilan' na' xila' ca' yesaslasba'." ²⁸ Perw cate' yosban Diosen' neda' ladjo bene' guat ca', yobch yeya'a Galilea ca' le'e.

²⁹ Nach Pedron' gože'ne':

—La' yogo' bene' quinga yesebejyichje' le', neda' bi gona' ca'.

³⁰ Perw Jesúsen' gože'ne':

—Da' li žia le', biṇa' cuež jean' chop ni'a na'aže' cate' gac šon ni'a bi chchebo' še nombi'o neda'.

³¹ Perw Pedroa' do laže' gwne':

—La'czla' še chonen byen guatlencza' le', gwbat nia' bi nombia' le'.

Na' lecze ca' gosena' yogüe'.

Jesúsen' bol güiže' Xe' Dios Getsemaní

(Mt. 26:36-46; Lc. 22:39-46)

³² Nach besežine' latje gan' nzi' Getsemaní, na' Jesúsen' gože' bene' ca' zjanaque' le' txen, gože'ne':

—Ngaze le' cue'edo' šlac neda' šjel güiža' Dios.

³³ Na' gwche'e Pedro, Jacobo na' Juan, na' gwzolaon da' juisyw da' gocde' lo' yichjlažda'ogüen' na' benchgüe' xbab. ³⁴ Na' gože' legaque':

—Lo' yichjlažda'ogua' nga chacyaše'chgüeda', chacda' gatzca' catequen' chžaglagua'. Nga le' yega'an na' le' soa le' na' txen len neda'.

³⁵ Nach Jesúsen' gwžialagüe' yelate' na' jachaze' coscho'ale lo' yon' gwnabde' Dios še guac ten ca'ale bi gac can' ba zoa gac che'. ³⁶ Gože' Diosen':

—Xa', bibi de da' nacho da' bi chac gono'. Benšca cont bi saca'zi'a na' bi yesote'nda', perw bi chnaba' gac da' žia' neda', san gac da' nao' le'.

³⁷ Nach beyeje' gan' nita' bene' ca' šone, na' ble'ede' zjanite' chesetase'. Na' gože' Pedron':

—Simón ¿chtason'? ¿Ne šlož da'oze ca' goc cuejo' bišgal len neda'? ³⁸ Bi tasle, san le' yol güiž Dios cont bi gon gwxiyen' le'e gan. Da' li lo' yichjlažda'olen' chna'laže'le' gonle' da' nac binlo, perw cuerp chelen' bi chzoeczen.

³⁹ Nach gwyeje' da' yoble na' bol güiže' Dios na' da' yoble gože'ne' dan' ba gožcze'ne' tñi'a. ⁴⁰ Nach bezyeje' gan' niten', na' da' yoble ble'ede' chesetase', le' yejlagüen' chesexa' chesežoden' bišgal. Na' bi besyežellaže' nac yosyoži'e xtižen'. ⁴¹ Na' da' gwyone' ni'a gwyeje' na' bezžine' gan' nita' bene' ca' šone na' gože' legaque':

—¿Ne' chtasle? ¿Ne' chezi'laže'le? Ba goc. Ba gole' gon to bene' neda' lo' na' bene' güen da' xinj ca', neda' naca' ben' gwseła' Diosen' golja' benach. ⁴² Le chas, le' yeyo'o. Ba za' ben' gon neda' lo' na'gaque'.

Gosezene' Jesúsen' cont yeseche'ene' lao bene' gwnabia' ca'

(Mt. 26:47-56; Lc. 22:47-53; Jn. 18:2-11)

⁴³ Jesúsen' ne' choe'te' dižan' ca' cate' bžin Judas, na' zan bene' zja'aque' len le' zjanoxe' no yag, no spada, bene' gosesela' bxoz gwnabia' ca' na' bene' gole' blao ca' chesenabia' nación Israel cheton'. (Judasen' goque' to bene' šižinw ca' gwlej Jesúsen' cont zjanaque' le' txen.) ⁴⁴ Na' Judasen' ba gože' legaque' nac yesenezde' non yesezene', gwne':

—Ben' gwnopa' xague', le'na'; le' sene' na' le' che'e.

⁴⁵ Na' cate' bžin Judasen' na' jabigue' gan' zoa Jesúsen' na' gože'ne':

—Maestro, Maestro.

Na' bnope'ne'. ⁴⁶ Nach gosezene' Jesúsen' cont yeseche'ene'.

⁴⁷ Perw to ben' zecha cuit Jesúsen' gwlej spada chen' na' gwдынen' mos che bxoz blaon' gwchogte' šla'a naguen'. ⁴⁸ Nach Jesúsen' gože' bene' ca':

—¿Nonle neda' ca to bene' gwban za'acle zedexi'le neda' len spada na' len yag? ⁴⁹ Yogo' žaze gwzoa' len le'e bsed blo'eda' bene' chyo'o yodao' blaon', na' bi gwzenle neda'. Perw chac da' qui cont chac can' nyoj Xtiža' Diosen'.

⁵⁰ Nach yogo' bene' ca' zjanaque' Jesúsen' txen bosoxonje' gosebejyichje'ne'.

Bi' güego' bin' boxonj

⁵¹ Na' to bi' güego' na'obe' Jesúsen', na' n̄xoa cože'be' toze sávana. Na' bene' ca' ba gosezene' Jesúsen' lecze gosenize'be'. ⁵² Perw gwlejyichjbe' sábanan' na' boxonjbe' ga'alyidbe'.

Goseche'e Jesúsen' lao bene' ca' chesenabia' nación Israelen'

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Nach goseche'e Jesúsen' lao b̄xoz blaon', na' besežag yogo' bene' ca' zjanac b̄xoz gwnabia', na' bene' gole blao ca' chesenabi'e nación cheton' na' bene' ca' bososed bosolo'ede' dan' bzoj da' Moisés. ⁵⁴ Na' Pedron' na'ogüe' Jesúsen' zito' zito'le b̄žintie' liž b̄xoz blaon' na' gwyo'e chyo'ona' gwchi'e txen len bene' ca' chesape' yodao' blaon' boše'e cuine' cho'a yi'.

⁵⁵ Na' ca' nac b̄xoz blaon' na' yogo' bene' ca' chesenabia' nación cheton', besyeyiljwlaže' bi da' yesagüe' xya che Jesúsen' cont yesote'ne', perw bi besyeželden'. ⁵⁶ Na' zan bene' gosone' diža' güenlaže' che Jesúsen', perw bi gosene' toz ca' yesene'. ⁵⁷ Bale' gosezože'e na' bososbague'ne' xya chol, gosene':

⁵⁸ —Neto' beneto' gwne': "Neda' yochinja' yodao' nga da' ben benach, na' šone žaze yeyona' yeto yodao' da' bi gon benach."

⁵⁹ Perw ne ca' ca' gosene' toz ca' yesene'.

⁶⁰ Nach b̄xoz blaon' gwzože'e ladjo yogo'lole' na' gwnabde' Jesúsen':

—¿Bi choži'o xtižen'? ¿Bi dan' chosožie' le' xya?

⁶¹ Perw Jesúsen' bitw bi gwne', bitw boži'e xtižen'. Na' b̄xoz blaon' da' yoble gwnabde' le', gwne':

—¿Naco' le' Cristo ben' gwlej Diosen' cont n̄abi'e, na' Xi'in Dios ben' chonx-encho?

⁶² Jesúsen' gože'ne':

—Le can' naca'. Na' le'ele neda' cate' ba chi'a šla'a l̄icha che Dios ben' nac la'zelagüe bene' gwnabia', neda' naca' ben' gwsele' golja' benach. Na' le'ele yetja' ladjo bejw dan' ze le'e yaban'.

⁶³ Nach b̄xoz blaon' gwcheza' xalane' cont nacia' bi beque'e can' gwna Jesúsen', na' gwne':

—Noch no chyažje bene' co' da' balj. ⁶⁴ Le'e ba benele chne' che Dios dan' že' ca', chon cuine' ca' Dios. ¿Nacxe ža le'e?

Na' yogüe' gosene' nape' doła' na' cheyała' gate'.

⁶⁵ Nach bale' gosezolagüe' chosoži'ene' xene' na' bososeyjue' lagüen' len to lache' na' gosot goseyine' le', na' gosonle' che' gose'ene':

—¿Gwnašc non' chot le'!

Na' bene' ca' chesape' yodao' blaon' gosot goseyine' le'.

Pedron' bi gwchebe' še nombi'e Jesúsen'

(Mt. 26:69-75; Lc. 22:56-62; Jn. 18:15-18, 25-29)

⁶⁶ Pedron' chi'e chyo'o che'e'lele, cate' b̄žin to no'ole güen žin che b̄xoz blaon'.

⁶⁷ Na' cate' no'olen' ble'ede' le' chi'e choše'e cuine' cho'a yin', gwne'e le' na' gože'ne':

—Lencze le' naco' txen len Jesús bene' Nazaret.

⁶⁸ Perw Pedron' bi gwchebe', gwne':

—Bi nombi'ane', n̄eca n̄ezda' bin' žo'.

Na' beyej Pedron' jayzie' cho'a puert na'le. Nach gwchež to jea. ⁶⁹ Na' no'ol güen žin̄na' gwne'e le' da' yoble na' gože' bene' ca' nita' na':

—Benga naque' legaque' txen.

⁷⁰ Perw le' da' yoble bi gwchebe' še naque' txen len Jesúsén'. Na' gocze štit da' yoble bene' ca' nita' na' gose'e Pedron':

—Da' licze, le' naco' txen len legaque', le naco' bene' Galilea, nacbía' ch̄nio' can' chesene bene' Galilea ca'.

⁷¹ Nach Pedron' chop šone ni'a gwne':

—Diosen' gone' neda' castigw še chonlaža' žia' bi nombi'a bena'.

⁷² Na' cate la' gwchežte jean' da' gwchope. Nach jayze'e Pedron' can' gož Jesúsén' le': “Bina' cuež jean' chop ni'a cate' gac šon ni'a bi chebo' še nombi'o neda'.” Na' cate' jayze'ede' can' gož Jesúsén' le', na' gwcheže'.

15

Goseche'e Jesúsén' lao Pilato

(Mt. 27:1-2, 11-14; Lc. 23:1-5; Jn. 18:28-38)

¹ Ca gwyeni', b̄xoz gwnabia' ca' besežague' len bene' gole blao ca' chesenabi'e nación cheton' na' len bene' ca' chososed chosolo'e dan' bzoj da' Moisés na' len yezica'chle bene' gwnabia' ca'. Na' bosocheje' Jesúsén' na' goseche'ene' jasesane'ne' lo na' Pilato ben' nac gobernador. ² Pilaton' gw̄nabde'ne', gože'ne':

—¿Len' naco' rey che bene' Israel?

Jesúsén' boži'e xtižen', gwne':

—Can' gwnao'na', can' naquen.

³ Na' b̄xoz gwnabia' ca' da' zan da' bosocuiše'ne'. ⁴ Nach Pilaton' da' yoble gw̄nabde'ne', gože'ne':

—¿Bi choži'o xtiža'gaquen'? le da' zan da' chosocuiše' le'.

⁵ Perw Jesúsén' bitw bi gwne'. Na' Pilaton' bebande' che'.

Gosechogbi'en gat Jesúsén'

(Mt. 27:15-31; Lc. 23:13-25; Jn. 18:38-19:16)

⁶ Na' gota' costumbr, Pilaton' gwsane' to bene' de ližya caten' čala' l̄ni pascw che neto' bene' Israel, con to bene' yesenab bene' gualaž cheton'.

⁷ To bene' lie' Barrabás na' len yexonj bene' gosot bene' cate' besyedabague' gobiern̄na' zjajo'e lo' ližya len nochle bene' güen da' mal. ⁸ Nach besežag bene' na' gosenabde' Pilaton' gwsane' to bene' con can' nac costumbr čegaquen'.

⁹ Na' Pilaton' boži'e xtiža'gaquen' gwne':

—¿Čaclaže'le gwsana' rey che le'e nacle bene' Israel?

¹⁰ Gwne' ca' le gocbe'ede' dan' chesacxi'a b̄xoz gwnabi'a ca' Jesúsén', da'nan' bosodie' le' lo ne'e. ¹¹ Perw b̄xoz gwnabia' ca' bosota bosone' bene' ca' že' na' cont gosenabe' gwsane' Barrabás ben' de ližyan'. ¹² Nach Pilaton' gw̄nabde' legaque':

—¿Bixe gona' len ben' žale nac rey che le'e nacle bene' Israel?

¹³ Legaque' bososya'adie' bosyoži'e xtižen':

—jBde'e le'e yag cruz!

¹⁴ Pilaton' gože' legaque':

—¿Bixe da' xinj nonen'?

Nach legaque' da' yoble bososya'achgüe' gosene':

—jBde'e le'e yag cruz!

¹⁵ Nach Pilaton', cont bega'ane' güen len bene' ca', bsane' Barrabásen' can' gosenabe'. Na' bene' mandadw gosot goseyin soldadw che' ca' Jesúsén', nach bene' le' lo na'gaque' cont yosode'ene' le'e yag cruz.

16 Nach soldadw ca' goseche'ene' yeto latje dan' zoa chyo'o che liž bene' gwnabian', na' bosotobe' yogo' soldadw ca', zjanac zane'. 17 Gosechize' Jesúsén' to lache' moradw, na' gosone' to corona de xis yeše' bosozoen' yichjen'. 18 Na' gosezolagüe' chesonle' che', chesosye'e:

—¡Viva, rey che bene' Israel!

19 Na' bosozete' yichjen' xis, bosoži'ene' xene', na' bosozoa xibe' gosone' ca' bene' chesonxen le'. 20 Beyož gosonle' che', besyeyine' lache' moradon' na' bosyoguacue'ne' xacze'. Nach goseche'ene' cont jasede'ene' le'e yag cruz.

Bosode'ene' le'e yag cruz

(Mt. 27:32-44; Lc. 23:26-43; Jn. 19:17-27)

21 Na' šlac zjanche'ene' gan' yesote'ne' besyežague' to bene' yež Cirene le' Simón, xa Alejandro na' Rufo, za' zeze'e yixe', na' bosogüe'ene' yag cruz che Jesúsén'.

22 Goseche'e Jesúsén' latje ga nzi' Gólgota, zeje dižan' Latje che Žit Yichj Bene' Guat. 23 Na' goso'ene' vino da' nchixe to nechw da' nzi' mirra, perw Jesúsén' bi goclaze' ye'ejen'. 24 Nach bosode'ene' le'e yag cruzen'. Na' soldadw ca' gosone' rifa cate' besyele'e xalana' Jesúsén' cont bla' bi besyechel to toe'.

25 Cheda ga šezille caten' bosode'ene' le'e yag cruz. 26 Na' yichj yag cruzen' bosozoe' dan' bosozoje' choen' diža' bixchen' gosote'ne'. Qui nyojen, žan: “Rey che Bene' Israel.” 27 Txen len Jesúsén' lecze bosode'e le'e yag cruz yechope bene' gwban, toe' šla'a licha, na' yetoe' šla'a robes. 28 Na' da' gosone' ca', goc ca' nyoj Xtiža' Diosen', žan: “Gosone'ne' ca' bene' güen da' xinj.”

29 Na' bene' gosede gała'ze gosezi'diže'ne', con chosota yichje' gosene':

—Le' gwnao' yochinjo' yodaon' na' šone žaze yeyontion'. 30 Bosla cuino' na' beyetj le'e yag cruza'.

31 Lecze ca' bxož gwnabia' ca' na' bene' ca' bososed bosolo'e dan' bzoj da' Moisés gosezi'diže'ne', na' gose' lježe':

—Bosle' bene' yoble, perw bi chac yosla cuine'. 32 Le'echone' yeyetje' na'a le'e yag cruzen', nach šejle'cho naque' Cristo ben' gwlej Diosen' cont nabí'e chio' bene' Israel.

Na' lente bene' ca' bosoda'lene' le' le'e yag cruz ca' gosezi'diže'ne'.

Can' goc caten' got Jesúsén'

(Mt. 27:45-56; Lc. 23:44-49; Jn. 19:28-30)

33 Cate' bžin guagwbiž, doxen yežlion' goc chol, bžinte cheda šone. 34 Na' ca' hora' Jesúsén' gwne' žižje gwne':

—Eloi, Eloi ¿lama sabactani? —zeje diža': Dios chia', Dios chia', ¿bixchen' ba gwlejyichjo' neda'?

35 Na' bal bene' ca' zjanita' na' gosende' na' gosene':

—Le gwzenag, chol güiže' da' Elías, ben' be' xtiža' Dios cani'.

36 Nach to bene' ca' gwyejsese' na' bzažede' to esponja vino zichj na' bzoen' to lao xis tone nach jažiguen' cho'a Jesúsén' cont xopen', na' gwne':

—Cuezcho, yešque güid Elíasen' yeletje' le'.

37 Nach Jesúsén' bosye'e žižje, na' gote'. 38 Na' lache' da' ze lo' yodao' blaon' bcheza' gacholen, gwza'te yichjen bžinte che'e. 39 Na' xan soldadw ca' zie' lao Jesúsén', na' cate' bende' can' bosye'en na' ble'ede' can' goten', gwne':

—Da' li le' bengan' goc dogualje Xi'in Dios.

40 Lecze bal no'ole zjanite' zito'le chesene'e. Na' len legaque' zjanita' María no'ole Magdala, na' Salomé, na' María xna' Jacobo bene' naše'te, na' lecze goque' xna' José. 41 No'ol qui gosa'ogüe' Jesúsén' na' gosaclene' le' cate' chsed

chlo'ede' bene' ca' že' distritw Galilea. Na' yezanch no'ol zjanita' na', bene' ja'aclene' le' txen Jerusalén.

Bosocuaše' Jesúsen'

(Mt. 27:57-61; Lc. 23:50-56; Jn. 19:38-42)

⁴² Žana' goquen žan' bososi'ni'e par ža che Dios cate' bi de lsens yesone' žin. Na' cate' ba chxoá gwbiž, ⁴³ to bene' le' José, bene' ciuda Arimatea, beyaxjde' gwyeje' lao Pilaton' na' jaynabe' cuerp che Jesúsen'. José goque' to bene' zaque' lao bene' ca' gosenabi'e nación Israel cheton', na' ba zoe' chbeze' batcan' solao nabia' ben' sela' Diosen'. ⁴⁴ Pilaton' bebande' dan' ba gote', na' goxe' xan soldadw ca' cont gwnabde' le' še da' li ba gote'. ⁴⁵ Na' cate' xan soldadw ca' gože' le' le can' ba goc, Pilaton' bnežjue' latje beyoa' Josén' cuerp che' Jesúsen'. ⁴⁶ Nach Josén' gwzi'e to lache' xen, beletje' cuerp che' Jesúsen' na' bolažen' len. Na' la' jaselote' le' to lo' bloj da' nche'ene' le'e yej xen, na' blole' to yej cho'a blojen' cont bseyjon len. ⁴⁷ Na' María no'ole Magdalan' len María xna' Josén' besele'ede' gan' bosocuaše'nen'.

16

Beban Jesúsen' ladjo bene' guat ca'

(Mt. 28:1-10; Lc. 24:1-12; Jn. 20:1-10)

¹ Cate' gwde ža che Diosen', María no'ole Magdalan', María xna' Jacobo, na' Salomé gosezi'e da' chla' zix cont šjaselo'en cuerp che' Jesúsen'. ² Na' šezildao' ža dmigw besežine' cho'a ban', cate' za' chla' gwbiž. ³ Na' za' yesežine' gose' lježe': —¿Noxe ca'a yej xen dan' da' cho'a blojen'?

⁴ Perw cate' besežine' na' gosene'e, besele'ede' yej xen dan' da' cho'a blojen' ba bga'an. ⁵ Nach goso'e lo' blojen', na' besele'ede' chi' to bene' xcuide' šla'a licha, nyaze' to lache' ton da' šiš. Na' besežebe'. ⁶ Na' bena' gože'ne':

—Bitw žeble. Cheyiljwle Jesús bene' Nazaret ben' bosode'e le'e yag cruz. Perw ba bebane'; notoch no nla' nga. Le na' gan' gosexoe'ne'. ⁷ Le šjaya'ac na' le ye' bene' ca' gosaque' le' txen, na' len Pedron', gwyobech Jesúsen' yežine' Galilea clél ca' legaque'. Na' Galilean' na' yesele'ede'ne' can' gwnacze'.

⁸ Nach no'ol ca' chosyoxonjsese' besyeya'aque' cho'a blojen', le chesexiztite' besežebe'. Na' notno gose'e ca', le besexožde'.

Jesúsen' blo'elagüe' María no'ole Magdala

(Jn. 20:11-18)

⁹ Beyož beban Jesúsen' ladjo bene' guat ca' šezildao' ža dmigw, Jesúsen' blo'elagüe' da' nechw len María no'ole Magdalan', ben' bebeje' gaž da' xigüe' yo'o nyaze'. ¹⁰ Na' María nga jatixjue'ede' bene' ca' ba gosenita' len le'. Zjanita'yaše' na' chesebeže' cate' bžine'. ¹¹ Na' cate' gosende' be'e diža' mban Jesúsen' na' gosende' be'e dižan' can' ba ble'ede'ne', bi gosejle'e.

Jesúsen' blo'elagüe' len chop bene' ca' gosaque' le' txen

(Lc. 24:13-35)

¹² Beyož goc ca', chop bene' ca' gosaque' Jesúsen' txen zjangüe'e nez yixe' cate' Jesúsen' blo'elagüe' legaque', na' nža'le besele'ede'ne'. ¹³ Lecze legaque' ja'aque' jasedixjue'ede' bene' yezica'chle, perw neca gosejle'e chegaque'.

Da' bgon Jesúsen' yeson bene' ca' chsejnilaže'ne'

(Mt. 28:16-20; Lc. 24:36-49; Jn. 20:19-23)

¹⁴ Gwdena' bene' šnej ca' gwlej Jesúsen' cont zjanaque' le' txen zjachi'e cho'a mes chesagüe' cate' blo'elagüe' len legaque'. Na' gwdile' legaque' da' bi

chesejnilaže' le' do yichj do laže' na' zjanaque' laždao' chach, le bi gosejle'e che bene' ca' besele'ede'ne' ba bebane' ladjo bene' guat ca'. ¹⁵ Na' gože' legaque':

—Le šja'ac doxen yežlio, na' le šjatixjue'e diža' güen chia' len yogo'lol bene'. ¹⁶ Bene' ca' yesejnilaže' neda' na' yesezoe' nis, gata' yela' mban chegaque' toli tocañe. Perw bene' bi chesejnilaže' neda', yesebiaye'e. ¹⁷ Na' bene' ca' chesejnilaže' neda', yesyega'anlene' da' qui: Yeso'e la' na' yesyebeje' da' xigüe' yo'o nyaz bene'; yesenie' diža' cobe da' bi zjansede'; ¹⁸ na' še yesoxe' no bel znia, o še yese'eje' da' nac venen, bibi yesacde'; na' lecze yesexoa taque' yichj bene' chese'e na' yesyeyacde'.

Begüe Jesúsen' yaba

(Lc. 24:50-53)

¹⁹ Beyož bšaljlene' legaque', Xancho Jesúsen' begüe' yaba, na' gwchi'e cuit Diosen' šla'a licha. ²⁰ Na' bene' ca' zjanaque' le' txen besežaše' na' jasedixjue'ede' diža' güen che' doxen. Na' cuin Xancho Jesúsen' goclene' legaque' gosone' yela' guac cont gosejle' bene' le' nac da' li dižan' goso'en. Da' na'zen' chzoja'.

DIŽA' GÜEN DAN' BZOJ SAN LUCAS

Da' nga bzoj Lucasen' par Teófilo

¹⁻⁴ Teófilo, naco' bene' zaca' na' chzoja' le' diža' quinga cont neздо' da' li ca nac da' ba bosozejni'ide' le' che da' ca' ba gosac. Bene' zan bač bosozoje' che Jesúsén', goso'e diža' che da' ca' bene', con can' bosozejni'i bene' ca' neto', bene' ca' besele'ede' can' gwzolaon cate' goljte Jesúsén'. Na' bene' ca' gosende' na' besele'ede' can' goquen' bososed bosolo'ede' bene' yoble diža' güen che'. Na' neda' cate' beyož gwñabyoža' can' goquen' na' gwyazlaža' gwzojan' tcho'a cont neздо', Teófilo.

To angl gwdixjue'ede' galje Juan

⁵ Ca tiemp caten' gwnabia' rey Herodes distritw gana' nzi' Judea, na' gwzoa to bxož che bene' Israel ca' bene' le Zacarías. Bene' žin len to xonj bxož bene' zjale Abías. Na' no'ol che Zacarías le Elisabet, na' naque' diaža che da' bxož Aarón. ⁶ Na' Zacarías len Elisabeten' zja'accze' to licha len Diosen' na' gosonyane' yogo'loł da' non Xancho Diosen' mandadw da'na' nyoj le'e ley che'na'. ⁷ Na' nono xi'ingaque' nita' neche Elisabeten' naque' no'ol güiž. Na' chopte' ba zjanaque' bene' gole.

⁸ Na' goquen' beyala' Zacaríasen' len bene' lježe' ca' bene' ca' zjanaque' bxož cont yesone' da'na' besyeyale' yesone' yesonxene' Dios. ⁹ Na' bxož ca' yogo' ni'a chesone' rifa cont chata'bia' noe' choj gwzeye' yal lo' yodao' blao čegaque' gan' chesonxene' Xancho Diosen'. Na' bchoj Zacaríasen' caten' gosone' rifan' bzeye' yala' lo' yodao'na'. ¹⁰ Na' šlac bzeye' yala' gosenita' yogo'loł bene' zan ca' chyo'ole bosol güiže' Diosen'. ¹¹ Na' to angl bene' gwsela' Xancho Dios blo'elagüe' Zacaríasen', na' gwzecha angla' cuit mesa' lichale gan' chosozeye' yala'. ¹² Na' cate' ble'e Zacaríasen' anglen', benit bečhoł lo' yichjlažda'ogüe' na' bžebchgüe'. ¹³ Perw anglen' gože' le':

—Bitw žebo' Zacarías. Diosa' ba bzenague' che dan' gwñabdo'ne', na' no'ol čho' Elisabeten' sane' to xi'ino', na' gwsio'obe' Juan. ¹⁴ Na' so' mbalaz na' yebedo' na' lecze bene' zan yesyebede' še ba goljbe'. ¹⁵ Gacbe' to bene' blao lao Diosen'. Bitw ye'ejbe' vino ne bichle da' chzože bene'. Na' cate' za' galjtebe' ba yo'o Spiritw che Diosa' lo' yichjlažda'obe' nabi'an lebe'. ¹⁶ Na' gombe' cont zan bene' Israel ca' yosoša' yichjlažda'ogüe' na' yesonxene' Xancho Diosen' can' cheyala' yesonxene' le'. ¹⁷ Na' cuialaobe' lao Xančhon', na' soa Spiritw che Diosen' len lebe' can' gwzoan len da' Elíasen', na' lecz ca' yela' guac che Diosen'. Na' bene' ca' bi nita' binlo len xi'ine' ca', gombe' ga yesenite' binlo len legacbe', na' bene' güedenag ca' gombe' yosozenague' che Diosen'. Gombe' cont yesenita' bene' yesonxene' Xančhon' cate' yide'.

¹⁸ Nach Zacaríasen' gože' anglen':

—¿Nac gac nežda' da' nga? Neda' naca' bene' gole na' lecz ca' no'ol čhian' ba naque' bene' gole.

¹⁹ Nach anglen' gože' le':

—Neda' naca' angl Gabriel bene' za' yaba. Zoa' len Diosen' na' chonxena'ne', na' gwsele' neda' zedetixjue'eda' le' diža' güen qui. ²⁰ Le' bi gac nio' na'a, le bi chejli'o xtiža' nga. Cate' žin ža gac da' nga, cana' gac yenio' da' yoble. Na' da' li gwžin ža gac can' gwnia'.

²¹ Na' bene' ca' že' chyo'ole chesebeze' Zacaríasen' besyebande' da' gwžede' lo' yodao' blaona'. ²² Na' cate' bechoj Zacaríasen', bene' señw len ne'e da' bi gocie'. Nach gosache'e bene' ca' ble'ebande' lo' yodao'na'.

²³ Na' cate' beyož bdelaze' dan' bene' žin lo' yodao'na', beyej liže'. ²⁴ Gwde na' no'ol che' Elisabeten' gwchendao' bidaon' lo' le'e. Na' gayo' bio' gwzoaze'. ²⁵ Na' gwne':

—Güenchguan' ba ben Xancho Diosen' len neda'. Ba bžin ža beži'ilaže'de' neda', cont bich yeson beñacha' xbab bibi zaca'.

To angl gwduxjue'ede' galje Jesucriston'

²⁶ Goc xop bio' noa' Elisabeten' bidaon', Diosen' besele' anglen' ben' le Gabriel, gwyeje' to yež da'na' nzi' Nazaret gan' mbane distritw Galilea. ²⁷ Gwsele' le' gan' zoa to no'ol güego' le' María. Na' Marían' napši'ichgua cuine'. Na' to bene' le' José bač naquen gwšagna'lene' le' cont gaque' xo'ole'. Na' Joséna' naque' diaža che rey David ben' gwzoa cani'. ²⁸ Na' bžin to angl bene' za' yaban' gwo'e gan' zoa María na' gože'ne':

—Patiox. Xancho Diosen' nži'ide' le' na' zoe' len le'. Na' gone' cont so' mbalazch ca yogo'lol no'ole yezica'chle.

²⁹ Cate' ble'e Marían' anglen', bebanchgüede' ca nac dižan' dan' gože' le'. Na' bene' xbab bi zejen dan' gwne' caten' bguape'ne' tiox. ³⁰ Na' anglen' gože'ne':

—Bitw žebo' María, Diosen' nži'ide' le'. ³¹ Na'a gua' xi'ino' to bi' byo dao', na' sano'be', na' go'o labe' Jesús. ³² Na' Jesús'en' gaque' to bene' blao na' benachen' yososi'ene' Xi'in Dios, Dios ben' naque' la'zelagüe bene' blao. Na' Xancho Diosen' gone' cont nabi'e nación Israel chele ca gwnabia' da' xozxta'ogüe' rey David. ³³ Na' le' nabi'e nación Israelen' toli tocañe, na' gwbat te yela' gwnabia' chen'.

³⁴ Nach gož Marían' angla':

—¿Nacxe gac sana' bdaon'? Bitw nžaga' bene' byo.

³⁵ Nach gož angla' le':

—Spiritw che Diosen' yiden gana' zo'na', na' yela' guac che Diosa' soan len le', Dios ben' naque' la'zelagüe bene' blao. Da'nan' bidaon' za' galje gacbe' laždao' xilaže' na' yososi'ebe' Xi'in Dios. ³⁶ Na' bene' xna'o Elisabeten' lecze bač gwchendao' bidaon' lo' le'e la'czla' ba naque' bene' gole. Ba goc xop bio' no'e to bi' byo dao', len gosene' naque' no'ole güiž. ³⁷ Bibi de da' nacho da' cbi gac gon Dios.

³⁸ Nach gož Marían' anglen':

—Ni zoa' naca' xmos Xana' Diosen'. Gacšca chia' con can' ba gwnao'.

Nach beza' anglen' gan' zoa Marían'.

Marían' jane'e Elisabeten'

³⁹ Gwde na' la' gwyejte Marían' to yež da' žia to lo' ya'a gan' mbane distritw Judean', ⁴⁰ na' bžine' liž Zacaríasen'. Na' gwo'e bguape' Elisabeten' tiox. ⁴¹ Na' cate' Elisabeten' bende' choł güiž Marían' le', nach gocbe'ede' chxite' chžia bidaon' lo' le'e. Na' Spiritw che Diosen' gwnabian' yichjlaždao' Elisabeten' ⁴² na' gwne' zižje da' bebecgüede', gože' Marían':

—Zo' mbalazch ca yogo'lol no'ole yezica'chle. Na' lecze bidaon' no'ona' soabe' mbalaz. ⁴³ Chebanda' le' naco' xna' Xana' zedena'o neda'. ⁴⁴ Con cate' benda' chguapo' neda' tiox, bidaon' chian' lecze bebebe', bxite' bžiabe' lo' lian'.

⁴⁵ Zo' mbalaz da' gwyejli'o gac can' gwna xtiža' Diosen' dan' gož anglen' le'.

⁴⁶ Nach Marían' gwne':

Chonxena' Xancho Diosen' do yichj do laža'.

⁴⁷ Na' do yichj do laža' chebecgüeda' Dios ben' bebeje' neda' lo' da' malen'.

48 Ba beyaše'de' neda' naca' xmoše' la'czla' bibi zaca'.
 Na' na'a bene' yesenita' toli tocanē yesene' neda' zoa' mbalaz.
 49 Dios ben' chac chon da' nono gac gon ba bene' da' güen juisyw len neda'.
 Toz len' naque' bene' laždao' xilaže' juisyw.
 50 Na' note'teze bene' chesape' le' bala'an do yichj do laže', Diosen'
 cheži'ilaže'de' legaque'.
 Cheži'ilaže'de' bene' že' na'a na' yeži'ilaže'de' xi'in diaža chegaque' ca'.
 51 Bač blo'e Diosen' beñachen' yela' guac che'.
 Na' ba bolague' bene' ya'laže' ca'.
 52 Ba bene' cont bene' gwnabia' ca' bich yesenabi'e.
 Na' bene' bi naque' bene' blao, Diosen' ba bnežjue' latje yesaque' bene' blao.
 53 Na' bene' chesedon, Diosen' ba bnežjue' legaque' da' zan da' güen.
 Na' bene' gwni'a ca', ba boše'e legaque', bibi bonežjue' legaque'.
 54 Nach ba goclene' chio' bene' Israel naccho ca' xmoše'.
 Ba blo'ede' bitw ganlaže' chio', san ba cheyaše' cheži'ilaže'de' chio'.
 55 Ba bene' can' gože' da' Abraham len yezica'chle da' xozxta'ocho.
 Na' soacze' yeyaše' yeži'ilaže'de' xi'in diaža che da' Abrahanna' toli tocanē.
 56 Na' cate' ba goc šone bio' zoa Marían' len Elisabeten', nach Marían' beyej
 liže'.

Golje Juan bene' bzoē' bene' nis

57 Na' cate' bžin ža san Elisabeten', gwzane' bi' byo dao'. 58 Na' cate' goseneze
 bene' gualiž chegaquen' na' diaža chegaquen' Xancho Diosen' ba beyaše'
 beži'ilaže'de' Elisabeten', nach besyebchgüede' len le'. 59 Na' goc xono' ža
 goljbe' na' jasezoe'be' señw dan' že' circuncisión can' gosone' len yogo' bi' byo
 dao' bi' gosaljbe' lo diaža che da' Abraham. Na' gosaclačže' si' labe' Zacarías
 can' le xaben', 60 perw xna'be' gwne':

—Bi gac. Cheyala' si'be' Juan.

61 Na' legaque' gose'ene':

—Notno diaža chele nita' bene' zjale ca', neca xozxta'ole.

62 Na' gosone' señw gosenabde' xaben' nac che'nde' si' labe'. 63 Nach bene'
 señw gwñabe' to yagla' dao' da' bzoje': "Si' labe' Juan." Na' yogüe' besyebande'.
 64 Beyož bzoje' da'na', la' gocte beñie', nach la' gwzolaote be'e diža' benxene'
 Diosen'. 65 Na' besyebane bene' gualiž chegaquen'. Na' xtiža'gaquen' gos
 gwłaljen doxen yež ca' zjachi' lo ya'ana' gan' mbane distritw Judean'. 66 Na'
 yogo'lol bene' gosende' dižan' gosone' xbab lo' yichjlažda'ogüe' che da' ca', na'
 gosene':

—¿Bixe gon bdao'na'?

Gosene' ca' le gosenezde' zoacze Xancho Diosen' len lebe'.

Diža' da' be' Zacarías

67 Nach gwnabia' Spiritw che Diosen' yichjlaždao' Zacaríasen', nach be'e
 xtiža' Diosen', gwne':

68 Chonxena' Xancho Dios ben' chonxen chio' bene' Israel.

Cheyaše' cheži'ilaže'de' chio' naccho nación che' na' ba chsele' bene' yebej chio'
 lo da' malen'.

69 Na' bena' bač za' cont yebej chio' lo da' malen', naque' bene' gwnabia' gual,
 na' naque' xi'in diaža che da' rey David ben' goc xmos Diosen'.

70 Chac can' gwna Diosen' len cho'a da' bene' ca' gwsele' cani', bene' gosac lo
 ne'e goso'e xtižen'.

71 Ba za' ben' gwne' yosle' chio' lo na' yogo' bene' chesegue'e chio'.

72 Chac can' gože' da' xozxta'ocho ca' yeyaše' yeži'ilaže'de' legaque'.
 Bi chanlaže', san chone' yogo' da' ba gwne' gone' gaclene' chio'.

⁷³ Diosen' chone' can' gwlo'e da' ba_li lao da' xozxta'ocho da' Abraham gože'ne' gaccze can' gwnen'.

⁷⁴⁻⁷⁵ Gwne' yosle' chio' lo na' bene' chesegue'ede' chio'.

Nach gac lažda'ochon' xilaže' lao le' na' gonxenchone' sin cbi žebcho, na' šejcho licha gonxenchone' šlac de ye_la' mban checho.

⁷⁶ Nach Zacaríasen' gože' bdao' chen':

Bdao' chia', benach yesene' chio' naco' bene' choe' xtiža' Dios, Dios ben' naque' la'zelagüe bene' blao.

Yesene' ca' da' cuialaguo' lao Xancho' na' go'o xtižen' cont nita' bene' yosozenague' che' cate' yide'.

⁷⁷ Gwsed gwlo'edo' neto' can' chaclaže' Diosa' yebeje' chio' naccho nación che' lo da' mala' na' yezi'xene' xto_la'chon'.

⁷⁸ Diosen' cheyaše' cheži'ilaže'de' chio',

le len' gwlo'e be'ni' che' lo' laždao' chio' benach.

⁷⁹ Cue'e be'ni' che' lo' yichjlaždao' chio' naccho ca bene' chaš ga nac chol, chio' chžebcho gatcho.

Na' gwzejni'ide' chio' benach naquen' soa cuzcho yežlio nga.

Can' be' Zacaríasen' xtiža' Diosen'.

⁸⁰ Na' Juanna' zej chcha'obe' zejte chac yichjlažda'oben' can' chazlaže' Diosen'. Na' jasoe' latje daš. Na'ate zoe' cate' gwzolagüe' gwduxjue'ede' xtiža' Diosen' len bene' Israel ca'.

2

Caten' golje Jesúsén'

(Mt. 1:18-25)

¹ Na' lecz šlac gwnabia' rey César Augusto, bene' mandadw gwyas to censo cont nezde' ba_l bene' že' to to yež da' zjachi' doxen yežlio gan' chnabi'e. ² Na' lecz cana' Cirenio naque' gobernador gan' nzi' Siria. Na' naquen da' nechw bchele' ba_l bene' že' to to yež. ³ Na' yogo'lo_l bene' jaya'aque' lažgaque' jasyede cuent cuine' cont bosochele' le'. ⁴ Na' José naque' diaža che da' rey David. Da'nan' beze'e Nazaret gan' mbane distritw Galilea, beyeje' yež Belén dan' nac laž da' rey David. Na' chi' yež Belén gan' mbane distritw Judea. ⁵ Beyeje' jayde cuine' cuent na' zenche'e no'ol che' Marían' perw bina' yeseca'a lježe'. Na' Marían' ba no'e bdao'. ⁶ Na' šlac nite' Belén bžin ža sane'. ⁷ Na' gwthane' bi' nechw, to bi' byo dao', na' btobe'be' lache' na' gwlo'ebe' ga chesagw beyixe', da' bich bi latje yo'o mesónna' par legaque'.

Angl ca' bosozende' bene' güeyoe xila' ba golje Jesúsén'

⁸ Na' že'na' yixe' che yež Belén na'ate že' bene' güeyoe xila' chesape' xila' chen'. ⁹ Na' to angl bene' gwsela' Xancho Diosen' bžine' gan' nita' bene' güeyoe xila' ca', na' be'ni' che Xancho Diosa' gwyechjen bsenin' gan' nite'na'. Na' besežebchgüe'. ¹⁰ Na' gož angla' legaque':

—Bitw žeble. Na'a chixjue'eda' le'e to diža' güen da' yesebechgüe yogo'lo_l bene'. ¹¹ Na'aža lo yež che rey David ba golje bena' gac yebeje' benachen' lo da' mal. Naque' Cristo, na' zeje diža' naque' ben' gwsela' Dios cont nabi'e, na' lecze naque' Xancho. ¹² Cont yeželele bdao'na', quinga naquen: bdao'na' ba ntobe'be' lache' na' debe' gan' chesagw beyixe' ca'.

¹³ Beyož gwna angla' ca' la' besežinte bene' zan angl gan' zoa angl nechua', za'aque' gan' zoa Diosen'. Na' chesonxene' Diosen' chesene':

¹⁴ iChonxenko Diosa' ben' zoa yaba,

na' lo yežlio yesezoa yesebez benachen' binlo, con bena' cheson can' chazlaže' Diosen'.

15 Na' cate' besyeya'ac angl ca' zjaya'aque' yaba, na' bene' güeyoe xila' ca' gose' lježe':

—Yeyejcho Belén šjayna'cho dan' ba goc can' nac dan' gwseła' Xanchon' angl quinga bedesedixjue'ede' chio'.

16 Na' beseya'aces bene' güeyoe xila' ca' jaya'aque' Belén. Na' besyeželde' Marían' len Josén' na' len bdao'na'. Na' bdao'na' debe' gan' chesagw beyixe' ca'. 17 Beyož besele'ede' can' ba goquen, na' goso'e diža' che bdao'na' len bene' ca' yezica'chle ca' nac dan' gož anglen' legaque'. 18 Na' yogo'lol bene' ca' gosende' diža' dan' gosoe' bene' güeyoe xila' ca' besyebande'. 19 Na' lecze Marían' gwlo'o yichje' yogo'lol diža' dan' gosoe' bene' güeyoe xila' ca' na' bene' xbab lo' yichjlažda'ogüe' bi zejen. 20 Nach besyeya'ac bene' güeyoe xila' ca' chesonxene' Diosen'. Na' cheso'e diža' nacchgua Diosen' bene' güen da' ba goc yogo'lol da' ba gosende' na' besele'ede' dan' gož anglen' legaque'.

Diaža che Jesúsen' jasesane'be' lo' yodao' blaona'

21 Cate' goc xono' ža golje bdao'na' jasezoe'be' señw da'na' nzi' circuncisión, na' bososi'e labe' Jesús, can' ben anglen' mandadw cate' za' gua' Marían' lebe'.

22 Na' cate' gwde ba beyac Marían' xilaže' len bdao'na' con can' bzoj da' Moisésen', nach ja'aque' ciuda Jerusalén goselene'be' jasesane'be' lao Xancho Diosen'. 23 Gosone' can' nyoj ley che' dan' ža: “Yogo' bi' byo dao' bi' nechw cheyala' gacbe' lo' na' Dios.” 24 Nach gosonxene' Diosen', gosone' can' ža ley che Xancho Dios dan' žan: “Cheyala' gotle chop ngolbex o chope plomxtil.”

25 Na' Jerusalénna' gwzoa to bene' le' Simeón. Benan' gwyejze' bene' da' güen lao Diosen' na' benxene' le', na' gwleze' batcan' yid Cristo ben' sela' Xancho Diosen' cont yebeje' bene' Israel ca' lo' da' mal. Na' Spiritw che Diosen' gwyo'on lo' yichjlaždao' Simeón, 26 na' bzejni'in le' bi gate' še bina' le'ede' Criston'. 27 Na' Spiriton' benen' cont gwyeje' yodao' blaona', na' zoe' yodao'na' cate' besežin xaxna' Jesúsen' zjano'ebe' cont yesone' len lebe' can' non ley chegaquen' mandadw. 28 Nach Simeónna' gwlene'be' nach benxene' Diosen', gože'ne':

29 Xana' Dios, bačh goc can' gwnaon'.

Ben latje yeyeda' binlo gana' zo'na', neda' naca' xmoso'.

30 Ba ble'eda' bena' zedyelej neto' lo' da' mal.

31 Naque' bene' gwnalažo' gwseło' neche yogo'lol benačh.

32 Na' cue'e be'ni' che' lo' yichjlaždao' bene' cbi zjanaque' bene' Israel.

Na' gaque' la'zelagüe bene' zaca' len neto' bene' Israel.

33 Nach xaben' len xna'ben' besyebande' ca' diža' chebe' dan' be' Simeónna'.

34 Na' Simeónna' gwñabde' Diosen' cont gac güen chegaque'. Na' gože' Marían': —Bene' Israel ca' yesejnilaže' xi'ino' nga yesenite' mbalaz, na' bene' Israel ca' cbi yesejnilaže'ne' bi yesenite' mbalaz. Zedelo'ede' benachen' can' chaclaže' Diosen' goncho, perw zane' bi yesejle'e che'. 35 Nach Diosen' gwlo'e non' chzenag che' na' non' cbi chzenag. Na' cacze chac ga chaz cwšiyw gac lo' yichjlažda'oguo' catequen' žaglaguo' len da' gac che'.

36 Na' lecze yodao' blaona' gwzoa to no'ole le' Ana, na' cho'e xtiža' Diosen'. Naque' xi'in da' ben' le' Fanuel na' naque' diaža che da' Aser. Bšagne'e cate' naque' no'ol güego', perw na' gaž izga gwzoalene' bene' che' na' gote', na' bga'ane' güezebe. Na' Anan' ba naque' to bene' gole, 37 taplalj tap izde'. Bicze chechoje' yodao' blaona'. Leca chonxene' Xancho Diosen' do ža do yel, gwzoatie' tgüeje bene' gwbas na' con gwzoachgüe' bol güiže' Diosen'. 38 Na' goquen' gwbiga' Anan' gan' zoa Josén' len Marían' lo' yodao'na' na' be'e yela' choxcen che Diosen' bačh gwsele' Jesúsen'. Na' be'e diža' che Jesúsen' len

yogo' bene' ca' že' Jerusalén ben' chesebeze' batca' sela' Diosen' ben' yebeje' legaque' lo da' malen'.

Jaya'aque' Nazaret

³⁹ Nach Josén' len Marían' cate' beyož gosone' yogo'lol dan' non ley che Xancho Diosen' mandadw yesone', jaya'ac lažgaque' Nazaret gan' mbane distritw Galilea. ⁴⁰ Na' Jesúsen' zej chcha'ogüe' na' zej chchachlaže'. Na' ca' zej chcha'ogüe' na' zej chejni'ichde', na' Diosen' nži'ilaže'de'ne'.

Can' ben Jesúsen' chašilyodao' blaona'

⁴¹⁻⁴² Na' xaxne'e ca' yogüiz chja'aque' lni da' chala' Jerusalén chjaseze'ede' can' goc cate' Diosen' betue' bi' nechw che yogo' bene' Egipto na' bosle' bene' Israel. Šižinw ize Jesúsen' cate' goseche' xaxne'en le' ja'aque' lnin' Jerusalén. ⁴³ Na' cate' gwde lnina' besyeya'aque', perw Jesúsen' bega'ane' ciuda Jerusalén. Na' xne'ena' len Joséna' bi gosacbe'ede'. ⁴⁴ Con gosacde' ba zjayde' t xen len bene' ca' nžaggaque'. Na' tža nez ba gosa'aque' cate' gwzolao chesyeyiljue'ne' ladjo diaža chegaque' na' no bene' xmigüe', ⁴⁵ perw bitw besyeželde' le'. Nach besyebi'e jaya'aque' Jerusalénna' da' yoble cont šjasyediljue' le'.

⁴⁶ Na' beyon žach besyeželde' Jesúsen' chašil yodao' blaona', chi'e gachol bene' ca' chososed chosolo'ede' dan' bzoj da' Moisés. Jesúsen' chzenague' xtiža'gaquen' na' zanen chnabde' legaque'. ⁴⁷ Na' yogo'lol bene' ca' chosozenague' xtiža' Diosen' da' cho'e chesyebande' can' chejni'ide' na' can' choži'e xtiža' bene' ca' zjansed dan' bzoj da' Moisés. ⁴⁸ Na' cate' besele'e xaxne'en le', besyebande', na' xne'en gože' le':

—Xi'indagua', ¿bixchen' chondo' neto' ca'? Xao' nga na' neda' ba gwdato' beyiljwto' le', na' da' juisyw ba ble'eto'.

⁴⁹ Jesúsen' gože' legaque':

—¿Bixchen' beyiljwle neda'? ¿Bi nezele liž Xa' ngan' cheyala' soa'?

⁵⁰ Perw xaxne'e bitw gosejni'ide' bi zejen dan' gože' legaque'.

⁵¹ Na' beyeje' yež Nazaret len xaxne'e bzenague' chegaque'. Na' gwlec yichj xne'ena' yogo'lol dan' goca'. ⁵² Na' ca' chac zej chejni'iche Jesúsen' na' zej gwcha'oche', na' Diosen' len benača' zej chesazlaže'che' le'.

3

Juan gwduxjue'ede' diža' güen che Diosa'

(Mt. 3:1-12; Mr. 1:1-8; Jn. 1:19-28)

¹ Cate' lo iz šino' dan' chnabia' César Tiberio doxen ga mbane nación Roma, izna' goc Poncio Pilato gobernador che distritw Judea, na' goc Herodes gobernador che distritw Galilea. Na' bene' biše' Herodesen', ben' le Felipe, goque' gobernador che distritw Itorea na' che distritw Traconite. Na' goc Lisánias gobernador che distritw Abilinia. ² Nach lecze izna' Anás na' Caifás gosacche' bxoz blao che bene' Israel. Izna' Juan ben' naque' xi'in Zacarías gwzoe' to latje daš. Nach Diosen' be'lene' Juanna' diža'. ³ Na' Juanna' gwyeye' yogo'lol yež dan' nita' gala'ze yegw Jordán, jatixjue'ede' yogo'lol bene' cheyala' yesyetinjde' xtolá'gaque' na' yesezoe' nis cont nitlao xtolá'gaquen'. ⁴ Juanna' bene' dan' bzoj da' Isaías ben' be' xtiža' Diosen' cani'te, gana' žan:

Bena' chne' zižje latje dašen', že':

“Le gonšagüe' yichjlažda'olen' cont soale gwzenagle che Xanchon' cate' yide', le cuejyichj da' malen' chonle cont yichjlažda'olen' gaquen ca to nez da' ba gosonšagüe'.

⁵ Gwžin ža cate' yogo' ya'a yegw ca' yesyeyaquen laše', na' no nez da' nacchgua bxoca' yesyeyaquen licha,

na' no nez da' nžaš nche'ene yesyeyaquen ba'a.

⁶ Na' yogo'lol bene' yesache'ede' can' chaclaže' Diosen' yebeje' benachen' lo da' mal."

⁷ Na' bene' zan ja'aque' gan' gwzoa Juanna' cont gwzoe'ne' nis. Na' Juanna' gože' legaque':

—Le'e nacchuale bene' zgot na' bene' gwxiye'. ¿Chaquele guac yelale lao castigw dan' seła' Diosen' caten' gone' yela' justis che benachen'? ⁸ Še da' li ba betinjele xtoła'le, cheyala' gonle da' nac güen cont yesache'e bene' ba boša' yichjlažda'olen'. Na' bitw gonle xbab gaquele Diosen' bitw gone' le'e castigw che xtoła'len' lagüe da' nacle xi'in diaža che da' Abrahanna'. Bitw nacho leca chyažje Diosen' le'e. Guac gone' cont yej quinga yesyeyaquen xi'in diaža che da' Abrahanna'. ⁹ Ca nac le'e, še bi chonle can' chazlaže' Diosen', zaca'leble ca to yag frut da' bibi chbia. Na' yogo'te yag frut da' bibi chbia, chog xan yaga' len na' gwzeyen'.

¹⁰ Nach bene' ca' chosozenag xtiže'na' gosenabde' Juanna', gose'ene':

—¿Bica' da' cheyala' gonto'?

¹¹ Na' gože' legaque':

—Ben' nape' chope camis cheyala' gwnežjue' ton che bene' bi de che'. Na' lecze ca' che ben' de da' gagüe', cheyala' gwnežjue' che ben' bi de gagüe'.

¹² Na' cate' to chope bene' güechixjw ca' jasebigue' cont gwzoa Juanna' legaque' nis, na' gose'ene':

—Maestrw, ¿bica' da' cheyala' gonto'?

¹³ Na' gože' legaque':

—Bitw gwchixjwchle ca da' cheyala' yeseyixjue'.

¹⁴ Na' to chope bene' ca' zjanac soldadw lecze gosenabde' le', gose'ene':

—¿Chix neto'? ¿Bica'ch da' cheyala' gonto'?

Na' Juanna' gože' legaque':

—Bitw ca'ale da' de che bene', na' neca gonlaže'le len da' yosbague'le bene' cont ca'ale xmechwgaque'. Le gon banez len laxjwle.

¹⁵ Na' bene' ca' gosezoe' lez yid Cristo ben' naquen seła' Diosen' yedenabi'e, na' gosacde' še Juanna' naque' Cristo. ¹⁶ Na' Juanna' gocbe'ede' xbab chegaquen' na' gože' yogo'lol'e':

—Neda' da' li chzoa' le'e nis, perw za' yid bena' gon cont soa Spiritw che Diosen' lo' yichjlažda'olen' nabian' le'e. Na' Spiriton' naquen ca yi', na' gwxi gwloan yichjlažda'ole. Bena' za' za' zaca'che' ca neda', na' da' nacchgüe' bene' zaca' bitw zaca' gona' xmandadoe' lechja' no xe'le'. ¹⁷ Benan' gone' len benachen' can' choncho cate' chdecho trigon' lo' rner. Chtobcho trigon' chgo'ošagüe'chon na' chzeycho yix beben'. Na' bene' chesejnilaže' Diosen', yotobe' legaque' cont šjasyenite' txen len le', na' bene' bi chesejnilaže' le', sele' legaque' lo' yi' gabilen' dan' cbi cheyol chenit.

¹⁸ Da' zanch da' gwna Juanna' gwdixjue'ede' legaque' diža' güen, na' gwneyoede' legaque' yesejle'en. ¹⁹ Nach Juanna' gwdile' gobernador Herodes ca nac da' mal da' bene' beque'e Herodías ca xo'ole', le Herodíasna' naque' xo'ole Felipe bene' biše' Herodesen'. Na' Juanna' lecze be'e diža' yogo'lol' da' mal dan' ba ben Herodes. ²⁰ Na' Herodesen', gualaz da' gwzenague' che Juanna', benche' yeto da' mal, gwlo'e Juanna' ližya.

Can' goc caten' gwzoa Jesúsen' nis

(Mt. 3:13-17; Mr. 1:9-11)

²¹ Nach šlac chzoa Juanna' bene' nis, bene' zan ja'ac cont bzoe' legaque' nis. Na' len Jesúsen' gwzoe' nis. Na' lo hora' Jesúsen' bol güiže' Diosen' na' la' byaljwte yaba gan' zoa Diosen'. ²² Na' betj Spiritw che Diosen' bžinen gwzoan

len le', na' ca hora' Spiriton' naquen ca to ngolbex. Na' gosende' gwne Dios ben' zoa yaban', gwne':

—Le' naco' Xi'ina' bene' chacchgüeda', na' chebe chezaquelaže'chgüeda' chio'.

Diaža che Jesúsén'

(Mt. 1:1-17)

²³ Na' ca do šichoa ize Jesúsén' cate' gwzolao bene' yogo'lol da' zedeyene'. Na' bene' ca' gwnita' na' gosone' xbab še naque' xi'in Joséna'. Josén' naque' xi'in Elí, ²⁴ na' Elí naque' xi'in Matat, na' Matata' naque' xi'in Leví, na' Levína' naque' xi'in Melqui, na' Melquin' naque' xi'in Jana, na' Janan' naque' xi'in yeto ben' le' José. ²⁵ Na' Joséna' naque' xi'in Matatías, na' Matatíasén' naque' xi'in Amós, na' Amósen' naque' xi'in Nahum, na' Nahunna' naque' xi'in Ešli. Na' Eslin' naque' xi'in Nagai, ²⁶ na' Nagain' naque' xi'in Maat, na' Maata' naque' xi'in Matatías, na' Matatíasén' naque' xi'in Semei, na' Semein' naque' xi'in José, na' Josén' naque' xi'in Judá. ²⁷ Na' Judán' naque' xi'in Joana, na' Joanan' naque' xi'in Resa, na' Resan' naque' xi'in Zorobabel, na' Zorobabelen' naque' xi'in Salatiel, na' Salatielen' naque' xi'in Neri, ²⁸ na' Nerin' naque' xi'in Melqui, na' Melquin' naque' xi'in Adi, na' Adin' naque' xi'in Cosam, na' Cosanna' naque' xi'in Elmodam, na' Elmodanna' naque' xi'in Er. ²⁹ Na' Era' naque' xi'in Josué, na' Josuéén' naque' xi'in Eliezer, na' Eliezeren' naque' xi'in Jorim, na' Jorinna' naque' xi'in Matat. ³⁰ Na' Mataten' naque' xi'in Leví, na' Levín' naque' xi'in Simeón, na' Simeóna' naque' xi'in Judá, na' Judán' naque' xi'in José, na' Josén' naque' xi'in Jonán, na' Jonánna' naque' xi'in Eliaquim. ³¹ Na' Eliaquinna' naque' xi'in Melea, na' Melean' naque' xi'in Mainán, na' Mainánna' naque' xi'in Matata, na' Matatan' naque' xi'in Natán. ³² Na' Natánna' naque' xi'in David, na' Davida' naque' xi'in Isaí, na' Isaín' naque' xi'in Obed, na' Obeda' naque' xi'in Booz, na' Boozen' naque' xi'in Salmón, na' Salmónna' naque' xi'in Naasón. ³³ Na' Naasónna' naque' xi'in Aminadab, na' Aminadaba' naque' xi'in Aram, na' Aranna' naque' xi'in Esrom, na' Esronna' naque' xi'in Fares. Na' Faresen' naque' xi'in Judá, ³⁴ na' Judán' naque' xi'in Jacob, na' Jacoben' naque' xi'in Isaac, na' Isaaquen' naque' xi'in Abraham, na' Abrahanna' naque' xi'in Taré, na' Tarén' naque' xi'in Nacor. ³⁵ Na' Nacoren' naque' xi'in Serug, na' Seruga' naque' xi'in Ragau, na' Ragaun' naque' xi'in Peleg, na' Peleguen' naque' xi'in Heber. Na' Heberen' naque' xi'in Sala, ³⁶ na' Salan' naque' xi'in Cainán, na' Cainánna' naque' xi'in Arfaxad, na' Arfaxaden' naque' xi'in Sem, na' Senna' naque' xi'in Noé, na' Noén' naque' xi'in Lamec. ³⁷ Na' Lamequen' naque' xi'in Matusalén, na' Matusalénna' naque' xi'in Enoc, na' Enoca' naque' xi'in Jared, na' Jareden' naque' xi'in Mahalaleel. Na' Mahalaleela' naque' xi'in Cainán, ³⁸ na' Cainánna' naque' xi'in Enós, na' Enósen' naque' xi'in Set, na' Seta' naque' xi'in Adán, na' Adánna' naque' xi'in Dios.

4

Satanásén' goclažen' co'oyelan' Jesúsén' cont gone' da' mal

(Mt. 4:1-11; Mr. 1:12-13)

¹ Na' Spiritw che Diosen' gwnabian' yichjlaždao' Jesúsén'. Na' Jesúsén' beze'e cho'a yegw Jordán, na' Spiritua' benen cont gwyeje' latje daš. ² Čhoa ža gwzoe' latje dašen' na' lao čhoa žan' bicze bi gwdagüe'. Na' cate' gwde čhoa žan' gwdone'. Na' Satanás dan' chnabia' da' xigüe' ca' goclažen' co'oyelan' le' cont gone' da' mal. ³ Nach gož Satanásén' le':

—Še le' naco' Xi'in Dios, gož yej nga yeyaquen yetextil.

⁴ Na' gož Jesúsen' len:

—Nyojcz Xtiža' Dios' žan: “Gague yela' guagw na'zen' chyažje chio' benach cont gac bancho, san lecze chyažjecho yogo'lol diža' dan' ža Diosen'.”

⁵ Na' gwche' Satanásen' le' to lo ya'a sibe na' bedao'nez blo'en le' yogo'lol nación da' zjachi' yežlio. ⁶⁻⁷ Nach gožen le':

—Doxen yela' gwnabia' da' de yežlio nga naquen lo na' cont gwnežjuan' con no che'nda'. Še le' gwzoa xibo' gonxeno' neda', nach goṇa' le' yela' gwnabia' che nación ca' zjachi' yežlio nga na' len yela' zaca' yela' xdan che nación ca'.

⁸ Nach Jesúsen' gože' Satanásen':

—Becuas ca'ale Satanás. Nyojcz Xtiža' Diosen' žan: “Cheyala' šejnilaže'cho Xancho Diosen' na' toz le' gonxencho.”

⁹ Nach Satanásen' gozche'en le' ciuda Jerusalén. Na' bcuen le' yichjo' yodao' blao gan' nac la'zelagüe sibe, na' gožen le':

—Še len' naco' dogualje Xi'in Dios, nga boslažo' cuino', ¹⁰ le' nyojcz Xtiža' Diosen', žan:

Sela' Diosen' bene' ca' zjanac angl che' yesaclene' le' na' yesape' le',

¹¹ yesoxe' le' cont bi chego' no yej.

¹² Nach Jesúsen' gožen':

—Lecz ca' nyoj Xtiža' Diosen' žan: “Bitw goncho Xancho Diosen' prueba še lede' can' žen'.”

¹³ Beyož gota'bia' bi gwzoe Satanásen' co'oyelan' Jesúsen' gone' da' mal, nach becuasen šlož len le'.

Jesúsen' gwzologüe' chyixjue'ede' diža' güen che Diosen' distritw Galilea (Mt. 4:12-17; Mr. 1:14-15)

¹⁴ Nach Jesúsen' beyeje' distritw Galilea, na' yela' guac che Spiritw che Diosen' gwzoan len le'. Na' yogo'lol bene' že' yež ca' zjachi' doxen Galilea gosenezde' che Jesúsen'. ¹⁵ Na' Jesúsen' bseḏ blo'ede' legaque' lo' yodao' chegaquen', na' yogo'lol bene' ca' gosonxene' le'.

Bežin Jesúsen' Nazaret (Mt. 13:53-58; Mr. 6:1-6)

¹⁶ Na' bežin Jesúsen' yež Nazaret gan' gwcha'ogüe', na' gwyo'e yodao' ža che Dios can' ba yolagüe' chone', na' gwzechede' cont gwlabē'. ¹⁷ Na' ben' yo'o lo ne'e yodao'na' bnežjue'ne' yiš da' ndobe gan' nyoj dan' bzoj da' Isaías ben' be' Xtiža' Diosen' cani'te. Na' Jesúsen' bzaše' yišen' na' beželde' ga nyojen žan:

¹⁸ Zoa Spiritw che Dios' len neda',

na' Diosen' gwleje' neda' zedeya' diža' güen len bene' yaše'.

Na' gwsele' neda' zedeyena' cont yesyeyaclaže' bene' ca' chesacyaše'de'.

Na' za'a cont gwsana' bene' ca' zjade ližya.

Na' zedeyena' cont yesyele'e bene' lchol.

Na' bene' chy chzaca', zedeyena' cont noch no yosochi yososaque' legaque'.

¹⁹ Na' zedetixjue'eda' ba bžin ža gaclen Diosen' benachen'.

²⁰ Jesúsen' botobe' yišen' na' bonežjuen' ben' yo'o lo ne'e yodaon' na' gwchi'e. Na' yogo' bene' ca' nita' yodaon' la' gosenat'ie' le'. ²¹ Nach gwzolao be'e diža' gwne':

—Ža na'aža ba chac can' ža Xtiža' Diosen' dan' ba benele nga.

²² Na' yogo' bene' ca' gosende' diža' dan' be'e besyebande' catec mba nac xtiža' Jesúsen'. Na' gosenie' güen che' na' gose' lježe':

—¿Gague bengaxi'in Josén'?

²³ Nach gož Jesúsen' legaque':

—Ye'ljale neda' can' ža diža' dan' de: “Beñe' güen rmed le', beyon cuino'.” Na' lecz ye'ljale neda': “Dan' chesene' beno' yež Capernaum da' bebane beñe', lecz can' cheyala' gono' lažcho nga.”

²⁴ Nach goze'e legaque':

—Da' li chnia' le'e, beñe' gualaž che note'teze beñe' choe' xtiža' Diosen' bitw chesezi'e che'. ²⁵ Ca tiemp che da' Elías ben' be' xtiža' Diosen' cani', bibi yejw goc šon iz yo gašje na' goc gwbin juisyw chegaque' doxen gan' zelao mbane Israel. Naquen da' li gwnita' zan no'ol güezebe yež ca' gan' mbane Israel ca tiempa', ²⁶ perw Diosen' bi gwsele' Elíasen' cont gaclene' ne to beñe' güezeb ca'. Gwsele' le' yeto yež yoble gan' nzi' Sarepta gan' mbane ciuda Sidón cont goclene' to no'ol güezebe. ²⁷ Na' lecz ca' tiemp che da' Eliseo ben' be' xtiža' Diosen' cani', gwnita' zan beñe' Israel beñe' gosacšene len yižgüe' da' nzi' lepra. Ne to legaque' bi beyon Eliseon'. Toz beñe' zito' beñe' Siria, ben' le' Naamán, beyon Eliseon'.

²⁸ Na' yogo' beñe' ca' že' yodao'na' cate' gosende' dan' gwna Jesúsen' beseža'achgüe'. ²⁹ Na' la' besyezoža'te' na' besyebeje' Jesúsen' yežen', na' goseche'ene' to lo ya'a da' zoa gala'ze, gosaclačže' yososlačoe'ne' lo ya'a na'ate, ³⁰ perw bibi goc yesonde' le'. Con beza' Jesúsen' bedie' gachol gaque'.

Jesúsen' bebeje' da' xigüe' dan' yo'o yichjlaždao' beñe'

(Mr. 1:21-28)

³¹ Na' jasoe' yež Capernaum gan' mbane Galilean', na' ža che Dios bsd blo'ede' beñe' ca' že' lo' yodao'na'. ³² Na' beñe' ca' besyebande' ca' nac dan' bsd blo'eden', le bzejni'ide' cacze to beñe' nezde' cayanen' nac xbab che Diosen'.

³³ Lo' yodao'na' gwzoa to beñe' yo'o nyaze' da' xigüen'. Na' bosye'e gwne':

³⁴ —¿Bixchen' chgoša' chlaže' chio' len neto', Jesús beñe' Nazaret? ¿Zedežiayo'o neto'? Neda' nombi'a le' na' nezda' naco' beñe' laždao' xilaže' juisyw ben' gwseła' Diosen'.

³⁵ Nach Jesúsen' gwdile' da' xigüen' na' gožen':

—¡Ššago'! Bechoj yichjlaždao' benga.

Na' bchix da' xigüen' bena' gachol beñe' ca' že'na' nach bechojen. Perw bitw benen le' zi'. ³⁶ Na' leca besyebane yogo' beñe' ca', nach gose' lježe':

—¿Bixen' chac? ¿Bixe da' coben' chlo'e benga? Nachbia' nape' yela' chnabia' na' yela' guac, le chone' mandadw na' la' chechojte da' xigüe' da' yo'o nyaz beñe'.

³⁷ Na' ca' nac dan' ben Jesúsen' gos gwlałje dižan' doxen lagüe yež ca' zjachi' do na'.

Jesúsen' beyone' taobi'in che Simónna'

(Mt. 8:14-15; Mr. 1:29-31)

³⁸ Na' cate' beze'e yodao'na', na' gwyeje' liž Simón. Na' taobi'in che Simónna' chacšende', yo'e da' la. Na' bosol güiže' Jesúsen' cont yeyone' le'. ³⁹ Na' Jesúsen' gwzeche' cuite' gan' die', na' bcheque' gwdile' da' lan' cont bechojen. Nach taobi'in che Simónna' la' gwyastie' na' bsini'e da' gose'ej gosagüe'.

Jesúsen' beyone' beñe' zan

(Mt. 8:16-17; Mr. 1:32-34)

⁴⁰ Na' cate' ba chxoa gwbižen' goseche'e con yogo' beñe' chese'e yižgüe' jasesane' legaque' lao Jesúsna'. Na' Jesúsen' gwxo'a ne'e yichj to toe' na' beyone' legaque'. ⁴¹ Na' lecz ca' bebej Jesúsen' da' xigüe' da' yo'o yichjlaždao' beñe' zan. Na' besyechojen gosenen ziže, gosenan:

—Le' naco' Xi'in Dios.

Na' Jesúsen' gwdile' legaquen na' bitw be'e latje bi yesenan, le gosenezen naque' Cristo ben' gwlej Diosen' cont yedenabi'e.

*Jesúsna' gwde' doxen Galilean' bsed blo'ede'
(Mr. 1:35-39)*

⁴² Na' beteyo cate' gwye'ni', beze'e na' beyeje' to latje ga nono nla'. Na' bene' ca' besyeyiljue'ne' na' ja'aque' gan' zoen'. Na' gosaclaže' yosozague' Jesúsen' cont bi yeze'e. ⁴³ Na' Jesúsen' gože' legaque':

—Lecz ca' bene' ca' nita' yež yoble cheyala' šjalo'eda'ne' cont yosozenague' che Diosen' na' nabi'e yichjlažda'ogaque'. Diosen' gwsele' neda' cont šjatixjue'eda' legaque' xtižen'.

⁴⁴ Ca' goquen', Jesúsen' gwde' to to yež che distritw Galilea na' bsed blo'ede' bene' ca' lo' yodao' čhegaquen'.

5

*Gosezene' be zan bel'ya'a
(Mt. 4:18-22; Mr. 1:16-20)*

¹ Na' šlac zecha Jesúsen' cho'a nisdao' da'na' nzi' Genesaret, besežag bene' zan na' bosochite' Jesúsen' da' gosaclaže' yosozenague' xtiža' Diosen' dan' bi'e cho'a nisdaon'. ² Na' Jesúsen' ble'ede' čhope barcw dao' cho'a nisdaon'. Na' bene' gwxcen bel' ca' ba besyežaše' lo' barcon' ba chesyeyibe' yixjw bel' čhegaquen'. ³ Na' Jesúsen' gwyo'e lo' barcw che Simónna' na' gwnabde' le' bosožigue' barcon' yelate' lo' nisen'. Na' Jesúsen' gwchi'e lo' barcon' blo'ede' bene' ca' že'na'. ⁴ Cate' beyož bi'e dižan' na' gože' Simónna':

—Le gwžiga'ch barcon' yelate' gan' nac sitjw, na' le gwzala' yixjw chelen' na' senle belen'.

⁵ Nach Simónna' gože' Jesúsen':

—Maestrw, ba bento' žin do yel na' ne to nono bdola'. Perw le' ba gwnao' yezolaoto', na' gwzala'to' yixjw ca' da' yoble.

⁶ Na' beyož bosozala' yixjw čhegaquen' zjanyicoco'ten belen', yeleze ca' yesyecheza'ten. ⁷ Na' bene' ca' zjanita' lo' barcw che Simónna' gosone' señw gosaxe' bene' lježen' že' yeto lo' barcw yoble cont yesaclene' legaque' yesyebje' yixjon'. Yelez ca' gwdebe nisen' chopte barcw ca' dan' gosegüe'e bel' zan lo'enna'. ⁸ Nach Simónna', ben' lecz le' Pedro, cate' ble'ede' da'na' goquen' na' bzoa xibe' lao Jesúsen' gože' le':

—Xana', neda' naca' to bene' mal, bibi zaca' par so' nga len neda'.

⁹ Gwne' ca' le le' txen len bene' lježe' ca' že' lo' barcon' besyebanchgüede' da' gosezene' bel' zanna'. ¹⁰ Lecz ca' besyebane xi'in ben' le Zebedeo, zjanac čhop biše'tie', Jacobo len Juan. Bene' ca' chesone' žin len Simónna'. Nach Jesúsen' gože' Simónna':

—Bitw žebo'. Le' naco' bene' gwxcen bel', na' chebejo' belen' lo' nisen'; perw na'a gona' cont gaxle bene' yesyechoje' lo' da' malen'.

¹¹ Na' cate' besyežinlene' barcon' yo biž, nach gosebejyichje' barcon' len yogo' xšinlaže' ca' na' ja'aclene' Jesúsen'.

*Jesúsen' beyone' to bene' che'ede' yižgüe' dan' nzi' lepra
(Mt. 8:1-4; Mr. 1:40-45)*

¹² Na' šlac Jesúsen' zoe' to yež na' bžin to bene' che'ede' to yižgüe' dan' nzi' lepra. Na' bena' cate' ble'ede' Jesúsen', bzoa xibe' lagüe' na' boļ güiže'ne' gože'ne':

—Xana', še chaclažo', guac yeca'o yižgüe' dan' che'eda' nga.

¹³ Nach Jesúsen' bli ne'e na' gwxcen' yichje' na' gože' le':

—Chaclaža' yeyacdo'. Beyaque.

Nach la' bega'ate yižgüe' dan' che'eden'. ¹⁴ Nach Jesúsen' bene' mandadw gože' le' notno ye'e can' ba beyone' le'. Na' gože' le':

—Con gwyej jaṇa' bxoza' cont le'ede' baḥ beyacdo'. Na' bnežjo da' cheyala' gwnežjo' dan' non Moisésen' mandadw cont yeyaco' xilaže' len ley che Diosen'. Ben ca' cont yogo' bene' yesenezde' ba beyacdo'.

¹⁵ Na' tža tža gos gwłalje diža' ca' nac yela' guac dan' ben Jesúsen'. Na' besedob bene' zan cont bosozenague' xtiža' Jesúsen' na' cont beyone' legaque' len bite'teze yižgüe' da' chese'ede'. ¹⁶ Nach Jesúsen' bchoje' to ši'i güeje jal güiže' Diosen' to latje daš.

Jesúsen' beyone' to bene' bi chda šla'a ni'a ne'e

(Mt. 9:1-8; Mr. 2:1-12)

¹⁷ Nach to ža zoa Jesúsen' to yo'o gan' chsed chlo'ede' bene'. Na' gala'ze zjanita' zan bene' Israel bene' zjanzi' fariseo. Na' lecze zjachi' yeto cuen bene' ca' chososed chosolo'ede' dan' bzoj da' Moisés. Bene' ca' že'na' za'aque' yogo'lol yež ca' gan' mbane distritw Galilea len distritw Judea, na' lecze bale' za'aque' ciuda Jerusalén. Na' bosozenague' diža' da' be' Jesúsen'. Na' yela' guac che Xancho Diosen' zoan len Jesús'a na' beyone' bene' güe' ca'. ¹⁸ Na' besežin xonj bene' zjanlene' to bene' xinj, bene' bi chda šla'a ni'a ne'e, zjanxoe' le' to lo cam dao'. Na' gosaclaže' yesedie' šjasesane' le' lao Jesús'a'. ¹⁹ Na' da' že'chgua bene' zan bi goc latje yesedie' šjasesane' bene' güen' lao Jesúsen'. Nach bene' ca' gosepe' yichjo'ole gosesaljue' goseque'e tej na' beseletje'ne' len xcame'na' gachol bene' ca' že' lo' yo'ona' cont bžine' lao Jesúsen'. ²⁰ Cate' goche'e Jesúsen' gosejnilaže' le' na' gože' bene' güe'na':

—Xi'ina', ba bezi'xena' xtolon'.

²¹ Na' bene' ca' chososed chosolo'e dan' bzoj Moisés'a na' bene' fariseo ca' gosene':

—¿Non' chaque benga naque' chne' ca'? Chon cuine' ca' Dios. Le nono zoa bene' gac yezi'xene' xtoła' beṇaḥen'. Toz Diosen' gac yezi'xenen'.

²² Jesúsen' goche'ede' ca' nac da' cheseza'laže' na' gože' legaque':

—¿Bičhena' chza'laže'le ca' lo' yichjlažda'ole? ²³ Še yapa'ne': “Ba bezi'xena' xtolo'na'”, bi nezele še napa' yela' gwnabia' cont yezi'xena' xtole'na'. San še yapa'ne': “Gwyas na' gwda”, na' nachbia' še napa' yela' guac gac can' gwnian'.

²⁴ Na'ach gona' cont gacbe'ele napa' yela' gwnabia' cont yezi'xena' xtoła' beṇaḥ, neda' naca' bena' gwseła' Diosen' golja' beṇaḥ.

Nach gože' bene' xinja':

—Chapa' le' beyas, beyoa' xcamon', na' beyej ližo'.

²⁵ Nach la' beyaste bene' xinja', cheseṇa'te bene' ca' nita'na'. Nach beyoa' xcamen' na' beze'e zjayda liže' chonxene' Diosen'. ²⁶ Na' yogo'lol bene' ca' že'na' besyebande' yela' guac che Jesúsen' dan' bene'na'. Nach gosonxene' Diosen', na' do chesežebe' gose' lježe':

—Da' yebanecho da' ca' ba ble'echo ṇa'aža.

Jesúsen' gwleje' Leví cont goque' le' txen

(Mt. 9:9-13; Mr. 2:13-17)

²⁷ Gwdena' beza' Jesúsen' na' ble'ede' to bene' güeḥixjw bene' le' Leví, chi'e latje gan' chḥixjue'. Na' Jesúsen' gože' le':

—Da len neda'.

²⁸ Nach gwzoža' Levín' gwlejyichje' yogo' xšinlaže' na' gwyejlene' Jesúsen'.

²⁹ Nach Levína' bene' to lni xen ližen' par Jesúsen', na' ja'ac bene' zan bene' güeḥixjw ca' na' bene' yezica'chle na' gosebe'lene' le' cho'a mesen' gosagüe'.

³⁰ Na' bene' ca' chososed chosolo'ede' dan' bzoj Moisésen' na' len bene' fariseo ca' gosacyožlene' bene' ca' zjanaque' Jesúsen' txen, gose'e legaque':

—¿Nacxechen' che'ej chagwle txen len bene' güechixjw na' yebale bene' güen da' xinj ca'?

³¹ Jesús'en' gože' legaque':

—Bene' cbi chesacšene bitw cheseyažjde' bene' güen rmed. Bene' ca' chesacšene, legaquen' cheseyažjde' bene' güen rmed. ³² Gague bene' ba zjanaque' bene' güen len Diosen' zedeneyoeda' cont yesyētinjde' xtolen', san bene' güen da' xinj. Legaque' zjanaque' ca bene' cheseyažjde' bene' güen rmed.

Gosenabde' Jesús'en' bixchen' cbi gwleje' tgüeje ža gwbas
(Mt. 9:14-17; Mr. 2:18-22)

³³ Nach bal bene' gose'e le':

—Bene' ca' zjanaque' txen len Juan na' bene' zjanaque' txen len bene' fariseo ca' chesonchgüe' gwbas chosol güiže' Diosen'. Perw na' bene' ca' zjanaque' le' txen chese'ej chesagüe'. ¿Bixchen'?

³⁴ Nach gož Jesús'en' legaque':

—¿Guac yesezoa gwbas bene' chaxe' to ga chac yela' güešagna' šlac ben' bšagnan' zolene' legaque'? Bi gac. ³⁵ Perw žin ža cate' bich soe' len legaque', cana'ch yesone' gwbas. Na' ca'cze naquen len neda' na' len bene' ca' zjanaque' neda' txen.

³⁶ Na' Jesús'en' be'e jempl nga bzejni'ide' legaque':

—Notno zoa bene' cheza' xe' da' cobe na' yode'en de'exo'. Še gone' ca' gwžiaje'e xe' da' coben' na' xe' de'exon' bitw gac leben len lache' coben'. ³⁷ Na' neca zoa bene' chgue'e vino cobe lo' bzod yide'exo', le vino coben' chšon' yide'exon' na' lalje vino na' yesebiayi' chopen. ³⁸ Cheyala' yesegue'e vino coben' lo' yid cobe cont bibi gaquen. ³⁹ Na' ca' nac bene' bach yolagüe' che'eje' vino golen', bitw ye'nde' ye'eje' vino coben', san že': "Vino golen' nacchen güen."

6

Bene' ca' zjanaque' Jesús'en' txen goselechje' trigon' gosagüen' ža che Dios
(Mt. 12:1-8; Mr. 2:23-28)

¹ Na' to ža nac ža che Dios, Jesús'en' gwdie' gan' nyaž trigw len bene' ca' zjanaque' le' txen. Nach bene' ca' zjanaque' le' txen goselechje' trigon' na' gosexoben' gosagüen'. ² Na' besele'e bal bene' fariseon' can' gosone' na' gose'e legaque':

—¿Bichen' chonle da' bi de lsens goncho ža che Dios?

³ Na' Jesús'en' gože' legaque':

—¿Bina' gwlable can' ben da' rey David to ža cate' le' na' bene' lježe' ca' gosedone'? ⁴ Gwyo'o Davin' liž Dios na' jaxi'e yetextil da' nac che Dios da' bi chac gagw bene' bi nac bxoz, na' gwdagüen', na' lecze bnežjue' che bene' zja'ac len le'.

⁵ Na' lecz ca' gwna Jesús'en':

—Naquen lo' na' nia' bi da' nac güen goncho cate' nac ža che Dios, neda' naca' ben' gwsela' Diosen' golja' benach.

Beyac to bene' nxo'on šla'a taque'
(Mt. 12:9-14; Mr. 3:1-6)

⁶ Na' yeto ža che Dios gozeje' lo' yodaon' na' bsd blo'ede' bene' ca' že'na'. Na' ladjo bene' ca' zjaže'na' yo'o to bene' nxo'on taque' licha. ⁷ Na' bene' ca' chososed chosolo'e dan' bzoj da' Moisés na' bene' fariseo ca' chosogüia chesene'e Jesús'en' še yeyone' bena' ža che Dios cont de da' yosode'ede'

yesagüe' xya che'. ⁸ Na' gocbe'e Jesús'en' can' chesone' xbaben', na' gože' ben' n̄xo'on taque':

—Gwzoža' na' gwzecha nga gachol.

Nach bena' bžine' gwzeche' lagüen'. ⁹ Na' Jesús'en' gože' bene' ca' že'na':

—¿Bi da' cheyala' goncho ža che Dios? ¿Goncho da' güen, še goncho da' mal? ¿Cheyala' yoslacho bene', še gwžiyi' chone'?

¹⁰ Jesús'en' gwne'e yogo'te ben' že'na', nach gože' ben' n̄xo'on taque':

—Bli naon'.

Nach blien' na' taquen' beyaquen binlo. ¹¹ Na' bene' ca' chososed chosolo'e leyna' na' len bene' fariseon' leca beseže'e na' gwzolao bosoxi'e nacle yesone' len Jesús'en'.

Jesús'en' gwleje' šižinw postlw

(Mt. 10:1-4; Mr. 3:13-19)

¹² Na' to ža gwyej Jesús'en' to lo ya'a jel güiže' Diosen'. Na' do yel be'lene' Diosen' diža'. ¹³ Na' cate' gwye'ni', goxe' bene' ca' zjanaque' le' txen, nach gwleje' šižinue' na' bsi'e legaque' postlw. ¹⁴ Bene' qui gwleje': Simón ben' bsi'e Pedro, na' bene' biše' Andrés, na' Jacobo, na' Juan, na' Felipe, na' Bartolomé, ¹⁵ na' Mateo, na' Tomás, na' Jacobo xi'in Alfeo, na' Simón ben' nac cananista, ¹⁶ na' Judas bene' biše' Jacobo, nach Judas Iscariote ben' bdie' Jesús'en' lo na' bene' chesegue'ede' le'.

Jesús'en' bzejni'ide' bene' zan

(Mt. 4:23-25)

¹⁷ Na' beyetje' lo ya'an len legaque' na' gwzeche' ga nac to laše' len bene' ca' zjanaque' le' txen. Na' lecze nita' bene' zan bene' za'ac doxen Judean', do ciuda Jerusalénna' na' do gan' mbane yež ca' zjanzi' Tiro na' Sidón. Na' Tiro len Sidón zjachin' cho'a nisdao'. Na' len bene' ca' nita' chosozenague' xtiža' Jesús'en' zjančixe bal bene' chese'e yižgüe'. Na' Jesús'en' beyone' legaque'. ¹⁸ Na' bene' ca' zjajo'o zjanyaz da' xigüen' yichjlažda'ogaque', Jesús'en' bebejen'. ¹⁹ Na' yogo' bene' goseyiljue' nacle yesone' cont yeselapa' na'gaquen' le', le gosenezde' nape' yela' guac cont yega'a yižgüe' čhegaquen' še yesechele'ne'.

Non' zoa mbalaz na' non' cbi zoa mbalaz

(Mt. 5:1-12)

²⁰ Na' Jesús'en' gwlis lagüe' gwne'e bene' ca' zjanaque' le' txen na' gože' legaque':

—Mbalaz zoa le'e bene' yaše', le'e chzenagle che Diosen' cont chnabi'e yichjlažda'olen'.

²¹ 'Mbalaz zoa le'e chdonle na'a, gwžin ža cate' bich tonle.

'Na' mbalaz zoa le'e chbežle na'a, gwžin ža cate' gwxižle.

²² 'Neda' naca' ben' gwsela' Diosen' golja' benač. Na' mbalaz soale še dan' chejnlaže'le neda' chesegue'e bene' le'e, na' chesyebeje' le'e lo' yodao' čhegaque', na' chesene'e chele, na' chesene' nacle bene' mal. ²³ Le yebechgüe cate' chac da' quinga, na' le soa mbalaz, le Diosen' gone' cont gacchgua da' güen chele cate' yežinle gan' zoe'na'. Can' chesonde' le'e, ca'czen' goson da' xozxta'ogaque' len da' bene' ca' goso'e xtiža' Diosen' cani'.

²⁴ 'Na' nyaše'chguaze nac le'e bene' gwni'a. Chac güen chele na'a, perw gague toli tocanen' gac chele ca'.

²⁵ 'Nyaše'chguaze nac le'e dechgua da' chagwle na'a. Gwžin ža cate' bich bi gata' chele.

'Nyaše'chguaze nac le'e chxižle na'a. Gwžin ža cate' yegüine'le na' cuežyaše'le.

26 'Nyaše'chguaze nac le'e chesonxen yogo'loł bene' le'e. Ca'czen' goson da' xozxta'ogaque', gosonxene' bene' ca' goseziye'e gosene' cheso'e xtiža' Diosen' cani'.

Cheyała' gaquecho bene' chesegue'ede' chio'
(Mt. 5:38-48; 7:12)

27 'Le'e chzenagle chia', cheyała' gaquele bene' chesegue'ede' le'e. Cheyała' gonle da' güen len bene' ca' chesegue'ede' le'e. 28 Le nab cont bene' chesegue'ede' le'e nite' mbalaz. Le soa le nabe Diosen' gaclene' bene' chososaca'zi' le'e. 29 Še to bene' chaze' šla'a xaga'le, le güe' dan' yešla'a. Še to bene' que'e xadon chele, le güe' latje lechje' len xcamisle. 30 Note'teze bene' bi dan' nabde' le'e, le gwnežjon. Še to bene' que'e bite'teze da' de chele, bitw yenablen. 31 Con yogo' da' güen da' chaclaže'le yeson benachen' len le'e, lecze ca' cheyała' gonle len legaque'.

32 'Še chaquele šinze bene' chacde' le'e na' bi chaquele bene' yoble, ¿bixchen' chaquele chebe Diosen' can' chonle? Ca'cze cheson bene' güen da' mal ca'. 33 Lecze še chonle da' güen len bene' ca' cheson da' güen len le'e na' bi chonle güen len bene' yoble, ¿bixchen' chaquele chebe Diosen' can' chonle? Ca'cze cheson bene' güen da' mal ca'. 34 Še chbejle bi da' chbejle len bene' chaquele yesyeyonen' le'e, ¿bixchen' chaquele chebe Diosen' can' chonle? Ca'cze cheson bene' güen da' mal ca', chesebeje' bi dan' chesebej lježgaque', na' nite' lez yosyonežjuen'. 35 Perw na' le'e, le soa le gaque bene' chesegue'ede' le'e, na' le soa le gon da' güen. Na' le soa le cuej bi dan' cuejle, perw bitw soale lez yesyeyonen'. Še gonle ca' dan' ba gwnia' le'e, gwlo'ele nacle xi'in Dios ben' nac la'zelagüe bene' blao, na' Diosen' güebi'icze' güen len le'e. Le'na' naque' bene' šagüe' len bene' ca' bi cheso'e yela' choxcen che' na' len yezica'chle bene' güen da' mal ca'. 36 Na' ca' Xacho Diosen' ben' zoa yaba cheyaše' cheži'ilaže'de' yogo' benachen', ca'cze cheyała' yeyaše' yeži'ilaže'le ljež benachen'.

Bitw zaca'cho nacho bene' zjanape' dola'
(Mt. 7:1-5)

37 'Bitw gonle xbab zaca'le nale bene' zjanape' dola'. Še nale che bene' zjanape' dola', ca'cze Diosen' ne' le'e naple dola'. Na' bibi yosbaga'le bene' cont Diosen' bibi yosbague'de' le'e. Le soa le yezi'xen che bene' cont Diosen' yezi'xene' chele. 38 Le soa le gwnežjo bi da' gwnežjwle bene' na' Diosen' güeyoncze' chele. Bał bene' leca nala' chosochixe' bi dan' chesote', chosochiše' lao yagarm chegaquen' na' chesebiben' na' chosozaaya'aten'. Ca'czen' cheyała' gonle gwnežjwle bi dan' cheseyažje bene' na' lecz ca' gon Diosen' len le'e.

39 Nach Jesúsen' be'lene' bene' že'na' to jempl, gwne':

—¿Guaque to bene' lchol cue'e nez yeto bene' lchol? Bi gac. Le nezecho chopte' šjasebixe' to lo' yechw. 40 Ca' nac cate' to bene' chsede' len to maestrw, bi nacho naque' bene' blaoch ca' maestroa'. Na' la'czla' še ben' chseda' gwda' yichje' yogo'loł dan' blo'e maestron' le', bitw naque' bene' sina'ch ca' maestroa'.

41 '¿Bixchen' chna'le beb dao' dan' yo'o lo' yejlao bene' lježle, na' bi chache'ele naquech beb xen dan' yo'o lo' yejlaolen'? 42 Na' še le'e yo'o to da' xen lo' yejlaolen' ¿nacxechen' che'le bene' lježlen': "Ben yebeja' beb dao' dan' yo'o lo' yejlaguon'?" ¿Bene' güexoayag! Zgua'tec le yebej beb xen dan' yo'o lo' yejlaolen', nach le'ele binlo cont yebejle dan' yo'o lo' yejlao bene' lježle.

Dan' choncho chlo'en bin' yo'o lo' yichjlažda'ochon'
(Mt. 7:17-20; 12:34-35)

⁴³ 'Bitw nacho to yag frut güen chbian frut da' bi nac güen, na' neca nacho dan' bi nac güen chbian da' nac güen. ⁴⁴ Con can' nac da' chbia to to yaguen' nezecho bi yaga'. Yag yeše' bitw chbian da'na' nzi' yixgüigw. Lecz ca' yag bisga'a bi chbian uvas. ⁴⁵ To bene' laždao' ži'ilaže' chone' da' güen, le ca' ža lo' yichjlažda'ogüe' nan' chone'. Na' ben' chon da' mal, chone' ca' lagüe dan' chzenague' che laždao' xi'a che'na'. Na' yogo'te diža' dan' chchoj cho'achon', lo' yichjlažda'ocho nan' za'aquen.

Chope bene' na' yo'o da' chon to toe'

(Mt. 7:24-27)

⁴⁶ '¿Bichen' che'le neda': "Xana", na' bi chonle can' nona' mandadw? ⁴⁷ Na'a nia' nac zaca'lebe bene' nao' neda' na' chzenague' xtiža' na' chone' can' nona' mandadw. ⁴⁸ Naque' ca to bene' ben yo'o na' gwche'ene' sitjw gwleque' lene yo'on da' nac da' gual. Cate' betjchgua yegw gwyechjen liže'na', na' bitw bebixen cuiayin', le gwzoachachchguan. ⁴⁹ Na' yogo' bene' chende' xtiža'na' na' bi chone' can' žia'na' naque' ca yeto bene' ben yo'o, con benen' lo' yo na'ze na' bibi lenen gwleque'. Na' cate' betjchgua yegw gwyechjen liže'na', na' bebixen gwžiai'te yo'on.

7

Jesúsen' beyone' xmos to xan soldadw

(Mt. 8:5-13)

¹ Na' cate' beyož be' Jesúsen' diža' len bene' ca', beyeje' yež Capernaum. ² Na' zoa to xan soldadw bene' bitw naque' bene' Israel. Na' zoa to xmose' chacšenchgüede', na' yelez ba de' par gate'. Na' xan soldadon' chacchgüede' le'. ³ Na' cate' xan soldadon' bende' diža' che Jesúsen', gwsele' bal bene' gole blao che bene' Israel cont jasenabde' Jesúsen' šeje' liže' yeyone' xmose'. ⁴ Nach cate' besežine' gan' zoa Jesúsen', gosenabde' le' gaclene' xan soldadon'. Na' gose'e Jesúsen':

—Xan soldadon' naque' to bene' zaque' gacleno', ⁵ le chacde' chio' bene' Israel, na' le' bene' yodao' cheto' nga len xmechue'.

⁶ Nach gwyej Jesúsen' len legaque', perw za' yesežine' liže'na' cate' gwsela' xan soldadon' bal bene' migw che' lao Jesúsen' na' gose'ene':

—Xan soldadon' že' bitw gwša'a yichjo' yido' liže'na', le neзде' bitw zaque' cont šo' liže'na'. ⁷ Da'nan' bitw beyaxjde' yide' nabde' le' gacleno'ne'. Con che'nde' gonšco' mandadw yeyaque' xmose'na'. ⁸ Xan soldadon' že' zoa bene' chnabia' le' perw lecze nita' soldadw che' na' chnabi'e legaque'. Na' cate' che'e toe': "Gwyej", na' cheje', na' cate' che'e yetoe': "Da", na' chide', na' cate' che'e xmosen': "Da' nga gono", na' chonen'. Na' neзде' con nao' yeyac xmose'na' na' yeyacde'.

⁹ Na' Jesúsen' cate' bende' diža' dan' gose' bene' migw che' xan soldadon' le', bebande' na' beyechje' gože' bene' zan ca' zjanao' le':

—Žia' le'e ne toze bene' Israel biņa' šejnilaže' neda' ca chejnlaže' benga bi naque' bene' Israel.

¹⁰ Nach jaya'ac bene' ca' gwsela' xan soldadon'. Cate' besyežine' liže'na' ba beyaque' xmosen'.

Jesúsen' bosbane' xi'in to no'ole güezebe

¹¹ Jesúsen' gwyeye' to yež dan' nzi' Naín len bene' ca' zjanaque' le' txen na' zan bene' yoble. ¹² Ba zja'aque' gala'ze par yesežine' cho'a puert che yežna' cate' besele'ede' chesechoj xonj bene' cho'a puerten' zjanlene' to bene' guat. Na' ben' goten' naque' bene' tliša', na' xne'en naque' no'ole güezebe. Na' bene'

zan bene' lo yeža' zja'aclene' xna' bene' guaten'. ¹³ Na' cate' ble'e Xanchon' no'olen', beyaše'de' le' na' gože'ne':

—Bitw cuežo'.

¹⁴ Nach gwyeje' jaxoa ne'en lo yagla' gan' xoa bene' guata'. Nach bene' ca' zjanlen le' gosebeze'. Na' gože' bene' guata':

—Bene' güego', neda' žia', beyas.

¹⁵ Nach bene' guaten' gwchi'e na' gwzologüe' beñie'. Na' Jesús'en' beyone' le' lo na' xne'e. ¹⁶ Na' yogo'lol bene' ca' besežebe' dan' beban bene' guata' nach gosonxene' Diosen' gosene':

—Ba bla' to bene' blao ga zoacho, bene' choe' xtiža' Diosen', na' Diosen' ba gwsele'ne' cont gaclene' chio' naccho nación che'.

¹⁷ Ca nac dan' ben Jesús'en' gos gwlalj diža' chen' doxen Judea na' yogo'lol yež ca' dan' zjanita' gala'ze.

Juanna' gwsele' chope ben' gosaque' le' txen gan' zoa Jesús'en'

(Mt. 11:2-19)

¹⁸ Nach bene' ca' zjanaque' txen len Juanna' jaseye'lene' le' diža' yogo'lol ca' nac dan' chon Jesús'en'. Nach gox Juanna' chope bene' ca' ¹⁹ nach gože' legaque':

—Le šja'ac gan' zoa Jesús'en' na' ye'lnē': “¿Len' naco' ben' chbezto' seļa' Diosen' o še cheyaļa' cuezchto' yid bene' yoble?”

²⁰ Nach bene' ca' chope cate' besežine' gan' zoa Jesús'en' gose'ene':

—Juan ben' chzoa bene' nis gwsele' neto' laguo' nga nabeto' le' še len' naco' ben' chbezto' seļa' Diosen' o še cuezchto' yid bene' yoble.

²¹ Šlacte ne' nita' chope bene' ca', Jesús'en' beyone' bene' zan bene' ca' chesacšene na' bene' chese'ede' yižgüe' gual. Lecze bebeje' da' xigüe' da' zjajo'o zjanyaz yichjlaždao' bene' zan. Na' bene' cont besyele'e zan bene' lchol. ²² Nach Jesús'en' boži'e xtiža' bene' ca' gwseļa' Juanna' lagüe'na', gože' legaque':

—Le šjaya'ac na' le šjayež Juanna' doxen da' ca' ba ble'ele na' da' ca' ba bene. Ba ble'ele chona' cont chesyete'e no bene' lchol, na' chesyeda no bene' zjanxinj ni'e. Na' lecze bene' gose'e yižgüe' dan' nzi' lepra besyeyacde', na' chesyeyene no bene' cuež. Ba ble'ele bosbana' no bene' guat, na' ba benele choa' diža' güen len bene' yaše' ca'. ²³ Mbalaz zoa bene' chejle'e chia' na' bi chdebde'.

²⁴ Na' cate' besyeya'ac bene' ca' gwseļa' Juanna', nach Jesús'en' be'lene' bene' ca' zjandoben' xtiža' Juanna', gože' legaque':

—¿Nacxe nac ben' jale'ele latje dašen'? ¿Šayichj šayen chaque'? Bi naque' ca'. ²⁵ ¿Nac naque' caten' jale'elne'? ¿Nyaze' lache' šagüe'? ¿še bitw? le bene' ca' zjanyaz lache' šagüe' na' chesenite' chese'ej chesagwšagüe' na' chesone' legr, bena' nita' yo'o güenchgua, ca no liž bene' gwnabia'. ²⁶ ¿Noxen' jale'ele? ¿Naque' to bene' choe' xtiža' Diosen'? Da' li naque' to bene' choe' xtiža' Dios, perw chnia' le'e, zaca'che' ca note'teze bene' choe' xtiža' Dios. ²⁷ Che benga nyojen le'e Xtiža' Diosen' žan:

Neda' Dios seļa' to bene' cuialogüe' laguo' güe'e xtižon' cont cate' yido' ba nita' bene' yesonxene' le'.

²⁸ Chnia' le'e, notech no benach na' soa bene' naquech bene' blaoch ca' Juanna'. Perw na' note'teze bene' gwzenague' che Diosen' cont Diosen' nabie' yichjlažda'ogüe', la'czla' bi naque' bene' blao, gwžin ža cate' šejni'ichde' chia' clel ca' Juanna'.

²⁹ Ba bzoa Juanna' bene' zan nis na' len bal bene' güechixjw. Na' yogo' bene' ca' gosacbe'ede' Diosen' zejcz'e' to licha dan' gwsele' Juanna' jatixjue'ede' legaque' yesyetenjde' xtoļa'gaque'. ³⁰ Perw na' bene' fariseo ca' na' bene'

ca' chososed chosolo'e dan' bzoj da' Moisés, goson yichjlaogaquen' cbi besyetinjde' xtolā'gaquen' can' goclaže' Diosen'. Bi gosaclaže' gwzōa Juanna' legaue' nis. ³¹ Nach Jesúsen' gože' legaue':

—¿No gwsaca'lebda' le'e zoale na'a? ¿No chon can' chonlen'? ³² Nacle ca bidao' neche bicze bi de chlebele. Can' zjanac bidao' ca', cate' nita'be' gan' chac ya'a chese' lježbe': "Ba bcuežto' bžejo, neca bya'ale, na' ba bilyaše'to', neca gwchežle." ³³ Juan ben' chzoa bene' nis bide' laole nga, bitw gü'e'ej gwdagwšagüe' can' chese'ej chesagw bene' yoble, na' neca gü'e'je' vino, nach gwnale che': "Yo'o nyaz da' xigüen' yichjlažda'ogüe'." ³⁴ Na' neda', chle'ele che'ej chagua' can' chese'ej chesagw bene' yoble, na' žale chia' naca' bene' lia na' bene' borrašw, neda' naca' ben' gwseła' Diosen' golja' benach. Na' lecze žale naca' migw che bene' güechixjw ca' na' migw che nochle bene' güen da' xinj. ³⁵ Perw na' bene' chosozenag che Diosen' zjanape' to yela' sina' na' chesone' cont nachbia' Diosa' naque' la'zelagüe' bene' sina'.

Jesúsen' gwyeye' liž Simón bene' fariseo

³⁶ To bene' fariseo goxe' Jesúsen' šeje' liže' cont yesagüe'. Na' bžin Jesúsen' liž bena' na' gwchi'e cho'a mesen'. ³⁷ Na' to no'ole lo ciudan', no'ole zle', gwneзде' bžin Jesúsen' liž bena'. Na' Jesúsen' len bene' ca' yezica'chle ba nite' cho'a mesen' cont yesagüe', cate' bžin no'olen'. Na' no'olen' noxe' to da' nac de yejese da' yože set da' la'zelaoze chla' zix. ³⁸ Na' jabigue' gała'ze xni'a Jesúsen' na' gwcheže' na' nis xchež chen' bžonen ni'a Jesúsen' gw bisen. Na' bxie' ni'ena' len yiša' yichje' na' bnopen' na' gwdeben' set zixen'. ³⁹ Na' ben' goxe' Jesúsen' ližen', cate' ble'ede' can' chon no'ola' na' gocde': "Šaca' bengā naque' to bene' choe' xtiža' Dios, guacbe'ede' no'olen' chgan ni'ena' naque' no'ole zle'". ⁴⁰ Nach Jesúsen' gože'ne':

—Simón, de to da' che'nda' yapa' le'.

Nach Simónna' gože' Jesúsen':

—Gwnan Maestrw.

⁴¹ Jesúsen' gože'ne':

—Gwzōa to bene' na' nita' chope bene' chesale' xmechue'. Toe' chale' gayo' gayo' mechw da' nzi' denario, na' ben' yeto chale' šiyon mechw lecze denario.

⁴² Na' chopte bene' ca' ne toe' ca' de chegaque' cont yesyeyixjue' xyan'. Na' ben' gwlej mechon' gwlejiychje' dan' chesale' chen'. Gwnašc neda', ¿noe' bene' ca' chope' gosacchde' che'?

⁴³ Nach Simónna' gože'ne':

—Šeca ben' goc xya chen' da' xench na' gwlejiychjen'.

Jesúsen' gože'ne':

—Da' li can' ba gwnao'na' naquen.

⁴⁴ Nach Jesúsen' gwyechje' gwne'e no'ola' na' gože' Simónna':

—¿Chle'edo' no'ole nga? Neda' ba gwyo'a ližo' nga na' bi beŋo' nis chib ni'a, perw no'ole nga ba gwdibe' ni'an' len nis xchež chen' bxien' len yiša' yichje'. ⁴⁵ Bi bnopo' neda', perw na' no'ole nga cate' bla'atia' gwzolagüe' chnopo' ni'a nga. ⁴⁶ Bi gwdebo' set yichja', perw no'ole nga ba gwdebe' set zix ni'a nga. ⁴⁷ Na' žia' le', xtole'na' gosaquen da' zan, perw ba bezi'xena' che'. Da'nan' chacchgüede' neda'. Bene' bi žinlaže' xtolen' ca' xtolā' no'ole nga, cate' yezi'xena' che' bitw gactecde' neda'.

⁴⁸ Nach gože' no'olen':

—Ba bezi'xena' xtolo'na'.

⁴⁹ Nach bene' ca' chesagw len Jesúsen' txen lo mesen' gwzolao chese' lježe':

—¿Nox bengā chacde' le'na' chezi'xene' xtolā' benachen'?

⁵⁰ Nach gož Jesúsen' no'ola':

—Dan' chejnilažo' neda' da'nana' ba de yela' mban chio' toli tocanē. Beyej to šagüe' to güen.

8

No'ol ca' gosaclene' Jesúsen'

¹ Na' gwdechle gwyej Jesúsasa' zan ciuda na' zan yež jatixjue'ede' diža' güen, gwne' Diosen' nabi'e yichjlaždao' bene' yosozenague' che'. Na' zja'aclen bene' šižinw ca' le', bene' ca' zjanzi' postlw. ² Nach to xonj no'ole lecze zja'aclene' Jesúsen' bene' ca' ba beyone'. Bale' ba bebeje' da' xigüe' da' zjajo'o zjanyaz lo' yichjlažda'ogaque' na' yebale' ba beyone'ne' cate' gosacšende'. Na' toe' lie' María bene' Magdala, bebej Jesúsen' gaže da' xigüe' gwyo'o gwyaz yichjlažda'ogüe'na'. ³ Nach lecze len ben' le Juana, xo'ole ben' le Chuza, na' Chuzan', gwyo'o lo ne'e liž rey Herodes na' yežlio che' ca'. Na' lecze len ben' le Susana gwyejlene' Jesúsen', na' yezan bene' yezica'chle. Na' no'ol ca' bosochine' bite'teze da' gota' chegaque' cont bosonežjue' dan' byažje Jesúsen' len bene' ca' zjanaque' le' txen.

Jempl che bene' goz trigon'

(Mt. 13:1-9; Mr. 4:1-9)

⁴ Na' bene' zan besežag gan' zoa Jesúsen' bene' za'ac to to yež ca'. Na' be'e to jempl, gwne':

⁵ —To bene' güen žin jeze' trigw na' šlac zeje' chose' trigon' late' biñ jasechazen do cho'a nezen', na' bosolej bososošj bene' len, na' be žia xil be chaš le'e yaba gosagwban'. ⁶ Yelaten' jasechazen ga nac lo yej, na' cate' beselan' na' gosebizen, le gague bi gopa' den'. ⁷ Yelaten' jasechazen ga nac lo yag yeše', na' gosecha'on txen, na' bosolole' yag yeše' ca' len. ⁸ Perw na' yelaten' jasechazen ga nac yo šagüe' na' beselan', na' balen gosebian to gayoa güeje.

Na' beyož be'e diža' quinga gwne' zižje gože' legaque':

—Le'e žia nagle da' chene, le gwzenag xtiža'na'.

Jesúsen' gwne' bixchen' bi'e jempl cate' bzejni'ide' bene'

(Mt. 13:10-17; Mr. 4:10-12)

⁹ Nach bene' ca' zjanaque' Jesúsen' txen gosenabde' le' bi zejen jempl da' ba bi'e. ¹⁰ Na' gož Jesúsen' legaque':

—Nono na' neze can' nac yela' gwnabia' che Diosen'. Perw ba chone' cont le'e chejnilaže'lene' nezelen. Perw bene' bi chesaclaže' yesejnilaže'ne', chzejni'igacda'ne' len jempl. Chona' ca' cont yesele'ede' can' chonan' na' bitw yesache'ede' bi zejen, na' cont yesende' xtižan' na' bi yesejni'iden'.

Jesúsen' bzejni'ide' bi zejen jempl che bene' goz trigon'

(Mt. 13:18-23; Mr. 4:13-20)

¹¹ 'Na' ca' nac jempl nga zejen quinga: Ca' dan' byažen zejen xtiža' Dios. ¹² Na' biñ dan' besego'onen chanezen', zejen bene' ca' chesende' xtiža' Diosen', perw na' chžin Satanás dan' chnabia' da' xigüe' ca' chebejen xtiža' Diosen' lo' yichjlažda'ogaque' cont bi yesejnilaže' le' na' bi gata' yela' mban chegaque' toli tocanē. ¹³ Na' biñ dan' besego'on ga nac lo yej zjanaquen ca' bene' chesyebede' xtiža' Diosen', perw zjanaque' ca' to da' bibi loe chon, šložga chesejle'e che xtiža' Diosen', na' cate' chac bi da' mal chegaque' la' chesebejyichjte' xtižen'. ¹⁴ Na' biñ dan' besego'onen ga nac lo yag yeše', zejen ca' bene' ca' ba gosende' xtiža' Diosen', perw šlac zjambane' chesyela' chesyěžje' na' chese'nde' yeseni'e, na' chesede' chesonteze' con da' žazen chegaque'. Na' da' qui bi choen' latje yega'an xtiža' Diosen' lo' yichjlažda'ogaque' na' da'nana' bi chesejnilaže' le' ca' cheyala'. ¹⁵ Na' da' ca' besego'onen lo' yo šagüen', zejen

ca bene' cate' chesende' xtiža' Diosen' chesezi'en chesonen' chęgaque', na' chesejnilaže' le' do yichj do laže', na' chesechejde' bite'tez dan' chac chęgaque' cont chesone' can' che'ne Diosa'.

Jempl che yi' dan' chguala'cho

(Mr. 4:21-25)

¹⁶ Na' Jesúsen' gwne':

—Notno gwguala' to yi' na' gw dosen' to yeso', na' neca gwcuáše' yin' xan xcame'. San chde'en le'e ze'e cont gwseñin' len yogo'lol bene' yeso'o lo' yo'o.

¹⁷ Le yogo'lol da' ngaše' chia' neda', lenna' gwlo'elaon, na' yogo'lol da' nono na' neze chia', žin ža yesenezden' na' yesejni'iden'.

¹⁸ Le gwzenag da' quinga da' chzejni'ida' le'e, le note'teze bene' chzenague' xtiža' Diosen' gwzejni'ich Diosen' le', perw na' note'teze bene' bi chzenague', da' daon' chacde' ba nezde', yeca'a Diosen' len.

Xna' Jesúsen' len bene' biše' ca' besežine' gan' zoe'

(Mt. 12:46-50; Mr. 3:31-35)

¹⁹ Na' xna' Jesúsen' len bene' biše' ca' besežine' gan' zoa Jesúsen', gosaclačže' yeso'e, perw catec bene' zan že' gague goc latje yesežine' lagüe' na'ate. ²⁰ Na' to ben' ze na' gože' Jesúsen':

—Xna'o len bene' bišo' ca' zjanite' chyo'o na' chesaclačže' yedesene'e le'e.

²¹ Na' Jesúsen' gože' legaque':

—Bene' ca' chosozenag xtiža' Diosen' na' chesezi'e cho'alao xtižen', bene' can' zjanaque' xna'a na' biša'.

Jesúsen' bcueze' be' bdono' lo nisdao'

(Mt. 8:23-27; Mr. 4:35-41)

²² Na' goc to ža Jesúsen' gwyo'e to lo barcw len bene' ca' zjanaque' le' txen. Na' gože' legaque':

—Laga'cho yešla'ale nisdaon'.

Nach bosose'e barcon'. ²³ Šlac zejen lo nisen' gwtas Jesúsen'. Nach gwzolao gwyechj to be' bdono' lo nisdaon', na' gwzolao cheyož nis lo' barcon'. Na' besexožde' yesebiaye'e. ²⁴ Nach bosyosbane' Jesúsen' gose'e le':

—¡Maestrw! ¡Maestrw! Bač chbiayi'cho.

Nach gwyase' na' gwdile' be' bdono' len nisdaon', na' la' gosebe'žiten. ²⁵ Na' gože' legaque':

—¿Nacxečen' bi chejle'le chia'?

Nach legaque' besežebe' len besyebande'. Nach gose' lježe':

—¿Noxe bęga? lente be' bdono' na' len nisdaon' chosozenaguen che da' že'.

To bene' Gadara yo'o nyaze' da' xigüe'

(Mt. 8:28-34; Mr. 5:1-20)

²⁶ Na' besežine' laž bene' Gadara ca', to yež da' chi' šla'a distritw Galilean', laga'cho nisdao'. ²⁷ Na' cate' bechoj Jesúsen' lo' barcoa', to bene' lo yežna' jašague' le'. Ba gwža yo'o nyaz da' xigüen' yichjlaždao' bena'. Na' ba chde' con gague bi xe' chazche', na' bich zoe' liže', con ba zoe' do capsantwle. ²⁸⁻²⁹ Na' bene' gualaž che' ca' bosocheje' ni'a ne'e len gden na' gosape' le'. Na' da' xigüe' ca' gosonen' cont bzoxj btine' gdenna' zan ni'a. Na' gosonen' cont gwyeye' ga nono bene' zjanla'. Na' bena' cate' ble'ede' Jesúsen' na' bzoa xibe' lagüen'. Na' bosye'e ziže gwne':

—¿Bixčen' chgoša' chlaže' chio' len neda', Jesús? Le' naco' dogualje Xi'in Dios ben' nape' la'zelagüe' yela' gwnabia' xen. Chneyoeda' le' bi gwsaco' neda'.

Gwne' ca' dan' ben Jesúsen' mandadw yechoj da' xigüen' yichjlažda'ogüen'.

³⁰ Nach Jesúsen' gože' da' xigüen' yo'o nyaz yichjlaždao' bena':

—¿Bi lio'?

Nach da' xigüen' gwnan:

—Legión lia'.

Gwnan ca' le zjanaquen da' zan zjajo'on yichjlažda'ogüen'. ³¹ Nach da' xigüe' ca' gosata'yoen Jesús'a bi yeselen' lo yi' gabil. ³² Na' to ya'a da' zoa gala'ze chesaš zan coš chesagwba'. Nach da' xigüe' ca' gosata'yoen Jesús'en' gwnežjue' latje šjaseyo'on yichjlaždao' coš ca'. Na' Jesús'en' bnežjue' latje. ³³ Nach besyechojen yichjlaždao' bena' na' jaseyo'on yichjlaždao' coš ca'. Na' besyeyetjses coš ca' le'e ya'a gan' nita'ba' na' jaselažo'ba' lo' nisdao' ga gosatba' gose'ejba' nis.

³⁴ Na' bene' ca' chosoyoe' cošen' besele'ede' dan' ba goquen' bosyoxonje' jasyeyeže' bene' lagüe yež len bene' chaš yixe', gose'e legaue' can' ba goquen. ³⁵ Nach ja'ac bene' jaseñe'e bixen' goc. Na' cate' besežine' gan' zoa Jesús'en' besele'ede' bena' ba gwyo'o gwyaz da' xigüen', na'a ba chi'e gala'ze cuit Jesús'en' nyaz xalane', na' ba bezoa yichjlažda'ogüe' binlo. Na' besežebe'. ³⁶ Na' bene' ca' besele'ede' can' goquen' goso'e diža' che dan' goc che bena' gwyo'o gwyaz yichjlažda'ogüe' da' xigüen' na' can' ba beyaque'. ³⁷ Nach yogo'lol bene' ca' že' gan' mbane yež Gadaran' jasetayoede' Jesús'en' yeze'e lažgaquen', le besežebchgüe'. Nach Jesús'en' beyo'e lo' barcon' cont yeze'e. ³⁸ Na' bena' beyaque cate' Jesús'en' bebeje' da' xigüe' ca' goso'o gosazen yichjlažda'ogüe', gota'yoede' le' gwnežjue' latje šejlene'ne'. Perw Jesús'en' bi be'e latje, san gože'ne':

³⁹ —Beyej ližo' na' jayež bene' lo' yo'o chio' yogo' da' güen da' ba ben Diosen' len le'.

Nach beza' ben' na' gwzologüe' cho'e diža' doxen yežen' yogo' can' ba ben Jesús'en' len le'.

Jesús'en' beyone' xi'in Jairo na' beyone' yeto no'ole bene' gwdane' xe'
(Mt. 9:18-26; Mr. 5:21-43)

⁴⁰ Na' cate' Jesús'en' belague' nisdan', bene' zan ba nita' chesebeze' le'. Chesyebechgüede' da' bežine' na'. ⁴¹ Na' bžin to bene' le' Jairo, ben' nac to bene' gwnabia' che yodao' che yežna'. Na' bzoa xibe' lao Jesús'en' gota'yoede' le' šejlene' le' liže', ⁴² le ba zoa gat bi' no'ol che'. Nache' bi' tliša', na' šižinw izguebe'. Na' šlac zej Jesús'en' len le', bene' zan gosebiadi'e le' na' bosochichgüe' le'.

⁴³ Na' len to no'ole ba goc šižinw iz chzoe' gwba'o na' ba benditje doxen xmechue' len bene' güen rmed ca'. Na' notno goc gon le' rmed. ⁴⁴ Na' gwbiga' no'olen' cože' Jesús'en' na' gwdane' lox xen', nach la' gwlezte gwba'o dan' zoen'.

⁴⁵ Na' gwna Jesús'en':

—¿Non' gwdan neda'?

Na' ne toe' ca' gosechebe' še ba gosegane' le'. Nach Pedron' len bene' ca' zja'aclen Jesús'en' gose'e le':

—Maestrw, bene' zan bene' za'ac nga chosochie' le' na' chosožigue' le' nile na'le. ¿Bixchen' chnabo' no gwdan xaon'?

⁴⁶ Nach Jesús'en' gože' legaue':

—To bene' ba gwdane' neda'. Chacbe'eda' ba beyacde' len yela' guac chia'na'.

⁴⁷ Nach no'olen' cate' gocbe'ede' cbi bgaše' dan' benen', nach gwbigue' lao Jesús'en' do chaž chžebe' na' bzoa xibe' lagüe'na', be'e diža' lao yogo' bene' ca' že'na' bixchen' gwdane' le' na' can' goc la' beyactede'. ⁴⁸ Nach gož Jesús'a' no'ola':

—Xi'ina', ba beyacdo' dan' chejnilažo' neda'. Beyej binlo.

49 Ne' choe'te Jesúsa' dižan' ca' cate' bžin to bene' gwza' liž Jairo ježe' le':
—Ba got bi' no'ol dao' chion'. Bich gondo' Maestroa' zed.

50 Perw cate' bene' Jesúsena', na' gože' Jairo:

—Bitw žebo', con gwejnlaže' neda' na' yeyaquebe'.

51 Na' cate' besežine' liž Jairona', Jesúsena' bi' be'e latje yeso'o zan bene' ca' zja'aclen le', san Pedro, len Juan, len Jacobo, na' len xaxna' bi' guat na'ze goso'o. 52 Na' ba chi'chgua žaš na' yogo' bene' ca' že'na' chesebežchgüe'. Na' Jesúsena' gože' legaue':

—Bitw cuežle. Bina' gatbe', san chtasbe'.

53 Na' bosoxiže' gosonle' che' da' zjanezde' ba gotbe'. 54 Perw Jesúsena' bexae' taca' bi' no'ol guaten' na' bol' güiže'be' gože'be':

—No'ol dao', beyas.

55 Nach bebambe', la' beyastebe'. Na' Jesúsena' bene' mandadw yeso'ebe' da' gagwbe'. 56 Na' xaxna'be' besyebanchgüede'. Perw Jesúsena' bene' mandadw bi' yeso'e diža' can' goca'.

9

Jesúsa' gwsele' bene' šižinw ca' jasedixjue'ede' xtižen'

(Mt. 10:5-15; Mr. 6:7-13)

1 Jesúsena' botobe' bene' šižinw ca' gwleje' cont zjanaque' le' txen na' bnežjue' legaue' yela' gwnabia' na' yela' guac cont goc besyebaje' da' xigüe' lo' yichjlaždao' bene', na' lecze ca' besyeyone' bene' ca' chesacšene. 2 Na' lecze bene' mandadw šjasedixjue'ede' Diosa' nabi'e yichjlaždao' bene' yosozenag che'. Na' bene' mandadw yesyeyone' no' bene' güe'. 3 Na' gože' legaue':

—Bibi goxe'le tnez. Bitw goxe'le xis da' gwchiše'le, neca gua'le bzod, ne yet, ne mechw, na' bitw gua'le yeto xcamisle. 4 Cate' žinle to liž bene', na'ze yega'anle šlac zoale lagüe yeža'; cate'ch yeza'le yeža', cana'ch yeza'le latja'. 5 Na' še zoa ga bi' yosolebe' le'e, cate' yeza'le na', le cuibe ni'alen' yo bište cont nacbia' malen' chesone' bi' chosozenague' xtiža' Diosena'.

6 Nach bene' šižinw ca' ja'aque' to to yež, na' gate'teze ja'aque' jasedixjue'ede' diža' güen che' Jesúsena' na' besyeyone' no' bene' güe'.

Ba gosote' Juan ben' bzoa bene' nis

(Mt. 14:1-12; Mr. 6:14-29)

7 Na' gobernador Herodes goque' tole bende' yogo'lol da' güen da' chon Jesúsena'. Gocžejlaže', le bal' bene' gose'e le' ba beban da' Juan ladjo bene' guat ca'. 8 Na' yebale' gosene' šeca da' Elías ben' be' xtiža' Diosena' cani' ba bela' yežlio nga da' yoble. Yebale' chesene' yeto bene' be' xtiža' Diosena' cani'te ba bebane' ladjo bene' guat ca'. 9 Na' Herodesena' gwne':

—Neda' bena' mandadw gosechogue' yen Juanna', perw žnoxen' chon da' güen ca' dan' chesoe' bene' diža'?

Na' gwtiljwlaže' nacle gone' cont le'ede' Jesúsena'.

Bguagw Jesúsena' gayo' mil bene'

(Mt. 14:13-21; Mr. 6:30-44; Jn. 6:1-14)

10 Na' cate' besyežin postlw ca' gan' zoa Jesúsena' nach gose'e le' can' ba gosonen'. Na' gwchi'e legacze' na' ja'aque' to latje gan' mbane yež Betsaida.

11 Cate' gosacbe'e bene' ca' nita' gan' zoa Jesúsena' ba gosa'aque' len bene' ca' zjanaque' le' txen, nach zja'aque' zjana'ogüe' legaue'. Jesúsena' blebe' legaue' na' bsd blo'ede' legaue' Diosena' nabi'e yichjlaždao' bene' yosozenag che', na' beyone' bene' ca' chesacšene.

12 Cate' gwzolao gwxa gwbižen', nach bene' šižinw ca' zjanaque' Jesúsen' txen gose'ene':

—Besela' bene' quinga cont šjaya'aque' ga že' bene' do ranšw na' do yež ca' dan' nyečhj mbi'i cont yeseyiljue' ga yesetase' na' yeseyiljue' da' yese'ej yesagüe', le ca nac latje gan' zoacho nga, naquen to latje daš.

13 Perw na' gož Jesúsen' legaque':

—Le'e le güe'e da' yesagüe'.

Na' gose'e le':

—Gayo'ga yetextil na' yečhopga bel ya'a de checho, lete še si'chon cont gaquen yesagw yogo'lol bene' quinga.

14 Gosene' ca' le že' ca gayo' mil bene' byo, bi cuent no'ol ca' len bidao'. Nach Jesúsen' gože' bene' ca' zjanaque' le' txen:

—Le gon mandadw yesebe' šiyon güej bene' ca'.

15 Nach gosone' mandadw gosebe' yogo' bene' ca', 16 na' Jesúsen' gwxi'e gayo' yetextilen' na' chope bel ya'ana', na' gwne'e yabale, be'e yela' choxcen che Diosen' na' bzoxjen' na' be'en bene' šižinw ca' cont goso'e che to to bene' ca'. 17 Na' gosagüen' ca' gosljde'. Nach bososše'e šižinw žome len yetextil bixjw na' len late' güeje bel da' bega'añ.

Pedron' gwne' Jesúsen' naque' bene' gwsela' Dios

(Mt. 16:13-19; Mr. 8:27-29)

18 Na' gozac yeto, bene' ca' zjanaque' Jesúsen' txen zjanite' len le' lchojiže, na' Jesúsen' chol güiže' Diosen'. Nach gože' legaque':

—¿Bi chesena bene'? ¿Non' naca' neda'?

19 Na' gose'e le':

—Bale' chesene' naco' da' Juan ben' bzoe' bene' nis. Na' yebale' chesene' naco' Elías ben' be' xtiža' Diosen' cani'. Na' yebale' chesene' naco' yeto bene' be' xtiža' Diosen' cani' ben' ba beban ladjo bene' guat ca'.

20 Nach gože' legaque':

—¿Chixe le'e? ¿No žale naca'?

Na' gož Pedron' le':

—Len' naco' Cristo ben' gwlej Diosen' cont yedenabi'o.

Jesúsen' gwduxjue'ede' gate'

(Mt. 16:20-28; Mr. 8:30-9:1)

21 Nach Jesúsen' gože' legaque' nono yese'e naque' ben' gwlej Diosen' cont yedenabi'e. 22 Na' gože' legaque':

—Da' zan da' saca'zi'a, neda' naca' ben' gwsela' Dios golja' beñach. Na' bene' gole blao ca' chesenabia' nación chechon' na' bꝑoz gwnabia' ca', na' bene' ca' chososed chosolo'e ley dan' bzoj da' Moisés, bi yesele'ede' neda' güen dan' bi gosejle'e chia', na' yesote'nda', perw yeyon ža yebana' ladjo bene' guat ca'.

23 Nach gože' yogo' bene' ca' zjanaque' le' txen:

—Note'tez bene' še chaclaže' gague' neda' txen, cheyała' cuejyichj cuine' yogo' ža, la'czła' saca'zi'e, na' gone' can' nia' neda'. 24 Note'tez bene' chacde' gone' cont bi saca'zi'e o cont nono yesot le', benan' cuiayi'. Na' note'teze bene' chzanlaže' cuine' saca'zi'e o gate' ne chia' neda', ba de yela' mban che' toli tocañe. 25 ¿Bixe zejenna' to bene' nabi'e doxen yežlion' še cuiaye'e na' bi gata' yela' mban che' toli tocañe? 26 Na' note'tez bene' še cheto'ede' par ye'e lježe' chejnlaže' neda' na' še cheto'ede' par gwzenague' xtižan', lecze ca' neda' yeto'eda' che' par nia' naque' neda' txen, neda' naca' ben' gwsela' Diosen' golja' beñach. Yeto'eda' che' cate' yida' da' yoble nsa'a yela' zaca' juisyw chia' na' yela' zaca' juisyw che Xa' Diosen' na' che ben' zjanac angl che'. 27 Da' li

žia' le'e, balle nita'le nga na'a bina' gatle cate' žin ža le'ele gwlo'e Diosen' yela' gwnabia' čhen'.

Jesúsen' goque' ca to be'ni'
(Mt. 17:1-8; Mr. 9:2-8)

²⁸ Nag goc to xman gwna Jesúsen' ca', gweje' to lo ya'a jel güiže' Diosen' na' gwče'e Pedro len Juan len Jacobo. ²⁹ Na' šlac chol güiže' Diosen' goc cho'alagüen' ca da' bža'. Na' xalanen' beyaquen šiš xila' na' goctiten. ³⁰ Na' lo hora' besežin chop bene' gan' zoa Jesúsen', toe' da' Moisés na' yetoe' da' Elías bosošaljlene' le'. ³¹ Goso'e diža' gosene' ba zoa gat Jesúsa' Jerusalén. Na' be'ni' che Diosen' gwechjen bsenin' legaque'. ³² Na' Pedron' len bene' ca' yečhope leca gosac ša tase' perw bi gosetase' na' besele'ede' Jesúsen' chactit cho'alagüen' na' zeche' choelene' da' Moisésen' len da' Elíasen' diža'. ³³ Na' cate' ba cheza' da' Moisésen' len da' Elíasen', Pedroa' gože' Jesúsen':

—Maestrw, leca güenna' zoacho nga! Gonto' šone ranšw, to čhio', to che Moisés, na' yeto che Elías.

Con gwne' ca' sin ca bene' xbab. ³⁴ Ne' choe'te Pedron' diža' cate' to bejw gwechjen legaque' na' besežebe' lagüe dan' goc ca'. ³⁵ Na' lo' bejon' gosende' gwne' Diosen', gwne':

—Benga Xi'ina' ben chacda'. Le gwzenag che'.

³⁶ Na' cate' beyož gwna Diosen' ca', besele'ede' yetoze Jesúsen'. Na' ca' beyoža' bibi diža' gosoe'lene' bene' ca' yezica'chle can' nac dan' ba gosende' na' dan' ba besele'ede'. Con gosenita'teze' šižize.

Beyon Jesúsen' to bi' gwyo'o gwyaz da' xigüe'
(Mt. 17:14-21; Mr. 9:14-29)

³⁷ Na' beteyo cate' ba besyeyetje' ya'ana' bene' zan jasešague' legaque' gan' nite'na'. ³⁸ Na' toe' gwne' zižje, gože' Jesúsen':

—Maestrw, chata'yoeda' le' gaclenšco' xi'ina' nga. Nacbe' xi'ina' tliša'.

³⁹ Čhñiz da' xigüen' lebe' na' la' chgosya'aten lebe', chonen cont chazbe' šon na' cont čžia bžina' cho'abe' na' chonen lebe' zi', na' čane chsanen lebe'.

⁴⁰ Ba gota'yoeda' bene' ca' zjanaque' le' txen cont yesyebeje' da' xigüen' yo'o nyazbe', perw bitw gosezaque'de'.

⁴¹ Nach Jesúsen' gože' bene' ca' že' na':

—Le'e bene' bi chejnilaže', chonchguale clele! Čšna čhyažjen soalena' le'e cont šejnilaže'le? ČBatca' zelao na'lagua' le'e?

Nach gože' xa bidao'na':

—Ben bidao' chion' nile.

⁴² Na' šlac zjasane'be' lao Jesúsen', da' xigüen' benen cont gwyazbe' šon, na' bchix btolen lebe' lo yo. Na' Jesúsen' gwdile' da' xigüen' cont bechojen lo' yichjlažda'obe'. Nach beyaquebe'. Gwdena' beyone'be' lo na' xabe'. ⁴³ Na' yogo' ben' že'na' besyebande' cate' besele'ede' yela' guac che Diosen'.

Da'yoble Jesúsen' gwdixjue'ede' gate'
(Mt. 17:22-23; Mr. 9:30-32)

Na' besyebande' che yogo'lol dan' chon Jesúsen', na' šlac nite' ca', Jesúsen' gože' bene' ca' zjanaque' le' txen:

⁴⁴ —Le gon cont diža' nga šo'on yichjlažda'ole, na' bi ganlaže'len. Neda' gaca' lo na' ben' chesegue'enda', neda' naca' ben' gwseła' Diosen' golja' benačh.

⁴⁵ Perw legaque' bitw gosejni'ide' diža' dan' be' Jesúsen', le naquen ca to da' ngaše' len legaque'. Na' besežebe' yesenabde'ne' bi zejen dan' gože' legaquen'.

Gosacyože' noe' nacch blao
(Mt. 18:1-5; Mr. 9:33-37)

⁴⁶ Na' be_{ne}' ca' zjanaque' Jesús_{en}' txen gosacyože' noe' nacch bla_o.
⁴⁷ Jesús_{en}' go_{che}'ede' xbab dan' chesonen', na' be_{xue}' to bidao' na' bzeche'be' cuite'na' ⁴⁸ na' gože' lega_{que}':

—Note'teze be_{ne}' chone' güen len to bidao' ca bi' nga ne_{che} da' chejnilaže' neda', choncze' güen len neda'. Na' note'teze chon güen len neda' choncze' güen len Dios ben' gwsela' neda'. Na' note'tez le'e cate' chon_{le} xbab che cuin_{le} bibi zaca'tecle, canan' ba nacle be_{ne}' bla_o.

Be_{ne}' bi chon contr chio' txenczen' chone' len chio'
(Mr. 9:38-40)

⁴⁹ Nach Juanna' gože'ne':

—Maestrw, bežagto' to be_{ne}' cho'e lao' na' chebeje' da' xigüe' da' yo'o nyaz be_{ne}'. Na' bžonto' gone' ca', le bi chone' chio' txen.

⁵⁰ Nach Jesús_{en}' gože'ne':

—Bitw gwžon_{le} gone' ca', le še to be_{ne}' bi chone' contr chio', txenczen' chone' len chio'.

Jesús_{en}' gwdile' Jacobo len Juan

⁵¹ Na' lagüe' ba zoa bagwze yezi' yeca'a Diosen' le', be_{ch}oglaže' šeje' Jerusalén. ⁵² Na' gwsele' to chope be_{ne}' gosebialao lagüe'na'. Na' ja'aque' to yež gan' mbane distritw Samaria cont šjasesini'e gan' soa Jesús_{en}' len be_{ne}' ca' zjanaque' le' txen. ⁵³ Perw be_{ne}' Samaria ca' bi bosolebe' Jesús_{en}' len be_{ne}' ca' nžague', le gosache'ede' zja'aque' Jerusalén. ⁵⁴ Na' chope be_{ne}' ca' zjanaque' Jesús_{en}' txen, Jacobon' len Juanna', cate' besele'ede' can' goson be_{ne}' Samaria ca', nach gosenabde' Jesús_{en}':

—Maestrw, ¿che'ndo' gonto' can' ben da' Elías ben' be' xtiža' Diosen' cani', nabeto' Diosen' sele' yi' gwzeyen be_{ne}' qui?

⁵⁵ Nach Jesús_{en}' gwye_{ch}je' gwdile' lega_{que}' gwne':

—Le'e bitw nezele non' chnabia' yichjlažda'ole. ⁵⁶ Neda' bitw za'a cont gwžia_{ya}'a be_na_{ch}, san za'a cont gwnežjua'ne' yela' mban toli toca_{ne}, neda' naca' ben' gwsela' Diosen' golja' be_na_{ch}.

Nach ja'aque' yež yoble.

Can' gož Jesús_{en}' be_{ne}' ca' gosac_{la}že' yesa_{que}' le' txen
(Mt. 8:19-22)

⁵⁷ Šlac zja'aque' na', to be_{ne}' gože' le':

—Sa'lena' le' gate'teze šejo'.

⁵⁸ Nach gož Jesús_{en}' le':

—Nita' xišna' beza' na' lec_z chesyēžin xišna' be dao' ca' zjazoa xil be chaš le'e yaba, perw bibi xišna' neda' de ga yezi'laža', neda' naca' ben' gwsela' Diosen' golja' be_na_{ch}.

⁵⁹ Nach Jesús_{en}' gože' yeto be_{ne}':

—Yo'o len neda'.

Perw bena' gože' le':

—Xana', za' got xa'. Be_nšca latje zgua'tec šjaycuaša'ne'.

⁶⁰ Na' gož Jesús_{en}' le':

—Be_{ne}' ca' zjanac yichjlažda'ogüe' ca che be_{ne}' guat, lega_{que}' guaccze yosocuaše' yezica'chle be_{ne}' guat. Perw le', jatixjue'e be_{ne}' Diosa' nabi'e yichjlaždao' be_{ne}' yosozenague' che'.

⁶¹ Nach lec_ze yetoe' gože' Jesús_{en}':

—Sa'lena' le' Xana', perw zgua'tec šjayzenda' xaxna'a len diaža chia'.

⁶² Jesús_{en}' gože' le':

—Bene' ba gwzolao nagüe' neda', še bi ze'e do yichj do laže', o še yo'o yichje' da' ba gwdele, bi zaque' gone' xšin Diosen'. Naque' ca to bene' chne' e coscože'le šlac chgua'ane' go'n.

10

Jesúsen' gwsele' gayonši bene' šjasedixjue'ede' xtiže'

¹ Na' gwdechle Xancho Jesúsen' gwleje' yegayonši bene' na' bene' mandadw yesebialagüe' šja'ac chope güeje' to to yež ga za' šej le'. ² Na' cate' za' yesa'aque' gože' legaue':

—Chyažje bene' zan yeseyixjue'ede' xtiža' Diosen', perw to chopga bene' nita' yeseyixjue'eden'. Na' bene' yosozenag che Diosen' zjazaca'lebe' ca to coseš xen da' chyažje yedobe. Da'nan' le nabe Xancho Diosen' sela'che' bene' yesaclene' chio' yotobcho coseš chen'. ³ Le šja'ac, le neda' chsela' le'e šjatixjue'ele xtižen' len bene' ca' chesegue'ede' le'e. Zaca'leble ca xila' dao' ben' chja'ac gan' že' beco'yo. ⁴ Bitw gua'le bzod, ne mechw, ne yel, na' bi šele guaple bene' tiox bene' yežagle chanez. ⁵ Note'tez liž šo'le zgua'tec nale: “Chnablaže'šca' soa cuezle binlo len xbab dan' yo'o lo' yichjlažda'ole, le'e nita'le nga.” ⁶ Na' še zoa to bene' chaclaže' soa cueze' binlo len yichjlažda'ogüe'na', nach gac can' gwñablaže'le cont soa cueze' binlo; perw še nono zoa bene' chaclaže' soa cueze' binlo len yichjlažda'ogüe', bi gac dan' ba gwñablaže'len'. ⁷ Na' lo' yo'o na'teze yega'anle. Bitw tale to to yo'o. Le ye'ej le gagw bite'teze da' chesone' ye'ej gagwle. Ca to bene' güen žin cheya'la' si' laxjue', lecz ca' le'e zaca'le yesone' da' ye'ej gagwle. ⁸ Na' cate' žinle to yež ga chesonxene' le'e, le ye'ej le gagwteze da' yesone' le'e. ⁹ Le yeyon bene' güe' bene' nita' yež gan' žinle, na' le' ye'e: “Ba bžin ža gwzenagle che Diosen' cont nabi'e yichjlažda'ole.” ¹⁰ Perw na' cate' žinle to yež ga bi yosolebe' le'e, le šja'ac la cay na' le ye'e: ¹¹ “Bište che lažle nga da' žia ni'ato', cuibton' cont gwlo'eto' le'e malen' chonle bi chzenagle xtiža' Diosen' dan' choe'to'. Perw chyixjue'eto' le'e Diosen' chazlaže' gwzenagle che' cont nabi'e yichjlažda'olen'.” ¹² Da' mal xen goson bene' ciuda Sodoma cani', perw žia' le'e, žan' gac juisyw bene' ca' bi bosolebe' le'e ližen', yesale'chde' clcl ca bene' Sodomán'.

Bene' ca' bi chosozenag xtiža' Jesúsen'

(Mt. 11:20-24)

¹³ Nach gozna Jesúsen':

—iNyaše' chguaze gac che le'e bene' Corazín! iNyaše' chguaze gac che le'e bene' Betsaida! Bene' ca' nita' Tiro na' Sidón ba' besyetenjde' xto'la'gaque' šaca' blo'egacda'ne' yela' guac chia' ca da' ba blo'eda' le'e. Na' bosoše'e ca gosone' šaca' bena' ca', chesazlje' to lache' gasj da' naquen zeše' na' chosože'elja cuine' no de cont yesache'e bene' ba boša' yichjlažda'ogüen'. ¹⁴ Saca'zi'chle clcl ca bene' že' Tiro na' Sidón cate' žin ža gac juisyw. ¹⁵ Le'e nita'le yež Capernaum chonle xbab šeca Diosen' gonchgüe' le'e yela' bala'an. Bi gone' le'e yela' bala'an san gone' le'e castigw toli tocañe dan' bi chejle'le chia'.

¹⁶ Nach Jesúsen' goze'e bene' gayonši ca':

—Bene' gwzenag xtiža'len' lecze gwzenague' xtiža'na', na' bene' goncze yichjlagüe' bi gwzenague' xtiža'len', lecze bi gwzenague' chia' neda'. Na' bene' goncze yichjlagüe' bi gwzenague' xtiža'na', lecze bi gwzenague' xtiža' Diosen' ben' gwse'la' neda'.

Besyežin bene' gayonši ca'

¹⁷ Bene' gayonši ca' cate' beyož jasedixjue'ede' xtiža' Jesúsen', besyežine' gan' zoen' na' besyebechgüede'. Nach gose'e Jesúsen':

—Xanto', chebechgüeto' can' goquen', le da' xigüe' ca' chosozenaguen cheto' cate' chonto' mandadw yesyechojen lo' yichjlaždao' bene' choe'to' lao'.

¹⁸ Na' gože' legaque':

—Ble'eda' bedao'nez gwnit yela' gwnabia' che Satanásen' dan' chnabia' da' xigüe' ca'. ¹⁹ Ba beña' le'e yela' guac cont gwlej gwšošjle no bel' znia na' no bejxjoni' na' cont soele Satanásen' bi gonen le'e gan. Na' bibi de da' gonen le'e zi'. ²⁰ Perw bi yebele neche da' xigüen' chosozenaguen chele, san le yebe da' ba bzoj Diosen' lale le'e libr gan' nyoj la yogo'lol xi'ine' ca'.

Bebechgüe Jesúsén'

(Mt. 11:25-27; 13:16-17)

²¹ Za' beyožte gwna Jesúsén' ca' nach ben Spiritw che Diosen' cont bebechgüede' na' bol' güiže' Diosen', gwne':

—Xa', le' chnabi'o bene' ca' že' yaba na' yežlion'. Na' chona' yela' choxclen chio' ba bzejni'ido' bal' bene'. Ba bzejni'ido' bene' ca' gosacbe'ede' cheseyažjde' no gwsed gwlo'e legaque'. Na' bitw bzejni'ido' bene' ca' cheson xbab zjanaque' bene' sina' na' bene' zjanejni'i. Beno' ca' Xa', le can' gwyazlažo'.

²² Nach gože' bene' ca' že'na':

—Xan' ba bene' lo' na' chona' cont chombia' bene' le'. Le' nombia'yane' neda', na' neda' nombia'yaña' le'. Na' bene' ca' ba gwleja' ba zjanombi'e Xan'. Na' nono nochle zjanombia' Xa' ne neda'.

²³ Na' gwyečhj Jesúsén' gwne'e bene' ca' zjanaque' le' txen na' gože' legaque':

—Mbachgua zoale chle'ele neda' na' chle'etele da' ca' chona'. ²⁴ Na' chnia' le'e zan bene' ca' goso'e xtiža' Diosen' cani' len bene' zan rey gosaclačže' yesele'ede' dan' chle'ele na'a, perw bitw goła' yesele'eden', na' gosaclačže' yesende' dan' chenelen', perw bitw goła' yesenden'.

Jempl che to bene' güen, bene' Samaria

²⁵ Na' gwzoža' to bene' nsedchgüe' ley dan' bzoj da' Moisés, goclačže' cueje' Jesúsén' diža' da' gwčhine' contr le' na' gože'ne':

—Maestrw, ¿bi da' cheyała' gona' cont gata' yela' mban chia' toli tocaņe?

²⁶ Na' gož Jesúsén' le':

—¿Bi nyoj le'e leyna'? ¿Nac žan?

²⁷ Na' ben' chejni'ichgüe' leyna' boži'e xtiža' Jesúsén', gože' le':

—Ley che Diosa' žan: “Cheyała' gaquecho Xancho Diosen' con ca zelao chejni'icho, do yichj do laže'cho, do fuers valor checho, na' gaque lježcho ca chaque cuincho.”

²⁸ Nach gož Jesúsén' le':

—Da' licze can' ba gwnao'na'. Can' cheyała' gono' cont bano' toli tocaņe.

²⁹ Na' bena' goclačže' gwlo'ede' choncze' can' ža leyna', na' gože' Jesúsén':

—¿Non' nac bene' lježa' ben' cheyała' gacda'?

³⁰ Na' Jesúsén' gože' le':

—To bene' beza' Jerusalén par yežine' yež Jericó, jasyexen bene' gwban le'. Na' goseyine' xalane' na' gosot goseyine' le'. Nach besyeya'aque' bosocua'ane' le' cacze to bene' guat. ³¹ Na' to bxož che bene' Israel ca' gwdie' lo' neza', na' cate' ble'ede' bena' dena', nach gwcuase' to šla'ale neza' na' con gwdeze'.

³² Lecz ca' ben to diaža che da' bene' Leví ca'. (Xi'in diaža che da' Leví yo'o lo' na'gaque' chesone' mandadw lo' yodao' blao.) Bena' zeje' tnez na' cate' ble'ede' ben' dena', na' gwcuase' to šla'ale neza' na' con gwdeze'. ³³ Nach to bene' Samaria ngüe'e neza' nlague' xpurrue' na' bžine' gan' de bena', perw na' le' cate' ble'ede' ben' beyaše'laže'. ³⁴ Na' gwbigue' gan' de' na' bene' le' rmed, bšone' set len vino lao güe' che'na' na' bchejen' lache'. Na' božie' le'

cože' xpurrue' na' beče'e le' ga zoa to mesón ga gwne'e le'. ³⁵ Na' beteyo cate' beza' bene' Samaria, gwleje' mechw da' zaca' ca chop ža žin na' bnežjuen' xan mesónna' ca laxjue', na' gože' le': "Gwna' bengā na' še žan bichle da' gono' gastw na' chixjuan' cate' zeza'a."

³⁶ Beyož be' Jesúsen' diža' can' goc che ben' jasyexen bene' gwban ca', nach gože' bena' chsed chlo'e leyna':

—¿Nac chono' xbab? ¿No bene' ca' šone gocde'ne' ca' bene' lježe'?

³⁷ Nach bena' chsed chlo'e leyna' gože' Jesúsen':

—Bena' beyaše' beži'ilaže'de' bena' jasyexen gwban ca'.

Nach gož Jesúsen' le':

—Lecze ca' cheyała' gono' le', yeyaše' yeži'ilaže'do' yogo'lol bene'.

Jesúsa' jane'e Marta na' María

³⁸ Na' gosego'ochē nez na' besyežine' to yež ga zoa to no'ole lie' Marta, na' Jesúsen' gwyeje' liže'na'. ³⁹ Na' zoa to bile' le' María. Na' Marían' gwchi'e cuit Jesúsen' bzenague' xtiže'na'. ⁴⁰ Perw na' Martān' belalchgüede' bsini'e da' yesagüe'. Na' gwyeje' lao Jesúsen' na' gože' le':

—Xana', ¿bi chacdo' median can' bcua'an bene' bilan' neda' toza' len mandadua'? Benšca mandadw gaclene' neda'.

⁴¹ Xancho Jesúsen' gože' le':

—Marta, chi'chgua yichjo' mandadua' na' chacžejlažo' dan' nyanchguan.

⁴² María nga ba gwleje' da' naquech da' güen. Chi'e chzenague' chia', na' notno gwžon gone' ca', le len da' nacch da' žialao da' cheyała' gonle.

11

Jesúsen' blo'ede' can' yosol güiže' Diosen'

(Mt. 6:9-15; 7:7-11)

¹ Na' gwzoa Jesúsa' to latje chol güiže' Diosen'. Cate' beyož bol güiže'ne' to bene' ca' zjanaque' le' txen gože' le':

—Xanto', bzejni'i neto' nac cheyała' yol güižto' Diosen', can' bzejni'i da' Juanna' bene' ca' gosaque' txen len le'.

² Na' Jesúsen' gože' le'gaque':

—Cate' yol güižle Diosen', quinga nale:

Xato' bene' zoa yaba,

chnabto' yogo'lol bene' yesonxene' le'.

Zelaže'to' nabi'o yichjlaždao' yogo' neto' benach.

Gacšca can' chazlažo' yežlio nga can' chac yabana'.

³ Ca nac dan' che'ej chagwto' tža tža, bešca cheto' na'a.

⁴ Na' bezi'xenšca cheto', le lencze neto' chezi'xento' che ljež benachto' bite'tez da' chesonde' neto'.

Na' bitw go'o latje soa da' gwžigan' neto' gonto' da' mal, san bcuase bcue'ejšca neto' len da' mala'.

⁵ Nach gož Jesúsen' le'gaque':

—Le gon xbab še šejle liž bene' migw chele do chel na' ye'line': "Migw chia', bešca neda' šone yetextil. ⁶ Ba bla' to bene' migw chia' bene' za' zito', na' bibi de chia' da' gua'ane' gagüe'." ⁷ Na' chixe še migw chelen' yo'e lo' yo'ote yoži'e xtiža'len': "Bitw gondo' neda' zed, le ba nyeyjw cho'a yo'o na' ba deto' chtasto' len bi' cheto' ca'. Bi gac chasa' gona' dan' chyažjdo'." ⁸ Chnia' le'e, la'czla' naque' migw chele, bitw ye'nde' chase' gone' dan' chyažjele, perw še gata'yoelne' sša na' chasšaze' gone' bite'tez da' chyažjele. ⁹ Na' chnia' le'e, še žan bi da' chyažjecho, chnabchon. Še žan to da' chaclaže'cho želecho, chyljwchon. Še žan chaclaže'cho saljw bene' cho'a yo'o che', na' necho cho'a yo'on cont saljue'.

Na' ca'cze cheya_{la}' ye'le Diosen' cate' bi da' chyažjele o bi da' chaclaže'le gone'.
¹⁰ Na' note'tezle še bi da' nabelene', gon_{czen}'. Na' še bi dan' che'nele gwzejni'ide'
 le'e, gwzejni'iczdēn'. Na' note'tezle še žan chaclaže'le gac to da' gac, yo_l güižle
 Diosen' can' chon to be_{ne}' ch_{nie}' cho'a yo'o, nach Diosen' gone' cont gacczen.

¹¹ 'Na' le'e nacle xa bidao', še xi'inle nabebe' le'e yetextil, ĩgwnežjwlebe' to yej?
 Na' še nabebe' le'e yid be_l gagwbe' ĩgwnežjwlebe' to be xigüe'? ¹² Na' še nabebe'
 le'e to žit gagwbe' ĩgwnežjwlebe' to be_{xjoni}'? Cabi gon_{le} ca'. ¹³ La' nacle be_{ne}'
 mal, nezczele gwnežjo xi'inle to da' güen. Nacchxe güen gon Xacho Diosen' ben'
 zoa yaba gwnežjue' Spiritw chen' soan lo' yichjlaždao' be_{ne}' ch_{nab} len.

Gosene' Jesúsēn' bebeje' da' xigüe' len yela' guac che Beelzebú
 (Mt. 12:22-30; Mr. 3:19-27)

¹⁴ Gwzoa to be_{ne}' gwyo'o gwyaz da' xigüe' yichjlažda'ogüe' na' benen cont bi
 goc nie'. Na' Jesúsēn' bebeje' da' xigüe' lo' yichjlažda'ogüe'na'. Na' cate' bechoj
 da' xigüēn', na' goc be_{nie}'. Na' be_{ne}' ca' že'na' besyebanchgüede'. ¹⁵ Perw bale'
 gosene':

—Beelzebú dan' chnabia' da' xigüe' ca' chaclenen le' cont chebeje' da' xigüe'
 zjajo'o zjanyaz yichjlaždao' be_{ne}'.

¹⁶ Na' yebale' cont gosagüe' xya che' gosēnabde'ne' gone' to yela' guac da'
 yesele'ede' le'e yaban' cont yesēnzde' še da' licze Diosa' gwsele' le'. ¹⁷ Perw
 Jesúsēn' gocbe'ede' xbab dan' gosone', na' gože' legaque':

—Ša to gobiern choje' chop šon cuen na' yeyoža' yesedile' legacze', gob-
 iernna' bi sibi'e. Na' še be_{ne}' to lo' yo'o yesechoje' chople na' yesedile' legacze',
 gague sša yesenite' txen. ¹⁸ Na' še Satanásēn' dan' chnabia' da' xigüēn' len da'
 xigüe' chen ca' yesechojen chople na' yesedilen, lecze bi sibian', san na' yeyož
 yedon. Le'e chnale Beelzebún' dan' chnabia' da' xigüe' ca' chaclenen neda'
 cont chebeja' da' xigüe' zjajo'o zjanyaz yichjlaždao' be_{ne}'. ¹⁹ Šaca' naquen
 can' žalen', lecze zejen dan' chnabia' da' xigüe' ca' chaclenen be_{ne}' lježle ca'
 chesyebaje' da' xigüe' zjajo'o zjanyaz yichjlaždao' be_{ne}'. Be_{ne}' lježle ca' yese'e
 le'e clēn' žale. ²⁰ Neda' chebeja' da' xigüe' len yela' guac che Dios, na' dan'
 chona' ca' chlo'en ba bžin ža Diosen' nabi'e yichjlaždao' be_{ne}' yosozenag che'.

²¹ 'Satanásēn' naquen ca to be_{ne}' gual, na' neda' naccha' be_{ne}' gualch. Na'
 nezele cate' to be_{ne}' gual chape' ližen' len spada, bibi gac che da' de che'.
²² Perw cate' žin to be_{ne}' gualch ca le' na' tillene' le', nach ben' nac be_{ne}' gualch
 gon gan. Na' que'e spada che ben' da'na' zoe' lez gaclen le' na' ca'atie' bichle
 da' de che' na' chisen' len be_{ne}' migw che' ca'.

²³ Be_{ne}' bi chone' neda' txen, chone' contr neda'. Na' be_{ne}' bi chaclene' cont
 yosozenag be_{ne}' yoble chia', zeje diža' chone' par bi yosozenague' chia'.

Da' xigüe'na' yeyo'on da' yoble lo' yichjlaždao' be_{ne}'
 (Mt. 12:43-45)

²⁴ 'Na' še to da' xigüe' da' gwyo'o gwyaz lo' yichjlaždao' be_{ne}' yechojen, nach
 lažen nile na'le yeyiljon ga soan mbalaz. Na' še bibi latje želen, nach nan: "Da'
 yoblecze šjajo'a lo' yichjlaždao' ben' gan' ba gwyo'a." ²⁵ Nach yeyejen da' yoble
 gan' zoa ben'. Cate' le'en bač cheyone' güen, na' ba zoache' binlo, ²⁶ nach
 šjaytoben yegaže da' xigüe' ca' da' zjanacch malech ca len, na' txen yeso'on lo'
 yichjlažda'ogüe'na'. Na' še bač goc ca', gacch mal che bena' clel ca dan' ba goc
 che' da' nechw.

Mbalaz nita' be_{ne}' ca' chosozenag xtiža' Diosen'

²⁷ Šlac be' Jesúsēn' diža' quinga, gwzoa to no'ole gachol be_{ne}' ca' že' gan' bsd
 blo'ede', na' no'ola' gwne' zižje, gože'ne':

—Mbalaz zoa no'ola' gw_{xan} le' na' bguaže' le'.

²⁸ Perw na' Jesúsen' gože'ne':

—Nacchxe mbalaz nita' beñe' ca' chosozenag xtiža' Diosen' na' chesone' can' žanna'.

Beñe' bi chosozenag che Diosen' chesenabe' gon Jesúsen' to yela' guac
(Mt. 12:38-42; Mr. 8:12)

²⁹ Na' beñe' zan gosebigue' gosehjde' Jesúsen', nach Jesúsen' gwne':

—Le'e zoale na'a nacchgualé beñe' laždao' xi'a. Chñable gona' yeto yela' guac da' le'ele cont ñezele še Diosa' gwsele' neda', perw bi gona' ca dan' chñabléná', le ba ble'ele da' ca' chona'. Lete gac chia' can' goc che da' Jonás ben' be' xtiža' Diosen' caní'. ³⁰ Na' ca dan' goc che Jonásen' blo'en beñe' Níneve ca' Diosen' gwsele' le', ca'cze dan' gac chia' gwlo'en le'e zoale na'a Diosen' gwsele' neda' golja' beñach. ³¹ Cate' žin ža gon Diosen' castigw che yogo'lol beñe' cheson da' mal, da' no'olen' gwnabi'e beñe' Seba ca' yedecuiše' le'e mbanle na'a. Le' gwze'e gan' nac zito'chgua na' bide' nga cont bedezenague' diža' sina' dan' be' da' rey Salomón len le', na' neda' zoa' nga naccha' beñe' blaoch ca da' Salomón na' bitw chzenagle chia'. ³² Na' cate' žin ža gon Diosen' castigw che yogo'lol beñe' cheson da' mal, lecze žana' yesyeban beñe' Nínive ca' na' yosocuiše' le'e nita'le ža na'aža. Le' legaque' besyetingde' xtoła'gaque' cate' da' Jonásen' gwdixjue'ede'ne' can' gwna Diosen'. Na' neda' zoa' nga naccha' beñe' blaoch ca da' Jonása' na' bi chzenagle chia'.

Dan' bsed blo'e Jesúsen' naquen ca to yi'
(Mt. 5:15; 6:22-23)

³³ 'Notno gwguala' to yi' na' gw dosen' caj, na' ñeca gwcuášen' ga yoble ga nono le'e len, san chde'en le'e ze'e cont gwseñin' len yogo'lol beñe' yeso'o lo' yo'ona'. ³⁴ Žia yejlaocho cont le'echo. Con še bibi chaquen chle'eczecho binlo. Perw še ñcholcho, bi chle'echo. Ca'czen' naquen len yichjlažda'ochon'. Še naccho beñe' laždao' güen, yo'o be'ni' che Diosen' lo' yichjlažda'ochon'. Perw še naccho beñe' mal, chol nac yichjlažda'ochon'. ³⁵ Da'nán' le gon cont gacle beñe' laždao' güen, na' šo' be'ni' che Diosen' yichjlažda'ole. ³⁶ Še nyeni' yichjlažda'olen' na' bibi da' mal yo'on, gwseñi'czen xñezle can' chseni' to yi' ga nac chol.

Jesúsen' gože' beñe' fariseo ca' zjanape' doła' na' len beñe' ca' chososed chosolo'e ley

(Mt. 23:1-36; Mr. 12:38-40; Lc. 20:45-47)

³⁷ Cate' beyož be' Jesúsen' diža' quinga, to beñe' fariseo gwche'e le' liže' cont yesagüe'. Na' gwyo'o Jesúsen' liž beñe' fariseon' na' gwchi'e cho'a mesen'. ³⁸ Na' beñe' fariseon' bebande' ble'ede' bitw bona' Jesúsen' cate' za' gagüe' can' cheson legaque' chesacde' chebe Diosen' legaque' dan' chesone' ca'. ³⁹ Na' Xancho Jesúsen' gože' le':

—Le'e beñe' fariseo nacle ca xiga' ye'en da' chchin beñe' na' chyibe' cožen' binlo perw bi chyibe' do lo'en. Chonle cont chesaque beñe' nacle beñe' güen, perw chebele chca'ale bi da' de che beñe' na' nacle beñe' mal juisyw. ⁴⁰ Bicze bi chejni'ile. Chi' yichjle gacle xilaže' len cuerp chelen'. Lecz ca' cheyała' cue' yichjle gacle xilaže' len yichjlažda'ole, le Diosen' ben' bene' cuerp chechon' lecze bene' yichjlažda'ochon'. ⁴¹ Le yeyaše' beñe' na' le gwnežjo bi da' cheseyažjde'. Še gonle ca', nacia' nacle beñe' laždao' xilaže'.

⁴² 'Nyaše' chguaze gac che le'e beñe' fariseo! La'czla' chnežjwle Diosen' to part lao ši part che yixe'güej, che yej Santa María, na' che bichle cuan chele, bibi zejen dan' bi chonle bichle da' nac da' güen, na' da' bi chaquele Diosen'. Da'

nac da' žialao gonle, gonle da' nac güen na' gaquele Diosen'. Perw bi cuejyichjle gwnežjwle da' ca' chnežjwle Diosen'.

⁴³ 'iNyaše'chguaze gac che le'e bene' fariseo! Chzelaže'le cue'le lo' yodao' txen len bene' blao ca', na' cate' chejle do gan' chac ya'a chaclaže'le yesonxen bene' le'e.

⁴⁴ 'iNyaše'chguaze gac che le'e chsed chlo'ele da' bzoj da' Moisés na' len le'e bene' fariseo! Chonle cont nachbia' gan' xoa ba che bene' guaten', le ley chechon' žan zjanaquen zban na' bi cheyala' gwlejchon. Perw le'e nacle ca ba da' bi zjanacbia'. Chosozenag bene' chele na' bi chesacbe'ede' nacle bene' laždao' zban.

⁴⁵ To bene' chsed chlo'e ley boži'e xtiža' Jesúsen', gože'ne':

—Maestrw, lagüe da' žo' da' quinga, chaqueton' zi'.

⁴⁶ Na' gož Jesúsen' legaque':

—Lecze ca' le'e chsed chlo'ele ley da' bzoj da' Moisés, inyaše'chguaze gac chele! Da' žale da' zan da' cheyala' yeson bene', chonle leyna' ca to yoa' da' nocze no do'e, to yoa' da' chaclaže'le yesoa' bene' yoble, perw le'e ne late'ze bi chaclaže'le gua'len.

⁴⁷⁻⁴⁸ 'iNyaše'chguaze gac che le'e chonšagüe'le cho'a ba che da' bene' ca' gosoe' xtiža' Diosen' cani'! Chacle toze len da' xozxta'ole ca' ben' gosote' legaque'. Na' dan' chonle ca', zejen chazlaže'le dan' gosote' legaquen'.

⁴⁹ Da'n'an' Diosen' lao yela' sina' che' gwne' sele' bene' yesoe'lene' le'e xtižen' na' sele' postlw che' ca' len le'e. Na' gwne' gotle bale' na' gwchi gwsaca'le yebale'. ⁵⁰ Na' da' li ba chonle can' gwnen'. Da'n'an' si'le castigw che yela' got che yogo' bene' ca' gosoe' xtižen' gwzolaon caten' gwxete yežlion' chžinten ža na'aža. ⁵¹ Zan bene' gosot bene' yoble legaque' gwzolaozen len da' Abel ben' beyot da' biše' Caín le', na' beyožen len da' Zacarías ben' gosote' ladjo yodao' blaona' na' ladjo mes de yej dan' zoa chyo'o yodao' gan' chesote' beyixe' cont chesonxene' Diosen'. Na' le'e mbanle na'a si'le castigw che yela' got che yogo' bene' ca'.

⁵² 'iNyaše'chguaze nac le'e chsed chlo'ele ley che Diosen'! Bitw chzejni'ile bene' leyna' to licha can' naquen, neca chzenagle chen. Na' bene' chesacclaže' yosozenaguen', neca choe'le latje yosozenaguen'.

⁵³ Na' cate' beyož be' Jesúsen' diža' quinga, nach bene' fariseo ca' na' bene' ca' chososed chosolo'e ley gosacyožchgüe' len le'. Na' gosaclaže' yesebeje' le' diža' ⁵⁴ le gosaclaže' choj dižan' cho'e da' yosode'ede' yesagüe' xya che'.

12

Yela' güexoayag che bene' fariseo

¹ Na' goc zan mil bene' besežague' gan' zoa Jesúsen', catec bene' zan besežag bosolej bosošošte ni'a lježe'. Na' Jesúsen' zgua'tec gwzolağüe' be'e diža' len bene' ca' zjanaque' le' txen, gože' legaque':

—Le gwsaca' len levadura che bene' fariseo ca'. Dan' cheseziye'e bene' cont yesacde' zjanaque' bene' güen zaca'leben ca levadura dan' chchixede' yetextil. Bitw gonle can' chesonen'. ² Le bitwbi de da' ngaše' da' nacho cbi gwlo'elaon, neca de da' nono na' neze da' nacho cbi yesenezden'. ³ Da'n'an' bite'teze da' gwnale bagaše'ze, bene' zan yesenden'. Na' dan' ba gwnale šižize lo' yo'o chelen', yogo'ze bene' yesenezden'.

Non' cheyala' žebcho

(Mt. 10:28-31)

⁴ Bene' migw chia', chyixjue'eda' le'e bitw žeble bene' ca' yesot le'e, le cate' ba gotle bich bi gac yesonde' le'e. ⁵ San zoa ben' cheyala' žeble, cheyala' žeble

Diosen', le cate' bach beque'e yela' mban chele, lecze nape' yela' chnabia' cont yesele' le'e gabil. Da' yoble chnia' le'e, cheyala' žeble Diosen'.

⁶ 'Nezecho byin dao' ca' bibi zjazaca'tecka', perw na' Diosen' ne toba' bi chanlaže'. ⁷ Na' ca nac chio', da' leca chaque Diosen' chio' neztede' bal yiša' yichj to tocho žia. Da'nana' bitw žeble, le zaca'ch le'e clal ca yogo' byin dao' ca'.

Cheyala' ye'cho bene' nombia'czcho Jesucriston'
(Mt. 10:32-33; 12:32; 10:19-20)

⁸ 'Na' chnia' le'e, note'tez bene' še cho'e diža' len benachen' che'ene' chejle'e chia', lecze ca' neda' gua'a diža' len angl che Diosen' bene' že' yaba yapegaca'ne' bena' naque' neda' txen, neda' naca' ben' gwseła' Diosen' golja' benach. ⁹ Na' note'teze bene' še cho'e diža' len benachen' che'ene' bitw chejle'e chia', lecze ca' neda' gua'a diža' len angl che Diosen' bene' že' yaba yapegaca'ne' bena' bitw naque neda' txen.

¹⁰ 'Na' note'teze bene' še ne' yela' ya' chia' neda' naca' ben' gwseła' Diosen' golja' benach, Diosen' yezi'xene' che' še yetinjde'. Perw note'teze bene' še ne' yela' ya' che Spiritw che Diosen', gwbat yezi'xen Diosen' che'.

¹¹ 'Na' cate' yeseche'exoje' le'e lao bene' gwnabia' che yodaon' o lao justis o še lao nochle bene' gwnabia', bi cuec yichjle nac yoži'ile xtiža'gaquen' o še nacle nale. ¹² Lo hor na'teze gwzejni'i Spiritw che Diosen' le'e bin' cheyala' nalen'.

Bitw cheyala' cuec yichjcho tloaze bi da' de checho

¹³ To bene' bchoje' ladjo bene' zan juisyw ben' zjanžag na', na' gože' Jesúsen': —Maestrw, gonšco' mandadw cont bene' bišan' gone' neda' bien che da' xaxna'to' da' cheyala' si'a.

¹⁴ Na' Jesúsen' gože' le':

—Bitw naca' neda' juez chele. Bi cheyala' gua' neda' laze da' de chele.

¹⁵ Nach gože' yogo'lol bene' ca' že'na':

—Le gwsaca' cont bi selaže'le bi da' gata' chele yežlio nga, la' de bi de checho o la' bibi de checho bi da' chyažj chchinecho, gague da' can' nac yela' mban checho.

¹⁶ Na' be'lene' legaque' to jempl, gwne':

—To bene' gwni'a gocchgua coseš che', ¹⁷ na' bene' xbab lo' yichjlažda'ogüe' gwne': “¿Nacxe gona? Bich bi latje de ga gwže'šagua' coseš chian'.” ¹⁸ Nach gozne': “Quinga gona, yochinja' yo'o gan' že' coseš chia' quinga na' gona' yo'o xench. Na' gwže'šagua' cosešen' na' bichle da' de chia'. ¹⁹ Na' lagüe ba de da' yažjda' da' zan iz, bich gona' žin. Ye'ej gagwteza' con da' chaclaža' na' gona' legr.” ²⁰ Perw Diosen' gože' bena': “Chono' xbab da' bibi zaca'. Na'aže' bžin hor gato', na' ¿nola lo na' gac yogo' da' de chio'?” ²¹ Can' gac che note'tez bene' še con chbec yichje' tloaze da' de che' šlac mbane' na' bi chone' da' chazlaže' Dios.

Diosen' chapši'e xi'ine' ca'
(Mt. 6:25-34)

²² Na' gož Jesúsen' bene' ca' zjanaque' le' txen:

—Da'nana' žia' le'e, bi gacžejlaže'le bi da' gagwle šlac mbanle, na' lecz ca' bi gacžejlaže'le che xalana'le. ²³ Zaca'ch yela' mban chelen' ca yela' guagw. Lecze ca' cuerp chelen', zaca'chen ca xalana'le. ²⁴ Le gon xbab che bechj ca', bitw chesazba', bitw chesyelapba', neca zoa da'a xoa' chegacba', neca zoa ga ncu'a no goš chegacba' ga že' da' yesagwba', perw na' Diosen' chguagwcze'ba'. ¡Nacchle zaca' le'e ca be ca' zjažia xil! ²⁵ Na' ne tole bi gac yoston cuinle gašje metr še con cue' yichjle tonle. ²⁶ Nezele bitw gac yoston cuinle, na' neca naquen da' zaca'. Da'nana' bi gacžejlaže'le che bica'chle da' chyažjele.

²⁷ 'Le gon xbab ca nac yej ca' da' zjaze yix̄e'. Chesecha'oczen, bibi žin chesonen, n̄eca chesalj̄en do. Na' chnia' le'e, da' rey Salomón gocue' lache' güen juisyw, perw bitw bžinlaže' xalane'na' ca yela' xdan che yej ca'. ²⁸ Diosen' none' xdan da' ca' ze yix̄en' la'czla' to chop žaze nitan' na' chosozeyen'. ¡Nacchxe gon Diosen' len le'e gwleccze yichje' gone' yogo' da' chyažjele, le'e late' lasze chejle'le che'! ²⁹ Da'n̄an' bitw güe'laže'le cont gata' da' ye'ej da' gagwle. Bitw gacžejlaže'le chen. ³⁰ Bene' ca' bi chesonxene' Diosen' con chesoe'laže' che bi da' gata' yese'ej yesagüe' na' che xalana'gaque'. Perw Xacho Diosen' nezcede' bi da' ca' chyažjele. ³¹ Cheyala' güe'laže'le gwzenagle che Diosen' cont n̄abi'e yichjlažda'olen', na' yogo' da' ca' chyažjele, goncze Diosen' len.

Da' zaca'ch gata' checho yežincho yaba
(Mt. 6:19-21)

³² 'Bitw žeble la'czla' nac to chople. Diosen' chbede' chnabi'e yichjlaždao' le'e chzenagle che' na' chaclene' le'e. ³³ Le yeyote' da' de chele cont gata' da' gwnežjwle bene' ca' cheseyažje. Še gonle ca', Diosen' gone' le'e da' zaca'ch na' da' cbi te chen cate' yežinle yaba gan' zoe'na'. Na' bitw gac šo' bene' gwban que'en, na' n̄eca gac šo' be dao' gwžiyi' len. ³⁴ Gan' de dan' chaquele nan' zoa yichjlažda'olen'.

Cheyala' soa cuezcho batcan' yide Criston' yeto

³⁵⁻³⁶ 'Le soa le cueze batcan' yida' yeto. Le soa can' nita' bene' chesape' liž xangaquen' šlac zeje' to yela' güešagna'. Zjanyaz xalana'gaque' na' čala' yi'. Nach cate' yežine' na' n̄ie' cho'a yo'on, na' la' yesesaljwte' cont yeyo'e. ³⁷ Mba gac che bene' ca' chesebeze' batcan' yežin xangaquen'. Še nite' chesebeze' le' caten' yežinen', nach gwsini'e da' yesagüe' na' cuine' gwnežjue' legaque' dan' yese'ej yesagüe'. ³⁸ Mba gac čhegaque' še chesebeze' batcan' yežine' la'czla' yežine' do chel o do šbal. ³⁹ Le gon xbab che da' nga. Šaca' neze xan yo'on baten' žin bene' gwban liže'na', le gwna'ze' cont bi güe'e latje šo' bena' liže'na' cuane' xšinlazen'. ⁴⁰ Le soa le cueze batcan' yida' da' yoble, le cate' bi chonle xbab yida', canan' yida', neda' naca' bena' gwseła' Diosen' golja' benach.

Mos ben' chon güen, na' mos ben' bi chon güen
(Mt. 24:45-51)

⁴¹ Pedroa' gože' Jesúsen':

—Xanto', čcho'o jem̄pl nga par neto'ze o še par yogo'lol̄ benach?

⁴² Nach gož Xanchon' Pedroa':

—Naquen par note'tez bene' še chone' can' chon mos blao ben' chejni'i, ben' chon can' cheyala' gone'. Ben' chon ca', co' xane' lo ne'e ližen' cont ne'e mos ca' yezica'chle. Na' gone' da' yesagw to toe' cate' žin hor yesagüe'. ⁴³ Še to bene' mos chonteze' can' ben xanen' mandadw gone', mba soe' cate' yežin xanen'. ⁴⁴ Da' li chnia' le'e, xanen' cue'e lo na' mosen' yogo'lol̄ da' de che'. ⁴⁵ Perw na' še mosen' gone' xbab na' ne': "Ba gwže xanan'", na' solagüe' got čhine' mosa' yezica'chle na' ye'ej gagwxate' na' sožde', ⁴⁶ nach xane'na' yežine' to ža senyale' le' cate' bi gacbe'ede'. Na' da' bi chon mosen' can' cheyala' gone', xane'na' got činchgüe' le' na' gone' cont si'e castigw txen len yezica'chle bene' bi cheson can' cheyala' yesone'.

⁴⁷ 'Na' mos ben' nac bene' güedenag, la'czla' ba nezde' can' che'ne xanen' gone', bi chone' ca'. Bi zoe' chbeze' batcan' yežin xanen', na' da'n̄an' xanen' got činchgüe'ne'. ⁴⁸ Na' bene' bi nezde' bin' non xanen' mandadw gone' na' da'n̄an' chone' da' zaca' čhine' le', na' xanen' bi čhinteque' le' zi'. Note'teze

bene' zjanye'chgua xbab, chese'go'o bene' lo na'gaque' da' zan da' yesone', na' chonen byen yesone' yogo' da' ca' zjajo'o lo na'gaque' yesone'.

Yesedil bene' neche da' bid Jesúsen'
(Mt. 10:34-36)

⁴⁹ Nach gwna Jesúsen':

—Dan' zedeyena' yežlio nga naquen ca to yi' da' cuec bene'. Na' yebeda' šaca' ba chi' yi'na'. ⁵⁰ Za'a cont saca'zi'a na' gata'. Na' chžaglagua' šlac chbeza' žin ža yeyož gaquen. ⁵¹ ¿Chonle xbab bene' že' yežlio yesezoa yesebeze' binlo len lježgaque' na'a dan' ba bidan'? Chnia' le'e, bi yesezoa yesebeze' binlo len lježgaque' na'a ba bida', san yesedile' na' yosošaše'. ⁵² Quinga solao gac na'a, še žan nita' gayo' bene' to lo' yo'o, yesedil legacze', chope' contr šone' na' šone' contr chope'. ⁵³ Yesedil bene' byo len xi'ine' na' xi'ine' len le'. Na' yesedil no'olen' len xi'ine' no'ole, na' xi'ine' no'olen' len le'. Na' yesedil no'olen' len xo'oliže' na' xo'oliže' len le'.

Bitw gosache'ede' bi zeje da' ca' chon Diosen'
(Mt. 16:1-4; Mr. 8:11-13)

⁵⁴ Nach lecze gož Jesúsen' bene' ca' nita' na':

—Cate' chle'ele chi' bejw gan' chxoa gwbiža' na' žale: “Gac yejw”, na' chac ca'. ⁵⁵ Na' cate' chechj be' da' za' ži'le na' žale: “Guac zeye”, na' chac zeye'. ⁵⁶ Bene' gwxiye' le'e. Cate' chle'ele nac chac le'e yaban' na' lo yežlion' nezele še gac yejw o še gac zeye'. ¿Bixchen' bi chache'ele bi zejen da' ca' chon Diosen' tiemp nga zoacho na'a?

Cheyala' goncho cont yezoacho binlo len bene' che'e chio' lao justis
(Mt. 5:25-26)

⁵⁷ ¿Bixchen' bi chonle xbab cont nezele can' cheyala' gonle? ⁵⁸ Cate' to bene' gonle xya che' na' che'e le'e lao justis, šlac ngo'ole nezen' le yeyiljwlaže' nac gonle yezoale binlo len le' cont bi che'e le'e lao justisen'. Še bitw gonle ca', cate' žinle lao justisen' nach gone' le'e lo na' bene' ca' yosejyue' le'e ližya. ⁵⁹ Chnia' le'e bitw yebeje' le'e še bina' chixjwle doxen da' čala'le.

13

Cuiayi'cho še bitw yetinjecho xtoła'chon'

¹ Na' len bene' ca' že'na' gwnita' bal bene' gosoe'lene' Jesúsen' diža', gose'ene' Pilaton' gwsele' soldadw che' ca' jasetue' to xonj bene' Galilea ca' na' bchixde' xčhengaquen' len che beyixe' ca' ba gosote' cont yesonxene' Diosen'. ² Nach boži'i Jesúsen' xtiža'gaquen' gože' legaque':

—¿Chonle xbaba' gosac čhegaque' ca' lagüe dan' gosonche' da' malech clal ca bene' Galilea ca' yezica'chle? ³ Chnia' le'e, bi naquen ca'. Še bitw yetinjele xtoła'le ca', lecze gwžin ža cate' cuiayi'le. ⁴ Nezele che bene' šino'šone ca', šlac zjanite' yež Siloé gwbiže to campanaryw na' gwdenen legaque' na' gosate'. ¿Lecze chonle xbab goc ca' dan' zjanacche' bene' mal clal ca bene' ca' zjaže' Jerusalén? ⁵ Chnia' le'e, gague can'. Še le'e bi yetinjele xtoła'le, lecze gwžin ža cate' cuiayi'le.

Jempl che yag yixgüigw da' bibi chbia

⁶ Na' be'lene' legaque' jempl nga, bzejni'ide'ne' cheyala' yesyetinjde' xtoła'gaque', na' gože' legaque':

—To bene' zoa to yag yixgüigw che' gan' že' yag uvas che' ca'. Na' gwyeje' lo' yaguen' jane'e še de toga yixgüigw gagüe', perw bitw bi bželde'. ⁷ Na' gože' ben' chape' yag che' ca': “Ba chac šon iz chedena'a yag nga še chbian

yixgüigw, perw bitw bi chbian. Gwchoguen, lažjw con zoan nlanen, na' nēca bi chbiazen.”⁸ Na' gož ben' le': “Xana', jayenna', za' zoašazen yetgüiz, che'ena' xanenna' na' cuecan yo beb.⁹ Na' še cuian yixgüigw do yetgüiz, bitec da' güen, perw še bicze bi cuian, nach chogchon.”

Jesúsen' beyone' to no'ole ža che Dios

¹⁰ Na' to ža che Dios bsd blo'e Jesúsen' bene' že' to lo' yodao'. ¹¹ Na' zoa to no'ole bene' ba goc šino'šone iz yo'o nyaz da' xigüen' yichjlažda'ogüe'na'. Na' ben da' xigüen' cont bdohe cuerp che'na', na' gague gocch se' to licha. ¹² Na' cate' ble'e Jesúsen' le', goxe'ne' na' gože'ne':

—No'ole, na'a yeyacdo' yižgüe' chio' nga.

¹³ Na' gwxoā ne'e cuerp che no'ola', na' la' bezete' to licha. Na' no'ola' benxene' Diosen'. ¹⁴ Perw na' bene' gwnabia' che yodao'na' bloque' da' beyon Jesúsen' no'ole güen' ža che Dios. Na' gože' bene' ca' nita' lo' yodaon':

—De xop ža cont gonle žin. Le da lo ža ca' cont yeyone' yižgüe' chelen' perw bitw yidle ža che Dios cont yeyacle.

¹⁵ Nach Xancho Jesúsen' gože'ne':

—Bene' gwxiye' le' len bene' lježo'. ¿Gague lo ža che Dios bia'cze chsežle go'n chele o burr chele ga zjada'ba' chjasanlba' güe'ej nis? ¹⁶ No'ole nga naque' xi'in diaža che da' Abraham, na' Satanásen' dan' chnabia' da' xigüe' ca' benen cont ba bdohe cuerp chen' šino'šone iz. Da'nan' nacczen licha ba beyona'ne' ža che Dios.

¹⁷ Cate' gwne' ca', bene' ca' chesegue'e le' gosacde' zto', perw yogo'lol bene' ca' yezica'chle nita'na' besyebanchgüede' len yogo' dan' ben Jesúsen', le leca güen zjanac dan' benen'.

Yela' gwnabia' che Diosen' naquen ca bin che xomdas

(Mt. 13:31-32; Mr. 4:30-32)

¹⁸ Nach gwna Jesúsen':

—Na'a gwlo'eda' le'e cont nezele šanch bene' yosozenag che Diosen' cont nabi'e yichjlažda'ogaque'. ¹⁹ Da'nan' yela' gwnabia' che Diosen' naquen ca bin che xomdas. To bene' gozen' na' cate' blan' gwcha'on goquen yag cha'o na' be ca' zjazoa xil goson ližgacba' lo xoze' yaga'.

Yela' gwnabia' che Diosen' naquen ca levadura

(Mt. 13:33)

²⁰ Nach da' yoble gozne':

—Na'a nia' le'e yelate' nac nac yela' gwnabia' che Diosen'. ²¹ Naquen ca levadura dan' gwlec no'olen' len to rob yezj cont gwcha'o doxenen.

Cheyala' chiljwlaže'cho nac goncho cont soacho binlo len Diosen'

(Mt. 7:13-14, 21-23)

²² Na' gwda Jesúsen' bsd blo'ede' bene' ca' že' ciuda ca' na' yež ca' gan' bedie' cont bežine' Jerusalénna'. ²³ Na' to bene' gože' Jesúsen':

—Xanto', ¿con to chopze bene' šjasyenite' len Diosen'?

Nach Jesúsen' gože' legaque':

²⁴ —Chnia' le'e, bene' zan chese'nde' yesenite' binlo len Diosen', perw gwžin ža cate' bich gac yesone' cont yesenite' binlo len le'. Da' nac žialao gonle, chiljwlaže'le nac gonle cont soale binlo len Diosen' ²⁵ cont bi gone' len le'e ca ben to xan yo'o cate' bžin hor gwseyjuen'. Gwzože'e bseyjue', na' gwdechle besežin bene' bososiže' le'e puert che'na' na' bich gwsaljue' cont yeso'e. Na' gose'ene': “Gwsaljwšca cont šo'to'.” Na' gože' legaque': “Bitw nombi'a le'e, nēca nezda' ga za'acle.” ²⁶ Can' gac che balle. Nach solaole ye'lne': “Güe'ej gwdagwto' len le' na' bsd blo'edo' neto' la cay lažto'.” ²⁷ Perw na' da' yoble

ye'e le'e: "Bitw nezda' ga bene' le'e. Le šjaya'ac yogo' le'e bene' güen da' mal." Can' ye'e le'e. ²⁸ Na' le'ele Abraham na' Isaac na' Jacob na' yogo'lo' bene' ca' gosoe' xtiža' Diosen' cani' nite' yaba gan' zoa Diosen' chnabi'e. Na' le'e bitw gac šo'lena'. Nach cuežyaše'le na' gagwxejte layle dan' leca žaglaole cate' gache'ele bich gac šo'le. ²⁹ Bene' zan bene' za'ac doxen yežlio yesyežine' yaba gan' zoa Diosen' chnabi'e na' yesebi'e cho'a mes yesagüe'. ³⁰ Nita' bene' zjanaque' bene' bzebe na'a perw gwžin ža cate' yesaque' bene' žialao. Na' nita' bene' zjanaque' bene' žialao na'a, perw gwžin ža cate' yesaque' bene' bzebe.

Begüine' Jesúsen' neche xto'la' bene' Jerusalén ca'
(Mt. 23:37-39)

³¹ Lo ža na'teze ba' bene' fariseo ca' besežine' gan' zoa Jesúsen' gose'ene':
—Cheya'la' yoxonjo' nga gan' chnabia' rey Herodes, le chaclaže' gote' le'.

³² Jesúsen' gože' le'gaque':

—Herodesen' naque' ca to beza' yela' gwxiye' chen'. Le šja'ac na' ye'ine' yeto chope žazen' soa' yebejcha' da' xigüe' ca' zjayo'o zjanyaz yichjlaždao' bene' na' yeyoncha' bene' chesacšene. Ba zoa yeyož gona' dan' cheya'la' gonan'. ³³ Perw ca nac dan' chona' na'a gonchczan' gwxe güižj. Gague ngan' chesote' bene' ca' chesoe' xtiža' Diosen', san Jerusalén chesote' bene' ca'.

³⁴ 'Le'e bene' Jerusalén, chotle bene' ca' chesoe' xtiža' Diosen' na' ca nac nochle bene' ca' chselā' Diosen' len le'e, chchellene' yej. Zan ni'a goclaža' yotoba' le'e ca to jed xcaca' be nche' xi'in na' chyežba' legacba', perw bitw goclaže'le. ³⁵ Na' na'a ba gwlejyichj Diosen' le'e. Na' chnia' le'e, bich le'ele neda' na'a. Cate'ch žin žana' nale: "Mbalaz ben' za' nga nselā' Xancho Diosen' le' cont nabi'e", cana'ch le'ele neda' da' yoble.

14

Jesúsen' beyone' to bene' de yi

¹ Na' to ža che Dios Jesúsen' gwyeje' jatagüe' liž to bene' fariseo ben' nac bene' blao. Na' yezica'chle bene' fariseo ca' chosogüia chesene'e bixen' goncze' cont gata' da' yosode'ede' yesagüe' xya che'. ² Na' lagüe'na' zecha to bene' chacšene, de cuerp chen' yi. ³ Na' gož Jesúsen' bene' fariseo ca' na' bene' ca' chososed chosolo'e ley dan' bzoj da' Moisés:

—¿De lsens len ley chechon' yeyoncho to bene' güe' ža che Dios o še bitw bi lsens de?

⁴ Perw notno boži'i xtiže'na'. Nach Jesúsen' be'ue' na' bena' na' beyone' le', na' gože'ne':

—Guac yeyejo'.

⁵ Nach gož Jesúsen' bene' ca' že' liž bene' fariseon':

—Le'e še zoa to burr o to go'n chele na' lažo'ba' to lo' yechw sitjw, ¿cabi la' yebejteleba' la'saze nac ža che Dios?

⁶ Na' nono goc yoži'i xtiža' Jesúsen'.

Bene' ca' gosaxe' gan' chac güešagna'

⁷ Na' ble'e Jesúsen' can' cheson bene' ca' gosaxe' liž bene' fariseon', gosebeje' gan' zjachi' bene' blao ca' cont gosebi'ena'. Na' Jesúsen' be'e to jempl, gože' le'gaque':

⁸ —Cate' to bene' gaxe' le'e gan' chac güešagna', bitw cue'le gan' cheya'la' cue' bene' blao ca', le še cue'le na', guacte yid bene' nacch bene' blao ⁹ na' xan yo'ona' ye'e le'e: "Le soža' cont cue' benga." Nach do chaquele zto' soža'le cue'le ga yoble len bene' ca' bitec bi zjazaca'. ¹⁰ Na' cate' gan' gaxe' le'e cue'le len bene' bitec bi zjazaca', na' cate' yid xan yo'ona' na' ye'e to tole: "Bene'

migw chia', da cui'o len bene' blao ca.'" Nach gacxenle lao bene' ca' zjachi' len le'e cho'a mesen'. ¹¹ Le note'teze bene' chonxen cuine', Diosen' gone' cont si'e zto' lagüen'. Na' note'teze bene' chzexjwlaže' lagüen', Diosen' gone' cont gacxene'.

¹² Na' lecze gož Jesúsen' ben' goxe' le' ližen':

—Cate' gono' to lni na' gaxo' bene' yesagüe' len le', bitw gaxo' bene' biše' lježo', bene' migw chio' o bene' zjanaque' bene' gwni'a. Legaque' lecze yesaxe' le' ližgaquen', na' yesyegüe'e gwzon lagüe dan' ba goxgaco'ne' ližo'na'. ¹³ Cate' gono' to lni gox bene' yaše' na' bene' nchog no ni'a na'gaque', bene' nxinj ni'e, na' bene' lchol. ¹⁴ Še gaxo' legaque', Diosen' gone' so' mbalaz, le bene' ca' bi gac yesyegüe'e gwzon chio'. So' mbalaz cate' Diosen' yosbane' le' ladjo bene' guat ca' txen len yezica'chle ben' ja'ac to licha cate' gosebane'.

Jempl che to bene' ben lni xen

¹⁵ Na' to bene' chi' cho'a mesen' txen len Jesúsen' bende' xtiže'na' na' gože'ne':
—Mbalaz soacho gagwcho lo lni da' gac caten' ba chnabia' ben' sela' Diosen'.

¹⁶ Nach Jesúsen' gwne':

—To bene' bene' to lni xen, na' goxe' bene' zan šja'ac ližen' cont yesagüe'.
¹⁷ Na' cate' bžin hor yesagüe', na' xan yo'ona' gwsele' xmosen' cont šjatobe' legaque' yesagüe'. Na' cate' jane'e to toe', gože' legaque': "Le šo'o, ba bsiñi'e dan' gagwchon'." ¹⁸ Na' yogo'lole' gose'e ben' bi zjazoe' latje šja'aque' gan' chone' lnin'. Bene' nechon' gwne': "Za' gwxia' to yežlio, na' cheyala' šjana'an. Na' ye'šco' xanon' bitw gac yida'." ¹⁹ Na' yetoe' gwne': "Za' gwxia' gayo' cue' goñ na' na'a šjengaca'ba' prueba. Ye'šco' xanon' si'xene' chia', bitw gac yida'." ²⁰ Na' yetoe' gože'ne': "Za' bšagna'. Da'nan' bitw gac yida'." ²¹ Na' mosen' beyeje' na' jayeže' xanen' can' gose' bene' ca' le'. Nach xan yo'ona' ben' chon lnin' bže'e. Nach gože' xmosen': "Gwyej jata to to cay na' to to nez lo ciudad', na' gwtobo' bene' yaše' na' bene' nchog ni'a na'gaque' na' bene' nxinj ni'e, na' bene' lchol cont yeside' yesagüe'." ²² Gwde bene' ca' nach gože' le': "Xana', ba jatoba' bene' ca' ba gwnaon', na' ne' dehcze latje par bene' yoble." ²³ Nach xane'na' gože' le': "Bchoj lo' ciudad' na' gono' byen yesid ben' nita' chanez. Na' šjaxi'o bene' ca' zjaže' yixe'. Gono' byen yeside' liža' nga yesagüe' cont yežan' bich bi latje šo'. ²⁴ Na' ca' nac bene' ca' goxa' da' nechw, bich gua' latje yesagw legaque' dan' ba bsiñi'ana'."

Dan' cheyala' goncho cont gaccho txen len Jesucriston'

²⁵ Na' bene' zan juisyw zjana'ogüe' Jesúsen', na' gwyecheje' gože' legaque':

²⁶ —Note'teze bene' še chaclaže' šejnilaže' neda' na' gwzenague' chia', še bi gacchde' neda' clal ca' xaxne'e, no'ol che', xi'ine', biše', zane', na' lente cuine', bi gac gone' neda' txen. ²⁷ Na' note'teze bene' bi chzanlaže' cuine' saca'zi'e o gate' ne' chia' neda', lecze bitw gac gone' neda' txen. ²⁸ Še tole che'nele gonle to campanaryw, zgua'tec cue'le na' gonle xbab gwsaca'le ca' do gaca' da' chyažjele cont gonlen, še gaque' xmechwle cont yeyož campanaryon'. ²⁹ Še bi gwchix' gwtole xbab chelna' gaca'te' dan' chyažjele, cate' ba gwlecle lenenna' na' gacbe'ele bich bi mechw de cont yeyožen, na' yogo' bene' yesele'ede' lenenna' yesezi'diže' le'e, ³⁰ yesene': "Benga gwzolao chone' to campanaryw perw bitw beyož xšinen'." ³¹ Na' še to rey chone' xbab tile' len yeto rey, lecze zgua'tec gwsaque' še gwzoede' len ši mil soldadw che' gone' gan yeto rey bene' nche' galje mil soldadw. ³² Na' še chacbe'ede' bi gone' gan, šlac ne' zoa ben' yeto, zito', sele' ben' šjasedie' xtižen' lao rey ben' yeto yesenabe' yesyenite' binlo. ³³ Ca' naquen len le'e, note'tezle še bi cuejyichjle yogo'lol'bi da' de chele, bitw gac gonle neda' txen.

*Cate' zeden' bich naquen zxi'**(Mt. 5:13; Mr. 9:50)*

³⁴ 'Zeden' naquen güen, perw na' še bich naquen zxi', ¿nacxe goncho cont yeyaquen zxi' da' yoble? ³⁵ Bibi zacan', neca gaclenen yežlio, neca gaquen par beb, lete čho'ončhon. Le'e žia nagle da' chene, le gwzenag xtiža'na'.

15*Jempl che xila' ben' gocžeje**(Mt. 18:10-14)*

¹ Na' bene' güečhixjw ca' na' yeba_{le} bene' güen da' xinj, yogüe' gosebigue' gan' zoa Jesús'en' cont gosende' xtiže'na'. ² Na' bene' fariseo ca' na' bene' ca' chososed chosolo'e ley dan' bzoj da' Moisés gosezi'diže' le', gosene':

—Benga chlebe' bene' güen da' xinj ca' na' chagwlene' legaque'.

³ Nach Jesús'en' be'e to jempl, gože' legaque':

⁴ —Še nita' to gayoa xila' chele na' gacžeje toba', ¿bi yocua'anle be ca' taplalj togalj gan' že'ba' latje daša' na' šjaydiljwle ben' ba gocžejena' cont yeželba'?

⁵ Na' cate' yeželban' yebechgüele na' yexoalba' ya'axičhje yeyoa'lba'. ⁶ Na' cate' yežin ližle, gwtoble bene' migw chele na' bene' gualiž chele na' ye'lne': "Le yebe len neda'. Ba bežel xila' chia' ben' gocžeje." ⁷ Chnia' le'e, gwbeche Diosen' txen len angl che' ca' cate' to bene' chon da' mal yetinjde' xtole' clel ca' yesyebede' che taplalj togalj bene' zjanaque' bene' güen bene' bitw de xtoła'gaque' da' yesyetinjde'.

Jempl che mechw dan' gwnit

⁸ Na' le'e no'ole še de ši mechw plata chele na' še nit ton, la' gwguala'tele to yi' na' gwloale lo' yo'o chele na' yeyiljwyožlen cont yeželen. ⁹ Na' cate' yeželenna', na' yotoble no'ole migw chele ca' na' bene' gualiž chele na' ye'le legaque': "Le yebe len neda', le ba beželda' mechw chia' dan' gwnit." ¹⁰ Chnia' le'e lecze chesyebe chesyenzaque' angl che Diosen' bene' zoa yaba cate' to bene' chon da' xinj chetinjde' xtole'na'.

Jempl che ben' benditje xi'inen' xmechue'

¹¹ Na' lecze gože' legaque':

—Gwzoa to bene' na' gwnita' chop xi'ine' bene' byo. ¹² Na' bžin ža bene' xcuiden' gože' xen': "Xa', ben' neda' dan' cheyala' sia' da' de chio'." Nach xen' bnežjue' dan' cheyala' si'en. ¹³ Goc to chop ža nach bene' xcuiden' btobe' yogo'lol bi da' de che' na' gwze'e gwyeje' nación zito' na' zlez da' bi zaca' jene'. Na' benditjde' xmechue'na' zejlene' da' malen'. ¹⁴ Na' cate' beya xmechuen', goc to gwbin juisyw doxen naciónna', na' bich bi gota' xmechue' cont si'e da' ye'ej gagüe'. ¹⁵ Da'nan' gwyeje' gan' zoa to bene' naciónna' gwnabe' žin, na' bena' gwsele' le' yiže' ga že' be zan xčoše' na' jayoe'ba'. ¹⁶ Na' catec gwdone' goclaže' gagüe' dan' chosonežjue' chesagw coš ca', perw ne len ca' bosonežjue' le' gagüe'. ¹⁷ Na' beyone' to xbab šagüe', gwne': "Nita' mos zan che xan' na' dechgua da' chesagüe', na' neda' gatda' yela' chdon. ¹⁸ Yeza' nga na' yeya'a gan' zoa xa' na' yapa'ne' bena' da' mal lao Diosen' na' lao le', ¹⁹ na' bich zaca' gone' neda' cuent ca' xi'ine', con še gone' latje gaca' ca' to xmose'." ²⁰ Nach beze'e beyeje' gan' zoa xen'. Na' zito'le za' yežine' cate' ble'e xen' le' na' beyaše'de' le' na' gwza'sese' jašague'ne'. Na' gwdele'ne' bnopene'. ²¹ Nach gož xi'ine'na' le': "Xa', ba bena' da' mal lao Diosen' na' laguo' le'. Bich zaca' gono' neda' cuent ca' xi'ino'." ²² Na' xe'na' gože' xmose' ca': "Le šjalej tgot lache' šagüe', le guacwben', na' le šjaxi' to niy na' le co'on xbembe', na' le šjaxi' šcuel yel na' gwdelen ni'abe'. ²³ Na' le šjaxi' go'ñ dao' ben' čane' na' le gotba' cont

gagwchoba', le goncho lni. ²⁴ Xi'ina' nga ba bena'be' cuent ca to bi' guat, perw ne' zoabe' mbambe' na'a. Gwlejjichjbe' chio', perw na'a ba bela'be'." Na' gosezolaogüe' chesone' lni.

²⁵ 'Na' xi'ine' bene' nechon' zeje' yixe' cate' bežin xi'inen' yeto ben' benditje xmechuen', na' cate' zeza' ben' gwyej yixen', ba zoa yežine' liž xen' cate' bende' chosocueže' na' chosoye'e. ²⁶ Na' goxe' to mosen' na' gwñabde' le' bixchen' chesone' lni. ²⁷ Na' mosen' gože'ne': "Bi' bišo'na' ba bela' na' xāon' ba betue' go'n daon' ben' chane' chgua da' bela'be' to šagüe' to güen." ²⁸ Nach xi'ine' nechua' bže'e na' bi goclaze' yeyo'e liž xen'. Na' bchoj xen' na' gota'yoede' le' yeyo'e yo'o. ²⁹ Perw xi'ine' bene' nechua' gože' xen': "Zan iz ba chac zoa' nga chonteza' žin con can' žo' le', na' bina' gaca' bene' güedenag. Na' ne to šib dao' caña' gono' neda' cont gota'ba' gona' lni len bene' migw chia' ca'. ³⁰ Na' na'a ba bela' xi'ino' nga benditjbe' yogo'lol da' bnežjo'be' gwdalembe' no'ole zle', na' beto' par lebe' go'n dao' ben' chane'." ³¹ Na' xe'na' gože'ne': "Xi'indagua', le' zoatezo' len neda', na' yogo'lol da' de naquen chio'. ³² Perw cheyała' goncho lni nga na'a da' chbechgüecho ba bela' bi' bišon', le ba bena'be' cuent ca to bi' guat, perw na'a zoabe' mbambe'; gwlejjichjbe' chio', perw ba bela'be'."

16

Jempl che to mos blao ben' benditjde' da' de che xane'

¹ Nach gož Jesúsen' bene' ca' zjanaque' le' txen:

—Gwzoa to bene' gwñi'a na' gwzoa to mos blao che' ben' gwyo'o lo ne'e yogo'lol da' de che'. Na' bene' gwñi'ana' bende' rson xmore' blaon' ba benditjde' bi da' de che'. ² Na' xanen' goxe' le' na' gože'ne': "Ba benda' diža' can' chonon'. Cheyała' yodio' cuent yogo'lol da' ba benditjedo' chia'. Bich gac gono' xšinan' na'a." ³ Nach mosen' bene' xbabn': "¿Bixe gona' na'a? Xanan' ba cholague' neda'. Bich gac gona' xšinen', na' neca gac goncha' žin gual, na' gacda' zto' še naba' carida. ⁴ Nezda' bi gona' cont nita' bene' yesene'e neda' cate' bich chona' žin che xanan'." ⁵ Nach goxe' yogo'lol bene' ca' chesala' xmechw xane'na' tgüej tgüejje' na' gože' bene' nechw: "¿Gaca' čalo' che xana'?" ⁶ Na' bena' gože'ne': "Čala' che tap mil litrw set." Nach gož mos blaona' le': "Bedao'nez gwche'edo' na' bzoj lo cuenten' bzoan čalo' che čhop mil litrwze seten'." ⁷ Gwde na' gože' bene' gwchopen': "¿Gacan' čalo' che xanan'?" Nach bena' gože'ne': "Čala' che to mil rob trigw." Nach mosen' gože' bena': "Gwche'edo' na' bzoj lo cuent chio'na' bzoan čalo' che xono' gayoa robze trigon'." ⁸ Na' xan mos gwxiyen' gočbe'ede' xmosen' leca nye'e xbab da' beyiljwlaže' nacle gone' soe' binlo len lježe' bene' ca' chesala' che xanen'. Le bene' ca' zjachi' yichje' to zleze dan' chac lo yežlion' chesonchgüe' xbab nacle yesone' len dan' zjade čegaque', perw zan bene' ba zjajo'o be'ni' che Diosen' lo' yichjlažda'ogaque' bitw chesone' xbab naclen' yosočine' dan' de čegaque'.

⁹ Na' chnia' le'e, dan' de chele yežlio nga da' te čen', perw le gwčhinen cont nita' migw čele. Na' cate' ba beya bi dan' de čele yežlio nga, nach nita' bene' yosolebe' le'e cate' yežinle yaba gan' soale toli točane.

¹⁰ Še to bene' chone' can' cheyała' gone' len da' bibi zaca'tec, lecz ca' gone' len da' zaca'čgua. Na' bene' bi chone' can' cheyała' gone' len da' bibi zaca'tec, lecz bitw gone' can' cheyała' gone' len da' zaca'čgua. ¹¹ Še le'e bi chonle can' cheyała' gonle len dan' de čele yežlio nga da' te čen', bitw gon Diosen' le'e da' zaca'č da' bi te che. ¹² Dan' de čele yežlio nga, che Diosen' gague čhelen'. Na' še bitw chonle can' cheyała' gonle len da' nac che', bitw gone' le'e da' zaca'č da' bi te čen'.

13 'Nono mos gac gone' žin len chop xane' to ši'ize, le še gone' ca', gue'ede' to xan žinna' na' gacde' yetoe'; o gone' žin che toe' do yichj do laže' na' che ben' yeto gonon' do chža'alaže'ze'. Lecze ca' le'e, bitw gac gonle xšin Diosen' do yichj do laže'le na' gonte xšinle cont gacle bene' gwni'a.

14 Na' lecze nita' bene' fariseo ca' chesende' xtiža' Jesúsen', na' gosezi'diže' le', le gosaclaže' yesaque' bene' gwni'a. 15 Na' gož Jesúsen' legaque':

—Le'e chonle cont benachen' chesacde' chdaczle licha, perw Diosen' neze nle'ede' yichjlažda'ole, na' Diosen' chgue'ede' bal' da' chesaque benachen' zjanaquen da' žialao xen.

Ley che Diosen' na' bene' ca' chnabia' Diosen' yichjlažda'ogaque'

16 Na' gozna' Jesúsen':

—Gwzolaon cani'te bžinten cate' bla' Juanna' bedetixjue'ede' xtiža' Diosen', ley dan' bzoj da' Moisés len dan' bosozoj yezica'chle bene' gosoe' xtiža' Diosen' bzejni'in chio' che Diosen'. Na' na'a gwzolaon len Juanna', ne' nita'cze bene' cheseyixjue'ede' Diosen' nabi'e yichjlaždao' bene' yosozenague' che'. Na' bene' zan cheseyiljue' nacle yesone' cont nabia' Diosen' yichjlažda'ogaque'.

17 'La'czla' še yežlion' len da' ca' zjažia le'e yaban' yesede chegaquen, ca nac Xtiža' Diosen' dan' nyojen, ne late' daon' cbi te chen.

Bi cheyala' yela'acho len no'ol chechon' cont soalencho no'ole yoble

(Mt. 19:1-12; Mr. 10:1-12)

18 'Note'teze bene' chele'e len no'ol che' na' cheque'e no'ole yoble chone' da' xinj, tozcze ca naquen šaca' gata'lene' no'ol che bene' yoble. Na' note'teze bene' yošagna'lene' to no'ole bene' bela'a len bene' che', lecze tozcze ca da' xinj gone' len dan' chon bene' chata'lene' no'ol che bene' yoble.

Bene' gwni'a na' Lázaro

19 Nach gozna' Jesúsen':

—Gwzoa to bene' gwni'a na' xdanchgua goc xalane'na', na' leca gwdagwšagüe' yogo' ža. 20 Na' to bene' yaše' le' Lázaro, yogo' ža jasedixjue' le' cho'a puert zaguan che bene' gwni'ana' cont gwñabe' yosonežjue'ne' con gaca' da' chesezande'. Na' Lázaron' leca gwžia yežo' doxen cuerp chen'. 21 Na' catec gwdone' goclaže' gagüe' bla'a dao' yela' guagw da' beselažo' cho'a mes che bene' gwni'an'. Na' beco' ca' ja'acba' jasele'eba' yežo' dan' gwžia cuerp che'na'. 22 Na' got bene' proben' nach angl bene' že' gan' zoa Diosen' besyezi' besyeque'e le' yaban' gan' zoe' na'a len da' xozxta'ocho Abraham. Na' lecze got bene' gwni'ana' na' bosocuaše'ne' 23 na' beyeje' lo yi' gabil'. Na' šlac chžaglagüe' na' gwlis lagüen' na' ble'ede' zito'le nita' da' Abraham len Lázaron' yabana'. 24 Nach bene' gwni'an' gwne' zižje gwne': “Xa' Abraham, beyaše'laže'šca neda' na' gwseła' Lázaron' cont yosbise' loža' nga len late' nis da' gwlapa' xbene'na', le leca chžaglagua' lo yi' nga.” 25 Perw na' Abrahanna' gože' le': “Xi'ina', bosa'laže' cate' gwban' yežlio zleze da' šagüe' da' güen gota' chio', na' Lázaro nga to zleze da' mal goc che'. Na' ba zoe' mbalaz nga na'a na' le' chžaglaguo'. 26 Bi gac gona' can' chaclažon', le Diosen' bach nze' to bdiñj xen ga nono gac te, cont nono gac sa' nga šeje' gan' zon', neca nono gac sa' gan' zon' na' yide' nga.” 27 Nach bene' gwni'ana' gože' Abrahanna': “Bene' gol dao', chata'yoeda' le' gwseła' šca Lázaron' liž xan'. 28 Nita' gayo' bene' biša' na' che'nda' šjatixjue'ede' legaque' nac yesone' cont Diosen' bi yesele' legaque' latje nga gan' yesežaglagüe'.” 29 Na' Abrahanna' gože' le': “Decze dan' bzoj da' Moisésen' na' dan' bosozoj yezica'chle bene' ca' goso'e xtiža' Diosen' cani'. Cheyala' yosozenague' che da' ca' zjanyojen.” 30 Na' gože' Abrahanna': “Bitw, bene' gol dao'. Še to bene' yebane' ladjo bene' guat na' güe'lene' legaque'

diža', nach yesyetinjde' xtoła'gaquen'." ³¹ Nach gož Abrahanna' le': "Še bitw chosozenague' che dan' bzoj da' Moisésen' na' dan' bosozoj yezica'chle bene' ca' goso'e xtiža' Diosen', la'czła' še yeban to bene' ladjo bene' guat ca', bi yesejle'cze' che Diosen'."

17

Bitw cheyala' goncho cont gon bene' da' xinj
(Mt. 18:6-7, 21-22; Mr. 9:42)

¹ Na' gož Jesúsen' bene' ca' zjanaque' le' txen:

—Decze da' gonen cont lažo' bene' yesone' da' xinj, perw nyaše'chguaze gac che bene' chone' cont bene' yoble yesone' da' xinj. ² Yejni'a šaca' yosocheje' yene' to yiše na' šjasezale' le' lo' nisdao' clal ca' soe' gone' cont to bene' za' gwzologüe' chejnilaže' neda' lažoe' gone' da' xinj. ³ Da'nan' le' gwsaca' cont bi gonle ga lažo' bene' gone' da' xinj.

'Na' še to bene' lježle gonde' le'e mal, le tile' na' še gwše'e xbab na' ne' bich gone' ca', le yezi'xen che'. ⁴ La'czła' gaž ni'a lao tža gone' da' mal contr bene' lježen', še gaž ni'ate ne': "Ba betinjda' che dan' benan', bezi'xen chia", na' cheyala' yezi'xene' che'.

Gosaclaže' yesejle'che' che Diosen'

⁵ Na' gose' postlw ca' Xancho Jesúsen':

—Gaclenšco' neto' cont šejle'chto' che Diosen'.

⁶ Nach gož Xancho' le'gaque':

—Xsa yag xomdas naquen da' dao' riz, na' la'czła' dan' chejnilaže'le Diosen' naquen ca' to xsa xomdas lagüe dan' bi chejnilaže'teclne', še šejnilaže'line', guaqué ye'le yag nga: "Gwcuase nga na' jayzoa lo' nisdaon", na' guaccze can' nalna'.

Dan' cheyala' yeson mos ca'

⁷ Le'e še mos chelen' chgua'ane' go'ñ, o še chyoe' xila', cate' chele'e güeyeban' bitw che'line': "Beyo'o ngale, gwche'edo' gaguo' xše'." ⁸ San che'line': "Bsinia' da' ye'ej gagua' na' gonon'. Te yedaguan' nach gago'." ⁹ Na' bitw cho'elne' yela' choxcen cate' ba bene' dan' gožlene'. ¹⁰ Na' lecz ca' le'e, cate' ba benle yogo'lol dan' ža Diosen' gonle, cheyala' nale: "Bitw zaca'to' no gon yela' choxcen cheto' ca' dan' ba bento', le bento' con da' cheyala'cze gonton'."

Jesúsen' beyone' ši bene' chese'ede' yižgüe' da' nzi' lepra

¹¹ Na' zej Jesúsen' Jerusalénna' len bene' ca' zjanaque' le' txen na' gwddie' gan' ndil distritw Samaria len distritw Galilean'. ¹² Na' besežine' to cho'a yež dao' na' besechoj ši bene' chese'e yižgüe' da' nzi' lepra jasešague' Jesúsen'. Na' gosezie' zito' ¹³ na' gosene' zižje gosene':

—Maestrw Jesús, beyaše'laže' neto'.

¹⁴ Na' Jesúsen' cate' ble'ede' le'gaque' na' gože'ne':

—Le šjaya'ac lao bxož ca' cont yesene'e le'e še ba beyacle.

Na' goquen' lo' neza' besyeyacde'. ¹⁵ Nach toe' cate' gočbe'ede' bach beyaque', na' bebi'e na' gwnie' zižje benxene' Diosen', ¹⁶ na' bzoa xibe' lao Jesúsen' bi'e le' yela' choxcen. Ben' ben ca' naque' to bene' Samaria. ¹⁷ Nach gwna Jesúsen':

—Beyona' ši bene'. ¿Ganxe bene' ca' yega? ¹⁸ ¿Toz bene' zito' nga bebi'e chonxene' Diosen'?

¹⁹ Nach gož Jesúsen' bena':

—Bezoža' beyej to šagüe' to güen. Ba beyacdo' da' chejnilažo' neda'.

Yela' chnabia' che Diosen'
(Mt. 24:23-28, 36-41)

²⁰ Na' bene' fariseo ca' gosenabde' le' batxen' yid ben' sela' Diosen' nabi'e naci3n Israelen'. Nach boži'i Jesúsen' xtiža'gaquen' gwne':

—Ca nac yela' gwnabia' che Diosen', bi naquen da' le'echo. ²¹ Nono cheyala' güe' diža' ne': “Gwna' nga chnabi'e”, o “Gwna' na' chnabi'e.” Le ba zoe' len le'e na'a chnabi'e.

²² Nach gože' bene' ca' zjanaque' le' txen:

—Gwžin ža cate' nale: “Šaca' na'a ba chnabia' ben' gwseła' Diosen'”, perw bitw gac can' nablaže'len'. ²³ Yesenita' bene' yesi'e le'e: “Gwna'šc nga zoa ben' gwseła' Diosen'”, o “Gwna'šc na' zoa ben' gwseła' Diosen'.” Perw bitw ga'ole ben' yesi'e le'e ca'. ²⁴ Can' chac cate' chep yes, chsenin' doxen le'e yaban' zejzenez, lecze can' gac cate' žin ža yida' da' yoble, neda' naca' ben' gwseła' Diosen' golja' benačh. Yida' zejzenez na' yogo'lol bene' yesele'ede' neda'. ²⁵ Zgua'tec de da' zan da' cheyala' saca'zi'a na' bene' ca' že' na'a bitw yesejle'e chia'. ²⁶ Lecz ca' goc ca' timp che da' Noé, lecze ca' gac cate' ba zoa žin ža yida' da' yoble, neda' naca' ben' gwseła' Diosen' golja' benačh. ²⁷ Bene' gwnita' ca' timp che da' Noén' gosaše' gose'ej gosagüe' gosolaže' bosošagne'e na' bosošague' na' no xi'in' che' cate' bžin ža gwyo'o Noén' lo' barcon'. Nach goc to yejwsio' juisyw. Na' gosebiayi' yogo' bene' ca' bi gosolaže' lo' barcon'. ²⁸ Lecz ca' goc ca' timp che da' Lot, bene' Sodoman' gose'ej gosagüe' gosote' bi da' de čhegaque', na' gosezi'e bi da' beseyažjde', na' gosaz gosa'ane', na' goson liže'. ²⁹ Perw na' žan' beza' Loten' Sodoman', Diosen' bene' cont byinj yi' na' azufre yaba na' gosebiayi' yogo'lole'. ³⁰ Can' gac cate' yida' da' yoble, neda' naca' ben' gwseła' Diosen' golja' benačh, na' yogo'lol bene' yesele'ede' neda'.

³¹ Na' ža caten' yida' še chda to bene' do yichjo'o che liže', na' xšinlaze' žen' lo' yo'o che', bi yeyetje' cont yotoben', con yoxonje'. Na' lecze ca' bene' chda do yixe', bitw gacde' yeyej liže'. ³² Le šjayza'laže' can' goc che no'ol che Loten'. ³³ Note'tez bene' chacde' gone' cont cbi saca'zie' o cont nono yesot le', bena' cuiayi'. Na' note'tez bene' chzanlaže' cuine' saca'zie' o gate' ne' chia' neda', ba de yela' mban che' toli' tocaņe.

³⁴ 'Chnia' le'e, quinga gac caten' yida' da' yoble. Čhope bene' zjadie' chesetase' toz cam. Toe' yeca'a Diosen' na' yetoe' yega'an. ³⁵ Na' čhop no'ole nite' txen chesote', toe' yeca'a Diosen' na' yetoe' yega'an. ³⁶ Na' čhope bene' nite' do yixe', toe' yeca'a Diosen' na' lecze yega'an yetoe'.

³⁷ Cate' gosende' diža' nga gose'e le':

—¿Gan' gac da' qui, Xanto'?

Nach Jesúsen' gože' legaque':

—Nga chonen che ben' že': “Gan' de be guat nan' chesežag šod ca'.”

18

Jempl che to no'ol güezeb len to juez mal

¹ Na' be'len Jesúsen' legaque' to jempl bsd blo'ede' legaque' cheyala' nita'teze' yesončhačhlaže' yosol güiže' Diosen'. ² Na' gože' legaque':

—Gwche' to ciuda ga gwzoa to juez na' juezen' bi gwdape' Diosen' bala'an na' neca gwche'yichje' še chesazlaže' benačhen' can' chonen'. ³ Na' ciudan' gwzoa to no'ol güezeb, na' goxjze cheje' lao juezen' na' che'e le': “Ben yela' justis chia' len bene' chgue'ede' neda'.” ⁴ Ba goc sša bi chzenague' che', perw gwdechle bene' xbab, gwne': “Bitw chapa' Diosen' bala'an na' neca chi'yichja' še chesazlaže' benačhen' can' chonan'. ⁵ Perw na' no'ol güezeb nga chone' neda' zed, na' na'a gaclena'ne' cont bich yide' yostoe' yela' chxenlaže' chia'.”

6 Nach gož Xanchon' legaque':

—Le gon xbab che dan' gwna juezen' ben' bi zej to licha. 7 Nacchxe gon Diosen' gwzenagche' che bene' ca' ba gwleje' cont zjanaque' xi'ine', bene' ca' chosol güiže' le' do ža do yel. ¿Gwleze' sša cont yosle' legaque' lo na' bene' ca' chesegue'ede' legaque'? 8 Chnia' le'e, Diosen' bedao'nez yosle' legaque' lo na' bene' ca'. Perw cate' neda' yida' yežlio nga yeto, neda' naca' ben' gwseła' Diosen' golja' benach, ¿ne' nita'ch bene' chesejnilaže' neda'?

Jempl che to bene' fariseo len to bene' güechixjw

9 Gwnita' bal bene' gosacde' zjanaque' bene' güen lao Diosen' neche da' chesone'. Bene' ca' chesacde' bene' ca' yezica'chle bibi zjazaque' len Diosen'. Na' Jesúsen' bi'e jempl nga da' bcuišen bene' ca', gwne':

10 —Chope bene' ja'ac yodao' blao jasel güiže' Diosen', toe' bene' fariseo na' yetoe' bene' güechixjw. 11 Bene' fariseon' gwzeze' bol güiže' Diosen' na' con chonxen cuine', gwne': “Dios, neda' chona' yela' choxclen chio' bitw chona' cana' cheson yezica'chle bene'. Bitw chca'a bi da' de che bene' yoble, na' bitw chona' bichle da' mal. Bitw chata'lena' no'ol bi nac no'ol chia', na' neca naca' bene' mal can' nac bene' güechixjw ni. 12 Chope ni'a to xman chona' gwbas, na' yogo'lol da' chona' gan, chbecan' ši cuen na' chnežjua' to cuen che yodao'.” 13 Na' bene' güechixjon' gwzeteze' zito'le, neca cheyaxjde' lis lagüe' yabale. Nach chbaže' lcho'e gwne': “Dios, beyaše'laže' neda' naca' bene' güen da' xinj.” Da'na'z da' gwna bene' güechixjon'. 14 Na' chnia' le'e, Diosen' bezi'xene' che bene' güechixjon' na' beyej liže' bibi xtóle' gota'. Perw bi goc ca' len bene' fariseon'. Le note'tez bene' chonxen cuine', Diosa' gone' cont si'e zto', na' note'tez bene' chzexjwlaže' lagüen', Diosen' gone' cont gacxene'.

Jasesane' bidao' lao Jesúsen'

(Mt. 19:13-15; Mr. 10:13-16)

15 Na' jasesane' bidao' lao Jesúsen' cont xoa ne'e yichjgacbe'. Na' cate' bene' ca' zjanaque' le' txen besele'ede' can' chesonen', gosedile' legaque'. 16 Perw na' Jesúsen' goxe' bene' ca' cont yeside' len bidao' chegaquen', na' gože' bene' ca' zjanaque' le' txen:

—Le güe' latje yesid bidao' ca' lagua' nga, bi gwžonle, le bene' ca' zjanac ca' bidao' quinga, legaque' chosozenague' che Diosen' cont chnabi'e yichjlažda'ogüe'. 17 Na' da' li žia' le'e, note'teze bene' bi yosozenague' che Diosen' ca' cheson bidao' quinga cate' chosozenagbe' che xaxna'be', gwbat nabia' Diosen' yichjlažda'ogaque'.

To bene' gwni'a be'lene' Jesúsen' diža'

(Mt. 19:16-30; Mr. 10:17-31)

18 To bene' gwnabia' gože' Jesúsen':

—Maestrw, le' naco' bene' güen. ¿Bi cheyala' gona' cont gata' yela' mban chia' toli tocane?

19 Nach Jesúsen' gože'ne':

—¿Bixchen' žo' naca' bene' güen? Toz bene' güen zoa, na' len' Dios. 20 Le' nezdo' da' none' mandadw goncho: “Bi gata'lenle no'ol bi nac no'ol chele o bene' byo bene' bi nac bene' chele. Nono gotle. Bi cuanle. Bi güe'le diža' güenlaže' che bene' lježle. Le gap bala'an xaxna'le.”

21 Na' gož ben' le':

—Yogo'lol da' quinga gwzolagua' chonzan' cate' ne' nactia' bidao'.

22 Nach cate' bene' Jesúsen' xtižen' na' gože'ne':

—Zoa to da' ne' chyažjen gono', jayete' yogo' da' de chio', na' mechw dan' le'edo' chen, bnežjon bene' yaše'. Yeyoža' šejnilažo' neda' na' yo'o gaco' neda'

txen. Nach še gono' ca', cate' yežino' yaba gan' zoa Diosen' da' zaca'ch gata' chio'.

²³ Perw na' bena' cate' beyož bende' diža' dan' gož Jesúsen' le', go-cyaše'chgüede', le bene' gwñi'achgua goque'. ²⁴ Na' Jesúsen' gwne'e bene' gwñi'ana' na' gože'ne':

—Leca zdebe naquen to bene' gwñi'a gwzenague' che Diosen' cont Diosen' nabi'e yichjlažda'ogüe'. ²⁵ Bedao'ch te to be xen be nzi' camello to lo' nag yeše' clel ca to bene' gwñi'a gwzenague' che Diosen' cont Diosen' nabi'e yichjlažda'ogüe'.

²⁶ Na' bene' ca' bosozenague' xtiže'na' gose'ene':

—¿Noxen' šjayzoa len Diosen' še ca'?

²⁷ Na' Jesúsen' gože' legaque':

—Da' bi gac gon beñachen', bitw nacho bi gac gon Diosen' len.

²⁸ Nach Pedroa' gože' le':

—Neto' ba gwlejyichjto' yogo' da' de cheto' cont nacto' le' txen.

²⁹ Na' gož Jesúsen' legaque':

—Da' li žia' le'e, note'teze bene' ba gwlejyichje' liže', xaxne'e, biše', xo'ole' o xi'ine' neche chzenague' che Diosen' cont Diosen' chnabi'e yichjlažda'ogüe', ³⁰ yežlio nga yonežjo Diosen' le' da' nac da' zaca'ch, na' cate' yežine' yaban' gata' yela' mban che' toli tocañe.

*Da'yoble gosyixjue'e Jesúsen' ba zoa gate'
(Mt. 20:17-19; Mr. 10:32-34)*

³¹ Na' gwlejiže Jesúsen' bene' šižinw ca' gwleje' cont zjanaque' txen len le' na' gože' legaque':

—Na'a ba zejcho Jerusalénna' gan' gac yogo'lol dan' nyoj chia' dan' bosozoj da' bene' ca' gosoe' xtiža' Diosen' cani', neda' naca' bena' gwsela' Diosen' golja' beñach. ³² Gaca' lo na' bene' ca' bi zjanac bene' Israel, na' yesezi'diže' neda', na' yesene' yela' ya' chia', nach yosoži'e xene' cho'alagua'. ³³ Yesot yeseyine' neda' na' yesote' neda', perw yeyon ža yebana' ladjo bene' guat ca'.

³⁴ Perw bene' ca' zjanaque' Jesúsen' txen bi gosejni'ide' dan' gože' legaque', le zjanchol yichjlažda'ogüen', da'nana' bi gosejni'iden'.

*To bene' lchol bene' Jericó bele'ede'
(Mt. 20:29-34; Mr. 10:46-52)*

³⁵ Nach cate' ba zoa yežin Jesúsen' Jericó, to bene' lchol chi'e chanezen' chñabe' yosonežjo bene' le' con gaca' da' chesezande'. ³⁶ Na' bende' chesede bene' zan gan' chi'ena', na' gwñabe' bin' chac. ³⁷ Na' gose'ene':

—Jesús bene' Nazaret chdie' laguo' nga.

³⁸ Na' bosya'adie' gwne':

—Jesús, xi'in diaža che da' rey David, beyaše'laže'sca neda'.

³⁹ Nach bene' ca' zjažialao lao Jesúsen' gosedi'e bene' lchol'en', gose'e le' cheya'la' soe' šize, perw nachle bosya'adiache', gwne':

—Xi'in diaža che da' rey David, beyaše'laže'sca neda'.

⁴⁰ Jesúsen' gwleze', nach bene' mandadw šjasexi'e bene' lchol'en' lagüe'na'. Na' cate' gwbiga' bene' lchol'en' lao Jesúsen', nach gože'ne':

⁴¹ —¿Bi chaclažo' gonda' le'?

Na' bene' lchol'en' gože'ne':

—Xana', benšca cont yele'eda'.

⁴² Jesúsen' gože'ne':

—Bele'e. Dan' chejnilažo' neda' bach beyac yejlagon'.

⁴³ Na' la' bele'ete bene' lchoła' na' gwda'ogüe' Jesúsen' benxene' Diosen'. Na' lecze ca' yogo' bene' ca' besele'ede' can' goquen' gosonxene' Diosen'.

19

Jesúsen' na' Zaqueo

¹ Nach Jesúsen' gwyo'e yež Jericó na' gwdeze' yešła'a ciudan'. ² Na' zoa to bene' le' Zaqueo. Naque' bene' gwnabia' che bene' güechixjw ca', na' naque' bene' gwni'a. ³ Gwdiljwlaže' naclen' gone' le'ede' Jesúsen', perw bitw goc, le gwnita' bene' zan len Jesúsen' na' Zaqueon' goque' to bene' bčhecw dao'. ⁴ Da'nán' gwza'sese' gwđie' lao bene' ca' cont gwyep'e to lo yag da' zoa gala'ze gan' te Jesúsen'. ⁵ Perw na' cate' bžin Jesúsen' xan yaguen', gwne'e lo yaguen' na' gože'ne':

—Zaqueo, bedao'nez beyetj. Cheyala' yega'ana' ližo' na'aže'.

⁶ Nach Zaqueon' beyetjsese' chebede'. Nach beče'e Jesúsen' liže'na' na' benxene' le'. ⁷ Perw na' bene' ca' zjanžague' len Jesúsen' cate' besele'ede' can' goquen', yogüe' gosenie' che Jesúsen' gosene':

—Ba zeje' zjazoe' to liž bene' güen da' xinj.

⁸ Nach Zaqueon' gwzeche' na' gože' Xanchon':

—Xana', gašje dan' de chia' gwnežjuan' bene' yaše'. Na' dan' ba gwca'a che bene', gwziya'a legaque' cont goseyixjwche' da' zcha'och ca dan' cheyala' yeseyxjue', yonežjwgaca'ne' tap ca'te'le.

⁹ Na' Jesúsen' gože'ne':

—Na'aža ba ben Diosen' yela' mban chio' toli tocañe len che bene' lo' yo'o chio'. Na' da' li ba naco' xi'in diaža che da' Abraham lagüe dan' ba chejnilažo' Diosen' can' ben da' xozxta'ocho Abraham. ¹⁰ Ca nac neda', gwsela' Diosen' neda' golja' benach cont zedyediljua' note'tez bene' ba mbiayi', na' gwnežjua' legaque' yela' mban toli tocañe.

Jempl che ši bene' bnežjw xangaque' legaque' mechw xen

¹¹ Na' šlac ne' zjanžag bene' chosozenague' diža' dan' choe' Jesúsen', be'lene' legaque' to jempl, le ba nite' gala'ze Jerusalénna' na' gosacde' la' solaote nabi'e nación Israelen'. ¹² Nach gwne':

—To bene' blao gwyeye' to yež zito' jene' dan' cheyala' gone' cont jaxi' lo ne'e nabi'e yež che', le gosebeje'ne' nabi'e yež chen' cate' yežine'. ¹³ Na' cate' za' se'e, gwleje' ši mos che' na' bnežjue' to toe' mechw xen. Nach gože' legaque': “Mechw nga gonele negosyw šlac bi zoa”. ¹⁴ Perw bene' gualaž chen' besegue'ede' le', nach cate' beyož gwze'e, gosesele' bene' lao xane'na' ben' gwnabia'che' lao yogüe', jaseže'ne': “Bitw chaclaže'to' nabi'a' benga neto'.” ¹⁵ Perw la'czla' bi gosaclaže' bene' gualaž chen', bia'cze gwxi' lo ne'e nabi'e. Nach cate' bežin lažen' da' yoble, bene' mandadw šja'ac xmose' bene' ši ca' lagüe'na', bene' ca' bocua'anlene' xmechuen'. Goclaže' nezde' gaca' gosone' gan len mechw dan' bocua'anlene' to toe'. ¹⁶ Bene' nechw bžine' lagüen' na' gože'ne': “Xana', xmecho' dan' bocua'anleno' neda' benen gan ši ca'te'le ca dan' bocua'anon'.” ¹⁷ Nach xanen' gože'ne': “Ba beno' da' güen. Naco' mos güen. Beno' can' cheyala' gono' len da' daon' bocua'anlena' le', da'nán' gona' cont nabi'o ši ciuda.” ¹⁸ Na' bene' gwchopen' bžine' lao xanen' na' gože'ne': “Xana', xmecho' dan' bocua'anleno' neda' benen gan gayo' ca'te'le ca dan' bocua'anon'.” ¹⁹ Nach gože' le': “Le' nabi'o gayo' ciuda.” ²⁰ Nach bžin yetoe' lao xane'na' na' gože'ne': “Xana', nga de xmecho' dan' bocua'anleno' neda'. Ba blažechachan' bay nga. ²¹ Bžeba' le' dan' naco' to bene' znia. Chono' gan da' bi beno' žin na' chelapo' dan' gosaz bene' yoble.” ²² Nach gož xanen' le':

“Dan' ba gwnao' ca' chlo'en napo' doła'. Naco' mos mal. Chacdo' naca' to bene' znia, na' nezdō' chona' gan da' bi bēna' žin na' chelapa' dan' gosaz bene' yoble. ²³ Na' še nezdō' chona' ca', žbichen' bi gwlejo' xmechuan' bene' yoble cont yezian' len yichjen na'a ba bela'a?” ²⁴ Nach gože' bene' ca' zjaze cuite'na': “Yeca'ale xmechuan' dan' bocua'anlena'ne' na' gwnežjwlen ben' ba noxe' ši ca'te' ca' dan' bocua'anlena'ne'.” ²⁵ Nach gose'e le': “Xanto', ba noxe'cze' ši ca'te' ca' dan' bocua'anleno'ne'.” ²⁶ Nach gož bene' gwnabian' legaque': “Chnia' le'e, ben' chon güen len dan' chnežjua'ne', gwnežjua'ne' da' zcha'och, perw na' bēna' bi chgone' žin dan' chnežjua'ne', yeca'a da' daon' noxe'na'. ²⁷ Na' ca' nac bene' ca' chesegue'ede' neda', bene' ca' bi chesaclačže' nabia'gaca'ne', le šjaxi'e na' gotlene' lagua' nga.”

Gosonxene' Jesúsen' cate' beyo'e Jerusalén
(Mt. 21:1-11; Mr. 11:1-11; Jn. 12:12-19)

²⁸ Na' cate' beyož be' Jesúsen' jempl nga nach gwze'e zeje' ciuda Jerusalén. ²⁹ Na' cate' ba zoa yesežine' yež ca' da' zjanzi' Betfagé na' Betania do gan' zoa ya'a da' nzi' Ya'a Olivos, na' gwsele' chop bene' ca' mandadw ben' zjanaque' le' txen, ³⁰ gože' legaque':

—Le šja'ac yež dan' chi' galaze, na' cate' žinlen' na' yeželele to burr dao' da'ba' yag, be nono na' cuia. Le sežba' na' le che'ba' nga. ³¹ Še no nab bixchen' chsežleba', na' ye'ne': “Xanto' chyažjde'ba'.”

³² Nach bene' ca' gwseła' Jesúsen' gosa'aque' na' besele'ede'ba' da'ba' gan' gož Jesúsen' legaque' ca'. ³³ Nach šlac cheseseže'ba', xamba' ca' gose'e legaque':

—žBixchen' chsežle burr daon'?

³⁴ Nach bene' ca' gwseła' Jesúsen' gose'e legaque':

—Xanton' chyažjde'ba'.

³⁵ Nach goseche'eba' lao Jesúsen' na' gosexo'a xagaque' cože'ban' nach bosožie' Jesúsen'. ³⁶ Na' šlac zeje' ngüe'e nez bene' ca' zjanžag gosonxene'ne', na' goseyixjw no xagaque' lo nez cont blej burron' len. ³⁷ Nach ba zja'aque' galaze Jerusalénna' na' besežine' gan' yesyeyetje' Ya'a Olivos. Na' bene' ca' zja'aclene' le' gwzolao gosonxene' Diosen', zižje cheso'e diža' che yogo'lol' yela' guac da' ba besele'ede' da' ben Jesúsen'. ³⁸ Nach gosene':

—žMbalaz rey chechon' ben' ba za' nga gwseła' Xancho Diosen' le' cont nabi'e! Cheyala' gonxenko Diosen' txen len bene' ca' nita' gan' zoe'na', le ba bene' cont benachen' gac yesyenite' binlo len le'.

³⁹ Na' len bene' zan ca' zja'aclene' Jesúsen' zja'ac bal bene' fariseo. Nach to chope' gose'e Jesúsen':

—Maestrw, ben mandadw len bene' ca' za'ac len le' txen cont yesenite' šize.

⁴⁰ Nach boži'i Jesúsen' xtiža'gaquen', gwne':

—Chnia' le'e, šaca' bene' quinga nite' šize, yej quinga yesosya'an yesonxenen neda'.

⁴¹ Cate' bžine' galaze Jerusalénna', gwne'e ciudan', na' bene' xbab che bene' lo' ciudan' na' gwchežyaše', ⁴² na' gwne':

—Šaca' la'ch na'aža šejni'ile nac gonle cont soale binlo len Diosen', perw na'a ne' ngašen'. ⁴³ Gwžin ža cate' bene' ca' chesegue'ede' le'e yesone' to yež de yej da' šečhjen ciudan' cont nono gac yoxonj. ⁴⁴ Na' yesote' le'e len xi'inle ca'. Na' yosyočinje' ciudan' na' yesoslase' yej ca'. Ca' gac lagüe da' bi chejle'le Diosen' ba gwsele' neda' laole nga.

Jesúsen' bebeje' bene' ca' cheson ya'a yodao' blaon'
(Mt. 21:12-17; Mr. 11:15-19; Jn. 2:13-22)

⁴⁵ Jesúsén' gwyo'e chyo'o yodao' blaona' na' gwzologüe' bešaše' bene' ca' chesote' na' bene' chesa'o na'. ⁴⁶ Na' gože' legaque':

—Nyojczy Xtiža' Diosen' žan: “Ližan' naqen to latje gan' yesoḷ güiž bene' neda”, perw le'e ba benlen ca to latje ga že' bene' gwban.

⁴⁷ Na' bsed blo'ede' bene' ca' že' yodao' blaona' yogo' ža. Na' bḫoz gwnabia' ca' na' bene' ca' chososed chosolo'e dan' bzoj da' Moisésen' na' nochle bene' blao che bene' Israel ca', goseyiljwlaže' nacle yesone' yesote'ne'. ⁴⁸ Perw bi besyeželde' nacle yesone' le' neche yogo' bene' besyebechgüede' xtiže'na'.

20

Yela' gwnabia' che Jesúsén'

(Mt. 21:23-27; Mr. 11:27-33)

¹ To ža šlac chsed chlo'e Jesúsén' bene' ca' chyo'o yodao' blaona' na' chyixjue'ede' diža' güen che Diosen', besežin bḫoz gwnabia' ca' na' len bene' gol ca' chesenabi'e nacióñna' na' bene' ca' chososed chosolo'e dan' bzoj da' Moisés. ² Na' gose'e le':

—Gwnašč neto' bi yela' gwnabia' napo' chono' da' qui, na' no beḅ yela' gwnabian' cont chonon'.

³ Na' boži'e xtiža'gaquen', gwne':

—Lecze de to da' nabda' le'e. Le našč neda' ⁴ ¿non' gwsela' da' Juanna' bzoe' bene' nis? ¿Dios nan' gwsele'ne', še beḅačhen'?

⁵ Na' legacze' gose' lježe':

—¿Bi nacho? Še ye'chone' Dios gwsela' le', na' ye'e chio': “¿Bixchen' ca' gweyle'le che'?” ⁶ Na' bi gac ye'chone' beḅač gwsela' le', le yogo'te bene' že' nga chesejle'e Diosen' gwsele' da' Juanna' be'e xtiže'na', na' yosožie' chio' yej še ye'chone' ca'.

⁷ Na' gose'e Jesúsén':

—Bi nezeto' non' gwsela' da' Juan.

⁸ Nach Jesúsén' gože' legaque':

—Lecz ca' neda' bi yapa' le'e bi yela' gwnabian' chonlenda' da' ca'.

Jempl che mos mal ca'

(Mt. 21:33-44; Mr. 12:1-11)

⁹ Na' be'e jempl nga bzejni'ide' bene' ca' chosozenag che', gwne':

—To bene' goze' to cue' xen yag uvas na' bocua'anen' lo na' bene' ca' yesonen' žin na' gwze'e gweje' zito' na' jasoe' sša. ¹⁰ Cate' bžin ža yosytobe' cosešen', nach gwsela' to xmose' lao bene' ca' nac lo na'gaque' yag uvasen' cont yosyonežjue'ne' to tlaw coseš dan' yesyezi'en. Na' bene' ca' nac lo na'gaque' yag uvasen' goseyine' mosen' na' to ga'alze bosyose'ene' bibi goso'ene'. ¹¹ Nach xan yežlion' gwsele' yeto mosen', na' lecze gosot goseyine' le' na' gosonde' le' zgot, na' to ga'alze bosyose'ene' bibi goso'ene'. ¹² Na' xan yežlion' gwsela'che' mos gwyone, na' lecze gosotlate'ne' gosone'ne' güe', na' besyebeje'ne' gan' že' yag uvas ca'.

¹³ 'Na' xan yežlion' gwne': “¿Nacxe gona'?” Nach beyone' xbab gwne': “Sela' xi'ina' ben' chacchgüeda', le šeca güesezi'e xtiža' le'.” ¹⁴ Perw bene' ca' nac lo na'gaque' yag uvasen' cate' besele'ede' xi'ine'na', gose' lježe': “Benga yega'anlene' yežlio nga cate' gat xe'. Le da gotchone' cont yega'anlenchon.”

¹⁵ Nach besyebeje' le' gan' že' yag ca' na' gosote'ne'.

Nach Jesúsén' gwnabde' bene' ca' zjanžaguen':

—¿Nacxe gon xan yežlion' len bene' ca' bocua'anlene' yežlio chen'? ¹⁶ Šeje' šjetue' legaque' na' yodie' yežlion' lo na' bene' yoble.

Na' bene' ca' že'na' cate' gosende' diža' quinga dan' be' Jesúsen' gosene':

—¿Catec da' mal juisyw dan' goc!

¹⁷ Na' Jesúsen' gwna'chgüe' legaue' na' gwne':

—¿Bixe zejen da' nga nyojen le'e Xtiža' Diosen'? žan:

Yej dan' bi gosaclaže' güen yo'o ca' yosoçhine',
len ba naquen yej squin.

¹⁸ Na' ca' nac yejna', note'tez bene' lažo' lo yeja' na' cue'žošje', na' note'tez bene' chiže' yeja' cate' lažon' na' gwšošjen le'.

Ca nac dan' cheyala' gaxjw

(Mt. 21:45-46; 22:15-22; Mr. 12:12-17)

¹⁹ Na' bene' ca' chososed chosolo'e dan' bzoj da' Moisés na' bxoz gwnabia' ca' la' besyeyiljwlaže'te nacle yesone' yesezene' Jesúsen', le gosacbe'ede' Jesúsen' be'e jemplna' neche dan' bi chesejnlaže' le'. Perw bibi gosone', le besežebe' bi yeson bene' ca' že'na' bene' chesejle'e che Jesúsen'. ²⁰ Da'nana' gesele' bene' yosogüia yesene'e Jesúsen' cont yesebeje'ne' diža' da' yosode'ede' cont yesagüe' xya che' lao gobernador ben' chnabia'. Gosacde' gone' xbab do laže'gaue' chosozenague' che'. ²¹ Nach gose'e le':

—Maestrw, nezeto' diža' da' cho'o na' da' chsed chlo'edo' bene' zejen to licha. Nezeto' toz can' chono' len note'tez bene'. Na' nezeto' diža' li cho'o chsed chlo'edo' bene' can' chazlaže' Diosen' goncho. ²² Na' da'nana' zedenabeto' le' ¿naquen binlo no chixjo da' cheyala' chixjwcho che ben' nac la'zelagüe bene' gwnabia' ben' chi' Roma, še bi?

²³ Na' goebe'e Jesúsen' gague do lažen' chese'ene' ca', san chesaclaže' yesagüe' xya che xtižen'. Na' gože' legaue':

—¿Bixchen' chaclaže'le yoslažo'le neda' len xtižan'? ²⁴ Le gwlo'e neda' to mechw. ¿No lao dan' da' le'e mechw nga? na' ¿no la' dan' nyoj le'en ni?

Nach gose'ene':

—Che César ben' nac la'zelagüe bene' gwnabia' ben' chi' ciuda Roma.

²⁵ Nach gože' legaue':

—Le gwnežjo bene' gwnabian' da' nac che bene' gwnabia', na' le gwnežjo Dios dan' nac che Dios.

²⁶ Na' bi gosezaque'de' yososlažoe' le' len xtižen' lao bene' ca' že'na'. Na' besyebande' can' boži'e xtiža'gaquen', na' bich bi gose'ene'.

Cate' yesyeban bene' guat ca'

(Mt. 22:23-33; Mr. 12:18-27)

²⁷ Na' lecze besežin bal bene' saduceo gan' zoa Jesúsen'. Bene' ca' chesene' bene' guaten' bi yesyebane'. Nach gosenabde' le', gose'ene':

²⁸ —Maestrw, da' Moísesen' bzoje' can' cheyala' goncho, gwne' še to bene' byo gate' na' chzeb no'ol chen' perw na' nono bi güezeb chga'an, na' bene' biše' ben' ba gota' cheyala' yošagna'lene' no'ol güezeba' cont yesenita' xi'in diaža che da' bišen'. ²⁹ Na' gosenita' bene' gosac gaž biše'. Na' bene' nechua' bšagne'e, na' gote' nono xi'in'e' gwnita'. ³⁰ Na' bene' gwchopen' bošagna'lene' no'ol güezeba', na' lecze gote' nono xi'in'e' gwnita'. ³¹ Na' bene' gwyona' lecze bošagna'lene' no'olen', na' lecz ca' goc len le'. Na' ca' goc gosedaš bene' gaža' bosošagna'lene' no'ola', na' ne toe' ca' gosezoa xi'in'e' len le'. ³² Gwde gosat yogo'lol bene' ca', nach got len no'ola'. ³³ Na' cate' yesyebane' ladjo bene' guat ca', ¿nox bene' ca' soalene' no'ola' ca' xo'ole'?, le yogo' bene' gaža' bosošagna'lene' le'.

³⁴ Na' Jesúsen' boži'e xtiža'gaquen', gože' legaue':

—Bene' ca' nita' lo yežlio nga chosošagne'e na' lecze chosošague' na' no xi'in'gaue'. ³⁵ Perw na' bene' ca' chaque Diosen' zjazaque' cont yosbane' legaue' ladjo bene' guat ca' cont šjasyenite' len le' toli tocanē, caten' yesyežine'

gan' zoa Diosen' bich yosošagne'e nēca yosonežjo xi'ine' no'ol yosošagne'e.
³⁶ Bich yesate', le yesaque' ca angl ben' že' yaba, na' yesaque' xi'in Dios lagüe
 dan' ba bosban Diosen' legaque' ladjo bene' guat ca'. ³⁷ Na' lecze da' Moisésen'
 bzoje' che dan' chesyeban bene' guat ca'. Bzoje' can' gož Diosen' le' caten' bol
 güiže'ne' to lo yag yeše' dao' da' chey. Na' gwne' Xancho Diosen' naque' Dios
 ben' chonxen Abraham, ben' chonxen Isaac, na' ben' chonxen Jacob. ³⁸ Na'
 bene' guat ca' bi chesonxene' Diosen', san bene' zjamban. Na' yogo' bene' ba
 gosejnilaže' Diosen', ne' zjambane' cont chesonxene' le'.

³⁹ Na' bal bene' chososed chosolo'ede' ley dan' bzoj da' Moisés gose'e
 Jesúsēn':

—Maestrw, binlo boži'o xtiža'gaquen'.

⁴⁰ Na' bich besyeyaxjde' bi yesenabde' le'.

Criston' naque' xi'in diaža che da' rey David

(Mt. 22:41-46; Mr. 12:35-37)

⁴¹ Jesúsēn' gože' legaque':

—¿Nacxečen' chesena bene' Criston' ben' yedenabi'e naque' xi'in diaža che
 da' rey David? ⁴² Cuiin Daviden' bzoje' Xtiža' Diosen' le'e libr da' nzi' Salmos,
 gwne':

Xancho Dios gože' Xanan':

“Gwche'edo' cuita' nga nabia'cho txen,

⁴³ na' gona' cont yogo' no chesegue'e le' yosozexjw yichje' yosozengue' chio'.”

⁴⁴ ¿Nacxe gac nacho Criston' naque' xi'in diaža che da' rey David? le cuiin
 Davin' gože' le': “Xana”.

Xtola' bene' ca' chososed chosolo'e dan' bzoj da' Moisésen'

(Mt. 23:1-36; Mr. 12:38-40; Lc. 11:37-54)

⁴⁵ Bene' zan zjanžag chosozenague' cate' gože' bene' ca' zjanaque' le' txen:

⁴⁶ —Le gwsaca' cont bi gonle can' cheson bene' ca' chososed chosolo'e
 ley dan' bzoj da' Moisés. Legaque' chesyebede' chesaše' zjanyaze' lache'
 ton. Na' chesyebede' chesonxen bene' legaque' cate' chesyēžague' lagüe ya'a.
 Chesyebede' chesebi'e gan' chesebe' bene' blao cate' chja'aque' yodao' na'
 cate' chac lni. ⁴⁷ Na' chesyēque'e yo'o che no'ole güezeb ca'. Na' cate' chosol
 güiže' Dios, sša cheso'e diža' cont yesaque' bene' leca chesonxene' Diosen'.
 Bene' can' chesacche' castigw clel ca yezica'chle bene' güen da' xinj.

21

To no'ole güezebe bnežjue' Diosen' xmechue'na'

(Mr. 12:41-44)

¹ Šlac zoa Jesúsēn' chyo'o yodao', gwne'e na' ble'ede' bene' gwni'a ca' gosego'o
 xmechwgaquen' lo' cajan' gan' chesegüe'e mechw che yodaon'. ² Na' lecze
 ble'ede' to no'ol güezebe bene' yaše' gwlo'e chop centav dao' che'na'. ³ Nach
 Jesúsēn' gwne':

—Da' li žia' le'e, no'ol güezebe yaše' nga ba gwlo'oche' mechw da' zaca'ch clel
 ca yogo' bene' ca' yezica'chle. ⁴ Le yogo' legaque' chesegüe'e da' checho'onen lo
 yela' gwni'a chegaquen', perw no'ol nga, lo yela' yaše' yela' zi' che' gwlo'e yogo'
 da' de che', yogo' da' chacbande'.

Gwžin ža yosyočinje' yodao' blaona'

(Mt. 24:1-2; Mr. 13:1-2)

⁵ Na' bal bene' ca' chesejnilaže' che dan' chsed chlo'e Jesúsēn' goso'e diža'
 catec xdan nac yodao' blaona' dan' gosonen' de yej xdan da' zaque' na' yo'on
 bi da' bosonežjo bene'. Nach Jesúsēn' gwne':

⁶ —Ca nac da' quinga chle'ele ngan', žin ža cate' ne to yej dan' zjancua' nga ca yega'an zjancua' cože' lježen. Yogon' yosyočinje'.

Dan' gac cate' ba za' bagwze yeyož yežlion'
(Mt. 24:3-28; Mr. 13:3-23)

⁷ Na' gosenabde' Jesúsen' gose'ene':

—Maestrw, ¿do bat gac dan' žo' nga? na' ¿nac gac nezeto' cate' ba zoa gac yogo' da' ca'?

⁸ Na' gwne':

—Le gwsaca' cont nono siye' le'e. Le bene' zan yesaš yežlio nga bene' yesaclaže' yosolane' xlatja' nga, yesene': “Nedan' Criston' ben' gwlej Diosen' cont nabi'a”, na': “Ba za' gac juisyw.” Perw le'e bitw gwzenagle xtiža'gaquen'.
⁹ Na' cate' yenele chac gwdile nile na'le o yenele chi' žaš contr bene' ca' chesenabia', bi žeble, le zgua'tec da' quinga cheyala' gac. Perw gague lenna' nacho na'tec na'a yeyož yežlion'.

¹⁰ Nach gože' legaque':

—Na' yesedile to yež len yeto yež yoble na' to nación len yeto nación yoble, ¹¹ na' zan cuen ga xo'chgua na' zan latje lo yežlion' ga gata' gwbin na' cue' yižgüe', na' yesac yela' guac da' yesele'e bene' le'e yaban' da' zaca' yesyebande', na' yesežebchgua benachen' neche dan' chac.

¹² 'Perw za' gac yogo' da' quinga cate' yesezene' le'e na' yosochi yososaque' le'e na' yesone' le'e lo na' bene' gwnabia' che yodao' chelen', na' yeseyixjue' le'e ližya. Na' yeseche'xoxje' le'e do lao rey na' do lao nochle bene' gwnabia' dan' chejnilaže'le neda'. ¹³ Na' cate' gac da' quinga güe'le xtiža'na'. ¹⁴ Na' le gon xbab zoacza' chaclena' le'e, nach cate' gacle lo na' bene' ca' bi cuen yichjle nacle yoži'ile xtiža'gaquen', ¹⁵ le neda' gona' le'e xbab len yela' sina' chian' cont yoži'ile xtiža'gaque' sin cbi bi gac yesene'. ¹⁶ Na' balle xaxna'le na' bene' biše'le na' biše' lježle na' bene' migw chele yesechje' yesone' le'e lo na' bene' chesegue'e le'e. Na' yesote' balle. ¹⁷ Na' yogo'ze bene' yesegue'ede' le'e dan' chejnilaže'le neda'. ¹⁸ Perw chape Diosen' le'e na' bitw güe'le latje cuiayi'le, ¹⁹ na' gone' yela' mban chele toli tocane še soale gwyo gwchejle yogo'lol dan' yesonde' le'e.

²⁰ 'Na' cate' le'ele ba besela'ac soldadw zan cue'ej cuit Jerusalénna' ben' yesedillen le'e, canan' nezele ba zoa cuiayi' ciudadan'. ²¹ Cana' bene' yesenita' Jerusalén cheyala' yosoxonje'. Na' bene' že' yezica'chle yež ga mbane Judea cheyala' šja'aque' do ya'adao'. Na' bene' yesenita' yixe', bi cheyala' yesone' xbab yesyeyo'e lo' ciuda. ²² Cana' gwnežjo Diosen' castigw che xtoła' bene' ca' že' Judean', cont gac can' nyojen le'e Xtiža' Diosen'. ²³ ¡Nyaše' zjanac no'ol ca' zjanoa' xi'in na' no'ol ca' ne' chosoguaže' bidao' lo ža ca'! Leca yesesaca'zi' bene' ca' že' doxen Judean', le Diosen' ža'achgüe' legaque'. ²⁴ Soldadw ca' yesote' bale' lo gwdile na' yebale' yeseche'xoxje' nación ca' dan' zjachi' doxen yežlion'. Na' bene' ca' bi zjanaque' bene' Israel yosyočinje' yo'o ca' dan' že' Jerusalénna' na' yosolej yosošošen'. Perw ba bžia' Diosen' bia' žin ža cate' bene' ca' bi zjanaque' bene' Israel bich yesenabi'e nación Israel.

Yid Jesucriston' da' yoble
(Mt. 24:29-35, 42-44; Mr. 13:24-37)

²⁵ 'Ca nac gwbiž, bio' na' beljw ca', gac da' yebanecho len legaquen. Na' bene' že' yežlion' yesaque' tole na' yesacžejlaže' catec sšag gon nisdan' chas chata' gaquen. ²⁶ Na' bene' že' yežlio nga yesatte' šlat yesežebchgüe' dan' gaquen, le yogo' da' chle'echo le'e yaban' yesaquen ca' chac yežlion' cate' chxo'.
²⁷ Na' cana'ch bene' že' yežlion' yesele'ede' neda' naca' ben' gwsela' Dios golja benach, za'a to lo' bejw len yela' guac xen na' yela' bene' zaca' juisyw chia'.

28 Na' cate' solao gac da' quinga, le gončach laže'le na' le yebe. Ba zoa žin ža yida' da' yoble yebeja' le'e lo da' malen'.

29 Na' Jesúsen' be'lene' legaue' to jempl, na' gože' legaue':

—Le na'šc can' chon yag yixgüigw na' bite'teze yag yoble, 30 cate' chle'ele ba chebian laga' che'en dao' nach nezele bach zoa yela' tiemp ba. 31 Ca'czen' cate' le'ele ba chac da' mal ca' ba gwnia', cana'ch nezele ba zoa gwlo'e Diosen' yela' gwnabia' che'.

32 'Da' li žia' le'e, biña' yenit diaža' che le'e nita'le na'a cate' yeyož gac yogo'lol da' ca'. 33 Le'e yaba na' yežlion' yesede čhen, perw ca' nac xtižan', gague da' te cbi gac can' žanna'.

34 'Na' le gon xbab cont bi gacle bene' lia na' bene' borrašw na' cont bi soale yela' yežejele. Bene' ca' yesac bene' lia na' borrašw na' bene' ca' yesyela' yesyežejde' bi yesebeze' batcan' gac yogo' da' quinga. 35 Na' toz can' gac che bene' že' doxen yežlion', yesac yogo' da' quinga cate' nono chon xbab. 36 Perw yogo' ža le soa le cuez batcan' gac da' quinga na' le yol güiž Diosen' cont bibi gac chele na' gac yedyesoale len neda' naca' ben' gwsela' Diosen' golja' benach.

37 Yogo' ža gwzoa Jesúsen' bsed blo'ede' bene' yodao' blao, na' yogo' že' beyeje' lo ya'a da' nzi' Ya'a Olivos. 38 Na' yogo' zil besežin bene' zan bosozenague' che' šlac bsed blo'ede' legaue' chyo'o yodao' blao.

22

Bosoxi'e cont yesezene' Jesúsen'

(Mt. 26:1-5, 14-16; Mr. 14:1-2, 10-11; Jn. 11:45-53)

1 Na' ba zoa gala' lni pascw caten' chesagüe' yetextil da' bibi levadura yo'on. 2 Na' bxoz gwnabia' ca' na' bene' ca' chososed chosolo'e ley dan' bzoj da' Moisésen' beseyiljue' nacle yesone' na' bi da' yosode'ede' cont yesezene' Jesúsen' na' yesote'ne', le besežebe' še cate' bi yesone yezica'chle bene' legaue'.

3 Nach Satanásen' dan' chnabia' da' xigüe' ca' gwyo'o gwyazen lo' yichjlaždao' Judas Iscarioten' ben' goque' txen len bene' šižinw ca' zjanaque' Jesúsen' txen, 4 na' gwyeye' jane'e bxoz gwnabia' ca' na' bene' gwnabia' che bene' ca' chesape' yodao'na' cont bosoxi'e nacle gone' gwdie' Jesúsen' lo na'gaque'. 5 Na' leca besyebede' na' gose'e le' yosonežjue'ne' mechw. 6 Na' Judasen' gwxenlaže' len legaue', na' gwzologüe' gw diljwlaže' nacle gone' gwdie' Jesúsen' lo na'gaquen' cate' bi že' bene' zan.

Jesúsen' blo'ede' legaue' can' cheyala' yesone' šjasyeza'laže' dan' gaten'

(Mt. 26:17-29; Mr. 14:12-25; Jn. 13:21-30; I Co. 11:23-26)

7 Na' bžin ža gala' lni caten' chesagüe' yetextil dan' bibi levadura yo'o. Naquen ža cate' chesote' xila' dao' cont šjasyeza'laže' can' bosla Diosen' da' xozxta'ogaquen' lo na' bene' Egipto ca'. 8 Na' Jesúsen' gwleje' Pedroa' len Juanna' na' gože' legaue':

—Le šja'ac na' le šjasini'a dan' gagwcho lo lnin'.

9 Na' gose'ene':

—¿Ga che'ndo' šjasini'ato'?

10 Nach gože' legaue':

—Le šja'ac na' cate' ba gwyo'ole ciudan' na' yežagle to bene' byo no'e to che'e nis. Na' šejlenlne' na' gan' yežinen' 11 le ye' xan yo'on': “Maestron' že': Gonšco' to yo'o ga gagua' xše' že' lni nga len bene' ca' zjanaque' neda' txen.” 12 Nach gwlo'ede' le'e to quart xen dan' zoa yichjen na'ale gan' de yogo' da' chyažjecho. Na' le gwsini'a cont gagwcho na'.

¹³ Na' gosa'aque' na' yogo' can' gož Jesús'en' legaque' goc. Nach bososini'e xše' že' lnina'.

¹⁴ Na' cate' bach gwchi'e cho'a mesen' len postlw che' ca', ¹⁵ na' gože' legaque': —Leca gwzelaža' gagua' yela' guagw che lni nga len le'e na'a za' saca'zi'a na' gata'. ¹⁶ Chnia' le'e, na'a zelao gagan'. Cate'ch ba blo'e Diosen' yela' gwnabia' che'na', cana'ch gagan' da' yoble.

¹⁷ Na' gwxi'e vas gan' yože nis uvasen', na' beyož be'e yela' choxcen che Dios, nach gwne':

—Le sin', na' le ye'ej yogo'le late' güeje dan' yože lo' vas nga. ¹⁸ Chnia' le'e na'a zelao che'aja' vino che uvasen'. Cate' ba blo'e Diosen' yela' gwnabia' che'na', cana'ch ye'ejan' da' yoble.

¹⁹ Nach gwxi'e yetextilen' na' be'e yela' choxcen che Diosen' na' bzojnen' na' bnežjuen' legaque'. Na' gože' legaque':

—Da' nga cuerp chia' chzanlaža' neche le'e. Quinga gonle cont šjayze'ele bi zejen len le'e dan' yesote' neda'.

²⁰ Na' lecze becxue' vassen' cate' ba beyož gosagüe' xšen' na' gože' legaque': —Dan' yože lo' vas nga zejen da' cobe dan' gwna Diosen' gone' gaclene' le'e. Na' solao gone' can' gwne', le yesote' neda' na' gwlaļj xchenan' neche le'e.

²¹ 'Na' da' li ben' gwdie' neda' lo' na' bene' ca' chesegue'e neda' nga chagwlene' neda' txen. ²² Na' gac chia' can' nžia' bia' gac, neda' naca' bena' gwsela' Diosen' golja' benach, perw nyaše'chguaze nac ben' gwdie' neda' lo' na' bene' ca'.

²³ Nach gosezolagüe' gosenabe lježgaque' noen' gon da' malen' nac ca'.

Gosacyože' noe' nacch blao

²⁴ Na' lecze gosezolagüe' gosacyože' noe' nacch blao. ²⁵ Na' Jesús'en' gože' legaque':

—Nita' bene' gwnabia' che to to nación ca' na' chesone' byen chosozenag bene' chegaque', na' bene' gwnabia' ca' chesaclaže' yesoe' bene' diža' chegaque' zjanaque' bene' güenchgua. ²⁶ Perw le'e gague can' cheyala' gonle. Še no le'e nacchle bene' blao, cheyala' gwzexjwlaže'le len bene' lježle na' gonle ca' bene' xcuide' ben' bibi na' neze. Na' še no le'e chnabia'le, cheyala' soale gaclen lježle. ²⁷ Le gon xbab noe' nacch bene' blao, še bena' chi' cho'a mesen' o še xmosen' ben' chon mandadw che'. Nacia'cze ben' chi' cho'a mesen' naccze' bene' blaoch. Perw neda', zoa' cont gaclena' le'e la'cze naca' Xanle.

²⁸ 'Le'e bina' cuejyichjle neda' la'czla' bene' zan ba chesegue'ede' neda'. ²⁹ Na' ca' nac Xan' ba none' chia' cont nabi'a txen len le', lecze neda' ba nona' chele cont nabi'a'le txen len neda'. ³⁰ Na' gona' cont ye'ej gagwle txen len neda' cate' yela'le gan' nabi'a', na' cue'le cuita'na' nabi'a'le šižinw cuen bene' ca' zjanaque' xi'in diaža' che da' Israel.

Jesús'en' gwne' Pedroa' bi chebe' še nombi'e le' (Mt. 26:31-35; Mr. 14:27-31; Jn. 13:36-38)

³¹ Nach Jesús'en' gwne':

—Simón, ben xbab chio', Satanásen' dan' chnabia' da' xigüe' ca' ba gwñaben gaco' lo' ne'en cont gonen cuejyichjo' bich šejnilažo' neda'. Na' dan' gonen len le' naquen ca' dan' chon bene' caten' chdie' trigon' lo' rner. ³² Perw na' neda' ba gwñaba' gaclen Diosen' le' cont bi cuejyichjo' dan' chejnilažo' neda'. Na' cate' ba betinjdo' xtolona', gono' chach laže' bene' lježo' quinga.

³³ Nach Pedroa' gože'ne':

—Ba bechoglaža' sa'alena' le', gague ližya na'ze, san gatlencza' le'.

³⁴ Na' Jesús'en' gože'ne':

—Pedro, žia' le', biṇa' cuež jean' na'aže' cate' gac šon ni'a bi chchebo' še nombi'o neda'.

Gwne' ba zoa yosoči yososaca' bene' legaque'

³⁵ Na' gože' bene' ca' zjanaque' le' txen:

—¿Byažjele bi da' byažjele cate' gwsela' le'e jatixjue'ele xtiža'na'? Gwsela' le'e sin cbi bia'le mechw, ne bzod, na' neca bia'le xelle.

Na' gose'ene':

—Bitw bi byažjeto'.

³⁶ Na' gože' legaque':

—Perw na'a še napple mechw, cheyala' gua'len, na' lecze ca' gua'le bzod. Na' še bitw bi spada chele de, le gote' xadon chelen' cont si'le to spada. ³⁷ Chnia' le'e gonle ca', le gac chia' can' nyojczen le'e Xtiža' Diosen' žan: “Gosone'ne' ca' bene' güen da' xinj.” Na' cheyala' gac yogo'lol dan' nyojen.

³⁸ Nach gose'ene':

—Xanto', gwna'šc nga noa'to' chope spada.

Na' gože' legaque':

—Güesaqueczen.

Jesúsen' chol güiže' Diosen' latje gan' nzi' Getsemani'

(Mt. 26:36-46; Mr. 14:32-42)

³⁹ Nach gwze'e gwyeje' Ya'a Olivos can' ba yolagüe' chone', na' bene' ca' zjanaque' le' txen zjana'ogüe' le'. ⁴⁰ Nach cate' besyežine' latjen' na' gože' legaque':

—Le yol güiž Dios cont bi gon gwxiyen' le'e gan.

⁴¹ Na' gwle'e len legaque' zito' ca gan' zelao žin to yej da' gwzala'cho, na' bzoa xibe' na' bol güiže' Dios, ⁴² gwne':

—Xa', benšca cont bi saca'zi'a na' bi yesote'nda' še ca' chazlažo', perw bi chnaba' gac da' žia' neda', san gac can' nao' le'.

⁴³ Na' to angl bene' za' yaba blo'elagüe' le' na' be'e le' fuerz valor. ⁴⁴ Na' šlac chžaglaochgüe' len yichjlažda'ogüe'na' gwzolao chžaglaоче' chol güiže' Diosen' beyacloljte' yes. Na' nis yes che'na' beyaquen ca tlab'a güeje chen dan' zjanaquen chelson, besyeyinjen lo yo. ⁴⁵ Na' bezeche', na' beyeje' gan' nita' bene' ca' zjanaque' le' txen, ble'ede' zjanite' chesetase' dan' leca gosacyaše'chgüede'. ⁴⁶ Na' gože' legaque':

—¿Bixchen' chtasle? Le chas, le yol güiž Dios cont bi gon gwxiyen' le'e gan.

Gosezene' Jesúsen'

(Mt. 26:47-56; Mr. 14:43-50; Jn. 18:2-11)

⁴⁷ Ne' choe'te Jesúsen' diža' cate' besežin bene' zan gala'ze gan' zoen'. Na' ben' le' Judas, ben' goque' txen len bene' šižinw ca' gwlej Jesúsen' cont zjanaque' le' txen, žialagüe' laogaque'. Na' gwbigue' gan' zoa Jesúsen' na' bnop'e xague', perw gague do lažen' bene' ca'. ⁴⁸ Na' Jesúsen' gože' le':

—Judas, ¿chnopo' neda' cont gw dio'nda' lo na' bene' quinga? neda' naca' bena' gwsela' Diosen' golja' benach.

⁴⁹ Na' cate' bene' ca' zjanaque' Jesúsen' txen besele'ede' can' gac che'na' nach gose'ene':

—Xanto', ¿gw yinto' bene' quinga spada cheton'?

⁵⁰ Na' toe' gw dinen' mos che bxož blaon', gwchogtechgüe' nague' licha.

⁵¹ Perw Jesúsen' gože'ne':

—Bich gonle ca'.

Nach gwdane' nag mosen' na' beyone' le'. ⁵² Jesúsen' gože' bꝛoz gwnabia' ca' na' bene' ca' chesenabi'e bene' ca' chesape' yodao', na' bene' gole blao ca' chesenabia' nación Israelen' ben' zja'ac zjasexi'e le', gože'ne':

—¿Bixchen' nonle neda' ca to bene' gwban za'acle zedexi'le neda' len spada na' len yag? ⁵³ Yogo' žaze gwzoo' len le'e chyo'o yodao' blaon' na' bitw gwzenle neda'. Perw na' ba bžin ža gonele neda' con can' chaclaže'le, na' ba bžin ža gac can' chaclaže' Satanásen' dan' chnabia' bene' ca' chesaš lo cholēn'.

Pedroa' bi gwchebe' še nombi'e Jesúsen'

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

⁵⁴ Nach gosoxe' Jesúsen' na' goseche'ene' liž ben' naque' bꝛoz blao che nación Israelen'. Nach Pedroa' na'ogüe' Jesúsen' zito' zito'le. ⁵⁵ Na' bosoxene' yi' chyo'o che bꝛoz blaona' na' gosebi'e cho'a yi'na'. Na' gwche' Pedroa' len legaue'. ⁵⁶ Na' to no'ole güen žin ble'ede' chi'e cho'a yi'na' na' gwne'e le' na' gwne':

—Lecze len bengā naque' txen len Jesúsen'.

⁵⁷ Perw Pedroa' bitw gwchebe' še nombi'e Jesúsen'. Gože'ne':

—No'ole, bitw nombi'ane'.

⁵⁸ Na' gocze šlož, yeto bene' ble'ede' Pedroa' gože'ne':

—Lenczo' naco' txen len bene' ca'.

Na' Pedroa' gože'ne':

—Bitw lena' len legaue'.

⁵⁹ Gwde to hor yetoe' gwne':

—Da' licze nac bengā txen len Jesúsen', le naque' bene' Galilea.

⁶⁰ Na' Pedroa' gože'ne':

—Bene', bi nezda' bi dižan' cho'o.

Na' ne' choe'te Pedroa' dižan' ca', gwchež to jea. ⁶¹ Na' Xancho Jesúsen' gwyechje' gwne'e Pedroa' na' jayze'e Pedroa' diža' dan' gož Xanchon' le' caten' gwne': “Biņa' cuež jean' na'aže' cate' gac šone ni'a bi chebo' še nombi'o neda'.”

⁶² Na' Pedroa' beze'e leca gwchežyaše'.

Gosezi'diže' Jesúsen'

(Mt. 26:67-68; Mr. 14:65)

⁶³ Na' bene' ca' goseche'e Jesúsen' gosezi'diže' le', na' gosot goseyine' le'.

⁶⁴ Na' bosocheje' to lache' lao Jesúsen' na' goseyine' le' na' gose'ene':

—Gwneya'ašč non' chyin le'.

⁶⁵ Na' zanch diža' da' gosene' gosezi'diže' Jesúsen'.

Goseche'e Jesúsen' lao bene' ca' chesenabia' nación Israelen'

(Mt. 26:59-66; Mr. 14:55-64; Jn. 18:19-24)

⁶⁶ Na' cate' gwyeni', bene' gole blao ca' chesenabia' nación Israelen' na' bꝛoz gwnabia' ca' na' bene' ca' chososed chosolo'e ley dan' bzoj da' Moisés be-sežague' na' gosone' mandadw gwyej Jesúsen' laogaue' gan' chesenabi'ena', nach gose'ene':

⁶⁷ —Gwnašč neto' še le' naco' ben' gwlej Diosen' cont nabi'o nación chechon'.

Nach gože' legaue':

—Šaca' nia' le'e neda' naca' Criston' ben' gwlej Diosen' cont nabi'a' nación chechon', bitw šejle'le chia'. ⁶⁸ Na' šaca' bi nabda' le'e, neca yoži'ile xtižan', neca gwsanlenda. ⁶⁹ Neda' naca' ben' gwseļa' Diosen' golja' beņach. Na' na'a cui'a cuit Diosen' nabi'a' txen len le', Dios ben' chnabia' doxen.

⁷⁰ Nach yogüe' yose'ene':

—¿Len' naco' dogualje Xi'in Diosen'?

Na' gože' legaue':

—Le can' žale nan' naca'.

⁷¹ Na' gosene':

—iNoch no chyažje no gagw xya che! Chio' ba benecho na'a chne' che Diosen' dan' že' ca'.

23

Bosocuiše' Jesúsen' lao Pilaton'

(Mt. 27:1-2, 11-14; Mr. 15:1-5; Jn. 18:28-38)

¹ Na' yogo'loł bene' ca' gosezože'e na' goseche'ene' lao Pilaton' ben' nac gobernador. ² Na' gwzolao bosocuiše' Jesúsen' gosene':

—Ba gwchoglaoto' che benga cheyała' gate' dan' chde' chgo'oyełe' nación Israelen' cont yesejle'e che' na' lecze chžone' chixjwto' da' cheyała' chixjwto' lao rey César. Na' lecze že' len' naque' Criston' ben' gwlej Diosen' cont nabi'e nación cheton'.

³ Nach Pilaton' gwnabde'ne' gože'ne':

—¿Len' naco' rey che bene' Israel?

Nach Jesúsen' boži'e xtižen', gwne':

—Can' gwnao'na', can' naquen.

⁴ Nach Pilaton' gože' bꝑoz ca' len yogo'loł bene' ca' zjanžag lagüe'na':

—Bibi nla'lagüe' še bi dola' nap benga.

⁵ Perw na' gosenēche', gosene':

—Chde' chgo'oyełe' yogo' bene' že' distritw Judea nga yesejle'e dan' chsed chlo'ede'. Gwzolaogüe' bsed blo'ede' distritw Galilean' perw lencze nga bač chsed chlo'ede' na'a.

Pilaton' gwsele' Jesúsen' lao Herodes

⁶ Cate' bene Pilaton' can gosene', nach gwnabe' še Jesúsen' naque' bene' Galilea. ⁷ Na' cate' gocbe'ede' Jesúsen' ze'e Galilean' gan' chnabia' gobernador Herodes, na' gwsele'ne' lao Herodes, le ca hora' zoa Herodes Jerusalénna'. ⁸ Cate' Herodes ble'ede' le' bebede', le ba goc sša che'nde' le'ede' le'. Ba bende' xtiža' Jesúsen' na' zoe' lez le'ede' gone' to da' zaca' yebande'. ⁹ Nach da' zan da' gwnabde' Jesúsen', perw ne to xtižen' ca boži'i Jesúsen'. ¹⁰ Bꝑoz gwnabia' ca' na' bene' ca' chososed chosolo'e ley dan' bzoj da' Moisés gosezeche' gala'ze na' bosocuiše'ne' len zan diža'. ¹¹ Na' Herodes len zan soldadw che' ca' gosezolaogüe' gosezi'diže'ne' na' gosonle' che'. Nach cate' beyož bosoguacue'ne' to lache' xdan juisyw, gosesele'ne' da' yoble lao Pilaton'. ¹² Na' žana' Pilaton' len Herodes gwzolao gosaque' migw, la'czla' cate' za' gac ca' besegue'e lježe'.

Gosechoglagüen' gat Jesúsen'

(Mt. 27:15-26; Mr. 15:6-15; Jn. 18:39-19:16)

¹³ Nach Pilaton' botobe' bꝑoz gwnabia' ca' na' bene' ca' chesenabia' nación Israelen' len yezan bene' yež, gan' chesone' yela' justisen'. ¹⁴ Nach gože' legaque':

—Le'e bedesanle benga lagua' nga, na' gwnale chde' chgo'oyełe' bene' Israelen' yesone' contr gobiernna'. Neda' bač gwnabyožda'ne' lao le'e ca xyan' dan' chagwle che', ne to da' xinj ca chželda' še bi dan' none'. ¹⁵ Na' lecze ca' Herodes bitw bi xtole' bželde', na' besele' le' laoto' nga. Na' nacbia' bibi ben benga da' cheyała' gate'. ¹⁶ Na' na'a con gona' mandadw yeseyine' le' na' gwsana'ne'.

¹⁷ Gwne' ca', le yogüiz chsane' to bene' pres lo lni pascw chegaque'. ¹⁸ Na' yogo' bene' ca' že' bososye'e toz ca gosene':

—Chojtega benga gate' na' gwsano' Barrabásen'.

19 Na' Barrabásen' goseyixjue'ne' ližya da' bxie' gwdile lo' ciudan' na' goque' to bene' güet bene'. 20 Na' da' yoble Pilaton' gwnabde' legaque' še gwsane' Jesúsén', 21 perw bososye'e zižjeh gosene':

—¡Bde'e le'e yag cruz! ¡Bde'e le'e yag cruz!

22 Da' gwyon ni'a gož Pilaton' legaque':

—¿Bixe da' xinj nonen'? Ne to da' xinj bi chželda' še bi none' da' zaca' gate'. Na' gona' mandadw yeseyine' le' na' gwsana'ne'.

23 Perw gosone' byen bososye'e yelate' zižjeh gosenabe' gwde'ene' le'e yag cruz. Nach Pilaton' bzenague' chegaquen' 24 na' gwchoglagüe' che' gac can' gosenabde' le'. 25 Nach bsane' Barrabás ben' zjanyixjue' ližyan', ben' gosenabe' gwsane', la'czla' Barrabásna' goque' ben' bxie' gwdile na' bene' güet bene'. Na' Pilaton' bodie' Jesúsén' lo' na'gaque' cont yesone' len le' ca' chesacłaže'.

Bosode'e Jesúsén' le'e yag cruz

(Mt. 27:32-44; Mr. 15:21-32; Jn. 19:17-27)

26 Na' šlac zjanche'ene' gan' yesote'ne' besyežague' to bene' yež Cirene le' Simón, za' zeze'e yixe'. Na' bosogüe'ene' yag cruz che Jesúsén' na' gwyeye' gwda'ogüe' Jesúsén'.

27 Na' bene' zan zjana'ogüe' le' na' zjalén zan no'ole. Na' no'ol ca' gwzolao bososye'e gosebeže' che'. 28 Na' Jesúsén' gwyechje' na' gože' legaque':

—No'ole Jerusalén, bitw cuežle chia'. Yejni'a le' cuež chele na' che xi'inle.

29 Da' li gwžin ža cate' yesene': "Mbalaz nita' no'ole güiž no'ole cono gwxa' na' nono bguaže'." 30 Cana' yesenablaže' yesebiže ya'a ca' cont chenen' legaque'. Yesenablaže' che' bdi'nj goten' legaque'. 31 Še yesot bene' neda' len bibi xtoła' de, ¡nacchxe yesonde' le'e nacle bene' güen da' xinj!

32 Na' lecze goseche'e chop bene' güen da' xinj cont bosode'e legaque' le'e yag cruz can' gosone' len Jesúsén'. 33 Na' cate' besežine' latje gan' nzi' Latje che Žit Yichj Bene' Guat, bosode'e Jesúsén' le'e yag cruzen'. Na' lecze bosode'e bene' mal ca' chop le'e yag cruzen' len le', toe' gwda' cuit Jesúsén' licha, na' yetoe' gwda' cuiten' robes. 34 Na' Jesúsén' gwne':

—Xa', bezi'xen che bene' quinga chesegue'ede' neda'. Gague zjanезде' bin' chesone'.

Na' gosone' rifa cate' besyele'e xalane' cont gota'bia' noe' yechelen. 35 Na' bene' zan besyežejde' le'. Na' bene' gwnabia' chegaque' ca' gosonle' che', gosene':

—Yezica'chle bene' bosle'. Še da' li naque' Criston' ben' gwlej Diosen' yedenabi'e, ¿bixchen' bi chosla cuine'?

36 Nach soldadw ca' lecz ca' gosonle' che'. Gosebigue' gala'ze gan' zoa yag cruzen' na' bosonežjue'ne' vino zichj. 37 Nach gosene':

—Še len' naco' rey che bene' Israel, bosla cuino'.

38 Na' yichj yag cruz che'na' gwzoa to dan' nyojen, žan: "Bengan' rey che bene' Israel." Na' byojen diža' griego, diža' latín na' diža' hebreo.

39 Na' to bene' mal ben' da' le'e yag cruz cuit Jesúsén' lecze gwzi'diže'ne', gože'ne':

—Še le' naco' ben' gwlej Diosen' cont yedenabi'o nación chechon', bosla cuino' na' lecze bosla neto'.

40 Na' ben' yeto gwdile' bene' lježen' gože'ne':

—¿Bi chžebo' Diosen'? Chio' ba da'cho le'e yag cruz cont gatcho can' da' le',

41 na' dan' gat chio' naquen' licha cont si'cho castigw che xtoła'chon'. Perw benga, bitw bi dola' nape'.

42 Nach gože' Jesúsén':

—Jesús, šjayza'laže'go' neda' cate' žin ža nabi'o.

⁴³ Na' gož Jesúsen' le':

—Da' li chnia' le', na'aža soaczo' len neda' gan' zoa Diosen'.

Can' goc caten' got Jesúsen'

(Mt. 27:45-56; Mr. 15:33-41; Jn. 19:28-30)

⁴⁴ Na' cate' bžin guagwbiž goc chol doxen lo yežlion' bžinte do cheda šone.
⁴⁵ Bitw bseni' gwbižen'. Na' ca nac lache' dan' ze lo' yodao' blaona', bcheza' gacholen. ⁴⁶ Nach Jesúsen' bosye'e zižje gwne':

—Xa', chon cuina' lo nao', bezi' spiritw chia'na'.

Na' beyož gwne' ca' gote'.

⁴⁷ Na' cate' ble'e xan soldadon' can' goquen', benxene' Diosen' na' gwne':

—Da' licze benga goque' bene' gwyej to licha.

⁴⁸ Na' bene' zan bene' besežag besele'ede' can' goc na' yogo'lóle' besyeya'aque' chesebaže' lcho'e gosacde' da' juisyw ba goc. ⁴⁹ Na' yogo' bene' ca' zjanombia' Jesúsen', na' len no'ol ca' zjanao' le' caten' beze'e Galilean', gosezeche' zito'le besele'ede' da' ca' goquen'.

Bosocuaše' Jesúsen'

(Mt. 27:57-61; Mr. 15:42-47; Jn. 19:38-42)

⁵⁰ Na' zoa to bene' ciuda Arimatea gan' mbane Judean' na' le' José. Naque' txen len bene' ca' chesenabia' nación Israel, na' naque' to bene' güen bene' zej to licha. ⁵¹ Ba zoe' chbeze' batcan' solao nabia' ben' sela' Diosen'. Bitw bene' txen len bene' ca' gosechoglagüen' yesote' Jesúsen'. ⁵² Bena' gwyeje' lao Pilaton' jaynabe' cuerp che Jesúsen'. ⁵³ Na' beletje'ne' le'e yag cruzen' na' btobe' le' to lache' xen na' la' bcuaše'te' le' to lo' bloj da' nche'ene' le'e yej. Na' naquen to ba cobe ga nono na' yosocuaše'. ⁵⁴ Na' yogo' da' ca' goc ža cate' chososi'ne' che ža che Dios. Na' ba bžin hor cate' cheyala' yosocueze' bite'teze žin o mandadw da' chesone'.

⁵⁵ Na' no'ol ca' za'aclene' Jesúsen' cate' gwze'e distritw Galilean' ja'aclene' Josén' cont besele'ede' ba che Jesúsen' gan' gwxa cuerp che'na'. ⁵⁶ Nach gosa'aque' na' gosone' to da' chla' zix da' yeseyebe' cuerp che Jesúsen'. Na' ža che Diosen' gosenita'cze can' ža ley chegaquen', bibi žin gosone'.

24

Jesúsen' bebane' ladjo bene' guat

(Mt. 28:1-10; Mr. 16:1-8; Jn. 20:1-10)

¹ Bał dmi gw ja'ac no'ol ca' da' yoble cho'a bloj gan' bosocuaše' Jesúsen' na' gosoxe' da' ca' ba gosone' da' chla' zix, na' yebał no'ole ja'aclene' leaque'.

² Na' cate' besežine' na' besele'ede' ba bga'a yejen' dan' bosode'e cho'a blojen'.

³ Na' goso'e, na' bitw besyeželde' cuerp che Xancho Jesúsen'. ⁴ Šlac zjanite' chesyebande' che da' quinga, besele'ede' chope bene' zjazecha cuitgaquen' zjanyaze' lache' da' chactitchgua. ⁵ Na' no'ol ca' besežebe' na' bosocheque' yichjgaquen' gosone'e lo yole. Nach bene' ca' gose'e no'ol ca':

—¿Bixchen' cheyiljwle to bene' mban nga ladjo bene' guat? ⁶ Notoch no nla' nga. Ba bebane' ladjo bene' guat na' mbancze'. Le šjayza'laže' can' gwne' cate' ne' zoale Galilean'. ⁷ Gwne' le' naque' ben' gwseła' Diosen' golje' benačh. Na' gwne' cheyala' gague' lo na' bene' mal ca' cont yesote' le' yosode'ene' le'e yag cruz, na' yeyon ža yebane' ladjo bene' guat.

⁸ Na' no'ol ca' jasyeze'ede' xtiže'na'. ⁹ Na' besyeya'aque' cho'a blojen' na' jasedixjue'ede' yogo' da' ca' len postlw ca' šnej na' len yezica'chle bene' ca' nita' txen len leaque'. ¹⁰ Na' no'ol ca' jasedixjue'ede' postlw ca' zjanaque'

bene' quinga: María bene' Magdala, na' Juana, na' María xna' Jacobo, na' len yebale no'ole. ¹¹ Na' postlw ca' bitw gosejle'e che no'ol ca', gosacde' chesenazen'.

¹² Perw na' Pedroa' la' gwzoža'te' na' la' gwza'seste' bžine' cho'a blojen' na' bcheque' na' ble'ede' lache' ca' zjachin' lo yo. Na' beze'e bebanchgüede' che da' ca' ble'ede'.

*Blo'elao Jesúsén' chop bene' ca' šlac zja'aque' Emaús
(Mr. 16:12-13)*

¹³ Na' lecze ža dmigwna' chop bene' ca' gosaque' Jesúsén' txen ja'aque' yež dan' nzi' Emaús, do šnej mil metr zito' par Jerusalénna'. ¹⁴ Na' legacze' bosošalje' che yogo' da' ca' ba goquen'. ¹⁵ Ne' chesone' xbab na' ne' chesoe'te' diža' chen cate' Jesúsén' gwbigue' len legaque' na' gwza'lene' legaque' txen, ¹⁶ perw bitw gosacbe'ede' noxen' zejlen legaque'. ¹⁷ Nach gože' legaque':

—¿Bi dižan' choe'le šlac ngo'ole nezen'? ¿Bixchen' chacyaše'le?

¹⁸ Na' toe' le' Cleofas boži'e xtižen' gože'ne':

—¿Nacxe chaquen' gwza'o Jerusalén na' biña' gacbe'edo' da' ca' ba goc lo' ciudan'? ¿Tozo' le' zo' Jerusalén na' biña' gacbe'edo'!

¹⁹ Na' Jesúsén' gože' legaque':

—¿Bi goquen' žale ca'?

Nach gose'ene':

—Dan' goc che Jesús bene' Nazaret. Goque' to bene' gwsela' Dios cont be'e xtižen', na' Diosen' len benachen' besyebede' yela' guac chen' dan' blo'e na' diža' dan' be'e. ²⁰ Perw na' bxoz gwnabia' checho ca' len bene' ca' chesenabia' nación chechon' gosone' le' lo na' bene' ca' gosechoglagüe' che' cheyala' gate', na' bosode'e le' le'e yag cruz. ²¹ Ba goc šone ža na'a goc da' quinga. Na' neto' gwzoato' lez Diosen' gwsele' le' cont yebeje' nación checho lo da' malen'. ²² Na' no'ol ca' zjanac txen len neto', bale' goso'e diža' da' chebaneto', ja'aque' cho'a ban' be'e ²³ na' bitw besyeželde' cuerp che'na'. Cate' besyela'aque' gosene' besele'eda'ogüede' angl bene' gose'e legaque' ba bebane' ladjo bene' guat ca'. ²⁴ Na' lecze to chop bene' byo bene' ca' zjanaque' txen len neto' ja'aque' cho'a ban' na' besele'ede' cayanen' gosena no'ol ca' naquen, perw bi besele'ede' Jesúsén'.

²⁵ Na' gož Jesúsén' legaque':

—Nyaše'chguaze le'e bi chejni'ile na' bi chejle'le yogo' dan' bosozoj bene' ca' gwsela' Diosen' goso'e xtižen' cani'. ²⁶ ¿Chaquale bi cheyala' gac dan' ba goca? Cristo ben' gwlej Diosen' cont yedenabi'e, benen byen gwzaca'zi'e yogo' da' quinga ba goc, perw yeyoža' la'laon naque' bene' zaca' juisyw.

²⁷ Na' be'e diža' len legaque' bsd blo'ede' legaque' yogo' dan' nyoj che'na' le'e Xtiža' Diosen', gwzolaoteque' len dan' bzoj da' Moisés na' len dan' bosozoj yezica'chle bene' gwsela' Diosen' goso'e xtižen' cani'.

²⁸ Na' besežine' gala'ze yežen' gan' zja'aquen', na' Jesúsén' bene' ca' chon bene' šejch yelate' zito'ch. ²⁹ Perw bene' ca' gosone' byen yega'ane' len legaque', gose'ene':

—Yega'anczo' len neto', le ba chal na' ba nac bagwže' par šejo'.

Na' gwyo'e cont yega'anlene' legaque'. ³⁰ Na' šlac zjachi'e cho'a mesen' txen, Jesúsén' gwxi'e yetextilen' na' be'e yela' choxcen che Diosen' na' bzojjen' bnežjuen' legaque'. ³¹ Cana'ch gosacbe'ede' le'na'. Na' šlac ne' nite' ca' con benite'. ³² Nach gose' lježgaque':

—Leca bebe lažda'ochon' cate' be'lene' chio' diža' chanez na' bsd blo'ede' chio' can' nyojen che' le'e Xtiža' Diosen'.

³³ Na' la' besyeya'actie' jaya'aque' Jerusalénna' na' besyežine' gan' zjandop zjanžag postlw ca' šnej len bene' ca' yezica'chle. ³⁴ Na' bene' šnej ca' gose'e bene' ca' za' besyežin:

—Da' licze ba beban Xanchon'. Ba blo'elagüe' Simónna'.

³⁵ Nach bene' ca' chop gose'e legaque' dan' goc šlac zjangüe'e nezen', na' gose'e legaque' besyeyombi'e le' cate' bzojje' yetextilen' cont yesagüen'.

Jesúsen' blo'elagüe' bene' ca' zjanaque' le' txen
(Mt. 28:16-20; Mr. 16:14-18; Jn. 20:19-23)

³⁶ Ne' chesoe'te' dižan' ca', cate'cze gwzecha Jesúsen' gachol. Nach gože' legaque':

—Le soa binlo len xbab dan' yo'o lo' yichjlažda'olen'.

³⁷ Perw leca besežebe' na' besyebande', gosacde' še chesele'ede' bxin che da' bene' guata'. ³⁸ Nach Jesúsen' gože' legaque':

—¿Bichen' chacle tole? na' ¿bichen' chonle xbab ca' lo' yichjlažda'olen'? ³⁹ Le na'šc ni'a na' nga cont gacbe'ele neda'. Le can neda' cont gacbe'ele. Šaca' naca' bene' guat, bi nac žit bela' chia' ca' dan' chle'ele nga.

⁴⁰ Beyož gwne' ca', blo'ede' legaque' ni'a ne'e ca'. ⁴¹ Na' legaque' bina' yeyož yesejle'e catec chesyebande' na' catec chesyebede'. Nach Jesúsen' gože' legaque':

—¿De late' da' gagua'?

⁴² Nach bosonežjue'ne' late' yid bel gagüe' na' late' chixe beser da' yože šina'ba'. ⁴³ Gwxi'en na' gwdagüen' laogaquen'. ⁴⁴ Nach gože' legaque':

—Ba gwnia' le'e cate' ne' zoalena' le'e cheyala' gac yogo'lol da' ca' bsi' Diosen' xneze zjanyoj chia' le'e ley dan' bzoj da' Moisés, na' le'e dan' bosozoj bene' ca' goso'e xtiža' Diosen' cani', na' lecz ca' da' nyoj le'e Salmos ca'.

⁴⁵ Nach ben Jesúsen' cont gosejni'ide' da' ca' zjanyoj che' le'e Xtiža' Diosen'. ⁴⁶ Na' gože' legaque':

—Benen byen goc da' quinga cont goc can' nyojen žan neda' gata' na' yebana' ladjo bene' guat yeyon ža, neda' naca' Cristo ben' gwlej Diosen' yedenabia'. ⁴⁷ Na' le'e cheyala' güe'le xtiža'na' len bene' že' yogo' nación. Solaotecle güe'len Jerusalén. Güe'le xtižan' nale cheyala' yesyetinje benachen' xtolagaquen' cont Diosen' yezi'xene' chegaque'. ⁴⁸ Le'e cheyala' güe'le diža' che da' quinga ba ble'ele dan' ba goc chia'. ⁴⁹ Na' lecze sela' Spiritw che Xa' Diosen' yedesoan len le'e can' gwnen'. Na' le yega'an lo' ciuda nga na'a cuezle gon Xa' Diosen' le'e yela' guac da' za' yaba.

Beyep Jesúsen' yaba
(Mr. 16:19-20)

⁵⁰ Na' Jesúsen' gwche'e legaque' ja'aque' gan' chi' yež dan' nzi' Betania na' gwlis ne'e gwñabde' Diosen' gone' cont nite' mbalaz. ⁵¹ Na' ca' beyoža' beyepe' yaban'. ⁵² Na' bene' ca' gosaque' le' txen besyega'ane' yešlož dao' gosonxene' Jesúsen' nach jaya'aque' Jerusalénna', chesyebchgüede'. ⁵³ Na' gwnita'teze' lo' yodao' blaona' chesonxene' Diosen'. Da' na'ze chzoja' na'a.

DIŽA' GÜEN DAN' BZOJ SAN JUAN

Jesucristo ben' nzi' Xtiža' Dios golje' goque' beṇach

¹ Cate' gwxe yežlion' ba zoacze ben' nzi' Xtiža' Dios. Zoe' len Diosen' na' lecze naque' Dios. ² Cate' gwxe yežlion' ba zoacze' len Diosen'. ³ Len' bene' yogo' beṇach, yogo' angl, yogo' da' ca' beyac da' mal, yogo' beyixe' na' bite'teze da' dech. Bibi de da' gwxe da' bi ben ben' nzi' Xtiža' Dios. ⁴ Le' nse'e yeḷa' mban. Na' ben' ba zjanape' yeḷa' mban toḷi tocaṇe da' non'e, legaquen' ba yo'o be'ni' lo' yichjlažda'ogaquen'. ⁵ Ben' nzi' Xtiža' Dios bide' nse'e be'ni' che yichjlaždao' beṇachen', na' la'czla' beṇe' zan bi gosejnilaže'ne' na' bi gwyo'o be'ni' chen' lo' yichjlažda'ogaque', bi gosezaquede' yosocue'eje' be'ni' che'na'.

⁶ Gwzoa to beṇe' le Juan, na' Diosen' gwsele'ne'. ⁷ Juanna' ben' bzoe' beṇe' nis bedeye'e diža' che ben' nsa' be'nin', cont yogo' beṇach guac yesejnilaže'ne'. ⁸ Gague Juanna' nac beṇe' nsa' be'nin', san le' bedeye'e xtiža' ben' nsa' be'ni' che yichjlaždao' beṇachen'. ⁹ Ba bžin ža be'ni' da' nac da' dogualje ba blan' yežlio nga, na' blan' cont gwsenin' lo' yichjlaždao' note'teze beṇe'.

¹⁰ Ben' nzi' Xtiža' Dios zoe' yežlion' cate' gwseten. Na' la'czla' len' bene' yežlion' ben' že' yežlion' bi gosacbe'ede' non' naque'. ¹¹ Golje' ladjo neto' beṇe' gualaž che', perw zan neto' beṇe' gualaž che' bi gwyejle'to' chen'. ¹² San balteze chio' gwyejle'cho che', chio' gwyejnilaže'chone', bene' cont naccho xi'in Dios. ¹³ Na' gague lagüe goljcho nita' xaxna'cho zjanaque' beṇe' bela' chen ba naccho xi'in Dios. Na' gague lagüe to beṇe' byo gwzoalene' to no'ole ba naccho xi'in Dios, na' gague lagüe beṇe' byon' goclaže' soa xi'ine' ba naccho xi'in Dios, san da' chejnilaže'chone', da'nan' non Diosen' chio' xi'ine'.

¹⁴ Jesucristo ben' nzi' Xtiža' Diosen' golje' goque' beṇach na' gwzoe' len neto'. Na' ble'eto' naque' beṇe' zaca' juisyw, le togue' naque' dogualje Xi'in Dios. Leca nži'ilaže'de' chio' beṇach na' bedzejni'ide' chio' diža' li che Diosen'. ¹⁵ Juanna' ben' bzoe' beṇe' nis be'e diža' che', gwne':

—Che bengan' bi'a diža' cate' gwnia': “Beṇe' za' za' zaca'che' ca neda', le ba zoacze le' cate' bina' soa' neda'.”

¹⁶ Jesucriston' nži'ilaže'chgüede' yogo' chio' chejnilaže'chone' na' zoacze' chaclenchgüe' chio'. ¹⁷ Da' Moisésen' bzejni'ide' da' xozxta'o neto' beṇe' Israel ley che Diosen' na' chlo'en yogo'cho napcho dola', na' Jesucriston' bedelo'ede' nži'ilaže' Diosen' chio' beṇach na' bedzejni'ide' chio' diža' li che Diosen'. ¹⁸ Nono na' soa beṇe' ba ble'ede' Diosen'. Toz ben' nac dogualje Xi'in Dios beṇe' tliša' ba bzejni'ide' chio' beṇach can' nac yichjlaždao' Diosen', le chacchgüe Diosen' le'.

Juan ben' bzoe' beṇe' nis be'e xtiža' Jesúsén

(Mt. 3:11-12; Mr. 1:7-8; Lc. 3:15-17)

¹⁹ Beṇe' chesenabi'e nación Israel cheton' beṇe' že' Jerusalén gososele' to chope bxož na' yebale beṇe' gosalj lo diaža che da' Leví cont gosenabde' Juanna' non' naque'. ²⁰ Na' Juanna' bi bedi'ide', be'e diža' li gože' legaque':

—Gague nedan' Cristo ben' chbezcho seḷa' Diosen' yedenabi'e nación chechon'.

²¹ Nach gose'ene':

—¿Nox naco'? ¿Naco' da' Elías ben' be' xtiža' Diosen' cani'?

Na' gože' legaque':

—Bi naca' le'.

Nach gosenabde' le':

—¿Naco' ben' naquen yide' yedeye'lene' neto' xtiža' Diosen'?
Na' boži'en gwne':

—Bi naca'.

²² Nach da' yoble gosenabde' le':

—¿Non' naco'? cont ye'to' beņe' ca' gosesele' neto'. ¿Bi ža togo' che cuino'?

²³ Nach Juanna' gože' legaque':

—Neda' naca' ben' chņe zižje to latje daš, žia': "Le gwža' yichjlažda'olen' cont gwzenagle che Xanchon' cate' yide'", can' gwna da' Isaías ben' be' xtiža' Diosen' cani'.

²⁴ Beņe' ca' ja'ac lao Juanna', beņe' fariseo ca' gosesele' legaque'. ²⁵ Nach gose'ene':

—¿Bixchen' chzo' beņe' nis še bi naco' Criston' neca naco' Elíasen' na' neca naco' ben' chbezcho yedeye'e xtiža' Diosen'?

²⁶ Nach Juanna' gože' legaque':

—Neda' chzoa' beņe' nis, na' gachol le'e ba zoa to beņe' biņa' gombia'le.

²⁷ Len' za' gwlo'elagüe' na' zaca'che' ca neda', na' da' nacchgüe' beņe' zaca' bitw zaca' gona xmandadoe' lechja' no xele'.

²⁸ Yogo' da' quinga goquen gan' nzi' Betábara dan' chi' yešla'a yegw Jordán gan' chzoa' Juanna' beņe' nis.

Jesúsen' yeque'e xtoła' benachen'

²⁹ Na' beteyo Juanna' ble'ede' zej Jesúsen' gan' zoen' na' gože' ben' chosozenag che':

—Le na' ben' za' nga, Diosen' ba gwsele'ne' cont yeque'e xtoła' benachen'. Bena' zaca'lebe' ca xila' dao' ben' chot chio' beņe' Israel cont Diosen' chezi'xene' xtoła'chon'. ³⁰ Che len' bi'a diža', gwnia': "Ben' za' za' zaca'che' ca neda', na' le' ba zoacze' cate' biņa' soa' neda'." ³¹ Neda' bi gocbe'eda' non' naque' perw Diosen' bzejni'ide' neda', na' da'nán' zedezoa' beņe' nis cont yogo' chio' beņe' Israel gacbe'echo non' naque'.

³² Juanna' lecze gwne':

—Ble'eda' cate' betj Spiritw che Diosen' yaban' bžinen gan' zoa Jesúsen'. Bžinen ca to ngolbex na' bega'aņen len le'. ³³ Neda' bi gocbe'eda' še Jesús nan' naque' ben' gwseła' Diosen', nach Dios ben' gwsele' neda' chzoa' beņe' nis gože'nda': "Le'edo' yetj Spiritw chia' na' yega'aņen len beņe' ba mbeja'. Len' naque' beņe' gon cont soa Spiritw chian' lo' yichjlaždao' beņe' na' nabian' legaque'." ³⁴ Ba ble'eda' goc can' gwne' na' cho'a diža' le bengan' Xi'in Dios.

Beņe' nechw ca' gwlej Jesúsen' cont gosaque' le' txen

³⁵ Beteyo Juan ben' bzoa beņe' nis zeche' da' yoble len yečhope beņe' zjanaque' txen len le'. ³⁶ Na' cate' ble'ede' gwde Jesúsen', nach gože' beņe' ca':

—Le na' ben' gwseła' Diosen' ben' zaca'lebe' ca xila' dao' ben' chot chio' beņe' Israel cont Diosen' chezi'xene' xtoła'chon'.

³⁷ Na' cate' beņe' ca' čhope, ben' zjanaque' txen len Juanna', gosende' can' gwnen' nach ja'aclene' Jesúsen'. ³⁸ Nach beyečhj Jesúsen' na' gwne'e legaque' zjana'ogüe'ne', na' gože' legaque':

—¿Bi chaclaže'le?

Na' gose'ene':

—Maestrw, ¿gan' zo'?

³⁹ Nach gože' legaque':

—Le šo'o na' le'ele.

Nach ja'aclene'ne' na' besele'ede' gan' zoen', na' besyega'anlene' le' žana', le ba nac bagwže', ca do cheda tap.

⁴⁰ Na ca nac beṇe' ca' chope' bosozenag xtiža' Juanna' na' gosa'ogüe' Jesúsén', toe' Andrés, beṇe' biše' Simón Pedro. ⁴¹ Na' Andrésén' za' gone' bichle da' za' gone' na' jel güiže' Simón bišen' na' gože' le':

—Ba bežaglaoto' ben' chesene' Mesías, ben' ba gwlezcho yide' yedenabi'e nación Israel chechon'. —Na' Mesías zeje diža' Cristo.

⁴² Nach Andrésén' gwche'e beṇe' bišen' gan' zoa Jesúsén'. Na' cate' Jesúsén' ble'ede' Simónna' gože'ne':

—Len' Simón xi'in Jonás. Perw yososi' beṇe' le' Cefas. (Na' Cefas zeje diža' Pedro.)

Jesúsén' gwleje' Felipe na' Natanael cont bsed blo'ede' legaque'

⁴³ Beteyo Jesúsén' gwchoglagüen' yeyeje' Galilean' na' jaṇe'e Felipen' na' gože'ne':

—Yo'o len neda'.

⁴⁴ Felipen' goque' beṇe' Betsaida gan' nac laž Andrésén' len Pedron'. ⁴⁵ Nach Felipen' jaṇe'e Natanaelen' na' gože'ne':

—Bač ble'eto' ben' bzoj da' Moisésén' xtižen' le'e da' ca' gan' bzoje' ley chechon', na' lecze xtiže'na' bosozoj beṇe' ca' goso'e xtiža' Diosen' cani'. Len' Jesús beṇe' Nazaret, ben' nac xi'in José.

⁴⁶ Nach Natanaelen' gože'ne':

—¿Bat benecho yesene' Nazaret na' choj beṇe' zaca'?

Nach gož Felipen' le':

—Yo'o cont le'edo'.

⁴⁷ Na' Jesúsén' ble'ede' bač zej Natanaelen' gan' zoe'na' nach gwne':

—Na' za' to beṇe' Israel gualaž chechon' beṇe' naque' beṇe' güen. Ne late'ze bi naque' beṇe' gwxiye'.

⁴⁸ Natanaelen' bende' xtiža' Jesúsén' na' gože'ne':

—¿Nac chac nombi'o neda'?

Na' Jesúsén' gože'ne':

—Ble'eda' le' ślac zechao' xan yag yixgüigw cate' za' ne Felipen' le'.

⁴⁹ Nach Natanaelen' gwne':

—Maestrw, len' naco' dogualje Xi'in Dios. Len' naco' ben' chbezto' sela' Diosen' yedenabi'o nación Israel chechon'.

⁵⁰ Na' Jesúsén' gože'ne':

—¿Da' gwnia' ble'eda' le' xan yag yixgüigw nan' chejli'o chia'? Da' zaca'ch ca da' quinga za' le'edo'. ⁵¹ Da' li chnia', le'ele yaban' gan' zoa Diosen' gaquen ca to da' chyaljo na' beṇe' ca' zjanac angl che' chep chetj yesaque' yežlio gan' zoa' nga, le neda' naca' ben' gwseła' Dios golja' beṇač.

2

Gota' to yela' güešagna' yež da' nzi' Caná

¹ Beyon ža gota' to yela' güešagna' yež da' nzi' Caná gan' mbane distritw Galilea. Na' xṇa' Jesúsén' gwyeje' liž ben' gan' gota' yela' güešagna'na'. ² Na' lecze gosaxe' Jesúsén' len beṇe' ca' zjanaque' le' txen cont ja'aque' gan' chac yela' güešagan'. ³ Na' bebiž vino dan' chese'ej beṇe' ca' že'na', na' xṇa' Jesúsén' gože' le':

—Bich bi vino chegaque' de.

⁴ Na' gož Jesúsén' le':

—¿Bixchen' žo' ca'? le biṇa' žin hor gwlo'a non' naca'.

⁵ Na' xṇe'ena' gože' beṇe' ca' cheson mandadon':

—Le gon bite'tez da' ne'.

⁶ Na' nita' xop yeso' de yej ga chož nis da' chosochin bene' Israel gualaž cheto' ca' par chesa' cheseyib cuine' can' ža ley cheton'. Na' to to yej ca' chožen do xono' che'e o do ši che'e nis. ⁷ Nach Jesúsen' gože' bene' güen mandadw ca':
—Le yosša' yeso' yej ca' nis.

Na' gosegue'en nis goseža'ten. ⁸ Nach gože' legaque':

—Le gaše' laten' na'a na' le šjanežjon ben' yo'o lo ne'e lnin'.

Na' gosone' can' gwnen'. ⁹ Na' ben' yo'o lo ne'e lnin' con bnixen' bi neзде' gan' zan', con bene' ca' cheson mandadw na'ze gosenезде' nisen' beyaquen vino, le legaquen' gosaše' nisen'. Na' bena' bnixen' na' goxe' bene' byo ben' bšagnan',
¹⁰ na' gože'ne':

—Yogo'ze bene' chon lni chdie' vino güen da' chzaca' la'ay cate' chzolao lnin', na' cate' ba zjane'eje' da' zil nach cho'e legaque' da' corrient. San le' bzago' vino šagüen' chdion' na'a ba cheyož lnin'.

¹¹ Da' nga ben Jesúsen' yež Caná distritw Galilea goquen yela' guac nechw da' bene' cont blo'e naque' bene' zaca'chgua, nach bene' ca' gwleje' cont gosaque' le' txen gosejnilaže'ne'.

¹² Gwde na' Jesúsen' gwyeje' Capernaum len xne'e na' len bene' biše' ca', na' len bene' ca' zjanaque' le' txen, na' besyega'ane' na' chop šone ža.

Jesúsen' bebeje' bene' cheson ya'a chyo'o yodao' blao

(Mt. 21:12-13; Mr. 11:15-18; Lc. 19:45-46)

¹³ Na' ba zoa gala' lni che neto' bene' Israel da' nzi' pascw, nach Jesúsen' gwyeje' Jerusalén len bene' ca' zjanaque' le' txen. ¹⁴ Cate' bžine' chyo'o yodao' blaon' bene' zan že' chesote' go'n na' xila' na' ngolbex, na' zjachi' bene' chosoše'e mechw. ¹⁵ Jesúsen' ble'ede' can' chaca' na' bene' to tašjw de do na' bchinen' cont bebeje' yogo' bene' ca' že' chyo'o yodaon', len xila' ca', len go'n ca', na' beslase' xmechw bene' chosoša' mechon' na' gwlo'oni'ane'e xmesgaquen'. ¹⁶ Na' gože' bene' ca' chesote' ngolbexen':

—Le yebej yogo' be qui nga. Bi gonle ya'a liž Xa' nga.

¹⁷ Nach bene' ca' zjanaque' le' txen jaseza'laže' can' nyoj Xtiža' Diosen' gan' žan: "Da' chi'chgua yichja' che ližon' chonten ga saca'zi'chgua."

¹⁸ Na' ben' chesenabia' nación Israel cheton' gose'ene':

—¿Bi yela' guac gono' da' le'eto' cont šejle'to' zaco' bebejo' bene' ca'?

¹⁹ Jesúsen' boži'e xtiža'gaquen' gwne':

—Le yochinj yodao' nga na' šone žaze yeyonan'.

²⁰ Nach bene' gwnabia' ca' gose'ene':

—Xopeyon iz byažjen gosone' yodao' nga, ¿chacdo' guac yeyonon' šone žaze?

²¹ Perw Jesúsen' bsaca'lebde' cuerp chen' yodao' cate' gwne' ca', na' legaque' gosone' xbab che yodao' na'zen' gwne' ca'. ²² Na' cate' bžin ža beyas bebane' ladjo bene' guat ca', bene' ca' zjanaque' le' txen jaseza'laže' can' gwnen' na' gosejle'e Xtiža' Diosen' dan' nyoj che' na' lecze gosejle'e xtiža' Jesúsen'.

Jesúsen' neзде' bin' yo'o lo' yichjlaždao' benachen'

²³ Šlac gwzoo Jesúsen' Jerusalénna' lo lni pascon' bene' zan besele'ede' yela' guac ca' dan' benen' na' gosejle'e naque' bene' gwsela' Dios. ²⁴ Perw Jesúsen' bi ben cuine' lo na'gaque', le nombi'e yichjlaždao' benachen'. ²⁵ Bi byažjde' no ye' le' xbab da' yo'o lo' yichjlaždao' bene' ca'. Le nezeczedede' bin' yo'o lo' yichjlaždao' to to chio' benach.

3

Jesúsen' len Nicodemo

¹ Na' gwzoa to bene' fariseo bene' le' Nicodemo. Goque' to bene' gwnabia' che nación Israel cheton'. ² Gwyeje' lao Jesús'en' šeže'le na' gože'ne':

—Maestrw, nezeto' Diosen' gwsele' le' cont chzejni'ido' neto', le nono gac gon yela' guac ca' dan' chonon' še bi zoa Diosen' len le'.

³ Na' gož Jesús'en' le':

—Da' li chnia' le', še non' bi galje yeto bi gac šjayzoe' gan' zoa Diosen' chnabi'e.

⁴ Nach gož Nicodemon' le':

—¿Nac gon to bene' galje' še' ba naque' bene' gole? ¿Guaquech yeyo'e lo' le'e xne'en' cont galje' yeto?

⁵ Na' Jesús'en' gozne':

—Chnia' le'e to da' zejen, še non' bi galje' len nis na' len Spiritw che Diosen', bi gac šjayzoe' gan' zoa Diosen' chnabi'e. ⁶ Bene' zjanaque' bela' chen chesenita' xi'ingaque' lecze bi' bela' chen. Na' Spiritw che Diosen' chnežjon yela' mban toli tocañe che bene' chesejnilaže' Diosen'. Da'n'an' žacho chesalje' yeto. ⁷ Bi yebando' dan' gwnia' chonen byen yogo' bene' galje' yeto. ⁸ Cate' chechj be' chechjen gate'teze, na' chendo' cholyoyen perw bi nezdo' ga zan' na' neca nezdo' ga šejen. Ca'czen' naquen len yogo' bene' chon Spiritw che Diosen' cont chesalje' da' yoble. Bi chle'echo da' chon Spiriton' perw nacia' ba bocoben yichjlažda'ogaque'.

⁹ Nach Nicodemon' gože'ne':

—¿Nacxe gac can' žo' nga?

¹⁰ Na' gož Jesús'en' le':

—Le' chsed chlo'edo' bene' Israel gualaž chechon' xtiža' Diosen', ¿bi chejni'ido' da' quinga? ¹¹ Da' li neto' chyixjue'eto' da' nezeto' na' choe'to' diža' che da' ba ble'eto' na' bi chejle'le. ¹² Ba bia' diža' che dan' chac yežlio nga na' bi chejle'ele. ¿Nac gac šejle'le še nia' le'e da' chac yaban'?

¹³ 'Toze neda' naca' ben' gwseła' Diosen' golja' benač za'a yaba na' noch no zoa no ba beyep yaba cont nezde' che Diosen'. ¹⁴ Na' can' goc latje daš cani' cate' gwlis da' Moisés'en' bel de bronce bde'eba' to le'e yag, can' cheyala' gac yeselise' neda' to le'e yag, neda' gwseła' Diosen' golja' benač. ¹⁵ Na' gac chia' ca' cont note'teze bene' yesejnilaže' neda' bi cuiaye'e san gata' yela' mban che' toli tocañe.

Chaque Diosen' benačen'

¹⁶ 'Leca chaque Diosen' chio' benač, na' gwseła' Xi'ine' bene' tliša' cont note'tez bene' chejnilaže'ne' bi cuiaye'e, san gata' yela' mban che' toli tocañe. ¹⁷ Na' Diosen' gwsele' Xi'in'en' yežlio nga gague cont gwnežjue' castigw che xtola' benačen', san cont gwnežjue' yela' mban chegaque' toli tocañe.

¹⁸ 'Note'tez bene' chesejnilaže' Xi'in' Diosen' bene' tlišan', bi yesezi'e castigw che xtola'gaquen', perw bene' bi chesejnilaže'ne' ba nchoglaon chegaque' yesezaca'zi'e toli tocañe da' bi chesejnilaže' Xi'in' Dios bene' tlišan'. ¹⁹ Na' can' naquen, bene' bi chesejnilaže' Xi'in' Diosen' ba nchoglaon chegaque' yesezaca'zi'e toli tocañe. Nchoglaon yesezaca'zi'e, le ba bid Xi'in' Diosen' nse'e be'ni' che yichjlaždao' benačen' perw na' chesyebchde' dan' nac chol clal ca be'ni' chen', dan' chesone' da' malen'. ²⁰ Yogo' bene' cheson da' mal chesegue'ede' be'ni' chen' na' bi chesazlaže' yosozenague' che' cont bi gwlo'elaon še chesone' da' mal. ²¹ San note'tez bene' cheson can' ža diža' li che Diosen', chesyebede' chosozenague' che Criston', le chlo'en zoacze Diosen' chaclene' legaque' cont chesone' can' ža diža' li chen'.

Juan ben' bzoa bene' nis be'che' diža' che Jesús'en'

²² Gwde na' Jesúsén' len bene' ca' zjanaque' le' txen ja'aque' yež dao' ca' zjachi' gan' mbane distritw Judean'. Na' šlac gosenite' na' bosozoe' bene' nis. ²³ Na' Juanna' lecze bzoe' bene' nis yež gan' nzi' Enón da' chi' gała'ze Salim, le na' dechgua nis. Na' ja'ac bene' gan' gwzoen' cont bzoe' legaue' nis. ²⁴ Caten' bina' yeseyixjue' Juanna' ližyan' goc ca'.

²⁵ Nach gwche' to žaš len bene' ca' zjanaque' txen len Juanna' na' yeto čhope bene' Israel gualaž čheto' che dan' chesezoa bene' nis. ²⁶ Nach ja'aque' lao Juanna' na' gose'ene':

—Maestrw, ben' gwzoa len le' yešła'a yegw Jordánna', ben' cho'o xtižen', bač chzoe' bene' nis na' yogo'ze bene' chja'aque' gan' zoe'na'.

²⁷ Nach Juanna' gože' legaue':

—Nono gacxene' še bi gon Diosen' cont yesonxen bene' le'. ²⁸ Nezczele can' ba gwnian', bi naca' Cristo ben' chbezcho seła' Diosen' yedenabi'e chio', san naca' ben' gwseła' Diosen' cont bia' xtižen' žialaole. ²⁹ Cate' chac to yela' güešagna', toz bene' byo ben' chšagnan' chzi'e no'olen'. Perw še zoa bene' migw che' len le' ža'na, chebede' cate' ben' chšagnan' že' zoe' mbalaz. Can' chac len neda', chbechgüeda' bene' zan chosozenague' che Criston'. ³⁰ Len' cheyala' šejch yesonxen bene' le' na' neda' cheyala' šejch yesanlaže' neda'.

Bene' za' gan' zoa Diosen'

³¹ Ca nac Cristo ben' za' gan' zoa Diosen', le' naque' bene' zaca'ch ca yogo'lol bene'. Yezica'chle beňač zjanaque' bene' che yežlio ngaze na' che yežlio ngaze cheso'e diža'. Perw na' Cristo ben' za' gan' zoa Diosen' zaca'che' ca yogo'lol bene'. ³² Le' cho'e diža' che da' ca' ba ble'ede' na' diža' da' ba bende' gan' zoa Diosen', na' nono chzenag xtižen'. ³³ Na' note'tez bene' chosozenag xtiža' ben' za' gan' zoa Diosen', nachbia' bena' nezde' Diosen' cho'e diža' li. ³⁴ Na' bena' gwseła' Diosen', bena' za' gan' zoe'na', len' cho'e xtiža' Diosen', le Spiritw che Diosen' zoan len le', na' cate' Diosen' choňe' Spiritw chen' bi chyisen' late' güeje. ³⁵ Diosen' chacde' Xi'ine' Criston' na' ba bene' lo ne'e yogo'lol da' de yežlion'. ³⁶ Na' bene' ca' chesejnilaže' Xi'in Diosen' de yela' mban čhegaue' toli tocaňe, san bene' cheson güedenag len Xi'in Diosen', bi gata' yela' mban čhegaue', le Diosen' gone' cont yesezaca'zi'e toli tocaňe.

4

Jesúsén' be'e diža' len to no'ole Samaria

¹⁻³ Na' goquen' bene' zanch chosozenague' che Jesúsén' ca bene' chosozenag che Juanna', na' bene' zanch chesezoa nis len Jesúsén' ca bene' chesezoa nis len Juanna', la'czła' gague cuin Jesúsén' bzoe' bene' nis, bene' ca' zjanaque' le' txen gosonen'. Nach cate' Jesúsén' gwnezde' bene' fariseo ca' gosache'ede' bene' zanch zjana'ogüe' le', nach beze'e distritw Judean' na' beyeje' distritw Galilean' len bene' ca' zjanaque' le' txen.

⁴ Na' benen byen zjaya'aque' nez da' chde Samarian'. ⁵ Ca' goquen' besežine' to yež da' nzi' Sicar lo distritw Samarian'. Yežen' čhega'anen gała'ze gan' de yežlio dan' bnežjw da' Jacob da' xi'ine' José. ⁶⁻⁸ Na' žia to bej da' nacchgua sitjw da' nzi' Bej che da' Jacob. Ca do guagwbiž Jesúsén' ba chjaxaquede' ngüe'e nezen' nach gwchi'e cho'a bejen'. Na' bene' ca' zjanaque' le' txen ba zja'aque' lagüe yežen' zjasexi'e da' yesagüe' len le', cate' bžin to no'ole Samaria cho'a bejen' cont güe'e nis. Na' Jesúsén' gože'ne':

—Ben late' nis ye'eja'.

⁹ Na' no'ole Samarian' boži'en gože'ne':

—¿Nacxečen' le' naco' bene' Israel chňabdo' neda' nis ye'ejo'? le no'ole Samaria neda'.

(Na' ca nac bene' Israel gualaž cheto' ca', bi chesene lježe' len bene' Samaria ca.) ¹⁰ Nach Jesúsen' gože'ne':

—Neda' ba goša' le': "Ben late' nis ye'eja'", na' šaca' nezdo' da' chaclaže' Diosen' gone' le' na' šaca' chache'edo' non' naca' neda', ba gwñabdon' neda' na' ba beña' le' nis da' choñ yela' mban toli tocañe šaca'.

¹¹ Na' no'olen' gože'ne':

—Bene', bi noxo' bi gaše'don' na' bej nga naquen sitjw. ¿Gaxe si'o nis da' choñ yela' mbanna' žo' ca'? ¹² ¿Chacdo' zaca'cho' ca da' xozxta'ocho Jacob ben' bocua'añ len neto' bej nga gan' güe'eje' len xi'ine' ca' na' len beyixe' che' ca'?

¹³ Gož Jesúsen' le':

—Note'tez bene' ye'ej nis che bej nga bia'cze bilde' da' yoble. ¹⁴ Na' note'tez bene' ye'ej nisen' gwnežjua'ne' neda', gwbatech bilden' da' yoble, le dan' gwnežjua'nen' gaquen lo' lažda'ogüe' ca to latje ga chaldi nis cont gata' yela' mban che' toli tocañe.

¹⁵ Na' no'olen' gože'ne':

—Bene', ben neda' nisen' žo' ca' cont bich bildan' na' bich yida' dexian' nga.

¹⁶ Jesúsen' gože'ne':

—Beyej jel güiž bene' chio' na' le da nga.

¹⁷ Nach gože' Jesúsen':

—Notno bene' chia' zoa.

Na' Jesúsen' gože' no'olen':

—Ledo' can' gwnaon' nono bene' chio' zoa, ¹⁸ le gayo' bene' chio' ba gwnita' na' bene' zoaleno' na'a gague naque' bene' chio'. Da' li can' ba gwnaon'.

¹⁹ Na' gož no'olen' le':

—Bene', chache'eda' naco' to bene' chac chyixjue'ede' bi da' ža Diosen'.

²⁰ Da' xozxta'o neto' bene' Samaria gosonxene' Diosen' lo ya'an zoa nga, na' le'e nacle bene' Israel žale Jerusalénna' cheyała' gonxenchone'.

²¹ Jesúsen' boži'en gože'ne':

—No'ole, gwyejle' chia', gwžin ža cate' bi gonen byen gonxenle Diosen' lo ya'a nga ne Jerusalénna'. ²² Le'e nacle bene' Samaria bi nombia'yañe'le Dios ben' chonxenle. Neto' bene' Israel nombia'to' Dios ben' chonxento', na' ladjo' neto' bene' Israel choj ben' yebej beñačen' lo da' malen'. ²³ Chžin ža na' na'a ba gole', cate' bene' yesonxene' Xacho Diosen' can' cheyała'cze yesonxene' le', gate'tez nite', lo' yichjlažda'ogaquen' yesonxene' bene' naque' dogualje Dios, le Xacho Diosen' cheyiljue' bene' yesonxene' le' ca'. ²⁴ Diosen' bi naque' bene' bela' chen, naque' spiritw. Da'nan' bene' yesonxen le', lo' yichjlažda'ogaque' cheyała' yesonxene' bene' nac dogualje Dios.

²⁵ Nach no'olen' gože'ne':

—Nezda' yid ben' ba gwlej Diosen' cont yedenabi'e chio', ben' nzi' Mesías o Cristo, na' cate' le' yide' yedezejni'ide' chio' yogo' da' quinga.

²⁶ Nach Jesúsen' gože' no'olen':

—Neda' choe'lena' le' diža' naca' ben' žo' ca'.

²⁷ Ne' choe'lente Jesúsen' no'olen' dižan' cate' bene' ca' zjanaque' le' txen besyežine' cho'a bejen'. Na' besyebande' choe'lene' to no'ole diža', perw ne toe' bi gosenabde'ne' bi dižan' choe'lene' no'olen' o bixchen' chšaljlene' le'.

²⁸ Nach no'olen' bocua'añ che'e nis chen' na' beyeje' lo yežen' jayeže' bene' gualaž che' ca':

²⁹ —Le šo'o le na' to bene' ba gože' neda' yogo'te da' ba beña'. ¿Še bengan' Cristo ben' chbezcho yedenabi'e?

³⁰ Na' besežaše' yežen' ja'aque' gan' chi' Jesúsen'. ³¹ Na' šlac zjayda no'olen', bene' ca' zjanaque' Jesúsen' txen gosata'yoede' le', chese'ene':

—Maestrw, gwdagw.

³² Na' Jesúsén' gože' legaque':

—Bi nezele de to yela' guagw chia'.

³³ Na' gose' lježe':

—¿Gague ba bedesesan bene' da' gwdagüe'?

³⁴ Na' gož Jesúsén' legaque':

—Len neda' naquen ca to yela' guagw chona' can' chazlaže' Dios ben' gwseła' neda' cont gac yogo' da' chnalaže'. ³⁵ Le'e žale: “Ne' dech yetap bio' cont yedobe cosešen'.” Na' neda' chnia', le na' na' le'ele to coseš da' chyažje yedob na'a. ³⁶ De da' goncho na'a cont bene' yosozenague' che Diosen' na' gata' yela' mban chegaque' toli tocañe. Na' bene' cheseyixjue'ede' xtiža' Diosen' na' lente bene' chesone' cont yosozenag bene' xtižen' txen yesenite' mbalaz. ³⁷ Diža' nga naquen da' li, žan: “Bene' yoble chaz na' bene' yoble chelap.” ³⁸ Bač chseła' le'e šjaylaple gan' bi gozle, le le'e gonle cont yosozenag bene' xtiža' Diosen' dan' ba goseyixjue'e bene' yoble.

³⁹ Na' ca nac bene' yež Sicar ga mbane Samaria, zane' gosejnilaže' Jesúsén' da' gosende' gwna no'olen': “Ba gože' neda' yogo' da' ba bena'.” ⁴⁰ Nachen' besežin bene' Sicaren' gan' chi' Jesúsén' gosata'yoede' le' yega'anlene' legaque', na' bega'ane' chope ža. ⁴¹ Na' bene' zanch gosejnilaže' Jesúsén' cate' gosende' diža' da' be' cuine'. ⁴² Nach gose'e no'olen':

—Bač chejle'to' na'a, gague dan' bzenagto' xtižo' na'ze, san da' ba beneto' choe' cuine' dižan', na' nezeto' bengan' Cristo ben' gwlej Diosen' cont yebeje' benachen' lo da' malen'.

Jesúsén' beyone' xi'in to bene' gwnabia'

⁴³ Na' cate' goc chop ža, Jesúsén' len bene' ca' zjanaque' le' txen gosa'aque' jaya'aque' Galilea. ⁴⁴ Le cuin Jesúsén' ba gwne' note'teze bene' cho'e xtiža' Diosen', bi chesonla'ancze bene' gualaž chen' le'. ⁴⁵ Na' cate' besežine' Galilean' bene' gualaž chegaquen' bosolebe' Jesúsén' dan' ba besele'ede' yogo' da' güen da' bene' Jerusalenna' lo lnin', le lencze legaque' ja'aque' lnina'.

⁴⁶ Na' gozej Jesúsén' yetni'a yež Caná dan' chi' distritw Galilea gan' bene' cont nisen' beyaquen vino. Na' yež Capernaum gwzoo to bene' gwnabia' bene' chon žin che rey, na' chacšenchgüe xi'ine'. ⁴⁷ Xa bi'na' cate' bende' ba bežin Jesúsén' Galilean' zeze'e Judean', nach gwyeje' lao Jesúsén' gwneyoede' le' šjeje' šjayene' xi'inen', le ba zoa gatbe'. ⁴⁸ Na' Jesúsén' gože'ne':

—Še bi chle'ele yela' guac na' bichle da' zaca' yebanele, bi chejle'le chia'.

⁴⁹ Nach ben' chon žin che reyen' gota'yoede' le' gwne':

—Bene', yo'ošca šlac biña' gat bi' chian'.

⁵⁰ Na' Jesúsén' gože'ne':

—Beyej ližo', bi gat bi' chion'.

Nach gwyejle' bena' dan' gož Jesúsén' le' na' beze'e. ⁵¹ Ba zoa yežine' cate' jasešag xmose' ca' le' na' gose'ene':

—Ba beyac bi' chion'.

⁵² Na' gwñabde' legaque' bi hor gwzolao beša'alaže'be', na' gose'e le':

—Neje cheda to gwde guagwbiž bechojbe' da' lan'.

⁵³ Na' xaben' gocbe'ede' ca hor na'czen' gož Jesúsén' le' bi gat bi' chen'. Nach gwyejnilaže' Jesúsén', le' len yogo' bene' že' ližen'.

⁵⁴ Da' nga goc yela' guac gwchop da' ben Jesúsén' šlac beze'e Judean' na' bežine' Galilea.

5

Jesúsen' beyone' to bene' nat late' cuerp che'

¹ Na' gwde to tiemp bžin ža goc yeto lni che neto' bene' Israel Jerusalénna', na' Jesúsen' gwyeje'. ² Jerusalénna' gala'ze cho'a puert che ze'e da' nyečj ciudadan' dan' nzi' Puert che Xila' žia to ga chož nis da' nzi' Betesda, na' ze gayo' chalšil cue'ej cuite gan' chož nisen'. ³ Na' bene' zan bene' güe' zjadie' chalšil ca', no bene' lchol, no bene' nxinj ni'e, no bene' natsi' late' güeje cuerp chegaquen'. Zjadie' chesebeze' batcan' ta nisen'. ⁴ Le tgüeje betj to angl na' bte' nisen', na' bene' nechw bene' cho'e lo' nisen' cheyož chta anglen' len, cheyacde' bite'tez yižgüe' che'ede'. ⁵ Na' cate' bžin Jesúsen' na' de to bene' ba goc šino'šonechoa iz chacšende'. ⁶ Na' Jesúsen' ble'ede' ben' na' gocbe'ede' ba chac šša de' ca', na' gože'ne':

—¿Chaclažo' yeyaco'?

⁷ Na' bene' güen' gože' Jesúsen':

—Bene', nono zoa no co' neda' lo' nisen' cate' chdan. Na' šlac zya'a cont šo'a, bene' yoble chyobde' chetje' lo' nisen'.

⁸ Nach gož Jesúsen' le':

—Gwyas na' botobe xta'on na' gwda.

⁹ Na' la' beyacte bena' na' botob xte'en na' gwzolao chde'. Perw na' goquen to ža che Dios cate' bi de lsens gon neto' bene' Israel žin. ¹⁰ Nach bene' gwnabia' che neto' bene' Israel gose'e bena' beyaquen':

—Ža che Dios na'a. Bi de lsens yeyoa' xta'ona'.

¹¹ Na' gož ben' legaue':

—Bena' beyon neda' gože'nda': "Botobe xtaon' na' gwda."

¹² Nach gose'ene':

—¿Non' gož le': "Botobe xtaon' na' gwda"?

¹³ Na' ben' beyaquen' bi gwnezde' non' beyon le', le Jesúsen' benite' ladjo bene' zan ca'. ¹⁴ Gwdechle Jesúsen' bedile' bena' beyaquen' lo' yodao' blaon' na' gože' le':

—Bač beyaco' na'a, na' cheyala' cuejyichjo' da' malen' bich gonon', cont bi gac chio' to da' malech.

¹⁵ Nach beza' bena' jatixjue'ede' bene' gwnabia' che nación Israel cheton' gože' legaue' Jesúsna' ben' beyon le'. ¹⁶ Da'nana' bene' gwnabia' ca' gwzolao gosebe'na'ogüe' Jesúsen' na' cheseyiljue' nacle yesone' yesote'ne' da' chone' yela' guac ca' ža che Dios cate' bi de lsens gon neto' bene' Israel žin. ¹⁷ Na' Jesúsen' gože' legaue':

—Xan' zoacze' chelalde' bate'teze na' lecze ca' neda'.

¹⁸ Da'nana' goseyljwlaže'che' nacle yesone' yesote' Jesúsen', perw gague neče bi chone' can' ža ley gan' chgualan' che ža che Dios na'zen', san lecze da' gwne' Diosen' naque' Xe', le zejen toz ca' zaque' len Diosen'.

Yela' chnabia' da' nape Xi'in Diosen'

¹⁹ Na' gož Jesúsen' legaue':

—Chnia' le'e to da' zejen, bibi chac gona' to gualaza'. Con da' chle'eda' chon Xan', lenna' chona', na' bite'teze da' chon Xan', lenna' chona', le neda' naca' Xi'ine'. ²⁰ Chaque Xan' neda' na' chlo'ede' neda' yogo' dan' chone'. Na' gwlo'ede' da' zaca'ch ca' da' quinga da' gona' cont yebanele. ²¹ Ca Xa' Diosen' chosbane' bene' ladjo bene' guat ca', ca'cze chona' neda' naca' Xi'ine', chnežjua' yela' mban che note'tez bene' chbeja' cont gata' yela' mban chegaue'. ²² Na' Xan' bi chchoglagüe' che ne to bene' še nape' doła', san ba gwlo'e lo' na' choglagua' che yogo' benač še non' nap doła'. ²³ Xan' chaclaže'

yogo' bene' yesonxene' neda' lecze can' chesonxene' le'. Na' bene' bi chonxen neda', ne Xa' Diosen' bi chonxene', le le'na' gwsele' neda'.

²⁴ 'Chnia' le'e to da' zejen, bene' chosozenag xtižan' na' chesejnilaže' Dios ben' gwsela' neda', de yela' mban čegaque' toli tocañe. Na' bi yezezaca'zi'e toli tocañe da' bi chesejnilaže'ne'. Bich zjanaque' ca bene' guat len yichjlažda'ogaquen' da' bi chosozenague' che Diosen', san ba bocobe' yichjlažda'ogaquen' neche ba chesejnilaže'ne'. ²⁵ Chnia' le'e to da' zejen, gwžin ža cate' bene' zjanac ca bene' guat len yichjlažda'ogaque' yesende' xtiža' neda' naca' Xi'in Dios, na' bene' yosozenag chia' gata' yela' mban čegaque' toli tocañe, na' bač chzolao chac ca' na'a. ²⁶ Xa' Diosen' zoacze' toli tocañe na' chone' cont zjamban beñačen', na' lecze ba bene' cont neda' naca' Xi'ine' zoa' toli tocañe na' chona' cont zjamban bene'. ²⁷ Na' lecze ba bene' neda' yela' chnabia' cont nia' non' nap doła', le ba gwsele' neda' golja' beñačh. ²⁸ Bi yebanele dan' chnia' nga, le gwžin ža cate' yogo'lol bene' guat že' lo' ba yesende' cate' yol güiža'ne'. ²⁹ Na' bene' ca' goson da' güen šlac gosebane' yesyechoje' na' yesebane' toli tocañe. Na' bene' ca' goson da' mal šlac gosebane' yesyechoje' na' yezezaca'zi'e toli tocañe.

Jesúsen' bzejni'ide' nape' yela' chnabia'

³⁰ 'Bibi gac gona' to gualaza'. Chzenaga' bin' ža Xan' cont nia' che beñačen' noe' nap doła'. Na' dan' nia' gac che to to bene' naquen da' cheyała' gac, le bi chi'yichja' gac dan' chnalaža'; san chi'yichja' gac can' chnalaže' Xan' ben' gwsela' neda'. ³¹ Šaca' toz neda' chgua'a da' bali non' naca', bi naquen to da' šejle'le. ³² Perw zoa Xan' cho'e diža' li non' naca', na' nezda' diža' da' cho'e chia' naquen da' šejle'le. ³³ Bač gwsela'le bene' lao Juanna' cont jasenabde' le' nac nac chia', na' Juanna' be'e diža' li non' naca'. ³⁴ Perw neda' bi chyažjda' diža' da' güe' ne to beñačh chia'. San chnia' da' quinga cont le'e šejle'le chia' na' gata' yela' mban čele toli tocañe. ³⁵ Juanna' goque' ca to yi' da' chseni'chgua dan' bzejni'ide' le'e che Diosen', na' šlož daon' bebele dan' bsd blo'eden'. ³⁶ Na' de to da' choe' xtiža' da' zaca'ch ca diža' da' choe' Juanna' chia': chona' yogoloł da' ba gwlo'o Xan' lo na' gona', na' da' ca' chonan' choen' diža' le Xan' gwsele' neda'. ³⁷ Nach Xan' ben' gwsela' neda' lecze cho'e xtižan', la'czla' biña' yenele can' chnen' na' biña' le'ele can' naquen'. ³⁸ Xtižen' biña' šon' lo' yichjlažda'olen', le bi chejnilaže'le neda' naca' ben' gwselen'. ³⁹ Chsedyañe'le gan' nyoj Xtiža' Diosen', le chaquele gaple yela' mban toli tocañe neche chsedlen. Na' da' ca' chsedlen' zjanyojen chesoen' xtiža'. ⁴⁰ Perw bi chaclaže'le šejnilaže'le neda' cont gata' yela' mban čele toli tocañe.

⁴¹ Na' neda' bi chyažjda' yesena beñačen' naca' bene' zaca'. ⁴² Nombi'a le'e na' nezda' bi chaquele Diosen'. ⁴³ Xan' ba gwsele' neda' chona' con da' že', perw bi chejle'le chia'. Na' cate' za'ac bene' cheson con bi da' ža xbab čegacze', nachle chejle'le čegaque'. ⁴⁴ ¿Nacxe gac šejle'le chia'? le chzelaže'le yesena bene' chonle güen, na' bi chzelaže'le gonle cont toz Diosen' ne' chonle güen. ⁴⁵ Bi gonle xbab neda' gwcuiša' le'e lao Xan'. Da' Moisésen' hcuiše' le'e lagüen', le chsedchguale dan' bzojen' chaquele cont soale binlo len Diosen', perw bi chejle'le xtižen'. ⁴⁶ Šaca' chejle'le xtiža' da' Moisésen', chia' neda'czen' chejle'le še ca', le xtiža' nedan' bzoje'. ⁴⁷ Na' da' bi chejle'le dan' bzoj da' Moisésen', ¿nacxe gonle šejle'le bi dan' žia' le'e?

6

Jesúsen' bguagüe' gayo' mil bene'

(Mt. 14:13-21; Mr. 6:30-44; Lc. 9:10-17)

¹ Gozde goc ca' Jesúsen' gwyeje' yešla'a nisdao' che Galilea len bene' ca' zjanaque' le' txen. Na' nisdao' na' lecze nzin' Nisdao' Tiberias. ² Na' bene' zan zjanao' Jesúsen' da' ba besele'ede' yela' guac dan' chonen' cheyone' bene' güe' ca'. ³ Na' gwloe Jesúsen' to lo ya'a len bene' ca' zjanaque' le' txen na' gosebi'e. ⁴ Na' da' yoble ba zoa gala' lni che neto' bene' Israel da' nzi' pascw. ⁵ Na' cate' gwna' Jesúsen' ble'ede' bene' zan ba zjanao' le' na' gože' Felipen':

—¿Gaxe si'cho da' yesagw yogo' bene' quinga?

⁶ Gwne' ca' yešque bi na Felipen', le Jesúsen' nezecede' naquen' gone'. ⁷ Na' Felipen' gože'ne':

—Chop gayoa denario yetextilen' bi gaquen yesyechele to toe' ne late' güejen.

⁸ Na' yeto ben' naque' Jesúsen' txen le Andrés na' naque' bene' biše' Simón Pedro. Na' Andrésen' gože' Jesúsen':

⁹ —Nga zoa to bi' byo dao' na' de gayo' yetextil de cebada chebe' na' yechope bel ya'a. Perw ¿bi de gon da' quinga? le bene' zanna' že' nga.

¹⁰ Nach Jesúsen' gože' bene' ca' zjanaque' le' txen:

—Le ye' yogo' lole' yesebi'e.

Dechgua yixye latjen', na' gosebe' bene' ca' lo yixyena', ca do gayo' mil bene' byo, bi cuent no'ole len bidao'. ¹¹ Nach gwxi' Jesúsen' yetextil ca', na' beyož be'e yela' choxcen che Diosen' bnežjuen' bene' ca' zjanaque' le' txen cont goseyisen' len bene' ca' zjachi' na'. Na' lec ca' bene' len bel ya'a ca'. Na' goso'e to toe' con ca'te'te' gosaclačže' gosagüe'. ¹² Na' beyož gosagüe' ca'te'te' goseljde', Jesúsen' gože' bene' ca' zjanaque' le' txen:

—Le yotobe da' ca' bega'an late' güeje cont bibi cuiayi'.

¹³ Nach bosyotobe' da' bixjw ca' dan' besyega'an lao gayo' yetextil ca' de cebad, na' goquen šižinw žome. ¹⁴ Cate' bene' ca' besele'ede' yela' guac dan' benen' nach gosene':

—Da' li bengan' choe' xtiža' Dios na' naque' ben' ba gwlezcho seła' Diosen' yežlio nga.

¹⁵ Na' cate' Jesúsen' gocbe'ede' ba zoa yeseche'exoxje' le' cont yesone' le' rey chegaque', nach gozze'e gozeje' ya'adaon' toze'.

Jesúsen' gwze'e lo nisdao'

(Mt. 14:22-27; Mr. 6:45-52)

¹⁶ Cate' ba gwxin, bene' ca' zjanaque' Jesúsen' txen jaya'aque' cho'a nisdao'. ¹⁷ Na' besyeyo'e to lo' barcw zjaya'aque' ciuda Capernaum. Ba gol na' Jesúsen' biña' yežine'. ¹⁸ Na' chas chata' chac nisdao' le chechjchgua be'. ¹⁹ Ba goc sša zjaya'aque' len barcon' lo nisdao' cate' besele'ede' ba zjayda Jesúsen' cheze'e lo nisen' gala'ze gan' zej barcon'. Na' besežebe'. ²⁰ Na' gože' legaque':

—Nedan', bi žeble.

²¹ Nach chesyebede' besyegüe'ene' lo' barcon'. Na' la' besyežintie' ga nac yo biž cho'a nisdao' gan' zjaya'aquen'.

Bene' zan chesyeyiljue' Jesúsen'

²² Na' beteyo bene' zan bene' ca' besyega'an yešla'a cho'a nisdao' gosache'ede' nono Jesúsen' nla' na' gosache'ede' bibi barcw yoble gota'ch san toga dan' besyeyo'o bene' ca' zjanaque' Jesúsen' txen, na' zjanезде' Jesúsen' bi beyo'e len legaque' lo' barcon'. ²³ Nach besežin barcw da' za'ac ciuda Tiberias gala'ze gan' gosagüe' yetextilen' caten' beyož be' Xancho Jesúsen' yela' choxcen che Diosen'. ²⁴ Na' cate' gota'bia' nono Jesúsen' bežel gan' nite'na' nach besyeyo'e lo' barcw ca' ja'aque' Capernaum cont besyeyiljue' Jesúsen' do na'.

Yela' guagw da' chnežjon bene' yela' mban toli tocanē

²⁵ Na' cate' bene' zan ca' besyeželde' Jesúsen' yešla' ale nesdaon' nach gose'e le':

—Maestrw, ¿batca' bla'o nga?

²⁶ Na' Jesúsen' gože' legaque':

—Chnia' le'e to da' zejen, cheyiljwle neda' neche dan' gwdagwle ca beljele na'zen', gague neche chejle'le chia' lagüe ba ble'ele yela' guac ca' ba benan'.

²⁷ Bi cheyala' cuencyichjle gata' da' ye'ej gagwle da' chbiayi', san cuencyichjle gata' da' gon yela' mban chele toli tocanē. Diosen' gwsele' neda' golja' benach na' neda' gona' to da' ye'ej gagwle cont gata' yela' mban chele toli tocanē. Na' Xa' Diosen' ba blo'e naca' ben' ba gwsele'.

²⁸ Na' gose'ene':

—¿Bi cheyala' gonto', cont yebe Diosen' neto'?

²⁹ Na' gož Jesúsen' legaque':

—Da' nga gonle cont yebe Diosen' le'e, šejnilaže'le neda' naca' ben' gwselen'.

³⁰ Na' gose'e Jesúsen':

—¿Bi yela' guac gono' še ca' cont le'eto' na' šejnilaže'to' le'? ¿Bi gono'? ³¹ Da' xozxta'ocho ca' gosagüe' yela' guagw da' nzi' maná šlac gosenite' latje dašen', na' nyoj Xtiža' Diosen' chegaquen', žan: “Yela' guagw da' za' yaban' be'e legaque' gosagüe'.”

³²⁻³³ Nach Jesúsen' gože' legaque':

—Chnia' le'e to da' zejen, gague da' Moisésen' bnežjue' da' xozxta'ocho ca' yela' guagon', san Xa' Diosen' bnežjuen' legaque'. Na' bi nacho lenna' zan' yaba gan' zoe'na', san de to yela' guagw da' ba gwsela' Diosen' na'a da' za' yaban' na' betjen yežlion', na' chnežjon yela' mban che note'teze bene' chesagw len.

³⁴ Nach bene' ca' gose'e le':

—Bene', beňšca neto' yela' guagon' žo' ca' gagwton' yogo' ža.

³⁵ Nach Jesúsen' gože' legaque':

—Neda' naca' yela' guagw da' chnežjon bene' yela' mban toli tocanē. Note'teze bene' yosozenag chia' na' yesejnilaže' neda', guata' da' chyažje yichjlažda'ogaque' toli tocanē. ³⁶ Na' ba gwnicza' le'e, la'czla' ba ble'ele neda' bi chejnilaže'le neda'. ³⁷ Yogo' bene' chbej Xan' cont yesaque' neda' txen, chžin ža chesejnilaže' neda'. Na' note'teze bene' chaclaže' šejnilaže' neda', bi gwsia'ne' ca'ale, san gaclena'ne' cont šejnilaže'nda'. ³⁸ Neda' za'a yaba na' betja' yežlion' gague cont gona' da' žan chia' san cont gona' can' chaclaže' Xan' ben' gwsela' neda'. ³⁹ Len' chaclaže' bi gua'a latje cuiayi' ne toze bene' ba gwleje' cont yesaque' neda' txen. Nach cate' žin ža te che yežlion' cana' yosbangaca'ne' ladjo bene' guat še ba gosate'. ⁴⁰ Xan' chaclaže' yogo'lol bene' yesejni'ide' non' naca' na' yesejnilaže' neda' cont gwnežjue' legaque' yela' mban toli tocanē, na' neda' yosbana' legaque' ladjo bene' guaten' še ba gosate' cate' žin ža te che yežlion'.

⁴¹ Na' zan bene' Israel gualaž cheto' legacze' besežeše' che dan' gwna Jesúsen': “Neda' naca' yela' guagw da' za' yaba.” ⁴² Gosene':

—¿Gague bengan' Jesús xi'in José? Nombia'cho xaxna' benga. ¿Bi dižan' cho'e že' ze'e yaba betje' yežlio?

⁴³ Nach Jesúsen' gože' legaque':

—Bich žešele chia'. ⁴⁴ Nono gac yesejnilaže' neda' še Xan' ben' gwsele' neda' bi gaclene' legaque' yesejnilaže', na' cate' žin ža te che yežlion' yosbana' legaque' še ba gosate'. ⁴⁵ Le'e gan' bosozoj bene' ca' goseyixjue'ede' xtiža' Diosen' cani' žan: “Yogüe' Diosen' gwsed gwlo'ede' legaque'.” Na' yogo' no yeseneze can' ža Xan' na' yosozenague' cont yesone' can' že'na', lecz yesejnilaže' neda'.

⁴⁶ 'Bi n_{ach}o zoa bene' ba ble'ede' X_{an}'. Toza' neda' ba ble'eda'ne', le za' gan' zoen'. ⁴⁷ Chnia' le'e to da' zejen, bene' chesejnilaže' neda', de yela' mban chegaque' toli tocanē. ⁴⁸ Neda' naca' yela' guagw da' chnežjon yela' mban toli tocanē che benachen'. ⁴⁹ Da' xozxta'ocho ca' gosagüe' yela' guagw da' nzi' maná šlac gosenite' latje dašen', na' bia'cze gosat yogüe'. ⁵⁰ Neda' cho'a diža' che to yela' guagw da' za' yaban' na' bene' chagw len bi gate'. ⁵¹ Neda' naca' yela' guagw dan' za' yaban' dan' nsa' yela' mban toli tocanē. Bene' šejnilaže' neda', bane' toli tocanē. Na' yela' guagw da' chnežjua' cont gata' yela' mban che benachen' naquen cuerp chia'.

⁵² Nach bene' Israel gualaž cheto' ca' legacze' besežeše', gosene' che':

—¿Nacxe gone' gone' cuerp chen' gagwchon?

⁵³ Jesúsen' gože' legaque':

—Chnia' le'e to da' zejen, Diosen' gwsele' neda' golja' benach, na' še bi chagwle cuerp chian' na' še bi che'ejle xchenan', bi de yela' mban chele toli tocanē. ⁵⁴ Bene' chesagw cuerp chian' na' chese'eje' xchenan' de yela' mban chegaque' toli tocanē, na' še ba gosate', cate' te che yežlion' yosbana' legaque' ladjo bene' guat ca'. ⁵⁵ Le cuerp chian' naquen dogualje yela' guagw, na' xchenan' naquen dogualje da' ye'ejle. ⁵⁶ Bene' ca' chesagw cuerp chia' na' chese'eje' xchenan' de yela' mban chegaque' toli tocanē, na' zjanaque' txen len neda' na' neda' naca' txen len legaque'. ⁵⁷ X_a' Diosen' gwsele' neda' na' de yela' mban chia' da' naca' toze len le'. Na' ca'cze gac len bene' yesagw cuerp chian', yesenite' toli tocanē dan' zjanaque' txen len neda'. ⁵⁸ Cuerp chian' naquen yela' guagw da' za' yaba. Na' len bi naquen ca' da' gosagw da' xozxta'ocho ca' latje dašen', le bene' gosagw len bia'cze gosate'. Na' bene' chesagw yela' guagw dan' žia' ca', yesenite' toli tocanē.

⁵⁹ Jesúsen' bsd blo'ede' da' ca' lo' yodao' che bene' Israel gualaž cheto' ca' da' zoa Capernaum.

Xtiža' Jesúsen' chnežjon yela' mban toli tocanē che bene' chosozenag chen

⁶⁰ Na' zan bene' ca' zjanao' Jesúsen', cate' gosende' da'na' chzejni'ide' legaque', gosene':

—Zdebechgua naquen goncho dan' chzejni'iden'. ¿Noxen' gac gon can' žen'?

⁶¹ Gocbe'e Jesúsen' chesenie' che' dan' bzejni'ide' legaque' da' ca', na' gozne':

—¿Bi chazlaže'le can' ba gwnian'? ⁶² ¿Nacxe nale cate' le'ele neda' yeyepa' gan' gwzoo' cana'? neda' naca' ben' gwsele' Diosen' golja' benach. ⁶³ Spiritw chian' chnežjon benachen' yela' mban, na' cuerp chian' bi gac gonen ca'. Diža' dan' bach bia' len le'e zjazacan' len yichjlažda'olen' cont banle toli tocanē še šejle'le chen. ⁶⁴ Perw ne' nita' balle bi chejle'le.

Jesúsen' gwne' ca' le gocbe'ede' cate' gosezolao bene' ca' gosedalene' le' noe' bi chesejle'e che' na' noe' gwdie'ne' lo' na' bene' ca' chesegue'ede' le'. ⁶⁵ Na' gozna' Jesúsen':

—Chac can' ba gwnian', nono gac šejnilaže' neda' še bi gaclen X_a' Diosen' le' cont šejnilaže'nda'.

⁶⁶ Beyož bzejni'i Jesúsen' legaque' da' ca', zan bene' ca' ba chosozenag xtižen' gosebejyichje' bich bosozenaguen'. ⁶⁷ Nach Jesúsen' gože' šižinw bene' ca' gwleje' cont gosaque' le' txen:

—¿Len le'e chaclaže'le yeyejle?

⁶⁸ Na' gož Simón Pedron' le':

—X_{anto}', noch no zaca' gwzenagto' xtižen'. Tozo' le' cho'o diža' da' chnežjon yela' mban che bene' chzenague' chen. ⁶⁹ Neto' chejnilaže'to' le' na' nezeto' naco' Cristo ben' gwlej Diosen' cont nabi'o, na' naco' dogualje Xi'in Dios, Dios ben' zoa toli tocanē.

⁷⁰ Na' Jesúsen' gože' legaque':

—Ba gwleja' le'e šižiṅwle cont zoale len neda' na' neza' tole chzenagle che gwxiyen'.

⁷¹ Gwne' ca' che Judas Iscariote ben' naque' xi'ṅ to bene' le' Simón, le gwneze' Judasen' ba naquen gwdie' le' lo na' bene' ca' chesegue'e le', na' Judasen' naque' to bene' šižiṅw ca'.

7

Bene' biše' Jesúsen' bi gosejnilaže' le'

¹ Gwde na' Jesúsen' gw dacze' bsd blo'ede' ben' že' distritw Galilean'. Bich goclaže' šejche' Judean', le bene' gwnabia' che nación Israel cheton' že' na' cheseyiljue' nacle yesone' yesote'ne'. ² Na' ba zoa gala' lni che neto' bene' Israel da' nzi' lni che Ranšw Yix. ³ Na' bene' biše' Jesúsen' gose'ene':

—Bitw yega'ano' nga. San gwyej Judean' cont bene' ca' chosozenag chio' yesele'ede' yela' guac dan' chonon'. ⁴ Note'teze bene' še chaclaže' yesacbe'e bene' naque' to bene' zaca', bi gone' yela' guac bagaše'ze. Še da' li chono' yela' guac, ben cont yesele'e yogo'lol bene' can' chonon'.

⁵ Bene' biše' Jesúsen' gose'ene' ca', le ne legaque' bi gosejnilaže'ne'. ⁶ Nach gož Jesúsen' legaque':

—Biṅa' žin ža ša'a, san le'e guac šja'acle bate'teze. ⁷ Bene' ca' bi zjanombi'e Diosen' bi gac yesegue'ede' le'e, san chesegue'ede' neda', le chzejni'ida'ne' chesone' da' xinj. ⁸ Le šja'ac lnin'. Neda' bi sa'a na'a, le biṅa' žin ža chia'.

⁹ Beyož gože' legaque' ca' bega'ane' Galilean' yeto chop ža.

Jesúsen' gwyeye' Jerusalén gan' yo'o lnin'

¹⁰ Nach gwde gosa'ac bene' biše' ca' zja'aque' lnin' gwza' Jesúsen' len bene' ca' zjanaque' le' txen zja'aque' lnin', perw bi ja'aque' can' nla'ze san bagaše'ze. ¹¹ Na' bene' gwnabia' che nación Israel cheton' že' Jerusalénna' besyeyiljue' le' lo lnin', chesene':

—¿Ganxe bena'?

¹² Na' bene' ca' zjandop zjanžag lo lnin' šižize goso'e diža' che Jesúsen', na' gague toze ca gosene'. Bale' gosene': "Naque' bene' güen", na' bale' gosene': "Bi naque', chonlede' bene'."

¹³ Na' goso'e diža' šižize che Jesúsen', le yogo'ze bene' chesežebe' bi yesone bene' gwnabia' ca' legaque' še yesacbe'ede' cheso'e diža' güen che Jesúsen'.

¹⁴ Na' do gašje zej lnin' cate' gwyej Jesúsen' gan' zoa yodao' blao che neto' bene' Israel na' gwzolao chsed chlo'ede'. ¹⁵ Na' besyebane bene' gwnabia' ca', gosene':

—¿Nacxečen' da' zan neze benga? le gague bi nseden'.

¹⁶ Na' Jesúsen' gože' legaque':

—Dan' chsed chlo'edan' bi naquen xbab checza', san naquen xbab che bene' gwsela' neda'. ¹⁷ Note'tez bene' chesacbaže' yesone' can' chazlaže' Dios ben' gwsela' nedan', guacbe'ede' še dan' chsed chlo'edan' zan' che Dios o še naquen da' chaljaže'za'. ¹⁸ Cate' to bene' chsed chlo'ede' xbab checze', cheyljue' nacle gone' cont gacxene'. San cate' to bene' chaclaže' gacxen bene' gwsela' le', nezecho xtižen' naquen da' li na' bi chziye'e.

¹⁹ 'Da' Moisésen' bene' le'e ley dan' nsedlen' perw ne tole bi chonle can' žanna'. ¿Bixčen' cheyljwle nacle gonle gotlenda'?

²⁰ Bene' ca' že'na' gose'ene':

—Yo'o da' xigüen', nan' chol chṅenošo'. ¿No chaclaže' got le'?

²¹ Jesúsen' gože' legaque':

—Toz yela' guac da' bena' ža che Dios cate' bi de lsens gon chio' bene' Israel žin, na' yogo'le chebanele. ²² Da' Moisésen' bene' mandadw soacho señw dan' že' circuncisión (la'czla' bi gwzolao señon' len le' san len da' xozxta' ocho ca' bene' gwnita' cani'te), na' da'nan' chzoale bi' byo dao' ca' señwna' ža che Dios. ²³ Can' naquen, la'czla' še naquen ža che Dios, chzoale no bi' byo dao' señw cate' chaquebe' xono' ža cont chonle can' ža ley dan' bzoj Moisésen', na' ¿bixchen' chža'ale neda' dan' ba beyona' to bene' güe' ža che Diosen'? ²⁴ Bi cheyala' yosbaga'le bene' che da' chle'ele chone', le bi nezele še chazlaže' Diosen' can' chone', san le nabyane' cont nezele bi ža Diosen', nachen' gacbe'ele non' cheyala' yosbaga'le.

Jesúsen' gwne' ze'e gan' zoa Diosen'

²⁵ Nach to chope bene' Jerusalén ca' gosene':

—¿Gague benga ben' chesyeyiljue' cont yesote'ne'? ²⁶ Le na' can' cho'e dižan' lao yogo' bene' na' bibi chese'e le'. ¿Gague ba cheson bene' gwnabia' checho xbab le naque' Cristo ben' chbezcho yedenabia'? ²⁷ Perw nezecho ga bene' benga, na' cate' yid Criston' nono yeseneze ga bene' le'.

²⁸ Jesúsen' chsed chlo'ede' chalšil che yodao' blao cate' gosene' ca'. Nach gwne' zižje gože' legaue':

—Chaquele nombia'le neda' na' chaquele nezele ga bene' neda'. Perw gague con za'a to gualaza'. Da' li zoa bene' gwsele' neda', na' le'e bi nombia'ln'e.

²⁹ Neda' nombi'ane', le za'a gan' zoen' na' le' gwsele' neda'.

³⁰ Na' da' gwne' ca' bal' bene' gosaclaže'chgüe' yesezene' le', perw nono gwzen le' da' bina' žin ža gague' lo' na'gaquen'. ³¹ Na' bene' zan gosejle'e Jesúsen' naque' bene' gwsele' Dios, na' gosene':

—Cate' yid Criston' ¿gonche' yela' guac da' zaca'ch ca da' chon benga?

Bene' chesape' yodao' blaon' ja'aque' cont šjasexene' Jesúsen'

³² Bene' fariseo ca' gosende' diža' cheso'e bene' ca' che Jesúsen'. Da'nan' bosoxi'e len bene' ca' zjanac bxoz gwnabia' che nación Israel cheton' na' gosesele' bene' chesape' yodao' blaon' cont šjasexene' Jesúsen'. ³³ Nach Jesúsen' bsd blo'echde' bene' ca' že'na', gwne':

—Soacha' yeto tiemp dao' len le'e nach yeya'a gan' zoa ben' gwsele' neda'.

³⁴ Na' yeyiljwle neda' na' bi yeželele neda', le gan' soan' bi gac yidle.

³⁵ Nach bene' gwnabia' che nación Israel cheton' gose' lježe':

—¿Gan' chacde' yeyeje' ga bi yeželechone'? ¿Yeyeje' gan' zjanaslas bene' gualaž checho ladjo bene' griego ca' na' gwsed gwlo'ede' legaue'? ³⁶ ¿Bi zejen dan' gwnen': “Yeyiljwle neda' na' bi yeželele neda' na' gan' soan' bi gac yidle”?

Jesúsen' be'e diža' che Spiritw che Diosen'

³⁷ Ža cate' zelao chesone' lnin' naquen ža xench, na' Jesúsen' zeche' chsed chlo'ede' na' gwne' zižje, gwne':

—Note'tezle še lo' yichjlažda'olen' nacle ca' bene' chbillaže', cheyala' šejnilaže'le neda' na' gona' le'e yela' mban toli tocan'e, na' lenna' gaquen lo' yichjlažda'olen' ca' to nis da' gwbat cheyo'ojen cont bich gacle ca' to bene' chbillaže'. ³⁸ Le'e chejnilaže'le neda', gac chele can' ža Xtiza' Diosen' da' nyojen, to da' güen juisyw gac lo' yichjlažda'olen' cont gacle ca' to yežlio ga chaldi nis, gan' de zan yegw da' cheseyilen len.

³⁹ Na' dan' gwna Jesúsen' ca' be'e diža' che Spiritw che Diosen' da' yedesoan lo' yichjlaždao' note'tezcho chejnilaže'chone'. Na' caten' gwne' ca' Spiriton' bina' yedesoan lo' yichjlaždao' bene', le bina' gac yogo' da' cheyala' gac cont gacia' Jesúsen' naque' bene' zaca' juisyw.

Gosaque' chople neche Jesúsen'

⁴⁰ Bene' ca' chosozenag xtiža' Jesúsen' bale' gosene':

—Da' li benga naque' ben' choe' xtiža' Diosen' ben' naquen yide'.

⁴¹ Na' yebale' gosene':

—Benga Criston' ben' naquen yedenabia'.

Perw yebale' gosene':

—¿Bixe n̄acho bene' Galilea ba gwlej Diosen' cont yedenabi'e chio'? ⁴² Xtiža' Diosen' da' nyojen žan Criston' ben' yedenabi'e choje' lo diaža che da' rey David na' gaque' bene' Belén gan' nac laž da' David.

⁴³ Can' goc bene' ca' gosaque' chople neche Jesúsen'. ⁴⁴ Na' bale' gosaclaže' yesezene'ne', perw nono gwzen le'.

Bene' gwnabia' che nación Israelen' bi gosejle'e che Jesúsen'

⁴⁵ Na' bene' chesape' yodao' blaon' jaya'aque' gan' nita' b̄xoz gwnabia' ca' len bene' fariseo ca', le bene' can' gosesele' legaque' cont yesezene' Jesúsen'. Na' bene' ca' gose'e legaque':

—¿Bixchen' bi n̄che'elne'?

⁴⁶ Na' bene' chesape' yodao' blaon' gose'ene':

—Bina' yenetō' bene' cho'e diža' güen ca dan' choe' bena'.

⁴⁷ Nach bene' fariseon' gose'e legaque':

—¿Lente le'e ba gwxiye'e? ⁴⁸ Ne toz neto' nacto' bene' fariseo bina' šejle'to' xtižen' na' n̄eca bene' gwnabia' chechon', ne toze' bina' šejle'e xtižen'. ⁴⁹ Perw bene' quinga že' nga bi zjanombi'e ley dan' bzoj da' Moisésen' na' ba zjambi-aye'e, da'nan' chesejle'e xtižen'.

⁵⁰ Na' Nicodemo ben' gwyej lao Ješusen' šeže'le naque' txen len bene' gwnabia' ca'. Na' Nicodemon' gože' legaque':

⁵¹ —Ley chechon' bi choen' latje choglaōcho che to bene' ba ben da' mal še bina' güe'e diža' naquen' goc na' še bina' n̄zecho bi dan' bene'.

⁵² Nach yezica'chle bene' gwnabia' ca' gose'e le':

—¿Leno' le' ba beyaco' bene' Galilea? Bsed Xtiža' Diosen' da' nyojen na' nezdo' ne to bene' choe' xtiža' Diosen' ca' na' choje' Galilean'.

⁵³ Nach besyeya'ac to toe' jaya'ac ližgaque'.

8*No'olen' besyedole'de' len xtoe'*

¹ Na' Jesúsen' gwyeye' ya'a da' nzi' Ya'a Olivos. ² Na' beteyo cate' gwyeni' gwyeye' yodao' blaon' da' yoble na' yogo' bene' ca' že' na' gosebigue' lagüen' na' gwchi'e na' gwzolağüe' chsed chlo'ede' legaque'. ³ Nach bene' chososed chosolo'e ley dan' bzoj da' Moisésen' na' bene' fariseo ca' jasesane' to no'ole bene' besyedole'de' len xtoe'. Na' bosozechē' le' gachol bene' ca' chosozenag che Jesúsen'. ⁴ Na' gose'e Jesúsen':

—Maestrw, no'ole nga ba bedole'to' delene' xtoe'. ⁵ Na' ley chechon' da' bzoj Moisésen' žan cheyala' gotcho no'ol ca' cheson ca' gwchelchone' yej. Na' ¿bi žo' le'? ¿bix cheyala' gonechone'?

⁶ Gose'e Jesúsen' ca' da' gosaclaže' yesebeje' le' diža' da' yosochine' yesagüe' xya che'. Na' Jesúsen' con bcheque' bzoje' lo yon' len xbene'. ⁷ Na' bene' ca' gosone' byen gosenabchde' le' bi že'. Nach Jesúsen' bebe'šagüe' na' gože' legaque':

—Guaque con note'tezle bi de xtoła'le solaole gwchellene' yejen'.

⁸ Nach bcheque' da' yoble bzojche' lo yon'. ⁹ Na' bene' ca' zjanche' no'olen' cate' gosende' can' gož Jesúsen' legaque', zjanezde' lecze ba zjanoncze' da' xinj, nach tgüejē' tgüejē' besyechoje' gwzolaotequen' len bene' golech na' bžinten

len bene' xcuide'ch, nach bega'an yetoze no'olen' len Jesús'en' gan' že' bene' ca' chsed chlo'ede'. ¹⁰ Nach Jesús'en' bebe'šagüe' da' yoble na' ble'ede' noch no bene' ca' zjanla' na' gože' no'olen':

—No'ole, ¿ganxe bene' ca' chosocuiš le'? ¿Ne toe' bi beŋ le' castigw?

¹¹ Na' no'olen' gože'ne':

—Ne toe', bene'.

Na' Jesús'en' gože'ne':

—Ne neda' bi goŋa' le' castigw. Beyej na' bich gono' da' malen'.

Jesús'en' nse'e be'ni' che yichjlaždao' beŋach

¹² Jesús'en' gozo'e diža' da' yoble chzejni'ide' bene' ca' že' na', gwne':

—Neda' nsa'a be'ni' che yichjlaždao' beŋachen'. Bene' zjanaque' neda' txen bich zjanaque' ca bene' yichjlaždao' l'chol bene' cheson da' xinj, san lo' yichjlažda'ogaque' naquen ca to da' yo'o be'ni'. Da'n'an' ba de yela' mban chegaque' toli tocaŋe.

¹³ Nach bene' fariseo ca' gose'e Jesús'en':

—Cho'o diža' che cuino' naco' bene' zaca', na' da'n'an' bi naquen to da' yesejle' bene'.

¹⁴ Na' gož Jesús'en' legaque':

—La'czla' cho'a diža' che cuina', xtižan' naquen da' li. Neda' nezda' gan' gwza'a na' gan' yeya'a, perw le'e bi nezele gan' za'a na' gan' yeya'a. ¹⁵ Le'e chosbaga'le neda' con can' chon beŋachen' xbab, san neda' nono chosbaga' bi da' yosbaga'. ¹⁶ Perw na' šaca' bi da' yosbaga' bene', gonan' ca cheyala', le bibi de da' chona' to gualaza', san chona' dan' ža Xan' ben' gwsela' neda'. ¹⁷ Ley chechon' dan' chsedlen' žan cheyala' šejle'cho cate' chedił diža' da' chesoe' chope testigw. ¹⁸ Na' nac chopto' choe'to' xtiža': neda' cho'a diža' che cuina' na' Xan' ben' gwsela' neda' lecze cho'e diža' chia'.

¹⁹ Na' gose'ene':

—¿Gaxe zoa xaon'?

Na' gwna Jesús'en':

—Ne neda' ne Xan' bi nombia'le. Šaca' nombia'le neda' lecze nombia'le Xan'.

²⁰ Diža' ca' bsed blo'e Jesús'en' cate' ze' gała'ze gan' chesegüe'e mechw lo' yodao' blao che neto' bene' Israel. Na' nono gwzen le', le biŋa' žin ža gaque' lo na' bene' chesegue'ede' le'.

Jesús'en' gože' legaque' bi gac šjaya'aque' gan' yeyejen'

²¹ Nach Jesús'en' gože' legaque':

—Neda' yeya'a, na' yeyiljwle neda' perw bi gac yeyejle gan' yeya'an, le biŋa' yetinjele xtoła'len' cate' žin ža gatle.

²² Na' da' gwne' ca' bene' gwnabia' che nación Israel cheton' gosene':

—¿Yeyot cuinen' že' gan' yeyejen' bi gac šejcho?

²³ Nach Jesús'en' gože' legaque':

—Le'e nacle bene' che yežlio nga na' chzenagle che dan' chnabia' yežlion', san neda' za'a yaba na' bi chzenaga' che dan' chnabia' yežlion'. ²⁴ Da'n'an' gwnia' biŋa' yetinjele xtoła'len' cate' žin ža gatle. Le še bi šejle'le neda' naca' doxen can' gwnian', gatle biŋa' yetinjele xtoła'len'.

²⁵ Nach gose'e Jesús'en':

—¿Nox naco' le'?

Na' gož Jesús'en' legaque':

—Zan ni'a ba gwnia' le'e non' naca'. ²⁶ Ne' dech da' zan da' nia' cont gwzejni'ida' le'e naple dola'. Perw bene' gwsela' neda' nezde' yogo'lol na' cho'e diža' li, na' neda' choe'lana' beŋachen' diža' da' ba benda' gwne'.

²⁷ Bene' gwnabia' ca' bi gosejni'ide' choe'lene' legaque' diža' che Xe' Diosen'.

²⁸ Nach Jesúsen' gože' legaque':

—Cate' ba gwde gwłisle neda' to le'e yag, neda' naca' bene' gwseła' Diosen' golja' benach, cana'ch gacbe'ele le naca' ben' ba gwnia' le'e, na' gacbe'ele bibi chona' to gualaza', san con da' bzejni'i Xan' neda', lenna' žia'. ²⁹ Xan' ben' gwsele' neda' zoacze' len neda'. Na' bi chbejyichje'nda', le bate'teze chona' da' chazlaže'.

³⁰ Na' šlac Jesúsen' choe'lene' bene' ca' dižan' nach bene' zan gosezolao chesejnilaže' le'.

Bene' ca' chnabia' da' malen' yichjlažda'ogaquen'

³¹ Nach Jesúsen' gože' bene' gualaž cheto' ca' bach gosezolagüe' chesejni-laže'ne':

—Še soacze gonle can' ba gwnian', gwlo'en da' li nacle txen len neda'. ³² Na' še soacze gonle can' ba gwnian', nachen' šejni'ile diža' li chian' na' gaclenen le'e cont yechojle lo na' da' chnabia' le'e.

³³ Bal' bene' ca' gose'e Jesúsen':

—Neto' nacto' diaža che da' Abrahanna' na' nono na' soa bene' nabia' neto'. ¿Bixchen' žo' yechojto' lo na' da' chnabia' neto'?

³⁴ Na' gož Jesúsen' legaque':

—Chnia' le'e to da' zejen, yogo' bene' cheson da' xinj zjanaque' lo na' da' mal da' chnabian' legaque'. ³⁵ Bene' zoa liž xan xšine' bi naque' xi'in ben' gan' chone' žinna', san šlož güejze zoe' txen len legaque' len bi da' chesone'. San bene' golje' txen len le', bate'teze zoe' len legaque'. ³⁶ Neda' naca' dogualje Xi'in Dios na' guac gona' cont da' malen' bich nabi'an yichjlažda'olen' na' yechojle lo ne'en na' bich gaquen ca xanle. ³⁷ Nezda' nacle diaža che da' Abrahanna', perw bia'cze cheyljwlaže'le nac gonle cont gotle neda'. Na' chonle ca' da' bi chzenagle xtižan'. ³⁸ Neda' cho'a diža' che da' ca' ba ble'eda' cate' zoa' cuit Xan', na' le'e lecze chonle da' ba benele gwna xalen'.

³⁹ Nach bene' ca' gose'e Jesúsen':

—¿Bixchen' žo' ca'? Neto' nacto' diaža che da' Abraham.

Na' gož Jesúsen' legaque':

—Šaca' nacle dogualje diaža che da' Abraham, gonle can' ben da' Abrahanna' šaca'. ⁴⁰ La'czla' ba bzejni'ida' le'e diža' li da' benda' gwna Diosen', bia'cze cheyljwlaže'le nac gonle gotle neda'. Da' Abrahanna' bi bene' can' chonlen'. ⁴¹ Toz can' chonle len xalen'.

Nach bene' ca' gose'e le':

—Toz Diosen' naque' Xato' na' bi chzenagto' che nochle bene'.

⁴² Jesúsen' gože' legaque':

—Šaca' Diosen' naque' xale gaquele neda', le neda' gwza'a gan' zoa Diosen'. Bi za'a nga to gualaza', Diosen' gwsele' neda'. ⁴³ ¿Bixchen' bi chejni'ile dan' chnia' le'e? Nezda' bi chejni'ile dan' bi chaclaže'le gwzenagle chia'.

⁴⁴ Satanás dan' chnabia' da' xigüe' ca' naquen xale, nachen' chebele chonle can' chnalažen'na'. Len ba naquen güet bene' cate' gwxete yežlion'. Na' bi chzenaguen che diža' li, le diža' li bi yo'on lo' yichjlažda'ogüen. Cate' chnen diža' güenlaže' chnen con can' nac cuinen, le naquen güenlaže' na' yogo' diža' güenlažen' zan' len len. ⁴⁵ Na' neda', da' cho'a diža' li, bi chejle'le chia'. ⁴⁶ Bibi da' mal nona' na' da'nan' ne tole bi gac gwlo'ele še bi da' mal ba bena'. Neda' zoateza' cho'a diža' li, ¿bixchen' bi chejle'le chia'? ⁴⁷ Bene' ca' chon Diosen' legaque' cuent ca xi'ine' chosozenague' xtižen'. Na' le'e bi chzenagle chen' da' bi nacle xi'ine'.

Ba zoacze Criston' cate' golje da' Abraham

⁴⁸ Nach bene' gwnabia' che nación Israel cheton' gose'e Jesúsen':

—Can' ba gwnacztó' nacbia'cze naco' txen len bene' Samaria ca' na' yo'o to da' xigüe' lo' yichjlažda'oguoñ' chonen ga chol chñenošo'.

⁴⁹ Jesúsen' gože' legaque':

—Bi yo'o da' xigüen' lo' yichjlažda'ogua', san chonxena' Xan' na' le'e chñele chia'. ⁵⁰ Bi chyiljua' no gonxen neda', perw zoa Xan' chaclaže' benachen' yesonxene' neda' na' Xan' choglagüen' chele naple doła' da' chñele chia'. ⁵¹ Chnia' le'e to da' zejen, note'teze bene' yosozenague' xtižan', guata'cze yela' mban che' toli tocañe.

⁵² Nach da' yoble bene' gwnabia' ca' gose'e le':

—Nach beyož gwñezeto' yo'o to da' xigüe' lo' yichjlažda'oguoñ' chonen ga chol chñenošo'. Ba got da' xozxta'ocho Abrahanna', na' len bene' ca' gosoe' xtiža' Diosen' can' lecze ba gosate', na' chñenošo' žo' bene' chosozenag xtižon' gata' yela' mban che' toli tocañe. ⁵³ ¿Chacdo' zaca'cho' ca' da' xozxta'ocho Abrahanna' len bene' ca' gosoe' xtiža' Dios bene' ba gosat? ¿Noxen' chacdo' naco'?

⁵⁴ Gož Jesúsen' legaque':

—Šaca' chonxen cuina' bibi zejen, perw Xan' ben' žale naque' Dios ben' chejnilaže'le chonxene' neda'. ⁵⁵ Le'e bi nombia'lné', san neda' nombi'ane'. Šaca' nia' bi nombi'ane' gaca' bene' güenlaže' can' naclena'. Perw neda' nombi'ane' na' chzenaga' xtižen'. ⁵⁶ Da' Abrahanna' ben' žale nac xozxta'ole bebecgüede' gwñezde' le'ede' ba za'a len benachen' na' zoe' mbalaz ba ble'eden'.

⁵⁷ Na' gose' bene' blao che nación Israel cheton' le':

—Biña' gacdo' šiyon iz. Chñenošo' žo' ba ble'edo' Abrahanna'.

⁵⁸ Jesúsen' gože' legaque':

—Chnia' le'e to da' zejen, ba zoacza' neda' cate' biña' galje Abrahanna'.

⁵⁹ Nach gosenize' yej da' yosochele' le', perw Jesúsen' bcuaše' na' beze'e yodaon'. Neca gosacbe'ede' cate' bedie' ladjogaque'.

9

Jesúsen' bene' cont ble'e to bene' golje' nchole'

¹ Txen zej Jesúsen' len bene' ca' zjanaque' le' txen cate' besele'ede' to bene' byo golje' nchole'. ² Na' gose'e Jesúsen':

—Maestrw, ¿non' nap doła' golje' benga nchole', še le' o še xaxñe'en?

³ Na' Jesúsen' gože' legaque':

—Benga golje' nchole' gague da' nape' doła' na' gague da' zjanap xaxñe'en doła', san golje' ca' cont le'ele can' chon Diosen'. ⁴ Cheyala' goncho xšin Dios ben' gwseła' neda' šlac ne' de latje. Gwžin ža bich gala' gonchon. ⁵ Šlac ne' zoa' yežlion' chgua'a be'ni' lo' yichjlaždao' benachen'.

⁶ Beyož gwne' ca' gwcho'on xene' lo' yon' na' bene' late' gona' len xene' na' gwdebe' gonan' yejlao bene' lcholeñ'. ⁷ Nach gože' ben':

—Gwyey jaydib yejlaguon' cho'a yel da' nzi' Yel Siloé.

(Na' Siloé zeje diža' Nseła'.) Na' gwyeye' na' beyib yejlagüen' na' cate' beze'e zjayde' ba chle'ede'. ⁸ Na' bene' gualič che' na' nochle bene' ba besele'e le' yogo' ža cate' ne' ncholeñ' gosene':

—¿Gague bengan' ba ble'echo chbe' chñabe' carida?

⁹ Na' bale' gosene':

—Le bengan'.

Na' yebale' gosene':

—Bi nac le' san yeto bene' yoblen', perw toz ca' naque' len benga.

Perw ben' beyaquen' gože' legaque':

—Nedan'.

¹⁰ Na' gose'ene':

—¿Nac goquen' gwzolao chle'edo'?

¹¹ Na' gože' legaque':

—To beņe' le Jesús bene' late' gona' na' gwdeben' yejlaguan' na' gože'nda': “Gwey cho'a yel da' nzi' Yel Siloé na' jaydiben'.” Na' gweya'a na' beyiban' na' gwzolao chle'eda'.

¹² Nach gose' beņe' ca' le':

—¿Gaņxe bena'?

Na' gože' legaque':

—Bi nezdā'.

Beņe' fariseo ca' gosenabyože' nac goquen' ba chle'ede'

¹³ Nach goseche'e ben' goc lcholen' gan' že' beņe' fariseo ca'. ¹⁴ Nac to ža che Dios caten' Jesúsēn' bene' gonan' dan' gwdebe' yejlao bena' cont ble'ede' na' bi de lsens gon neto' beņe' Israel žin ža che Diosen'. ¹⁵ Na' beņe' fariseo ca' lecze gosenabde' le' nac goquen' ba chle'ede'. Na' gože' legaque':

—Gwdebe' gona' yejlaguan' na' jaydiban' na' na'a ba chle'eda'.

¹⁶ Nach baļ beņe' fariseo ca' gosene':

—Nezecho bi zoa Diosen' len bena' beyone' beņe' lcholen', le chone' da' bi cheyaļa' gone' ža che Diosen'.

Na' yebaļe' gosene':

—¿Nac gon to beņe' güen da' xinj gone' yeļa' guac ca dan' ben benga?

Na' legacze' besechoje' chop cuen. ¹⁷ Na' da' yoble gose'e ben' golje' nchole':

—¿Bi žo' le' che ben' bene' cont chle'edo'?

Na' bena' gwne':

—Naque' to beņe' choe' xtiža' Dios.

¹⁸ Na' beņe' gwnabia' che nación Israel cheton' bi gosejle'e golje ben' nchole' na' na'a bačh chle'ede'. Nach gosaxe' xaxne'ena'. ¹⁹ Na' gosenabde' legaque', gose'ene':

—¿Xi'inle benga ben' žale golje' nchole'? ¿Nacxe goquen' chle'ede' na'a?

²⁰ Xaxne'ena' gose'e legaque':

—Nezeto' bengan' xi'into', na' nezeto' golje' nchole'. ²¹ Perw bi nezeto' nac goquen' ba chle'ede' na'a, na' neca nezeto' non' ben cont ba chle'ede'. Ba zejeczede' iz, le nabe cuine' cont güe'e diža' naquen' goc.

²² Xaxne'en gosene' ca' da' chesežebe' beņe' gwnabia' ca', le beņe' gwnabia' ca' ba gosechoglagüen' bi yosolebe' lo' yodaon' note'teze beņe' güe'e diža' chejle'e Jesúsēn' naque' Cristo ben' chesebeze' yedenabi'e. ²³ Da'nān' xaxne'en gosene': “Ba zejeczede', le nabe cuine'.”

²⁴ Nach da' yoble gosaxe' ben' golje' nchole' na' gose'ene':

—Be' diža' li lao Diosen', le bi naquen can' gwnao' bače. Nezeto' ben' gwnao' beyon le' naque' beņe' güen da' xinj.

²⁵ Na' ben' beyac yejlagüen' gwne':

—Bi nezdā' še naque' beņe' güen da' xinj o še bi naque'. Da' nezdā', goca' beņe' lchol na' na'a ba chle'eda'.

²⁶ Na' da' yoble gose'e le':

—¿Bi bende' le? ¿Nac benen' chle'edo'?

²⁷ Na' gože' legaque':

—Ba gwnicza' le'e na' bi chzenagle. ¿Bixchen' chaclaže'le yenian' da' yoble? ¿Len le'e chaclaže'le gwzenagle che'?

²⁸ Nach gosezi'diže' le', gosene':

—Le' naco' txen len le', san neto' nacto' txen len da' Moisés. ²⁹ Nezeto' Diosen' be'lene' Moisésen' diža', perw benga bi nezeto' ga ze'e.

³⁰ Na' ben' golje' nchole' gože' legaue':

—iDa' zaca' yebanecho, bi nezele ga za' benga, na' bene' cont chle'eda'!

³¹ Nezecho Diosen' bi chzenague' che bene' cheson da' xiñj, san chzenague' che note'tez bene' chejnilaže' le', bene' cheson can' chnalažen'. ³² Na' gwzolaoten cate' gwxe yežlion' biña' yenecho zoa bene' chac chone' cont chle'e bene' golje' nchole'. ³³ Šaca' bengan' bi ze'e gan' zoa Diosen' bibi gac gone'.

³⁴ Bene' fariseo ca' beselocchgüe' na' gose'e le':

—Len' goljtio' naco' bene' mal juisyw, ¿chacdo' zaco' gwseddo' neto'?

Na' besyebeje' le' lo' yodaon'.

Bene' ca' zjanchol yichjlažda'ogaue'

³⁵ Jesús en' bende' diža' che ben' beyac yejlagüen' can' goc che' ba besyebeje'ne' lo' yodaon' nach jašague'ne' na' gože'ne':

—¿Chejnilažo' Xi'in Diosen' ben' gwselen'?

³⁶ Na' gož ben' le':

—Bene', gwna neda' non', cont šejnilaža'ne'.

³⁷ Jesús en' gože'ne':

—Nedan' ben' ba ble'eczedo' na' nedan' choe'lena' le' diža'.

³⁸ Nach bena' bzoa xibe' benxene' Jesús en', gwne':

—Xana', chejnilaža' le'.

³⁹ Nach Jesús en' gwne':

—Za'a yežlio nga cont gata'bia' non' nap dola' na' non' bi nap dola'. Zedeyena' cont bene' ca' bi chesejni'i bich yesaque' ca bene' lchol, na' zedeyena' cont bene' ca' chesacde' chesejni'ide' yesaque' ca bene' lchol len yichjlažda'ogaquen'.

⁴⁰ Nach bal bene' fariseo ca' nita' gala'ze caten' gwne' ca' na' gosende' xtižen', gose'e Jesús en':

—¿Chacdo' len neto' nacto' ca bene' lchol?

⁴¹ Nach Jesús en' gože' legaue':

—Šaca' nacle ca bene' lchol, bibi xtola'le de, san žale chejni'ile, na' da'nan' naple dola'.

10

Jempl che bene' güeye' xila' ca'

¹ Chnia' le'e to da' zejen, bene' bi cho'o lo' le'ej che xilan' gan' nac cho'a puerten' san chepe' ga yoble cont cho'e, benan' naque' bene' gwban. ² Ben' chsaljue' na' cho'e cho'a puerten', len' güeyoe' xilan'. ³ Na' ben' chap cho'a puert le'ej che xilan' chsaljue' puertan' cont cho'o ben' chyoeban'. Na' xila' ca' chosozenagba' xtiža' ben' chyoeban', le zjanombia'ba' ši'en cate' chaxe'ba' cho'e lagacba' cont chbeje'ba'. ⁴ Na' cate' ba gwleje' yogo'ba' lo' le'ejen', chbialagüe' laogacban', na' xila' che' ca' chesa'oba' le' da' zjanombia'ba' ši'en.

⁵ Bi chesa'oba' bene' yoble, san chosyoxonjba' dan' bi zjanombia'ba' ši'en.

⁶ Jesús en' be'e diža' che bene' güeye' xila' ca' par bzejni'ide' bene' ca' že'na', perw bi gosejni'ide' bi zejen dan' gože' legaquen'.

Jesús en' zaca'lebde' ca to bene' chyoe' xila' chen' binlo

⁷ Nach Jesús en' bsd blo'echde' legaue' yeto, gwne':

—Chnia' le'e to da' zejen, nedan' naca' ca cho'a puert gan' cheso'o xila' ca' lo' le'ej chegacban'. ⁸ Yogo' nochle bene' ba goside' cate' za' yida' neda', bene' bosozejni'ide' diža' güenlaže', guac nacho zjanaque' bene' gwban. Perw

bene' chesejnilaže' neda' bi chosozenague' xtiža' bene' ca'. ⁹ Neda' naca' ca cho'a puert che le'ej che xila' ca'. Na' note'tez bene' yesejnilaže' neda', gata' yela' mban chegaque' toli tocanē na' soacza' gaclena' legaque' bite'tez da' cheseyažjde'.

¹⁰ 'Bene' ca' žia' bene' gwban chesaclaže' yesone' cont bene' ca' žia' zjanaque' xila' chia' yesebejyichje' xtižan' na' yosozenague' che legaque'. Na' še yosozenague' che legaque', yesebiaye'e. Na' neda' za'a chnežjua' yela' mban toli tocanē che bene' chesejnilaže' neda' cont nite' güenchgua. ¹¹ Neda' binlo chgüia chna'a bene' chesejnilaže'nda' ca chon to bene' güeye' xila' bene' chyoe' xila' chen' binlo. Na' da' nži'ida' legaque', da'nan' chzane cuina' gata' neche legaque'. ¹² Nita' bene' chesezi' laxjue' cont chosoyoe' xila' che bene'. Na' bene' chesezi' laxjue' chesebejyichje' xila' ca' cate' chesele'ede' za' beco'yo, le xila' ca' bi zjanacba' be chegaque'. Chesoe' latje chniz beco'yon' xila' ca' na' chesoslasba' legacba'. ¹³ Na' bene' bi zjanaque' xan xila' ca' chosoxonje' da' bi zjanži'ide' xilan', le bi zjanac xilan' be chegaque', san chosoyoeba' dan' chesezi' laxjuen'.

¹⁴ 'Neda' binlo chgüia chna'a bene' ca' chesejnilaže'nda', chona' ca chon to bene' chyoe' xila' chen' binlo. Na' nombi'a bene' ca' chesejnilaže' neda' na' legaque' zjanombi'e neda'. ¹⁵ Nombi'a legaque' ca Xan' nombi'e neda' na' neda' nombi'a Xan'. Na' da' nži'ida' legaque' chzane cuina' gata' neche legaque'. ¹⁶ Nita' bene' yoble bene' bi zjanaque' bene' Israel bene' yesejnilaže' neda'. Na' cheyala' šjatoba' legaque' cont yosozenague' chia', nach yesaque' toze len yezica'chle bene' ba chesejnilaže' neda' na' toz neda' gwgüia na'a yogo'lóle'.

¹⁷ 'Chzane' cuina' yesot bene' neda', na' techle yebana' da' yoble. Na' Xan' chacchde' neda' le chazlaže' da' chona' ca'. ¹⁸ Nono checa'a yela' mban chian' san chzanlaže' cuina' gata'. Guac zane cuina' yesote'nda' na' lec'z guac yeyas yebana' ladjo bene' guaten', can' non Xan' mandadw gona'.

¹⁹ Na' da' yoble bene' nación Israel cheton' besechoje' chople neche xtiža' Jesúsēn'. ²⁰ Zane' gosene':

—Yo'o da' xigüen' yichjlažda'ogüe', nan' chol chñenoše'. ¿Bixchen' chzenagle xtižen'?

²¹ Na' yebale' gosene':

—Bene' yo'o da' xigüen' yichjlažda'ogüen' bi gac gwšalje' ca'. ¿Guac gon da' xigüe' cont le'e bene' lchol'?

Bene' gwnabia' che nación Israel besegue'ede' Jesúsēn'

²² Na' cate' bžin ža gwyo'o lni dan' chesone' chjasyeze'ede' žan' beyož besyeyone' yodao' blao che Diosēn', ba bžin tiemp zag Jerusalēnna'. ²³ Na' Jesúsēn' chde' chašil che yodao' blaon' gan' nzi' Chašil che Salomón. ²⁴ Na' bene' gwnabia' che nación Israel cheton' gosechje' Jesúsēn' na' gose'ene':

—¿Bixchen' chono' cont chacžejlaže'to' še naco' Cristo ben' chbezto' sela' Diosēn' cont yedenabi'e nación chechon'? Še len' Criston', gwnatega neto' zaca'lao.

²⁵ Na' gož Jesúsēn' legaque':

—Ba gwnia' le'e na' bi chejle'le. Da' ca' ba bena' len yela' guac che Xan' chlo'en naca' bene' gwsele'. ²⁶ Perw bi chejle'le chia' da' bi nacle txen len bene' chesejnilaže' neda', can' ba gwnicza' le'e. ²⁷ Nombi'a bene' chesejnilaže' neda', na' žia' legaque' xila' chia'. Legaque' chosozenague' chia' na' chesone' con can' chzejni'ida'ne'. ²⁸ Na' chnežjua' legaque' yela' mban toli tocanē na' gwbat yesebiaye'e na' nono gac yesyeca'a legaque' lo na'. ²⁹ Xan' ba gwleje' bene' ca' chesejnilaže' neda' cont chgüia chna'a legaque'. Na' nono gac yesyeca'a legaque'

lo na' Xan', le nape' la'zelagüe yela' chnabia' xen. ³⁰ Neda' na' Xan' toz bene' nacto'.

³¹ Beyož gwne' ca' bene' gwnabia' ca' gosenize' yej cont yosoche'enen'. ³² Na' gož Jesúsen' legaque':

—Da' zan da' güen ba ble'ele bena' len yela' guac che Xan'. ¿Che nonna' chaclaže'le gwchelle neda' yej?

³³ Na' bene' gwnabia' ca' gose'e le':

—Gague che yela' guac ca' benon' gwchelto' le' yej san da' chneya'o che Diosen'. Con benachze le' na' chon cuino' ca Dios.

³⁴ Na' gož Jesúsen' legaque':

—Nezeczele can' nyoj Xtiža' Diosen' dan' nsedle gan' žan: “Neda' ba gwnia', le'e nacle ca neda' Dios.” ³⁵ Na' Xtiža' Diosen' da' nyojen gague da' te chen', na' lenna' žan Diosen' gwne' che bene' ca' bosozenag xtižen' cani' gosaque' ca le'.

³⁶ Diosen' gwleje' neda' cont gaclena' benachen' že' yežlio nga na' ¿nacxechen' ža le'e chneya'a che Diosen' da' žia' naca' Xi'ine'? ³⁷ Še dan' chonan' bi chlo'en yela' guac che Xa' Diosen', bi cheyala' šejle'le chia' šeca'. ³⁸ Perw še chacbe'ele chona' da' zaca' len yela' guac che Diosen', cheyala' šejle'le len' gwsele' neda', la'czla' bi chaclaže'le šejle'le xtižan'. Na' še šejle'le che da' ca' chonan', nachen' nezele zoa Xan' len neda' na' neda' zoa' len le', le toz benen' nacto'.

³⁹ Nach da' yoble gosaclačže' yesezene' Jesúsen' perw bitw bdole'.

⁴⁰ Jesúsen' beyeje' jayzoe' yešla'a yegw Jordanna' latje gan' gwzoa da' Juanna' šlac ne' chzoe' bene' nis. ⁴¹ Na' bene' zan ja'ac gan' gwzoe' cont bosozenague' xtižen' na' gosene':

—Da' Juanna' ne to yela' guac bi bene', perw yogo'lol dan' gwne' che benganaquen da' li.

⁴² Na' bene' zan gosejnilaže' Jesúsen' latje na'.

11

Can' goc cate' got Lázaro

¹⁻² Na' gwzoa to bene' gocšene bene' yež Betania le' Lázaro. Betania naquen laž María na' bene' bile' Marta, na' legaque' zjanaque' bene' zan Lázaron'. María nan' bzoe' to set zix'ni'a Xancho Jesúsen' na' bosbiže' ni'en len yiša' yichje'. ³ Na' bene' zan Lázaron' gosele' diža' gan' zoa Jesúsen', chese'e le':

—Xanto', bene' xmigo' Lázaron' ba chacšende'.

⁴ Cate' gwneze Jesúsen' chacšene Lažaron', na' gwne':

—Ca nac yižgüe' chen', bi che'eden' cont yela' goten' gonen le' gan, san che'eden' cont gache'ele catec bene' zaca' nac Diosen' na' gache'ele naca' bene' zaca'chgua, neda' naca' dogualje Xi'in' Dios.

⁵ La'czla' Jesúsen' chacde' Martan' len bene' bilen' na' len Lázaron', ⁶ cate' gwnezde' chacšene Lázaron', bega'anche' yechope ža gan' zoen'. ⁷ Nach gože' bene' ca' zjanaque' le' txen:

—Le šo'o šejcho distritw Judean' da' yoble.

⁸ Na' gose'ene':

—Maestrw, bi ža na'zen' bene' gwnabia' che nación chechon' gosaclačže' yesote' le' yosochele' le' yej. ¿Da' yoble šejo' na'?

⁹ Jesúsen' gože' legaque':

—Lagüe žan' nsa' šižinw hor, na' bene' chda lagüe ža bi chchegüe', le nseni' gwbižen' lo yežlion'. ¹⁰ Na' bene' chda ba goļ chchegüe', le nac chol.

¹¹ Gwde gwne' ca' nach gože' legaque':

—Bene' xmigwcho Lázaron' ba chtase' na' ša'a šjaysbana'ne'.

¹² Na' gose'ene':

—Xanto', še ba chtase' güeyacczede'.

¹³ Jesús'en' gwne' ca' dan' gwñezde' ba got Lázaron', na' bene' ca' zjanaque' Jesús'en' txen gosacde' še chtaszen'. ¹⁴ Nach Jesús'en' bochixgaten' bi zejenna' gwne' ca':

—Ba got Lázaron'. ¹⁵ Na' chebeda' bi gwzoa' na' šlac chacšende', cont gona' šejle'le chia'. Le šo'o šejcho gan' de'na'.

¹⁶ Nach ben' le' Tomás ben' bososi'e Tomás Cuaš gože' yezica'chle bene' ca' zjanaque' Jesús'en' txen:

—Le šo'o cont gatcho txen len Jesús'en' še yesote'ne'.

Jesús'en' že' chac chosbane' bene' guat

¹⁷ Na' ja'aque' Betanian' len Jesús'en', na' cate' besežine'na' bene' Betania ca' bosozende' le' ba goc tap ža bosocuaše' Lázaron'. ¹⁸ Betanian' chin' gala'ze Jerusalénna' ca do gašjw hor. ¹⁹ Na' bene' zan bene' gualaž čegaque' že' Jerusalénna' besežine' gan' zoa Martan' len Marían' cont yeso'e legaque' yela' chxenlaže' da' got bene' zangaquen'. ²⁰ Nach Martan', cate' gwñezde' Jesús'en' ba bžine' cho'a yežen', na' gwze'e jašague'ne'. Na' Marían' bega'ane' yo'ona'. ²¹ Nach Martan' gože' Jesús'en':

—Xana', šaca' zo' nga caten' gocšene bene' zanan' bilja gote' šaca'. ²² Na' nezda' la'czla' ba gote', bite'tez da' nabdo' Diosen' gone', gonczen'.

²³ Nach gož Jesús'en' le':

—Güeban bene' zanon'.

²⁴ Nach Martan' gože'ne':

—Nezda' yebane' cate' yesyeban bene' guat ca' žan' te čhe yežlion'.

²⁵ Na' gož Jesús'en' le':

—Neda' chac chosbana' bene' guat ca' le' nsa'a yela' mban toli tocaṇe. Da'nan' bene' ca' yesejnilaže' neda', la'czla' yesate', guata' yela' mban čegaque' toli tocaṇe. ²⁶ Na' note'tez bene' nite' chesejnilaže' neda', gwbat yesebiaye'e. ¿Chejli'o da' nga chnia' le'?

²⁷ Na' gož Martan' le':

—Xana', chejli'a naco' dogualje Xi'in Dios. Chejli'a naco' Criston' ben' ba gwlezto' sela' Diosen' yežlion' yedenabi'e.

Jesús'en' gwcheže' gan' bosocuaše' Lázaron'

²⁸ Beyož gwna Martan' ca' beyeje' jayeže' María bilen' šižize:

—Ba bla' Maestron' cho'a yežen' na' chnie' le'.

²⁹ Na' Marían' cate' bende' dan' gož Martan' le' la' gwza'te' na' gwyeje' gan' zoa Jesús'en'. ³⁰ Biṇa' žin Jesús'en' lagüe yežen' ca horen', ne' nga'ane' cho'a yežen' gan' jašag Martan' le'. ³¹ Na' bene' Jerusalén ca' nita' liž María, bene' cheso'e le' yela' chxenlaže' da' got bene' zanan', cate' besele'ede' gwza' Marían' nach gosa'aclene' le', gosacde' zeje' cho'a blojen' gan' ngaše' zjačeže'.

³² Na' Marían' cate' bžine' gan' zoa Jesús'en' na' ble'ede' le', la' bzoate xibe' lagüen', gože'ne':

—Xana', šaca' zo' nga caten' gocšene da' bene' zanan', bilja gote' šaca'.

³³ Na' cate' ble'e Jesús'en' chbež Marían' na' lecze chesebež bene' Jerusalén ca' za'aclene' le', da' juisyw da' goque Jesús'en' na' bžaglagüe' lo' yichjlažda'ogüen'.

³⁴ Na' gože' legaque':

—¿Ga bcuaše'lene'?

Na' gose'e le':

—Xanto', yo'o na' le'edo'.

³⁵ Na' gwchež Jesús'en'. ³⁶ Na' bene' Jerusalén ca' gosene':

—Le na' catequen' chacde' le'.

³⁷ Na' bale' gosene':

—Bengan' bene' ga ble'e bene' lcholen', na' šaca' gwzoe' nga caten' gocšene Lázaron', benlje' cont bi gote'.

Jesúsen' bosbane' Lázaron' ladjo bene' guaten'

³⁸ Na' da' yoble da' juisyw da' goque Jesúsen' lo' lažda'ogüen'. Na' gwyeje' gan' bosocuaše' ben'. Naquen to bloj na' da' to yej cho'enña'. ³⁹ Na' Jesúsen' gože' bene' ca':

—Le ca'a yejen'.

Na' Martan' bene' zan da' Lázaron' gože'ne':

—Xana', ba chla' ben' zigw, le bach goc tap ža gote'.

⁴⁰ Na' gož Jesúsen' le':

—Ba gwnia' le' še šejnilažo' neda' na' le'edo' nac Diosen' bene' zaca' juisyw.

⁴¹ Nach bene' ca' goseque'e yejen'. Na' Jesúsen' gwne'e yabale na' gwne':

—Xa', choxcleno' ba bzenago' chia'. ⁴² Nezda' yogo' ni'a chzenago' chia', perw žia' ca' cont bene' ca' že' nga yesejle'e len' gwselo' neda'.

⁴³ Beyož bol güiže' Diosen', gwne' zižje, gwne':

—Lázaro, bechoj.

⁴⁴ Nach la' bechojte Lázaron' ndobyoy ni'a ne'en to cint de lache' na' to bay ndobe cho'alagüen'. Na' Jesúsen' gože' legaque':

—Le yozaše' lachen' na' le gwsane' yeyeje'.

Bosoxi'e yesezene' Jesúsen'

(Mt. 26:1-5; Mr. 14:1-2; Lc. 22:1-2)

⁴⁵ Na' zan bene' Jerusalén ca' bene' ja'aclene' Marían' besele'ede' yela' guac da' ben Jesúsen' na' gosejnilaže'ne'. ⁴⁶ Perw bal bene' Jerusalén ca' ja'aque' lao bene' fariseo ca' na' jaseže' legaque' Jesúsen' bosbane' Lázaron'. ⁴⁷ Nach bχoz gwnabia' ca' che neto' bene' Israel len bene' fariseo ca' bosyotobe' yogo'lol bene' ca' chesenabia' nación cheton'. Na' bosoxi'e gosene':

—¿Nac goncho? le yela' guac zan chon benga. ⁴⁸ Na' še nacho jayenña', yogo'ze bene' yesejnilaže'ne', na' yesid bene' nación Roma na' yeseque'e yodao' blao chechon' na' yosožiaye'e nación chechon'.

⁴⁹ Na' to bene' gwnabia' zoa ca horen' le' Caifás. Le' naque' bχoz blao lo izen'. Na' gože' legaque':

—Le'e gague bi nezele. ⁵⁰ Na' bi chacbe'ele napen chio' cuent toz ben' gat, clcl ca cuiayi' yogo'cho lente nación checho nga.

⁵¹ Gague con ca gwnalaže'ze Caifásen' gwne' ca', san da' naque' bχoz blao iznan', Diosen' bene' ga gwne' ca' cont gwdixjue'ede' gat Jesúsen' neče nación cheton'. ⁵² Na' ca nac dan' gaten', gague gate' neče nación cheto' na'zen' san gate' cont yogo' bene' ba gwlej Diosen' yesaque' xi'ine' gate'teze nación, yesaque' txen yesejnilaže'ne'. ⁵³ Ca' goquen', žana' bene' gwnabia' ca' gosezolagüe' bosoxi'e nacle yesone' yesote' Jesúsen'.

⁵⁴ Na' da'nan' Jesúsen' bich gwdacze' con can' nla'ze gan' že' bene' gwnabia' che nación cheton'. Nach gwze'e distritw Judean' na' gwche'e bene' ca' zjanaque' le' txen to yež da' nzi' Efraín da' chi' gala'ze latje dašen', na' besyega'ane' na'.

⁵⁵ Na' ba zoa gala' lni pascw che neto' bene' Israel. Na' bene' zan bene' za'ac to to yež zja'aque' Jerusalénna' cate' za' gala'le lnin' cont yeson cuine' xilaže' can' ža ley cheton'. ⁵⁶ Na' besyeyiljue' Jesúsen' do gan' zoa yodao' blaon' na' cate' bi besyeželde'ne' na' gose' lježe':

—¿Bi chaquele? ¿Güide' lni nga, še bi yide'?

⁵⁷ Gosene' ca' le bꝛoz gwnabia' cheto' ca' na' bene' fariseo ca' ba gosechoguen' še note'tez bene' nezde' gan' zoa Jesúsén' cheyalá' gwzende' legaue' cont yesezene' le'.

12

Marían' chgüe'e set zix ni'a Jesúsén'

(Mt. 26:6-13; Mr. 14:3-9)

¹ Na' yexop ža za' gala' lni pascon', Jesúsén' gwche'e bene' ca' zjanaque' le' txen yež Betanian' gan' zoa Lázaron' ben' bosbane' ladjo bene' guaten'. ² Na' bal bene' Betanian' bososiñi'e to xše' da' gwdagw Jesúsén' cont gosonxene'ne'. Na' Martan' bdie' yela' guagw na' Lázaron' gwche'lene' bene' ca' cho'a mesen' txen len Jesúsén'. ³ Na' Marían', de ca do tya set zix che' da' zaca'chgua la'ay na' naquen dogualje da' bchoj lo yag yej da' nzi' nardo. Na' jabigue' gala'ze xñi'a Jesúsén' na' gwlo'e set zixen' ni'ena' na' beyoža' bosbižen' len yiša' yichje'. Na' doxen yo'ona' gwla'chguan ze set zixen'. ⁴ Na' Judas Iscariote xi'in to bene' le' Simón, le' naque' to bene' šižinw ca' zjanaque' Jesúsén' txen, na' len' ba naquen gwdie' Jesúsén' lo na' bene' ca' chesegue'ede' le'. Na' Judasen' gwne:

⁵ —¿Bixchen' bi bete' seten' na' gone' mechon' cont gaclenen bene' yaše'? le zacan' ca no laxjw mos da' gone' gan tgüiz.

⁶ Judasen' gwne' ca' gague da' beyaše'de' bene' yašen' san da' goque' bene' gwban. Len' beꝛue' mechw da' bosochin yogüe' na' gwlejlane' mechon'.

⁷ Nach Jesúsén' gože'ne':

—Bibi ye'lné', le ba bene' da' non gone' len neda' che ža cate' gaša'. ⁸ Bene' yaše' ca' nita'cze' len le'e bate'teze, san neda' bich soacza' yessa' len le'e.

Bꝛoz gwnabia' ca' bosoxi'e yesote' Lázaron'

⁹ Na' bene' zan bene' Israel gualaž cheton' goseñezde' zoa Jesúsén' lagüe' yež Betanian' na' ja'aque', gague cont yesele'ede' Jesús na'zen' san da' gosaclačže' yesele'ede' lencze Lázaron' ben' bosbane' ladjo bene' guaten'. ¹⁰ Na' bꝛoz gwnabia' che nación Israel cheton' bosoxi'e lecze yesote' Lázaron', ¹¹ le bene' zan bene' Israel ba chesyecuase' len legaue' na' ba chesejnilaže' Jesúsén' dan' goseñezde' bosbane' Lázaron'.

Jesúsén' beyo'e ciuda Jerusalénna' da'yoble

(Mt. 21:1-11; Mr. 11:1-11; Lc. 19:28-40)

¹² Na' beteyo Jesúsén' len bene' ca' zjanaque' le' txen gosa'aque' Betanian' na' ja'aque' Jerusalén. Na' bene' zan chesežag Jerusalénna' da' ba zoa gala' lñin', na' zane' cate' goseñezde' žin Jesúsén' Jerusalénna', ¹³ besežaše' jaseleze' le' zjanoxe' no zin. Na' chesegüe'e lban' che', chesene':

—¡Leca bene' zaca' bengal! Mbalaz ben' za' nga nselá' Xancho Diosen' le' cont nabi'e. ¡Mbalaz bene' naque' Rey che nación Israel chechon'!

¹⁴ Na' bžel to burr dao' be gwžia Jesúsén', na' goc can' nyoj Xtiža' Diosen' žan:

¹⁵ Le'e chonxenle Diosen' ciuda Jerusalénna', bi žeble;

le na', ba za' Rey chelen' žie' to burr dao'.

¹⁶ Na' bene' ca' zjanaque' Jesúsén' txen gague cate gosejni'ide' chac con can' bosozoj ben' goso'e xtiža' Diosen' cani'. Beyož got Jesúsén' na' goc yogo' da' ca' gosaquen' cont bla'lagüe le Jesúsén' naque' bene' zaca' juisyw, cana'ch jasyeza'laže' diža' ca' da' zjanyoj che Jesúsén' na' gosejni'idén'.

¹⁷ Bene' ca' besele'e cate' Jesúsén' bol güiže' Lázaron' na' bosbane' le' cont bechoje' lo' ban' gosoe'lene' bene' ca' že' lo ciudan' diža' can' goquen'. ¹⁸ Na' da'nán' bene' zan jaseleze' Jesúsén' da' ba gosende' diža' che yela' guac dan' bene' bosbane' Lázaron'. ¹⁹ Nach bene' fariseo ca' gose' lježe':

—Ba chle'ele bibi chac bi goncho. Yogo'ze bene' ba chosozenague' che'.

To chope bene' griego gosenabe' yesoe'lene' Jesúsen' diža'

²⁰ Na' zjalen to chope bene' griego bene' ca' ja'aque' gosonxene' Diosen' lo ĩnin'. ²¹ Na' bene' ca' besežine' gan' zoa Felipen' ben' nac bene' Betsaida ga mbane distritw Galilean', na' gose'ene':

—Si'xenšco', chaclaže'to' güe'lento' Jesúsen' diža'.

²² Na' Felipen' gwyeje' jane'e Andrésen' nach choptie' jaseže' Jesúsen' ca'.

²³ Nach Jesúsen' gože' legaque':

—Na'a ba bžin hor gac yogo'loĭ da' cheyaĭa' gac cont la'lagüe naca' bene' zaca' juisyw. ²⁴ Žia' to da' zejen, še to trigon' bi yexinjen cate' lažon' lo yon', con chega'anče tozen; perw še yexinjen na' yelan', da' zan trigon' gonen.

²⁵ Note'tez bene' con chi' yichje' gac güen chegaque' yežlio nga, bene' ca' yesebiaye'e. Na' note'teze bene' chesene' bibi nonen še bi gac chegaque' yežlio nga, šjasyezoe' len Diosen' toĭi tocañe. ²⁶ Na' note'tez bene' chesaclačže' yesone' xšinan', cheyaĭa' yesejnilaže' neda' na' yosozenague' chia'. Na' gan' soa' neda' ľecze na' yesezoa bene' ca' yeson xšinan'. Note'tez bene' yeson xšinan', Xan gone' cont yesacxene'.

Jesúsen' gwdixjue'ede' yesot bene' ľe'

²⁷ 'Ba chžaglagua' lo' yichjlažda'oguan'. ¿Chaquale nabda' Xan' yosle' neda' lo da' ca' ba zoa gac chia' na'a? Bitw gona' ca', ľe za'a cont gac chia' yogo' da' ca'.

²⁸ Nach boĭ güiže' Diosen', gwne':

—Xa', ben len neda' cont yesacbe'e bene' naco' bene' zaca' juisyw.

Beyož gwne' ca' na' gwne' Dios ben' zoa yaban', gwne':

—Ba bena' len ľe' cont chesacbe'e bene' naca' bene' zaca' juisyw na' za' goncha' ca' yeto.

²⁹ Na' zan bene' ca' že' na' gosende' dan' gwna Diosen' na' gosene' gwzion' gwne. Na' yebaĭe' gosene':

—To angl gwne' ľe'.

³⁰ Na' Jesúsen' gwne':

—Diosen' gwne' neda' zižje gague cont nezda' neda' chzenague' chia' san cont neze ľe'e. ³¹ Ba bžin ža Diosen' chogbi'en' che bene' ca' bi chesejle'e chia'. Na' ba bžin ža Satanás dan' chnabia' da' xigüe' ca' na' dan' chnabia'te bene' ca' bi chosozenag che Diosen' solao nit yela' chnabia' chen. ³² Na' cate' yeselise' neda' to ľe'e yag, cana'ch gona' cont zan bene' že' doxen lo yežlion' yesejnilaže' neda'.

³³ Gwne' ca' cont gosenezde' yesot bene' ľe' yosode'ene' to ľe'e yag cruz. ³⁴ Na' bene' ca' že'na' clele gosejni'ide' dan' gwnen' na' gose'e ľe':

—Ba beneto' can' ža Xtiža' Diosen' da' nyojen, na' nezeto' žan Cristo ben' sela' Diosen' yedenabi'e nación chechon' soe' toĭi tocañe. Na' ľe' ¿bixchen' žo' naco' bene' gwsela' Dios goljo' beñach na' žo' yesote' ľe' to ľe'e yag cruz še ca'? ¿Nox naco' šaca'?

³⁵ Nach Jesúsen' gože' legaque':

—Yešlož da'ozen' soa' len ľe'e, neda' nsa' be'ni' che yichjlažda'olen'. Ľe gwzenag chia' šlac ne' de latje šo' be'ni' chian' lo' yichjlažda'olen', cont bi cuiayi'lenle da' mal dan' chnabia' ľe'e. Ben' chda gan' nac choĭ bi chache'ede' gan' zeje'. Can' naquen len ľe'e. ³⁶ Ľe šejnilaže' neda' šlac ne' zoa' len ľe'e, cont šo' be'ni' chian' lo' yichjlažda'olen'.

Gwde gwna Jesúsen' ca' beze'e na' bcuaše'de' legaque'.

Zan bene' Israel bi gosejnilaže' Jesúsen'

³⁷ Na' la'czla' bene' Israel gualaž cheto' ca' besele'ede' ben Jesúsen' da' zan yela' guac, zane' bi gosejnilaže'ne'. ³⁸ Goc can' bzoj da' Isaíasen' ben' be' xtiža' Diosen' cani', gwne':

Xanto', nono chejle' diža' dan' chyixjue'eton',
na' nono chesache'e blo'o yela' guac chion'.

³⁹ Bi goc yesejle'e, le goc chegaque' can' ža yeto dan' bzoj da' Isaíasen', žan:

⁴⁰ Diosen' bene' cont bi gosejni'ide' na' cont zjanaque' bene' güedena.

Ba bene' cont chesele'ede' na' bi zjanезде' bi zejen,
na' bi chesache'ede' lo' yichjlažda'ogaque' bi zejen dan' chlo'ede' legaque'.

Šaca' chesejni'ide' na' chesache'ede' bi zejen dan' chlo'eda' legaque',
ba besyetinjde' na' ba beca'a xtoła'gaquen' šaca'.

⁴¹ Da' Isaíasen' gwne' ca' da' ble'ebande' nac Jesúsen' bene' zaca' juisyw nach be'e diža' che'.

⁴² Na' la'czla' zanch bene' Israel gualaž cheto' ca' bi gosejnilaže' Jesúsen', bia'cze bene' zan na' len no bene' gwnabia' cheto' gosejnilaže'ne', perw bi goso'e diža' chesejnilaže'ne' le besežebe' bich yosoleb bene' fariseo ca' legaque' lo' yodaon'. ⁴³ Gosaclačže'che' yesenite' binlo len benachen' clel ca yesenite' binlo len Diosen'.

Xtiža' Jesúsen' naquen da' žialao

⁴⁴ Nach Jesúsen' gwne' zižje gože' bene' ca' že'na':

—Bene' chesejnilaže' neda' gague neda'zen' chesejnilaže' san lente Xan' ben' gwsela' neda'. ⁴⁵ Na' bene' chne'e neda' chle'ede' bene' gwsela' neda'.

⁴⁶ Neda' za'a yežlio nga chgua'a be'ni' lo' yichjlaždao' bene' ca' chesejnilaže' neda', cont bi yesenite' yesonche' da' malen'. ⁴⁷ Na' note'tez bene' nezde' can' ba gwnian' na' bi chzenague' chia', gague neda' gwnežjua' castigw che xtolen', le bi za'a yežlion' cont gwnežjua' castigw che xtoła' benachen', san za'a cont gwnežjua' yela' mban toli tocaņe che bene' yesejnilaže' neda'. ⁴⁸ Perw de da' choglaon che bene' ca' bi chesejnilaže' neda' na' bi chosozenague' che dan' ba gwnian', xtižan' dan' ba bian', lenna' choglaon che bene' ca' zjanape' doła' cate' žin ža te che yežlion'. ⁴⁹ Gague bia' diža' to gualaza', san Xa' ben' gwsela' nedan' none' mandadw bin' cheyała' nia' na' bin' cheyała' gwsed gwlo'eda'.

⁵⁰ Na' nezda' dan' none' mandadw nia' nsan' yela' mban toli tocaņe che bene' yosozenag chēn. Na' da' li, con can' ža Xan', can' choe'lena' le'e diža'.

13

Gwdib Jesúsen' ni'a bene' ca' zjanaque' le' txen

¹ Na' Jesúsen' ba nezde' ba bžin ža yeze'e yežlion' na' yeyeje' gan' zoa Xe' Diosen', na' gocde' yogo' bene' ba chejnilaže' le' lo yežlio nga. Da'nān' za' gała' lni pascon' bzejni'ide' bene' ca' zjanaque' le' txen, le chacyane'czede' legaque'.

² Bač gwlo'o Satanásen' xbab lo' yichjlaždao' Judas Iscariote, ben' nac xi'in to bene' le Simón, cont gwdie' Jesúsen' lo na' bene' ca' chesegue'ede' le'. Na' ba zjanite' chesagüe' xše'. ³ Na' Jesúsen' nezde' Xen' ba bene' cont nape' la'zelagüe yela' chnabia', na' nezde' gan' zoa Diosen' gwze'e na' gan' zoe' nan' yeyeje'.

⁴ Da'nān' gwzože'e cate' ba chesyedagüe' xše' na' gwlechje' xe' da' nyaze' cha'le na' gwxi'e to lache' da' bchej lsinen'. ⁵ Nach gwxi'e nis na' gwde'en to lo' ša' na' gwzomagüe' gwdibe' ni'a bene' ca' zjanaque' le' txen ca to mos, na' bosbiže' ni'agaquen' len lachen' nchej lsinen'.

⁶ Na' cate' ba zoa chibe' ni'a Simón Pedro, Pedron' gože'ne':

—Xana', žle' chibo' ni'an'?

⁷ Na' Jesúsen' gože'ne':

—Dan' chona' nga bi chejni'idon' na'a, perw gwžin ža cate' šejni'idon'.

⁸ Na' gož Pedron' le':

—Gwbat gua'a latje chibo' ni'an'.

Jesúsen' gože'ne':

—Še bi chiban', bich gaco' txen len neda'.

⁹ Na' Pedron' gože'ne':

—Xana', gague ni'a na'zen' chibo' še ca', san doxena'.

¹⁰ Nach gož Jesúsen' le':

—Bene' noša' nazje', ni'e na'zen' chyažjen chibe', le doxen cuerp chen' naquen xilaže'. Can' nac le'e, nac lažda'olen' xilaže', la'czla' gague yogo'le.

¹¹ Jesúsen' gwneзде' non' gwde' le' lo na' bene' chesegue'ede' le'. Da'nan' gwne': "Gague yogo'le nac lažda'olen' xilaže'."

¹² Na' cate' beyož gwdibe' ni'a yogüe', nach beyaze' xe' dan' chaze' cha'le na' bebi'e da' yoble cho'a mesen'. Na' gože' legaque':

—¿Chejni'ile bi zejen dan' ba bena' nga len le'e? ¹³ Le'e nsi'le neda' Maestrw na' Xanle, na' güenczen' žale, le can' naca'. ¹⁴ Na' neda' la'czla' naca' Xanle na' Maestrw chele, ba gwdiba' ni'alen' ca to mos, na' can' cheyala' gaclen lježle ca to mos. ¹⁵ Ba gwdiba' ni'alen' cont blo'eda' le'e cheyala' gonle can' ba benan'. ¹⁶ Chnia' le'e to da' zejen, note'teze mos bi naque' bene' blaoch ca xane', na' to bene' zej mandadw bi zaca'che' ca bene' gwseła' le'. ¹⁷ Še chejni'ile da' quinga na' gonle can' gwnian', nach soale mbalaz.

¹⁸ Bi žia' ca' che yogo'le. Nombi'a yichjlaždao' to to le'e ba gwleja' cont soale txen len neda'. Na' nezda' gac can' ža Xtiža' Diosen' da' nyojen žan: "Bene' gwdagw len neda' txen ba blej bšošje' neda'." ¹⁹ Chnia' le'e da' quinga cate' za' gac ca' cont cate' ba goc ca' soachachle šejle'le le naca' ben' gwseła' Diosen' can' ba gwnia' le'e. ²⁰ Chnia' le'e to da' zejen, bene' ca' chosolebe' note'tez bene' chseła', neda'czen' chosolebe' še ca', na' bene' chosolebe' neda' lecze chosolebe' Dios bene' gwsele' neda'.

Jesúsen' gwne' toe' gwdie' le' lo na' bene' ca' chesegue'ede' le'

(Mt. 26:20-25; Mr. 14:17-21; Lc. 22:21-23)

²¹ Beyož gwna Jesúsen' ca' ba gwzolao chacyaše'chgüede' lo' yichjlažda'ogüen', na' bochixgaten' gwne':

—Da' li chnia' le'e, to le'e gwdelenda' lo na' bene' chesegue'e neda'.

²² Na' bene' ca' zjanaque' le' txen con cheseña' cho'alao lježe' chesone' xbab che noen' gwne' ca'. ²³ Na' toe' chi'e cuiten' dan' chaquechgüe' Jesúsen' le'.

²⁴ Nach Pedron' bene' señw len bena' cont gwñabde' Jesúsen' no chen' gwne' ca'. ²⁵ Nach gwbigue' bago gože' Jesúsen':

—¿Non' gon ca'?

²⁶ Na' gož Jesúsen' le':

—Bena' gwnežjua' late' yetextilen' cate' ba blo'ojan' lo' nis yela' guagon', le'na' gon ca'.

Nach blo'oje' late' yetextilen' lo' nis yela' guagon' na' bnežjuen' Judas Iscariote bene' nac xi'in to bene' le' Simón. ²⁷ Na' beyož bnežjue' Judasen' yetextilen' la' gwyo'o gwyazte Satanás dan' chnabia' da' xigüe' ca' lo' yichjlaždao' Judasen'. Nach Jesúsen' gože' Judasen':

—Da' ba zoa gono' benen bedao'nez.

²⁸ Na' ne to ben' zjachi' cho'a mesen' bi gosejni'ide' bixchen' gože' le' ca'. ²⁹ Bale' gosacde' da' noxe' Judasen' bols mechon' Jesúsen' gože' le' šjaxi'e da' cheseyažjde' lo' lnin' o šjanežjue' mechw da' chyažje no bene' yaše'. ³⁰ Nach cate' beyož gwdagw Judasen' pedas yetextil dan' bnežjw Jesúsen' le', la' bchojte'. Na' ba nac ba gol' gual.

To da' cobe da' non Jesúsen' mandadw goncho

³¹ Gwde bchoj Judasen', Jesúsen' gwne':

—Diosen' gwsele' neda' golja' beñach na' na'a ba nla'laon naca' bene' zaca' juisyw, na' neda' lecze ba chlo'a Diosen' naque' bene' zaca' juisyw. ³² Na' dan' chlo'a naque' bene' zaca', lecze le' gwlo'e naca' bene' zaca', na' la' gontien' na'a. ³³ Xi'inda'ogua', yešložga soa' len le'e. Na' yeyiljwle neda', na' chnia' le'e dan' goša' bene' gwnabia' che nación Israel chechon', bi gac sa'lenle neda' gan' yeya'an. ³⁴ Na' to da' cobe chžia' bia' gonle, gaque lježle tole yetole. Can' chacda' le'e, lecz can' cheyala' gaque lježle tole yetole. ³⁵ Na' yeseneze yogo'lol bene' nacle neda' txen še soaczle gaque lježle tole yetole.

Jesúsen' gwne' Pedron' bi chebe' nombi'ene'

(Mt. 26:31-35; Mr. 14:27-31; Lc. 22:31-34)

³⁶ Na' Simón Pedron' gože' Jesúsen':

—Xana', ¿gan' yeyejo'?

Na' gož Jesúsen' le':

—Gan' yeya'an bi gac sa'lenu' neda' na'a, perw techle yido' ga'oguo' neda'.

³⁷ Na' Pedron' gože' le':

—Xana', ¿bixchen' bi gac sa'lenu' le' na'a? Gwzanlaže' cuina' gata' še chonen byen cont gaclenu' le'.

³⁸ Na' gož Jesúsen' le':

—¿Chacdo' gwzanlaže' cuino' gato' cont gaclenu' neda'? Da' li chnia' le', cate' cuež jean' ba goc šon ni'a bi chchebo' nombi'o neda'.

14

Bene' chesejnilaže' Jesúsen' lecze zjanombi'e Xe' Diosen'

¹ Bich gacžejlaže' le. Le šejnilaže' Diosen' na' lecze le šejnilaže' neda'. ² Da' zan yo'o da' že' gan' zoa Xa' Diosen'. Ba gwnia' le'e šaca' bibi latje de chele, san yeya'a šjayenšagua' yo'o che tole. ³ Na' cate' yeyož šjayenšagua' yo'o chele ca', cana'ch yida' da' yoble yeči'a le'e cont yedyezoale gan' šjayzoa' neda'. ⁴ Nezele gan' yeya'an' na' ba nezele nac gonle cont yežinle na'.

⁵ Na' gož Tomásen' le':

—Xanto', bi nezeto' gan' yeyejo'. ¿Nacxe gac nezeto' nac gonto' yežinto' na'?

⁶ Jesúsen' gože'ne':

—Neda' naca' nezen' na' nsa'a yogo' diža' li, na' toz neda' chac chnežjua' bene' yela' mban toli tocañe. Ne toze bene' bi yežine' gan' zoa Xan' še bi šejnilaže' neda'. ⁷ Še nombia'yane'le neda', lente Xan' ba nombia'le še ca'. Na' bach nombia'lene' na'a na' ba ble'elne'.

⁸ Na' gož Felipen' le':

—Ben cont le'eto' Xaon', lezen' chñabeto' le'.

⁹ Jesúsen' gože'ne':

—Felipe, šša xen ba gwzoa' nga len le'e na' ¿biña' gombi'o neda'? Note'tez bene' ba ble'e neda' lencze Xan' ba ble'ede'. ¿Bixchen' chñabo' gona' cont le'ele Xan'? ¹⁰ ¿Bi chejli'o zoa' len Xan' na' le' zoe' len neda'? Diža' da' choa' len le'e bi choan' to gualaza'. Xa' nan' zoe' len neda' na' len' chone' cont choa' dižan' chaclaže' gua' na' chona' bi da' chaclaže' gona'. ¹¹ Le šejle' chia' zoa' len Xan' na' le' zoe' len neda'. Na' še bi chejle'le xtižan', le šejle' chia' dan' ba ble'ele chona' yela' guac. ¹² Na' chnia' to da' zejen, bene' ca' chesejnilaže' neda', da' ca' chonan' lecze legaquen yesone'. Na' da' zaca'ch ca' da' ca' yesone', le yeya'a gan' zoa Xan'. ¹³ Na' bite'teze da' nabele Xan' lagüe da' chejnilaže'le neda' naca' Xi'ine', gonan', cont gwlo'a nac Xan' bene' zaca' juisyw. ¹⁴ Bite'tez da' nable gona' lagüe da' chejnilaže'le neda', neda' gonan'.

Jesúsen' gwne' sele' Spiritw che Diosen'

¹⁵ 'Še chaquele neda', gonle can' nona' mandadw. ¹⁶ Na' nabda' Xan' cont sele' Spiritw chen' soan len le'e toli tocaŋe na' gaclenen le'e. Na' Spiritw che Diosen' gwzejni'in le'e da' nac da' li. ¹⁷ Na' bene' bi chesejnilaže' Diosen', Spiritw chen' bi gac soan len legaŋe', le bi chesele'eden' na' neca chesejle'e še zoan. San le'e nombia'len, le zoan len le'e na' gwžin ža yedesoa lo' yichjlažda'olen' nabian' le'e. ¹⁸ Bi yocua'aŋa' le'e ca bi' güezebe. Güidcza' yeto gan' zoale nga. ¹⁹ Yešlož bene' ca' bi chesejnilaže' Diosen' bich yesele'ede' neda', perw le'e gwle'eczele neda'. Na' da' zoa' toli tocaŋe, da'nan' soale toli tocaŋe. ²⁰ Na' cate' žin ža yedesoa Spiritw che Diosen' lo' yichjlažda'olen', cana'ch gache'ele neda' zoa' len Xan' na' le'e zoale len neda' na' neda' zoa' len le'e. ²¹ Bene' zjanezde' dan' nona' mandadw yesone' na' chesonen', bene' ca' chesacde' neda'. Na' bene' ca' chesacde' neda' lecze chaque Xan' legaŋe', na' neda' lecze soa' gacda' legaŋe' na' gona' cont yesombia'che' neda'.

²² Na' Judas (perw gague Judas Iscariote) gože'ne':

—Xanto', ¿bixchen' gono' cont neto' nezeto' zoaczo' len neto' na' bi gono' ca' len bene' bi chesejnilaže' Diosen'?

²³ Na' Jesúsen' gože'ne':

—Bene' chesacde' neda' chosozenague' xtižan', na' Xan' lecze gacde' legaŋe' na' neda' len xan' yedesoa to len legaŋe'. ²⁴ Bene' bi chesacde' neda' bi chosozenague' xtižan'. Na' diža' dan' chnian' bi cho'an to gualaza' san cho'a diža' da' ža Xan' ben' gwsela' neda'.

²⁵ 'Da' quinga ba gwnia' le'e šlac ne' zoa' len le'e. ²⁶ Na' Xan' sele' Spiritw chen' soan lo' yichjlaždao' le'e chejnilaže'le neda' cont gaclenen le'e. Na' Spiriton' gwzejni'in le'e yogo' da' cheyala' nezele na' gonen cont šjayza'laže'le yogo' dan' ba gwnia' le'e.

²⁷ 'Na' hcua'aŋa' le'e na' chona' cont soa cuezle binlo len xbab chelen'. Chaclača' soa cuezle binlo len xbab chelen' can' zoa' neda'. Nono benač gac gone' cont soa cuezle binlo len xbab chelen' can' chac chona' neda'. Bi gacžejlaže'le, neca žeble. ²⁸ Ba benele gwnia' yeya'a gan' zoa Xan' na' yida' da' yoble gan' zoale nga. Na' ša chaquelenda' ca cheyala', nach chebele dan' yeya'a gan' zoa Xan', le Xan' zaca'che' ca neda'. ²⁹ Na' ba gwnia' le'e na'a bibi na' gac, cont soačhačle šejnilaže'le neda' caten' gac ca'.

³⁰ 'Bich gua'a diža' zan len le'e, le ba za' Satanás dan' chnabia' da' xigüe' ca' na' dan' chnabia'te bene' ca' bi chesejnilaže' neda', na' tillenen neda', perw bi gonen neda' gan. ³¹ Chona' con can' non Xan' mandadw cont neze benačhen' chacda' Xan'. Le šo'o na'a, ba gole šejcho.

15

Jesúsen' zaca'lebe' ca to yag da' chbia uvas

¹ 'Neda' zaca'leba' ca to yag da' chbia uvas. Na' Xan' zaca'lebe' ca bene' chonši'i yaguen'. ² Na' le'e chejnilaže'le neda' zaca'leble ca xoze' yaguen'. Na' to to xoze' yaguen' da' bibi chbian, chchoguen'. Na' to to xozen' da' chbia uvasen' chpe'en cont chbiachen da' zanch. ³ Na' le'e ba nacle ca to xozen' da' ba mpe'e, le bač chzenagle xtižan' dan' ba be'lena' le'e. ⁴ Le soačhač len neda' cont soačhača' len le'e. Can' nac xoze' yaguen' bibi chac cuian to gualazen še bi nca'an le'e yaguen', can' naquen len le'e, bi gacle can' chazlaže' Diosen' še bi soačhačle len neda'.

⁵ 'Neda' zaca'leba' ca to yag da' chbia uvas na' le'e zaca'leble ca xozen'. Note'tezle še soačhačle len neda' lecze soačhača' len le'e na' gacle can' chazlaže' Diosen', ca'aczen' nac che yag uvazen' dan' chbiachgua, le bibi gac

gonle to gualazle. ⁶ Bene' bi zoachache' len neda', gac che' can' chac len xoze' yag da' bibi chbia, le chesechoguen' na' chesebižen na' chžin ža chosotoben' chesadoen' yi' cont cheseyen.

⁷ 'Na' le'e še zoachachle len neda' na' zoachachle chzenagle xtižan', bite'tez da' chaclaže'le nabele Diosen', gonczen'. ⁸ Chacxen Xan' cate' zoale chonchguale dan' chazlažen', na' še chonle ca', yesacbe'e bene' da' li chejni-laže'le neda' na' chzenagle chia'. ⁹ Ca Xan' chacde' neda', lecz ca' neda' ba chacda' le'e. Le soa le gon can' žia' cont gacbe'ele chacda' le'e. ¹⁰ Še gonle can' nona' mandadw, nachen' gacbe'ele chacda' le'e, le neda' chona' dan' non Xan' mandadw na' chacbe'eda' chacde' neda'.

¹¹ 'Ba gwnia' le'e ca' cont soale mbalaz ca mbalazen' zoa' neda'. Chaclaža' soale mbalaz juisyw. ¹² Na' da' nga nona' mandadw gonle, gaque lježle tole yetole can' chacda' neda' le'e. ¹³ Nono zoa bene' chaquech lježe' ca bene' chzanlaže' cuine' gate' neche bene' migw che'. Na' can' chona' neda'. ¹⁴ Na' le'e nacle migw chia' še chonle con can' nona' mandadw. ¹⁵ Na' bich žia' nacle bene' güen žin chia', le to bene' güen žin bi nezde' yogo' da' chon xanen', san žia' nacle migw chia'. Le yogo'lol da' ba benda' gwna Xan' ba bzejni'idan' le'e. ¹⁶ Gague le'e gwlejle neda' naca' Xanle. Neda' gwleja' le'e cont chejni-laže'le neda'. Na' chsela' le'e cont šjenle can' chazlaže' Xan', na' gague da' te che da' ca' gonlen'. Na' yogo'lol da' nabele Xan' gone' lagüe da' chejni-laže'le neda', gonczen'. ¹⁷ Da' nga da' chona' mandadw gonle, gaque lježle tole yetole.

Bene' bi chesejni-laže' Diosen' chesegue'ede' bene' chosozenag che Jesúsen'

¹⁸ 'Še bene' bi chesejni-laže' Diosen' chesegue'ede' le'e, le gon xbab ba chesegue'eczedede' neda' cate' za' yesegue'ede' le'e. ¹⁹ Ša nacle txen len bene' ca' bi chesejni-laže' Diosen', nachen' yesacde' le'e can' chesaque' bene' lježen' šaca'. Perw ba gwleja' le'e cont chzenagle chia'. Da'nan' chesegue'ede' le'e da' bi nacle legaque' txen. ²⁰ Le šjasa'laže' dan' gwnia' le'e: "Note'teze mos bi naque' blaoch ca xanen'." Bosoči bososaca' bene' neda', na' lecz ca' yesonde' le'e. Na' balze bene' bosozenague' xtižan', lecze balze' yosozenague' xtiža'len'. ²¹ Na' da' bi zjanombi'e Diosen' ben' gwsela' neda', da'nan' yesonde' le'e yogo' da' ca', le chesegue'ede' le'e da' chzenagle chia'.

²² 'Ša neda' bi bedezejni'ida' legaque', bi zjanape' doła' da' chesegue'ede' neda' šaca'. Perw na'a bibi de da' yosode'ede' yesene' bi zjanape' doła'. ²³ Bene' chgue'ede' neda' lente Xan' chgue'ede'. ²⁴ Ba bena' yela' guac da' nono nochle na' gon, na' šaca' bi besele'eden' bi zjanape' doła' da' chesegue'ede' neda'. Perw ba besele'ede' da' ca' na' bia'cze chesegue'ede' neda' len Xan'. ²⁵ Na' chac can' nyoj Xtiža' Diosen' dan' chososedede' gan' žan: "Besegue'ede' neda' la'czla' bibi da' mal bena'."

²⁶ 'Ba gwnia' le'e sela' Spiritw che Xa' Diosen' gaclenen le'e. Spiriton' san' gan' zoa Xan' na' gwzejni'in le'e diža' li chia' neda'. ²⁷ Na' lecz ca' le'e cheyala' güe'le xtižan', le ba gwzoale len neda' šlac ba gwduxjue'eda' xtiža' Xa' Diosen'.

16

¹ 'Ba gwnia' le'e yogo' da' ca' cont bi gacžejlaže'le. ² Le yesyebeje' le'e lo' yodao' chegaque' ca', na' gwžin ža cate' note'tez bene' yesote' le'e yesacde' chebe Diosen' dan' chesonen'. ³ Yesonde' le'e yogo' da' ca' le bi zjanombi'e Xan' neca neda'. ⁴ Žia le'e da' quinga cont cate' žin ža gac can' gwnian' nach šjaze'ele.

Da' chon Spiritw che Diosen'

'Bi gwnia' le'e yogo' da' ca' gac chele cate' za' gwzolao bzejni'ida' le'e xtiža' Diosen', le ne' zoacza' chaclena' le'e. ⁵ San na'a yeya'a gan' zoa Xan' ben' gwseła' neda', na' ne' tole bi chnabele neda' gan' yeya'a. ⁶ Na' ba chacyaše'le dan' ba gwnia' yeya'a. ⁷ Perw da' li napen le'e cuent yeya'a, le še bi yeya'a, Spiritw che Xa' Diosen' dan' gaclenen le'e bi yedesoan lo' yichjlažda'olen'. Na' yeya'a nach sełan' len le'e. ⁸ Na' cate' yid Spiriton' gwzejni'in beñachen' zjanape' doła', na' gwzejni'in non' nac bene' güen len Diosen', na' gwzejni'in gata' castigw toli tocañe che bene' bi chosozenague' chia'. ⁹ Spiriton' gwzejni'in legaque' zjanape' doła' da' bi chesejnilaže' neda'. ¹⁰ Na' gwzejni'in legaque' non' nac bene' güen len Diosen', le yeya'a gan' zoa Xa' Diosen' na' le'e bich le'ele neda'. ¹¹ Na' gwzejni'in legaque' gata' castigw che xtolagaquen' toli tocañe, le Satanás dan' chnabia' da' xigüe' ca' na' dan' chnabia'te bene' ca' bi chesejnilaže' Diosen' ba nchoglaon chen gwnežjw Diosen' castigw chen toli tocañe.

¹² 'Ne' dech da' zan da' nia' le'e, perw naquen zdebe šejni'ilen na'a. ¹³ San cate' yedesoa Spiritw che Diosen' lo' lažda'olen' cont gwzejni'in le'e da' nac da' li, len gwsed gwlo'en le'e yogo' da' cheyala' nezele chia', le Spiriton' chñen diža' li. Bi güe'en diža' to gualazen, san güe'en bite'tez diža' da' chzene Xan' len, na' chixjue'en le'e bica' da' za' za'ac. ¹⁴ Spiriton' gonen cont gwlo'elaon naca' bene' zaca' juisyw, le gwzejni'in le'e xtiža'. ¹⁵ Xan' ba bene' cont nezda' yogo' da' neze le', na' da'nan' gwnia' Spiriton' chixjue'en le'e xtižan'.

Jesúsen' gwne' šložze yesacyaše'de' na' techle yesyebede'

¹⁶ Šlož bi le'ele neda', na' te yešlož na' yezle'ele neda' da' yoble, le yeya'a gan' zoa Xan'.

¹⁷ Na' bale bene' ca' zjanaque' Jesúsen' txen gose' lježe':

—¿Bi zejen dan' che'e chio' te yešlož na' bich le'echone' na' techle lecze yešlož na' yezle'echone' da' yoble? Na' ¿bi zejen dan' že' yeyeje' gan' zoa Xan'? ¹⁸ ¿Bi zejen dan' že' yešlož? Bi chejni'icho bin' že'.

¹⁹ Jesúsen' gocbe'ede' chesaclaže' yesenabde'ne' bi zejen, na' gože' legaque':

—¿Ba chñabe lježle bi zejen dan' gwnia': "Yešlož na' bich le'ele neda' na' techle lecze yešlož na' yezle'ele neda' da' yoble"? ²⁰ Da' li chnia' le'e ba zoa cuežle na' yegüine'le šlac bene' ca' bi chesejnilaže' Diosen' yesyebede'. Yeyaše'laže'le, perw šložzen' na' techle yebele. ²¹ Cate' chzan no'olen' chžaglagüe' šlac chaque' bes che yela' sanña'. Na' cate' ba golje bda'ona' bich chone' xbab che dan' bžaglagüen', le chbede' ba golje yeto beñach yežlio nga. ²² Lecze ca' le'e ba chacyaše'le na'a, perw cate' yežagcho da' yoble soachle mbalaz na' nono gac yeca'a yela' chebe chelen' lo' yichjlažda'olen'.

²³ 'Na' cate' ba bžin ža šjayzoa' da' yoble gan' zoa Xan', cana'ch bich yažjele bi nabele gwzejni'ida' le'e. Da' li chnia' le'e, da' chejnilaže'le neda' bite'tez da' nabele Xan', gonczen' le'e. ²⁴ Ža na'aža bibi na' nabele Xan' ye'ln'e' chñablen da' chejnilaže'le neda'. Na' na'a le nabe Xan' bi da' nabelene' ye'ln'e' ca', na' gone' can' nabelenen' cont soale mbalaz juisyw.

Criston' ba bene' cont yenit yela' chnabia' che gwxiyen'

²⁵ 'Da' zan ba gwnia' le'e len jempl. Gwžin ža cate' bich gwzejni'ida' le'e len jempl, san gua'a diža' da' šejni'ile cate' gwzejni'ida' le'e che Xan'. ²⁶ Na' cate' ba bžin žana', cana'ch nabele Xan' bi da' nabelene' ye'ln'e' chñablen da' chejnilaže'le neda'. Na' bi yažjen nabda' Xan' gaclene' le'e. ²⁷ Le cuincze Xan' chacde' le'e dan' chaquele neda' na' chejle'le gwsele' neda'. ²⁸ Gan' zoa Xa' Diosen' gwza'a na' ba bida' yežlio nga. Na' na'a yeza' yežlio nga na' yeya'a gan' zoa Xan'.

²⁹ Nach gose'ene':

—Bač cho'o diža' da' chejni'ito' na' bi cho'o jemplw. ³⁰ Ba chache'eto' nombi'o yogo' xbab che beñačen'. Ba nezedo' bi chesaclaže' bene' yesenezde' cate' bina' yesenaben'. Da'nana' bač chejle'to' zao' gan' zoa Diosen'.

³¹ Na' gož Jesúsen' legaque':

—¿Ba chejle'le na'a? ³² Ba bžin ža na' na'a ba gole' gaslasle. To tole ca'a xnez che chele na' gwcua'anle toza'. Perw bi zoa' toza', le zoa Xan' len neda'. ³³ Ba gwnia' le'e ca' cont soa cuezle binlo len xbab chele, le chejnilaže'lenda'. Yežlio nga saca'zi'le, perw bi gacžejlaže'le, neda' ba bena' cont yenit yela' chnabia' che gwxiyen' dan' zoa na'a chnabian' yežlio nga.

17

Jesúsen' gwnabde' Diosen' gaclene' bene' ca' zjanaque' le' txen

¹ Beyož gwna Jesúsen' da' ca' nach gwne'e yabale na' gwne':

—Xa', ba bžin hor gac chia' dan' ba bžio' bia' gac. Ben cont nacbia' nedan' Xi'ino' naca' bene' zaca' juisyw cont neda' gona' ga gacbia' le' naco' bene' zaca' juisyw. ² Ba beño' neda' yela' chnabia' lao yogo' beñač cont chnežjua' yela' mban toli tocañe che yogo' bene' ca' ba gwlejo' chesejnilaže' neda'. ³ Na' bene' ca' zjanape' yela' mban toli tocañe zjanombi'e le', le tozon' zaco' gonxento', na' lecze zjanombi'e neda' Jesucristw bene' gwseło'.

⁴ Lo yežlion' ba bena' cont nacbia' naco' bene' zaca' juisyw, le ba beyož bena' yogo'lol da' gwlo'o lo na' gona'. ⁵ Na' na'a Xa', ben cont la'laon naca' bene' zaca' juisyw cate' yela'a gan' zon', doxen can' blo'elaon cate' gwzoa' len le' cate' za' xete yežlion'.

⁶ Ba gwlejo' bal beñač chesejnilaže' neda', na' bač blo'eda' legaque' can' naco' na' can' chonon'. Zjanaque' xi'ino' na' beno' cont chesejnilaže' neda' na' chesone' can' žon'. ⁷ Na' ba zanezde' yogolol da' chona' na' yogo' diža' da' choa' zjanaquen chio' le'. ⁸ Le ba be'lena' legaque' diža' dan' ba bzejni'ido' neda' na' ba bosozenague' chen, na' ba chesacbe'ede' da' li gwza'a gan' zon', na' chesejle'e le len' gwseło' neda'.

⁹ Chnaba' gacleno' legaque'. Bi chnaba' gacleno' yogo' beñač, san gacleno' bene' ca' gwlejo' chesejnilaže'nda' le ba zjanaque' lo nao'. ¹⁰ Na' yogo' bene' chesejnilaže' neda' lecze chesejnilaže' le'. Na' ca'cze naquen, note'tez bene' zjanaque' xi'ino' lecz zjanaque' xi'ina', na' bene' ca' chesejnilaže'nda' chosolo'e naca' bene' zaca' juisyw.

¹¹ Na' na'a bich soa' yežlio nga, perw bene' quinga chesejnilaže' neda' nita'cze' yežlio nga, na' neda' ba zeza' gan' zo'na'. Xa', naco' la'zelagüe bene' laždao' xilaže', na' chnaba' gwchino' yela' chnabia' chio' cont gwcuas gwcuizo' da' malen' len legaque' cont nita'cze' yesaque' toze len lježgaque', ca chio' naccho toze. ¹² Šlac ba gwzoa len legaque', neda' ba bchina' yela' chnabia' chion' cont bcuas bcuiža' da' malen' len legaque'. Da'nana' ne toe' bi gwžiayi', con toz ben' ba naquen cuiaye'e cont gac doxen can' ža Xtižo' dan' nyojen.

¹³ Na' na'a ba zeza' gan' zon', na' šlac ne' zoa' yežlio nga cho'a diža' quinga cont bene' qui nita'chgüe' mbalaz ca mbalazen' zoa' neda'. ¹⁴ Neda' ba be'lena' legaque' xtižon', na' bene' ca' bi chesejnilaže' le' chesegue'ede' legaque' dan' bi chesone' txen len legaque', ca' neda' bi naca' txen len bene' ca' bi chesejnilaže' le'. ¹⁵ Na' ca' nac bene' ca' chesejnilaže' neda', bi chnaba' yeca'o legaque' lo' yežlio nga, san chnaba' gacleno'ne' cont Satanás dan' chnabia' da' xigüe' ca' bi siye'en legaque'. ¹⁶ Legaque' bi zjanaque' txen len bene' bi chesejnilaže' le', ca neda' bi naca' txen len bene' bi chesejnilaže' le'. ¹⁷ Ben cont bene' ca' chesejnilaže' neda' yesaclaže' yesone' con da' žo', le ba zjanombi'e diža' li chio'. Yogo' da' ba bzejni'ido' legaque' naquen da' li. ¹⁸ Len' gwseło'

neda' yežlion' cont ba bia' xtižon', na' lecze ca' chsela' legaque' yeso'e xtižan'.
 19 Chzanlaže' cuina' chona' con da' žo' le' cont yesaclaže' yesone' con can' žo' da' zjanombi'e diža' li chion'.

20 'Na' bi chnaba' gacleno' legacze', san lecze gacleno' bene' ca' yesejnilaže' neda' cate' yesende' diža' dan' yesoe' bene' quinga. 21 Xa', ben cont yogo'lole' yesaque' toze len lježgaque' na' yesaque' txen len chio', ca le' naco' toze len neda' na' neda' naca' toze len le'. Ben cont yeyož yesaque' toze len chio' na' len lježgaque' cont bene' ca' bi chesejnilaže' le' yesache'ede' len' gwselo' neda'. 22 Na' yela' bala'an' dan' nono' neda' ba bnežjuan' legaque' cont zjanaque' toze len bene' lježe' ca chio' naccho toze. 23 Legaque' zjanaque' txen len neda' na' neda' naca' txen len le' cont yogo'cho gaccho toze. Gaccho toze cont bene' ca' bi chesejnilaže' le' yesache'ede' len' gwselo' neda' na' yesache'ede' chacdo' bene' ca' can' chacdo' neda'.

24 Xa', chacdo' neda' cate' bina' xe yežlio nga na' nono' neda' bene' zaca' juisyw. Na' chaclaža' bene' quinga gwlejo' chesejnilaže' neda' yedyesenite' len neda' gan' yedyesoan' cont yesele'ede' naca' bene' zaca' juisyw. 25 Xa', naco' la'zelagüe bene' chon da' zej to licha. Na' ca nac bene' ca' bi chesejnilaže'nda', lecze bi zjanombi'e le', perw neda' nombi'a le', na' bene' ca' ba gwlejo' cont chesejnilaže' neda' zjanезде' len' gwselo' neda'. 26 Na' ba bzejni'ida' legaque' can' nacon' na' can' chonon', na' za' gwzejni'ichda' legaque', cont yesache'ede' chacdo' legaque' can' chacdo' neda', na' cont neda' soacza' len legaque'.

18

Judasen' bdie' Jesús'en' lo na' soldadw ca'

(Mt. 26:47-56; Mr. 14:43-50; Lc. 22:47-53)

1 Beyož gwna Jesús'en' da' ca', gwza'lene' bene' ca' zjanaque' le' txen ja'aque' šla'a Yegw Cedrón gan' gota' to le'ej ga goseze zan yag olivos. Na' goso'e lo' le'ejen'. 2 Na' Judasen' ben' ba naquen gone' Jesús'en' lo na' bene' ca' chesegue'ede' le' lecze nombi'e latjen', le zan ni'a Jesús'en' len bene' ca' zjanaque' le' txen ba besedobe' na'. 3 Ca' goquen' bžin Judasen' na' nche'e xonj soldadw na' yexonj bene' chesape' yodao' blaon' bene' gosesela' bxož gwnabia' ca' na' bene' fariseo ca' cont yesezene' Jesús'en'. Zjanxobe' no lintern na' zjanoxe' no yi' yech na' zjana'le' spada. 4 Jesús'en' ba nezde' yogo'lol' da' za' gac che', na' bchoje' jašague' legaque' na' gwne':

—¿Non' cheyljwle?

5 Na' gose'ene':

—Cheyljwto' Jesús bene' Nazaret.

Na' gož Jesús'en' legaque':

—Nedan'.

Na' Judasen' ben' ba naquen gone' Jesús'en' lo na'gaquen' zelene' legaque'.

6 Cate' Jesús'en' gože' legaque': "Nedan", la' besyebiga'te' cosxanle na' jasechaze' lo yon'. 7 Na' da' yoble Jesús'en' gože' legaque':

—¿Non' cheyljwle?

Na' legaque' gose'ene':

—Cheyljwto' Jesús bene' Nazaret.

8 Na' Jesús'en' gwne':

—Ba gwnia' nedan'. Na' še nedan' cheyljwle, le güe' latje šjaya'ac bene' quinga.

9 Gwne' ca' cont goc can' ba gwdixjue'ede' caten' gwne': "Ne to bene' ca' ba gwlej Diosen' chesejnilaže' neda' bi yesebiaye'e." 10 Na' Simón Pedron' no'e to

spada na' goljen' gwdinen' mos che bꝛoz blaon' gwꝓhogtechgüe' nague' licha. Na' mosen' le' Malco. ¹¹ Na' Jesúsen' gože' Pedron':

—Bego'o spada ꝓion' lo' ližen'. ¿Chacdo' bi cheyała' gac da' ba nžia bia' Xa' Diosen' gac ꝓhia'?

Goseꝓe' Jesúsen' lao ben' le' Anás

(Mt. 26:57-58; Mr. 14:53-54; Lc. 22:54)

¹² Nach soldadw ca' len xanguaque' na' len bene' chesape' yodao' blao che nación Israel ꝓeton' gosezene' Jesúsen' na' bosoꝓeje'ne'. ¹³ Na' goseꝓe'ene' da' nechw lao Anás ben' naque' xta'obi'in che Caifás. Na' Caifásen' goque' bꝛoz blao che nación Israel ꝓeton' lo' izen'. ¹⁴ Na' Caifásna' ben' gože' bene' gwnabia' ꝓeton' napen legaque' cuent toz ben' gat cllel ca cuiayi' yogüe'.

Pedron' bi gwꝓebe' naque' Jesúsen' txen

(Mt. 26:69-70; Mr. 14:66-68; Lc. 22:55-57)

¹⁵ Simón Pedron' len yeto bene' naque' Jesúsen' txen gosa'ogüe'ne'. Na' nombia' ben' nac bꝛoz blao ben' yeto. Da'nan' goc gwyo'e len Jesúsen' chyo'o che bꝛoz blaon'. ¹⁶ Na' Pedron' bega'ane' do cho'a puerten'. Nach ben' yeto, da' nombia' bꝛoz blaon' le', gwyeje' na' be'lene' diža' bi' no'olen' chap cho'a puerten' cont gwlo'obe' Pedron'. ¹⁷ Nach bi' no'olen' chape cho'a puerten' gožbe' Pedron':

—¿Gague leno' le' chzenago' dan' chsed chlo'e benga?

Na' Pedron' gwne':

—Bi lena' neda'.

¹⁸ Bene' güen žin ca' na' bene' ca' chesape' yodao' blaon' ba gosebeque' to yi' ya'alj, le chac zag, na' zjazeche' cho'a yin' cont chesyže'ede'. Na' Pedron' ze' len legaque' cho'a yin' cheže'ede'.

Gosenabde' Jesúsen' che dan' chsed chlo'eden'

(Mt. 26:59-66; Mr. 14:55-64; Lc. 22:66-71)

¹⁹ Na' ben' nac bꝛoz blaon' gwꝓabde' Jesúsen' che bene' ca' chosozenag che dan' chsed chlo'eden' na' che da' ca' chzejni'iden'. ²⁰ Na' Jesúsen' gože'ne':

—Ba bi'a diža' doxen latje lagüe. Zan ni'a bsd blo'eda' lo' yodao' ꝓecho ca' na' chyo'o yodao' blaon' gan' chesežag yogo' bene' gualaž ꝓechon'. Bibi diža' gwnia' bagaše'ze. ²¹ ¿Bixꝓen' chꝓabdo' neda'? Gwꝓabe bene' ca' gosende' dan' bsd blo'edan'. Legaque' zjanezde' bi dižan' bia'.

²² Beyož gwna Jesúsen' ca', to ben' chape yodao' blaon' zie' na', na' gwꝓape' xaguen', gože'ne':

—¿Ca' choži'o xtiža' ben' nac bꝛoz blaon'?

²³ Jesúsen' gwne':

—Še bi da' mal ba gwnia', be' diža' che bi da' malen' ba gwnia', na' še gwnia' güen, ¿bixꝓen' chgapo' neda'?

²⁴ Nach Anásen' bdie' Jesúsen' ncheje' lao Caifásen' ben' nac bꝛoz blaon'.

Da' yoble Pedron' bi gwꝓebe' še naque' txen len Jesúsen'

(Mt. 26:71-75; Mr. 14:69-72; Lc. 22:58-62)

²⁵ Na' Pedron' zie' cho'a yin' cont cheže'ede' na' bene' ca' nita'na' gose'ene':

—¿Gague lenczo' len' chzenago' dan' chsed chlo'e benga?

Na' bi gwꝓebe', gwne':

—Bi lena' neda'.

²⁶ To xmos bꝛoz blaon' naque' biše' ljež ben' gwꝓog Pedron' naguen', na' le' gože' Pedron':

—¿Gague ble'eda' le' len Jesúsen' lo' le'ej gan' ze yag olivos?

²⁷ Na' Pedron' da' yoble bi gwꝓebe', na' la' gwꝓežte to jea.

*Goseche'e Jesúsen' lao Pilaton'**Mr. 27:1-2, 11-14; Mr. 15:1-5; Lc. 23:1-5)*

²⁸ Na' do cheni'las bene' gwnabia' ca' gosebeje' Jesúsen' gan' zoa Caifásen' na' goseche'ene' gan' zoa gobernador Pilato ben' chon yela' justis. Na' legaque' bi goso'e len Jesúsen' yo'o gan' zoa Pilaton', le can' nac costumbr cheton' bi chac yesagüe' xše' lni pascon' še yeso'e gan' že' bene' bi zjanac bene' Israel.

²⁹ Da'nán' Pilaton' bchoje' na' gože' legaque':

—¿Bi ben benga? ¿Bi xya chagwle che'?

³⁰ Na' bene' gwnabia' ca' gosene':

—Šaca' benga bi naque' bene' güen da' xinj bi bdeto'ne' lo naon'.

³¹ Na' gož Pilaton' legaque':

—Le yeche'e, na' le gon yela' justis che' can' ža ley chelen'.

Nach bene' gwnabia' che nación Israel cheton' gose'ene':

—Bi de lsens gotto' bene'.

³² Da' gosone' ca' goc can' gwna Jesúsen' caten' bzejni'ide' nac yesone' yesote'ne'. ³³ Nach Pilaton' beyo'e yo'ona' na' goxe' Jesúsen' na' gože'ne':

—¿Naco' le' Rey che bene' Israel ca'?

³⁴ Jesúsen' gože'ne':

—¿Con da' goljlažon' chnabo', še bene' yoble gose'e le' ca'?

³⁵ Pilaton' gože'ne':

—¿Chacdo' naca' neda' bene' Israel? Bene' Israel gualaž chio' na' bxož gwnabia' chele ca' bosodie' le' lo na' nga. ¿Bi da' xinj benon'?

³⁶ Jesúsen' gože'ne':

—Yela' chnabia' chia' nža'le naquen len yela' chnabia' che bene' chesenabi'e yežlio nga. Šaca' yela' chnabia' chia' naquen che yežlio nga na' šaca' nabi'a nación ca' že' yežlio nga, bene' ca' chosozenag chian' gosedile' cont bi goca' lo na' bene' gwnabia' che nación Israel cheton' šaca'. Perw yela' chnabia' chian' bi naquen che yežlio nga.

³⁷ Nach Pilaton' gože'ne':

—¿Na' len' naco' rey še ca'?

Na' gwna Jesúsen':

—Da' li can' žon', naca' rey na' ba bida' yežlio nga cont gwzejni'ida' benachen' diža' li na' yogo' bene' chesone' txen len diža' li chosozenague' chia'.

³⁸ Nach gož Pilaton' le':

—¿Bi dan' diža' li?

*Gosechoglagüen' yesote' Jesúsen'**(Mt. 27:15-31; Mr. 15:6-20; Lc. 23:13-25)*

Beyož gwna Pilaton' ca' na' bezchoje' yeto ši'i gan' že' bene' gwnabia' che nación Israel cheton' na' gože' legaque':

—Bibi nla'lagüe še bi da' xinj non benga. ³⁹ Perw na' de costumbr chele gwsana' to bene' de ližya lo lni pascon'. ¿Chaclaže'le gwsana' benga naque' Rey che le'e bene' Israel?

⁴⁰ Nach bososye'e gosene':

—Bi gwsano' bena'. Barrabás na' gwsano'.

Na' Barrabásen' naque' to bene' gwban.

19

¹ Nach Pilaton' bene' mandadw goseyine' Jesúsen'. ² Na' soldadw ca' gosone' to corona de xis yeše' na' bosozoen' yichj Jesúsen' na' bosoguacue'ne' to lache' moradw ca' da' chosochin no rey. ³ Nach gosonle' che', gosene':

—¡Viva Rey che bene' Israel!

Na' gosegapa'chgüe' xague'.

⁴ Nach Pilaton' bchoje' da' yoble na' gože' bene' gualaž cheto' ca' že' na':

—Cueja'ne' da' yoble cont nezele bibi da' xinj chželda' še bi da' none'.

⁵ Na' bechoj Jesúsen' chyo'ona', na' zoa corona de xis yešen' yichje' na' ne' nyaze' lache' moradon'. Na' Pilaton' gože' legaque':

—Le na', nga ze ben'.

⁶ Na' b̄xoz gwnabia' ca' na' bene' chesape' yodao' blaon' cate' besele'ede' Jesúsen' na' bososye'e zan ni'a gosene':

—¡Bde'e le'e yag cruz! ¡Bde'e le'e yag cruz!

Nach Pilaton' gože' legaque':

—Le'e le che'e na' le gwde'e le'e yag cruzen', le neda' bibi da' xinj cheželda' še bin' none'.

⁷ Na' bene' gwnabia' ca' che nación Israel cheton' gose'e le':

—De to ley cheto' da' žan cheyala' gate' da' že' naque' Xi'in Dios, le con to benachzen' naque'.

⁸ Ba chžeb Pilaton' can' ba chaquen', na' cate' bende' xtiža'gaquen' bžebche'.

⁹ Na' beyo'e yo'o gan' zoe' da' yoble, nche'e Jesúsen', na' gože' Jesúsen':

—¿Ga bene' le'?

Na' Jesúsen' bi boži'e xtižen'.

¹⁰ Nach Pilaton' gože'ne':

—¿Bi choži'o xtižan'? ¿Bi neздо' napa' yela' chnabia' cont gwsana' le' na' napa' yela' chnabia' cont chogbi'an yosode'e le' le'e yag cruz?

¹¹ Jesúsen' gože'ne':

—Bibi yela' gwnabia' napo' šaca' Diosen' bi nonen' le'. Da'nan' bene' bdie' neda' lo naon' napche' dola' ca le'.

¹² Nach Pilaton' beyiljwlaže' nacle gone' gwsane' Jesúsen'. Perw bene' gwnabia' che nación cheton' bososye'e gosene':

—Še gwsano' benga, contr rey che nación Roman' chono' še ca', le note'tez bene' že' naque' rey chone' contr rey César.

¹³ Nach Pilaton', beyož bende' xtiža'gaquen', gwleje' Jesúsen' chyo'ona' na' lecze bchoj le' na' gwchi'e gan' chone' yela' justisen', to latje da' nzi' Gan' Nagw Yej, na' diža' hebreo nzin' Gabata. ¹⁴ Do guagwbiž ža cate' za' solao l̄ni pascon' Pilaton' gože' bene' gwnabia' cheto' ca':

—Le na', nga zoa rey chelen'.

¹⁵ Nach da' yoble gosezolagüe' bososye'e gosene':

—¡Cheyala' gate'! ¡Bde'e le'e yag cruz!

Nach Pilaton' gože' legaque':

—¿Rey chele nga gona' mandadw yosode'e le'e yag cruz?

Nach b̄xoz gwnabia' ca' gose'ene':

—Gague rey cheto' benga. Toze César naque' rey cheto'.

¹⁶ Nach Pilaton' bdie' Jesúsen' lo na'gaque' cont te'e le'e yag cruzen'. Nach gosa'aque' Jerusalénna' goseche'e Jesúsen' cho'a ciudan'.

Bosode'e Jesúsen' le'e yag cruz

(Mt. 27:32-44; Mr. 15:21-32; Lc. 23:26-43)

¹⁷ Na' Jesúsen' zeje' no'e yag cruz chen' na' besežine' to latje nzi' Latje che Žit Yichj Bene' Guat, na' diža' hebreo nzin' Gólgota. ¹⁸ Na' soldadw che gobernadores' bosode'ene' le'e yag cruzen', na' lecze bosode'e yečhope bene' le'e yečhope yag cruz cuiten' na' Jesúsen' gwyo'e gachol bene' ca' čhope'. ¹⁹ Na' gobernador Pilaton' bene' mandadw byoj diža' da' gwda' yichj yag cruz che Jesúsen'. Na' bosozojen' žan: “Jesús bene' Nazaret, Rey che bene' Israel”.

²⁰ Bosozojen' diža' hebreo, diža' griego na' diža' latín. Na' zan bene' Israel

gualaž cheto' bosolaben', le gan' gwda' Jesúsen' le'e yag cruzen' naquen gala'ze ciuda Jerusalénna'. ²¹ Nach b̄xoz gwnabia' ca' na' yezica'chle bene' gwnabia' che nación Israel cheton' gose'e Pilaton':

—Bi gwzojo' “Rey che bene' Israel”, san bzoj: “Le' gwne' naque' rey che bene' Israel.”

²² Na' Pilaton' gwne':

—Da' bena' mandadw bosozoje', ba nyojenna'.

²³ Nach soldadw ca', beyož bosode'e Jesúsen' le'e yag cruzen', goseque'e xalana' Jesúsen' na' besyele'en gosebejen' tap cuenle na' tgüejen gosezi' to toe'. Na' lecze goseque'e yeto xe' da' naquen to güelize, na' bibi dia chen de. ²⁴ Na' gose' lježe':

—Bi gwzoxjchon san gonchon rifa cont nezecho no yechelen.

Na' dan' gosone' ca' goc can' nyoj Xtiža' Diosen', žan: “Besyele'e xalanan' legacze', na' gosone' rifa lache' dan' chazan'.”

²⁵ Na' do gala'ze yag cruz che Jesúsen' zecha Marían' ben' nac xna' Jesúsen' na' bene' bile xne'ena', na' María bene' naque' no'ol che Cleofas na' María bene' naque' bene' Magdala. ²⁶ Na' cate' Jesúsen' ble'ede' zecha xne'en gala'ze len to bene' naque' le' txen, bene' chaquechgüe Jesúsen' le', nach gože'ne':

—Bena' gaque' ca xi'ino'.

²⁷ Nach gože' bena':

—Bži'ilaže' xna' nga ca xnao'.

Na' žana' gwque'ene' bene'ne' ca bene' lo' yo'o.

Can' goc caten' got Jesúsen'

(Mt. 27:45-66; Mr. 15:33-41; Lc. 23:44-49)

²⁸ Gwde na' Jesúsen' ba neзде' bač goc yogo' da' cheyala' gac. Nach cont goc can' ža yelate' Xtiža' Diosen' da' nyojen gwne':

—Chbilda' nis.

²⁹ Na' de late' vino zichj da' yože' to lo' xguag dao'. Na' to bene' bzaže'de' vino zichjen' to esponja bzoen' to lo' xis da' že' hisopo na' gwłisen' blapen' cho'a Jesúsen'. ³⁰ Na' beyož gwxop Jesúsen' vinon' na' gwne':

—Bač goc yogo'lol da' cheyala' gac.

Nach bcheque' yichjen' gote'.

To soldadw godoe' lanza cuit le'e Jesúsen'

³¹ Na' yeteyo gaquen ža che Dios na' ža lni xen, da'nan' bene' gwnabia' che nación cheton' jaseñabde' Pilaton' gone' mandadw yeseyišjw soldadw che' ca' ni'a bene' ca' zjada' le'e yag cruzen' cont yob yesate' na' yesyeque'e legaque' le'e yag cruz ca', le bi gosaclaže' yeseda'ch bene' ca' le'e yag cruzen' ža che Dios. ³² Nach soldadw ca' ja'aque' jasedišjue' chope la'a ni'a ben' gwda' šla'a cuit Jesúsen'. Na' lecze ca' gosone' len ben' gwda' le'e yag cruzen' cuiten' yešla'a. ³³ Na' cate' besežine' gan' da' Jesúsen', besele'ede' ba gote' na' bich goseyišjue' ni'e ca'.

³⁴ Perw to soldadon' godoe' lanza cuit le'e Jesúsen', na' la' bchojten chen len nis. ³⁵ Neda' ble'eda' can' goquen' na' nezda' cho'a diža' li. Na' cho'a diža' li can' goquen' cont lencze le'e šejle'le. ³⁶ Na' goc da' ca' len Jesúsen' cont goc can' ža Xtiža' Diosen' da' nyoj che', žan: “Ne to žit yo'e bi yeseyišjue'.” ³⁷ Na' yeto da' žan: “Yesene'e ben' ba bosožie' güe'.”

Bosocuaše' Jesúsen'

(Mt. 27:57-61; Mr. 15:42-47; Lc. 23:50-56)

³⁸ Beyož goc yogo' da' ca', José bene' nac bene' ciuda Arimatea jañabde' Pilaton' gwnežjue' lsens yeque'e cuerp che Jesúsen'. Na' Pilaton' be'e lsens.

Nach Josén' gwyeje' na' beque'e cuerp che Jesúsén'. Josén' ba chejnilaže' Jesúsén' perw chejnilaže'ne' bagaše'ze da' chžebe' bene' gwnabia' cheto' ca'.
³⁹ Na' len Josén' lecze gwyej Nicodemo ben' ba gwyej gan' zoa Jesúsén' šeže'le. Na' Nicodemon' no'e to da' chla' zix da' none' len yal dan' že' mirra, na' len to bište dan' že' aloes, ca do šona roben'.
⁴⁰ Nach bosyochele' cuerp che Jesúsén' to lache' xen na' len dan' chla' zixen', ca' chon neto' bene' Israel cate' chcuāše'to' bene' guat.
⁴¹ Na' gala'ze latje gan' bosode'e Jesúsén' le'e yag cruzen' gota' to le'ej ga goseze yag. Na' na' za' goseche'ene' to bloj cont yosochinen' ca to ba, na' nono bene' guat na' šo' lo'enña'.
⁴² Ža caten' got Jesúsén' naquen ža caten' chososini'e che ža che Diosen'. Na' da' chesacbyende' yosocuaše'ne', da'nan' jasele'e Jesúsén' lo' bloj coba', le naquen gala'ze.

20

Jesúsén' bebane' ladjo bene' guaten'

(Mt. 28:1-10; Mr. 16:1-8; Lc. 24:1-12)

¹ Na' bal dmigw María bene' Magdalan' gwyeje' cho'a blojen' gan' bosocuaše' Jesúsén' na' ble'ede' ba bga'a yejen' dan' bosode'e cho'a blojen'.
² Nach beza'sese' beyeje' gan' zoa Simón Pedron' len yeto bene' naque' Jesúsén' txen, na' gože' legaque':

—Ba besyebeje' Xanchon' lo' blojen' na' bi nezeto' ga besyeyo'ene'.

³ Nach Pedron' na' ben' yeto gosa'aque' ja'aque' cho'a blojen'.
⁴ Choptie' goseza'sese' perw ben' yeto gwza'sesche' ca Simón Pedron' na' byobech bžine' cho'enña' ca le'.
⁵ Na' bcheque' gwne'e lo'enña' na' ble'ede' lache' ca' zjachin' lo yo perw bi gwyo'e.
⁶ La' bla'te Simón Pedron' na' le' gwyo'e lo' blojen' na' lecze ble'ede' lache' ca' gan' zjachin'na'.
⁷ Na' bay dan' bosoguazje' yichjen' bi chin' gan' chi' lache' ca', san ndoben chin' šla'ale.
⁸ Nach lencze ben' yeto gwyo'e, le biña' šo'e la'czla' byobech bžine' cho'enña', na' ble'ede' can' naquen na' gwyejle'e.
⁹ Le biña' yesejni'ide' Xtiža' Diosen' da' nyojen žan cheyala' yebane' ladjo bene' guaten'.
¹⁰ Na' besyeya'aque' jaya'aque' yo'o gan' nite'na'.

María bene' Magdalan' ble'ede' mbancze Jesúsén'

(Mr. 16:9-11)

¹¹ Na' Marían' bega'ane' na' gwzeche' gala'ze cho'a blojen' chbeže'. Na' ne' chbežte' ca' bcheque' gwne'e lo' blojen'.
¹² Na' ble'ede' chope angl bene' zjanyaz lache' šiš zjachi'e lo' blojen', toe' chi' zej yichjle na' yetoe' chi' zej xni'ale gan' gota' cuerp che Jesúsén'.
¹³ Nach gose'e no'olen':

—¿Bixchen' chbežo' no'ole?

Na' boži'en gože' legaque':

—Ba besyeyo'e Xanan' na' bi nezda' gale jasesane'ne'.

¹⁴ Beyož gwna' Marían' ca' gwyechje' ble'ede' zecha Jesúsén' cožen', perw bi goebe'ede' še naque' le'.
¹⁵ Na' gož Jesúsén' le':

—¿Bixchen' chbežo', no'ole? ¿Non' cheyiljo'?

Marían' bene' xbab še ben' chape' yaguen' nach bol güiže' le', gože'ne':

—Bene', še len' beyo'one' ga yoble, gwna neda' gale jaysano'ne' cont yeyoa'ne'.

¹⁶ Jesúsén' gože'ne':

—¡María!

Na' Marían' gwyechje' da' yoble na' gože'ne':

—¡Raboni! —naquen to diža' hebreo na' zejen Maestrw.

¹⁷ Jesúsén' gože'ne':

—Bi goxo' neda', le biña' yeyepa' gan' zoa Xan'. Beyej len yezica'chle bene' ca' ba bosozenag xtižan' bene' ca' zjanaque' ca biše' zana', na' gožgaque'

yeyepa' gan' zoa Xan' ben' lecz naque Xale. Naque' Dios ben' chonxena' na' lecze naque' Dios ben' chonxenle.

¹⁸ Nach beza' María bene' Magdalan' na' jaydixjue'ede' yezica'chle bene' ca' chosozenag xtiža' Jesúsén' le ba ble'ede' Xanchon'.

Bene' ca' zjanaque' Jesúsén' txen besele'ede' mbancze'
(Mt. 28:16-20; Mr. 16:14-18; Lc. 24:36-49)

¹⁹ Na' cate' ba goc choł že' dmigon', bene' ca' zjanaque' Jesúsén' txen zjandop zjanžague' lo' yo'o na' zjanseyjwte' puert ca' da' besežebe' bene' gwnabia' che nación Israel cheton'. Nach Jesúsén' ble'e na' gwze' gachol legaque'. Na' gože' legaque':

—Le soa binlo len xbab da' yo'o lo' yichjlažda'ole.

²⁰ Beyož gwne' ca' na' blo'ede' legaque' taque' ca' na' cuit le'ena'. Na' besyebede' cate' besele'ede' le naque' Xanchon'. ²¹ Na' gozne' da' yoble:

—Le soa binlo len xbab da' yo'o lo' yichjlažda'olen'. Can' gwsela' Xan' neda' yežlio nga bia' xtižen', lecze ca' neda' chsela' le'e güe'le xtižan'.

²² Beyož gwne' ca' blobe' legaque' na' gože' legaque':

—Le si' Spiritw che Diosen'. ²³ Bene' ca' yesyetinje xtoła'gaquen', naple yela' chnabia' ye'lné' ba gwnitlaon, na' naple yela' chnabia' cont ye'le bene' bi yesyetinje xtoła'gaquen' bitw nitlaon.

Tomás ble'ede' mban Jesúsén'

²⁴ Na' Tomás ben' bososi'e Tomás Cuaš lene' len bene' šižiñw ca' ba goseda-lene' Jesúsén', na' bi gwzoe' cate' Jesúsén' bedyelo'elagüe' legaque' že' dmigon'.

²⁵ Na' bene' ca' yezica'chle gose'ene':

—Ba ble'eto' Xanchon'.

Na' Tomásén' gože' legaque':

—Bi šejli'a mbancze' še bi le'eda' yiž che claven' le'e taque' ca' na' gwzebe xbenan' gan' gwdebe clav ca' na' gwzebe na'an cuit le'en.

²⁶ Gozde' to xman zjanite' lo' yo'on da' yoble na' zoa Tomásén' len legaque'. Na' da' yoble nyeyjw puert ca', cate' bezla' Jesúsén' na' gozzeche' gachol legaque'. Na' gwne':

—Le soa binlo len xbab da' yo'o lo' yichjlažda'olen'.

²⁷ Nach gože' Tomásén':

—Gwna' lo' taca' quinga na' bzeben xbenon'. Na' bzebe naon' cuit li'a nga cont šejli'o. Na' bich gaco' bene' bi chejle', san šejli'o.

²⁸ Nach Tomásén' gože'ne':

—jXana' na' Dios chia'!

²⁹ Na' Jesúsén' gože' Tomásén':

—Tomás, ba chejli'o da' ba ble'edo' neda'. Mbalaz bene' ca' ba chesejle'e la'czla' biña' yesele'ede' neda'.

Da' quinga zjanyojen cont šejle'cho Jesúsén' naque' bene' gwsela' Dios

³⁰ Da' zan yela' guac ben Jesúsén' da' besele'e bene' ca' zjanaque' le' txen da' bi nyojen nga. ³¹ Perw zjanyoj da' quinga cont šejle'le Jesúsén' naque' Cristo ben' gwlej Diosen' cont nabi'e na' naque' Xi'in Dios, na' cont gata' yela' mban toli tocané chele da' chejnlaže'lene'.

21

Jesúsén' blo'elagüe' gaže bene' ca' zjanaque' le' txen

¹ Gwdechle yeto ža yoble Jesúsén' bozlo'elagüe' bene' ca' zjanaque' le' txen cho'a nisdao' da' nzi' Nisdao' Tiberias. Quinga goc: ² Txen nite' Simón Pedron' len Tomásén' ben' bososi'e Tomás Cuaš, na' Natanael bene' yež Caná gan'

mbane Galilean', na' chope xi'in Zebedeo na' yechope bene' ca' zjanaque' Jesúsen' txen. ³ Na' Simón Pedron' gože' legaque':

—Ša'a gw Xen beł da' yoble.

Na' gose'e le':

—Lecze sa' neto'.

Nach gosa'aque' ja'aque' cho'a nesdaon' na' goso'e to lo' barcw. Na' nocze no beł beseželde' že'na'. ⁴ Na' do ba zoa šeni' besele'ede' zecha Jesúsen' cho'a nesdaon', perw bi gosache'ede' še Jesús nan'. ⁵ Nach Jesúsen' gože' legaque':

—Bene' migw chia' ¿nono beł chdole'le'?

Na' gose'ene':

—Nono chdole'to'.

⁶ Nach gože' legaque':

—Le gwzala' yixjw beł chelen' cuit barcon' lichale na' senlba'.

Nach bosozala' yixjw beł chegaquen', na' tantw be zan besedola', bi gosoede' yosyocuen' lo' barcon'. ⁷ Nach ben' chaquechgüe Jesúsen' le', gože' Pedron':

—Xancho nan'.

Na' cate' gože' Simón Pedron' Xancho nan', la' beyacwte Pedroa' xalanen', le gague bi nyaze' cha'len' chone' žinna', na' la' bxite'te' lo' nisen' cont byob bežine' gan' zoa Jesúsen'. ⁸ Na' yezica'chle bene' ca' zja'aclene' barcw daon' zjanxobe' yixjw gan' že' beł ya'a ca'. Bi naquen zito' cho'a nesdaon', ca do yeto gayoa metrže. ⁹ Na' cate' besyežine' cho'a nesdaon' besele'ede' chi' yi' ya'alj na' xoa beł ya'a lagüenna' na' len yetextil. ¹⁰ Na' Jesúsen' gože' legaque':

—Le yeyoxe' ngale to chope beł ya'a ca' za' gw Xen le.

¹¹ Na' Simón Pedron' gwyeje' jaxi'e yixjw belen' gan' chi' barcon' na' bexoben' ga nac yo biž. Žen' to gayoa ši'ineyon beł xen, perw bi bcheza' yixjon' la'czla' be zan gwže' lo'enna'. ¹² Na' Jesúsen' gože' legaque':

—Le da gagwle xsil.

Na' ne toe' bi besyeyaxjde' ye'ene': “¿No le'?”; le ba gosache'ede' naque' Xancho'. ¹³ Jesúsen' gwbigue' na' gwxi'e yetextilen' na' bnežjue' che to toe' na' lecz ca' bene' len beł ya'an.

¹⁴ Da'na' goc da' gwyon ni'a blo'elao Jesúsen' bene' ca' zjanaque' le' txen gwde bebane' ladjo bene' guaten'.

Jesúsen' be'lene' Simón Pedron' diža'

¹⁵ Na' cate' besyedagüe', Jesúsen' gože' Simón Pedron':

—Simón xi'in Jonás, ¿chaquechdo' neda' clel can' chesaque bene' quinga neda'?

Pedron' boži'en gože'ne':

—Xana', nezdo' chacda' le'.

Jesúsen' gože'ne':

—Bsed blo'e bene' ca' za' gwzolao chesejnilaže' neda', bene' ca' zjanac ca me' xila' chia'.

¹⁶ Na' da' gwchop ni'a gože' le':

—Simón xi'in Jonás, ¿chacdo' neda'?

Na' da' yoble gwna Pedron':

—Xana', le' nezdo' chacda' le'.

Jesúsen' gože'ne':

—Bgüia gwña' bene' ca' chesejnilaže' neda', bene' ca' zjanac ca xila' chia'.

¹⁷ Da' gwyon ni'a gož Jesúsen' le':

—Simón xi'in Jonás, ¿chacdo' neda'?

Na' Pedron' gocyasē'de' dan' gož Jesúsen' le' ca' da' gwyon ni'a, na' gože' le':

—Xana, le' neze nle'edo' yogo'lo'. Nezdó' chacda' le'.

Jesúsen' gože' le':

—Bsed blo'e beñe' ca' chesejnilaže' neda', beñe' ca' zjanac ca xila' chia'. ¹⁸ Da' li chnia' le', cate' goco' beñe' güego', cuino' gwyaz xalanon' na' gwyejo' con ga žan chio'. Perw cate' gaco' beñe' gole, gwli naon' na' beñe' yoble chize' xalano' na' yeche'e le' ga bi chaclažo'.

¹⁹ Gože'ne' ca' cont gwnezde' can' gacxen Diozen' len da' gac che' cate' žin ža gate'. Na' gwde gwna Jesúsen' can' gac che Pedron' nach gože'ne':

—Con gwyejnilaže' neda' na' bzenag chia'.

Can' gwna Jesúsen' che ben' chacchgüede'

²⁰⁻²² Na' yeto beñe' naque' Jesúsen' txen na'ogüe' legaque'. Na' beyechj Pedron' na' ble'ede' le' na' gože' Jesúsen':

—Xana, ¿nac gac che benga?

Jesúsen' gože'ne':

—Še chaclaža' ne' zoacze' cate' yida' yeto ¿bin' chacžejlažo'? Con gwzoateze gwyejnilaže' neda' na' bzenag chia'.

Ben' gwne' ca' naque' ben' chaquechgüe Jesúsen' na' ben' gwche' cuit Jesúsen' txen cate' gosagüe' xše' žen' cate' za' gac Jesúsen' lo na' beñe' ca' chesegue'ede' le'. Na' cana' bena' gwñabde'ne': “Xana, ¿noxen' gwdie' le' lo na' beñe' ca?”

²³ Na' dan' gož Jesúsen' Pedron': “Še chaclaža' ne' zoacze' cate' yida' yeto ¿bin' chacžejlažo'?", da'nan' gwditj diža' len beñe' ca' chsejnilaže' Criston' gosene' bi gat bena'. Perw Jesúsen' gague gože'ne' bi gate', san gože'ne': “Še chaclaža' ne' zoacz benga cate' yida' yeto, ¿bin' chacžejlažo'?”

²⁴ Nedan' nezda' can' goc yogo' da' quinga na' da'nan' ba bia' diža' chegaquen na' ba bzojan'. Na' lecze le'e nezczele choa' diža' li.

²⁵ Na' da' zanch da' ben Jesúsen' da' bi zjanyojen, le ša zjanyoj yogon' tgüeje tgüejen, libr zan juisyw yesaquen še ca'.

Da' na'ze chzoja' na'a.

DA' GOSON POSTLW CA'

Jesúsen' gwne' sele' Spiritw che Diosen'

¹ Teófilo, ca nac dan' bzoja' da' nechw, bzoja' yogo'lol da' ben Jesúsen', na' lécze bzoja' yogo' dan' bsed blo'ede' cate' gwzolaote' bsed blo'ede' ² žinten cate' beyepe' yaba. Šlac bsed blo'ede' gwleje' postlw che' ca', na' Spiritw che Diosen' bzejni'in Criston', na' Criston' gože' legaque' nac yesone'. ³ Nach gwde gosot bene' mal ca' Jesúsen' na' gwde bebane' ladjo bene' guaten' nach jalo'elagüe' postlw che' ca'. Na' da' zan da' bene' cont gosenezde' mbanczen'. Na' gwдалene' legaque' choa ža na' bzejni'ide' legaque' can' chnabia' Diosen'.

⁴ Na' šlac ne' zoa Jesúsen' len postlw che' ca' gože' legaque' cbi yesyežaše' ciuda Jerusalénna'. Gwne':

—Le yega'an le cueze gac can' gwna Xa' Diosen' gac, ca dan' bzejni'ida' le'e. ⁵ Da' zaque' ben Juan da' bzoe' bene' nis, perw yeto chope ža da' zaca'ch gac chele dan' yedesoa Spiritw che Diosen' lo' yichjlažda'olen' nabi'an le'e.

Jesúsen' beyepe' yaban'

⁶ Na' ža na'teze šlac ne' zjandop zjanžague' len Jesúsen' gose'ene':

—Xanto' žba bžin ža gono' cont yechoj nación Israel chechon' lo' na' bene' zito' ca'?

⁷ Jesúsen' gože' legaque':

—Bitw naquen nezele bi ža bi hor gon Xacho Diosen' da' ca' toze' ba bžie' bia' gone'. ⁸ Perw na' cate' yedesoa Spiritw che'na' len le'e, gaclenen le'e len yela' guac chenna' cont güe'le xtižan' ciuda Jerusalén ni, na' doxen ga mbane distritw Judean', na' distritw Samaritan', na' doxen yežlion'.

⁹ Beyož gwna Jesúsen' ca', chesena'te bene' ca' chesejnilaže' le', beyepe' yaba to lo' bejw na' bich besele'ede' le'. ¹⁰ Na' ne' chesena'te bene' ca' le'e yaban' gan' besele'ede' beyepe', cate'cze gosache'ede' ba zjazecha chope angl len legaque' bene' zjanyaz lache' šiš. ¹¹ Na' bene' ca' chope gose'e legaque':

—Bene' Galilea, žbixchen' chna'le le'e yaban'? Can' ble'ele beyep Jesúsen' yaban' caten' bechoje' ladjwlen', can' le'eczele yide' da' yoble.

Gosebeje' Matías cont goque' postlw laz Judasen'

¹² Na' nite' ya'a dan' nzi' Ya'a Olivos na' jaya'aque' Jerusalénna'. Jerusalénna' naquen gala'ze con ca'te' de lsens yesa'aque' ža che Dios can' ža ley che bene' Israel ca'. ¹³ Na' cate' besyežine' Jerusalénna' postlw ca' šnej na' bene' ca' zjanžague' gosegüe' gan' nite'na' lo' quart zoa yichjen'. Postlw ca' šnej bene' quinga: Pedro, Jacobo, Juan, Andrés, Felipe, Tomás, Bartolomé, Mateo, Jacobo xi'in Alfeo, na' Simón ben' chon txen partid dan' nzi' cananista, na' Judas ben' nac bene' biše' Jacobon'. ¹⁴ Na' gosenita'teze postlw ca' šnej chosoł güiže' Diosen' txen len bene' ca' zjanaque' biše' Jesúsen' na' len María xna' Jesúsen' na' len yezica'chle no'ol ca' zjanžag.

¹⁵ Na' ca' hora' Pedroa' zeche' ladjo to gayoa galje bene' chesejnilaže' Jesucriston' cont be'lene' legaque' dižan', na' gože' legaque':

¹⁶ —Bene' migw, Spiritw che Diosen' benen cont rey David bzoje' na' be'e diža' che Judasen' ben' gwche' bene' ca' gosezen Jesúsen' gan' jasešague' le'. Na' benen byen goc can' nyoj Xtiža' Diosen'. ¹⁷ Judasen' goque' txen len neto' na' bene' txen len neto' yogo'lol dan' gwyo'o lo' na'to' bento'. ¹⁸ Na' gosezi'e late' yežlio len mechw dan' gwxi' Judasen' bene' da' malen' bdie' Jesúsen' lo' na' bene' ca'. Perw na' blažoe' cosyichj gan' goładite' na' gošj li'ena', doxen

xjaloen' bchoj. ¹⁹ Yogo' bene' že' Jerusalénna' gosenezde' can' goc chen' na' da'nán' bososi'e yežlion' Acéldama na' xtiža'gaque'na' zejen Yežlio Chen. ²⁰ Goc can' nyoj to salmo žan:

Liže'na' gaquen to yo'o daš, nono soa na'.

Na' lecze nyojen žan:

Na' te bene' yoble yolane' žin dan' bene'.

²¹ Na' nga nita' bene' ba gosone' txen len chio' šlac gwɔdalen Xancho Jesúsén' chio'. ²² Ba gosone' txen gwzolaoten cate' da' Juan bzoe' le' nis bžinten caten' beyepe' yaban', na' cheyala' cuejcho toe' gone' txen len neto' postlw güe'to' diža' can' beban Xancho Jesúsén' ladjo bene' guat ca'.

²³ Na' gosebeje' chope bene', toe' José ben' le Barsabás, na' lecz le' Justo, na' ben' yeto Matías. ²⁴⁻²⁵ Nach bosol güiže' Diosen' gose'ene':

—Xanto', le' nombi'o yichjlaždao' yogo'lol bene'. Lao bene' ca' chope blo'ešca neto' noe' ba gwlejo' cont gaque' postlw na' gone' xšinon' txen len neto'. Le ca nac Judasen', gwlejyichje' dan' ngo'o lo ne'e gone' na' ba zjayde' gan' naquen yeyeje' yela' güen da' mal che'na'.

²⁶ Nach gosone' rifa cont gosenezde' non' ba gwlej Diosen' na' Matíasén' bchoje' na' gosone' le' cuent len postlw ca' yešnej.

2

Can' goc cate' bla' Spiritw che Diosen'

¹ Na' bžin ža lni dan' že' Pentecostés, na' postlw ca' na' yogo'lol bene' ca' ba gosejnilaže' Jesúcriston' zjandop zjanžague' toze latje. ² Na' zejzenez goc to ššag le'e yaban' ca' ššag che to be' bdonon' gual na' nenxeje lo' yo'o gan' zjachi'ena'. ³ Na' besele'ede' gala'ze yichj to toe' gosezoa tgüeje yi' bel' da' čala'nin. ⁴ Ca' goc jašo'o Spiritw che Diosen' lo' yichjlaždao' to toe', na' Spiriton' benen cont gosezolagüe' goso'e gwde gwdele diža' da' gosejni'i bene' zito' ca'.

⁵ Na' ca' tiempén' bene' zan bene' Israel že' Jerusalénna' bene' chesonxene' Diosen', za'aque' doxen yežlion'. ⁶ Na' cate' gosende' chac ššaguen' gan' že' postlw ca', zan bene' Israel ca' besežague', na' leca besyebande', le to to postlw ca' bosozejni'ide' legaque' len diža' da' chesejni'i to toe'. ⁷ Bi gosejni'ide' bin' chac na' besyebande' gosene':

—¿Gague bene' distritw Galilea bene' quinga? ⁸ ¿Nacxečen' to tocho chenecho cheso'e diža' can' cheso'e bene' gualaž čecho diža'? ⁹ Bałcho naccho bene' nación Partia, na' bałcho bene' nación Media, na' bałcho bene' nación Elam, na' bałcho bene' distritw Mesopotamia. Na' yebałcho bene' distritw Judea, na' yebałcho bene' distritw Capadocia, yebałcho bene' distritw Ponto, na' yebałcho bene' distritw Asia, ¹⁰ yebałcho bene' distritw Frigia na' bene' distritw Panfilia, na' yebałcho za'cho nación Egipto, na' yebałcho za'cho yež ca' zjachi' Africa do te ciuda Cirene. Na' chio' naccho cuent len bene' nación Roma, bałcho goljcho naccho bene' Israel na' yebałcho ben cuincho txen len bene' Israel. ¹¹ Na' bałcho naccho bene' yež ca' zjachi' Creta na' bene' distritw Arabia. Na' gate'tez bene' naccho, yogo'cho chenecho cheso'e bene' distritw Galilea quinga xtiža'chon' da' chaccho, cheso'e diža' che da' zan da' ba ben Diosen' da' zaca' yebanecho.

¹² Na' yogo' bene' ca' besedobe' chosozenague' besyebande' na' gosacžejlaže' bin' chac, na' zane' gosene':

—¿Bi zejen dan' chaquen'?

¹³ Na' yebałe' goseneye'e gosene':

—¡Bene' quinga chesezože'!

Diža' dan' be' Pedroa' len bene' Israel ca' besežag

14 Na' Pedroa' gwzeche' lao ben' zjandop zjanžague' txen len postlw ca' yešnej na' be'e diža' zižje gwne':

—Le'e bene' Judea na' note'tezechle zoale ciuda Jerusalén ni, che'nda' gwzenagle chia' na' gonle xbab che da' za' ni'a le'e. 15 Bene' lježa' quinga bitw chesezožde' can' chaquele, le ne' nac tempran. 16 Ba chac can' bzoj da' Joel ben' be' xtiža' Diosen' cani' bzoje' dan' gwna Diosen', žan:

17 Cate' ba zoa žin ža cont yeyož yežlion',
neda' Dios gona' cont Spiritw chian' yedesoan len bene' že' doxen yežlion'.
Na' gona' cont xi'inle ca' yeso'e xtiža'na',
na' bene' byo xcuide' ca' yesele'edagüede' bi da' gona',
na' güe'lena' bene' byo gol ca' diža' lo bišgal chegaquen'.

18 Na' yogo' bene' ca' chesejnilaže' neda', bene' byo na' no'ole,
yedesoa Spiritw chian' len legaque' cont yeso'e xtižan'.

19 Gona' cont yesele'e benachen' da' zaca' yesyebande' le'e yaban' na' lagüe yežlion',

na' gona' yela' guac chia'na' len chen, len yi' na' len žen da' nac ca bejw.

20 Bich gwseñi' gwbižen', na' bio'na' yeyaquen xna ca chen
cate' za' žin ža yida' da' yoble gwnežjua' castigw che yogo' bene' cbi chesejni-
laže'nda', neda' naca' Xanle.

Žana' gaquen to ža žialao xen.

21 Nach note'tez bene' yesenabe' gaclena' legaque',
neda' naca' Xanle yebeja' legaque' lo da' malen'.
Can' gwna Diosen'.

22 Na' le'e bene' Israel gualaž chia', le gwzenag chia'. Jesúsena' ben' nac bene' yež Nazaret, Diosen' blo'ede' naque' bene' zaque'. Diosen' bene' cont Jesúsena' bene' yela' guac na' bichle da' zaca' yebanecho can' nezeczelen'. 23 Lo yela' neze che Diosen' bin' za' gac, bi'e latje gwzenle Jesúsena' na' bdelene' lo na' bene' mal ca' gosote'ne' bosode'ene' le'e yag cruzen'. 24 Perw na' Diosen' bechis bosbane'ne' ladjo bene' guat ca', le bi gwzoe yela' goten' nabian' le'. 25 Quinga bzoj da' rey David xtiža' Jesúsena' cani'te, žan:

Nezda' Xana' Diosen' zoe' len neda' do ža do yel,
na' zoe' chaclene' neda' cont bi chžeba'.

26 Da'na'na' zoa' mbalaz na' choa' diža' leca chebeda'.

Na' lecze chebeda' nezda' yechis yosbane' neda' ladjo bene' guat ca' cate' ba gota'.

27 Dios chia', nezda' bi yocua'ano' neda' gan' že' bene' guat ca',
neca go'o latje gožo' cuerp chia'na', neda' naca' xi'inno' na' nac lažda'oguan' xilaže'.

28 Ba blo'edo' neda' can' soa cueza' mbalaz.

na' mbalaz soa' dan' soaleno' neda'.

Beyož gwna Pedroa' ca' nach gože' legaque':

29 —Bene' Israel, nezecho da' xozxta'ocho rey David gote' na' bosocuaše' le'. Na' nombia'cho ba gan' bosocuaše' le'. 30 Na' da' rey Davin' be'e diža' can' bzejni'i Diosen' le' na' gwnezde' gwlo'o Diosen' da' bali' gague da' te bi gac can' gwne'. Gwnezde' gon Diosen' cont Criston' galje' lo diaža' che' na' nabi'e nación Israelen' can' gwnabia' le'na'. 31 Diosen' bene' cont da' rey Davin' gwnezde' can' gaquen' na' da'nan' be'e diža' che Criston' ben' ba gwseła' Diosen' cont nabi'e. Gwne' Criston' yebane' na' bi yega'añe' gan' že' bene' guat ca' na' neca gožo' cuerp che'na'. 32 Na' Diosen' bechis bosbane' Jesúsena' ladjo bene' guat ca', na' yogo' neto' choe'to' diža' nezeto' beyas bebane'. 33 Na' Diosen' len yela' guac che'na' bene' cont beyep Jesúsena' gan' zoe'na' na' chnabi'e txen len le'. Na' Diosen' bnežjue'ne' Spiritw che'na' can' gwne'. Na' Jesúsena' ba bene' yela'

guac nga da' ba benele na' da' ba ble'ele. ³⁴ Gague da' rey Davin' beyep yaban', san da' David bzoje' che Jesús'en' gwne':

Xancho Diosen' gože' Xanan':

“Gwche'edo' cuita' nga nabia'cho txen,

³⁵ na' gona' cont yogo' no chesegue'e le' yosozexjw yichje' yosozenague' chio'.”

³⁶ 'Da'nan' yogo' chio' bene' Israel cheyała' nezecho Jesús'en' ben' betwle bda'ln'e' le'e yag cruz, Diosen' gwleje'ne' cont naque' Xancho'n' na' naque' Cristo, zeje diža' naque' ben' gwsela' Diosen' nabi'e nación chechon'.

³⁷ Na' cate' bene' ca' zjanžaguen' gosende' xtiža' Pedroa', da' juisyw da' gosacde' lo' lažda'ogaquen', nach gose'e Pedroa' na' len yezica'chle postlw ca':

—Bene' gualaž, ¿bin' cheyała' gonto'?

³⁸ Nach Pedroa' gože' legaque':

—To tole cheyała' yetinjle xtola'le ca' na' soale nis dan' ba chejnilaže'le Jesucriston', na' Diosen' yezi'xene' chele na' gone' le'e Spiritw che'na' soan lo' yichjlažda'olen'. ³⁹ Xancho Diosen' gone' note'tezle Spiritw che'na' can' ba gwne', le'e na' xi'inle ca' na' note'tez bene' zito', le chnežjuen' yogo' bene' chbeje' cont yesaque' lo' ne'e.

⁴⁰ Nach Pedroa' be'lene' legaque' diža' zan, na' gwneyoede' legaque' gwne':

—Le yechoj ladjo bene' mal quinga bene' cbi zjanombia' Dios.

⁴¹ Ca' goquen' bene' ca' gosejle'e diža' dan' be' Pedroa' gosezoe' nis. Na' lo žana' šon mil bene' gosejnilaže' Jesús'en' na' gosaque' txen len yezica'chle bene' chesejnilaže' le'. ⁴² Yogüe' gosenita'teze' bosozenague' dan' bososed bosolo'e postlw ca' legaque'. Na' gosaque' toze len yezica'chle bene' gosejnilaže' Jesús'en' na' gose'ej gosagüe' txen na' gosenite' bosol güiže' Diosen' txen.

Can' goson bene' ca' gosejnilaže' Criston' da' nechw

⁴³ Na' yogo'ze bene' besyebande' can' goson postlw ca' da' zan da' güen da' zaca' yebanecho len yela' guac che Diosen'. ⁴⁴ Na' bene' ba chesejnilaže' Jesús'en' gosaque' toze na' gosone' toze yogo'lol da' zjade chegaque'.

⁴⁵ Na' gosote' yežlio na' bichle da' zjadede' na' mechw dan' besele'ede' čen goseyisen' lao yogo'lole' con da' beseyažje to toe'. ⁴⁶ Na' tža tža besedop besežague' yodao' blaona' na' lecze do laže' gose'ej gosagüe' txen liž to togaque' na' gosenite' mbalaz. ⁴⁷ Gosenita'teze' gosonxene' Diosen'. Na' gosazlaže' bene' yezica'chle can' gosone'na'. Na' tža tža Xancho Diosen' bene' cont gosanch bene' ca' gosejnilaže' Jesucriston'.

3

Beyac to bene' nxinj ni'e

¹ Na' to ža Pedroa' na' Juan ja'aque' yodao' blaona' do cheda šone, hor cate' bene' Israel ca' chosol güiže' Diosen' yogo' ža. ² Na' gwzoo to bene' nxinj ni'e ca' goljte' na' yogo' ža gosebec bene' le' cho'a puert che yodao'na', puert dan' nzi' Puert Xdan, cont gwñabe' mechw lao bene' ca' chja'ac yodao'na'. ³ Nach cate' bžin Pedroa' len Juan yodao'na' na' ben' nxinj ni'ena' bol güiže' legaque' yosonežjue'ne' mechw. ⁴ Nach Pedroa' len Juanna' gosebeze' na' goseničgüe' le' na' Pedroa' gože'ne':

—Gwñ'a' neto'.

⁵ Na' bena' bene' xbab yosonežjue'ne' mechw. ⁶ Perw Pedroa' gože'ne':

—Bibi mechw chia' de da' goña' le', perw zoa to da' gona' gaclena' le': len yela' guac che Jesucriston' bene' naque' bene' yež Nazaret, chona' mandadw gwzoža' na' gwda.

⁷ Na' Pedroa' bežoe' ne'e licha na' bsože'ene', na' gocte gwzeche' na' ni'ena' la' besyeyacten da' gual na' lecz ca' bečj ni'e ca'. ⁸ Na' cate' gočbe'ede'

ba besyeyac ni'en', bxite' yela' chbe che'. Na' gwyo'e chašil che yodao'na' len legaque' chxite' na' cho'e yela' choxcen che Diosen'. ⁹ Na' bene' ca' že' chašilen' besele'ede' can' chde' chxite' cho'e yela' choxcen che Diosen'. ¹⁰ Na' besyeyombi'e le' naque' ben' chbe' chnab mechw yogo' ža cho'a puert che yodao'na', puert dan' nzi' Puert Xdan, na' leca besyebande' da' ba beyac ni'ena'.

Pedroa' be'e xtiža' Diosen' chašil yodaon'

¹¹ Na' gosenite' chašil da' nzi' Chašil che da' Salomón dan' ze gan' zoa' yodao'na'. Na' ben' beyac ni'ena' bi bsane' Pedroa' len Juanna'. Nach yogo' bene' že' yodaon' besežagsese' chašila' cont jasene'e ben' beyaquen', le besyebanchgüede'. ¹² Na' cate' Pedroa' ble'ede' ba zjanžag bene' zan gan' nite'na' nach be'lene' legaque' diža', gože' legaque':

—Le'e bene' gualaž chia' bene' Israel, ¿bixchen' chebanelo? ¿Cadaquele len yela' guac cheton' bento' cont beyac benga? ¿Še cadaquele beyaque' dan' chonchguato' can' chazlaže' Diosen'? Bi naquen ca'. ¹³ Dios ben' gosonxen da' xozxta' ocho Abraham, Isaac na' Jacob, blo'e nac Xi'ine' Jesúsen' bene' zaca' juisyw. Perw le'e bdele Jesúsen' lo na' justis ca' cont gosote'ne' na' bžonle cate' Pilaton' goclaže' gwsane'ne'. ¹⁴ Can' benle len Jesúsen' la'czla' naque' bene' laždao' xilaže' juisyw na' naque' la'zelagüe bene' chon da' güen. Nach gwñable bosan Pilaton' to bene' güetw bene' na' bi gwñable yosane' Jesúsen'. ¹⁵ Na' ca' nac Jesúsen' ben' bxe yela' mban toli tocanē, le'na' betwle, perw na' Diosen' bechis bosbane' le' ladjo bene' guat ca'. Neto' ble'eto'ne' na' choe'to' diža' ba bebane' ladjo bene' guat ca'. ¹⁶ Na' chle'ele benga cbi goc se'e na' nombia'lnē, na' na'a ba beyac ni'ena' len yela' guac che Jesúsen' ben' chejnižaže'to'. Le da' chejnižaže'to' Jesúsen', da'nan' besyeyacšagüe' ni'a benga na' ba chle'ele can' beyaquen'.

¹⁷ Bene' migw, nezda' le'e na' bene' gole blao chele ca' betwle Jesúsen' lagüe bi gwejni'ile Diosen' gwsele'ne'. ¹⁸ Na' da' benle ca', goc can' gwna Diosen' gac, da' bene' mandadw bosozoj da' bene' ca' goso'e xtižen' cani', bosozoje' che Criston' ben' gwlej Diosen' cont nabi'e. Bosozoje' che' gosene' yosochi yososaca' bene' le'. ¹⁹ Da'nan' le yeyonšca xbab chele na' le yetinje xtoła'len' cont Xancho Diosen' gwñitlagüen' na' gone' ga soale mbalaz. ²⁰ Nach Xancho Diosen' sele' Jesúsen' yežlio nga yetni'a, ben' gwleje' cani'te cont naque' Cristo checho. ²¹ Perw chonen byen yega'an Jesucriston' yaban' na'a, na' cate' žin ža gon Diosen' cont yežlio nga yeyaquen da' cobe, cana' yide' yeto. Ca' gosena bene' gwleje' cani' cont goso'e xtižen'. ²² Da' Moisésen' be'lene' da' xozxta' ocho diža', gože' legaque': "Xancho Diosen' sele' yeto bene' gualaž chechon' cont güe'lene' le'e xtiže'na' can' gwsele' neda'. Che bena' gwzenagle bite'tez ne'. ²³ Na' Diosen' gone' yesebiayi' yogo' bene' ca' cbi yosozenague' che bena' selen', na' bich yesenite' txen len bene' ca' chesonxene' le'." Can' gož Moisésen' da' xozxta' ocho ca'.

²⁴ Lecz ca' yogo'lol bene' goso'e xtiža' Diosen' cani', gwzolaozen len da' Samuel na' yogo' bene' ca' gosedeč, goso'e diža' che da' ca' ba chac tiemp na'a. ²⁵ Le'e nacle xi'in diaža che da' bene' ca', na' dan' gož Diosen' legaque' gone', na' dan' gože' yezica'chle xozxta'ole ca', lecz naquen che le'e. Gože' da' Abrahanna': "To bene' galje lo diaža chio' gone' cont bene' že' doxen yežlion' nite' mbalaz." ²⁶ Da'nan' cate' Diosen' bosbane' Xi'ine' Criston' ladjo bene' guat ca', zgua'tec gwsele'ne' lao chio' bene' Israel da' goclaže' gaclene' chio' cont tocho yetinjecho xtoła'chon'.

4

Pedroa' na' Juanna' nite' lao bene' gwnabia' ca'

¹ Ne' chesoe'lente Pedroa' na' Juanna' bene' ca' diža' cate' besežin bal bꝁoz che bene' Israel ca', na' bene' gwnabia' che ben' chesape' yodao' blao chegaque'na' na' bene' saduceo ca' bene' cbi chesejle'e še yesyeban bene' guat ca'. ² Bene' ca' cheseže'e che dan' chososed chosolo'e Pedroa' len Juanna', le chesene' nezecho gwžin ža cate' yesyeban bene' guat ca' da' beban Jesúsen'. ³ Na' bene' blao ca' gosezene' Pedroa' len Juanna' na' goseyixjue' legaque' ližya do yel, le ba chxin na' bi gola' yesone' yela' justis chegaquen' ca' cheyala' že'na', san bosocuezen' beteyoch. ⁴ Na' ca' nac bene' ca' gosende' chesoe' Pedroa' na' Juanna' xtiža' Diosen', zane' gosejnilaže' Criston', na' txen len bene' ca' ba gosejnilaže'ne' cana', gosac do gayo' mil bene' byo cbi cuent no'ole.

⁵ Na' beteyo bene' gwnabia' che bene' Israel ca', bene' gole blao ca' na' bene' bososed bosolo'e ley dan' bzoj da' Moisés, besedop besežague' ciuda Jerusalénna' ⁶ len Anás ben' naquech bꝁoz blao, na' len Caifás, na' Juan, na' Alejandro na' nochle bene' zjanaque' biše' ljež ben' naquech bꝁoz blaon'. ⁷ Na' gosone' mandadw jasexi'e Pedroa' na' Juanna' na' cate' ba zjazie' laogaquen' gosenabde' legaque':

—¿No beñ lsens chele cont beyonle bene' nxinjen'? o ¿no yela' guac che bchinle beyonlene'?

⁸ Na' Spiritw che Diosen' dan' yo'o lo' yichjlaždao' Pedroa' benen cont gože' bene' ca':

—Le'e bene' gwnabia' na' bene' gole bene' blao che nación Israel chechon', ⁹ chñable nac bento' da' güen beyonto' bena' nxinj ni'ena'. ¹⁰ Le'e na' yogo' bene' gualaž cheyala' nezele Jesucriston' ben' naque' bene' Nazaret bene' yela' guac che' cont beyacšagüe' benga. Le'e betwle Jesucriston' bda'ln'e' to le'e yag cruz, perw Diosen' bechis bosbane'ne' ladjo bene' guat ca'. ¹¹ Bi gwyejle'le che Jesucriston', da'n'an' zaca'leble ca' bene' cheson yo'o bene' bi chesazlaže' yej güen da' ba naquen yej squin che yo'ona'. ¹² Toze Jesucriston' guac gone' chio' yela' mban toli tocañe, na' noch no zoa doxen lo' yežlion' bene' gac gone' yela' mban toli tocañe che chio' beñach.

¹³ Besyebane bene' gwnabian' can' boži'i Pedroa' na' Juanna' xtiža'gaquen' sin cbi besežebe', le nachbia' zjanaque' bene' yixe' na' bi zjansedteque'. Nach gosacbe'ede' legaquen' ba gosedalene' Jesúsen'. ¹⁴ Na' dan' zecha ben' beyaque ni'ena' txen len Pedroa' na' Juanna', bi besyežele bene' gwnabian' bi yesene' chegaque'. ¹⁵ Nach bene' gwnabian' besyebeje' postlw ca' chyo'ole šlac bosoxi'e legacze' nacle yesone'. ¹⁶ Na' bene' gwnabian' gose' lježgaque':

—¿Bi goncho len bene' quinga? Yogo' bene' že' ciuda Jerusalén ni zjañezde' gosone' to yela' guac xen na' bi gac ye'cho bene' bi gosone' yela' guaquen'. ¹⁷ Letechoze goncho cont cbi gaslas diža' dan' cheso'ena'. Da'n'an' cheyala' ye'cho legaque' gata' castigw chegaque' še yesoe'che' xtiža' Jesúsen'.

¹⁸ Nach gosaxe' Pedroa' na' Juanna' da' yoble na' gose'e legaque' bich yeso'e diža' che Jesúsen' na' noch no yososed yosolo'ede'. ¹⁹ Nach Pedroa' na' Juanna' bosyoži'e xtižen' gose'e legaque':

—Le gon xbab che da' nga, ¿chaquele chaclaže' Diosen' gwzenagto' chele o še chaclaže' gwzenagto' che le'? ²⁰ Bi gac cuzto' bich güe'to' diža' che da' ba ble'eto' na' ba beneto'.

²¹⁻²² Na' da' zan da' gose' bene' gwnabia' ca' legaque' cont yosošebe'ne'. Perw na' bi beseželde' nacle yesone' legaque' castigw, le bene' zan chesonxene' Diosen' dan' beyac bena' len yela' guac che Diosen'. Ba gwdie' choa iz na' ca goljte' bi goc se'e. Nach bososane' Pedroa' na' Juanna'.

Gosenabde' Diosen' gaclene' yeso'e xtiže'na' sin cbi yesežebe'

²³ Na' Pedroa' len Juanna' cate' bososan bene' gwnabian' legaque' jaya'aque' gan' nita' yezica'chle bene' chesejnilaže' Criston' na' gosoe'lene' legaque' diža' yogo'lol can' gose' bꝛoz gwnabia' ca' na' bene' gole blao ca' legaque'. ²⁴ Na' cate' gosende' dan' gose' Pedroa' len Juanna' legaque', toze can' gosone' xbab na' bosol güiže' Diosen', gosene':

—Xanto' Dios, len' beno' yaban' na' yežlion' na' nisdaon'. Len' beno' benach na' be ca' chesaš na' bica'chle da' zjade, na' len' chnabi'o doxen. ²⁵ Na' le' beno' cont da' rey David bzoje' diža' quinga dan' gož Spiritw chion' le', žan: Bene' ca' cbi zjanaque' bene' Israel chesase' contr le', Xanto' Dios, perw bicze gac can' chesone' xbabem'.

²⁶ Bene' gwnabia' che nación ca' na' che yež ca' txen zjanaque' chesone' contr le' Xanto' Dios, na' contr Xi'ino' Criston' ben' gwseło' cont nabi'e.

²⁷ 'Na' Xanto' Dios, naquen da' li rey Herodes na' Poncio Pilato na' bene' cbi zjanaque' bene' Israel gosaque' txen len bene' Israel ca' lo ciuda nga. Na' yogüe' gosone' txen cont gosote' Xi'ino' Jesúsén' ben' nac bene' laždao' xilaže' juisyw, ben' gwlejo' cont nabi'e. ²⁸ Gosone' can' gwchogbi'o gac dan' bžio' bia' cani'te. ²⁹ Na' na'a Xanto', gwna can' cheson bene' gwnabia' ca', le chesaclaže' yosošebe' neto' bene' güen žin chio'. Na' goclen neto' cont bi žebo' güe'to' xtižo'na'. ³⁰ Na' cate' güe'to' xtižo'na' blo'ešca yela' guac che Xi'ino' Jesúsén' bene' laždao' xilaže' juisyon' cont gac yela' guac, na' yesyeyac no bene' chesacšene na' gac bichle da' yesyebane bene'.

³¹ Na' cate' beyož bosol güiže' Diosen', Diosen' bene' gwxo' gan' zjandop zjanžague'na' na' Spiritw che'na' gwzoachguan len legaque', nach gosoe' xtiža' Diosen' sin cbi besežebe'.

Gosone' dan' zjade chegaque' toze

³² Na' yogo' bene' ca' gosejnilaže' Criston' toz ca' gosac yichjlažda'ogaque'. Na' yogo' bi da' zjade chegaque' gosonen' toze, na' nono gwna: “Chia' da' nga”, o “Chia' da' na”, le naquen che yogo'lol gaque'. ³³ Na' postlw ca' len yela' guac xen che Diosen' bosozejni'ide' bene' Jesúsén' bebane' ladjo bene' guat ca'. Na' Diosen' goclenchgüe' legaque' len bi dan' gosone'. ³⁴ Na' bibi goc falt bi da' beseyažje bene' gosejnilaže' Criston', le bene' zjanape' no yežlio o no yo'o gosoten'. Na' mechw dan' besele'ede' che to ton ³⁵ bosonežjuen' postlw ca', na' postlw ca' goseyisen' len bene' beseyažjden'. ³⁶ Can' ben to bene' Chipre bene' le José. Naque' xi'in diaža che da' Levin' na' postlw ca' bososi'ene' Bernabé, zeje diža' ben' cheyonxenlaže' bene'. ³⁷ Joséna' bete' to yežlio che' na' mechw dan' ble'ede' chen bnežjuen' postlw ca'.

5*Da' mal dan' goson Ananías na' Safira*

¹ Na' zoa to bene' le Ananías na' no'ol che'na' Safira, na' gosote' to yežlio chegaquen'. ² Perw na' legacze' bosoxi'e yosonežjue' late'ze mechw dan' besele'ede' chen na' yese'e postlw ca' doxenenna'. Nach gwwey Ananíasen' na' bnežjue' postlw ca' mechon'. ³ Nach Pedroa' gože'ne':

—Ananías, ¿bixchen' bzenago' che Satanás dan' chnabia' da' xigüe' ca' na' chacdo' xoayago' Spiritw che Diosen'? Chi'o neto' choño' doxen mechon' dan' ble'edo' che yežlion', len ba gwlo'ošagüe'le laten' par cuinle. ⁴ Chio' yežlion' cate' biña' goton', na' chio' mechon' dan' ble'edo' cate' beton' na' zaco' cont beno' da' chaclažo' len len. ¿Bixchen' benle da' malen' nac ca'? Gague contr neton' ba benle benlaže'le, san contr Diosen'.

⁵ Nach Ananíasen' cate' bende' xtiža' Pedroa' to gwbiḡze' na' gote'. Na' yogo' bene' ca' gosende' diža' can' goquen' besežebchgüe'. ⁶ Na' besežin to čhope bene' xcuide' gan' gwbiḡ da' Ananíasen' na' bosyochele' cuerp chen' to lache' na' besyeyo'ene' ga bosocuaše'ne'.

⁷ Na' gwde do šon hor gote' cate' bžin no'ol che'na' na' gwyo'e lo' yo'on sin cbi nezde' bin' ba goc che bene' chen'. ⁸ Na' Pedroa' gože'ne':

—¿To ca'te' ble'ele che yežlion'?

Na' Safiran' gože'ne':

—To ca'te'ten'.

⁹ Nach Pedroa' gože' no'olen':

—¿Bixchen' goco' toze len bene' chion' chaquele gonle Diosen' prueba še lede' can' že' bi cheyała' xoayagcho? Cho'a puert nga zjazecha bene' ba bosocuaše' bene' chio'na' na' na'a yeso'e le'.

¹⁰ Na' la' gwbiḡte Safiran' lao Pedroa' na' gote'. Na' cate' goso'o bene' xcuide' ca' lo' yo'ona' besele'ede' ba gote' nach goso'ene' jasecuaše'ne' cuit da' bene' che'na'. ¹¹ Na' yogo' bene' chesejnilaže' Criston' besežebe' can' goquen' na' lecze besežeb yezica'chle bene' gosende' diža' can' goquen'.

Gosone' da' zan yela' guac

¹² Na' postlw ca' gosone' da' zan yela' guac na' bichle da' besele'e bene' da' zaca' yesyebande'. Na' bene' ca' chesejnilaže' Xancho Jesucriston' chesedop chesežague' txen chašil che yodao' blaona' gan' nzi' Chašil che da' Salomón.

¹³ Na' yezica'chle bene' ca' že' Jerusalénna' gosapchgüe' legaque' bala'an, la' czla' besežebe' yesaque' txen len legaque'. ¹⁴ Perw na' zane' gosejnilaže' Xancho' na' gosaque' txen, zan bene' byo na' no'ole. ¹⁵ Na' cate' no' bene' gosacšende' goseyixjue' legaque' tnez do lo cam do lo yagla', gosebeze' te Pedroa' cont yesechele' bxin che' na' yesyeyacde' še bi yižgüen' chese'ede'. ¹⁶ Na' bene' ca' že' yež da' zjachi' gała'ze ciuda Jerusalénna' ja'aque' zjanche'e bene' chesacšene' na' bene' zjajo'o zjanyaz da' xigüe'. Na' yogo' lole' besyeyacde'.

Bene' saduceo ca' goseyixjue' Pedroa' len Juanna' ližya

¹⁷ Nach ben' nacch bxož blao na' yezica'chle bene' saduceo bene' cbi chesejle' yesyeban bene' guat, besegue'ede' postlw ca'. ¹⁸ Na' gosezene'ne' na' goseyixjue' legaque' ližya. ¹⁹ Na' to angl bene' za' gan' zoa Xancho Diosen' bžine' ližyan' šeže'le na' gwsaljue' puert ca' na' bebeje' legaque'. Na' gože' legaque':

²⁰ —Le šja'ac yodao' blaona' na' le güe' diža' len ben' chesežagna' naquen' yesone' cont gata' yela' mban chegaque' toli tocanē.

²¹ Nach dan' gosende' can' gož anglen' legaque', ja'aque' yodao' blaona' cate' gwyeni' na' bososed bosolo'ede' ben' zjanžag na'.

Na' ben' nac bxož blao len bene' gole blao ca' chesenabia' nación Israelen' besedobe' cont bosoxi'e, nach gosone' mandadw šjasexi'e postlw ca' gan' zjade' ližyan'. ²² Na' cate' ben' chesap yodaon' besežine' ližyan' gague no postlw ca' zjanla' na' jaya'aque' lao bene' gwnabia' ca' jasyedixjue'ede'. ²³ Gose'e bene' ca':

—Nyeyjwchach ližyan' na' lecze na' nita' soldadw ca' cho'a puerta' chesapen' perw cate' gwsaljwto' puerten' gague no postlw ca' že' lo' ližyan'.

²⁴ Na' ben' nacch bxož blao na' bene' gwnabia' che ben' chesap yodaon' na' bxož gole blao ca' cate' gosende' rsonna' besyebande', gosene':

—¿Nac gac da' nga na'a?

²⁵ Na' šlac chesacžejaže', bžin to bene' gože' legaque':

—Bene' ca' gwduxjwle ližyan' zjaze' chašil che yodao' blaona' chososed chosolo'ede' bene'.

²⁶ Nach bene' gwnabia' che ben' chesap yodaon' len bene' gop ca' jasa'aque' jasexi'e postlw ca' diža' šagüe'. Bi gosone' znia len legaque' da' besežebe' bene' chosozenag xtiža' postlw ca' še yosožie' legaque' yej. ²⁷ Na' cate' besežin postlw ca' lao bene' gwnabia' ben' nita' chosoxi'a, nach ben' nacch bxoz blao gože' legaque':

²⁸ —Ba bento' mandadw bi güe'le diža' che Jesúsen' na' bich gwsed gwlo'ele bene' xtižen', na' ba gwdisle xtiže'na' doxen ciuda Jerusalénna'. Na' ba chosbague'le neto' žale betwto'ne'.

²⁹ Nach Pedroa' na' postlw ca' gose'e legaque':

—Nacchen da' žialao xen gwzenagto' che Diosen' clal ca' che benach. ³⁰ Le'e betwle Jesúsen' bda'lné' to le'e yag cruz, perw Dios ben' chonxencho na' ben' gosonxen da' xozxta'ocho ca' bechis bosbane'ne' ladjo bene' guat ca'. ³¹ Na' na'a Diosen' ba bnežjue'ne' yela' bala'an xen na' yela' gwnabia' xen cont chnabi'e na' chnežjue' yela' mban toli tocañe che bene' chesejnilaže'ne'. Na' le'na' chazlaže' gaclene' yogo' chio' bene' Israel yetinjecho xtoła'chon' nach yezi'xene' chechon'. ³² Neto' nezeto' can' ben' Diosen' len Jesúsen' na' choe'to' diža' chen, na' lecze Spiritw che Diosen' choen' diža' che Jesúsen' lo' yichjlažda'oton', le Diosen' ba gwsele' Spiritw chen' zoan lo' yichjlaždao' bene' chosozenag che'.

³³ Na' beseža'achgua bene' gwnabia' ca' cate' gosende' can' gož Pedroa' legaque' na' gosaclaže' yesote' postlw ca'. ³⁴ Perw gwzoa to bene' fariseo len legaque' bene' le Gamaliel. Chsed chlo'ede' bene' ley dan' bzoj da' Moisésen' na' gosapchgua bene' le' bala'an. Na' Gamalielen' gwzeche' na' bene' mandadw yesechoj postlw ca' chyo'ole šlac güe'lene' bene' ca' že'na' diža'. ³⁵ Na' gože' bene' ca' že'na':

—Bene' gualaž, cheyała' goncho xbab nac goncho len bene' quinga cont goncho da' nac güen. ³⁶ Le yosa'laže' can' goc cate' bchoj ben' le Teudas gwne' naque' bene' zaque'. Na' do tap gayoa bene' bosozenag che' na' gosaque' le' txen. Perw na' bžin ža gosot bene' le' na' besyeyaslas ben' gosaque' le' txen, gague bi gocch yesone'. ³⁷ Na' gwdechle ca' tiempen' bosochele' bal' bene' že' to to yež, bchoj to bene' distritw Galilea ben' le Judas na' bene' zan gosaque'ne' txen. Na' lecze bžin ža gosote'ne' na' bene' ca' gosaque' le' txen lecze besyeyaslase'. ³⁸ Na' da'nán' žia' le'e can' chacda' cheyała' goncho, jaseye bene' quinga, bibi gonecho legaque'. Le še chososed chosolo'ede' xbab chegacze', yeniten. ³⁹ Na' še dan' chososed chosolo'ede' naquen che Dios, bibi gac goncho cont cbi gaslasen. Cheyała' gwsaca'cho cont bi tilencho Diosen'.

⁴⁰ Na' gosazlaže' bene' gwnabia' ca' can' gož Gamalielen' legaque'. Nach gosaxe' postlw ca' na' goseyine' legaque' na' gosone' mandadw bich yososed yosolo'ede' che Jesúsen' bate'tezechle. Nach bososane' legaque'. ⁴¹ Na' ca' nac postlw ca', cate' besyechoje' gan' gota' yela' güexian', chesyebede', le Diosen' be'e latje bosochi bososaca' bene' legaque' neche dan' chososed chosolo'ede' che Jesúsen'. ⁴² Na' yogo' ža bososed bosolo'ech postlw ca' che Jesucriston' do liž bene' na' cate' chja'aque' yodao' blaona'.

6

Bene' ca' chesejnilaže' Criston' gosebeje' gaže bene' goson žin bixjw

¹ Na' ca' tiempen' zej chanch bene' ca' chesejnilaže' Jesucriston' na' bene' ca' cheso'e diža' griego gwzolao chesežeše', chesene' no'ol güezeb ca' nchixe legaque' bi chesezi'e lebe len no'ole güezeb ca' cheso'e diža' hebreo cate' cheseyise' dan' chese'ej chesagw to togaque'. ² Nach postlw ca' šižinw bosyotobe' yezica'chle bene' ca' chesejnilaže' Jesucriston' na' gose'e legaque':

—Bi naquen güen neto' gwsanto' bich gwsed gwlo'eto' bene' xtiža' Diosen' cont chisto' dan' yese'ej yesagw bene'. ³ Da'nan' bene' migw, le cuej gaže bene' lježle, bene' zoachgua Spiritw che Diosen' len legaue', bene' zjanac bene' sina' na' bene' cheson da' güen, na' le gon lo na'gaue' yese'ise' dan' yese'ej yesagw bene' ca'. ⁴ Na' neto' soateze soato' yol güižto' Diosen' na' gwsed gwlo'eto' bene' xtižen'.

⁵ Na' gosazlaže' yogo' bene' ca' na' gosone' can' gose' postlw ca' legaue', na' gosebeje' to bene' le Esteban bene' chejnilaže' chgua Diosen' na' zoachgua Spiritw che Diosen' len le'. Na' lecze gosebeje' Felipe, na' Prócoro, na' Nicanor, na' Timón, na' Parmenas, na' Nicolás bene' ciuda Antioquía ben' bene' txen len bene' Israel. ⁶ Na' bosozoe' legaue' lao postlw ca' na' postlw ca' bosol güiže' Diosen' chegaue' na' gosexoa na'gaquen' yichj bene' ca' cont gosezi' lo ne'e žin dan' yesonen'.

⁷ Na' bene' zanch gosende' xtiža' Xancho Jesucriston', na' zan bene' Jerusalénna' gosejnilaže'ne' na' lecze zan bχoz ca' bosozenague' na' gosejle'e xtiže'na'.

Gosezene' Esteban

⁸ Na' Estebanna' gwzoachgua yela' guac che Diosen' len le' na' Diosen' goclenchgüe' le'. Da'nan' bene' yela' guac na' bichle da' zaca' yesyebane bene' lao bene' ca' že' na'. ⁹ Na' zoa to yodao' dan' chesene' Yodao' che Bene' ca' Bich Zjanaue' Esclavos. Bene' ca' chesedop chesežag yodao'na' za'aque' ciuda Cirene na' ciuda Alejandría na' distritw Cilicia na' distritw Asia. Na' bal bene' ca' gwzolao gosacyože' len Estebanna', ¹⁰ perw na' bi besyeželde' nac yosyoži'e xtižen', le Spiritw che Diosen' bnežjon le' yela' sina' na' bzejni'in le' bin' gwne'. ¹¹ Nach gosego'oyele' to chop bene' cont goso'e diža' güenlaže' che', gosene' Estebanna' gwneye'e che da' Moisésen' ben' bzoj ley che bene' Israel ca'. Na' lecze gosene' Estebanna' gwne' diža' ya' che Diosen'. ¹² Na' bene' ca' gosacyože' che Estebanna' bosota bosone' bene' lo ciuda na' bene' gole blao che bene' Israel ca' na' bene' ca' chososed chosolo'ede' ley dan' bzoj da' Moisésen' cont gosaue' toze. Na' ja'acsese' gan' zoa Estebanna' na' gosezene'ne' na' goseche'ene' gan' že' bene' ca' chesenabia' nación Israelen'. ¹³ Na' goseyiljue' bene' goso'e diža' güenlaže' bene' gosene' che':

—Benga bicze šize zoe' chne' diža' bya' che yodao' blao che Diosen' nga na' ley dan' bzoj da' Moisés. ¹⁴ Ba beneto' že' Jesús ben' naue' bene' yež Nazaret yochinje' yodao' blaona' na' yoše'e costumbr checho dan' ben da' Moisés mandadw na'ocho.

¹⁵ Na' yogo' bene' ca' zjachi' gan' chesone' yela' justisen' gosene'e cho'alao Estebanna' na' besele'ede' chactiten ca' cho'alao angl.

7

Choe' Estebanna' diža'

¹ Nach ben' nacch bχoz blaona' gože' Estebanna':

—¿Naquen can' chesena bene' quinga?

² Na' Estebanna' gože' legaue':

—Le'e bene' gole na' note'teze bene' gualaž, le gwzenag chia' len to chop da' nia' le'e. Diosen' ben' nac la'zelagüe bene' zaca' blo'elagüe' da' xozxta'ocho Abraham cate' gwzoe' distritw Mesopotamia cate' za' šjasoe' ciuda Harán. ³ Na' Diosen' gože'ne': “Bchoj lažo' na' gwlejyichj bene' biše' lježo' na' gwyej jaso' latje gan' gwlo'eda' le'.” ⁴ Beyož gož Diosen' Abrahanna' ca', nach Abrahanna' bchoje' gan' že' bene' Caldea ca' na' jasoe' Harán. Na' bžin ža got da' xe'na' na' gwdechle Diosen' gwche'e da' Abrahanna' gan' zoacho nga.

5 Diosen' bi bnežjue' da' Abrahanna' yežlio gaquen che', ne late' da'ozen', san gwne' gaquen che xi'in diaža che' cate' ba gote', la'czla' nono xi'ine' na' soa cate' gož Diosen' le' ca'. 6 Nach Diosen' gwne' šjasenite' laž bene' zito' tap gayoa iz ga yesaque' esclavos na' yesežaglaochgüe'. 7 Nach Diosen' lecze gože'ne': "Neda' gwnežjua' castigw che nación gan' yesone' xi'in diaža chio' ca' esclavos na' gona' cont yesyechoje' naciónna' na' yeside' yesonxene' neda' nga." 8 Nach Diosen' gože' Abrahanna' gone' güen len xi'in diaža che'na'. Na' bene' mandadw soa Abrahanna' to señw dan' že' circuncisión, le' na' len bene' byo ca' zjanaque' diaža che', cont gachia' le chesejle'e che dan' gwna Diosen'. Da'na'na' cate' golje xi'ine' Isaaquen' bzoe'be' señw to xmanzebe', na' lecze can' ben da' Isaaquen' cate' gol je xi'ine' Jacob. Na' ca'cze ben da' Jacoben' len da' xi'ine' ca' šižinw, bene' ca' gosac šižinw diaža che bene' Israel.

9 'Na' xi'in da' Jacoben' ben' le José, bene' biše' ca' gosacxi'ede' le' na' gosote'ne' gosezi' bene' nación Egipto le'. Perw Diosen' gwzoe' len Josén'. 10 Na' goclene'ne' len yogo'lol da' bžaglagüe'. Na' Diosen' bene' cont da' faraón ben' chnabia' Egipton' bebede' Josén' na' gocbe'ede' naque' bene' sina'. Na' da'nan' faraónna' gwleje' le' cont goque' gobernador che nación Egipton' na' bene' lo ne'e ližen' na' yežlio che'na'.

11 'Na' goc gwbin doxen Egipton' na' lecze can' goc gan' nzi' distritw Canaán na' da' xozxta'ocho ca' bi beseželde' da' yesagüe' na' besežaglaochgüe'. 12 Perw na' bžin ža da' Jacoben' bende' diža' de trigw Egipton' na' gwsele' da' xozxta'ocho ca' jasexi'en da' nechw. 13 Na' bechop ni'a ja'aque' cate' ben Josén' ga besyeyombia' bene' biše' ca' le', nach gwneze faraónna' can' nac diaža che Josén'. 14 Na' Josén' bene' mandadw šjasexi'e xagaque' Jacoben' na' yogo'lol biše' lježe' ca', zjanaque' ca do gayonšino' bene'. 15 Can' goc gwey Jacoben' jasoe' Egipton' na' Egiptona' gote', na' lecz na' gosat xi'ine' ca' bene' ca' gosac xozxta'ocho. 16 Na' gwdechle besyeyo'e žit benat chegaquen' na' jasecuše'ne' to lo' bloj ba da' gosone' yež gan' nzi' Siquem. Da' Abrahanna' gwxi'e ban' cani'te che xi'in da' Hamor gwduxjuen' mechw.

17 'Na' cate' ba zoa žin tiemp gwnežjo Diosen' legaque' yežlio can' gože' Abrahanna', ba zej chan bene' Israel ca' že' laž bene' Egipto ca'. 18 Na' ca' chac beža' rey che Egipton' na' rey coben' bi gwneзде' can' goclen Josén' nación chen'. 19 Na' rey nga gw diljwlaže' bi da' mal bene' len da' xozxta'ocho bene' Israel ca' na' bene' mandadw šjasecho'on xi'ingaque'na' cont yesatbe'. 20 Na' ca' tiempen' golje da' Moisésen' na' bebe Diosen' lebe', na' xaxna'be' bososcha'ogüe'be' šone bio'. 21 Perw na' bžin ža jasecho'onšaze'be' na' xi'in faraónna' to no'ole beželde'be' na' beyo'ebe' liže' boscha'ogüe'be' ca' xi'ine'. 22 Ca' goquen' bsd da' Moisésen' tcho'a yela' sina' che bene' Egipto ca' na' bene' da' zaca' na' be'e diža' da' zaca'.

23 'Na' čhoa ize da' Moisésen' cate' gwanan šjane'e bene' Israel gualaž che' ca'. 24 Na' jale'ede' to bene' Egipto chchi chsaque' to bene' Israelen'. Nach da' Moisésen' betue' bene' Egipton', boži'e da' malen' bende' bene' gualaž che'na'. 25 Bene' xbab gocde' yesache'e bene' gualaž che' chaclen Diosen' le' cont yosle' legaque' lo na' bene' Egipto ca', perw bi gosache'ede'. 26 Na' beteyo gosedi chopze bene' Israel. Na' bžin da' Moisésen' gocde' gone' cont yesenite' binlo, na' gože' legaque': "¿Bixchen' chdillen lježle le'e nacle bene' gualažze?" 27 Nach ben' nap doła'na' bžigue' da' Moisésen' ca'ale gože'ne': "¿No gwna le' gaco' bene' gwnabia' cont gono' yela' justis cheto'na'?" 28 ¿Lez chaclažo' goto' neda' can' beto' bene' Egipton' neje?" 29 Na' cate' bene' da' Moisésen' can' gož bena' le' nach bxonje' jasoe' nación gan' nzi' Madián la'czla' naque' bene' zito' len bene' ca'. Na' bšagne'e na' gwnita' čhope xi'ine'.

³⁰ 'Na' goc choa iz zoe' na', cate' to angl bene' gwsela' Dios blo'elagüe' le' latje dašen' gala'ze Ya'a Sinaí, yo'o anglen' to lo' yi' bel chdoljen to lo' yag xis yeše'. ³¹ Na' cate' ble'e da' Moisésen' can' chaquen' bebande' nach gwbigue' yelate' cont ble'ešagüe'de' na' bende' chol güiž Xancho Diosen' le', che'ene': ³² "Neda' naca' Dios ben' chonxen Abraham, ben' chonxen Isaac, na' ben' chonxen Jacob." Nach da' Moisésen' gwxyzize' catec bžebe', gague cheyaxjde' ne'e. ³³ Na' gož Xanchon' le': "Gwlechlj xelo'na' cont gapo' neda' bala'an, le' latje gan' zechao'na' naquen' chia'. ³⁴ Neda' ba ble'eda' yela' yaše' yela' zi' da' chde nación chia' Israelen' bene' že' Egipton' na' ba benda' ca' chesonyaše'. Da'na'na' gaclena' le'gaque'. Beda' na'a cont sela' le' Egipton'."

³⁵ 'Diosen' gože'ne' ca' la'czla' bene' Israel ca' cbi gozezi'e che', gose'e Moisésen': "¿No gwna le' gaco' bene' gwnabia' cont gono' yela' justis cheto'?" Diosen' gwsele' da' Moisésen' cont gwnabi'e da' xozxta'ocho ca' na' cont bebeje' le'gaque' lo' na' bene' Egipto ca', na' angl che' Diosen' ben' ble'e da' Moisésen' lo' yi' bel gwzoe' goclene'ne'. ³⁶ Na' da' Moisésen' bebeje' le'gaque' Egipton' gan' bene' zan yela' guac na' bichle da' zaca' yebane bene', na' lecz ca' bene' cate' besežine' Nisdao' Xnan' na' šlac gosonite' latje dašen' choa iz. ³⁷ Na' da' Moisésnan' gože' da' xozxta'ocho ca': "Xancho Diosen' sele' yeto bene' gualaž chechon' cont güe'lene' le'e xtiže'na' can' gwsele' neda'. Che' benan' gwzenagle." ³⁸ Da' Moisésen' gwzoe' len da' xozxta'ocho ca' latje dašen', na' lo' Ya'a Sinaí' to angl bene' gwsela' Diosen' gože' le' diža' da' zjansa' yela' mban, na' bzoje' dižan' par chio'.

³⁹ 'Perw na' da' xozxta'ocho ca' zan las bi bosozenague' che' da' Moisésen', bosozoe'ne' to šla'ale. Gosaclaže' šjaya'aque' Egipton'. ⁴⁰ Na' šlac zej da' Moisésen' lo' Ya'a Sinaí, gose'e bene' biše' Aarónna': "Ben da' le'echo da' šejnilaže'cho na' da' cuialao laoch tnez. Le' ca' nac Moisésen' ben' bebej chio' Egipton', nono neze bin' ba goc che'." ⁴¹ Nach gosone' to me' go'ñ dao' de oro na' gosote' no beyixe' gosonxene' me' daon', na' gosone' lni' che' bena' gosone' len ni'a na'gaque'. ⁴² Da'nan' Diosen' gwlejyichje' nación Israelen' na' be'e latje gosejnilaže' gwbiž, bio', na' beljw. Na' da' nga nyojen len dan' bosozoj da' bene' ca' goso'e xtiža' Diosen' cani', žan:
Le'e bene' Israel, gague nedan' benxenle' caten' betwle beyixe' latje dašen' lao choa iz.

⁴³ Benle' no da' benxenle', na' bia'le yodao' da' chacte chedobe gan' benxenle' dan' nzi' Moloc, na' bia'le beljon' benxenle' dan' nzi' Renfán. Na' dan' ba gwlejyichjle' neda', da'nan' cueja' le'e gan' zoalen' na' sela' le'e nación zito' do gan' nzi' Babilonia.

⁴⁴ 'Na' šlac chesaše' latje dašen', da' xozxta'ocho ca' gosone' to yodao' da' chacte chedobe gan' že' yej ta'a gan' nyoj ley chegaque'na'. Na' gosonen' con can' gož Diosen' da' Moisésen' na' con can' blo'ede' le'. ⁴⁵ Nach cate' da' Josué gwche'e le'gaque' gan' ben Diosen' cont goseque'e yežlio che' bene' zito' ca', lecze goso'e yodao' da' chacte chedobe. Na' ne' bosochine' yodaon' bžinten tiemp che' da' rey David. ⁴⁶ Na' Diosen' bebede' da' rey Davin', na' da' Davin' goclaže' gone' to yodao' che' Diosen', Dios ben' lecze benxen da' Jacoben' cani'te. ⁴⁷ Perw na' da' xi'ine' Salomón benen'. ⁴⁸ Na' Diosen' ben' chnabia' doxen, bi nacho zoe' lo' yo'o da' chon benachen', san chac can' gwna Diosen' dan' bzoj to bene' be' xtiže'na' cani', žan:

⁴⁹ Neda' zoa' yaba chnabia', na' guac gona' con bi chazlaža' lo' yežlion'. Na' ¿chaquele gonle' to liža'na'?

Neda' bi chyažjda' yo'o ga yezi'laža'.

⁵⁰ Neda' bena' yogo'te da' zjade.

⁵¹ 'Dan' bi chzenagle, dan' bi chejle'le lo' lažda'olen' nacchgualē bene' güedenag can' gosac da' xozxta'ocho ca'. Bicze chzenagle che Spiritw che Diosen'. ⁵² Da' xozxta'ocho ca' lecze bosochi bososaque' bene' ca' goso'e xtiža' Diosen' cani', na' gosote' legaque' caten' goso'e diža' can' sela' Diosen' Xi'ine' ben' nac bene' güen juisyw. Na' cate' bide', le'e bdelne' lo na' bene' ca' gosote'ne' na' le'e nape doła' dan' gosote'nen'. ⁵³ La'czla' nombia'le ley dan' bosonežjw angl ca' da' Moisésen', bi chzenagle chen.

Gosote' Estebanna'

⁵⁴ Na' cate' Esteban' gože' legaque' ca', beselocchgüe' gosagwxejte laye'. ⁵⁵ Perw na' Esteban' gwzoachgua Spiritw che Diosen' len le', bcos lagüen' gwne'e yabale na' ble'ede' chac to be'ni' gual gan' zoa Diosen' na' ble'ede' zecha Jesúsēn' cuit Diosen' chnabi'e txen len le'. ⁵⁶ Nach Estebanna' gwne':

—Le na'šc nla'xeje yaban' na' nla' Jesúsēn' ben' golje' benach zeche' cuit Diosen' chnabi'e txen len le'.

⁵⁷ Nach bene' ca' zjanžaguen' leca beseloque' na' bososya'adie' na' bososeyjw naggaque'na' na' to ši'ize ja'acsese' gan' ze Estebanna'. ⁵⁸ Nach gosebeje' Estebanna' cho'a yež na' bosožie'ne' yej. Na' bene' ca' bosožie' le' yejen' bosonežjue' xagaque' da' zjandobe' to bene' xcuide' bene' le Saulo cont gapen'.

⁵⁹ Na' šlac chosožie' Estebanna' yej, Esteban' bol' güiže' Diosen', gwne':

—Xana' Jesús, bezi' neda' yaban'.

⁶⁰ Nach bzoa xibe' lo yon' na' gwne' zižje, gwne':

—Xana' bi gono' cuent xtoła' bene' quinga dan' chesote' neda'.
Na' beyož gwne' ca', gote'.

8

Saulo bchi bsaque' bene' chesonxen Jesucriston'

¹⁻² Na' ca' nac Saulon', gwyazlaže' dan' gosote' da' Estebanna'.

Na' bene' ca' chesejnlaže' Jesucriston' ciuda Jerusalénna' jasecuāše' da' Estebanna', na' gosebežchgüe' che'. Na' gwde gosote' da' Estebanna' gosezolagüe' bosochi bososaque' bene' ca' chesedop chesežag chesonxene' Jesucriston' Jerusalénna', na' yogo' bene' ca' chesonxen Jesucriston' besyeyasłase', ja'aque' yež ca' zjachi' do distritw Judean', do distritw Samaria, perw gague len postlw ca'. ³ Na' Saulon' gwzolagüe' cheje' liž to to bene' ca' chesonxen Jesucriston' chjaxobe' no bene' byo na' no no'ole cont chche'e legaque' ližya.

Bene' ciuda Samaria gosende' diža' güen che Jesucriston'

⁴ Na' bene' ca' chesonxen Jesucriston' ben' besyeyasłase' ja'aque' doxen, jasedixjue'ede' xtiža' Jesucriston'. ⁵ Na' ben' le Felipe bžine' ciuda Samarian' na' be'e diža' che Jesucriston'. ⁶ Na' cate' gosende' xtižen' na' besele'ede' yela' guac dan' bene' len legaque', bene' zan besedobe' bosozenague' che'. ⁷ Bebeje' da' xigüe' ca' zjayo'o zjanyaz yichjlaždao' bene' zan, na' cate' besyechojen chososya'adian. Na' zan bene' natzi' late' güeje cuerp chegaque'na' beyone' legaque', lecze beyone' no bene' nxinj ni'e. ⁸ Na' besyebchgüe' bene' ca' že' ciudan'.

⁹ Na' lo ciudan' zoa to bene' guaža' bene' le Simón. Da' zan da' bene' da' besyebane bene' Samarian' gwziye'e legaque' gože'ne' naque' bene' zaque'.

¹⁰ Na' šlac bene' da' ca', yogo' bene' lo ciudan' bosozenague' che' tcho'a, no bene' gole ca' lente no bi' xcuide' ca', gosene' che':

—Le bengan' nse'e yela' guac xen che Diosen'.

¹¹ Zan iz bosozenague' che', le gwziye'e legaque' len yela' guaža' che'na'.
¹² Perw cate' Felipen' gwđixjue'ede' diža' güen che Jesucriston' len legaque' na' bzejni'ide' legaque' che yela' chnabia' che Diosen', zane' gosejle'e che' na' gosezoe' nis, bene' byo na' no'ole. ¹³ Na' lencze Simón gwyejle'e che' na' gwzoe' nis na' gwzolaogüe' gwdalene' Felipen', na' bebande' ca nac yela' guac ca' dan' chon Felipen' na' yezica'chle da' zaca' yebanecho.

¹⁴ Na' postlw ca' nite' ciuda Jerusalénna' gosende' bene' ca' že' ciuda Samaria ba chosozenague' xtiža' Diosen', nach gosesele' Pedroa' len Juanna' Samarian'. ¹⁵⁻¹⁶ Na' cate' besežine'na' bosol güiže' Diosen' gosenabde'ne' soa Spiritw chen' lo' yichjlaždao' bene' Samaria ca', le ca hora' biña' soan lo' lažda'ogaque' la'czla' ba gosezoe' nisen' dan' chesejnilaže' Xancho Jesúsen'. ¹⁷ Nach gosexoa na' postlw ca' yichjgaque' cont gwzoa Spiriton' lo' yichjlažda'ogaquen'.

¹⁸ Na' ble'e Simón can' cheson postlw ca' chesexoa ne'e yichj bene' cont chzoa Spiriton' len legaque', na' bšabde' legaque' mechw. ¹⁹ Gože' legaque':

—Le gon cont neda' gac xoa na'a yichj note'teze bene' na' soa Spiriton' len legaque' can' chon le'e.

²⁰ Nach Pedroa' gože'ne':

—Cuiayo'o len xmechon' dan' chono' xbab guac si'o len mechw da' chon Diosen'. ²¹ Bi zaco' gono' da' nga chonto', le yichjlažda'oguo' naquen mal lao Diosen'. ²² Da' cheyala' gono', betinje da' malen' chono' na' gwñab goclen lao Diosen' cont yezi'xene' chio' ca nac xbabem' yo'o lo' yichjlažda'oguo'. ²³ Nachbia' da' mal dan' yo'o lo' yichjlažda'oguo' chnabi'an le' na' ngo'on le' nez malen'.

²⁴ Nach Simónna' boži'e xtižen' gože' le':

—Le nab goclen lao Xancho' cont ne to da' mal dan' bačh gwnao' nga bi gac chia'.

²⁵ Na' Pedroa' len Juanna' cate' beyož goseyixjue'ede' xtiža' Diosen' lo' ciuda Samarian' na' beyož goso'e diža' can' ba goclen Xancho Jesucriston' legaque', nach jaya'aque' Jerusalénna'. Na' šlac zjaya'aque'na' goseyixjue'ede' xtiža' Xancho Jesucriston' len bene' ca' že' yezica'chle yež ca' gan' mbane distritw Samaria.

Felipe na' bene' Etiopía

²⁶ Nach Xancho Diosen' gwsele' to angl bene' gože' Felipe:

—Gwej gan' xoa nez dan' chetj Jerusalénna' na' chden latje dašen' chžinen yež dan' nzi' Gaza.

²⁷ Nach Felipe gwlo'e nezen', na' šlac zeje' ble'ede' to bene' nación Etiopía zeyo'e to lo' carret zeze'e gwyeje' Jerusalénna' jexene' Diosen'. Le' naque' to bene' blao na' ba none' le' capar cont gone' xšin no'ole gwnabia' che bene' Etiopía ca', šo'o lo' ne'e mechw che'. Na' no'ole gwnabian' le' Candace. ²⁸ Na' ben' yo'o lo' carreten' chlabe' libr dan' bzoj da' Isaíasen' ben' be' xtiža' Diosen' cani'. ²⁹ Nach Spiritw che Diosen' gožen Felipen':

—Jayxen carreten' na' gwyejlene' txen.

³⁰ Nach gwza'ses Felipen' cont jayxene' carreten' na' cate' bžine' gała'ze bende' chlab ben' libr dan' bzoj da' Isaíasen'. Nach gože'ne':

—¿Chejni'ido' dan' chlabo'na'?

³¹ Na' bene' Etiopían' boži'e xtižen' gože' Felipen':

—¿Nacxe gac šejni'ida' da' ngan', le gague no nla' no gwzejni'ide' nedan'?
 Nach gota'yoede' Felipen' cont gwyo'e lo' carreten' gwche'lene'ne'.

³² Na' gan' chlabe'na' nyojen žan:

Ca to xila' be nxob bene' cont gote'ba',

na' ca to xila' dao' be bi chosya'a cate' chšibe'ba',
can' bene', bibi gwne' caten' gosezi' gosebague'ne'.

³³ Na' gosone' le' ca to bene' bibi zaca'.

Na' bi gosone' yela' justis che' ca cheyala' gaquen.

Na' nono diaža che' nita', le goseque'e yela' mban che' lo yežlio nga.

³⁴ Nach bene' Etiopían' gože' Felipen':

—Benšca goclen gwna neda' no chen' ža ben' bzoj Xtiža' Diosen' ca', ¿che cuinen' že' ca' o še che bene' yoble?

³⁵ Nach Felipen' gwzologüe' bzejni'ide' bi zejen dan' chlab bene' Etiopían', gože' le' diža' güen che Jesús'en'. ³⁶ Na' ca' chac, besežine' ga žia nis, nach bena' gože' Felipen':

—Nga žia nis, ¿cibi gac soa' nisen' na'a?

³⁷ Nach Felipen' gože'ne':

—Še chejnilažo' Jesucriston' do yichj do lažo', guac so' nisen'.

Nach gwne':

—Chejli'a Jesucriston' naque' xi'in Diosen'.

³⁸ Nach bene' mandadw bcueze' carreten' na' betj Felipen' len bene' Etiopían' jasežo'e lo' nisen' cont Felipen' bzoe'ne' nis. ³⁹ Na' cate' besyechoje' lo' nisen', Spiritw che Diosen' la' beche'eten Felipen' ga yoble, na' bich ble'e bene' Etiopían' le'. Na' mbalaz beza' ben' beyo'e lo' carreten'. ⁴⁰ Nach Felipen' bžine' yež dan' nzi' Azoto na' gwzologüe' gwdixjue'ede' diža' güen che Jesucriston' to to yež da' zjachi' gała'ze ga gwdie' bžinte' Cesarean'.

9

Diosen' bocobe' yichjlaždao' Saulon' (Hch. 22:6-16; 26:12-18)

¹ Na' Saulon' con chdacze' cho'e diža' can' chaclaže' gote' bene' chesejnilaže' Xancho Jesucriston' na' chdacze' cheyljwlaže' nacle gone' gote' legaque'. Na' da'nan' Saulon' gwyeje' lao bxoz blao che bene' Israelen', ² na' gwñabde'ne' gwzoje' to yiš da' goxe' yosolab bene' že' to to yodao' nita' ciuda Damasco cont yesenezde' nape' yela' gwnabia' sene' bene' ca' ba chesejnilaže' Jesucriston' na' gwcheje' legaque' cont che'e legaque' ciuda Jerusalénna' la'czla' bene' byo o la' no'ole. ³ Cate' beyož bnežjue'ne' yišen' gwlo'e nez, na' ba zoa žine' ciuda Damascon' cate' zejzenez to be'ni' da' za' yaban' gwyečhjen le'. ⁴ Na' gwbiže' lo' yon'. Na' bende' che' to bene' le':

—Saulo, ¿bixchen' chči chsaco' neda'?

⁵ Na' Saulon' boži'e xtižen' gože' le':

—¿No le' bene'?

Nach bena' gože'ne':

—Nedan' Jesús ben' chči chsaco'. Na' dan' chgue'edo' neda', chone zi' cuino' can' chac che to go'ñ be chlibe lo' ya dan' zoa lo' carroš cheba'.

⁶ Na' do chaž chžebze' gože' le':

—Xana' Jesús, ¿bin' chaclažo' gona'?

Nach Xancon' gože'ne':

—Beyas na' gwyej ciuda Damascon' na' zoa to bene' ye'e le' da' cheyala' gono'.

⁷ Na' bene' ca' zja'aclen Saulon' benit bečol gosac lo' yichjlažda'ogaque'na' catec besežebe' dan' goquen', le gosende' ši'i bene' perw nono besele'ede'.

⁸ Nach beyas Saulon', perw cate' bexa' lagüen' con bich ble'ede'. Nach bene' ca' nžague'na' gosoxe' ne'e goseche'ene' Damascon'. ⁹ Na' šone ža gwzoe' sin cbi ble'ede' na' bi güe'ej gwdagüe'.

¹⁰ Na' zoa to bene' chejnilaže' Xancho Jesucriston' Damascon' bene' le Ananías, na' Ananíasen' ble'edagüede' Xanchon'. Na' Xanchon' gože'ne':

—Ananías.

Na' boži'e xtižen' gwne':

—Nga zoa', Xana'.

¹¹ Nach Xanchon' gože'ne':

—Gwzoža' na' gwyej liž Judas dan' zoa cay dan' chesene' Nez Licha, na' nabo' to bene' le Saulo, to bene' ciuda Tarso. Ba chol güiže' neda'. ¹² Na' ba bena' cont ble'edagüede' le' gwyo'o gan' zoe'na' na' gwxo'oa nao' yejlagüe'na' cont yele'ede'.

¹³ Nach Anaiásen' boži'e xtižen' gože' le':

—Xana', ba benda' bene' zan cheso'e xtiža' bena', ca nac da' mal juisyw ba bene' Jerusalén len bene' ca' ba gwlejo' cont zjanaque' lo' nao'. ¹⁴ Na' chesene' ze'e nga noxe' yiš che bxo'z gwnabia' ca' cont sene' yogo'lol'neto' chejnilaže'to' le'.

¹⁵ Nach Xancho Jesucriston' gože' Ananíasen':

—Gwyej, le ba gwleja' Saulon' cont šjazejni'ide' xtiža' len bene' cbi zjanac bene' Israel na' len rey čegaque' ca', na' lente le'e nacle bene' Israel. ¹⁶ Na' gwlo'eda'ne' ca' nac da' yaše' da' zi' da' gac che' dan' gwzenague' čhia'.

¹⁷ Nach Ananíasen' gwyeje' gan' zoa Saulon' na' gwyo'e lo' yo'ona' na' gwxo'oa ne'e yejlao Saulon', gože'ne':

—Bene' migw Saulo, Xancho Jesúsén' ben' blo'elagüe' le' tnez gan' za'ona' ba gwsele' neda' zede'na'a le' cont yele'edo' na' soa Spiritw čhe Diosen' len le'.

¹⁸ Nach la' besyeyinjte da' ca' že' lo' yejlagüen', zjanaquen ca' yid bdi'ej, na' la' bele'etede'. Nach gwzože'e cont gwyeje' gan' gwzoe' nisen'. ¹⁹ Ca beyoža' gwdagüe' na' beyaclaže'. Na' bega'ane' Damascon' yeto' chop ža len bene' ca' chesejnilaže' Xanchon'.

Saulon' be'e xtiža' Diosen' Damascon'

²⁰ Na' la' gwzolaote gwyeje' to to yodao' be'e diža' čhe Jesúsén', gwne' len' naque' Xi'in Diosen'. ²¹ Na' yogo' bene' ca' chesende' xtiže' dan' cho'ena' besyebande' na' chese' lježe':

—¿Gague bengan' chda chonit cholane' bene' ca' chesejnilaže' Jesúsén' ciuda Jerusalénna'? na' ¿gague da' na'czen' bide' nga na'a cont gwčheje' bene' ca' na' šjasane' legaque' lao bxo'z gwnabia' ca'?

²² Na' Saulon' tža tža Diosen' goclene'ne' cont be'e diža' čhe Jesúsén' tcho'a, gwne' Jesúsén' naque' ben' gwse'la' Diosen' cont nabi'e. Na' bene' Israel ca' že' Damascon' bi beseželde' bin' yesene', le gosache'ede' dan' che'e legaque' naquen da' li.

Saulon' bi goque' lo' na' bene' ca' chesegue'ede' le'

²³ Na' cate' ba goc sša choe'len Saulon' bene' Damasco ca' xtiža' Jesucriston' nach bosoxi'a bene' Israel ca' yesote'ne'. ²⁴ Na' gosenite' chesape' to to cho'a puert čhe ze'ena' dan' nyečhj ciudan' cont yesezene' Saulon' yesote'ne' bate'teze choje', perw na' Saulon' goche'ede' ba zjachi'na'ogüe'ne'. ²⁵ Na' bene' ca' chesejnilaže' Jesucriston' besyeletje'ne' le'e ze'e dan' nyečhj ciudan' šeže'le besyegüe'ene' to lo' žome cont goc bechoje' lo' ciudan'.

Gwyej Saulon' Jerusalénna'

²⁶ Nach beze'e beyeje' Jerusalén. Na' cate' bežin Saulon' ciuda Jerusalénna' goclaže' gone' txen bene' ca' chesejnilaže' Jesucriston', perw yogo'lole' besežebe' le', bi gosejle'e še da' li ba chejnilaže' Jesucriston'. ²⁷ Nach Bernabé gwče'e Saulon' ja'aque' gan' že' postlw ca' na' be'lene' legaque' diža' can' goc ble'e Saulon' Xancho Jesúsén' šlac ngüe'e nez zeje' Damascon' na' can'

goc Xancho' be'lene' Saulon' diža'. Na' lecze gož Bernabén' legaque' Saulon' ba be'e xtiža' Jesúsén' Damascon' sin cbi bžebe'. ²⁸ Nach postlw ca' gosejle'e can' goc che Saulon', na' gwzolaogwdalen Saulon' bene' ca' chesejnilaže' Jesucriston' Jerusalénna'. ²⁹ Na' sin cbi bi chaž chžebe' gwzolağüe' chzejni'ide' bene' Israel ca' diža' che Xancho Jesúsén', con bene' chesac diža' griego. Bene' byen bzejni'ide' legaque' xtiža' Diosen', perw na' legaque' gosacłaže' yesote'ne'. ³⁰ Na' cate' bene' ca' chesejnilaže' Jesucriston' Jerusalénna' gosacbe'ede' ba zjachi'na'ogüe' yesote'ne', nach goseche'ene' ja'aque' ciuda Cesarea na' besyesele'ne' ciuda Tarso.

³¹ Na' bene' ca' chesedop chesežague' chesonxene' Jesucriston' doxen distritw Judean', distritw Galilean' na' distritw Samaritan' gosenite' binlo, noch no bosochi bososaca' legaque', na' gosenita'chache' gosejnilaže' Xancho Jesúsén' na' bosozenague' che' do yichj do laže'gaque'. Na' Spiritw che Diosen' benen cont gosacchach laže'gaque' na' benen cont gwyane'.

Beyac ben' le Eneas

³² Ca nac Pedroa' cheje' to to yež gan' že' bene' ca' ba gwlej Diosen' cont zjanaque' lo ne'e chjane'e legaque'. Na' to ža gwyaje' jane'e bene' ca' že' yež dan' nzi' Lida. ³³ Na' yež Lidan' jati'e to bene' le' Eneas. Ba chac xono' iz de' che'ede', natzi' late' cuerp che'na'. ³⁴ Nach gož Pedroa' le':

—Eneas, Jesucriston' cheyone' le'. Gwyas na' btob xcamo'na'.

Nach la' gwyaste bena'. ³⁵ Na' yogo'lol bene' že' Lidan' na' bene' že' yež dan' nzi' Sarón besele'ede' bena' ba beyacde' na' gosebejyichje' costumbr chegaque' cont gosejnilaže' Xancho Jesucriston'.

Dorcas bebane' ladjo bene' guat ca'

³⁶ Na' ca tiemp na', to ciuda dan' nzi' Jope zoa to no'ole le' Tabita, na' diža' griego le' Dorcas. Na' chejnilaže' Jesucriston' na' zoe' chone' da' güen na' chaclene' no bene' yaše' bene' chyažj chchine'. ³⁷ Perw na' gocšene Dorcasen' na' gottechgüe', na' bosoguaže'ne' na' gosexoe'ne' to lo' cuart da' zoa yichj yo'o cha'te. ³⁸ Na' gała'ze chega'an yež Lidan' len Jopen', na' bene' ca' chesonxen Jesucriston' Jopen' gosenezde' Pedroa' zoe' Lidan'. Nach gosesele' chope bene' jasata'yoede' Pedroa' gose'ene':

—Benšca goclen yo'o len neto' netec na'a.

³⁹ Na' Pedroa' la' gwza'te' gwyaje' len bene' ca'. Na' cate' besežine' Jopen', goseche'ene' lo' yo'o gan' xoa bene' guaten', na' la' gosebiga'te yogo' no'ol güezebe lagüe'na' chesebeže' chosolo'ede' le' lache' dan' ben da' Dorcasen' šlac gwbane', no vestidw na' no camis. ⁴⁰ Nach Pedroa' bešaše' yogo'lol bene' ca' chyo'ole na' bzoa xibe' bol güiže' Diosen'. Na' beyechje' chne'e cuerp che no'olen', na' gože'ne':

—Tabita, gwyas.

Nach la' bexa'te yejlao da' Dorcasen' gwne'e Pedroa' na' la' bebe'te'. ⁴¹ Nach Pedroa' bexae' ne'ena' bsože'e le', nach goxe' no'ole güezeb ca' na' yezica'chle bene' ca' zjanaque' lo na' Diosen' na' blo'ede' legaque' ba beban Dorcasen'. ⁴² Na' yogo'lol bene' Jopen' gosende' can' goquen', na' bene' zanch gosejnilaže' Xancho Jesucriston'. ⁴³ Na' Pedroa' bega'ane' Jopen' zan ža, gwzoe' liž to bene' le Simón, bene' chonšagüe' yid.

10

Pedroa' na' Cornelio

¹ Na' ciuda Cesareana' zoa to bene' le Cornelio, naque' xan to gayoa soldadw, na' bosozoa la soldadw che' ca' Bene' Italia. ² La'czla' Cornelion' cbi

naque' bene' Israel, benxene' Diosen', na' lecze ca' goson bene' lo' yo'o che', chesezoe' chesape' Diosen' bala'an. Na' Cornelion' chaclenteze' bene' Israel bene' chyažj chchine', na' zoateze' chol güiže' Diosen'. ³ Na' goc che', to ža do cheda šone ble'edagüede' to angl bene' gwseła' Diosen' gwyo'e gan' zoe'na', na' anglen' gože'ne':

—Cornelio.

⁴ Nach Cornelion' chna'chgüe' lao anglen' na' do chžebe' gože'ne':

—¿Bixen' Xana'?

Nach gož anglen' le':

—Diosen' neзде' can' zo' chol güižo'ne' na' chnežjo' dan' cheseyažje bene' yaše', na' Diosen' chaclaže' gaclene' le'. ⁵ Da' nga gono' na'a, gwseła' bene' šjasexi'e to bene' zoa ciuda Jopen' bene' le Simón na' lecze le' Pedro. ⁶ Zoe' liž to bene' chonšagüe' yid. Bena' lecze le' Simón, na' liž ben' zoan cho'a nisdao'. Na' Simón Pedroa' ye'e le' bin' cheyalā' gono'.

⁷ Cate' beza' anglen' Cornelion' goxe' chope mos che' na' to soldadw bene' chaclen le', na' soldadoa' lecze chonxene' Diosen'. ⁸ Na' Cornelion' bzejni'ide' legaue' yogo'lolte can' goquen' nach gwsele' legaue' Jopen'. Na' gosegüe'e nez zja'aque'.

⁹ Na' beteyo gala'ze ba zja'aque' za' yesežine' ciuda Jopen' cate' Pedroa' gwloe' yichjo'o che yo'o gan' zoe'na' ca do guagwbiž cont jel güiže' Diosen'. ¹⁰⁻¹¹ Na' šlac choe'lene' Diosen' diža' gwdonchgüe', con goclaže' gagüe' cate. Na' šlac chac dan' gagüe'na', ble'edagüede' le'e yaban' chetj to lache' xen na' nchej tap squinen na' chetjen gan' zoe'na'. ¹² Na' lo'enna' zjaže' yogo' cuen beyixe' že' yežlion', be žia tap ni'a na', na' be chososa' le'eban' lo yo, na' len be žia xil be chaš le'e yaba. ¹³ Nach bende' gož Diosen' le':

—Gwyas Pedro na' betw be ca' gwdagw.

¹⁴ Nach Pedroa' gože'ne':

—Bi gagua' legacba' Xana'. Ne tni'a biña' gagua' be zban zjanac ca', le cbi de lsens len ley cheto'na' gagwto' ben' zjanac ca'.

¹⁵ Nach Diosen' gože' le' da' gwchope:

—Ben' bach gwnia' gago' bi nao' be zban zjanacba'.

¹⁶ Da' gwyon ni'a gož Diosen' le' ca' nach la' begüete lachen' le'e yaban'. ¹⁷ Šlac chacžejlaže' Pedroa' bi zejen dan' ble'edagüeden', besežin bene' ca' gwseła' Cornelion' cho'a puert liž Simón ben' chonšagüe' yiden', le ba gosenabe' gan' zoa liže'na'. ¹⁸ Nach zižje gosenabe' še le na' zoa to bene' lecze le Simón Pedro. ¹⁹ Na' Pedroa' ne' chone' xbab che dan' ble'edagüede', cate' gož Spiritw che Diosen' le':

—Simón, šone bene' chesyeyiljue' le'. ²⁰ Gwzoža' na' beyetj cont šejleno' legaue', na' bi gacžejlažo' la'czla' bi zjanaue' bene' Israel, le neda' gwseła' legaue'.

²¹ Nach Pedroa' beyetje' jašague' bene' ca' gwseła' Cornelion', nach gože' legaue':

—Nga zoa', nedan' Simón Pedro. ¿Bičhen' cheyiljwle neda'?

²² Nach gose' bene' ca' le':

—To xan soldadw bene' le Cornelio gwsele' neto'. Le' zejczze' chone' da' güen na' chonxene' Diosen' na' yogo'lol bene' Israel ca' cheso'e xtiže' ca bene' šagüe' naque'. To angl che Diosen' gože' le' yedenabe' šejo' liže'na' cont gwzenague' chio' še bin' yo'one'.

²³ Nach gwlo'o Pedroa' legaue' yo'o na' besyega'anlene' le' tže'. Nach beteyo Pedroa' gwyase' gwyejlene' legaue' na' gwche'e to chope bene' Jopen' bene' chesejnlaže' Jesucriston'.

²⁴ Na' beteyo cate' besežine' ciuda Cesarean', Cornelion' bač ntobe' biše' lježe' len xmigüe' ba zjažie' liže'na' chesebeze' le'. ²⁵ Na' cate' bžin Pedroa' liž Cornelion' la' bchojte Cornelion' bšague'ne' na' bzoa xibe' lagüe'na' benxene'ne'. ²⁶ Na' Pedroa' bsože'e le', gože'ne':

—Bezoža'. Lecze benač neda'.

²⁷ Na' ne' choe'lente' le' dižan' ca' cate' gwyo'o Pedroa' lo' yo'on na' ble'ede' bene' zan ba že' lo' yo'ona'. ²⁸ Nach gože' legaque':

—Nezeczele ley che neto' bene' Israel žan bi cheyała' šo'to' liž bene' bi zjanaque' bene' Israel, na' žan bi cheyała' gonto' txen len le'e bi nacle bene' Israel. Perw bač bzejni'i Diosen' neda' ne to bene' cbi cheyała' gona' xbab che' naque' bene' zban par šo'a liže'na'. ²⁹ Da'nana' cate' bene' quinga bedesexi'e neda', bi gocžejlaža' še nacle gona', san ba bida' do yichj do laža', na' na'a chaclaža' nezda' žbixchen' gwnio' neda'?

³⁰ Nach Cornelion' gože'ne':

—Na'a chac tap ža do cheda šone zoa' sin chibi nagua', na' chol güiža' Diosen' liža' nga, cate'cze ble'eda' to bene' byo lagua'na' nyaze' to lache' da' chgo'oten be'ni'. ³¹ Nach gože' neda': “Cornelio, ca nac da' gwnabdo' Diosen', bač bzenague' chen, na' nezde' chnežjo' da' chyažj da' chchine' bene' yaše'. ³² Na' na'a gwsela' to chope bene' šjasexi'e to bene' zoa ciuda Jopen' bene' le Simón Pedro. Zoe' liž to bene' lecze le Simón, to bene' chonšagüe' yid. Liž ben' chonšagüe' yiden' zoan gala'ze cho'a nisdao'. Na' cate' la' Pedroa' ližo' nga nach güe'lene' le' diža'.” ³³ Nach la' gwsela'tia' bene' ca' bedesexi'e le', na' choxclenteco' bač bido'. Na' nezce Diosen' yogo'to' nita'to' nga gwzenagto' yogo'lolte dan' ba ben Diosen' mandadw nao'.

Pedroa' be'e diža' liž Cornelion'

³⁴ Nach Pedroa' gwzolagüe' be'e dižan' gwne':

—Da' li bač nezda' nono nla' bene' nacho nzoa Diosen' le' to šla'aze. ³⁵ Gate'teze bene' nación con bene' chesonxen Diosen' do yichj do laže' na' chesone' da' güen, Diosen' chbede' legaque'. ³⁶ Diosen' gwduxjue'ede' neto' bene' Israel guac soato' binlo len le' še šejnilaže'to' Xi'ine' Jesucriston' bene' naque' Xan yogo'lol bene'. ³⁷ Nezele dan' ba goc doxen distritw Judean' dan' gwzolaog distritw Galilean' gwde gwduxjue'e da' Juanna' xtiža' Diosen' na' bzoe' bene' nis. ³⁸ Nezele Diosen' gwleje' Jesúsena' ben' naque' bene' yež Nazaret cont chaclene' chio' benač, na' be'ene' Spiritw che'na' na' yela' chnabia'. Na' gwda Jesúsena' bene' da' güen na' beyone' yogo'lol bene' ca' chsaca'zi' Satanás dan' chnabia' da' xigüe' ca', le Diosen' zoe' len le'. ³⁹ Neto' nezeto' na' choe'to' diža' che yogo' da' güen da' ben Jesúsena' na' dan' bsd blo'ede' distritw Judean' na' ciuda Jerusalénna'. Na' choe'to' diža' can' gosote'ne' bosode'ene' to le'e yag cruz. ⁴⁰ Perw na' Diosen' bečhis bosbane'ne' ladjo bene' guat ca' beyon ža na' ben Diosen' cont Jesúsena' blo'elagüe' neto'. ⁴¹ Gague yogo'lol bene' besele'ede' Jesúsena' caten' bebane' ladjo bene' guat ca', perw Diosen' gwleje' neto' cont choe'to' xtiže'na' na' bene' cont ble'eto'ne'. Na' neto' güe'ej gwdagwlento'ne' txen gwde bebane' ladjo bene' guat ca'. ⁴² Jesúsena' bene' mandadw chixjue'eto' benačhen' Diosen' bzoe' le' gone' yela' justisen' len yogo' bene' zjamban na' len yogo' bene' ba gosat. ⁴³ Na' da' ca' bosozoj yogo' bene' goso'e xtiža' Diosen' cani'te zjanyojen chesenana' note'tez bene' yesejnilaže' Jesucriston', Diosen' yezi'xene' xtola'gaque'na'.

Spiritw che Diosen' gwyo'on lo' yichjlaždao' bal bene' bi zjanaque' bene' Israel

⁴⁴ Ne' cho'ete Pedroa' diža'na' cate' Spiritw che Diosen' gwyo'on lo' yichjlaždao' yogo' bene' ca' chosozenag diža' dan' cho'ena'. ⁴⁵ Na' bene'

Israel ben' chesejnilaže' Jesucriston', bene' ca' zja'ac len Pedroa' liž Corne-
lion', besyebande' dan' gwyo'o Spiritw che Diosen' lo' yichjlaždao' bene' ca'
cbi zjanaque' bene' Israel. ⁴⁶ Gosache'ede' gwyo'o Spiritw che Diosen' lo'
yichjlaždao' bene' ca' že' liž Cornelion', le gosende' gosonxen bene' ca' Diosen'
goso'e diža' da' bi gosejni'ide' na' lecze gosonxene' Diosen' len xtiža'gaque'na'.

⁴⁷ Nach Pedroa' gože' bene' Israel ca' nžaguen':

—Bibi de da' gwžon yesezoa bene' quinga nisen', le nacbia' ba zoa Spiritw
che Diosen' len legaque' can' zoan len chio'.

⁴⁸ Nach Pedroa' bene' mandadw gosezoe' nis da' chesejnilaže' Jesucriston'.
Na' gosata'yoede' le' cont bega'ane' yeto chop ža.

11

Pedroa' gože' bene' Jerusalén ca' can' goquen'

¹ Na' postlw ca' na' yezica'chle bene' ca' že' distritw Judean' ben' chese-
jnilaže' Jesucriston' gosende' xtiža' bene' ca' bi zjanaque' bene' Israel lecze
ba chosozenague' xtiža' Diosen'. ² Nach Pedroa' beze'e gwyejche' ciuda
Jerusalénna' gan' nita' bene' Israel ben' chesejnilaže' Jesucriston' na' legaque'
goseñelagüe' che', ³ gose'ene':

—¿Bixchen' ba gwyejo' gan' že' bene' cbi zjanaque' bene' Israel na' jatag-
wleno' legaque'? Malen' ba beno'.

⁴ Nach Pedroa' gwzolagüe' be'lene' legaque' diža' tcho'a yogo' dan' goc che',
gože' legaque':

⁵ —Šlac zoa' ciuda Jopen' chol güiža' Diosen', ble'edagüeda' ca to lache' xen
nchej dapte squin ca' chetjen le'e yaban' zan' gan' zoa'na'. ⁶ Na' gwna'yaña'
na' ble'eda' lo'enna' že' beyixe' ca' chaš yežlion' be žia tap ni'a na', na' ble'eda'
be chososa' le'eban' lo' yo, na' be žia xil be chaš le'e yaba, na' bal be ca'
zjanacha' be znia. ⁷ Na' benda' gož Diosen' neda': "Gwyas Pedro, na' betw
be ca' gwdagw." ⁸ Nach boži'an gwnia': "Xana', bi gagua' legacba'. Ne tni'aze
bina' gagua' be zban zjanac ca', le bi de lsens len ley cheto'na' gagwto' ben'
zjanac ca'." ⁹ Na' da' gwchop ni'a Diosen' gwne': "Be bač gwnia' gago'
bi nao' zjanacha' be zban." ¹⁰ Šon ni'a gože' neda' ca' nach begüe lachen'
le'e yaban'. ¹¹ Za' beyož ble'edagüeda' da'na' cate' besela'ac šone bene' byo
gan' zoa'na' bene' za'ac ciuda Cesarean' chesyeyiljue'nda'. ¹² Na' Spiritw che
Diosen' bzejni'in neda' cheyala' ša'alena' legaque' sin cbi gacžejlaža', na' gwchi'a
bene' lježcho quinga xop, gwyejto' Cesarean' bžinto' liž ben' le Cornelio na'
gwyo'oto' ližen'. ¹³ Nach Cornelion' be'lene' neto' diža' can' blo'elao to angl le'
liže'na' na' anglen' gože'ne': "Gwseła' bene' šja'ac ciuda Jopen' šjasexi'e to bene'
le Simón Pedro. ¹⁴ Bena' ye'e le' len bene' lo' yo'o chio' nac gonle cont gata'
yela' mban chele toli tocañe." ¹⁵ Nach cate' gwzolagua' bia' dižan' len bene'
ca' že' liž Cornelion', Spiritw che Diosen' gwyo'on lo' yichjlažda'ogaque'na' can'
gwyo'on lo' lažda'ochon' cana'. ¹⁶ Nach jaysa'laža' xtiža' Xancho Jesucriston'
can' gwne': "Da' zaque' ben Juan da' bzoe' bene' nis, perw da' zaca'che'
gac chele cate' yedesoa Spiritw che Diosen' lo' yichjlažda'olen' nabi'an le'e." ¹⁷ Na' ba ben Diosen' cont zoa Spiritw che'na' lo' yichjlažda'ogaquen' dan'
gosejnilaže' Xancho Jesucriston' can' ba bene' len chio' chejnilaže'chone', na'
žnox naca' neda' gwžona' gon Diosen' dan' chaclaže' gone'?

¹⁸ Na' ca' beyož bosozenague' xtiža' Pedroa' bich bi gosene' che Pedroa' dan'
gwyeje' liž Cornelion', san goso'e yela' choxcen che Diosen', gosene':

—Na'a ba nezecho lecze len bene' ca' bi zjanaque' bene' Israel chazlaže'
Diosen' yesyetingde' xtola'gaque'na' cont gwnežjue' yela' mban chegaque' toli
točan.

Bene' ca' chesonxen Jesucriston' ciuda Antioquía gan' mbane Siria

¹⁹ Na' gwde gosot bene' Israel ca' Estebanna', gosezolagüe' bosochi bososaca'chgüe' yezica'chle bene' ca' chesejnilaže' Jesucriston', nach bene' ca' chesejnilaže'ne' gosasłase'. Bale' ja'aque' do distritw Fenicia, na' yež ca' zjachi' to lo yežlio da' žia lo' nisdaon' gan' nzi' Chipre na' do ciuda Antioquía ga mbane distritw Siria. Na' gan' zja'aquen' bososed bosolo'ede' con bene' zjanac bene' Israel xtiža' Jesús'en', bi bososed bosolo'eden' bene' cbi zjanaque' bene' Israel. ²⁰ Perw na' to chope bene' Chipre na' bene' ciuda Cirene lecze bosoxonje' ja'aque' ciuda Antioquían', na' gosezolagüe' goseyixjue'ede' diža' güen che Xancho Jesucriston' len bene' ca' cbi zjanaque' bene' Israel. ²¹ Na' Xanchon' goclene' legaque' len yela' guac che'na' na' bene' zan gosebejyichje' da' ca' chesejnilaže' na' gosejnilaže' Xanchon'.

²² Na' cate' bene' ca' chesejnilaže' Jesucriston' ciuda Jerusalénna' gosende' can' ba chac ciuda Antioquían', nach bosose'e Bernabén' cont gwyeje' Antioquían'. ²³ Na' cate' bžin Bernabén' Antioquían', ble'ede' da' li ba goclenchgua Diosen' bene' ca', na' bebechgüede'. Nach gwneyoede' legaque' nita'chache' yosozenague' che Xanchon' do yichj do laže'. ²⁴ Bernabén' naque' to bene' güen, na' chejnilaže'chgüe' Jesucriston' na' Spiritw che Diosen' zoachguan len le'. Na' zanch bene' Antioquían' gosejnilaže' Jesucriston'.

²⁵ Gwde na' Bernabén' gwze'e zeje' ciuda Tarson' jaydiljue' Saulon', nach cate' beželde' le', gwche'ene' Antioquían'. ²⁶ Na' gosenite' Antioquían' tgüiz gosone' txen len bene' Antioquía ca' chesedop chesežag chesonxene' Jesucriston' na' bososed bosolo'ede' bene' zan. Na' Antioquía na'tequen' gwzolao bososi'e bene' ca' chesejnilaže' Jesucriston' bene' cristian da' chosozenague' che Criston'.

²⁷ Šlac nita' Bernabén' na' Saulon' lo ciuda Antioquían', besežin bał bene' Jerusalén ben' chosozende' bene' bi dan' ba gož Diosen' legaque'. ²⁸ Na' cate' bene' ca' besežinna', toe' bene' le Agabo gwzeche' lao bene' ca' zjandop zjanžag chesonxen Jesucriston' be'e diža' can' ba bzejni'i Spiritw che Diosen' le', gwne' doxen yežlion' gata' to gwbin juisyw. Na' cate' bžin ža gwnabia' ben' le Claudio doxen gan' mbane nación Roman', cana' goc gwbinna' can' gwna Agabon'. ²⁹ Nach bene' ca' chesedop chesežag chesonxene' Jesucriston' Antioquían' bosoxi'e yosotobe' mechw cont yeseselen' yesaclene' bene' lježgaquen' chesonxen Jesucriston' gan' mbane distritw Judean'. Na' bosoxi'e to toe' yosonežjue' gaca'te' da' gac yosonežjue'. ³⁰ Na' gosone' can' bosoxi'ena' nach gosesele' Saulon' len Bernabén' distritw Judean' jasenežjue' mechon' bene' ca' chosogüia chesene'e bene' chesejnilaže' Jesucriston' ciuda Jerusalénna'.

12

Gosote' Jacobon' na' goseyixjue' Pedroa' ližya

¹ Na' ca tiempa' rey Herodes bchi bsaque' bał bene' ca' chesonxene' Jesucriston'. ² Nach bene' mandadw gosote' Jacobo bene' biše' Juanna' len spada. ³ Na' gocbe'e rey Herodesen' chesyebe bene' Israel ca' dan' bene' mandadw gosote' Jacobon', nach bene' mandadw gosezene' Pedroa' cate' gola' lni cate' chesagüe' yetextil dan' bibi levadura nchixen. ⁴ Nach Herodesen' gwduxjue'ene' ližya na' gwsele' šino'to soldadw bene' gosape' ližyan', tap güeje' do ža do yel. Herodesen' bene' xbab cueje'ne' ližyan' te lnin' cont gone' yela' justis che' lao bene' že' lo ciudad'. ⁵ Soldadw ca' gosapchgüe' Pedroa' šlac de ližyan', perw na' ca nac bene' ca' chesejnilaže' Jesucriston', gosenabchgüede' Diosen' gaclene' Pedroa'.

Diosen' bebeje' Pedroa' ližyan'

⁶ Na' to že' ca gw̄xeze ngüia Herodesen' cueje' Pedroa' ližyan' cont gone' yela' justis che', Pedroa' de' chtase' ladjo chope soldadw na' ncheje' chope gden, na' lecze nita'te soldadw bene' chesape' cho'a puert ližyan'. ⁷ Cate'cze zejzenez to angl bene' gwseła' Xancho Diosen' bžine' lo' ližyan' gan' de Pedroa' na' gwyeni'chgua lo' ližyan'. Anglen' bte' cuit le'e Pedroa' bosbane'ne', gože'ne':

—Netec na'a gwyas.

Na' la' besyeyežte gdenna' zjanchej na' Pedroa'. ⁸ Nach gož anglen' le':

—Bego'o xpanto' na' bolej xelon'.

Nach ben Pedroa' ca'. Nach gož anglen' le':

—Bechele xadon chio' na' beyo'o len neda'.

⁹ Nach bechoj Pedroa' zena'ogüe'ne' perw bi gocbe'ede' še da' li anglen' chon ca' len le', con gocde' še chle'edagüede'. ¹⁰ Beyož besyedie' chop cuen gan' nita' soldadw ca' chesape' ližyan', besyēžine' gan' zoa puert zaguanna' dan' nac de ya gan' chesechoje' cont chja'aque' la cay, con to gualazze puerten' byaljon cont besyechoje', na' cate' ba gosa'aque' late' nach anglen' bocua'ane' Pedroa' toze'. ¹¹ Cana'ch gocbe'e Pedroa' da' li ba bechoje' ližyan', nach gwne':

—Ba cheyacbe'eda' da' licze Xana' Diosen' ba gwsele' angl che'na' na' bosle' neda' lo' na' Herodesen' na' bosle' neda' lo' yogo' da' ca' chesaque bene' Israel gualaž chia' ca' yesonde' neda'.

¹² Na' ne' chonte Pedroa' xbaben' ca', gwze'e gwyeje' liž María xna' Juan ben' lecze le Marcos. Na' liž Marían' zjandop zjanžag bene' zan chosol güiže' Diosen'. ¹³ Nach bsiže' cho'a puert zaguanna' na' la' bchojte to bi' no'ole le Rode ja'na'be' non'. ¹⁴ Na' cate' bžimbe' cho'a puerten' beyombia'be' ši'i Pedroa', na' tantw bebebe' bi gwsaljwbe' puerten' san beyejsesbe' gan' že' bene' ca' jayežbe' legaque' ba bla' Pedroa'. ¹⁵ Nach gose'ebe':

—¿Gague chactonto'na'?

Perw lebe' nezczebe' le'na'. Nach legaque' gose'ebe' naquen bxin che'.

¹⁶ Perw Pedroa' ne' chsižcze' cho'a puerten'. Nach ja'aque' gosesaljue'. Cate'cze besele'ede' le'na' besyebande'. ¹⁷ Nach Pedroa' bene' señw len ne'e cont gosonite' šize bosozenague' be'e diža' can' goc bebej Xancho Diosen' le' ližyan'. Nach lecze gože' legaque' cheyała' yosozende' Jacobon' na' yezica'chle bene' lježgaque' can' ba goquen'. Nach beze'e zjayde' ga yoble.

¹⁸ Nach cate' gwyeni', yela' güeban juisyw gwnita' soldadw ca' na' gosoe' diža', gosene':

—¿Bixen' goc len Pedroa'?

¹⁹ Nach rey Herodesen' bene' mandadw jasyediljue' Pedroa' na' gwñabde' soldadw gop ca' nac goquen' bele'. Perw soldadw ca' bibi rson bosonežjue'. Nach bene' mandadw gosote' soldadw ca'. Nach gwza' Herodesen' distritw Judean' jazoe' ciuda Cesarea.

Got rey Herodesen'

²⁰ Ca horan' Herodesen' chža'achgüe' bene' ciuda Tiro na' bene' ciuda Sidón ca'. Perw na' bene' ca' beseyažjde' yesezi'e da' yese'ej yesagüe' gan' chnabia' rey Herodesen'. Da'na'na' bosocode' ljež bene' Tiro na' bene' Sidón ca' cont jasenezjue' mechw che ben' nac lo' ne'e gan' mbane Herodes, ben' le' Blasto. Gosone' ca' cont Blaston' gwñe' chegaque' lao reyen', le gosaclaže' gwzenag reyen' chegaque' cate' šja'aque' lagüe'na' šjasenabe' yesenite' binlo len le'. ²¹ Nach rey Herodesen' bžie' bia' to ža gwtobe' legaque' cont güe'e diža' laogaque'na'. Na' cate' bžin žan', reyen' gwyaz xalane' dan' nac xdan dan' chaze' cate' chone' yela' justis, nach gwchi'e xišne'e gan' chnabi'e na' be'e diža' lao bene' ca' že' žana'. ²² Nach bene' ca' bososye'e, gosene':

—Diosen' choe' diža', gague benachen'.

²³ Na' lo hora' gwsela' Xancho Diosen' to angl ben' ben cont gocšene reyen' gwže'e bzoga' lo' le'e na' gote'. Goc che' ca' dan' be'e latje gosonxen bene' le' gualaz da' yesonxene' Diosen'.

²⁴ Perw ca nac xtiža' Xancho Jesucriston' gos gwlaļjchguan.

²⁵ Na' Bernabén' len Saulon' beyož gosone' yogo' da' cheyaļa' yesone' ciuda Jerusalénna', nach besyeya'aque' jaya'aque' ciuda Antioquían'. Na' goseche'e to bene' le Juan na' ľecze lie' Marcos.

13

Bernabén' na' Saulon' ja'aque' jasedixjue'ede' xtiža' Jesucriston' yež zito'

¹ Na' len bene' ca' chesedop chesežag chesonxene' Jesucriston' ciuda Antioquían' zjančixe bene' cheseyixjue'ede' bene' yoble bi da' che' Diosen' legaue', na' zjalén bene' chososed chosolo'ede' xtiža' Diosen'. Na' legaue' zjalie' Bernabé, na' Simón ben' zjansi'e bene' gasj, na' Lucio bene' ciuda Cirene, na' Saulo, na' Manaén. Na' Manaénna' bgole' txen len rey Herodes ben' gwnabia' distritw Galilea. ² Na' to ža bene' ca' chesejnilaže' Jesucriston' gosone' gwbas zjandop zjanžague' chesonxene'ne' cate'cze gož Spiritw che Diosen' legaue':

—Le cuej Bernabén' len Saulon' cont yesone' xšina' con gate'teze sela' legaue'. ³ Nach bene' ca' bosol güižche' Diosen' sin cbi zjane'ej zjanagüe', nach gosexoa na'gaue' yichj Saulon' len yichj Bernabén', gosone' ca' cont gosegüe'e xšin Diosen' lo' na'gaue'. Gwdena' bosose'e legaue'.

Postlw ca' goso'e xtiža' Jesucriston' Chipre

⁴ Nach Spiritw che Diosen' gwselan' Bernabén' len Saulon' yež gan' nzi' Seleucia. Na' Seleuciana' goso'e lo' barcon' cont besežine' Chipre. Na' Chipren' naquen to yežlio dao' dan' chi' lo' nisdaon'. ⁵ Besežine' yež dan' nzi' Salamina gan' mbane Chipren' na' gosezomagüe' goseyixjue'ede' xtiža' Diosen' lo' yodao' che bene' Israel ca'. Na' zjanče'e Juan ben' ľecze le Marcos cont chaclene' legaue'. ⁶ Na' ca' gosaše' gosodie' doxen Chipren' besežine' yež gan' nzi' Pafos. Na' Pafosna' besežague' to bene' guaža' le Barjesús. Naque' bene' Israel na' chxoayague' že' chzende' bi dan' che' Diosen' le'. ⁷ Barjesúsen' naque' xmigw gobernador ben' le Sergio Paulo. Sergio Paulon' naque' to bene' chejni'ichgüe'. Na' le' goxe' Bernabén' na' Saulon', le goclaže' yosozende' le' xtiža' Diosen'. ⁸ Na' Barjesúsen' ľecze bososi'ene' Elimas, diža' griego zejen bene' guaža'. Le' goclaže' bi šejle' Sergio Paulo xtiža' Diosen' dan' choe' Bernabén' na' Saulon'. ⁹ Na' Spiritw che Diosen' zoachguan len Saulon' ben' ľecze le Pablo, nach bcos lagüen' gwŋa'chgüe' Elimasen'. ¹⁰ Nach gože'ne':

—Naco' xi'in Satanás dan' chnabia' da' xigüe' ca', yela' güexoayag chio' na' yela' bene' mal chio'. Bi chazlažo' bite'teze da' güen. ¿Bichen' cbi chbezo' chžono' yosozenag bene' diža' li che Xanto' Diosen'? ¹¹ Da'nán' Xanto' Diosen' gone' castigw chio' na' choló' to tiemp, bi gac le'edo' gwbiža'.

Nach la' gwcholtie', gwde ca to bejw lo' yejlagüe'na', nach gwzomagüe' chgan chtobe' cheyiljue' no goxe' ne'e cont cue' nez. ¹² Gobernadores' ble'ede' can' goquen' na' gwyejle'e xtiža' Xancho Jesucriston', na' bebanchgüede' can' ža dižan'.

Pablon' na' Bernabén' ja'aque' Antioquian' gan' mbane distritw Pisidia

¹³ Nach Pablon' len bene' ca' nžague'na' gosa'aque' yež Pafosen', goso'e lo' barcon' cont besežine' yež gan' nzi' Perge gan' mbane distritw Panfilia. Na' Juan ben' ľecze chese'e Marcos gwlejyichje' legaue' beyeje' Jerusalénna'. ¹⁴ Na'

Pablon' len Bernabén' gosa'aque' yež Perge na' besežine' ciuda Antioquían' gan' mbane distritw Pisidia. Na' cate' bžin ža che Dios nach ja'aque' yodao' che bene' Israel ca' dan' zoa na' na' jasechi'e. ¹⁵ Na' ca beyož blab to bene' libr gan' nyoj ley che Diosen' len dan' bosozoj bene' ca' goso'e xtiža' Diosen' cani', bene' ca' chesenabia' lo yodao'na' gosesele' to bene' gan' chi' Pablon' len Bernabén' na' gože' legaque':

—Bene' migw, še de bi diža' da' chaclaže'le güe'le neyoele bene' quinga, guac nalen na'a.

¹⁶ Nach Pablon' gwzechede' bene' señw len ne'ena' cont yosozenag bene' ca' zjachi'na', na' gože' legaque':

—Le gwzenag le'e bene' Israel na' nochle chonxenle Diosen'. ¹⁷ Dios ben' chonxen chio' bene' Israel gwleje' da' xozxta'ocho ca' na' goclene' legaque' cont yesaque' to yež xen šlac gosenite' nación Egipto gan' gosaque' bene' zito'. Nach Diosen' bebeje' legaque' Egipton' len yela' guac chen'. ¹⁸ Na' Diosen' gwdape' yela' chxenlaže' choa iz len da' xozxta'ocho ca' šlac gosaše' latje dašen'. ¹⁹ Diosen' bonite' gaž yež da' zjachi' gan' nzi' Canaán cont bnežjue' da' xozxta'ocho ca' yežlio chegaquen'. ²⁰ Nach gwde na' Diosen' gwleje' tgüeje tgüeje juez cont gosenabi'e nación Israelen' lao tap gayoa yogašje iz bžinte tiemp che da' Samuel ben' be'e xtiža' Diosen' cani'. ²¹ Nach tiemp che da' Samuelen' da' xozxta'ocho ca' gosenabde' Diosen' gone' to rey bene' nabi'e legaque'. Na' Diosen' bnežjue' legaque' rey Saúl na' gwnabi'e legaque' choa iz. Saúl nan' goque' xi'in ben' le' Cis, na' goque' diaža che da' ben' le Benjamín ben' gwzoa cani'te. ²² Nach bžin ža Diosen' beque'e yela' gwnabia' che Saúlen' na' bzoe' ben' le David cont gwnabi'e. Na' gwne' che rey Davin': "Chbeda' David xi'in Isaí nga, le chaclaže' chone' can' chazlažan' na' chzenague' bite'tez da' chapa'ne." ²³ Nach na'a Diosen' ba gwsele' yeto bene' golje' lo diaža che da' rey Davin', ben' le Jesús. Ba gwsele' le' cont gone' chio' bene' Israel yela' mban toli tocané can' gwne' cani'. ²⁴ Na' cate' bina' solao Jesúsén' gwsed gwlo'ede' bene', da' Juanna' gwduxjue'ede' len yogo' bene' Israel gualaž chechon' cheyala' yesyetingde' xtola'gaque' na' yesezoe' nis. ²⁵ Na' cate' beyož ben Juanna' dan' yo'o lo ne'e gone', nach gože' bene' ca' chosozenag che': "¿Chonle xbab naca' neda' ben' chbezle sela' Diosen'? Bi naca' bena'. Za' yid bena', na' da' nacchgüe' bene' zaca', bi zaca' gona' mandadw che' lechja' no xele'."

²⁶ 'Bene' migw, chio' naccho xi'in diaža che da' xozxta'ocho Abraham, na' nochle le'e chonxenle Diosen' txen len neto' bene' Israel, xtiža' Diosen' dan' žan gone' chio' yela' mban toli tocané naquen par chio'. ²⁷ Bene' ciuda Jerusalén ca' len bene' gwnabia' chegaque' ca' bi gosejli'e gwsela' Diosen' Jesúsén', na' bi gosejni'ide' da' ca' zjanyoj che' le'e libr dan' bosozoj bene' ca' goso'e xtiža' Diosen' cani' la'czla' chosolaben' lo' yodaon' yogo' ža che Dios. Na' dan' bi gosejni'ide', da'nan' gosechoglagüen' yesote' Jesúsén', nach goc can' nyoj che'. ²⁸ Na' la'czla' gosenezde' bibi da' mal non Jesúsén' cont yesote' le', gosenabde' Pilaton' gone' mandadw yesot soldadw che' ca' le'. ²⁹ Na' goc che Jesúsén' yogo' dan' nyoj che' le'e Xtiža' Dios dan' bosozoj bene' ca' gosenita' cani'. Na' beyož gote'na' nach besežin bene' besyeletje' cuerp che'na' le'e yag cruzen' na' bosocuaše'ne'. ³⁰ Na' gwdena' Diosen' bechis bosbane' le' ladjo bene' guata'. ³¹ Na' bene' ca' zjanaque' Jesúsén' txen cate' gwze'e distritw Galilea cont gwyeje' ciuda Jerusalén, legaque' besele'ede' Jesúsén' yezan ža gwde bebane' ladjo bene' guata', na' legaque' cheso'e diža' chen' len yezica'chle bene' Israel.

³² Na' lencze neto' chyixjue'eto' le'e diža' güen cont nezele ba chac da' güen dan' gož Diosen' da' xozxta'ocho ca' cani'. ³³ Ba benen' len chio' naccho xi'in

diaža che da' bene' ca', dan' bosbane' Jesúsen' ladjo bene' guaten'. Na' goc can' nyojen che' le'e libr dan' nzi' Salmos, na' salmo gwchopen' žan: "Le' naco' xi'ina'; na'aža ba blo'a zoaczo'." ³⁴ Na' Diosen' lecze bene' cont nyojen ga yoble che' dan' bosbane' le' ladjo bene' guaten' na' gwbat gožo' cuerp chen', žan: "Gona' güen len le' dołoł can' goša' rey Davin'." ³⁵ Na' nyoj yeto salmo žan: "Bi go'o latje gožo' cuerp chian' neda' naca' ben' chacchgüedo' na' ben' chon xšinon'." ³⁶ Nezecho da' rey Davin' gwnabi'e bene' Israel ca' gwnita' ca' tiemp chen' can' gwnalaže' Diosen' na' beyožen' gote' na' bgaše' len yezica'chle da' xozxta'ocho ca' na' lecze gožo' cuerp chen'. ³⁷ Perw na' Diosen' bosbane' Jesúsen' ben' nyoj Xtižen' žan ca', na' bi gožo' cuerp chen'. ³⁸ Na' cheyala' nezele bene' migw, Jesúsen' ben' choa' diža' che', chezi'xene' xtoła' note'tez bene' chejnilaže'ne'. ³⁹ Bi beyaccho bene' güen len Diosen' da' bi benyane'cho can' ža ley dan' bzoj da' Moisésen', perw note'tezcho chejnilaže'cho Jesúsen', len' ba cheyone' chio' bene' güen. ⁴⁰ Le gwsaca' cont bi gac chele can' bosozoj bene' ca' goso'e xtiža' Diosen' cani', žan:

⁴¹ Cheyala' gonle xbab, le'e chnelaole chia', na' cheyala' yebanele, le gwžin ža cuiayi'le.

Neda' Dios gona' to da' yebanele šlac mbanle,
to da' bi šejle'le la'czla' še no chixjue'e le'e can' gaca'.

⁴² Beyož bzejni'i Pablon' bene' ca' že'na' nach besyechoje' lo' yodaon'. Nach bene' ca' ba goson cuine' bene' Israel gosata'yoede' Pablon' len Bernabén' yeside' ža che Dios xmanña' yeto cont yosozejni'ide' legaque' yelate' che da' ca' ba bosozejni'ide'. ⁴³ Nach bene' zan bene' Israel len zan bene' ca' ba goson cuingaque' bene' Israel zja'aclene' Pablon' len Bernabén'. Nach Pablon' na' Bernabén' goseneyoede' legaque' cont nita'che' yesejnilaže'che' Diosen' ben' chaclen legaque'.

⁴⁴ Na' cate' bežag xmanña' ža che Dios yogo'lołcze bene' lo' ciudan' besežag cont bosozenague' xtiža' Diosen'. ⁴⁵ Na' gwnita' bene' Israel bene' bi gosejle' che Jesúsen', na' cate' besele'ede' ba nac bene' zan chosozenague' che Pablon' na' gosacxi'ede' le' na' gosenelagüe' che' na' gosezi'diže' le'. ⁴⁶ Perw na' Pablon' len Bernabén' bi besežebe' san gose'e bene' ca' že'na':

—Ba bento' can' gwnalaže' Diosen' na' zgua'tec bzejni'ito' le'e nacle bene' Israel gualaž cheto'. Na' na'a dan' bi chaclaže'le gwzenagle, chonle cont bi gon Diosen' le'e yela' mban toli tocanē. Da'nān' na'a gwzejni'ito' bene' ca' bi zjanac bene' Israel. ⁴⁷ Gonto' ca' neche Xanto' Diosen' bačh bene' mandadw gonton', le nyojen žan:

Bačh nzoa' le'e cont co'ole be'ni' chian' lo' yichjlaždao' bene' ca' bi zjanac bene' Israel,

cont bene' ca' že' doxen yežlion' yesache'ede' guac nitlao xtoła'gaque'.

⁴⁸ Na' bene' ca' bi zjanac bene' Israel chesebede' beyož gosende' can' gwna Pablon', na' gosene' güenchgua nac xtiža' Diosen'. Na' yogo' bene' ca' ba gwlej Diosen' cont gata' yela' mban chegaque' toli tocanē, legaque' gosejle'e xtiža' Diosen' dan' be' Pablon' len Bernabén'. ⁴⁹ Can' goc bene' ca' že' doxen distritwna' gosende' xtiža' Xancho Jesucriston'. ⁵⁰ Perw bał bene' Israelen' goso'e diža' len no'ol blao ca' gosonxen Diosen' na' len bene' gwnabia' blao ca' lo' ciudan', na' bosoše'e xbab chegaquen' cont gwzolao gosone' contr Pablon' len Bernabén' na' bich goso'e latje yesenite' doxen distriton'. ⁵¹ Nach Pablon' len Bernabén' cate' besyeya'aque' ciuda Antioquían' gosebibe ni'agaque' cont bežib yo bište dan' žianña'. Gosone' ca' cont bosolo'ede' bene' ca' chesyebēj legaque' malen' chesone' chosolague' legaque'. Nach jaya'aque' yež Iconio.

⁵² Na' mbalazchgua gwnita' bene' ca' chesonxen Jesucriston' ciuda Antioquían', na' Spiritw che Diosen' gwzoachguan len legaque'.

14

Pablon' len Bernabén' besežine' yež Iconio

¹ Na' goquen' Pablon' len Bernabén' besežine' yež Iconion' na' ja'aque' yodao' che bene' Israel. Na' cate' goso'e xtiža' Jesucriston', bene' zan bene' Israel ca' na' len zan bene' cbi zjanac bene' Israel gosejle'e che'. ² Perw na' gwnita' bene' Israel ca' bene' bi gosejle'e che Jesucriston', na' legaque' gosenelagüe' che bene' ca' chesejnilaže' Jesucriston' na' gosone' cont bene' ca' bi zjanac bene' Israel gosezolagüe' besegue'ede' Pablon' len Bernabén'. ³ Perw na' Pablon' len Bernabén' besyega'ane' sša Iconion' cheso'e xtiža' Xancho Jesucriston' sin cbi besežebe'. Na' Xancho' blo'e le diža' lin' cheso'e chesene' Diosen' chacde' beñachen', le be'e legaque' yela' guac cont gosone' da' zaca' yebanecho cont gosaclene' bene'. ⁴ Na' bene' ca' že' lo yežen' gosaque' chople, ba'e gosede'e bene' Israel ca' ben' bi gosejnilaže' Jesucriston' na' yebale' gosede'e Pablon' len Bernabén'. ⁵ Nach bene' Israel ca' gosone' yela' güexi'a len bene' ca' cbi zjanac bene' Israel na' len justis chegaque' cont yesone' contr Pablon' len Bernabén' na' yosochele' legaque' yej. ⁶ Perw cate' gwneze Pablon' len Bernabén' dan' chesaclače' yesone' len legaque', bosyoxonje' jaya'aque' yež Listra na' yež Derbe na' yezica'chle yež ca' zjachi' distritw dan' nzi' Licaonia. ⁷ Na' lecz goseyixjue'ede' xtiža' Xancho Jesucriston' len bene' ca' že' na'.

Bosožie' Pablon' yej šlac zoe' Listran'

⁸ Na' yež Listran' besežague' to bene' golje' nxiñj ni'e ca', cate' gocte' bidao' bi goc se'e. ⁹ Con chi'teze' chzenague' choe' Pablon' dižan'. Nach Pablon' gwne'e le' na' gocbe'ede' bena' chejle'e Diosen' nape' yela' guac cont yeyone' ni'en'. ¹⁰ Nach Pablon' bol' güiže'ne' gože' le' zižje:

—Gwzoža'.

Na' la' gwzoža'te' na' gwzolao chde'. ¹¹ Na' že' bene' zan chesene'e can' goquen' na' legaque' bososye'e gosene' diža' Licaonia:

—Xancho bene' ca' chejnilaže'cho ba gosetje' nga chesone' yela' guac, na' chle'etecho legaque' ca' beñach.

¹² Gosene' Bernabén' naque' xangaque' ben' zjansi'e Júpiter, na' Pablon' naque' xangaque' ben' zjansi'e Mercurio. Gosene' ca' le Pablon' choe'che' dižan'. ¹³ Na' yodao' gan' chesonxene' xangaque' Júpiteren' zosan cho'a yež. Na' bxoz che Júpiteren' jaxi'e go'ñ be ba zjanone' xdan zjanžie' legacba' corona yej. Nach bxoza' gwche'e bene' zan cho'a yežen' gan' zoa puert che ze'e dan' nyečj yežen' na' goclače' yesote' go'nen' yesonxene' postlw ca'. ¹⁴ Na' Pablon' len Bernabén' cate' gosacbe'ede' can' yeson bene' ca', gosecheza' xagaque' dan' bi gosaclače' yesonxen bene' ca' legaque'. Nach gosodie' gachol' bene' ca' gose'e legaque' zižje:

¹⁵ —Bene', ¿bixchen' chonle ca'? Lecz beñach neto'. Za'to' cont chyixjue'eto' le'e cheyala' gwša' yičjlažda'olen' na' cuejyichjle costumbr quinga dan' bibi zaca' na' gonxenle Dios ben' zoa toli tocanē. Le' bene' yaban', yežlion', nisaon', beñach, be ca' chesaš na' bite'tezechle da' chle'echo le'e yaban', lo yežlion' na' lo' nis. ¹⁶ Cani' Diosen' bi bžone' gon beñachen' bite'tez da' mal da' žan yesone'. ¹⁷ Perw zoacze' chone' da' güen len yogo' beñach cont yesenezde' zoe' naque' Dios. Chone' cont chac yejw cont chac dan' chazcho na' chata' da' che'ej chagwcho cont zoacho mbalaz.

¹⁸ Na' la'czla' Pablon' len Bernabén' gosene' yogo' da' ca', canē gosezoede' bosožone' yesot bene' Listra ca' go'ñna' yesonxene' legaque'.

19 Nach besežin ba| bene' Israel bene' nita' yež Iconio na' ciuda Antioquía dan' chi' distritw Pisidian', na' bene' ca' gosego'oyele' bene' Lистра ca' cont gosaque'ne' txen bosochele' Pablon' yej. Na' cate' gosone' xbab bač gote' nach gosexobe' le' cho'a yeža' na' bosyocua'ane' le' na'. 20 Perw na' bene' ca' chesonxene' Jesucriston' besedobe' gan' de Pablon', nach Pablon' beyase' beyeje' lo ciudan' da' yoble. Nach beteyo beza' Pablon' len Bernabén' jaya'aque' yež Derben'.

21 Nach cate' besežine' Derben' bosozende' bene' ca' že' na' diža' güen che Jesucriston', na' bene' zan gosone' txen len legaque' gosejle'e che Jesucriston'. Na' gwdena' gosa'aque' ja'aque' da' yoble Listran' na' Iconion' na' Antioquían'.

22 Na' to to yež gan' ja'aque' gosone' chač laže' bene' ca' chesonxene' Jesucriston' na' gose'e legaque' yesenite' yesonxene' le' do yichj do laže', na' gose'e legaque' da' zan da' gac da' saca'zi'cho šlac chbezcho yeyejcho yaban' gan' zoa Diosen' chnabi'e. 23 Na' to to yež ga besyedie' gosebeje' bene' yosogüia yesene'e yezica'chle bene' ca' chesonxene' Jesucriston'. Na' Pablon' len Bernabén', cate' za' yesa'aque' to to yež, gosone' gwbas na' bosol güiže' Diosen' gosenabe' gaclen Xancho Jesucriston' bene' ca' ba chesejnilaže' le'.

Pablon' len Bernabén' jaya'aque' Antioquía gan' mbane distritw Siria

24 Cate' gosa'aque'na' Pablon' len Bernabén' besyedie' distritw Pisidia na' besežine' distritw Panfilian'. 25 Na' goseyixjue'ede' xtiža' Jesucriston' yež Perge na' beyožen' jaya'aque' yež Atalia. 26 Nach Atalian' besyeyo'e lo' barcw jaya'aque' ciuda Antioquían' gan' mbane distritw Sirian'. Le bene' Antioquíanan' gosesele' Pablon' na' Bernabén' cana'te na' gosenabde' Diosen' šejlene' legaque' na' gaclene' legaque' cont yosozejni'ide' bene' xtiže'na'. Na' na'a besyežine' ba beyož gosone' dan' gosego'o bene' ca' lo na'gaque' yesone'. 27 Na' bosyotobe' bene' ca' chesonxene' Jesucriston' na' gose'ene' yogo'lol can' ben Diosen' len legaque' šlac zja'aque', can' goclene' legaque' cont zan bene' bi zjanac bene' Israel ba gwzoloao chesejnilaže' Jesucriston'. 28 Na' besyega'ane' Antioquían' sša len bene' ca' chesonxene' Jesucriston'.

15

Gosone' yela' güexi'a len bene' ca' že' ciuda Jerusalénna'

1 Na' šlac Pablon' len Bernabén' ne' nite' ciuda Antioquían' besežin to chope bene' za'ac distritw Judean' na' gosezologüe' bosozejni'ide' bene' ca' chesonxen Jesucriston' na'. Gose'ene' yogo'lol bene' byo cheyala' yesezoe' señw dan' že' circuncisión can' ža ley dan' bzoj da' Moisésen' cont gata' yela' mban čegaque' toli tocanē. 2 Na' Pablon' len Bernabén' gosacyože' len bene' ca' za'ac distritw Judea dan' chosozejni'ide' ca'. Nach bene' ca' chesonxene' Jesucriston' Antioquían' gosechoglagüen' šja'ac to chope' Jerusalén len Pablon' na' Bernabén'. Šja'aque' šjasene'e postlw ca' že'na' na' len bene' ca' chosogüia chesene'e lježgaquen' cont yesone' yela' güexi'a len legaque' che dan' chosozejni'i bene' ca' za'ac distritw Judean'.

3 Nach bene' ca' chesedop chesežag chesonxene' Jesucriston' Antioquían' gosesele' legaque' Jerusalénna'. Na' bene' ca' zja'aquen' gosedie' distritw Fenicia na' distritw Samaria. Na' yež ca' gan' že' bene' chesonxene' Jesucriston', bene' ca' zja'aquen' gose'e legaque' zan bene' bi zjanac bene' Israel ba gosebejyichje' da' ca' gosejnilaže' do cana' cont chesejnilaže' Diosen'. Nach bene' ca' že' distritw Fenicia na' distritw Samaria besyebēchgüede' gosende' dižan'.

4 Na' cate' Pablon' len Bernabén' besežine' Jerusalénna', bene' ca' chesedop chesežag chesonxene' Jesucriston', na' postlw ca' na' len bene' ca' chosogüia

chesena' lježgaquen' besežague' bosoguape' legaque' tiox. Nach Pablon' len Bernabén' gose'e legaque' yogo'lol' can' ba goclen Diosen' legaque'. ⁵ Nach nita' to chope bene' Fariseo bene' ba chesonxene' Xancho Jesucriston', na' tgüeje tgüeje' gosezie' gosene':

—Note'tez bene' byo gonxene' Jesucriston' cheyała' soe' señw dan' nzi' circuncisión na' cheyała' gone' can' ža ley dan' bzoj da' Moisésen'.

⁶ Nach besedobe postlw ca' len bene' ca' chosogüia chesena' lježgaque', na' bosoxi'e še naquen can' chesena bene' ca'. ⁷ Ba chac sša cheso'e dižan' cate' gwzoža' Pedron' gože' legaque':

—Bene' migw, nezele ba goc zan iz Diosen' gwleje' neda' jatixjue'eda' diža' güen che Jesucriston' len bene' ca' bi zjanac bene' Israel cont goseje'e che'. ⁸ Na' Diosen' nombi'e yichjlaždao' yogo'lol' bene', na' cont nezecho chacde' bene' ca' bi zjanac bene' Israel can' chacde' chio' naccho bene' Israel, nacha' gwsele' Spiritw chen' gwyo'on lo' yichjlaždao' bene' ca' can' ba gwyo'on lo' yichjlažda'ochon'. ⁹ Toz ca chon Diosen' len chio' na' len legaque', note'tezcho ba beya' beyibe' lažda'ochon' dan' chejle'cho che Jesúsriston'. ¹⁰ Ba chonle contr Diosen' dan' chaquele gwchile bene' ca' bi zjanac bene' Israel cont yesa'ogüe' costumbr che chio' bene' Israel. Nezele catec zdebe zjanaquen, ne chio' ne xozxta'ocho ca' bi goc yesone' yogo' can' ža diža' gol cheto' ca'. ¹¹ Bi cheyała' goncho ca', le nezecho note'tez naccho, Xancho Jesús'en' chone' yela' mban checho toli tocanē dan' chacde' chio', gague neche dan' choncho can' ža ley che Moisés.

¹² Beyož gwna Pedroa' ca' nach bich bi gosena bene' ca', san yogüe' gosenite' šize bosozenague' xtiža' Pablon' len Bernabén'. Goso'e diža' can' bnežjo Diosen' legaque' yela' guac cont gosone' da' zaca' yebanecho gan' že' bene' ca' bi zjanac bene' Israel. ¹³ Na' beyož goso'e dižan' nach postlw Jacobo be'e dižan', gwne':

—Bene' migw, le gwzenag diža' nga gua'a. ¹⁴ Simón Pedro nga ba bzejni'ide' chio' can' ben Diosen' da' nechw len bene' bi zjanac bene' Israel cont blo'e chacde' legaque', ba gwleje' bałe' cont zjanaque' lo' ne'e. ¹⁵ Na' dan' goc ca' chotilen da' ca' bosozoj bene' goso'e xtiža' Diosen' cani', le nyojen žan:

¹⁶ Tena' yida' da' yoble na' gona' cont nabia' xi'in diaža che da' rey David, la'czla' na'a nono xi'in diaža che' chnabia', na' gona' cont soa toe' da' yoble nabi'e.

¹⁷ Gona' ca' cont yogo' bene' bi zjanac bene' Israel guac yeseyiljue' nac yesone' yesenite' binlo len neda'.

Note'tez bene' nación guac yosol güiže' neda'.

¹⁸ Can' gwna Xancho Diosen' cani'te, bene' cont goseneze bene' can' gaquen'.

¹⁹ Na' lagüe nyoj Xtižen' žan ca', chacda' neda' bi cheyała' gonecho zed bene' ca' bi zjanac bene' Israel bene' ba chesebejyichje' costumbr gole chegaque' na' chesonxene' Diosen'. ²⁰ Con gwzojcho ye'gacchone' bi yesone' txen len bi dan' cheson bene' dan' chesene' naquen che l' gua'a lsaca' dan' chesonxene', neca yesata'lene' no no'ol cbi nac no'ol chegaque' o bene' byo cbi nac bene' chegaque', neca yesagüe' be chesote' chosošoque' do lba'ba', neca yesagüe' chen che beyixe'. ²¹ Nabcho bi yesone' da' ca', le cani'te nita' bene' to to yež chosozejni'ide' ley chechon' dan' bzoj da' Moisésen' dan' žan bi goncho da' ca', na' chosolabe' leyna' yogo' ža che Dios.

²² Nach postlw ca' len bene' chosogüia chesene'e yezica'chle bene' chesonxene' Jesucriston', na' len bene' chesedop chesežag, gosazlaže' can' gwna Jacobon', na' bosoxi'e choj chope bene' lježe' šja'aque' ciuda Antioquían' txen

len Pablon' na' Bernabén'. Na' gosebeje' Judas ben' lecze gože'ne' Barsabás, na' Silas, ben' zjanac bene' blao len legaque'. ²³ Na' bosozoje' to cart da' gosoxe' bene' ca' žan:

“Neto' postlw, len bene' chosogüia chesene'e yezica'chle bene' chesonxene' Jesucriston', na' len yogo' bene' chesedop chesežag len neto', chguapto' le'e tiox le'e zoale Antioquían' na' distritw Siria na' distritw Cilicia. Bi nacle bene' Israel perw ba nac lježcho chonxencho Jesucriston'. ²⁴ Ba nezeto' to chope bene' besechoj nga ja'aque' gan' zoalen' gosone' šejlaže'le len dan' bosozejni'ide', na' chacle tole dan' chesene' cheyala' soale señw dan' že' circunciación na' cheyala' gonle yogo' bichle dan' ža ley dan' bzoj da' Moisésen'. Bi nezeto' gosa'aque' na' gague mandadw che neto' gose'e le'e ca'. ²⁵ Da'n'an' gwzoato' txen bento' yela' güexi'a gwlejšto' chope bene' quinga chselä'to' gan' zoalen', txen len postlw Pablon' na' len Bernabén', bene' ca' chaquechgüeto'. ²⁶ Nezeto' Pablon' len Bernabén' zan las ba ša' yesate' dan' cheso'e xtiža' Xancho Jesucriston'. ²⁷ Na' chselä'to' Judasen' len Silasen' cont yosozejni'ide' le'e diža' cho'a yogo' dan' bzojšto' le'e cart nga. ²⁸ Chazlaže'to' can' bzejni'i Spiritw che Diosen' neto', na' da'n'an' bi gonto' mandadw bichle da' zdebe gonle san da' quinga chaqueto' chonen byen cbi gonlen. ²⁹ Bi gagwle yela' guagw dan' ba bosozie' lo l gua'a lsacan' chesonxenen', na' bi gagwle be ca' chesote' chosošoque' do lba'ba', bi gagwle chen che beyixe', na' bi gata'lenle no'ol cbi nac no'ol chele o bene' byo ben' cbi nac bene' chele. Na' še gwzenagle che da' quinga ba gwnato' bi gonle, güenna' chonle še ca'. Da' na'ze chzojšto' le'e cart nga. Diosen' gaclenšque' le'e.”

³⁰ Can' goquen' bene' ca' chesonxene' Jesucriston' Jerusalénna' goseselē' bene' ca' chope len Pablon' na' len Bernabén' gosa'aque' zja'aque' ciuda Antioquían'. Na' cate' besežine' Antioquían' bosotobe' bene' ca' chesonxene' Jesucriston' na' bosonežjue' legaque' carten' gosesela' bene' Jerusalén ca'. ³¹ Na' cate' bene' Antioquía ca' bosolaben' besyebede' ca' consejon' nyoj le'e carta'. ³² Na' Judasen' len Silasen' lecze gosaque' bosozende' bene' bin' ba gwna Diosen'. Nach gosoe'lene' bene' Antioquía ca' diža' zan gosone' chach laže'gaque' na' gosaclene' legaque' cont gosonxenche' Jesucriston'. ³³ Gosenite' Antioquían' zan ža, nach cate' bžin ža šjaya'aque', bene' Antioquía ca' gose'e legaque': “Nayežagcho”, na' lecze gose'e legaque' yesyežine' Jerusalénna' to šagüe' to güen. ³⁴ Na' Silasen' bechoglaže' yega'ane' Antioquían'. ³⁵ Na' Pablon' len Bernabén' gosenita'cze' Antioquían' na' txen len yezan bene' bosozejni'ide' bene' xtiža' Xancho Jesucriston'.

Pablon' gwyeye' da'yoble gan' ba jatixjue'ede' xtiža' Diosen'

³⁶ Nach cate' ba goc sša nite' Antioquían', Pablon' gože' Bernabén':

—Šejcho da' yoble yogo' yež ca' gan' ba jatixjue'echo xtiža' Xancho Jesucriston' šjana'cho nac cheson bene' ca'.

³⁷ Nach Bernabén' goclaže' šja'aque' na' yeseče'e Juan ben' lecz le Marcos. ³⁸ Perw Pablon' gwne' bi gonen güen yeseče'ene' dan' gwlejšyichj Marcosen' legaque' cate' besežine' distritw Panfilian' na' bi benlene' legaque' xšin Diosen'. ³⁹ Cate' gota'bia' ne toe' bi goclaže' gac can' ža ben' yeto, nach besyele'e. Bernabén' gwze'e gwče'e Marcosen' na' goso'e lo' barcw ja'aque' Chipren'. ⁴⁰ Na' Pablon' gwlejšto' Silasen' cont che'e le'. Na' bene' ca' chesonxene' Jesucriston' Antioquían' bosol güiže' Xancho Diosen' gosenabe' gaclene' legaque' gate'tez šja'aque'. Nach Pablon' len Silasen' gosa'aque'. ⁴¹ Na' ja'aque' to to yež ca' zjachi' distritw Sirian' na' len distritw Cilician' gosone' chach laže' bene' ca' chesedop chesežag chesonxene' Jesucriston'.

16

Timoteon' gwzolağüe' chonlene' Pablon' na' Silasen' txen

¹ Na' Pablon' len Silasen' besyežine' yež Derben' nach gwdena' besyežine' yež Listran'. Na' Listran' zoa to bene' chonxene' Jesucriston' le' Timoteo. Xna' Timoteon' naque' bene' Israel na' chonxene' Jesucriston', na' xen' naque' bene' griego. ² Na' bene' ca' chesonxene' Jesucriston' yež Listran' len yež Iconion' cheso'e diža' che Timoteon' chesene' zoacze' chone' da' güen. ³ Da'nana' Pablon' gwñabe' šjlen Timoteon' legaque', nach gwchi'ene' gan' bosozoe' le' señw dan' že' circuncisión. Bene' ca' le' yogo' bene' že' na' gosenезде' xa Timoteon' bi naque' bene' Israel na' Timoteon' biña' soe' señon', na' lecze Pablon' goclaže' yega'ane' güen len bene' Israel ca'. Cate' beyož bzoe'ne' señua' na' gosa'aque'. ⁴ Na' to to yež ga besežine' bosozende' bene' ca' chesonxene' Jesucriston' can' nac yela' güexi'a che postlw ca' len bene' chosogüia chesene'e lježgaque' Jerusalenna' che da' ca' cheyala' yesone'. ⁵ Na' bene' ca' chesedop chesežag chesonxene' Jesucriston' gosenita'chache' gosejnilaže'ne' na' gwyanche' tža tža.

Pablon' ble'edagüede' to bene' distritw Macedonia chata'yoede' le' šje' laže'

⁶ Nach Spiritw che Diosen' bi ben' latje šjasedixjue'e Pablon' len Silasen' len Timoteon' xtiža' Diosen' yež ca' zjachi' distritw gan' nzi' Asia. Da'nana' gosodie' yež ca' zjachi' distritw ca' gan' nzi' Frigia na' Galacia. ⁷ Besežinte' gala'ze distritw gana' nzi' Misia na' gosone' xbab yeso'e distritw da' nzi' Bitinia, perw lez na' bi be' Spiritw che Jesúsena' latje šja'aque'. ⁸ Nach gosodie' gala'ze distritw Misian' na' besežine' ciuda dan' nzi' Troas dan' chi' cho'a nesdaon'. ⁹ Nach že'na' Pablon' ble'edagüede' zecha to bene' distritw Macedonia lagüe', che'e le': "Yo'o Macedonia cont gacleno' neto'." ¹⁰ Neda' Lucas gwzoa' len legaque' na' da' ble'edagüe Pablon' bene' Macedonian', nach gwnezeto' chaclaže' Diosen' šjazeneto' bene' Macedonia ca' diža' güen che Xancho Jesucriston'. Nach bsiñi'a cheto' cont gwza'to' gwyejto' distritw Macedonian'.

Pablon' len Silasen' ja'aque' Filipos

¹¹ Na' cate' gwza'to' ciuda da' nzi' Troas dan' chi' cho'a nisdao' gwyo'oto' to lo' barcw zejto' licha gan' chi' to yežlio lo' nisen' dan' nzi' Samotracia, nach beteyo bžinto' yežen' dan' nzi' Neápolis. ¹² Nach gwza'to' Neápolis bžinto' ciudan' nzi' Filipos gan' mbane distritw Macedonia na' bega'anto' to chop ža. Filipos naquen ciuda blaoch che distriton' gan' že' bene' Roma. ¹³ Na' cate' bžin ža che Dios bchojto' ciudan' na' gwyejto' cho'a yegw gan' chaqueto' chjasel güiže' Diosen', nach gwche'to' na' be'lento' no'ol ca' ba zjandoben' diža' güen che Jesucriston'. ¹⁴ Toe' le Lidia naque' bene' Tiatira na' chote' lache' güen da' nac color moradw, na' chonxene' Diosen' do yichj do laže'. Xancho Diosen' bene' cont bzenague' che dan' bzejni'i Pablon' le'. ¹⁵ Nach le' len bene' lo' yo'o che' gosezoe' nis. Gwdena' gota'yoede' neto' gwne':

—Še chejle'le da' li ba chonxena' Xancho Jesucriston', le' šo'o soale ližan'.

Nach gwyejto' jasoato' ližen', le' bene' byen.

¹⁶ Na' to ža zejto' gan' chosol güiže' Diosen' cate' bežagto' to no'ol güego' no'ole esclava. Yo'o nyaz da' xigüen' yichjlažda'oben' chonen cont chac chñeya'abe', na' gan' xen chombe' par xambe' ca' chñeya'abe'. ¹⁷ Na' lebe' na'obe' neto' len Pablon' gate'tez zejto', na' chosya'abe' žabe':

—Bene' quinga chesone' xšin Diosen' ben' chnabi'e doxen, na' cheseyixjue'ede' le'e can' gata' yela' mban chele toli tocañe.

¹⁸ Ba chac zan ža chombe' ca' cate' goque Pablon' zed, na' gwyechje' gože' da' xigüen' yo'o lo' yichjlažda'oben':

—Len yela' chnabia' che Jesucriston' chnia' le' bechoj lo' yichjlaždao' bi'nga. Na' la' bechojte da' xigüen' lo' yichjlažda'oben'.

¹⁹ Na' gwdena' cate' gosache'e xambe' ca' ba bechoj da' xigüen' lo' yichjlažda'oben' na' bich bi gan yesone' len lebe', nach gosezene' Pablon' len Silasen' na' jasesane' legaque' lagüe ya'a gan' že' bene' ca' chesenabia' ciudan'.

²⁰ Na' cate' besežine' gan' že' justis ca', gose'e legaque':

—Bene' Israel quinga chesaše' chesebeque' da' zed lo' ciuda nga. ²¹ Na' chosolo'ede' costumbr da' bi de lsens gao' chio' naccho bene' Roma.

²² Nach bene' ca' lo ciudan' gosase' contr Pablon' len Silasen', na' bene' gwnabia' ca' gosone' mandadw goselechje' xagaque' cont goseyine' legaque' xis. ²³ Beyož goseyinchgüe' legaque' nach bosoži'e legaque' ližya, chese'e ben' chape' ližyan' gwna'yane' legaque' cont bi yesyechoje'. ²⁴ Beyož gose'e le' ca', nach bži'e legaque' lo' quart ližyan' dan' zoa la'zelaoze gan' nac biže'te na' bchide' ni'agaquen' len yag dan' nzi' cepo.

²⁵ Ca' gosenita' Pablon' len Silasen' ca do chel, chosol güiže' Diosen' na' chesole' no himno chesonxene' Diosen', na' yezica'chle bene' ca' zjade ližyan' chosozenague'. ²⁶ Nach zejzenez leca gwxo' na' bsesechguan len yo'o ližyana'. Na' to ši'ize yogo' puert che ližyana' beseyaljon na' besyeyež yogo' gden ca' dan' zjanchej ni'a na' bene' ca' že' lo' ližyan'. ²⁷ Bosbanen ben' chape' ližyan' na' cate' ble'ede' ba zjanyaljo puert ca', la' goljte spada chen' cont yeyot cuine', le bene' xbab ba bosyoxonj yogo' bene' ca' zjade ližyan'. ²⁸ Nach Pablon' gože'ne' zižje:

—Bibi gone cuino'. Nga zoacze yogo'to'.

²⁹ Nach ben' chap ližyan' gwnabe' to yi', na' gwyo'osese' zjane'e gan' de Pablon' len Silasen'. Do chxizze' bzoa xibe' lao bene' ca', le chžebchgüe'. ³⁰ Na' la' bebejte' legaque' lo quart gan' zjajo'en', che'e legaque':

—¿Bi cheyala' gona' cont gata' yela' mban chia' toli tocañe?

³¹ Nach gose'e le':

—Gwyejnilaže' Xancho Jesucriston', le' na' bene' lo' yo'o chio', na' gata' yela' mban chele toli tocañe.

³² Nach ben' chape' ližyan' gwche'e legaque' ližen' na' gosoe'lene' le' len bene' lo' yo'o chen' xtiža' Xancho Jesucriston'. ³³ Nach ca hora' ben' chap ližyan' gw dibe' lo güe' che Pablon' na' che Silasen', na' gwdena' jasoe' nis len bene' lo' yo'o che' ca'. ³⁴ Nach ben' chape' ližyan' beche'e Pablon' len Silasen' liže' bgüe'ej bguagüe' legaque'. Mbalaz zoe' ba chejnilaže' Diosen' txen len bene' lo' yo'o che'.

³⁵ Cate' ba gwyeni' bene' gwnabia' ca' gosesele' xa'ag jaseže' ben' chap ližyan' yosane' bene' ca' šjaya'aque'. ³⁶ Nach le' gože' Pablon':

—Bene' gwnabia' ca' bach gosesele' rson yosana' le'e. Guac yeyejle to šagüe' to güen.

³⁷ Nach Pablon' gože' xa'ag ca':

—Ba goseyine' neto' latje lagüe ya'a sin cbi gosone' yela' justis cheto' še bi nonto' na' gosegüe'e neto' ližya, len nacto' bene' nación Roma. ¿Na' chesone' xbab yososane' neto' šižize? Bi gac, san yesid cuine' yesyebeje' neto'.

³⁸ Nach xa'ag ca' jasyeyeže' bene' gwnabia' ca' can' gož Pablon' legaque'. Na' bene' ca' besežebe' cate' gosenezde' Pablon' len Silasen' zjanaque' bene' nación Roma. ³⁹ Nach bene' gwnabia' ca' ja'aque' gan' zjade Pablon' len Silasen' na' gosata'yoede' legaque' yesyezi'xene' can' ba goquen', na' diža' šagüe' gose'e legaque' yesyechoje' yesyeya'aque' lo ciudan'. ⁴⁰ Nach bechoj Pablon' len Silasen' ližyan' na' ja'aque' liž Lidian' da' yoble, na' da' yoble gosone' chach laže' bene' ca' chesonxene' Jesucriston' na' beyožen' besyeya'aque'.

17

Bene' Tesalónica ca' gosone' contr Pablon'

¹ Cate' Pablon' na' Silasen' gosa'aque' ciuda Filipos nach ja'aque' yež da' nzi' Anfípolis na' len yež da' nzi' Apolonia na' besyežine' to ciuda da' nzi' Tesalónica gan' zoa to yodao' che bene' Israel. ² Na' Pablon' ca costumbr che gwyeje' yodao' ža che Dios. Na' ca' goc, šone ža che Dios be'lene' legaque' diža'. ³ Bzejni'ide' legaque' gože'ne' bene' ca' goso'e xtiža' Diosen' cani' bosozoje' xtiža' Criston'. Gosene' ben' seļa' Dios yedenabi'e, cheyaļa' yosochi yososaca' bene' le' na' yesote'ne' na' techle yeyas yebane' ladjo bene' guat ca'. Gože' bene' Tesalónican':

—Jesúsen' ben' choa' diža' che', le'na' Criston' ben' gwseļa' Dios cont nabi'e.

⁴ Nach baļ bene' Israel gosejle'e xtiža' Pablon' len Silasen' na' gosaque' txen len legaque', na' lecze zan bene' griego bene' chesonxen Diosen' na' zan no'ole blao lecze gosejle'e. ⁵ Perw gwnita'ch bene' Israel bene' bi chesejle'e xtiža' Diosen'. Legaque' gosacxi'ede' Pablon' len Silasen' na' bosyotobe' xonj bene' mal bene' chesaš lagüe ya'a na' gosaque' txen gosone' cont gwche' žaš doxen ciudan'. Nach bene' že' lo ciudan' ja'aque' liž ben' le' Jasón chesacde' yesyebeje' Pablon' len Silasen' liže'na'. ⁶ Cate' besežine' liž Jasónna', noch no bene' ca' nita'. Nach cate' bi besyeželde' Pablon' len Silasen', na' gosoxe' Jasónna' len yebaļ bene' chesonxene' Jesuscriston' na' goseche'e legaque' lao bene' ca' chesenabia' ciudan', na' bososye'e gosene':

—Bene' ca' nita' liž benga chesaše' chesebeque' da' zed doxen, na' na'a ba besele'e gan' zoacho nga. ⁷ Jasón ni ba blebe' legaque' ližen', na' bi chesone' can' ža ley che César ben' nac la'zelagüe bene' gwnabia' chechon' chi' ciuda Roman', na' chesene' zoa yeto rey bene' le' Jesús bene' nabi'e chio'.

⁸ Na' cate' gosende' diža'na', bene' lo ciuda ca' len bene' gwnabia' chegaque' ca' gosebecche' žaš. ⁹ Nach Jasónna' len bene' lježe' ca' bosozie' mechw cont bene' gwnabia' ca' bososane' legaque', con še bich yesyežin Pablon' na' Silasen' lo ciudan', chesene'.

Pablon' len Silasen' ja'aque' yež Berea

¹⁰ Nach že'na' bene' ca' chesonxene' Jesucriston' lagüe ciuda Tesalónican' bosyose'e Pablon' na' Silasen' cont ja'aque' yež gan' že' Berea. Na' cate' besyežine' nach ja'aque' lo' yodao' che bene' Israel ca'. ¹¹ Na' bene' Israel ca' že' Berean' zjanacche' bene' šagüe' clal ca' bene' Israel ca' že' Tesalónican' na' besyebede' bosozenague' xtiža' Jesucriston' dan' bosozejni'i Pablon' len Silasen' legaque'. Na' tža tža besyeyiljue' gan' nyoj da' ca' bosozejni'i bene' ca', cont yesenezde' še le can' žan. ¹² Na' zane' gosejle'e xtiža' Xancho Jesucriston' na' lecze zan bene' griego ca' na' zan no'ole blao. ¹³ Nach bene' Israel ca' že' Tesalónican' bene' ca' cbi chesejle' che Jesucriston', gosende' diža' ba zoa Pablon' len Silasen' Berean' chosozejni'ide' xtiža' Diosen'. Nach gosa'aque' ja'aque' Berean' na' gosone' cont bene' Berea ca' lecz gosone' contr Pablon'. ¹⁴ Perw na' bene' Berea ca' chesejnilaže' Jesucriston' la' bososa'te' Pablon' gwyeje' cho'a nisdao'. Na' ca' nac Silasen' len Timoteon', legaque' besyega'ane' Berean'. ¹⁵ Na' to chop bene' Berean' ja'aque' jasesane' Pablon' ciuda dan' nzi' Atenas. Na' cate' besyeya'aque' jaya'aque' Berean' Pablon' gwseļe' rson len legaque' cont Silasen' len Timoteon' lecz šja'aque' cate gan' zoe'na'.

Pablon' bsed blo'ede' bene' Atenas ca'

¹⁶ Na' Pablon' šlac zoe' ciuda Atenasen' chbeze' žin Silasen' len Timoteon', gocchgüe' tole lo' yichjlažda'ogüe' da' ble'ede' da' zan l gua'a lsaca' da' chesejnilaže' bene' ca'. ¹⁷ Da'nan' bzejni'ide' bene' Israel ca' lo' yodao' chegaque'na'

len yezica'chle bene' ca' chesonxene' Diosen'. Na' yogo' ža gwyeje' ga chac ya'a je'e xtiža' Diosen' len bene' ca' že'na'. ¹⁸ Nach bene' ca' že'na' gwzolao chesoe'lene' le' diža'. Bale' chesejle'e dan' bzejni'i to bene' le' Epicuro, na' yebale' chesejle'e dan' bosozoj bene' ca' chesene' estoico. Na' bale' gosene':

—¿Bin' chon ža benga?

Na' yebale' gosene':

—Chacljede' gwzejni'ide' chio' che no bene' cobe bene' šejnilaže'cho.

Gosene' ca' le Pablon' ba bzejni'ide' legaque' xtiža' Jesúsena' na' ba be'e diža' Jesúsena' bebane' ladjo bene' guat. ¹⁹ Nach goseche'e Pablon' to latje dan' nzi' Areópago gan' chesedobe bene' blao chegaque' cate' chosoxi'e bi da' chesone'. Nach gose'e Pablon':

—Che'neto' gwzejni'ido' neto' bi da' coben' dan' chsed chlo'edo'. ²⁰ Bi'na' yeneto' diža' can' nac dan' cho'o nga na' chaclaže'to' nezeto' bi zejen yogo' da' ca'.

²¹ Ca nac bene' Atenas ca', de costumbr chegaque' yogo' ža con chesaše' cheso'e diža' o chosozenague' che bi da' cobe da' de, na' lecz ca' cheson no bene' zito' že' Atenas.

²² Nach Pablon' gwzeche' gachol legaque' gan' chesone' yela' güexi'a na' gože' legaque':

—Le'e bene' Atenas, chacbe'eda' leca chejnilaže'le zan l gua'a lsaca'. ²³ Cate' gwdia' tnez ble'eda' gan' chonxenle zan l gua'a lsaca', na' ble'eda' to latje gan' nyojen žan: “Che Xancho ben' nono nombia'.” Na' ca nac ben' chonxenle sin cbi nombia'le', che benan' chyixjue'eda' le'e.

²⁴ 'Dios ben' ben yežlion' na' yogo' da' de lagüe yežlion', len' chnabi'e yaban' len yežlion'. Bi chyažjde' yo'o da' chon beñachen' cont soe' len chio'. ²⁵ Bibi chyažje Diosen' gwnežjo beñachen' le', na' bibi gac yesone' yesaclene' le'. Diosen' cho'e yela' mban che yogo'lol bene', cho'e legaque' biš grasyw na' cho'e legaque' yogo' bi da' zjanape'.

²⁶ 'Diosen' bene' bene' nechon', na' toz ca nac yogo' beñach xi'in diaža che'. Na' bsi'e xneze bat nita' to toe' na' ga yesenite'. ²⁷ Diosen' bnite' yogo' beñachen' lo yežlion' cont yeseyiljue' nacle yesone' yesombi'ene' na' yesonxene'ne'. Na' da' li Diosen' bi zoe' zito' len to to chio'. ²⁸ Le' chone' cont zoacho mbancho na' chdacho. Nac da' li can' gosena to chope bene' poeta chele ben' goso'e diža' xdan, gosene': “Naccho diaža che Diosen'.” ²⁹ Na' dan' naccho diaža che Diosen' bi cheyala' goncho xbab nac Diosen' ca no l gua'a lsaca' de oro, de plata o de yej. Chesaljaže' beñachen' chesone' da' ca'. ³⁰ Cani' Diosen' be'e latje goson beñachen' con ca gwna xbab chegaque' yela' cbi chejni'i chegaque', perw na'a Diosen' chone' mandadw yogo'lol bene' že' doxen yežlion' yesebejyichje' da' malen' chesonen'. ³¹ Diosen' chaclaže' cuejyichjcho da' malen', le ba mbeje' Jesucriston' gone' yela' justis che yogo' beñach na' gwnežjue' castigw che yogo' bene' cbi chesejnilaže' le', na' Diosen' zejcze' to licha dan' gone' ca'. Na' Diosen' ba nžie' bia' bat gone' yela' justis che beñach. Na' dan' bosban Diosen' Jesucriston' ladjo bene' guaten', nezecho Jesucristwnan' gone' yela' justis che beñachen'.

³² Cate' bene' Atenas ca' beyož gosende' gwna Pablon' yesyeban bene' guat ca', bale' gosezi'diže' le' na' yebale' gose'ene':

—Na' gwzenagto' xtižon' yeto ža yoble.

³³ Can' goc beza' Pablon' latje gan' že' bene' ca'. ³⁴ Perw bal bene' Atenas ca' gosaque' Pablon' txen na' gosonxene' Jesucriston'. Na' bene' ca' gosaque' Pablon' txen len to bene' byo le Dionisio na' yeto no'ole le Dámaris. Na'

Dionision' naque' txen len bene' gwnabia' ca' ben' cheson yela' güexi'a gan' nzi' Areópago.

18

Ca goc šlac zoa Pablon' Corinto

¹ Gwde goc da' ca', Pablon' beze'e ciuda Atenasen' na' gwyeje' ciuda gan' nzi' Corinto. ² Cate' bžine' Corinton' bežague' to bene' Israel le' Aquila bene' naque' bene' distritw Ponto, na' len no'ol che' ben' le Priscila. Za' besyežingale' Corinton' zeya'aque' nación Italia, le rey Claudio, ben' chnabia' ca hora' doxen gan' mbane naciónna', bene' mandadw besyežaš yogo' bene' Israel ca' že' ciuda Roma. Nach Pablon' gwyeje' jane'e Aquilan' len Priscilan'. ³ Xšingaque' naquen chesone' yo'o de lache', na' toze ca nac xšin Pablon'. Nach bega'ane' gosonite' txen na' gosone' žinna' txen. ⁴ Na' yogo' ža che Dios Pablon' gwyeje' yodao' che bene' Israel ca' jazejni'ide' legaue' che Jesucriston', cont bal bene' Israel len bal bene' bi zjanac bene' Israel yesejnilaže'ne'.

⁵ Nach Silasen' len Timoteon' gwde gosa'aque' distritw Macedonian' be-sežine' gan' zoa Pablon', na' cana'ch Pablon' bsane' xšinen' cont gota'ch latje gwduxjue'ede' xtiža' Jesúsena' na' bzejni'ide' bene' Israel ca' Jesucristwnan' naque' bene' chesebeze' sela' Diosen' yedenabi'e. ⁶ Perw bene' Israel ca' beseže'e Pablon' na' bosožie' yela' ya' che'. Nach Pablon' gwšibe' xe'na' cont blo'e chbejyichje' legaue', gwne':

—Bibi doła' napa' dan' cuiayi'le toli tocañe. Le'e naple doła'. Na' ña'a šjased šjalo'eda' bene' ca' bi zjanac bene' Israel.

⁷ Nach bechoje' lo' yodao'na' na' beze'e bežine' liž to bene' le Justo. Justo na'na' zoe' chonxene' Diosen' na' liže' zoan cuit yodao'na'. ⁸ Na' to bene' le' Crispo naque' bene' gwnabia' che yodaon'. Na' Crispon' len yogo' bene' lo' yo'o che' gosaque' txen chesejle'e che Xancho Jesucriston'. Na' yezan bene' Corinto gosejle'e cate' gosende' xtiža' Jesucriston' da' choe' Pablon' na' gosezoe' nis. ⁹ Na' goc to že' Pablon' ble'edagüede' Xancho Jesucriston', che'ene':

—Bi žebo' Pablo. Gwzoateze be' xtižan' na' bi so' šize. ¹⁰ Neda' zoa' len le' na' bi gona' latje no gone le' da' mal, le bene' zan že' lo' ciuda nga bene' chesonxene' neda'.

¹¹ Ca' goquen' bega'an Pablon' Corinton' tgüiz yogašje bsed blo'ede' legaue' xtiža' Diosen'.

¹² Na' ca tiempen' ben' le Galión naque' gobernador distritw gan' nzi' Acaya. Nach bene' Israel ca' nita' ciuda Corinto bene' cbi chesonxen Jesucriston' gosaque' toze gosone' contr Pablon'. Na' goseche'ene' jasesane'ne' gan' chon gobernadores' yela' justisen'. ¹³ Na' cate' besežine'na' gose'e gobernadores':

—Benga chde' chgo'oyele' bene' lo' yežen' yesone' bi da' cobe cont yesonxene' Diosen' na' da' chzejni'ide' goncho, bi zejen to li len ley chechon'.

¹⁴ Bač zoa ñe Pablon' cate' gobernador Galiónna' gože' bene' Israel ca':

—Ca nac xya dan' chagwle nga, šaca' naquen to da' xinj o to da' malchgua, gonan' yela' justis. ¹⁵ Perw naquen che diža', na' che bene', na' che ley chelen'. Da'nan' le gwye' nacle gonle. Bi co'o lo' na' gona' yela' justis che dan' nac ca'.

¹⁶ Nach bešaše' legaue' gan' chone' yela' justisen'. ¹⁷ Nach bene' ca' bi zjanac bene' Israel gosenize' Sóstenes ben' ba nac bene' gwnabia' che yodaon', gosot goseyine' le' lao gobernador Galiónna', perw bena' bibi cuent bene' legaue'.

Pablon' beyeje' Antioquían' da'yoble

¹⁸ Na' bega'anč Pablon' ciuda Corinton' yezan ža beyož goc da' ca', na' cate' beze'ena' gože' bene' ca' chesonxen Jesucriston': “Nayežagcho”, nach beze'e txen len Priscilan' na' Aquilan'. Ja'aque' to yež da' nzi' Cencrea

gan' bšib yichj Pablon' da' bach beyož bene' to da' gwlo'o cho'e lao Diosen' gone'. Na' beyožen' Pablon', Aquilan' na' Priscilan' besyeyo'e lo' barcw da' zej nación Siria. ¹⁹ Na' cate' besyeyžine' ciuda Efeson' besyechoje' lo' barcon', na' Priscilan' len Aquilan' besyega'ane' Efeson'. Na' Pablon' gwyeje' yodao' che bene' Israel ca' je'lene' bene' ca' ba zjandob na' xtiža' Dios. ²⁰ Na' bene' ca' že' lo' yodaon' gosata'yoede' le' yega'anche' len legaque', perw bi goclaže'. ²¹ Nach gože' legaque':

—Nayežagcho, le chonen byen soa' lni dan' šo' ciuda Jerusalénna', perw güidhcza' deña'a le'e yeto še Diosen' gone' latje.

Nach beze'e ciuda Efeson' na' beyo'e lo' barcon' zeyeje'. ²² Cate' bežine' ciuda Cesarean' bechoje' lo' barcon' na' gwyeje' Jerusalénna' na' bguape' tiox bene' ca' chesedop chesežag chesonxene' Jesucriston'. Nach beze'e beyeje' ciuda Antioquían'. ²³ Gwde to tiemp zoe' Antioquían', nach gwze'e da' yoble gwyeje' to to yež dan' nita' distritw Galacia na' Frigia, bene' chach laže' bene' ca' chesonxene' Jesucriston'.

Apolos gwduxjue'ede' xtiža' Diosen' ciuda Efeson'

²⁴ Na' ca' tiemp na' bžin to bene' Israel ciuda Efeson' bene' le Apolos. Naque' bene' ciuda Alejandría. Le' chac cho'e diža' güen lao yogo' bene', na' ba nsede' binlo doxen Xtiža' Diosen' dan' nyoj. ²⁵ Apolosen' chejle'e dan' bzejni'i Juanna' che Xancho Jesúsén' na' nezde' can' bzoe' bene' nis caten' besyetinjde' xtoła'gaquen'. Na' Apolosen' be'e diža' do yichj do laže' bzejni'ide' binlo che Jesúsén', la'czla' con dan' bsd blo'e da' Juan na'zen' nezde'. ²⁶ Nach Apolosen' gwzolao be'e diža' che Xancho Jesucriston' lo' yodao' che bene' Israel ca' sin cbi chaž chžebe'. Na' cate' Priscilan' na' Aquilan' gosende' can' chzejni'i Apolosen', legaque' gosebejiže' le' na' bosozejni'ichde' le' che Jesucriston' da' ca' biña' nezde'. ²⁷ Gwdena' cate' Apolosen' bene' xbab šeje' distritw gan' nzi' Acaya, bene' Efeso ca' chesonxen Jesucriston' gose'e le' chone' güen dan' šeje' na' bosozoje' to cart da' beḡue' che bene' ca' chesonxen Jesucriston' distritw Acaya cont bene' ca' bosolebe' le'. Na' Diosen' nži'ilaže' bene' Acaya ca' na' ba goclene' zane' cont chesejnilaže' Xancho Jesucriston'. Na' cate' bžin Apolosen' Acayan' be'lene' legaque' diža' da' goclenchguan legaque'. ²⁸ Bzejni'ide' yogo'lol bene' gože'ne' clemen' cheson bene' Israel gualaž chen' bi chesejle'e che Jesúsén'. Bzejni'ide' legaque' can' nyoj Xtiža' Diosen' žan Jesúsén' naque' Cristo ben' chesebeze' yedenabi'e.

19

Šlac gwzoa Pablon' ciuda Efeson'

¹ Na' šlac zoa Apolosen' ciuda Corinto, Pablon' beze'e bedie' yež ca' zjachi' do ya'adao' na' bežinte' ciuda Efeson'. Efeson' bežague' bal bene' chesonxene' Jesucriston'. ² Na' gože' legaque':

—¿Zedesoa Spiritw che Diosen' lo' yichjlažda'olen' caten' gwzolao chejni-laže'le Jesucriston'?

Nach gose'e le':

—Bi nezeto' še zoa Spiritw che Diosen'.

³ Nach Pablon' goze'e legaque':

—¿Bi dižan' chejle'le da' gwzoale nisen' še ca'?

Nach gose'e le':

—Gwzoato' nis can' bzejni'i da' Juanna'.

⁴ Nach gož Pablon' legaque':

—Da' Juanna' bzoe' bene' nis cate' besyetinje xtoła'gaque' na' lecze gože' legaque' cheyala' yesonxene' bena' za' sela' Diosen'. Na' da' gwne' ca' be'e diža' che Jesucriston'.

⁵ Beyož bosozenague' can' gwna Pablon' nach gosezoe' nisa' da' yoble cont bosolo'e da' li chesejnilaže' Xancho Jesúsén'. ⁶ Nach Pablon' gwxoá ne'ena' yichj to toe' na' Spiritw che Diosen' gwzoan lo' yichjlaždao' to toe', nach gosene' diža' da' cbi chesejni'ide' na' goseyixjue'ede' bi dan' gož Diosen' legaque'. ⁷ Na' yogo' bene' ca' zjanac ca do šižinue'.

⁸ Na' do šone bio' Pablon' bsd blo'ede' bene' ca' chesedop chesežag lo' yodao' che bene' Israel ca' dan' zoa Efeson'. Bi bžebe', na' bzejni'ide' legaque' na' gwneyoede' legaque' yeson cuingaque' lo' na' Diosen' cont nabi'e legaque' len xbab chegaquen'. ⁹ Na' bchoj bal' bene' güedenag bene' cbi chesejle'cze', na' lao bene' ca' že' yodao'na' gosene' diža' ya' che xtiža' Jesucriston' dan' chzejni'i Pablon'. Da'nan' Pablon' bechoje' gan' že' bene' ca' na' bebeje' ben' ba chesonxene' Jesúsén' na' gwche'e legaque' gan' zoa to yo'o xen che to bene' le' Tiranno na' bzejni'ide' legaque' yogo' ža. ¹⁰ Na' gwzoa Pablon' chop iz bzejni'ide' bene' ca', na' can' goc, yogo' bene' že' distritw Asia gosende' xtiža' Xancho Jesúsén', bene' zjanac bene' Israel lente bene' bi zjanac bene' Israel. ¹¹ Na' Diosen' bchine' Pablon' cont bene' yela' guac da' besyebanchgüe bene'. ¹² Na' jasesane' no bay no lache' da' ba bchelen Pablon' gan' zjade bene' güe' na' la' chesyeyactede' bi yižgüe' chese'ede', na' bene' ca' yo'o nyaz da' xigüe' yichjlažda'ogaque'na' lecze besyechojen.

¹³ Lecze chesaš bal' bene' Israel chesyebeje' da' xigüe' da' zjajo'o lo' yichjlaždao' bene' na' gosacłaže' yosočhine' la Xancho Jesúsén' cont yesyebeje' da' xigüe' ca', nach gose'e da' xigüen':

—Len yela' chnabia' che Jesúsén' ben' choe' Pablon' xtiže'na' chonto' mandaw yechojle.

¹⁴ Na' zoa to bxoz gwnabia' che bene' Israel le' Esceva, na' nita' gaže xi'ine'. Na' bene' quingan' bosochine' la Jesúsén' gosacłaže' yesyebeje' da' xigüen'.

¹⁵ Nach goc to šlas chesone' ca' cate' to da' xigüen' boži'in xtižen', gožen' legaque':

—Nombi'a Jesúsén' na' ba benda' diža' che Pablon', perw bi nombi'a le'e cont šejli'a xtiža'len'.

¹⁶ Nach bena' yo'o nyaz da' xigüen' bxite' gwñize' bene' ca' betlate' legaque' na' gwcheze' xalana'gaque'. Nach bosyoxonje' liž bena' ga'alyide' na' bedo chen zjanaque' dan' bene' legaque' zi'. ¹⁷ Na' goslas diža' can' goquen' gosenezete yogo' bene' že' Efeson', bene' Israel lente bene' cbi zjanac bene' Israel. Nach yogüe' besežebe' na' gosache'ede' Xancho Jesúsén' naque' bene' zaque'.

¹⁸ Nach bene' zan ba chesejle'e xtiža' Xancho Jesúsén', na' zane' gosexoadole' lao bene' ca' chesedop chesežag chesonxene' Jesucriston' cheso'e diža' che da' malen' ba gosone'. ¹⁹ Na' bene' ca' gosac bene' guaža' na' bene' güene ya'a bosyotob libr chegaquen' na' gosoxen' bosozeyen' lao bene' lježe' bene' chesonxene' Jesucriston'. Na' besyebeje' cuent ca do gaca'te' zaca' libr ca' na' bžinen šiyon mil mechw plata, na' to to mechw plata ca' zacan' do tža žin. ²⁰ Can' goc, bene' zan gosende' xtiža' Xancho Jesucriston', na' gwyanch bene' bosozenague' che'.

²¹ Nach gwde goc da' ca' Pablon' bene' xbab yeyeje' Jerusalénna', na' gocłaže' yedie' šjayne'e bene' ca' že' yež gan' mbane distritw Macedonia len Acaya. Nach bene' xbab yeyož yeyeje' Jerusalénna' lecze cheyala' šeje' ciuda Roma. ²² Na' gwleje' chope bene' chesonlene' le' xšin Diosen' na' gwsele' legaque' distritw Macedonian', zjale' Timoteo na' Erasto, perw na' le' bega'anche' distritw Asian' yeto chope ža.

Bene' ca' besegue'ede' Pablon' gosebecchgüe' da' zed ciuda Efeson'

²³ Na' gwche' to da' zed gual ciuda Efeson', le nita' bene' beseže'e xtiža' Jesús'en' dan' bsed blo'e Pablon'. ²⁴ Quinga goc: gwzoa to bene' le' Demetrio bene' chon yodao' dao' de plata da' naquen ca nac yodao' gan' zoa xonax Diana ben' chesonxene'. Na' bene' ca' gosonlene' žinna' gosonchgüe' gan, le gwda'ochguan. ²⁵ Nach btobe' bene' ca' goson žin txen len le' na' nochle bene' goson žin dan' nac ca', na' gože' legaque':

—Nezele ca nac žin dan' nlancho choncho nga, chonlenchon gan xen. ²⁶ Na' ba beneczele na' ba ble'eczele can' chon to bene' le Pablo chsed chlo'ede' bene' lo ciuda Efeso checho nga na' lecze chsed chlo'ede' zan bene' že' doxen distritw Asia nga, che'e legaque' bibi zaca' l gua'a lsaca' da' cheson benachen' cont chesejnilažen'. Na' bene' zan ba chosozenague' che' na' chesebejyichje' dan' chejnilaže'cho. ²⁷ Le gonšč xbab nacle goncho, le xož yesene' che žin dan' choncho nga, na' gague lezen, san lecz xož yesone' cont yodao' che xonax Diana chechon' yega'anen ca to da' bibi zaca' na' len yela' chze na' yela' zaca' che xonaxen'. Na' nezele ca nac xonax Diana chechon', yogo'cze bene' distritw Asia nga na' bene' gate'tezechle chesonxene' le'.

²⁸ Beyož gosende' xtiža' Demetron' beselocchgüe' na' bososye'e gosene':

—Leca bene' zaca' xonax Diana che chio' bene' Efeso.

²⁹ Nach gwche' da' zed doxen lo ciudan', na' gosaque' toze' jaseņize' chope bene' distritw Macedonia bene' gosaque' txen len Pablon', toe' le Gayo na' yetoe' Aristarco. Na' gosexobe' legaque' besežine' gan' chesedobe yogo' bene' lo ciudan'. ³⁰ Na' Pablon' goclaže' šo'e gan' zjandobe bene' ca' cont güe'lene' legaque' diža', perw bene' ca' chesonxene' Jesucriston' lo ciudan' bi goso'e latje šo'e. ³¹ Bal' bene' zjanaque' bene' gwnabia' distritwna' zjanac xmigw Pablon' na' lecze gosesele' rson gose'e Pablon' bi šeje' gan' zjandobe bene' ca'. ³² Na' bene' ca' zjandoben' gosone' sšag juisyw. Gwde gwdele bososya'a to toe'. Na' bene' zan bi zjaņezde' bichen' zjandobe'na'. ³³ Bene' Israel ca' bosožigue' to bene' le Alejandro lao bene' ca' že'na' cont be'lene' legaque' diža', na' bosozejni'ide' le' bin' cheyała' ne'. Na' Alejandron' gwłis ne'e cont gwnabe' nite' šize yosozenague' diža' dan' güe'e laogaquen' gwzoe' rson che bene' ca' chesejnilaže' Jesucriston'. ³⁴ Perw cate' besele'ede' le' gosache'ede' lecze naque' bene' Israel, na' besyezolagüe' da' yoble bososye'e, gosene':

—Bene' zaca' juisyw xonax Diana che chio' bene' Efeso.

Ca do chop hor bososye'e ca' da' bi chesonxen bene' Israelen' xonax chegaquen'.

³⁵ Na' bene' güezoj chegaquen' cane goc bebecžie' legaque'. Na' gože'ne':

—Le'e bene' gualaž, yogo' bene' že' doxen yežlion' zjaņezde' naquen checho gapši'icho yodao' che xonax Dianan'. Naque' bene' zaque', le l gua'a lsaca' chen' blažon' le'e yaba. ³⁶ Na' nono gac na da' yoble. Da'nan' le soa šize na' bich gonle da' bi zejen. ³⁷ Na' ca nac bene' quinga nche'ele nga, bibi na' yesebane' lo' yodao' checho ca' na' neca nacho chosožie' yela' ya' che xonax Diana chechon'. ³⁸ Na' Demetrio nga len yezica'chle bene' lježe', še chac bi chac chegaque' len bene' yoble, nita' bene' gwnabia' chechon' cont yesone' yela' justis chegaquen', con šja'aque' yeso'e legaque' part še ca'. ³⁹ Na' še bichle da' chnable gac, cheyała' goncho to yela' güexi'a cont choglaon. ⁴⁰ Perw ca nac žaš da' nga chac na'a, xož бага'cho choncho contr gobiern can' že'cho nga, na' bibi de ye'gacchone' še yesenabe' bixchen' goc žaš da' nga chac na'a.

⁴¹ Beyož gože' legaque' ca' bene' mandadw besyežaše'.

20

Pablon' gweyjche' distritw Macedonia na' nación Grecia

¹ Nach cate' beyož gwche'ži da' zeden', Pablon' goxe' bene' Efeso ca' chesonxen Jesucriston' cont ja'aque' gan' zoe'na' na' bene' chach laže'gaque' cont yesenite' yesejnilaže' Jesucriston'. Nach gože' legaue': "Nayežagcho", na' goseyela' lježe' na' beze'e beyeje' da' yoble distritw Macedonia. ² Na' gwdie' to to yež da' zjachi' gala'ze Macedonian' bene' chach laže' bene' ca' chesonxene' Jesucriston', na' beyožen' gweyjche' nación da' nzi' Grecia. ³ Na' gwzoe' Grecian' šon bio'. Na' cate' bžin ža yeze'e, ba zoa yeyo'e lo' barcon' yeyeje' distritw Siria gan' nac laže' cate' gwnezde' zjachi'nao' bene' Israel ca' le'. Da'nan' bene' xbab yeza' ni'e yedie' gan' mbane distritw Macedonia na'le. ⁴⁻⁵ Na' xonj bene' ja'aque' ciuda da' nzi' Troas gan' gosebeze' Pablon' len neda' Lucas, na' gosa'aclene' neto' distritw Asia. Quinga zjale bene' ca': Sópater, bene' yež Berea, na' Aristarco len Segundo ben' zjanac bene' ciuda Tesalónica, na' Gayo bene' yež Derbe, na' Timoteon' na' chope bene' za'ac distritw Asia, Tíquico len Tróximo. ⁶ Na' gwde lınin' cate' chesagüe' yetextil da' bibi levadura nchixen, neda' len Pablon' gwza'to' Filiposen' na' goc gayo' ža cate' bžinto' ciuda Troas gan' ba nita' bene' ca' chesebeze' neto', nach gwzoato' na'ze gaže ža.

Can' goc šlac zoa Pablon' Troas

⁷ Na' cate' bžin ža dmigw besedobe bene' ca' chesonxene' Jesucriston' lo' ciuda Troasen' na' gweyjto' güe'ej gwdagwto' txen len legaue', na' Pablon' bzejni'ide' legaue' xtiža' Diosen'. Na' dan' ba zoa yeza' Pablon' ca' gwxeze nach be'e diža' bžinte do chel. ⁸ Na' yogo'to' ndop nžagto' to lo' yo'o de šon cuia, yo'oto' lo' cuarten' dan' zoa yichjen cha'te, na' zjaze da' zan yi lámpara. ⁹ Na' to bi' güego' lebe' Eutico žiabe' cho'a ventan. Na' Pablon' toņ zej diža' dan' cho'ena' na' gwtas bi'na' gan' žiabe' cho'a ventanna'. Na' šlac chtasbe' blažo'be' lo' yo che'ele. Nach cate' besyecose'be' bi' guat besyecose'. ¹⁰ Nach Pablon' betje' bžine' gan' jasyedixjue'eben' na' bcheque' lao bi' guata' gwdele'be'. Nach gože' bene' ca':

—Bi žeble, mbanczbe'.

¹¹ Nach Pablon' begüe' da' yoble na' gosagüe' na' bezolagüe' cheyo'e diža' len legaue'. Ne' choe'te' dižan' ca' cate' gwyeni'. Nach beze'e. ¹² Nach bi'na' blažo' cho'a ventanna', bene' ca' že'na' besyech'e'be' besyebchgüede' dan' mbanczbe'.

Gosa'aque' ciuda Troasen' na' ja'aque' ciuda Mileto

¹³⁻¹⁴ Nach bxi'ato' len Pablon' neto' bebialaoto' beyejto' lo' barcw bežinteto' ciuda gan' nzi' Asón na' Pablon' gwyazlaže'che' begüe'e nez bela'te' Asónna' cont gwyo'e lo' barcon' txen len neto'. Nach gweyjto' ciuda gan' nzi' Mitilene. ¹⁵ Bezsa'to' Mitilenen' na' beteyo bežinto' gala'ze to yežlio da' chi' lo' nisaon' gan' nzi' Quío. Na' gwde yeto ža bežinto' gan' chi' yeto yežlio lo' nisaon' da' nzi' Samos. Na' bechojto' lo' barcon' gweyjto' yež dan' nzi' Trogilio gan' bega'anto' tže' beži'laže'to'. Nach beteyo bezyo'oto' lo' barcon' na' bežinto' ciuda Mileto. ¹⁶ Ca' bento' bi' gwde'to' ciuda Efeson', le Pablon' bi' goclaže' šede' yež ca' zjachi' do distritw Asian'. Chachyende' yob žine' Jerusalénna' še gala' soe' na' ža lni dan' nzi' Pentecostés.

Pablon' bšaljlene' bene' chosogüia chesene'e bene' ca' chesonxen Jesucriston' Efeson'

¹⁷ Na' šlac zoato' ciuda da' nzi' Mileto Pablon' goxe' bene' Efeson' bene' chosogüia chesene'e yezica'chle bene' ca' chesonxene' Jesucriston'. ¹⁸ Na' cate' besela'aque' Pablon' gože' legaque':

—Nezele can' bena' caten' gwzooa' distritw Asia gan' zoa lažlen', bena' da' güen šlac gwzooa' len le'e gwzolaotia' ža nechw žan' bžina' na'. ¹⁹ Gwzooa' bena' xšin Diosen' na' bi benxen cuina'. Zan ni'a gwchežchgua' chele. Na' da' zan da' bosochi bososaca' bene' Israel ca' neda'. ²⁰ Bzejni'ida' le'e yogo' dan' byažje šejni'ile, neca bezi'laža', bzejni'ida' le'e do gan' chdop chžagle na' len liž to tole. ²¹ Bzejni'ida' bene' zjanac bene' Israel gualaž chia' lente bene' cbi zjanac bene' Israel can' chaclaže' Diosen' yesyetinje xtoła'gaquen' na' yesejnilaže' Xancho Jesucriston'. ²² Na' na'a yeya'a Jerusalén, le Spiritw che Diosen' chonen byen yeya'a, na' bi nezda' bin' gac chia' yežina' na'. ²³ Con nezda' to to yež gan' ba bedia' Spiritw che Diosen' ba bzejni'in neda' doła' gata' ližya na' gac bichle da' saca'zi'a. ²⁴ Perw bi chi' yichja' che da' ca' saca'zi'a. La'czla' še yesote' neda', chzanda' yela' mban chia'. Toze da' chi' yichja' ša'lao gona' yogo' dan' gwlo' Xancho Jesucriston' lo' na' gona', na' soa' mbalaz lo' yichjlažda'oguan' šlac chonan', le Xanchona' gwleje' neda' cont chyixjue'eda' diža' catequen' nži'ilaže' Diosen' benachen'.

²⁵ 'Ca' nac le'e, ba bzejni'ida' le'e che yela' chnabia' che Diosen', perw na'a ne tole bich le'ele neda'. ²⁶ Da'n'an' chnia' le'e bibi doła' napa' še nole cuiayi'. ²⁷ Bač bzejni'ida' le'e yogo' dan' chaclaže' Diosen' nezele, bibi bcuaša'. ²⁸ Da'n'an' cheyala' cuec yichjle che yogo'lo' dan' ba bzejni'ida' le'e na' lece ca' le gwsed le gwlo'e yezica'chle bene' chesedop chesežag chesonxene' Xancho Jesucriston' cont yosozenague' che dan' ba bzejni'ida'. Le gon ca' le Spiritw che Diosen' ba gwlejen le'e cont gwzejni'ile yezica'chle bene' chesonxene'ne'. Jesucriston' bnežjw cuine' bedelaž xchene' beque'e xtoła'chon' cont bozoe' chio' binlo' len Diosen' da' yoble. ²⁹ Nezda' cate' bich zoa' len le'e yesela'ac bene' yese'nde' yesexoayague' le'e cont cuejyichjle bich gwzenagle che Jesucriston'. ³⁰ Ladjw le'e yesechoj bene' yososed yosolo'ede' diža' güenlaže' gualaz da' yososed yosolo'ede' diža' li. Yesone' ca' cont ga'ole dan' yososed yosolo'e legaque'. ³¹ Da'n'an' le gwsaca' cont nono yesexoayag le'e. Na' le gon xbab, le šon' izen' ba gwzooa' bzejni'ida' le'e na' gwneyoeda' le'e do ža do yel gwchežtia' chele.

³² 'Na' na'a bene' migw, Diosen' gaclene' le'e na' xtiže'na' gwzejni'ichen can' chacde' le'e. Na' xtiže'na' gaclenen le'e cont šjayzoalenle Diosen' txen len yezica'chle bene' ba gwlej Diosen' zjanaque' lo' ne'e. ³³ Bi chzelaža' bi da' de che bene', neca chzelaža' xmechwgaque' na' neca xagaque'. ³⁴ Nezczele can' bena' žin cont bžel da' byažjda' len da' beseyažje bene' ca' gosenite' len neda'. ³⁵ Na' bena' žinna' ca' cont blo'eda' le'e cheyala' gaclencho bene' še bi cheseyažjde'. Na' šjasa'laže'le can' gwna Xancho Jesúsena': "Mbalazech zoacho caten' chnežjwcho bi dan' chnežjwcho bene' clal ca' caten' chesone' chio' bi dan' chesone' chio'."

³⁶ Na' beyož be' Pablon' dižan' nach bzoa xiben' txen len yogo' bene' ca' na' bosol güiže' Diosen'. ³⁷ Na' yogo'lole' gosebeže' che Pablon' na' goseyele' le' na' bosonope' ne'ena'. ³⁸ Nach gosa'aque' len neto' bžinteto' gan' beyo'oto' lo' barcon'. Da' juisyw gosacde' dan' gože' legaque' bich yesele'ede' le'.

21

Pablon' beyeje' Jerusalén

¹ Beyož bze diža' lježto' len bene' ca' nach beyo'oto' lo' barcon' na' zjaydato' licha bžinteto' gan' chi' to yežlio lo' nesdaon' da' nzi' Cos, na' beteyon' bežinto'

gan' chi' yeto yežlio lo' nisdaon' da' nzi' Rodas, nach bezsa'to' bežžinto' ciuda Pátara. ² Na' cate' bežinto' Pátaran' bželetto' yeto barcw dan' chzan' šejen distritw Fenicia, na' beyo'oto' lo'enna'. ³ Na' ba zjaydato' lo' barcon' cate' ble'eto' yežlio dan' chi' lo' nisdao' dan' nzi' Chipre, chin' šla'a rovesle. Nach bedeto' zjaydato' gan' mbane distritw Siria. Nach cate' bežžinto' ciuda gan' nzi' Tiro besyeletje' yoa' da' zonsa' barcon' na' neto' bechojto' lo' barcon'. ⁴ Na' jaydiljwto' bene' ca' chesonxene' Jesucriston' Tiron' na' bega'anlento' legaque' to xman. Na' Spiritw che Diosen' bzenen legaque' cont gosata'yoede' Pablon' bi šjeje' ciuda Jerusalénna'. ⁵ Perw na' cate' ba gwde to xman beza'to', na' yogüe' len xi'ingaque' len xo'olgaque' gosa'aque' len neto' cho'a yežen' na' bzoa xibto' len legaque' boļ güižto' Diosen' cho'a nisdaon'. ⁶ Beyožen' bze diža' lježto' na' gwdeļa' lježto', nach beyo'oto' lo' barcon' na' legaque' besyeya'aque' zjaya'ac ližgaque'.

⁷ Na' beza'to' ciuda Tiron' bežinto' gan' že' ciuda Tolemada. Nach beyetjto' lo' barcon' jayna'to' bene' ca' chesonxene' Jesucriston' lo' ciuda Tolemaidan' na' bega'anlento' legaque' tža. ⁸ Na' beteyo beza'lento' Pablon' na' bežinto' Cesarean' na' jayga'anto' liž Felipe ben' naque' txen len bene' ca' yexop ben' chesaclene' postlw ca' len žin bixjw da' gota'. Na' Felipen' zoateze' cho'e diža' che Jesucriston'. ⁹ Felipen' nita' tap xi'ine' no'ol güego' na' chosozende' bene' bi dan' ba gož Diosen' legaque'. ¹⁰ Zan ža ba gwzoato' liž Felipen' cate' bla' to bene' distritw Judean' bene' le Agabo, lecze chaque' chzende' bene' bi dan' ba gož Diosen' le'. ¹¹ Nach Agabon' gwnabe' xpant Pablon' na' bchejen' ni'a ne'e, na' gože' neto':

—Spiritw che Diosen' ba bzenen neda' bene' Israel ca' že' Jerusalénna' yosocheje' ni'a na' ben' nac che' bant nga na' yesone' le' lo' na' bene' ca' bi zjanac bene' Israel.

¹² Cate' beyož beneto' can' gwna Agabon', neto' len bene' Cesarea ca' gota'yoeto' Pablon' bi šjeje' Jerusalénna'. ¹³ Nach Pablon' gwne':

—Bi cuežle chia' o gonle ga soayaša'. Chzane cuina' yosocheje' neda' na' yesote' neda' Jerusalénna' dan' chyixjue'eda' xtiža' Xancho Jesúsén'.

¹⁴ Na' cate' gocbe'eto' bibi gac gonto' cont cbi šjeje' ciuda Jerusalénna', nach bich bi gožto'ne', con gwnato':

—Gac con can' ža Xanchon'.

¹⁵ Nach bsini'ato' beza'to' zjaydato' Jerusalén. ¹⁶ Na' to chope bene' Cesarean' bene' chesonxen Jesucriston' gosa'aque' txen len neto', na' goseche'e neto' liž to bene' le Mnasón. Bena' ba goc šša chonxene' Jesucriston'. Naque' bene' Chipre, perw ba zoa liže' Jerusalénna'. Na' ba bosoxi'e soato' liže'na'.

Pablon' bežine' Jerusalénna' jane'e Jacobon'

¹⁷ Na' cate' bežinto' ciuda Jerusalénna' bene' lježto' ca' že'na' besyebede' bosoguape' neto' tiox. ¹⁸ Na' beteyo gwyejlento' Pablon' jana'to' Jacobon', na' bžinto'na' ba zjandop zjanžag yogo' bene' bla' ben' chosogüia chesene'e yezica'chle bene' ca' chesonxene' Jesucriston' na'. ¹⁹ Nach Pablon' bguape' legaque' tiox na' beyožen' be'lene' legaque' diža' doxen can' ba ben Diosen', le zan bene' bi zjanac bene' Israel ba chesonxene' Jesucriston' gan' ba gwyeje' je'lene' legaque' xtiža' Diosen'. ²⁰ Na' cate' bosozenague' dan' gož Pablon' legaque', nach goso'e yela' choxcen che Diosen' na' gose'e Pablon':

—Bene' migw, neždo' zan mil bene' Israel gualaž checho ca' ba chesonxene' Jesucriston' na' yogüe' chesacde' chonen byen goncho yogo' da' ca' zjanyoj le'e ley chechon' dan' bzoj Moisés. ²¹ Na' zane' ba zjanende' chsed chlo'edo' bene' Israel gualaž chechon' nita' laž bene' zito' bich cheyala' yesone' can' ža le'e ley chechon' na' bi yesezoa' xi'ingaque' ca' señw dan' že' circuncisión.

22 ¿Nacxe ye'to' legaque'? le zane' yesežag nga cate' yesende' bach zo' nga da' yoble. 23 Güen goncho quinga: nita' tap bene' nga bene' zoa to da' zjango'o cho'en lao Diosen' na' chesaclaže' yesone' can' gosenen'. 24 Na' cheyla' chi'o legaque' yodao' blaon' na' gono'ne' txen chixjo' beyixe' ca' gwnežjwle bxozen' gote' cont yexi' yeyachle can' ža leyna'. Na' yeyožen' gac yosošib yichjgaque' can' zjango'o cho'en. Gono' ca' len legaque' cont yogo' bene' yesacbe'ede' bi chzo' ley chechon' to šla'ale can' chesenen', san chono' can' žanna'. 25 Na' ca' nac bene' ca' bi zjanac bene' Israel bene' ca' chesonxene' Jesucriston' yež yoble, ba bzojto' legaque' can' nac yela' güexi'a chechon', gožto'ne' bi yesagüe' yela' guagw dan' chesene' naquen che l gua'a lsacan' chesejnilaže' bene', na' bi yesagüe' chen, na' bi yesagüe' be chat chosošoque' lba'ba', lecze bi yesata'lene' no'ole bi nac xo'olgaque' o bene' byo bi nac bene' chegaque'.

Gosezene' Pablon' yodao' blaona'

26 Beteyo gwza' Pablon' gwče'e bene' ca' tap cont yesyexi yesyeyache' yodao' blaona' can' ža' ley chegaque'na'. Nach Pablon' gwyo'e gana' zoa bxozen' gwdixjue'ede' le' bi ža yanen' yeyož yesaque' xi'laže' cont yosonežjue' beyixe' ca' gote' che to to legaque'.

27 Bač zoa gac gaže ža chesone' can' ža leyna' cont chesyexi chesyeyache', nach gozej Pablon' lo' yodao' blaona'. Na' bal bene' Israel ca' za'ac distritw Asian' besele'ede' le' lo' yodaon' na' gosego'oyele' bene' že' do na' cont yesezene' Pablon'. 28 Bososya'adie', gosene':

—Le'e bene' gualaž, le gon txen sencho benga. Chde' doxen chsed chlo'ede' contr yež Israel chechon', na' contr ley chechon' dan' bzoj da' Moisésen', na' contr yodao' checho nga. Na' na'a ba none' yeto da' mal juisyw contr yodao' dan' nac che Dios chechon', ba gwlo'e bene' bi zjanac bene' Israel lo'enna'.

29 Gosene' ca' neče da' besele'ede' Pablon' lo' ciudan' chdalene' to bene' ciuda Efeso le' Tróximo, na' gosacde' še Pablonan' gwče'e le' lo' yodao'na', la'czla' bi bene' ca'.

30 Na' gosonchgüe' to žašyey. La' besedobte bene' zan cho'a yodaon' na' goso'e lo' yodaon' gosenez' Pablon', besyebeje' le' na' la' bosyoseyjwte' puert ca'. 31 Na' ba zoa yesote' le' cate' gwneze ben' yo'o lo' ne'e soldadw che nación Roma ben' že' lo' ciudan'. Cate' gwnezde' ba chac to žašyey juisyw doxen ciudan', 32 nach btobe' soldadw ca' len bene' gwnabia' chegaque' ca', na' gosa'aque' zja'acses' gan' chi' da' zeda'. Na' cate' bene' ca' chesote' Pablon' besele'ede' ba besežin soldadw ca' len bene' gwnabia' chegaque' ca', la' gosebezte' bich goseyine' Pablon'. 33 Cate' ben' yo'o lo' ne'e yogo' soldadon' bžine' gan' že' bene' ca', na' bene' mandadw gosoxe' soldadw che' ca' Pablon' na' bosočeje' le' chope gden. Nach gwñabde' bene' ca' že'na' no nac Pablon' na' bi bene'. 34 Na' bene' ca' že'na' bososya'adie', gwde gwdele chesena to toe'. Na' gwde cbi gwyejni'i ben' yo'o lo' ne'e soldadw ca' bin' chac catec sšag chesone', nach bene' mandadw goseče'e Pablon' cuartel. 35-36 Nach yogo' bene' ca' zjana'ogüe' legaque' chesosye'e zjambeque' to žaš juisyw. Na' cate' besežine' cho'a nepe' che cuartelen' goselen soldadw ca' Pablon' neče dan' chesaclaže' bene' ca' yesenize' le', na' yogo' bene' ca' chesosye'e, chesene':

—Le gote'.

Pablon' be'lene' bene' zan ca' diža'

37 Bač cheso'e lo' cuartelen' cate' Pablon' gože' ben' yo'o lo' ne'e soldadw ca':

—¿Goño' latje gua' to chope diža'?

Nach bena' gože'ne':

—¿Chaco' diža' griego? ³⁸ ¿Bi naco' bene' nación Egipto ben' gwda btob tap mil bene' güet bene' bat ngaze na' gwche'e legaque' latje dašen' gan' chesone' contr gobiernen'?

³⁹ Nach Pablon' gože'ne':

—Gague benan' neda'. Neda' naca' to bene' Israel na' ciuda blao gan' mbane distritw Cilician' dan' nzi' Tarso nac laža'. Ben goclen beñ latje güe'lena' bene' quinga diža'.

⁴⁰ Nach bena' bnežjue' latje. Nach Pablon' gwzeche' lo nepen' bene' señw len ne'e cont bene' ca' že'na' gosenite' šize bosozenague' che'. Nach gwzolagüe' be'e diža' len legaque' diža' hebreo.

22

¹ Gože' legaque':

—Bene' gole len bene' xcuide', le gwzenag diža' dan' gua' laole nga.

² Na' cate' gosache'ede' chne' legaque' diža' hebreo gosenite' šize. Nach Pablon' gože' legaque':

³—Neda' naca' bene' Israel. Golja' ciuda Tarso gan' mbane distritw Cilicia, perw gwcha'ogua' ciuda Jerusalén ni. Na' bseda' len maestrw blao ben' le Gamaliel. Bzejni'ide' neda' doxen can' ža ley che da' xozxta'ocho ca'. Na' godca' chonchgua' can' chazlaže' Diosen', cayanen' chaque le'e za'acle nga na'a. ⁴ Na' bchi bsaca' zan bene' ca' chesejnilaže' Jesucriston', goclaža' gotto' legaque'. Na' gwxcena' no bene' byo na' no no'ole chesonxene' le' na' gwche'egaca'ne' ližya. ⁵ Bxoz ben' naquech bene' blao na' nochle bene' gole blao ca' chesenabia' nación Israel chechon' zjanезде' can' bena'. Legaque' gosone' yiš dan' beřua' gwy'a ciuda Damascon' gan' godca' sena' baltez bene' chesonxen Jesucriston' cont che'egaca'ne' Jerusalén ni par gonto'ne' castigw.

*Pablon' cho'e diža' can' goc che' cate' Diosen' bocobe' yichjlažda'ogüe'
(Hch. 9:1-19; 26:12-18)*

⁶ Na' šlac zya'a ciuda Damascon' ca do guagwbiž cate' to be'ni' gual da' za' yaba gwyečhen neda'. ⁷ Na' gwbiža' lo yon' benda' to bene' gože' neda': "Saulo, Saulo ¿bixchen' chchi chsaco' neda'?" ⁸ Nach boži'a xtižen', goša'ne': "¿No le' bene'?" Nach gwne': "Nedan' Jesús bene' Nazaret na' neda' chchi chsaco'." ⁹ Bene' ca' zya'alena'na' besežebchgüe' besele'ede' be'nin', perw bi gosejni'ide' dan' gož Jesúsen' neda'. ¹⁰ Nach goša'ne': "¿Bin' cheyala' gona' Xana'?" Nach Xana' Jesúsen' gwne': "Beyas na' gwyejteze ciuda Damascon', na' cate' žino'na' to bene' ye'e le' dan' cheyala' gono'." ¹¹ Na' gwchoła' catec gwna'chgua' be'nin', nach bene' ca' zya'alena' txen gosoxe'de' taca' cont bžinto' Damascon'.

¹² Na' to bene' le Ananías zoe' ciuda Damascon' ben' chonxene' Diosen' do yichj do laže' na' chzenague' che yogo' ley dan' bzoj Moisésen'. Na' yogo'lol bene' gualaž checho ca' že'na' cheso'e xtiža' Ananíasen' naque' bene' chon da' güen. ¹³ Ananíasna' bide' gan' zoan' na' cate' ble'e nach gože' neda': "Saulo, bele'e." Na' beyož gwne' ca' la' bele'eteda' na' ble'eda' le'. ¹⁴ Nach gože' neda': "Dios ben' chonxencho na' ben' benxen da' xozxta'ocho ca', len' ba gwleje' le' cana'te cont nezdó' can' chaclaže' gono', na' ba ble'edo' Xi'ine' ben' nac la'zelagüe bene' chon da' güen, na' ba bendo' xtiže'. ¹⁵ Nachen' go'o xtižen' len bene' zan bene' že' lo yežlion' gwzejni'igacdo'ne' da' ca' ba bendo' na' ba ble'edo'." ¹⁶ Na' lecz gož Ananíasen' neda': "¿Bichen' cuezo'? Yo'o so' nis. Na' nabdo' Xancho Jesucriston' cont yeya' yeyibe' yichjlažda'oguoñ' len da' malen'." Can' gože' neda'.

Diosen' gwleje' Pablon' cont be'e xtižen' len bene' ca' bi zjanaque' bene' Israel

17 'Na' gwdena' beyeda' ciuda Jerusalén ni na' gwy'a lo' yodao' blaon' jel güiža' Diosen', na' šlac chol güiža'ne' ble'edagüeda' Xancho Jesucriston'. 18 Na' Xancho' gože' neda': "Bi šedo' chojo' ciuda Jerusalén ni, le bi yosozenag bene' quinga xtižo' dan' go'o chian'." 19 Nach goša'ne': "Xana', legaque' zjanezde' neda' gwy'a to to yodao' jet jatina' bene' ca' chesonxene' le' na' bseyjwgaca'ne' ližya. 20 Na' lecz naca' bene' ca' txen cate' gosote' Esteban ben' be' xtižon', na' neda' gwna'a xadon che bene' ca' gosot le'." 21 Nach Xancho Jesucriston' gože' neda': "Bchoj na' seła' le' zito' go'o xtižan' len bene' ca' bi zjanac bene' Israel."

Pablon' len ben' yo'o lo ne'e soldadw ca'

22 Bene' ca' zjandoben', nga zelao bosozenague' xtiža' Pablon', beseže'e da' be'e diža' che bene' zito' bene' bi zjanac bene' Israel, nach gosezolagüe' chososye'e, chesene':

—Le got bena'. Bich cheyała' bane'.

23 Bososya'adie' na' beselocchgüe' bosozala' xagaque' ca'ale na' gosaše' bište yon' bosozalen' lo be'. 24 Cate' ble'e ben' yo'o lo ne'e soldadw ca' can' chesonen' nach bene' mandadw gosego'o soldadw ca' Pablon' lo' cuartelen' na' yeseyine'ne' cont güe'e diža' bi da' malen' ba bene'. Goclaže' nezde' bichen' bene' lo ciudan' chososya'adie' che'. 25 Na' ba zjancheje' Pablon' cont yeseyine' le' cate' gože' to soldadw ben' zena' bene' chnabi'e lao to gayoa soldadw:

—Can' ža ley, bi de lsens chinle neda' sin cbi nezele še bin' nona', le neda' naca' bene' nación Roma.

26 Beyož gože' bene' gwnabia' che soldadon' ca' la' gwyejte ben' lao ben' yo'o lo ne'e yogo' soldadw ca', ježe'ne':

—Gwsaco' bin' gondo' ben' ba bdolan', le naque' bene' nación Roma.

27 Nach ben' yo'o lo ne'e soldadw ca' gwyeje' lao Pablon' gože'ne':

—Gwna neda' žle bene' nación Roma le'?

Nach Pablon' gože'ne':

—Bene' nación Roma neda'.

28 Nach ben' yo'o lo ne'e yogo' soldadw ca' gože' Pablon':

—Mechw xen gwxaqueda' cont naca' cuent len bene' nación Roman'.

Nach Pablon' gože'ne':

—Neda' golja' naca' bene' nación Roma.

29 Nach bene' ca' ba nita' cont yeseyine' Pablon' la' besyecuaste' cuiten', na' ben' yo'o lo ne'e yogo' soldadw ca' lecze bžebe' dan' ba bcheje' Pablon' cont yeseyine'ne'.

Gosesele' Pablon' gan' chosoxi'a bene' ca' chesenabia' Israelen'

30 Nach beteyo ben' yo'o lo ne'e soldadw ca' gwseže' gdenña' nchej Pablon'. Na' bene' mandadw besedobe bxoz gwnabia' ca' len yogo' bene' gole blao ca' chesenabia' nación Israelen' cont nezde' bi dan' chosocuiše' Pablon'. Na' cate' ba besedobe bene' ca' nach gwleje' Pablon' na' gwsele' le' gwzeche' laogaquen'.

23

1 Nach Pablon' gwne'e bene' gole blao ca' chesenabia' nación Israelen' na' gože' legaque':

—Bene' migw, ža na'aža nezda' lo' lažda'ogua' ba bena' can' chazlaže' Diosen'.

2 Nach Ananías ben' nacch bxoz blao bene' mandadw len bene' ca' zjaze cuit Pablon' yesebaže' cho'ena'. 3 Na' Pablon' gože'ne':

—¡Diosen' gone' le' castigw, bene' güexoayag! Chi'o nga cont gono' yela' justis chia' can' ža ley chechon' na' chono' contr ley beno' mandadw yesebaže' choa'.

⁴ Bene' ca' že' gala'ze gose'e Pablon':

—Bi cheyala' yoži'o xtižen' ca', le naque' bꝑoz blaoc che Dios.

⁵ Nach Pablon' boži'en gwne':

—Bene' migw, bi gwnezda' še bengabꝑoz blaon'. Nezda' Xtiža' Diosen' dan' nyojen žan: “Bi yoži'ile diža' zi' len bene' gwnabia' chelen'.”

⁶ Pablon' gocbe'ede' bene' ca' chesenabia' nación Israelen' zjanaque' chople. Bale' chesejle'e can' chsed chlo'e bene' ca' zjansi'e saduceo na' yebale' can' chsed chlo'e bene' ca' zjansi'e fariseo. Nach Pablon' gože' bene' ca' že'na':

—Bene' migw, naca' bene' fariseo, na' naca' xi'in bene' fariseo. Na' zoa' nga chonle yela' justis chia' neche chejli'a yesyeban bene' guat ca'.

⁷ Beyož gwne' ca' bene' fariseo ca' len bene' saduceo ca' ben' zjandop zjanžag na' gosezolagüe' chosošaše', na' besechoje' chople. ⁸ Le bene' saduceo ca' chesene' bi yesyeban bene' guat ca' na' bi chesejle'e nita' angl o nochle spiritw yoble. Na' bene' fariseo ca' chesejle'e yesyeban bene' guat ca' na' chesejle'e nita' angl na' nita' nochle spiritw. ⁹ Yogo' ben' že'na' chesosye'e chosošaše'. Nach to chope bene' zjansed ley dan' bzoj Moisésen', ben' zjanac bene' fariseo, gosezože'e gosone' Pablon' txen, gosene':

—Bibi da' mal non bengab. Še no spiritw o no angl ba gwnelen le', bi cheyala' goncho contr le', le' contr Diosen' goncho še ca'.

¹⁰ Leca gwche' to žaš xen na' ben' yo'o lo ne'e yogo' soldadw ca' bžebe' še yosozoxj yosotine' Pablon'. Nach bene' mandadw besežin soldadw che' ca' cont jasyeje' Pablon' ladjo bene' ca' na' besyeche'ene' cuartelen' da' yoble.

¹¹ Nach že' beteyon' Xancho Jesucriston' bžine' gan' de Pablon' na' gože'ne':

—Bi žebo' Pablo. Can' ba bi'o xtižan' Jerusalén ni, lecz ca' cheyala' go'o xtižan' ciuda Roma.

Bosoxi'e yesote' Pablon'

¹² Na' beteyo bal bene' Israel besedobe' na' bosoxi'e yesote' Pablon'. Na' gosechogbi'en, gosene':

—Diosen' gone' chio' castigw še ye'ej gagwcho sin cbiņa' gotcho Pablon'.

¹³ Nde choa bene' bosoxi'e yesote' Pablon'. ¹⁴ Nach ja'aque' gan' že' bꝑoz gwnabia' ca' len bene' gole bene' blaoc ca' chesenabia' nación Israelen' na' gose'e legaque':

—Bač gwchogbia'to' gon Diosen' neto' castigw še ye'ej gagwto' sin cbiņa' gotto' Pablon'. ¹⁵ Na' le' yotobe lježle le' gon yela' güexi'a gwxe cont nabele ben' yo'o lo ne'e yogo' soldadw ca' cueje' Pablon' yide' laolen', gwde'ele za' yeyiljwyožechle bi da' xinj ba none'na'. Na' neto' cue'na'oto'ne' tnez gotto'ne' cate' za' le'e gan' nita'len'.

¹⁶ Na' zoa' to bi' byo bi' nac xi'in bene' zan Pablon' na' lebe' benebe' da'na' chesacde' yesonde' le'. Na' gwyejbe' cuartelen' jazenebe' Pablon'. ¹⁷ Nach Pablon' goxe' to bene' chnabi'e to gayoa soldadw na' gože'ne':

—Ben goclen gwche' bi' nga lao bene' gwnabia' chelen'. De to da' ye'be' le'.

¹⁸ Bene' gwnabia' che soldadon' gwche'e bi'na' lao ben' yo'o lo ne'e yogo' soldadw ca' na' gože' le':

—Pablo ben' de ližya goxe' neda' na' gwñabe' goclen lagua' cont zedesana' bi' nga laguon', že' de to da' ye'be' le'.

¹⁹ Nach ben' yo'o lo ne'e yogo' soldadw ca' beꝑue' na'be' gwche'ebe' to šla'ale gwñabde'be':

—¿Bi che'ndo' nao' neda'?

²⁰ Nach bi'na' gožbe' le':

—Bene' blao che bene' Israel gualaž cheto' ca' ba bosoxi'e yesenabe' cuejo' Pablon' gwxe na' yosode'ede' selo'ne' gana' chesežag bene' gwnabia' chegaquen' cont yeseyiljwyože' bi da' xinj non Pablon'. ²¹ Perw bi šejli'o chegaque'. Nde choa bene' ca' yesebe'na'ogüe' Pablon' tnez cont yesote' le' na' ba gosechogbi'en bibi yese'ej yesagüe' šlac biña' yesote'ne'. Na' ba chesebeze' gwzenago' chegaque' cont cuejo' Pablon'.

²² Nach ben' yo'o lo ne'e soldadon' bose'e bi'na' na' gože'be':

—Gwsaco' bi go'o diža' che rsonna' ba bedesano' lagua' nga.

Gosesele' Pablon' lao gobernador ben' le Félix

²³ Nach ben' yo'o lo ne'e yogo' soldadw ca' goxe' chope bene' gwnabia' ben' chesenabia' to gayoa güeje soldadw na' bene' mandadw yososi'ni'a chegaque' cont šja'aque' ciuda Cesarea do cheda ga šeže'le na' yeseche'e chop gayoa soldadw bene' yesa'ac ni'aze na' gayonši bene' yesebia cabayw na' yechop gayoa soldadw bene' yesoxe' lanza. ²⁴ Lecze gože' legaque' chyažje cabayw be cuia Pablon', le le'na' yeseche'e gana' zoa gobernadore' ben' le Félix, na' yesape' Pablon' cont bibi gac che' tnez. ²⁵ Nach bzoje' to cart che gobernadore' da' bgoxe' legaque', žan:

²⁶ “Señor Gobernador: Neda' Claudio Lisias chzoja' le' gobernador Félix, nacteco' bene' blao, chguapa' le' tiox. ²⁷ Bene' Israel ca' ba gosezene' benga na' ba bosoxi'e yesote'ne', perw cate' gwnezda' naque' bene' nación Roma, gwy'a'a len soldadw chia' ca' jasla'ne' lo na'gaquen'. ²⁸ Na' cont nezda' bičen' chosocuiše' le', gwchi'ane' gan' chosoxi'a bene' gwnabia' che nación Israelen'. ²⁹ Nach gwnezda' chosocuiše' le' che bize da' chesac che' len ley chegaque'na', na' bi nacho bi da' mal ba none' cont yesote' le' o cont gate' ližya. ³⁰ Perw na' ba gwnezda' ba bosoxi'a bene' Israel ca' yesote' le', da'nan' la' chsela'tia'ne' laguo' le' na' lecze bena' mandadw len bene' ca' chosocuiš le' šja'aque' laguo' na' yesene' bin' chesac chegaque' len le'. Si'xenšco' yogo' da' quinga chneyoeda' le'. Claudio Lisias.”

³¹ Nach soldadw ca' gosone' can' ben bene' gwnabia' chegaquen' mandadw, besyebeje' Pablon' na' šeže'le gosegüe'e nez len le' besežine' yež da' nzi' Antípatris. ³² Na' cate' gwyeni' besyebi'i soldadw ca' ja'ac ni'aze' jaya'aque' cuartelen' na' bene' ca' gosebia cabayon' ja'aclene' Pablon'. ³³ Na' cate' besežine' ciuda Cesarean' bosonežjue' gobernadore' carten' zjanoxe'na' na' lecze gosone' Pablon' lo ne'e. ³⁴ Na' gobernadore' cate' beyož blabe' carten' gwñabde' Pablon' ga bene' naque'. Na' cate' gwnezde' naque' bene' distritw Cilicia, ³⁵ nach gože'ne':

—Gwzenaga' bin' nao' cate' yesela'ac bene' ca' chosocuiš le'.

Nach bene' mandadw bososeyjue' Pablon' lo' yo'o gan' chbe' rey Herodesen' cate' chone' yela' justis.

24

Pablon' be'e diža' lao gobernador Félix

¹ Cate' bačh goc gayo' ža zoa Pablon' ciuda Cesarean', nach bžin Ananías ben' nac bxož blaoch che bene' Israelen' na' nche'e to chope bene' gole blao chegaque' na' len to bene' le Tértulo ben' chac chne' lao bene' gwnabia'. Na' ja'aque' lao gobernadore' gosagüe' xya che Pablon'. ² Na' cate' jasexi'e Pablon', Tértulon' gwdagüe' xya che', gože' gobernador Félixen':

—Si'xeno', señor gobernador, za'to' laguo' nga. Binlo juisyw zoa nación chechon' na' da' zan da' šagüe' ba chac da' chnabi'o neto'. ³ Gate'tez zoato' žato' choxcleno' can' chono'na', señor gobernador, catec chbeto' can' chnabi'ona'. ⁴ Na' cont bi goneto' le' bichle zed, chata'yoeda' le' gwzenago' šlož dao' dan'

zedenato' na'a. ⁵ Ben' ba goxo' laguo' nga, nezeto' naque' to bene' chbecchgua da' zed. Chde' doxen yežlion' chone' cont neto' bene' Ísrael chacto' chople. Na' naque' bene' blao len bene' ca' chesene' bene' nazareno lagüe chesejnilaže' Jesús ben' nac bene' yež Nazaret. ⁶ Na' goclaže' gone' da' mal juisyw lo' yodao' cheton' na' da'nan' gwzento'ne' cont chogbia'to' che' con can' ža ley cheton'. ⁷ Perw na' gwyaz Lisiasen' ben' nac bene' gwnabia' che soldadw ca' na' beque'ene' lo' na'ton'. ⁸ Na' gože' neto' cheyala' yidto' laguo' nga cont gwcuisto'ne'. Guac nabdo' Pablon' cuino' cont nezdo' nac da' li can' chcuisto'ne' nga.

⁹ Nach bene' Israel ca' za'aclene' Tértulon' gosaque' toze len le' gosene' le' can' naquen. ¹⁰ Nach gobernadoren' bene' señw len Pablon' cont ne', na' Pablon' gwzologüe' gwne':

—Nezda' ba goc zan iz chono' yela' justis che nación ni, na' da'nan' chbeda' gwzoo' rson chian' laguon'. ¹¹ Na'a chac šižinw ža gwya'a Jerusalénna' jenxena' Diosen'. Na' guac nabdo' bene' ca' besele'e neda' še leca' naquen. ¹² Bi nacho besele'ede' chacyoža' len no bene' lo' yodao' blaon' ne' lo' yodao' yoble o gate'teze lo' ciudan'. ¹³ Na' bibi gac yeson bene' quinga cont yosolo'e napa' doła' ca' dan' chosocuiše' neda'. ¹⁴ Bi gwcuša' diža', da' li chonxena' Diosen' ben' gosonxen da' xozxta'oto' ca', la'czla' chonxena'ne' can' cheson bene' ca' zjanao' da' cobe dan' bi chesazlaže' bene' quinga, na' chejli'a che yogo'lol Xtiža' Diosen' dan' nyoj le'e ley cheton' na' da' ca' bosozoj bene' ca' goso'e xtiža' Diosen' cani'. ¹⁵ Na' zoa' lez yosban Diosen' bene' ca' ba gosat, bene' güen lente bene' mal. Lencze bene' gualaž chia' can' nite' lez gon Diosen' ca'. ¹⁶ Da'nan' zoa' chi' yichja' chona' can' chaclaže' Diosen' neche nezda' lo' yichjlažda'ogua' bibi doła' napa' lao Diosen' ne' lao beñachen'.

¹⁷ 'Ba goc zan iz zoa' zito' na' za' bela'a Jerusalénna' na'a cont bnežjua' mechw da' btoba' da' gaclenen bene' yaše' ca', na' lecz ca' jasana' yelaten' lo' yodao' blaon'. ¹⁸ Ca' goquen' zoa' lo' yodao' blaon' ba bexi beyacha' can' cheyala' gacto' cont chnežjwto' bi dan' chnežjwto' lao Diosen', cate' to chope bene' Israel za'ac Asia besele'e gan' zoa'na'. Na' bi nacho mbeca' žaš, neca ndop nžaga' bene' zan. ¹⁹ Na' bene' ca' za'ac distritw Asian' cheyala' yesid cuine' yosocuiše' neda' laguo' nga še bi da' mal chesacde' chona'. ²⁰ Na' bene' quinga nita' nga guac yesene' še bi da' mal nona' caten' bosodie' neda' lao bene' ca' chesenabia' nación Israelen'. ²¹ Še toz dan' bi chesazlaže' dan' goše'gaca'ne' caten' zjandob bene' ca' chesenabia', gwnia': "Ca' nac yela' justis chia' dan' chonle' na'aža, chonlen dan' chejli'a gwžin ža yesyeban bene' ca' ba gosat."

²² Gobernador Félixen' ba nezde' can' chosozejni'i bene' ca' ba chesejle' che Jesucriston', na' cate' bende' can' gwna Pablon', bich goclaže' gone' yela' justis che' ca' hora', gwne':

—Cate' yid Lisiasen' ben' nac bene' gwnabia' che soldadw ca', cana' yeyož gwzenaga' can' nac dan' chagwle xya nga.

²³ Nach bene' mandadw beche' xan soldadon' Pablon' gan' die' ližyan' na' be'e latje gon Pablon' con bi chaclaže' gone', na' be'e latje jaseña' bene' migw chen' le' jasesane' bi dan' byažjde'.

²⁴ Nach beza' gobernador Félixen' ciuda Cesarean', perw cate' gwde to chope ža bežine' da' yoble nche'e no'ol che' ben' le' Drusila. Na' Drusilan' naque' no'ole Israel. Nach gobernadoren' bene' mandadw gosaxe' Pablon' da' yoble na' bzenague' be' Pablon' diža' gwne' yogo'lol bene' cheyala' yesejnilaže' Jesucriston'. ²⁵ Nach Pablon' be'lenche' le' diža' can' cheyala' gaccho bene' güen lao Diosen', na' can' gwsaca'cho cont bi goncho da' mal, na' lecze be'lene' le' diža' can' gon Diosen' cate' žin ža gone' justis che yogo' beñach na'

gwnežjue' castigw che yogo' bene' bi chesejnilaže' le'. Na' gobernador Félixen' bžebe' na' gože' Pablon':

—Da' na'ze gwzenaga' na'a, guac yeyejo'. Na' cate' nlatja' guaxcza' le' yeto.

²⁶ Gobernadores' gocde' še gwnežjo Pablon' le' mechw cont yosane' le'. Da'n'an' goxe' Pablon' güeltze be'lene' le' diža'. ²⁷ Ca' chac gwde chop iz nach yeto bene' yoble bene' le Porcio Festo gwdie' blane' xlatje'. Na' Félixen' goclaže' yega'ane' binlo len bene' Israelen' cate' ba bechoje' gobernador, da'n'an' bene' mandadw bega'an Pablon' ližyan'.

25

Pablon' bzoa rson che' lao gobernador Feston'

¹ Na' cate' bžin Feston' ciuda Cesarean' gan' nabi'e, gwzoe' šone ža na' gwze'e gwyeje' Jerusalénna'. ² Nach bxoz gwnabia' ca' len nochle bene' blao che bene' Israel ca' ja'aque' jasene'e le' cont bosocuiše' Pablon'. ³ Na' gosata'yoede' Feston' gone' mandadw šjasesane' Pablon' Jerusalén. Gosata'yoede' le' gone' ca' le gosaclaže' yesebe'na'ogüe' Pablon' cont yesote'ne' tnez. ⁴ Na' gobernador Feston' boži'e xtiža'gaque', gwne':

—Yega'anche' Cesarean' gan' die' ližyan' le' neda' bich chžeda' ša'a na'. ⁵ Na' le cuej no bene' gwnabia' chele seła'le legaque' len neda' cont yosocuiše' le' lagua' gan' gona' yela' justis še bi da' xinj ba none'.

⁶ Nach gwzoa gobernadores' len legaque' Jerusalénna' do xono' o do ši ža na' gwdena' beze'e beyeje' Cesarean'. Na' beteyo gwchi'e gan' chone' yela' justisen' na' bene' mandadw gwyej Pablon' lagüen'. ⁷ Nach cate' bžin Pablon' lagüen' ba nita' bene' Israel ca' za'ac Jerusalénna' na' la' gosechjte' le' na' gosezolagüe' bosocuiše' le' chesene' da' zan da' mal juisyw ba bene', perw bi blo'elaon še diža' li cheso'e. ⁸ Nach Pablon' bzoa rson che', gwne':

—Bibi doła' napa' len ley che neto' bene' Israel ne len yodao' blao cheton' na' ne len rey César ben' chnabia' doxen nación Roman'.

⁹ Na' Feston' goclaže' yega'ane' binlo len bene' Israel ca', da'n'an' gože' Pablon':

—¿Bi che'ndo' sao' Jerusalén gona' yela' justis chion' na'le che yogo' da' ca' chosocuiš bene' quinga le'?

¹⁰ Nach Pablon' gwne':

—Rey Césaren' ba nzoe' le' cont gono' yela' justis, na' cheyala' gac yela' justis chia' laguo' nga. Ca' nac bene' Israel quinga, le' nezczedo' bibi da' xinj na' gona' len legaque'. ¹¹ Šaca' ba gwdapa' doła' o bichle da' ba bena' da' cheyala' gata', bi žia' bi gata'. Perw bibi nona' ca' nac dan' chosocuiše' neda' nga, na' nono zaca' gwde neda' laogaque'na'. Da'n'an' chnaba' tia' lao rey Césaren' cont gone' yela' justis chian'.

¹² Nach Feston' bene' yela' güexi'a len bene' gwnabia' che' ca' bi yesone' len Pablon' nach gože'ne':

—Ba gwñabo' tio' lao rey César na' lagüe' nan' šejo'.

Gobernador Feston' bdie' Pablon' lao rey Agripan'

¹³ Na' cate' ba gwde yeto chope ža, rey Agripa len no'ol che' ben' le Berenice besežine' Cesarean' bedeseguape' Feston' tiox. ¹⁴ Na' cate' gwneze gobernador Feston' nite' yezan ža, nach be'lene' rey Agripan' diža' che Pablon', gože'ne':

—Zoa to bene' nyixjw Félixen' ližya nga cate' bechoje'. ¹⁵ Na' cate' gwya'a Jerusalénna' bxoz gwnabia' ca' na' nochle bene' blao che bene' Israel ca' gosenabe' choglaguan' cont gaque' castigw. ¹⁶ Perw na' goše'gaca'ne' bi de costumbr che chio' bene' nación Roma gwdecho bene' yesaque' castigw še bi yesyedillagüen' len bene' ca' chosocuiš le' cont yosozoa rson chegaque'.

17 Nach cate' besela'aque' nga beteyo la' gwche'tia' gan' chona' yela' justis na' bena' mandadw gosebeje' Pablon'. 18 Na' cate' bosocuiš bene' ca' le', ne toz da' mal dan' chacda' yosobague'de' le' bibi gosene'. 19 Dan' chac chegaque', bi chejnilaže' Pablon' can' chesejnilaže' legaque', na' cheso'e diža' che to bene' ba got, bene' le Jesús, na' Pablon' že' mbancze'. 20 Cate' bich bi bežellaža' gona' ca dan' chesac chegaquen' na' goša' Pablon' še chaclaže' yodia'ne' Jerusalén cont gac yela' justis chen' che da' ca' chosobague'de' le'. 21 Nach Pablon' gwñabe' šeje' gone' yela' justis che' lao rey César Augusto, na' bena' mandadw beyeyjue' šlac gac gwdia'ne' lao rey Césaren'.

22 Nach rey Agripan' gože' Feston':

—Chaclaža' gwzenaga' can' choe' ben' dižan'.

Nach Feston' gože' le':

—Gwxe gwzenago' che' šeca'.

23 Nach beteyo gosacxenchgua rey Agripan' len Berenice cate' goso'e gana' chi' gobernadoren', na' lecz zjachi' bene' ca' chesenabia' soldadw ca' na' yogo' no bene' blao che ciudan'. Na' gwdena' Feston' bene' mandadw jasexi'e Pablon'. 24 Na' Feston' gwne':

—Rey Agripa, na' len yogo' le'e že'le nga len neto', ca nac benga ze laole nga, yogo' bene' Israel bene' že' Jerusalén len bene' že' Cesarea nga ba gose'e neda' benga naque' bene' mal na' yogo'cze' chesene' bi cheyala' bane'. 25 Na' ba gwñabyoža' na' gota'bia' bibi none' da' zaca' choglaguan' che' gate'. Na' ba gwñabe' tie' lao rey César gone' yela' justis che', na' ba gwcheba' gwdia'ne' ciuda Roma na'ale gan' zoa rey Césaren'. 26 Na' chacžejlaža', le bibi chežellaža' gwzoja' reyen' yapa'ne' bin' none'. Da'nan' bach gwleja'ne' laole nga, na' chbechgüeda' chbeja'ne' laguo' le' rey Agripa, cont yeyož gwzenagcho che' na' gata' bi da' gwzoja'. 27 Chacda' bi naquen to licha sela'ne' Roman' sin cbi gwzoja' še bin' none'.

26

Pablon' bzoe' rson che' lao rey Agripan'

1 Nach rey Agripan' gože' Pablon': —Guac ñao' bi da' gaclenen le'.

Nach Pablon' gwłis ne'en lao bene' ca' gwzolagüe' bzoa rson chen', gwne':

2 —Chbechgüeda' rey Agripa, ba gosone' latje gua' diža' laguo' nga na'a ca nac dan' chosocuiš bene' Israel gualaž checho ca' neda'. 3 Le' nombi'o costumbr che chio' bene' Israel na' nezd'o' can' chesacyož bene' gualaž checho ca' legacze'. Da'nan' chata'yoeda' le' gapšco' yela' chxenlaže' gwzenago' chia' nga.

Quinga ben Pablon' cate' bina' šejnilaže' Criston'

4 'Yogo' bene' Israel gualaž chechon' zjañezde' can' ba gwzoa' chonxena' Diosen' cate' ne' nactia' bidao', caten' gwzoa' laža' lente caten' gwzoa' ciuda Jerusalén. 5 Na' še chese'nde' yeso'e diža', lecze zjañezde' goca' txen len bene' ca' zjansi'e fariseo cate' nactia' bi' xcuide' na' bene' fariseo ca' chesonche' yogolo' costumbr gole can' nyoj ley chechon' clél can' cheson yezica'ch bene' Israel gualaž checho ca'. 6 Na' legaque' chesagüe' xya chia' neche chejli'a gwžin ža cate' Diosen' yosbane' bene' guat ca' can' gože' da' xozxta'ocho ca'. Neche da'nan' zoa' nga na'aža' cont gac yela' justis chian'. 7 Bene' zan lo šižinw cue' chio' bene' Israel nite' chesebeze' batcan' yosban Diosen' bene' ca' ba gosat, can' že' gone'. Da'nan' chesonxene' le' do ža do yel. Lecz neda' zoa' lez gac ca', na' da'nan' bal' bene' Israel gualaž chechon' chosocuiše' neda' nga rey Agripa. 8 Na' le'e chi'le chzenagle chia', ¿bixchen' chaquele nono šejle' dan' yosban Diosen' bene' ca' ba gosat?

Cana' Pablon' bgue'ede' bene' chesejnilaže' Criston'

⁹ 'Cana' neda' godca' cheyala' gue'eda' bene' ca' chesonxen Jesús ben' nac bene' Nazaret, na' da' zan benchgua' contr leaque'. ¹⁰ Bene' zan bene' chesejle' che Jesús en' Jerusalénna' gwdixjua' ližya, gwdapa' yiš dan' bosozoj b̄xoz gwnabia' ca' cho'en diža' napa' yela' gwnabia' cont gona' ca'. Na' cate' gosechoglagüe' yesote' no bene' ca', goca' toze can' bosoxi'e yesone'. ¹¹ Na' zan las gwy'a to to yodao' jasaca' leaque' cont yesebejyichje' bich yesonxene' Jesús en'. Na' catec bgue'eda' leaque' gwy'a a yež zito' jalagšiba' leaque'.

Da' yoble Pablon' cho'e diža' can' goc che' cate' Diosen' bocobe' yichjlažda'ogüe'

(Hch. 9:1-19; 22:6-16)

¹² 'Can' goc to ža cate' zya'a ciuda Damascon', noxa' yiš che b̄xoz gwnabia' ca' dan' žan gw̄chi gwsaca' bene' ca' chesonxene' Jesús en'. ¹³ Ca do guagwbiž zya'a ngua'a nezen' señor rey, cate'cze ble'eda' to be'ni' juisyw da' za' le'e yaba, chseni'chen ca gwbižen', na' gwyečjen neda' len bene' ca' zya'alena' txen. ¹⁴ Na' yogo'to' gwbižto' lo yon', na' neda' benda' to bene' chne' diža' hebreo gwne': "Saulo, Saulo žbixchen' ch̄chi chsaco' neda'? Dan' chondo' neda', chone zi' cuino' ca chon to go'n be chlibe lo ya dan' zoa lao carroš cheban'." ¹⁵ Nach bol güiža'ne', goža'ne': "žNo le' bene'?" Nach Xana' Jesús en' boži'en, gwne': "Neda' Jesús na' neda' ch̄chi chsaco'. ¹⁶ Beyas, le bač blo'elagua' le' na' ba gwleja' le' gono' xšina' na' go'o diža' che da' nga ba ble'edo' na' che bichle dan' za' le'edo' da' za' gwlo'eda' le'. ¹⁷ Na' na'a sela' le' gan' že' bene' ca' bi zjanac bene' Israel. Na' bi gona' latje no got le', ne bene' Israel gualaž chio' ca' na' ne bene' bi zjanac bene' Israel. ¹⁸ Chsela' le' gan' že' bene' bi zjanac bene' Israel na' gwzejni'ido'ne' cont yesebejyichje' da' malen' zjanone' na' yesone' da' güen. Chaclaža' yesyechoje' lo na' Satanás dan' chnabia' da' xigüe' ca' na' yosozenague' che Diosen' cont nitlao xtoła'gaque', na' lecze chaclaža' yesaque' txen len nochle bene' chesejnilaže' neda' bene' ba zjanac lo na' Diosen'."

Pablon' bsed blo'ede' bene' xtiža' Criston'

¹⁹ 'Ca' goc chia' rey Agripa, bzenaga' ca dan' gož Jesús en' neda' zoe' yaban' caten' ble'edagüeda'ne' tnez. ²⁰ Zgua'tec jazejni'ida' bene' ca' že' ciuda Damasco xtiže'na' na' gwdechle jazejni'ida' bene' ca' že' Jerusalénna' len bene' že' doxen distritw Judean', goše'gaca'ne' cheyala' yesebejyichje' xtoła'gaque' na' yosozenague' che Diosen' na' yesone' da' güen cont gachbia' ba gosebejyichje' da' malen'. Can' bzejni'ida' bene' Israel gualaž checho ca' lente bene' ca' bi zjanac bene' Israel. ²¹ Na' neče dan' chona' ca', bene' gualaž checho bene' chesegue'ede' neda' gosezene' neda' yodao' blaon' na' gosaclaže' yesote' neda'. ²² Perw na' Diosen' zoe' chaclene' neda', na' da'nan' zoacza' cho'a xtižen' ža na'aža len yogo'lolle že'le nga, le'e nacle bene' blao lente le'e bi nacle bene' blao. Bi nacho bichle chzejni'ida' bene' da' bi bzoj da' Moisés en' len yezica'chle ben' goso'e xtiža' Diosen' cani'. ²³ Gosene' Criston' ben' za' sela' Diosen' saca'zi'e na' gate' na' gaque' bene' nechw yebane' ladjo bene' guat ca'. Na' lecze gosene' le'na' gwzende' bene' Israel len bene' bi zjanac bene' Israel can' cheyala' yesone' cont šo' be'ni' che' lo' yichjlažda'ogaque'.

Pablon' goclaže' šejnilaže' rey Agripan' Jesucriston'

²⁴ Ca' cho'e dižan' cate'cze gobernador Feston' gwne' zižje gože'ne':

—jChactonton' Pablo! Dan' ba bsedteco' nan' bač chactonto'.

²⁵ Nach Pablon' gože' gobernadoresn':

—Bi chactonta' señor gobernador, san diža' lin' cho'a, diža' da' zaca' gwzenago'. ²⁶ Na' rey Agripa nga nombi'e da' quinga choa' diža' chen, da'nan'

bi chžeba' choa' diža' lagüe' nga. Nežda' chache'ede' choa' diža' li, le dan' goc che Jesúsen' bi nacho goquen bagaše'ze. ²⁷ Le' rey Agripa, ¿chejli'o da' ca' bosozoj bene' ca' goso'e xtiža' Diosen' cani'? Nežda' chejli'on.

²⁸ Nach rey Agripan' gože' Pablon':

—¿Chacdo' bedao' co'oyelo' neda' cont šejnilaža' Jesucriston'?

²⁹ Nach Pablon' gože'ne':

—Chnaba' lao Diosen' žin ža cate' le' len yezica'chle bene' že' nga šejnilaže'le Jesucriston' can' chejnilaža'ne', še yob o še ne' chžach, perw cbi gata'le ližya can' dia' neda'.

³⁰ Beyož gwna Pablon' ca' bezoža' rey Agripan' len no'ol chen' Berenice, na' len gobernador Feston' na' len bene' ca' gosebe' len legaque'. ³¹ Nach cate' ba besyeyo'e ga yoble, rey Agripan' na' gobernador Feston' gose' lježe':

—Bi nacho ba non benga da' zaca' gate' o da' zaca' chixjwchone' ližya.

³² Nach rey Agripan' gože' Feston':

—Šaca' bi gwñabe' tie' lao rey Césaren' cont gac yela' justis che'na' guac yosanchone'.

27

Gosesele' Pablon' ciuda Roman'

¹ Na' cate' bosoxi'e yesesele' Pablon' distritw Italia gan' chi' ciuda Roman', nach gwlo'e Pablon' len yezica'chle pres ca' lo na' to xan soldadw bene' le Julio. Na' Julion' naque' txen len soldadw ca' ben' zjansi'e Batallón che Augusto. Na' neda' Lucas gwzoa' len Pablon'. ² Nach gwyo'oto' to lo' barcw da' za' ciuda da' nzi' Adramitio cont žinen distritw Asia, beza'to' ciuda Cesarean'. Na' za'len Aristarcon' neto'. Naque' bene' ciuda Tesalónica dan' chi' distritw Macedonia. ³ Nach ža beteyo bžinto' ciuda da' nzi' Sidón. Na' xan soldadw ben' le' Julio bencze' güen len Pablon', be'e latje gwyeje' gan' že' bene' migw che' ca' cont bosonežjue' le' bi dan' byažjde'. ⁴ Na' cate' bechojto' ciuda Sidónna' beza'to' bedeto' gała'ze gan' nla' yežlio dan' chi' lo' nisdao' dan' nzi' Chipre. Chechjhgua be' clele ca' horen', na' yežlion' bcue'ejen neto' len be'na'. ⁵ Na' beyož gwdeto' lo' nisdao' dan' de gała'ze gan' zjambane distritw Cilicia na' distritw Panfilia, nach bžinto' ciuda dan' nzi' Mira dan' chi' gan' mbane distritw Licia.

⁶ Na' ciuda Miran' xan soldadon' bželde' yeto barcw da' za' ciuda Alejandría da' za' šej distritw Italia, na' bene' mandadw gwyo'oto' lo'en txen len Pablon'.

⁷ Nach gwza'to' zejto' lo' nisen' da' yoble. Zan ža zejto' šolaže', cane bžinto' gwdeto' ciuda gan' nzi' Gnido. Na' dan' ne' chechj ben' clele gan' zejton', da'nana' bi goc šejto' licha, nach gwca'ato' zejto' chcue'ej cuinto' len yelate' yežlio dan' nga'an lo' nisdan' dan' nzi' Creta, gan' bitec gwyechj be', na' gwdeto' gała'ze gan' zoa to ya'a da' nzi' Salmón. ⁸ Na' zejto' gała'ze ga zoa yo biž chcue'ej cuinto', cane bžinto' gan' nzi' Buenos Puertos gała'ze yež dan' nzi' Lasea.

⁹ Goc zan ža zejto' ca' na' bačh chžebto' šjažiayi' cuinto' lo' nisdan', le ba bžin tiemp zag cate' chechjhgua be'. Nach Pablon' gwñeyoede' bene' ca' yesebeze' na'ze. ¹⁰ Gože' legaque':

—Le'e bene' le'e chsa'le barcon', ba chache'eda' can' zejcho nga cane chac chzan', xož cuiayi' barcon' len yoa' chelen', na' lente chio' yo'ocho lo' barcon' xož cuiayi'cho.

¹¹ Nach xan soldadw ca' bzenagche' che xan barcon' na' che ben' chsa' len clal ca' che Pablon'. ¹² Le bi nac latje güen cho'a nisdan' gan' zoaton' ga'anto' tiemp zaguen', na' gwyan bene' ca' gosacde' cheyala' sa'to' šejto' še gonen žinto' Fenice gana' soato' šlac te da' zaguen'. Fenice naquen to yež ga chac cho'o

barcw gan' mbane Creta na' bi chactec zag, le šla'ale nla' ga chla' gwbiž na' šla'ale ga chxoa gwbiž.

To be' gual gwyechjen lo nisdaon'

¹³ Cate' gwzolao chechj to be' goł dan' za' che'el'le na' bene' ca' chososa' barcon' gosacde' guac šja'acche' gan' gosaclaže', nach gozsa'to' zejto' lo nisen' da' yoble to łcue'ej che Cretan'. ¹⁴ Gague goc sša cate' ba chac to be' gual da' nzi' Noreste chechjchguan clele gan' zej barcon'. ¹⁵ Na' chžiga'chguan barcon'. Bibi goc yesone' cont šejchto'. Na' btoblaže'to' gwžiga' ben' barcon' len neto' con can' chechjenna'. ¹⁶ Nach bžinto' to łcue'ej yežlio da' nga'an lo' nisen' dan' nzi' Clauda, gan' bitec chechj be'. Na' barcw cha'o gan' yo'oton' nxoben to barcw dao' da' chon žin choslan bene' cate' chac bi da' chac che barcw xenna'. Na' cane goc bocueto' barcw daon' lo' da' cha'ona'. ¹⁷ Beyoža' bchejto' barcw cha'ona' do gual cont gwlo'oto' fuers chen. Na' besežebe' gaga' barcon' to latje gan' nac yox da'na' nzi'in Sirte, nach bosoletje' lache' xen dan' chonen cont chžiga' ben' barcon'. Nach con zejto' lo nisen' con gan' gwyej barcon'. ¹⁸ Beteyo ba chož nisen' lo' barcon' da' chechjchgua ben', nach gosešaše' yoa' dan' nsa' barcon' gwzolao bosozala'šazen' lo' nisen'. ¹⁹ Na' ža gwyone goclento' legaue' bzala'to' xšinlaz barcon' lo' nisen'. ²⁰ Zan ža bi blo'elao gwbižen' na' šeže'le bibi beljw ble'eto', do ža do yel goc yejw na' gwyechj be', na' bich gwzoato' lez yelato'.

²¹ Bačh goc sša bi chagwto', nach Pablon' gože' bene' ca':

—Le'e bene', chac quinga dan' bi bzenagle chia' caten' gwnia' le'e bi sa'cho Cretan', na' dan' bi bzenagle chia', ba gwžiayi' yoa' che barcon' len xšinlazen. ²² Perw na'a bi soayaše'le, ne tole cbi cuiayi' yela' mban chele, san barcw ngazen' cuiayi'. ²³ Neda' chonxena' Diosen' na' ba ben cuina' lo ne'e, na' le' ba gwsele' to angl bene' blo'elagüe' neda' nže'e. ²⁴ Nach angla' gože' neda' diža' nga: “Bi žebo' Pablo. Cheyala' žino' lao rey César ben' chi' ciuda Roma, na' da'nan' yelao', bibi gac chio', na' lez yosla Diosen' yogo' bene' ca' že' lo' barcon'.” ²⁵ Na' dan' gwna anglen' ca', bene', le yebe. Nežda' Diosen' gone' gac dołoł can' gož anglen' neda'. ²⁶ Da' gac checho yecho'onen chio' yo biž da' nga'an late' lo' nisen'.

²⁷ Na' cate' ba goc žta'gwbiž zejto' lo nisen' nžiga' ben' neto' nile nale lo nisdaon' dan' nzi' Adria, nach ca do chel bene' ca' zjansa' barcon' gosacbe'ede' ba zejto' gala'ze yo biž. ²⁸ Nach beseletje' to plom lo' nisen' cont bosochixe' ca do gaca'te' sitjw nac nisen'. Beyož bosochixen'na' gosenezde' goquen šino'tochoa metr. Nach gosezdie' yelate' na' bosozchixen' da' yoble na' ca horen' goquen gažechoa metr. ²⁹ Na' besežebe' šjati'i barcon' yej lo' nisen', nach beseletje' tap ya xen dan' že' ancla, bosochijen' xan barcon' cont gosoxen' len, na' do chesežebze' chesebeze' batcan' šeni'. ³⁰ Nach bene' ca' zjansa' barcon' gosaclaže' yosyoxonje'. Besyeletje' barcw dao' dan' ncua' xina' barcon', con bosode'ede' yeseletje' ancla ca' dan' ncua' lagüen'. ³¹ Nach Pablon' boł güiže' xan soldadw ca', gože'ne':

—Še bene' quinga bi yesyega'ane' lo' barcw nga, bi yelacho.

³² Nach soldadw ca' gosechogue' don' zjanca' barcw daon' bososanen' lo' nisa'.

³³ Do šbal Pablon' gwzolao gwneyoede' yesagw bene' ca' že' lo' barcon', gože' legaue':

—Ba chac žta'gwbiž zoale bi chtasle na' bi che'ej chagwle. ³⁴ Chata'yoeda' le'e le gagw cont soale binlo, le ne tole ca cuiayi'.

³⁵ Beyož gwne' ca' bešue' to yetextil, be'e yela' choxclen che Diosen' lao yogo' neto' že'to' lo barcon' na' gwxi'e to pedasen' gwdagüen'. ³⁶ Nach yogo'to'

bebeto' na' lec̄ gwzolaoto' gwdagwto'. ³⁷ Chop gayoa gayonšino'to' nacto' že'to' lo' barcon'. ³⁸ Na' beyož gwdagwto' ca' beļjeto', nach trigon' da' ne' nga'anč lo' barcon', gosebejen' bosozalen' lo' nisdaon' cont barcon' bich goctequen zi'i.

Goxj barcon'

³⁹ Cate' gwyeni' bi zjanombi'e yežlion' gan' besežinen', perw besele'ede' de to latje ga žia nisen' šize na' cho'enna' nac laše' lo' yox. Nach gosaque' toze gosaclaže' yesone' cont žin barcon' šjachen' laše' lo' yoxen'. ⁴⁰ Na' gosechogue' do che ancla ca', gosebejyichjen' lo' nisen'. Lecze goseseže' do dan' bosochėje' yag dan' chsa' barcon' licha na' goselise' lache' dan' zoa yichj barcon' cont bžiga' ben' len, nach zja'aque' cho'a yo bižen'. ⁴¹ Na' gosedie' ga chedił nisdaon' len yeto da' yoble, na' jachaz lagüe barcon' lo' yoxen', bich goc tan. Na' nisen' gwzolao bzojjen barcon' catec fuers nsan'. ⁴² Nach soldadw ca' gosaclaže' yesote' pres ca' cont bi yeseyele' nisen' na' yosyoxonje'. ⁴³ Perw xan soldadw ca' goclaže' yosle' Pablon', da'nān' bžone' yeson soldadw ca' can' chesacclaže' yesonen'. Bene' mandadw len pres ca' še noe' chac chyela' nisen' zgua'tec legaque' yesexite' lo' nisen' cont yesyechoje' yo biž. ⁴⁴ Na' bene' mandadw bene' ca' bi chac yeseyela' nis yosochine' no yagla' o bichle xšinlaz barcon' cont yesyežine' lo' yo. Na' can' gosone' na' yogüe' besyežine' lo' yo bižen'.

28

Dan' goc che Pablon' šlac zoe' Malta

¹ Cate' bechojto' lo' nisdaon' bžinto' yo bižen', bene' ca' že'na' gose'e neto' ba bžinto' gan' nzi' Malta, naquen to yež dan' chi' to lo' yežlio da' nga'anen lo' nisdaon'. ² Na' bene' ca' že'na' gosaque' bene' šagüe' len neto', bosoxene' to yi' xen na' goxe' yogo'to' gan' nite'na', le ba chac yejw na' chacchgua zag. ³ Nach Pablon' btobe' xonj xis bcue'en lo' yin', cate' bchoj to beļ be nac venen lo' xis ca' gwdi'inba' ne'e gola'ditban'. ⁴ Na' besele'e bene' Malta ca' nala'dit belen' na' Pablon', na' gose' lježe':

—Benga nacļje' bene' güet bene'. Da'nān' la'czla' bele' lo' nisen', Diosen' bi güe'e latje banche'.

⁵ Nach Pablon' con gwžib ne'ena' lo' yin' na' bexope belen', na' bibi gocde'. ⁶ Yogo' bene' ca' chesebeze' batcan' solao gata' ne'en yi o batca' gate'. Gosebeze' šša na' besele'ede' bibi gocde'. Nach gosone' xbab yoble, gosene' naque' to bene' šejnilaže'cho.

⁷ Na' bene' gwnabia' che doxen Malta le' Publio na' yežlio che' zjaden gaļa'ze latje gan' bžinton', na' blebe' neto', gwzoato' ližen' šone ža. ⁸ Na' xa Publion' chacšenchgüede' yo'e da' la na' che'ede' yiž chen. Nach Pablon' gwo'e gan' de'na' bol güiže' Diosen', nach gwxoā ne'en yichj bene' güen' na' beyaque'. ⁹ Beyožēn' jasexi'e yezica'chle bene' lagüe yeža' bene' chese'ede' yižgüe' na' gwnabde' Diosen' yeyone' legaque', na' lecze besyeyaque'. ¹⁰ Na' da' zan da' güen goson bene' ca' len neto'. Na' cate' bžin ža beza'to' bosyoži'e lo' barcon' yogo' da' ca' chyažjeto'.

Pablon' bžine' ciuda Roman'

¹¹ Bega'anto' Malta šon bio', nach gwza'to' zejto' lo' nisen' yo'oto' to lo' barcw da' za' ciuda Alejandría da' gwlezen latjen' šlac gwde da' zaguen'. Na' mben le'e barcon' l' gua'a lsaca' che bene' ca' le' Cástor na' Pólux. ¹² Na' bžinto' ciuda dan' nzi' Siracusa gan' bega'anto' šone ža. ¹³ Nga gozza'to' cont bžinto' yež da' nzi' Regio. Na' bega'anto' tža. Nach gwzolao chechj be' dan' za' che'elle, na' beza'to' da' yoble beteyo bezžinto' ciuda da' nzi' Puteoli na' bechojto' lo' barcon'. ¹⁴ Nga

bežagto' beṇe' lježto' chesonxene' Jesucriston' Puteoli na' gosenabe' gwzoato' len legaque' to xman. Na' gwdena' gwza' ni'ato' zejto' Roman'. ¹⁵ Na' cate' za' žinto' ciuda Roman' gosenaze beṇe' lježto' že' Roman' ba zoa žinto', na' bale' bedeseleze' neto' latje gan' nzi' Šone Tiend na' yebale' lagüe ya'a dan' nzi' Che Apio. Cate' ble'e Pablon' legaque' be'e yela' choxc̄len che Diosen' na' gwbede' lo' yichjlažda'ogüe'. ¹⁶ Na' cate' bžinto' Roman', xan soldadw ca' bene' yezica'chle pres ca' lo na' beṇe' gwnabia' che soldadw ca' nita' na', perw be'e latje gwzoa Pablon' toze' ga yoble na' con gwzoa to soldadw gwdape' le'.

Pablon' be'e xtiža' Jesucriston' Roman'

¹⁷ Beyon ža bžinto', Pablon' goxe' beṇe' blao che beṇe' Israel ca' že' ciuda Roman'. Na' cate' beyož besedobe'na' gože' legaque':

—Beṇe' migw, beṇe' gualaž checho ca' že' ciuda Jerusalén gosezene' neda' gosone' neda' lo na' beṇe' gwnabia' che nación Roman', la'czla' bibi bena' contr beṇe' gualaž ca' na' ne contr costumbr che da' xozxta'ochon'. ¹⁸ Nach beṇe' gwnabia' che nación Roman' gosenabyože' na' gosac̄laže' yososane' neda' cate' gosacbe'ede' bibi nona' da' zaca' yesote'nda'. ¹⁹ Nach beṇe' gualaž ca' že' Jerusalénna' bosožoncze' yososane' neda'. Da'nān' gwṇaba' tia' lao rey Césaren' cont gac yela' justis chia'. Perw bi nacho gagua' xya che beṇe' gualaž checho da' gosonde' neda' ca'. ²⁰ Da'nān' zoa' nga bač goxa' le'e cont le'eda' le'e na' güe'lena' le'e diža'. Na' ncheja' gden ni neche dan' zoa' lez yosban Diosen' beṇe' ca' ba gosat, cacze zan chio' beṇe' Israel zoacho lez.

²¹ Nach beṇe' ca' gose'ene':

—Bibi cart na' la' laoto' nga dan' za' distritw Judean' da' bosozoj beṇe' Jerusalén ca' güen' diža' še bin' chac len le', na' nono beṇe' gualaž na' la' beṇe' ne mal chio'. ²² Perw chaclaže'to' yeneto' go'o diža' che dan' chejli'o che Jesúsēn', le nezeto' doxen chesene' che le'e chejle'le che'.

²³ Na' bosozie' bia' to ža cont šjasene'e le' da' yoble, na' cate' bžin žan' beṇe' zan ja'aque' gan' zoen'. Nach Pablon' be'lene' legaque' diža' do ža. Be'e diža' che dan' cheyala' gwzenagcho che Diosen' ben' chnabia' doxen, na' bzejni'ide' legaque' da' ca' zjanyoj le'e ley dan' bzoj Moisésēn' na' len dan' bosozoj yezica'chle beṇe' goso'e xtiža' Diosen' cani' che Jesucriston', cont yesejle'e che'. ²⁴ Na' baḷ beṇe' ca' gosejle'e xtižen' da' be'e na' yebale' bi gosejle'en'. ²⁵ Dan' bi gosone' toz ca' yesone' xbab, gwzolaos besyeya'aque'. Nach Pablon' gože' legaque':

—Dan' gož Spiritw che Diosen' da' Isaíasēn' dan' bzoje' che da' xozxta'ocho ca' naquen da' li, žan:

²⁶ Gweyēj gož beṇe' gualaž chio' ca' xtižan':

Da' li yenele, perw na' bitw šejni'ile bi zeje dan' yenelen'.

Na' da' li le'ele, perw bi gacbe'ele bi zejen dan' le'elen'.

²⁷ Nacle beṇe' güedenag na' bač natcze yichjlažda'olen'.

Bi chazlaže'le gwzenagle dan' chenele na' dan' chle'ele;

con nacle beṇe' güedenag.

Šaca' bi nacle beṇe' güedenag, šejni'ile bi zejen dan' chenele na' dan' chle'ele.

Nach yetinjele xtola'le cont yeca'an na' yocoba' yichjlažda'olen'.

²⁸ Che'nda' nezele ba gwzolaon na'a Diosen' chsele' beṇe' cheseyixjue'ede' xtižen' len beṇe' bi zjanac beṇe' Israel cont yosozenague' che' na' gata' yela' mban chegaque' toli tocanē.

²⁹ Beyož gwna Pablon' ca', beṇe' Israel ca' besyežaše' chesacyožchgüe' che dan' gwnen'.

³⁰ Na' chop iz nya' gwzoa Pablon' ciuda Roman' to yo'o ga chyixjue', na' blebe' yogo'lol bene' jase'ne'e le'. ³¹ Na' bzejni'ide' legaque' Diosen' chnabi'e doxen, na' lecz bzejni'ide' che Xancho Jesucriston'. Nono bžon gwzejni'ide' be'ne', na' be'e xtiža' Diosen' con can' goclaže'.

CART DAN' BZOJ POSTLW SAN PABLO CHE BENE' CA' ŽE' ROMA

¹ Neda' Pablo chzoja' le'e. Chona' bite'tez dan' ža Xancho Jesucriston'. Diosen' gwleje' neda' cont naca' postlw che', na' gwsele' neda' cont chyixjue'eda' diža' güen che'. ² Diosen' ba gwzomagüe' bzende' benachen' diža' güen che', bene' cont gwnita' bene' goso'e xtižen' cani' na' bozozojen'. ³ Na' diža' güen che Diosen' chzejni'in chio' che Xi'ine' Xancho Jesucriston'. Len' golje' benach lo diaža che da' rey David. ⁴ Na' Spiritw che Diosen' blo'en Xancho Jesucriston' naque' dogualje Xi'in Dios na' nape' yela' guac, le Jesucriston' bebane' ladjo bene' guat ca'. ⁵ Na' neto', da' chejnilaže'to' Xancho Jesucriston', Diosen' bene' da' güenchgua len neto', le gwleje' neto' na' gwsele' neto' chyixjue'eto' xtižen'. Na' gwsele' neto' chyixjue'eton' cont šanch bene' yesejnilaže'ne' na' yosozenague' che'. Na' Xancho Jesucriston' soe' blaoch cate' bene' že' yogo' nación yosozenague' che Diosen'. ⁶ Can' naquen, Diosen' ba gwleje' le'e cont nacle lo na' Jesucriston'.

⁷ Chzoja' da' nga par yogo' le'e že'le Roman' le'e ba mbej Diosen' cont nacle lo ne'e. Diosen' chacde' le'e. Na' chnaba' lao Xacho Diosen' len Xancho Jesucriston' yesaclene' le'e na' yesone' cont soa cuezle binlo len xbab da' yo'o lo' yichjlažda'olen'.

Pablon' goclaze' šjane'e bene' ca' chesejnilaže' Jesucriston' ciuda Roma

⁸ Zgua'tec ni'a le'e Jesucriston' zoe' chaclene' neda' cont choa' yela' choxclen che Diosen' par yogo' le'e, le bene' ca' že' doxen lo yežlion' cheso'e diža' can' chejnilaže'le Criston'. ⁹ Nezcze Diosen' yogo' ni'a cate' chol güiža'ne' chnaba' gaclene' le'e. Naque' ben' chejnilaža' do yichj do laža' na' chona' xšinen' choa' diža' güen che Xi'ine' Jesucriston'. ¹⁰ Chnaba' lao Diosen' gone' latje yedeña'a le'e še ca' chnalaže' gona', le ba chac sša zelaža' yida'. ¹¹ Chaclaža' yedeña'a le'e na' gwzejni'ichda' le'e cont soachachle šejnilaže'le Diosen'. ¹² Na' le'e len neda' soacho gonchachlaže' lježcho dan' chejnilaže'cho Jesucriston'.

¹³ Bene' migw, che'nda' nezele zan ni'a ba goclaza' yida' yedeña'a le'e, perw bina' gac yedeña'a le'e. Chaclaža' yida' gona' xšin Diosen' gan zoale cont šanle gwzenagle che Jesucriston' ca ba goc yezica'chle yež ga ba gwya'a. ¹⁴ Nezda' cheyala' gua' diža' güen che Jesucriston' len yogo'lol bene', bene' že' ciudan', na' bene' že' yixe', na' bene' chesac letr na' bene' cbi chesac letr. ¹⁵ Da'nan' che'nchgüeda' gua' xtižen' len le'e že'le Roman' can' ba bian' ga yoble.

Diža' güen che Jesucriston' nsan' yela' guac che Diosen'

¹⁶ Bi cheto'eda' gua' diža' güen che Jesucriston', le xtižen' nsan' yela' guac che Diosen' cont bene' chesejle' chen gata' yela' mban chegaque' toli tocañe. Nsan' yela' guac len neto' bene' Israel, na' lecze len le'e bi nacle bene' Israel. ¹⁷ Na' diža' güen che Jesucriston' chzejni'in chio' še bene' yesejnilaže' Jesucriston', Diosen' gone' legaque' bene' güen, na' bi de bichle da' gac goncho cont gaccho bene' güen len le'. Can' nyoj Xtiža' Diosen' žan: "Diosen' že' bene' chejnilaže' le' naque' bene' güen len le' na' gata' yela' mban che' toli tocañe."

De xtola' benachen'

¹⁸ Diosen' zoe' yaban' na' ba blo'ede' benachen' toli tocañe yesesaca'zi' yogo' bene' cbi chesejnilaže' le' na' chesone' da' xinj. Na' da' chesone' da' xinjen' bi chesac laže' yesombia' bene' yoble diža' li che Diosen'. ¹⁹ Na' Diosen' gone' yesezaca'zi'e, le ba zjanezde' zoe' da' ba blo'ede' legaque' can' ba benen'. ²⁰ Bi

chle'echo can' nac Diosen', na' bi chle'echo can' zoe' chnabi'e, perw nezecho de yela' guac che' can' bene' bxie' yežlion', na' yogo' beṇaḥ chesele'ede' da' ca' ba bene'. Da'nān' bibi de da' yosode'e beṇaḥen' yesene' bi zjanezde' še zoe'. ²¹ La'czla' zjanezde' zoa Diosen', bi chesonxene' le', neca cheso'e yela' choxclen che'. Xbab chegaquen' bibi zacan' na' zjanchoḷ yichjlažda'ogüen' yela' bi chejle' chegaquen'. ²² Chesene' zjanaque' bene' sina' perw chesone' xbab da' bibi zaca'. ²³ Chosozoe' Diosen' to šla'ale la'czla' naque' la'zelagüe' bene' zaca' na' zoe' toḷi tocaṇe. Na' gualaz le', chesejnilaže' no ḷ gua'a lsaca' che beṇaḥ bene' te che, na' no ḷ gua'a lsaca' che be zoa xil, che be žia tap ni'a na'ba' na' che no be xigüe'.

²⁴ Da'nān' Diosen' ba gwlejyichje' legaque' cont chesone' da' xinj can' ža lo' lažda'ogaquen', na' bale' ba chesonchgüe' da' nac yela' zto' len cuerp chegaquen' toe' len yetoe'. ²⁵ Diosen' gwlejyichje' legaque' cont chesone' yela' zto', le legaque' gosebejyichje' diža' li che Diosen' na' chesejle'e che da' güenlaže'. Chesejnilaže' da' ca' ben Diosen' na' bi chesejnilaže' Dios ben' cheyala' šejnilaže'cho na' gonxencho toḷi tocaṇe. Ca'czen' gacšca.

²⁶ Da'nān' Diosen' gwlejyichje' legaque' cont chesone' yela' zto' con da' žan lo' yichjlažda'ogaque'. Can' chac, nita' no'ole bene' bich chesone' can' cheyala' yeson no'olen', san cheseque'e ljež no'olgaque' cont chesone' len legaque' da' bi cheyala' yesone'. ²⁷ Na' nita' bene' byo bene' bitw chese'nde' yesenita'lene' no'ole, san chesezelaže' ljež bene' byogaque' nach cheseca'a lježe' cont chesone' yela' zto'. Na' dan' ba chbiayi' cuerp chegaquen', naquen castigw da' cheyala' yesezi'e yela' güen da' xinj chen'.

²⁸ Bi chesaclaže' beṇaḥen' yosozenague' che Diosen', da'nān' ba gwlejyichje' legaque' len xbab mal chegaquen'. Da'nān' nite' chesone' da' bi cheyala' yesone'. ²⁹ Chesonchgüe' yogo' da' xinj. Bene' byo chesata'lene' no'ole bi nac no'ol chegaque', na' no'olen' chesata'lene' bene' byo bi nac bene' chegaque'. Chesexi'e bene'. Chesezelaže' bi da' de che bene'. Zjanaque' bene' xi'a juisyw, chesegue'e lježe', chesot lježe', chesedile', cheseziye'e, zjanacchgüe' bene' güedenag, na' chja'aque' chjaseleje' diža' che bene'. ³⁰ Chesene' mal che bene' yoble, chesegue'ede' Diosen', na' bibi bala'aṇ chesozoe' bene' yoble. Chesa'laže'. Chesonxen cuine' cheso'e diža' zjanaque' bene' güen. Chesaljlaže' bichle da' mal da' yesone'. Bi chosozenague' che xaxṇe'e. ³¹ Bi chesejni'ide'. Bi chesone' da' ba gosene' yesone'. Bi chesacde' bene' yoble. Bi chesyezi'xen che lježe' na' bi chesyeyaše' lježe'. ³² Zjanezde' Diosen' že' toḷi tocaṇe yezazaca'zi' ben' cheson da' ca'. Na' la'czla' zjanezde' can' že', con nita'cze' chesone' da' xinjen' na' chesyebede' cate' bene' yoble chesone' can' cheson legaquen'.

2

Diosen' zejczze' to licha da' chone' castigw che xtoḷa'chon'

¹ Še nācho che bene' yoble da' xinjen' chone', bibi zaca' ye'cho Diosen' gague bi xtoḷa'cho de, note'tez naccho. Cate' chnecho che da' chon bene' yoble, na' cheyechjen chio', le toz can' choncho len da' cheson legaque'. ² Nezecho še choncho da' xinj ca' nac da' ca' ba gwnian', Diosen' gone' cont saca'zi'cho che xtoḷa'chon' na' zejczze' to licha da' gone' ca'. ³ ¿Chaquele Diosen' bi gone' da' saca'zi'cho cate' chnecho che da' xinj da' chon bene' yoble na' chontecho can' chesone'na'? Bi cheyala' gaquecho bi gone' da' saca'zi'cho, le gonczen'. ⁴ ¿Bi chacbe'ele Diosen' nacchgüe' bene' šagüe' na' bene' xenlaže' len chio' napcho doḷa' na' chone' ca' cont gache'echo da' xinjen' choncho na' yetinjechon? ⁵ Le'e bi chetinjele xtoḷa'len' nacle bene' yid, na' chonle cont Diosen' ža'ache' le'e na'

gonche' ga saca'zi'le cate' žin ža chogbi'e che benachen'. Cana' gwlo'e zejce' to licha can' chogbi'en saca'zi' to to benach che xtolag'gaquen'. ⁶ Na' cana' to tocho saca'zi'cho o gone' ga gac güen checho con ca nac da' ba bencho. ⁷ Na' še cheyljwlaže'cho nac goncho cont šjayzoacho len Diosen' toli tocanē, na' cont yebe Diosen' chio', na' cont gone' gacchcho bene' zaca', soacho goncho da' güen bite'teze da' gwžaglaecho. Nach Diosen' gone' cont bancho toli tocanē. ⁸ Na' še zoacho choncho con da' chazlaže'cho na' bi chzenagcho diža' li che Diosen', san zoacho chzenagcho che da' malen', Diosen' ža'ayichje' chio' na' gone' ga saca'zi'cho toli tocanē. ⁹ Yogo' benach bene' chon da' xinj saca'zi'e na' žaglagüe', zgua'tec žaglao neto' bene' Israel na' tech yezica'chle bene'. ¹⁰ Yogo'cho še choncho da' güen, Diosen' gone' cont šjayzoacho mbalaz len le' na' gone' cont gacxencho, na' gone' cont soacho binlo len xbab dan' yo'o lo' yichjlažda'ochon'. Zgua'tec gone' ca' len neto' nacto' bene' Israel, na' techle gone' ca' len le'e bi nacle bene' Israel.

¹¹ Toz ca chon Diosen' len yogo'lol benach. ¹² Bene' bi zjanombi'e ley dan' bzoj da' Moisésen' na' chesone' da' xinj, Diosen' gone' yesebiaye'e gague lagüe dan' bi zjanombi'e leyna', san lagüe dan' zjanezde' chesone' da' xinj. Na' bene' zjanombi'e leyna' na' chesone' da' xinj, Diosen' gone' ga yesebiaye'e da' bi chesone' can' žanna'. ¹³ Gague con yenecho can' ža leyna' cont Diosen' ne' naccho bene' güen len le', san goncho can' žanna', nach Diosen' ne' naccho bene' güen len le'. ¹⁴ Bene' bi zjanac bene' Israel na' bi zjanombi'e ley dan' bzoj Moisésen', tgüeje lo' lažda'ogaquen' chonen cont chesone' da' güen can' ža leyna' cheyala' yesone', na' la'czla' bi zjanombi'e leyna' dan' zoa yichjlažda'ogaquen' chžian bia' yesone' da' güen, naquen ca to ley len legaque'. ¹⁵ Nacia' zjanezde' lo' lažda'ogaque' cheyala' yesone' da' ca' nžia bia' leyna' yesone', le chesone' late' güejen. Na' zjanezde' lo' yichjlažda'ogaquen' še da' chesone' naquen güen o še naquen mal. ¹⁶ Can' gac caten' žin ža Diosen' gone' lo' na' Jesucriston' choglagüen' che to tocho ca nac xbab chechon' da' ba bencho na' bichle da' ba bencho bagaše'ze še naquen güen o še naquen mal. Can' chnia' cate' chyixjue'eda' diža' güen che Jesucriston'.

Bene' Israel bi chesone' can' ža' leyna'

¹⁷ Na' le'e nacle bene' Israel gualaž chia', šeca chonle xbab zoale binlo len Diosen' da' nsedle ley dan' bzoj Moisésen', na' šeca cha'laže'le dan' nombia'le Diosen'. ¹⁸ Nezele bin' chazlaže' Diosen' na' chache'ele bin' nac da' güen na' bin' nac da' mal, le nsedle xtižen'. ¹⁹ Chaquele zaca'le cont co'ole be'ni' lo' yichjlaždao' bene' bi nombia' Diosen'. ²⁰ Na' chaquele guac gwzejni'ile bene' cheson clele nac cheyala' yesone', na' chaquele guac gwsed gwlo'ele bene' cobe xtiža' Diosen', le nombia'le diža' li chen' na' len nsan' doxen da' cheyala' nezele. ²¹ Le'e chsed chlo'ele bene' yoble, ¿bixchen' bi chsed chlo'e cuinle? Le'e žale bi cheyala' no cuan, ¿bixchen' chbanle? ²² Le'e žale nono gata'len no'ole bi nac no'ol che', na' no'olen' bi gata'lene' ben' bi nac bene' che', ¿bixchen' chonle da' che'le bene' bi gone'? Le'e chgue'ele l gua'a lsaca' da' chesejnilaže' bene' ¿bixchen' chjalanle bi da' de lo' yo'o gan' že' l gua'a lsaca' ca'? ²³ Cha'laže'le da' nsedle ley da' bzoj Moisésen', perw chzoale Diosen' to šla'ale da' bi chonle can' ža leyna'. ²⁴ Chac can' nyoj Xtiža' Diosen' žan: "Da' chonle da' xinj, bene' bi zjanac bene' Israel chesene' mal che Diosen'."

²⁵ Še choncho can' ža leyna' zaca'czen dan' ba gwzoacho señw lo' cuerp chechon' da' zejen chio' bene' Israel naccho yež che Diosen'. Perw še bi choncho can' ža leyna', bibi zejen da' ba gwzoacho señw dan' nzi' circuncisión. ²⁶ Bene' bi naque' bene' Israel bi zoe' seña', na' še chone' can' ža ley che

Diosen', Diosnan' ne' naque' txen len chio' zoacho seña'. ²⁷ Na' bene' cheson can' ža leyna', la'czla' bi zjanaque' bene' Israel na' bi zjazoe' señw dan' nzi' circunciśi3n lo cuerp chen', chesone' cont nachia' de xtoła' le'e nsedle leyna' perw bi chonle can' žanna'. ²⁸ Bi nacho nacccho dogualje bene' Israel da' na'ocho costumbr che naci3n chechon' na' dan' zoa señw lo cuerp chechon'. ²⁹ Naccho dogualje bene' Israel gague dan' choncho can' ža leyna' da' nyojen, san da' chejnilaže'cho Diosen' do yichj do laže'cho na' ba be'cho latje bocobe Spiritw che Diosen' yichjlažda'ochon'. Da'nan' Diosen' güe'e diža' güen checho, la'czla' še notno chne güen checho.

3

¹ ¿Bi da' güen da' chga'an che chio' bene' Israel da' goljcho lo diaža che da' xoxxta'ochon' še ca'? ¿Bi da' güen da' chga'an da' ba zoacho señw da' nzi' circunciśi3n? ² Da' xen da' chga'an. Na' da' blaoch da' chga'an, Diosen' bnežjue' da' xoxxta'ocho ca' Xtižen' da' nyojen par yogo' benach. ³ Na' la'czla' zan bene' gualaž checho bi gosejle'e chen, bi nacho Diosen' bi gone' güen can' gwne' gone' len chio' naccho naci3n che'na'. ⁴ Goncze' con can' že'na'. Yogo' ni'a Diosen' chne' diža' li, la'czla' še žin ža cate' yogo'lol bene' yesene' diža' güenlaže'. Chac can' nyoj Xtiža' Diosen' žan:

Le' gwlo'edo' benachen' le cho'o diža' li.

Na' ca' nac bene' ca' cheson xbab bi chono' can' žon', yesache'ede' chonczo' can' žo'na'.

⁵ Bal bene' chesene' cate' choncho da' xinj chlo'en ca' bene' güen nac Diosen', na' chesene' Diosen' bi zeje' to li še chone' cont saca'zi'cho che da' xinj dan' chonchon'. ⁶ Clelen' chesone' xbab. Šaca' Diosen' bi chone' da' zej toli, bi gac gone' yela' justis che chio' benach. Perw gonczen'.

⁷ Na' nita' bal bene' chesone' xbab clele, chesene': "Cate' choe'cho diža' güenlaže' chlo'en ca' bene' güen juisyw nac Diosen' da' cho'e pur diža' li. Da'nan' bi cheyala' ne' napcho dola' cate' chonlaže'cho." ⁸ Lecze chesonlaže' bal bene' chesene' neda' bzejni'ida' guaque goncho da' mal cont gac da' güen. Da' cheyala'cze gon Diosen' cont sacazi' note'tez bene' ža ca'.

Yogo'cho napcho dola' lao Diosen'

⁹ ¿Bixen' ša? ¿Naquech chio' bene' Israel bene' güench ca' bene' bi zjanac bene' Israel? Bi naccho ca'. Ba bzejni'ida' toz ca' nac che chio' bene' Israel len che bene' bi zjanaque' bene' Israel, yogo'cho de xtoła'cho. ¹⁰ Na' Xtiža' Diosen' nyojen žan:

Nono zoa bene' zej to licha, ne toe'.

¹¹ Nono nla' bene' chejni'i cont gwzenague' che Diosen', nono nla' bene' cheyljue' le'.

¹² Yogo' benach ba zjanque'e nez mal.

Yogüe' ba zjanaque' ca' to da' bibi zaca'.

Ne to nono zoa bene' chone' da' güen.

¹³ Len xtiža'gaquen' chesexoayague' bene'.

Ca' zban chla' cho'a ba che bene' guat še bi nyeyjon binlo, ca' zban chla' xtiža'gaquen'.

Na' ca' venen che bel znia nac xtiža'gaquen' da' cheso'e.

¹⁴ Pur diža' mal diža' bya' že' cho'agaquen'.

¹⁵ Con bize da' chosode'ede' cont chesote' bene'.

¹⁶ Gate'teze chja'aque' zjanse'e yela' yaše' yela' zi' ca' nac da' chesone'.

¹⁷ Bi chesozoe' binlo len lježe'.

¹⁸ Bi chesežebe' Diosen' len bi da' mal chesone'.

19 Na' nezecho Diosen' bene' chio' bene' Israel ley chen'. Da'nan' ne tocho bi chac nacho bibi xtoła'cho de, le bi choncho can' žanna'. Nachen' Diosen' že' si'cho castigw che xtoła'chon', con can' že' che yogo' benach, le yogüe' bi chesone' can' ža ley chen'. 20 Bi nacho zoa bene' naque' bene' güen len Diosen' da' chone' yogo' da' ža leyna', le notno chon ca'. Leyna' chlo'en chio' naccho bene' güen da' xinj.

Bene' šejnilaže' Jesucriston' gague' bene' güen len Diosen'

21-22 Na' na'a Diosen' ba blo'e can' goncho cont gaccho bene' güen len le', na' bich bi že' che da' ca' ža leyna' cheyala' goncho, san že' cheyala' šejnilaže'cho Jesucriston' cont gaccho bene' güen len le'. Doxen Xtiža' Diosen' dan' nyojen cani'te chzejni'in cheyala' šejnilaže'cho Jesucriston' cont gaccho bene' güen. Na' toz can' chon Diosen' len yogo'lol benach. 23 Le yogo'cho ba bencho da' xinj, na' ne tocho bi naccho bene' güen can' chaclaže' Diosen' gaccho. 24 Perw na' Diosen' nži'ilaže'de' chio', na' gague bi chzi'e par že' naccho bene' güen len le', le Cristo Jesúsén' ba bnitlagüe' xtoła'chon'. 25 Diosen' gwsele' Jesucriston' bnežjw cuine' gosote'ne' neche xtoła' benach. Na' note'teze bene' yesejnilaže'ne' nitalao xtoła'gague'. Diosen' gwsele'ne' cont nachia' zeje' to licha da' gwdape' yela' chxenlaže' bezi'xene' xtoła' bene' ca' gwnita' cani' bene' gosejnilaže'ne'. 26 Na' lecze gwsele'ne' cont nachia' zeje' to licha da' že' che yogo' chio' chejnilaže'cho Jesúsén' naccho bene' güen.

27 Bi cheyala' gonxen cuincho güe'cho diža' naccho bene' güen. Šaca' choncho doxen dan' ža leyna' zaca' gonxen cuincho güe'cho diža' naccho bene' güen, perw nono chon can' ža leyna'. Con da' chejnilaže'cho Jesucriston', da'nan' zaca' cont yeyaccho bene' güen len Diosen'. 28 Can' naquen, note'tez bene' chejnilaže' Jesucriston', Diosen' že' naque' bene' güen len le' da' chejnilaže'ne', gague lagüe dan' chone' can' ža leyna'.

29 ¿Chaquale Diosen' naque' Dios che chio' naccho bene' Israel ngaze? Lecze naque' Dios che bene' bi zjanac bene' Israel. 30 Le toze Diosen' zoa na' len' že' che yogo'cho naccho bene' güen len le' con še chejnilaže'cho Jesucriston', na' toz can' chone' len chio' zoacho señw dan' že' circuncióń na' len bene' cbi zjazoa señwna'. 31 ¿Chaquale choncho leyna' ca to da' bibi zaca' da' žacho cheyaccho bene' güen len Diosen' cate' chejni'laže'cho Jesucriston'? Bi chonchon ca to da' bibi zaca', san chlo'echo naquen da' zaca'chgua.

4

Can' ben da' Abraham

1 Na' le'e bene' gualaž chia' len le'e bi nacle bene' Israel, da' xozxta'oto' Abraham ¿bixe nacho che'? 2 Šaca' Abrahanna' bene' doxen can' ža leyna', zaca' gonxen cuine' da' naque' bene' güen, san bi bene' doxen can' žanna' na' bibi gota' da' zaca' gonxen cuine' lao Diosen'. 3 Quinga ža Xtiža' Diosen' da' nyojen: "Abrahanna' gwejnilaže' Diosen' na' da'nan' Diosen' gwne' naque' bene' güen len le'." 4 Cate' to bene' chone' žin, chone' gan laxjue' na' xan žinna' bi chone' to goclen cate' chnežjue' laxjuen'. 5 San to goclen chon Diosen' že' che chio' chejnilaže'chone' naccho bene' güen len le', le bi choncho da' güen. Choncho da' xinj, na' Diosen' chnitlagüe' da' xinj chechon' še chejnilaže'chone'. 6 Lecz da' Davin' be'e diža' ca mba chzoa ben' chnitlao Diosen' xtołen' na' bibi cuent chone' še ba ben ben' da' güen o ba bene' da' mal. 7 Bzoj Davin' da' nga žan:

Mba zoacho še ba bezi'xen Diosen' che da' xinj da' ba bencho.

Mba zoacho še ba bnitlagüe' xtoła'chon'.

8 Mba zoacho še Diosen' že' checho bibi xtoła'cho de.

⁹ ¿Chaquele neto'zen' zoato' señw dan' že' circuncisión gac soato' mba can' gwnen'? Gague neto'zen'. Lencze le'e bi zoale señw dan' že' circuncisión guac soale mba. Nezecho Diosen' gwne' da' Abrahanna' naque' bene' güen len le' da' gwejnilaže'ne'. ¹⁰ Gwne' che da' Abrahanna' naque' bene' güen len le' cate' biña' soe' señw dan' že' circuncisión, gague beyož gwzoen'na' gwne' ca'. ¹¹ Na' gwdechle gwzoe' señwna' cont gwnezde' Diosen' bnitlagüe' xtole' da' ba chejnilaže'ne'. Na' da'nán' Abrahanna' naque' xozxtao' yogo' bene' chesejnilaže' Diosen' cont nitlao xtoła'gaquen' la'czła' bi zjazoe' señwna'. ¹² Na' lecze naque' xozxtao' neto' bich bi xtoła'to' de da' chejnilaže'to' Diosen', neto' zoato' señw dan' že' circuncisión. Perw gague naque' xozxta'oto' da' zoato' señwna', san da' chejnilaže'to' Diosen' can' gwejnilaže' da' Abrahanna' le'.

Diosen' bene' güen len da' Abrahanna' da' gwejnilaže'ne'

¹³ Diosen' gože' da' Abrahanna' gone' cont le' len bene' za' yesalje lo diaža' chen' yesac chegaque' doxen yežlion'. Gož Diosen' da' Abrahanna' ca' da' gwejnilaže'ne'. Da'nán' gwna Diosen' naque' bene' güen gague da' bene' can' ža leyna'. ¹⁴ Šaca' ža Diosen' con bene' yeson doxen can' ža leyna' yesac chegaque' yežlion', bibi zaca' šejnilaže'cho Diosen' šeca', na' bibi zejen da' gwne' gone' güen len bene' za' yesalje lo diaža' che da' Abrahanna'. ¹⁵ Na' leyna' nsan' castigw che benachen', le bi chesone' can' žanna. Šaca' bibi ley de da' gwžian bia' bi da' cheyala' gon chio' benach, bibi xtoła'cho de šeca'.

¹⁶ Can' naquen, note'teze bene' chesejnilaže' Diosen', none' legaque' ca' xi'in diaža' che da' Abrahanna', na' Diosen' gone' cont legaque' yesac chegaque' yežlion' can' gože' da' Abrahanna'. Gague neto'zen' nombia'to' ley da' bzoj da' Moisésen' gac cheto' yežlion'. Na' nacczen da' li gon Diosen' güen len note'tez bene' chejnilaže'ne'. Na' gone' ca' cont gachia' to goclen chone' len bene' ca' chesejnilaže'ne' can' gwejnilaže' da' Abrahanna' le'. Na' da' non Diosen' cuent Abrahanna' naque' ca' xozxtao' yogo' chio' chejnilaže'chone', ¹⁷ chac can' gože' da' Abrahanna' gwne': "Ba nzoa' le' gaco' xozxtao' bene' še' nación zan." Dios ben' gwejnilaže' da' Abrahanna' nape' yela' guac cont yosbane' bene' guat, na' chac chone' cont gac da' biña' gac.

¹⁸ Abrahanna' bi gwnezde' nac gac can' gwna' Diosen' gac, san con gwzoe' gwejle'e che Diosen' na' gwzoe' lez gon Diosen' cont nita' bene' zan xi'in diaža' che'. ¹⁹ Gwzoacze' gwejle'e can' gož Diosen' le' la'czła' ba naque' bene' gole par soa xi'ine', le ba zejgale' to gayoa iz, na' no'ol che' Sara naque' bene' güiž. ²⁰ Gwzoateze' gwejnilaže' Diosen' na' bi gocžejlaže' len da' gož Diosen' le' gone', san gwzoachache' gwejnilaže'ne' na' benxene'ne'. ²¹ Abrahanna' gwnezde' Diosen' nape' yela' guac cont gone' can' gwnen'. ²² Da'nán' Diosen' gwne' naque' bene' güen da' gwejnilaže'ne'.

²³ Na' dan' nyojen žan Diosen' gwne' naque' bene' güen da' gwejnilaže'ne', gague nyojen ca' che Abraham na'zen'. ²⁴⁻²⁵ Lecze nyojen che yogo'cho, le Diosen' lecze že' naccho bene' güen len le' da' chejnilaže'chone'. Cont gwnitlagüe' xtoła'chon' Diosen' gwsele' Xancho Jesucriston' bnežjw cuine' gosote' le'. Na' Dios ben' chejnilaže'cho bechis bosbane'ne' ladjo bene' guat ca' cont beyone' chio' bene' güen.

5

Zoacho binlo len Diosen' da' chejnilaže'cho Jesucriston'

¹ Na' ca' nac chio', da' ba chejnilaže'cho Xancho Jesucriston', Diosen' ba gwne' naccho bene' güen len le', na' lecze da'nán' ba zoacho binlo len le'.

² Da' chejnilaže'cho Jesucriston', Diosen' zoacze' nži'ide' chio'. Na' chebecho

nezecho gone' soacho mbalaz juisyw can' zoa le' cate' šjayzoacho txen len le'.
³ Na' lecze chebe chezaque'cho cate' chzaca'zi'cho, le nezecho še gonxenlaže'cho cate' chzaca'zi'cho, nach gwyo gwchejehcho cate' de bichle da' saca'zi'cho.
⁴ Na' še chonxenlaže'cho cate' chzaca'zi'chon', chlo'en zoachachcho chejni-laže'cho Diosen'. Na' še zoachachcho chejni-laže'chone', nezecho šjayzoacho txen len le'.
⁵ Na' dan' zoacho lez šjayzoacho txen len Diosen', bi nacho naquen to da' güenlaže' chaquecho gac checho ca'. Le Diosen' ba gwsele' Spiritw chen' zoan len chio' na' chnen lo' lažda'ochon' žan chacchgüe Diosen' chio'.

⁶ Chio' beňach naccho bene' güen da' xinj na' bibi chac goncho cont yezoacho binlo len Diosen', perw bžin ža cate' Diosen' gwsele' Criston' bnežjw cuine' gote' neche chio' napcho dola'.
⁷ Nono zoa bene' gwnežjw cuine' yesot bene' le' neche bene' yoble, la'czla' še nac ben' bene' güen, o še gwchojlja tgüej bene' yeyaxjde' gwnežjw yela' mban che' yesote'ne' gualaz to bene' šagüe'.
⁸ San Diosen' blo'ede' chacchgüede' chio' da' gwsele' Criston' gote' neche chio' la'czla' zoacho choncho da' xinj.
⁹ Na' dan' got Criston' neche chio', Diosen' že' naccho bene' güen da' chejni-laže'cho le'. Na' Criston' lecze gone' cont bi saca'zi'cho cate' žin žan' Diosen' chogbi'e che yogo'lol bene'.
¹⁰ Cana' bi gwzoacho binlo len Diosen'. Perw Xi'ine' Criston' bnežjw cuine' gote' neche chio' cont bozoe' chio' binlo len Diosen'. Na' na'a ba zoacho binlo len le' na' nezecho zoacze Criston' chone' cont žin ža šjayzoacho len Diosen'.
¹¹ Na' lecze chebecho nombia'cho Diosen', le Xancho Jesucriston' ba bozoe' chio' binlo len le'.

Adánna' gwleque' da' mal yežlio nga, san Jesucriston' gwleque' da' güen

¹² Yela' güedenag che bene' nechw ben' le Adán gwxe da' malen' yežlio nga, na' da' malen' nšan' yela' got. Can' goc, gwzolao chesat yogo' beňachen', le yogo'lol' chesone' da' mal.
¹³ Beňachen' gwzolao chesoncze' da' xinjen' cate' gwzoate da' Adán, la'czla' bina' gata' ley dan' bzoj da' Moisésen'. Na' gan' bibi ley de, nono chon xbab še cheson bene' da' xinj.
¹⁴ Perw na' gwzolaon len da' Adánna' na' len bene' gwnita' caten' gwbane', bžinten len bene' gwnita' caten' gwban Moisésen', yogo'lol' gosate' can' chesat bene' ža na'aža. La'czla' legaue' bi gosone' güedenag len to da' gož Diosen' legaue' can' ben Adánna', bia'cze yogüe' gosone' da' xinjen'. Adánna' gwleque' yela' goten', san Jesucriston' ben' ba naquen seła' Diosen', len' bxie' yela' mban toli tocanē.

¹⁵ jNža' xen ca dan' gwxe caten' Adánna' bene' da' xinjen' na' ca dan' gwxe cate' Diosen' gwsele' Jesucriston'! Yogo' chio' beňach gatcho lagüe da' ben Adánna' da' xinjen', san yogo' chio' beňach guac soacho mba da' nži'i Diosen' beňachen' na' gwsele' Xi'ine' Jesucriston' cont chaclene' note'tezcho.
¹⁶ Toz Adánna' bi bzenague' che Diosen' na' da'nan' Diosen' gwne' yezacazi' yogo'cze beňachen' toli tocanē che xtoła'gaquen'. Nach Diosen' gwsele' toz bene' güen cont bnitlagüe' xtoła' note'tezcho chejni-laže'chone' na' beyone' chio' bene' güen la'czla' da' zan da' xinj ba bencho.
¹⁷ De yela' got che chio' beňach neche da' xinj da' ben toz ben' gože' Adán, san mbalaz juisyw chac che chio' beňach neche da' güen da' ben Jesucriston' bnežjw yela' mban che' neche yogo'cho. Diosen' nži'ide' chio', nachen' bibi chchixjue' chonze' chio' ca bene' güen še chejni-laže'cho Jesucriston', na' none' chio' yela' mban toli tocanē cont nabia'cho txen len Jesucriston'.

¹⁸ Can' naquen, da' ben toz Adánna' da' xinj, Diosen' gwchogbi'en saca'zi' yogo' beňachen' che xtoła'gaquen'. Na' neche da' güen da' ben toz Jesucriston' da' bnežjw cuine' gosote'ne', da'nan' nitlao xtoła' note'tezcho chejni-laže'chone', cont none' chio' ca bene' güen.
¹⁹ Len da' xinj dan' ben Adánna' cate' bene' güedenag len Diosen', gwxe da' xinj da' chon yogo' chio' beňach. Na' da' bzenag

Jesucriston' che Diosen' na' bnežjw cuine' cont nitlao xtoła' beṇachen', da'nan' note'tezcho chejnilaže'chone' none' chio' ca beṇe' güen.

²⁰ Cate' Diosen' bnežjue' ley chen' da' bzoj Moisésen' na' gwcha'o gwxenč da' xinj da' goson beṇachen', le bi bosozenague' chen. Perw na' la'czla' gwcha'o gwxen da' malen', gwcha'o gwxenč yela' ži'ilaže' che Diosen' len chio' beṇach. ²¹ Can' chac, de yela' got che yogo' chio' beṇach da' naccho beṇe' chon da' xinj, ca'cze Diosen' nži'ide' yogo' chio' beṇach cont note'tezcho gaccho beṇe' güen len le' na' gata' yela' mban checho toli tocaṇe še šejnilaže'cho Xancho Jesucriston'.

6

Bi cheyala' soacho goncho da' xinj san soacho goncho can' chazlaže' Criston'

¹ ¿Nacxen' cheyala' goncho na'a ba nezecho nži'ilaže' Diosen' chio'? ¿Gončcho da' malen' cont yezi'xenchcze Diosen' che chio'? ² Gague can' goncho. Cate' gwzolao chejnilaže'cho Criston' bich goclaže'cho ṇabia' da' malen' chio'. Da'nan' guac ṇacho ba gotcho len da' xinjen' cont bich gonchon. ³ ¿Bi chache'ele can' zejen da' gwzoacho nis? Zejen da' chejnilaže'cho Jesucriston' ben' got neče chio', bač naccho ca to beṇe' guat len da' xinjen' cont bich gonchon. ⁴ Na' dan' gwzoacho nis lecze guac ṇacho bgaše'cho can' bosocuaše' Criston'. Na' con can' bečhis bosban Xancho Diosen' Criston' ladjo beṇe' guaten' len yela' guac xen che', ca'czen' bene' len chio', ba bocobe' yichjlažda'ochon' cont soa cuezcho goncho da' güen.

⁵ Na' can' žacho ba gotcho len da' xinjen' dan' chejnilaže'cho Criston', lecze guac ṇacho bečhis bosban Diosen' chio' can' bečhis bosbane' Criston', le ba bocobe' yichjlažda'ochon'. ⁶ Cana' ne' chnabia' da' malen' chio' len yogo' da' choncho. perw na'a da' chejnilaže'cho Criston' ben' got neče chio', ba none' chio' ca to beṇe' guat len da' xinjen' cont bich gonchon na' cont da' mal dan' yo'o lo' yichjlažda'ochon' bich soan ṇabian' chio'. ⁷⁻⁸ Beṇe' ba got bich zoe' chone' da' xinj, na' ca' nacczen len chio' chejnilaže'cho Criston', bich che'necho ṇabia' da' malen' chio' na' bich zoacho chzenagcho chen. Na' chejle'cho gone' cont soacho bancho len le' na'a na' toli tocaṇe. ⁹ Na' nezecho Criston' beyas bebane' ladjo beṇe' guaten' na' gwbat gate' da' yoble le bich soe yela' goten' le'. ¹⁰ Na' cate' gosote' Criston', tñi'aze bnežjw yela' mban che' neče xtoła'chon'. Bich chyažjen gwnežjw cuine' da' yoble, san ba zoalene' Diosen' chone' con bi da' chazlaže' Diosen'. ¹¹ Nach dan' gote' neče xtoła'chon', cheyala' soacho goncho cont da' mal dan' yo'o lo' yichjlažda'ochon' bich ṇabian' chio', na' cheyala' soacho txen len Xancho Jesucriston' cont goncho dan' chazlaže' Diosen'.

¹² Da'nan' bi güe'cho latje ṇabia' da' malen' cuerp chechon' dan' nac da' gat na' goncho bi da' xinj da' selažen'. ¹³ Bi cheyala' gon cuincho lo na' da' gwxiyen' cont goncho da' mal len cuerp chechon'. Cheyala' gon cuincho lo na' Diosen' cont goncho da' güen. Guac ṇacho Diosen' bečhis bosbane' chio' ladjo beṇe' guaten' da' bocobe' yichjlažda'ochon'. ¹⁴ Bich ṇabia' da' malen' chio', le nezecho Diosen' chbede' chio' gague neče da' choncho can' ža ley dan' bzoj da' Moisés, san dan' naque' beṇe' šagüe'.

Beṇe' chzenag che da' malen' naque' ca beṇe' zoa xan, beṇe' chnabia' le' cont gonche' da' malen'

¹⁵ ¿Gontezcho da' xinjen' da' nezecho nži'i Diosen' chio' na' nezecho bi chone' cuent še ba bencho da' ža leyna' cheyala' goncho? Bitw goncho ca'. ¹⁶ Nezecho še ba chzenagcho che to beṇe' cont goncho bite'tez že', choe'cho latje chnabi'e

chio'. Na' ca'cze naquen len chio' še chzenagcho che da' malen' na' chon-
tezchon, ba chnabia' da' malen' chio' še ca'; na' bi gac šjayzoalencho Diosen'
tolī tocañe še ca' choncho. San še zoacho chzenagcho che Diosen', nachen'
zejczcho choncho da' güen na' šjayzoalencho Diosen' tolī tocañe. ¹⁷ Na' choa'
yela' choxcen che Diosen' na'a ba chzenagle do yichj do laže'le xtiža' Diosen'
da' ba bzejni'ito' le'e, na' bich chzenagle che da' malen' can' benle cana'.
¹⁸ Diosen' ba bebeje' le'e lo' da' malen' na' ba ben cuinle lo ne'en cont soale
gonle da' güen. ¹⁹ Ba bzejni'ida' le'e bia' diža' che bi da' chac che chio' benach
cont šejni'ile. Nachen' chnia' le'e, con can' gwzoale bentezle da' nac da' yela'
zto' len cuerp chelen', na' benchgualē da' malen', lecze can' cheyala' gon cuinle
lo na' Diosen' gonle da' güen cont chazlaže' Diosen' can' chonlen'.

²⁰ Caten' ne' zejcho choncho da' malen' bi chzenagcho che Diosen' neca
choncho da' güen. ²¹ Na' bibi banez na' le'echo che da' mal ca' ba bencho, san
na'a ba cheto'echo chen. Bene' ca' ne' chesonteze' da' malen' gata' castigw
chegaque' tolī tocañe. ²² Na' chio', Diosen' ba bebeje' chio' lo da' malen' na'
yo'ocho lo ne'ena'. Da'nan' zejch choncho da' güen can' chazlaže' Diosen' na'
šjayzoacho len le' tolī tocañe. ²³ Še zoacho choncho da' xinjen', gata' castigw
checho tolī tocañe cate' gatcho. San Diosen' chonadze' chio' to da' güen
juisyw, chio' chejnilaže'cho Xancho Jesucriston', chone' cont šjayzoacho len
Diosen' tolī tocañe.

7

Naccho ca to bene' ba got len ley da' bzoj Moisésen'

¹ Bene' migw, da' nga žia' le'e, le nombia'le ley dan' bzoj Moisésen'. Nezczecho
con bene' ca' zjamban cheyala'cze yosozenague' che leyna'. ² Ca to no'ole
nšagna', šlac mban bene' che' cheyala' soalene' le', le can' chon leyna' man-
dadw gone'. Na' še ba got bene' chen', cana' ba bele' len leyna' da' chon
mandadw soalene' bene' chen'. ³ Še no'olen' soalene' bene' yoble šlac ne' mban
bene' chen', nape' doła' len leyna' da' chzoa xtoe'. Perw na' še ba got bene'
chen', leyna' žan ba guac yošagna'lene' bene' yoble na' bi nacho chone' da' xinj
yošagne'e.

⁴ Bene' migw, can' naquen len chio' chejnilaže'cho Criston'. Ba belacho
len leyna' da' žan saca'zi'cho che xtoła'chon' tolī tocañe. Na' ba gwnitlao
xtoła'chon' dan' bnejw Criston' yela' mban chen' gosote'ne' le'e yag cruzen'.
Da'nan' ba zoacho txen len Criston' ben' beban ladjo bene' guaten', na' zoacho
cont goncho can' chazlaže' Diosen'. ⁵ Cana' zoacho chzenagcho che da'
malen' dan' yo'o lo' yichjlažda'ochon'. Na' cate' gwnezecho can' ža ley dan'
bzoj da' Moisésen', nachle be'laže'cho bencho da' malen', na' da' malen' nsan'
castigw checho tolī tocañe cate' gatcho. ⁶ Perw na'a ba belacho len ley da'
žan cheyala' si'cho castigw tolī tocañe, le Criston' beque'e xtoła'chon'. Na'
ba chaclaže'cho goncho can' chazlaže' Diosen', na' chonchon gague cont na'
Diosen' naccho bene' güen len len', san chonchon dan' ba bocobe Spiritw
chen' yichjlažda'ochon'.

Bi güe'cho latje nabia' da' malen' chio'

⁷ Bi cheyala' goncho xbab nac to da' mal ley dan' bzoj da' Moisésen'. Leyna'
bzejni'in neda' bi dan' bi cheyala' gona' cont goebe'eda' chona' da' xinj. Na'
gwnezda' naquen mal chzelaža' bi da' de che bene', le leyna' žan: "Bi selaže'le
bite'teze da' de che bene'." ⁸ Na' cate' gwnezda' can' ža leyna', nachle da' mal
dan' yo'o lo' yichjlažda'oguan' benen gwzelaže'cha'. Da' li cate' bi nezecho can'
žā leyna', bi nezecho še choncho da' xinj. ⁹ Neda' gwzoa' to tiemp bi goebe'eda'

bi cheyała' selaža'. Perw cate' bžin ža gwnezda' nžian bia' bi cheyała' selaža', nachle bzenagcha' che da' mal da' yo'o lo' yichjlažda'oguan' na' gwzelaže'cha'. Da'nān' gwnezda' cheyała' sia' castigw che xtolan' toli tocaņe. ¹⁰ Leyna' nyojen cont gwzenagcho chen na' gata' yela' mban checho toli tocaņe, perw da' bi bzenaga' chen, bzejni'in neda' gata' castigw chia' toli tocaņe. ¹¹ Can' goc, cate' bembia' leyna', da' malen' da' yo'o lo' yichjlažda'oguan' gwxoayaguen neda' cont bencha' da' malen', nach gwchoglaon chia' gata' castigw che xtolan' toli tocaņe.

¹² Ley dan' bzoj Moisésen' nacczen che Dios, na' to to da' nžian bia' goncho naquen güen na' zejen to licha. ¹³ ¿Nacho leyna' da' naquen güenchguan' chonen cont saca'zi'cho che xtoła'chon' toli tocaņe? Bi nac len. Da' mal da' yo'o lo' yichjlažda'ochon' bi ben' latje goncho can' cheyała' goncho, na' da'nān' gwchoglaon checho saca'zi'cho che xtoła'chon' toli tocaņe. Leynan' da' nac da' güen chlo'en chio' Diosen' chgue'echgüede' da' mal da' choncho.

¹⁴ Nezecho leyna' naquen che Spiritw che Diosen' na' naquen güen, san chio' yo'o da' malen' lo' yichjlažda'ochon' na' zoacho choncho da' xinj. ¹⁵ Bi choncho da' güen da' chaclaže'cho goncho, san da' xinj da' chgue'echo len' choncho. Bi chache'echo bixchen' choncho ca'. ¹⁶ Na' dan' chgue'echo da' mal dan' chonchon', zejen chache'echo nac leyna' güen. ¹⁷ Gague chion' choncho da' xinj da' bi chaclaže'cho goncho, san da' mal dan' yo'o lo' yichjlažda'ochon' chžigan' chio' cont chonchon. ¹⁸ Nezecho bi naccho bene' güen, le yo'o da' malen' lo' yichjlažda'ochon'. Chaclaže'cho goncho da' güen perw bi chac gonchon. ¹⁹ Bi choncho da' güen da' chaclaže'cho goncho, san choncho da' xinj da' bi che'necho goncho. ²⁰ Da'nān' chnia', gague chion' choncho da' xinj da' bi chaclaže'cho goncho, san da' mal dan' yo'o lo' yichjlažda'ochon' chžigan' chio' cont chonchon.

²¹ Can' chac checho, cate' che'necho goncho da' güen, da' mal dan' yo'o lo' yichjlažda'ochonan' chžonen gonchon. ²² Lo' yichjlažda'ochon' chbecho goncho can' ža ley che Diosen', ²³ perw chache'echo, yo'o yeto da' yo'o lo' yichjlažda'ochon' chžonen goncho da' güen, na' lenna' chnabian' chio' cont choncho da' xinjen'.

²⁴⁻²⁵ ¡Nyaše' chac checho! Lo' yichjlažda'ochon' chaclaže'cho goncho can' ža ley che Diosen', perw da' mal dan' yo'o lo' yichjlažda'ochon' chnabian' chio' len cuerp chechon' cont choncho da' xinjen'. ¿Non' soe da' mal dan' yo'o lo' yichjlažda'ochon' cont bi nabian' cuerp chechon' len xbab chechon'? Le dan' chnabia' da' malen' chio' da'nān' si'cho castigw toli tocaņe. ChoχcLen Diosen' len' soede' da' mal dan' yo'o lo' yichjlažda'ochon' cont bich nabian' chio', le ba chejnilaže'cho Xancho Jesucriston'.

8

Spiritw che Diosen' chonen chio' yela' mban toli tocaņe

¹ Na' na'a da' ba naccho txen len Cristo Jesúsēn', bich gata' castigw checho toli tocaņe, le ba chzenagcho che Spiritw che Diosen' cont choncho da' güen na' bich chzenagcho che da' malen' dan' yo'o lo' yichjlažda'ochon'. ² Cate' ne' zoacho chontezcho da' malen' nhoglaon checho si'cho castigw che xtoła'chon' toli tocaņe, perw na'a Spiritw che Diosen' ba benen chio' yela' mban toli tocaņe da' chejnilaže'cho Cristo Jesúsēn' na' Spiritw chen' chnabian' yichjlažda'ochon'. Da'nān' bich saca'zi'cho toli tocaņe. ³ Ley da' bzoj Moisésen' bi gwzoen yebejen chio' lo' da' malen', le yo'o da' malen' lo' yichjlažda'ochon'. Nach Diosen' gwsele' Xi'ine' Jesucriston' golje' yežlion', goczze cuerp chen' ca cuerp che chio' bene' güen da' xinj. Na' Jesucriston'

bnežjw cuine' neche xto_{la}'chon' cont da' malen' bich nabian' chio' len xbab da' yo'o lo' yichjlažda'ochon'. ⁴ Diosen' gwsele'ne' cont soacho goncho da' güen can' ža ley chen' cheyala' goncho. Le bich chzenagcho che da' malen' dan' yo'o lo' yichjlažda'ochon', san ba zoacho choncho da' güen lagüe dan' chzenagcho che Spiritw che Diosen'.

⁵ Še chzenagcho che da' mal dan' yo'o lo' yichjlažda'ochon', con da' malzen' chebecho choncho; san še chzenagcho che Spiritw che Diosen', chebecho choncho da' ca' chazlaže' Diosen'. ⁶ Le še zoacho chebecho da' malen', nachle si'cho castigw to_{li} toca_{ne}, na' še chebecho da' ca' chazlaže' Spiritw che Diosen', guata' yela' mban checho to_{li} toca_{ne} na' soa cuezcho bin_{lo} len xbab dan' yo'o lo' yichjlažda'ochon'. ⁷ Choncho ze bene' chgue'e Diosen' cate' chebecho da' malen', le cate' chebecho da' malen' bi chazlaže'cho neca chac gwzenagcho che ley chen'. ⁸ Na' še zoacho chzenagcho che da' mal dan' yo'o lo' yichjlažda'ochon', bi chebe Diosen' chio'.

⁹ Na' chio', da' ba bedesoa Spiritw che Diosen' lo' lažda'ochon', bi zoacho chzenagcho che da' malen' da' yo'o lo' yichjlažda'ochon', san zoacho chzenagcho che Spiritw che Diosen'. Na' bene' bi zoa Spiritw che Criston' lo' lažda'ogüen', gague da' li chejnilaže' Criston'. (Spiritw che Criston' lecze naquen Spiritw che Dios.) ¹⁰ Perw na' še ba zoa Criston' len chio', Diosen' že' naccho bene' güen len le' na' lecze šjayzoacho len le' to_{li} toca_{ne} la'czla' yesat cuerp chechon' neche da' malen' dan' de yežlion'. ¹¹ Diosen' bečhis bosbane' Cristo Jesús en' ladjo bene' guaten', na' lecze gwžin ža cate' Diosen' yečhis yosbane' chio' len cuerp checho quinga da' chesat, le Spiritw chen' zoan lo' lažda'ochon'.

¹² Da'nan' bene' migw, chonen byen gwzenagcho che Spiritw che Diosen'. Bi cheyala' gwzenagcho che da' mal dan' yo'o lo' lažda'ochon'. ¹³ Le še soacho gwzenagcho che da' mal dan' yo'o lo' lažda'ochon', saca'zi'cho to_{li} toca_{ne}. Na' še gwzenagcho che Spiritw che Diosen' cont bi gwzenagcho che da' malen', nach gata' yela' mban checho to_{li} toca_{ne}.

¹⁴ Na' note'tezcho še chzenagcho che dan' chzejni'i Spiritw che Diosen' chio', naccho xi'in Dios. ¹⁵ Diosen' bene' chio' Spiritw chen' caten' gwque'e chio' ca xi'ine'. Da'nan' bich chžebcho Diosen' can' chžebcho to bene' znia cate' choncho xšinen'. Bich chžebcho Diosen', san cho_l güižchone', che'chone': "Xa". ¹⁶ Na' lecze Spiritw chen' chnen lo' lažda'ochon' cont nezecho naccho xi'in Dios. ¹⁷ Na' da' naccho xi'in Dios, gwžin ža cate' yogo' da' de che Criston' gaquen checho txen len le'. Na' can' bzanlaže' cuin Criston' gwdi gwxaque', can' cheyala'cze zanlaže' cuincho saca'zi'cho bi da' gac checho cont Diosen' gone' ga gacchgua güen checho txen len le' yaban'.

¹⁸ Yežlio nga de da' chzaca'zi' chzaca'yaše'cho. Perw chacda' bibi zaca'czen cue' yichjcho che da' ca' chac checho, le gwžin ža leca mba juisyw gac checho cate' šjayzoacho len Diosen'. ¹⁹ Diosen' bene' be_nač, bene' beyixe', len bica'chle da' zjade. Na' yogo'cho len bichle da' ca' bene' zoacho lo juisyw chbezcho batcan' gon Diosen' gacchgua mba che chio' naccho xi'ine'. ²⁰ Na' yogo' da' ca' ben Diosen' bich zjanacšagüen'. Na' gague con to gualazen zjanaquen ca', san Diosen' bžie' bia' zjanaquen ca'. Perw za' yeyonšagüe' Diosen' legaquen len beyixe' ca' na' len chio' be_nač. Na' txen chbezcho gone' cont gac checho bin_{lo}. ²¹ Yogo'cze da' ca' bene' yesebiayin', na' chesebezen batcan' žin ža cate' gone' cont yeyac cuerp che chio' naccho xi'in Diosen' da' cobe na' da' zaca'chgua can' nac che Criston', le canan' lecze yesyeyacšagüe' da' ca' cont bich te chegaquen. ²² Nezecho ža na'aža yogo' da' ca' ben Diosen' chesežaglaon ca to no'ole bene' chzan. ²³ Na' gague da' ca'ze chesežaglaon,

san lencze chio' benach chžaglaŋocho na' chbežgüe'cho. Ba ben Diosen' chio' Spiritw chen' cont nezecho gwžin ža gaquech güen checho. Na' chbežgüe'cho lo' lažda'ochon' chbezcho batcan' gon Diosen' cuerp cob chechon' cont gwlo'e ba nque'e chio' ca xi'ine'. ²⁴ Cate' Diosen' bene' yela' mban checho toli tocanę gwzolao chbezcho gone' cuerp cobe chechon', na' lenna' ne' chbezcho. Nono zoa ne' chbeze' gac da' nezde' ba goc. ²⁵ Na' še bina' le'echo da'na' chbezcho gac, cheyala' cuezcho gaquen sin cbi chjaxaque'laže'cho.

²⁶ Na' Spiritw che Diosen' chaclenen chio', le bi nezecho can' cheyala' goncho yol güižcho Dios, san Spiritw che Diosen' chacbe'en cate' con chebanecho na' cate' bi cheželecho diža' da' güe'lencho Diosen', nach chnen gualazcho len diža' da' bi chejni'icho. ²⁷ Na' Dios ben' chna' chgüie' yichjlaždao' yogo'cze bene', chejni'ide' bin' chaclaže' Spiritw chen' cate' chnen gualazcho, le ba gwleje' chio' naccho lo ne'e. Na' con da' chaclaže' Diosen' chnab Spiriton' lagüen'.

Diosen' de'e chio' na' da'nan' nono soe chio'

²⁸ Na' nezecho bite'tez dan' chac, Diosen' chone' cont gac güen che chio' chaquechone', le ba gwleje' chio' cont naccho lo ne'e can' gwnalaže'. ²⁹ Cate' bina' galjcho Diosen' gwnezde' šejnilaže'chone' na' bsi'e xnezen' gac yichjlažda'ochon' güen can' nac yichjlaždao' Xi'ine' Jesucriston'. Bsi'e xnezen' gac Jesucriston' bene' blao lao yogo'cho na' chio' gaccho ca biše' lježe' bi' xcuide'ch. ³⁰ Can' naquen, cani'te Diosen' bsi'e xnezen' gac yichjlažda'ochon' güen can' nac yichjlaždao' Jesucriston' na' gwleje' chio' cont naccho lo ne'e. Lecze beyone' chio' bene' güen len le' na' bene' cont gacchgua güen checho txen len Jesucriston' yaban'.

³¹ ;Catec güenna' chon Diosen' len chio' ba bsi'e xnezen' gac checho yogo' da' ca! Len' de'e chio', nachen' notno soe chio'. ³² Diosen' bi bžone' saca'zi' Xi'ine' Jesucriston', san gwsele'ne' cont yeque'e xtoła'chon'. Da'nan' nezecho yebede' gone' chio' yogo' bite'tez da' yažjecho. ³³ Diosen' ba gwleje' chio' naccho lo ne'e, na' beque'e xtoła'chon'. Na' notno soe gwcuiš chio' lagüen', le ba gwne' bibi xtoła'cho de. ³⁴ Nono zoa no gac gon cont na Diosen' de xtoła'cho. Criston' bzanlaže' cuine' gosote'ne' cont beque'e xtoła'chon', na' beyas bebane' ladjo bene' guat ca', chi'e chnabi'e txen len Diosen'. Na' len' chnie' gualaz chio' lao Diosen'. ³⁵ ;De da' gwžon cont Criston' bich gacde' chio'? ;Gwžon no da' mal da' gac checho? ;Gwžon no yela' yaše' yela' zi' da' gac checho? ;Gwžon no yela' xi'a che bene' chgue'e chio'? ;Gwžon no yela' chbil chdon checho? ;Gwžon cate' bi de xalana'cho? ;Gwžon še bi da' xož gac checho? ;Gwžon še za' no bene' gote' chio'? Bibi de da' gwžon cont Criston' bich gacde' chio'. ³⁶ Chac can' nyojce Xtiža' Diosen' žan: Xanto' Dios, da' chejnlaže'to' le' nita' bene' chesaclaže' yesote' neto' do ža do yel.

Chesone' xbab nacto' ca to xila' be yesote'.

³⁷ Na' la'czla' yogo' da' mal ca' za'ac len chio', bi chac chop laže'cho, san chebechgüecho le nezecho zoacze Criston' chacde' chio'. ³⁸ Neda' nezda' bibi de da' gac gwžon cont Diosen' len Criston' bich yesacde' chio'. Yela' goten' bi gonen, ne yela' mbanna', ne no angl, ne no da' xigüe', ne no bene' gwnabia', ne da' chac checho na'a o bichle da' za'za'. ³⁹ Ne da' de le'e yaban', ne da' de gabilen', ne bichle da' ben Diosen' bi gac yosožonen cont Diosen' bich gacde' chio'. Ba blo'ede' catec chacde' chio' dan' gwsele' Xancho Jesucriston' beque'e xtoła'chon'.

9

Diosen' gwque'e bene' Israel ca' ca xi'ine'

1-2 Neda' naca' txen len Criston' na' choa' diža' li, bi chonlaža', chnia' chacyaše' chgüeda' na' chacchgüeda' lo' lažda' o'gua' che bene' gualaž chia' bene' bi chesejnilaže' Criston'. Spiritw che Diosen' chaclenen neda' cont nezda' diža' lin' choa'. ³ Chacda' gwzanda' cuina' cuiaya'a šeca' da' cuejiže' Diosen' neda' cuit Criston' gonen cont bene' gualaž chia' ca' yesejnilaže' Criston'. Chacda' legaue', le gosalje' zjanaue' bene' Israel ca neda'. ⁴ Diosen' gwque'e xozxtao' neto' bene' Israel ca xi'ine', na' gwzoe' len legaue' lo' be'ni' juisyw. Na' gwne' gaclene'ne', na' bnežjue' legaue' ley da' bzoj Moisésen'. Na' blo'ede'ne' naclen' yesonxene'ne', nach gože' legaue' bichle da' güen da' gone' len legaue'. ⁵ Bene' gole blao bene' za' che'elte gosaue' xozxtao' neto' bene' Israel. Na' lo diaža chegaue'na' golje Criston' ben' gwsela' Diosen'. Criston' lecze naue' Dios na' chnabi'e yogo'te beñach, yogo'te beyixē' na' yogo'lol bichle da' de yežlio nga na' gate'teze. Cheyala' gonxenchone' toli tocañe. Na' can' gonšcaczcho.

⁶ Na' bi cheyala' goncho xbab bi ben Diosen' can' gwne' gone' güen len neto' bene' Israel. Gague yogo' neto' goljto' lo diaža che da' Israelen' na Diosen' nacto' bene' Israel, le gague yogo'to' chejnilaže'to'ne'. ⁷ Na' gague yogo' neto' goljto' lo diaža che da' Abrahanna' nacto' dogualje xi'in diaža che', le gague yogo'to' chejnilaže'to' Diosen' can' gwyejnilaže' da' Abrahanna' le'. Quinga gož Diosen' Abrahanna' cani', gwne': "Xi'in diaža che da' Isaaquen' gona' cuent lo diaža chion'." ⁸ Na' dan' gwne' ca' zeje diža' Diosen' chbeje' bene' zjanaue' xi'ine' gague da' gosalje' lo diaža che bene' Israelen', san bene' chesejle'e gon Diosen' gac chegaue' can' že' con can' gwyejle' da' Abrahanna', legacze' zjanaue' xi'ine' na' zjanaue' xi'in diaža che da' Abraham. ⁹ Quinga gož Diosen' Abrahanna' gone', gwne': "Cate' žin tiempen' bžia' bia' yida', cana' ba zoa to bi' che no'ol chio' Sara ni."

¹⁰ Na' gague da' na'zen', san lecze ca' Diosen' be'e diža' che xi'in da' Rebecan' bin' gosac choptebe' xi'in da' xozxta'oto' Isaac. ¹¹⁻¹² Cate' bina' yesalje bi' cuaš ca' na' bibi na' yesombe' cont nacho zjanacbe' bi' güen o bi' mal, Diosen' blo'ede' chbeje' note'tez bene' chaclaže' cont gone' güen len legaue'. Le Diosen' gože' Rebecan': "Bin' galje da' nechw gwzexjw yichjbe' cont bin' za' cože'ben' nabia'be' lebe'." Gwne' ca' cont nezecho chbeje' bene' gac güen chegaue', gague lagüe da' chesone' bi da' güen, san cont gac can' chnalažen'. ¹³ Na' ga yoble nyoj Xtiža' Diosen' žan: "Gocda' Jacob na' bgue'eda' Esaú."

¹⁴ Bi cheyala' goncho xbab Diosen' cbi chone' da' zej to licha dan' chone' ca'. Zejczte to licha. ¹⁵ Chone' can' gože' Moisésen' cani'te, gwne': "Yeyaše'laža' con non' chazlaža' yeyaše'laža', na' ži'ilaže'da' con non' chazlaža' ži'ilaže'da'." ¹⁶ Diosen' chbeje' bene' cont yeyaše'laže'de' le', gague can' chaclaže' beñachen', na' gague da' chesone' bi da' chesone', san Diosen' cheyaše'laže'de' con non' chbeje' yeyaše'laže'de'. ¹⁷ Na' Xtiža' Diosen' nyojen can' gože' bene' gwnabia' che Egipton', gwne': "Neda' bena' naco' rey cont chlo'eda' bene' yela' guac chia' da' chona' len le'. Chonan' cont yeseneze bene' že' doxen lo yežlion' zoa' chnabi'a'." ¹⁸ Can' naquen, Diosen' cheyaše'laže'de' con non' chazlaže' yeyaše'laže'de', na' lecze bene' zjanaue' bene' güedenag, lecze chazlaže' gone' legaue' bene' güedenag.

¹⁹ Na' da' chon Diosen' ca', guacte gonle xbab nale: "Con can' ba nžia Diosen' bia' chon chio' beñach. ¿Bixchen' že' de xtoła'chon' še ca'?" ²⁰ Perw ¿no nac chio' beñach gacyožencho Diosen'? Ca to no yeso' xguague bi gac yen' bene' ben len: "¿Bixchen' beno' neda' quinga?" ²¹ Bene' güen yeso' xguaguen' guac gone' con can' chazlaže' len gonan'. Chac chone' ton da' nac xdanchgua na' len gona' na'ze gone' yeto da' gon žin len bite'teze.

22 Na' bi n̄acho chon Diosen' con can' chazlaže' len chio' benačh yogo' ni'a, nžie' bia' gwnežjue' castigw toli tocanē che bene' ca' bi chosozenag che', na' nape' yela' guac cont gone' ca'. Perw chzoede' sša chape' yela' chxenlaže' len legaque' na' gague la' sela'te' legaque' lo yi' gabilen' la'czla' zjazaque' yesebiaye'e. 23 Chone' ca' le nžie' bia' gone' da' güen juisyw len note'tezcho chejnilaže'chone', chion' cheyaše'laže'de'. Cani'te gwleje' chio' gac da' mba juisyw checho cate' šjayzoacho len le'. 24 Chion' ba gwleje' gac güen checho balcho naccho bene' Israel na' balcho bi naccho bene' Israel. 25 Can' ža le'e libr dan' bzoj Oseas ben' be' xtiža' Diosen' cani', žan:

Bene' ca' bi zjanaque' yež chia', neda' Dios n̄ia' legaque' yež chia', na' bene' ca' bi goda', yapegaca'ne' chacda' legaque'.

26 Na' yež gan' gož Diosen' bene' ca': "Bi nacle yež chia'", na'teze Dios ben' zoa toli tocanē ye'e legaque' xi'ine'.

27 Na' Isaías ben' be' xtiža' Dios cani' gwne' quinga che da' xozxtao' neto' bene' Israel: "La'czla' chio' bene' Israel šancho ca yox da' chi' cho'a nisdao', bał gacho šjayzoacho len Diosen'. 28 Le Diosen' gone' can' ba nchoglagüen' len chio' benačh, na' bedao'nez gone' doxen can' ba ngüie' gone'." 29 Gac can' ža yeto da' bzoj Isaíasen' cani', žan:

Šaca' Xancho Diosen' ben' nape yela' guac xen bi bocua'ane' to chope bene' lo nación Israel chechon',
ba gwžiaiyo'cho can' gosac che bene' Sodoma na' bene' Gomorra ca'.

Bene' Israel bene' bi chesejnilaže' Criston'

30 Quinga ba goc, bene' bi zjanaque' bene' Israel bi besyeyiljue' nacle yesone' cont Diosen' ne' zjanaque' bene' güen len le', perw bale' ba chesejnilaže' Criston' na' da'n̄an' ba zjanaque' bene' güen len Diosen'. 31 Na' zan bene' Israel gualaž cheto' zjanao' to ley da' chžian bia' naclen' yesone' cont yesaque' bene' güen len Diosen'. Perw bi zjanaque' bene' güen len le', le bi chesone' doxen can' žanna'. 32 Na' bi goc yesaque' bene' güen len Diosen', le gosacde' yesone' da' güen cont yesaque' bene' güen len le' na' bi gosacbe'ede' con bene' yesejnilaže'ne' yesaque' bene' güen len le'. Goc chegaque' ca chac che bene' jati'i to yej. 33 Quinga nyoj Xtiža' Diosen' chegaque':

Gan' nzi' Sión sela' to bene',
na' bena' zaca'lebe' ca to yej da' chego' bene' na' ca to yej xen da' šjati'i bene'
na' bixe',

le bene' zan bi yesejnilaže' ben' sela'.

Na' note'teze' yesejnilaže' bena' selan', gwbat yesyetinjde' che dan' gosejnilaže'ne'.

10

1 Bene' migw, lo' lažda'ogua' che'nchgüeda' bene' Israel gualaž chia' yesejnilaže' Jesucriston' cont gata' yela' mban chegaque' toli tocanē, nachen' choł güiža' Diosen' chnaba' gaclene' legaque'. 2 Nežda' da' zan da' chesone' chesacde' yebe Diosen' legaque', perw bi chesacbe'ede' bin' chazlaže' Diosen'. 3 Bi chesejni'ide' cheyla' yesejnilaže' Criston' cont yesaque' bene' güen, san chesyeyiljue' bi da' güen da' yesone' chesacde' cont yesaque' bene' güen len le'. Da'n̄an' bi chesejnilaže' Jesucriston' can' chaclaže' Diosen' yesone'. 4 Le yogo' bene' chesejnilaže' Criston' ba besyeyaque' bene' güen len Diosen'. Na' chio' chejnilaže'chone' ba nezecho nono gac gonyane' can' ža ley dan' bzoj Moisésen', n̄eca gac yeyaque' bene' güen da' na'ogüe' lezen.

5 Da' Moisésen' bzoje' can' cheyla' gon bene' cont gaque' bene' güen len Diosen', gwne': "Note'teze bene' chone' cayanen' ža leyna', nachen' guac bane'

toľi tocanē.”⁶⁻⁷ Na' chio' ba naccho bene' güen len le' da' chejnilaže' chone', na' bich choncho xbab nacho: “¿No gac cue yaban' na' no gac yetj gan' že' bene' guaten?” šaca' nacle goncho šjaxi'cho Criston' cont gaclene' chio'.⁸ San diža' güen da' chyixjue'eto' žan: “Ba nombia'cho diža' da' chaclenen chio'. Choncho xbab che len na' choe'cho diža' can' žan.” Lenña' diža' da' chyixjue'eto' bene' cont yesejnilaže' Jesucriston'.⁹ Che'to' bene': “Še güe'lenle bene' diža' cont yeseñezde' chejnilaže'le Jesucriston' na' chzenagle che' da' naque' Xanle, na' še šejle'le lo' yichjlažda'ole Diosen' bečhis bosbane' Jesucriston' ladjo bene' guaten', nachen' gata' yela' mban chele toľi tocanē.”¹⁰ Le cheyaľa' šejle'cho lo' yichjlažda'ochon' cont yeyaccho bene' güen len Diosen' na' lecze cheyaľa' güe'lencho bene' diža' che dan' chejnilaže'cho Criston' cont gata' yela' mban checho toľi tocanē.

¹¹ Xtiža' Diosen' nyojen žan: “Note'tez bene' yesejnilaže' Diosen', gwbat yesyetinjde' che da' gosejnilaže'ne'.”¹² Balcho naccho bene' Israel na' balcho bi naccho bene' Israel, toz can' chon Diosen' len yogo'cho, le Xancho Jesucriston' naque' Xan yogo'loľ bene', na' cheyaše'laže'de' note'tezcho chñabcho gaclene' chio'.¹³ Can' gwne': “Note'tez bene' yeseñabe' gaclena' legaque', neda' naca' Xanle yebeja' legaque' lo da' malen'.”¹⁴ Na' ¿nacxe yeson bene' yeseñabe' goclen lagüen' še bi chesejnilaže'ne'? Na' ¿nacxe yesone' yesejnilaže'ne' še biña' yesende' xtižen'? Na' ¿nacxe yesende' xtižen' še nono zoa no güe'lene' legaque' xtižen'?¹⁵ na' ¿nacxe yeson bene' yeseyixjue'ede' xtiža' Diosen' še Diosen' bi sele' legaque' yeseyixjue'eden'? Chac can' nyoj Xtiža' Diosen' žan: “Chbechgüecho caten' za'ac bene' cheseyixjue'ede' diža' güen chosozejni'ide' guac soacho binlo len Diosen'.”

¹⁶ Perw gague yogo' bene' gualaž cheto' chosozenague' diža' güen che Diosen'. Chac can' gwna Isaías ben' be' xtiža' Diosen' cani', gwne': “Xana', nono chzenagtec diža' dan' chzeneto'ne'.”¹⁷ Bia'cze cheyaľa'cze yesene bene' diža' güen da' chzejni'in che Criston' cont yesejnilaže'ne'.

¹⁸ Na' chñaba': ¿biña' yesene bene' Israel gualaž cheton' diža' güen da' chzejni'in che Criston'? Bač gosenden'. Chac can' nyoj Xtiža' Diosen' žan: Bene' že doxen lo yežlion' ba gosende' xtižen'; ba zej xtižen' doxen.

¹⁹ Na' chñaba' da' yoble: ¿bi gosejni'i bene' Israel gualaž cheton' diža' dan' chzejni'in che Criston'? Ba gosejni'iczdnen'. Le da' Moisésen' bzoje' da' gwna Diosen' čegaque', žan:

Neda' Dios gona' güen len bene' bi zjanac bene' nación chia', na' gue'ele legaque'.

Na' gona' güen len bene' nación ca' bene' bi chesejni'i, na' ža'ale.

²⁰ Nach Isaíasen' ben' be' xtiža' Diosen' cani' bi bžebe' gwdixjue'ede' da' nga gwna Diosen', žan:

Bene' bi besyeyiljw neda', besyeželde' neda'.

Na' bene' bi gosenab neda', blo'elagua' legaque'.

²¹ Na' Diosen' gože' bene' Israel gualaž cheton', gwne': “Yogo' ni'a chñeyoeda' le'e cont gwzenagle chia', na' zoachachle chonle güedenag len xtižan'.”

11

Bal bene' Israel yesejnilaže' Jesucriston'

¹ Bi cheyaľa' goncho xbab Diosen' bechojlaže' nación Israel cheto' to ši'ize. Neda' naca' bene' Israel, golja' lo diaža' che da' Abraham na' naca' diaža' che da' Benjamín. ² Biña' yechojlaže' Diosen' neto' nacto' diaža' che ben' gože' Israel, le gwleje' neto' cani'te cont nacto' nación che'. Le gon xbab can' nyoj

dan' gwna Elías ben' be' xtiža' Diosen' cani', gwdagüe' xya che da' xozxta'oto' ca', gože' Diosen': ³ “Xana', bene' gualaž chia' quinga ba gosote' bene' ca' goso'e xtižon', na' ba bosyočinje' mes de yej ca' gan' cheyala' yesonxene' le'. Yetoga neda' zoa' chzenaga' chio' na' lencze neda' chese'nde' yesote'.” ⁴ Nach Diosen' boži'e xtižen' gože'ne': “Ne' nita' gaže mil bene' ba gwleja' bene' biṇa' yosozoa xibe' yesonxene' l' gua'a lsaca' dan' nzi' Baal.” ⁵ Na' ca'cze naquen ža na'aža, neto' bene' Israel chejnilaže'to' Criston' bi nacto' bene' zan, perw Diosen' ba gwleje' neto' cont chonxento'ne', le nži'ilaže'de' neto'. ⁶ Diosen' gwleje' neto' cont chonxento'ne' da' nži'ilaže'de' neto'. Bi gwleje' neto' lagüe' da' nonto' bi da' güen. Šaca' gwleje' neto' lagüe' da' nonto' bi da' güen, bi naquen con to goclen da' chon Diosen' neto' lo yela' bene' šagüe' che' cate' chbeje' neto' še ca', san naquen to goclenze.

⁷ Zan bene' nación Israel cheton', la'czla' chesonchgüe' da' chesacde' cheyala' yesone', bi chesyeželde' naclen' yesone' cont yesaque' bene' güen len Diosen'. Perw Diosen' gwleje' balto' cont šejnilaže'to'ne' na' none' neto' ca to bene' güen. Na' bene' yezica'chle zjanaque' güedenag len Diosen'. ⁸ Chac čegaque' can' nyoj Xtiža' Diosen' žan: “Diosen' bene' cont zjanaque' ca bene' bicze nte. Na' ža na'aža zjanaque' ca to bene' bi chle'e len yejlagüen', na' ca to bene' bi chene len naguen'.” ⁹ Na' da' Davin' gwne' čegaque': Yogo' da' de da' chesyebede' yesaquen ca to da' yeben legaque', na' yesaquen ca to ga šjaselažoe' yesaque' castigw.

¹⁰ Yesechol' yichjlažda'ogaquen', na' yedote yesezaca'zi'e can' chzaca'zi' ben' nlegw cože' no'e yoa' zi'i.

Diosen' gwleje' bal bene' bi zjanac bene' Israel cont chesejnilaže'ne'

¹¹ Nezececho zan bene' Israel gualaž cheton' bi chesejnilaže' Criston'. Na' chnaba', ¿zjanaque' ca bene' gwyo'o yeja' ni'e? ¿še zjanaque' ca bene' gwbiže' na' gote'? Zjanaque' ca to bene' con gwyo'o yeja' ni'e na'ze. Da' bi chesejle'e che Criston' de latje cont le'e bi nacle bene' Israel chzenagle xtižen'. Da'nan' legaque' gwžin ža yesezelaže' gon Diosen' güen len legaque' ca ba chone' len le'e bi nacle bene' Israel. ¹² Da' yoble chnia', da' bi chesejnilaže' bene' gualaž cheto' ca' Criston', chac ca' cont yezica'chle bene' že' yežlion' yesenite' mba con še yesejnilaže'ne'. Na' da' bchoj nación Israel cheton' lo na' Diosen', de latje cont le'e bi nacle bene' Israel soale mba lo na' Diosen'. Perw gwžin ža cate' yogo'te bene' gualaž cheto' yesenite' yesejnilaže' Diosen', na' cana'ch gac mba juisyw.

¹³ Na' le'e bi nacle bene' Israel, che'nda' nezele Diosen' gwsele' neda' cont güe'lena' le'e xtižen' le'e bi nacle bene' Israel. Na' chona' con ga zelao chzaque'da' cont bene' yosozenague' che Diosen'. ¹⁴ Le chaclaža' gona' cont bene' gualaž chia' ca' yesezelaže' gon Diosen' güen len legaque' can' chone' len le'e chejnilaže'lene', na' gata' yela' mban čegaque' toli' tocaṇe. ¹⁵ Diosen' ba bnite' zan bene' Israel gualaž cheton' ca'ale to tiemp cont le'e bi nacle bene' Israel gwbiga'le len le'. Na' gwžin ža cate' gon Diosen' yesyebiga' yezan bene' gualaž cheto' len le'. Na' leca' mba gac cate' yesyebigue' len Diosen'. ¹⁶ De costumbr che neto' nacto' bene' Israel cate' chonto' yetextil, na' chnežjwto' Diosen' to bloł' dao' cuazin' cont chlo'eto'ne' doxenen naquen che'. Na' lecze še nacho to loe yaguen' naquen che Diosen', zejen lecze xoze' yaguen' naquen che'. Na' da' xozxta'oto' ca' ben' gosejnilaže' Diosen' cani' zjazaca'lebde' ca bloł' dao' cuazina' na' ca' loe yaguen'.

¹⁷ Nación Israel cheton' zaca'leben ca xoze' yag da' ba nchog xan yaga' to lao yag olivo güen na' ba bniten' šla'ale. Na' le'e bi nacle bene' Israel zaca'leble ca xoze' yag olivo da' ze do yiže', da' ba gwchogue' lagüen na' ba bozoen' yag

güen cont beyaquen toze. Nach guac nacho loe yag güenna' ba noxen' le'e na' niže' chenna' chac banlenle. ¹⁸ Bi gaquele naquechle bene' güen ca bene' Israel gualaž cheto' da' chac chele ca'. Gague le'e chnežjwle yela' mban che loe yaguen', san loe yaguen' chonen le'e yela' mban.

¹⁹ Le'e bi nacle bene' Israel, šeca che'lja lježle: "Diosen' bene' bene' Israel ca yag da' gwchogue' xozen' cont goc bozoe' chio' gualaz legaque'." ²⁰ Da' li can' žalen'. Perw da' bi gosejnilaže' Criston', Diosen' bene' len legaque' ca xoze' yag da' ba gwchog xan yaguen' len, na' ba bozoe' le'e lagüe da' chejnilaže'le Criston'. Da'n'an' bi ga'laže'le, san le gwsaca' cont soachachle šejnilaže'lene'. ²¹ Da' bi gosejnilaže' Criston', Diosen' bene' cont gwdi gwxaca' bene' Israel gualaž cheto' ca' bene' zjazaca'lebe' ca xoze' yag güenna', na' lecze ca' gone' saca'zi'le še bi soachachle šejnilaže'lene'. ²² Le gonšc xbab can' nži'ilaže' Diosen' chio' chejnilaže'chone' na' can' chone' cont saca'zi' bene' ca' bi chesejnilaže'ne'. Nachen' cheyala' soachachle šejnilaže'lene' cont bi gone' saca'zi'le can' ba bene' len bene' Israel gualaž cheton' bi gosejnilaže'ne'. ²³ Na' Diosen' yebede' si' lo ne'e bene' Israel gualaž cheto' ca' cate' yesejnilaže'ne', le nape' yela' guac cont yozoe' legaque' binlo len le', nach yesaque' ca xoze' yag da' bezyone' toze len yag chen da' yoble. ²⁴ Le'e nacle ca xoze' yag olivo da' ze yixe', Diosen' gwchogue' le'e na' bozoe' le'e lo xoze' yag güen la'czla' bi nacle dogualje xozen'. Na' naquechxe yebede' yozoe' bene' Israel gualaž cheto' ca' le'e yaguen' da' yoble bene' ca' zjazaca'lebe' ca dogualje xoze' yaguen'.

Bene' zan bene' Israel yesyeyaque' lo na' Diosen'

²⁵ Bene' migw, che'nda' šejni'ile da' nga da' nono na' neze cont bi ga'laže'le gaquele zaca'chle clal ca bene' Israel gualaž cheto' ca'. Diosen' be'e latje zane' zjanaque' bene' güedenag len xtižen' šlac yesejnilaže' bene' bi zjanaque' bene' Israel ben' ba bsi'e xneze yesejnilaže'ne'. ²⁶ Nach gwžin ža yogo' bene' Israel gualaž cheto' ca' yesenita' yesaque' lo na' Diosen'. Gac can' nyoj Xtiža' Diosen' žan:

To bene' choj lo ciuda Sión yebeje' le'e lo da' mal da' chonle,
le'e za'le lo diaža che da' Jacob.

²⁷ Na' cate' žin ža yeca'a xto'la'len',
cana'ch ba goc can' ba gwnia' gona'.

²⁸ Dan' bi chesejle' zan bene' Israel gualaž cheton' diža' güen che Diosen', da'n'an' ba bzoe' šla'ale nación cheton' na' ba gwleje' le'e bi nacle bene' Israel cont chejle'le che'. Perw na' Diosen' ne' chacde' bene' ca', le gwleje' da' xozxta'oto' ca' cont yesaque' nación che'. ²⁹ Na' Diosen' bi chetiñde' che bene' mbeje' yesaque' nación che', neca chetiñde' che goclen da' chone' len beñachen'. ³⁰ Cana'te le'e bi bzenagle che Diosen' na' da' bi gosaclaže' bene' Israel gualaž cheton' yosozenague' che', nach beyaše'laže' Diosen' le'e na' goclene' le'e cont chzenagle che'. ³¹ Na' da' bi chosozenag bene' Israel gualaž cheto' ca' che Diosen' na'a, chac ca' cont žin ža gwlo'e Diosen' ne' cheyaše'laže'de' legaque' can' cheyaše'laže'de' le'e. ³² Diosen' ba gwchoglagüe' che yogo' beñachen' de xto'la'gaque' da' bi chosozenague' che', na' ba bene' ca' cont lecze gwlo'ede' cheyaše'laže'de' yogo'cze'.

³³ Leca bene' sina' Diosen'. Nezczed' yogo'lol. Gwbat šejni'icho da' nžie' bia' gac o da' nžie' bia' gone' lo yela' sina' che'. ³⁴ Nyoj Xtižen' žan: "Nono neze yogo' xbab che Xancho Diosen'; nono nape yela' sina' cont gwzejni'ide' le' can' cheyala' gonen'. ³⁵ Na' nono cheyala' gon xbab yebi' Diosen' güen len le' še bi da' ba be'ene'." ³⁶ Yogo'lol da' de naquen che Dios. Bene' beñach, beyixe' na' bica'chle da' zjade. Na' lagüe yogo'lol da' bene' zoe' blao. Len' gacxene' toli tocañe. Can' gacšca.

12

Cheyała' gon cuincho lo na' Diosen'

¹ Bene' migw, Diosen' ba cheyaše'laže'de' chio'. Da'nan' chneyoeda' le'e le gon doxen cuinle lo na' Diosen' na'a mbanle. Le gonen do yichj do laže'le. Na' le gac bene' laždao' xilaže' le can' chazlaže' gonxenchone'. ² Bi goncho ca cheson bene' bi zjanombia' Diosen'. San cheyała' nabecho Diosen' gwše'e xbab chechon' cont yebecho goncho dan' chazlažen'. Na' chaclaže' goncho da' güen, da' chebede' na' yogo' da' zej to licha.

³ Diosen' nži'ilaže'de' neda' na' ba gwsele' neda' cont chyixjue'eda' xtižen'. Da'nan' chnia' bi cheyała' gonxen cuincho, san cheyała' gacbe'echo Diosen' ba goclene' chio' cont chejnilaže'chone' na' none' grasyw checho cont goncho bi da' goncho. ⁴ Can' nac cuerp chechon', zan cuen naquen na' gague toze žin da' cheson to to cuenen. ⁵ Lecze can' naquen len chio', bene' zan naccho chejnilaže'cho Criston' na' yogo' chion' naccho txen len le' na' len lježcho zaca'lebcho ca toze cuerp.

⁶ Diosen' none' grasyw chechon' gwde gwdele da' gon to tocho. Še ba none' checho chixjue'echo bi da' gože' chio', nach cheyała' chixjue'echon na' šejle'cho gaclene' chio' gonchon. ⁷ Na' še Diosen' ba none' checho gaclencho bene', cheyała' gaclencho legaque'. Na' še ba none' checho gwsed gwlo'echo bene', cheyała' gwsed gwlo'echone'. ⁸ Na' še Diosen' ba none' checho neyoecho bene' cont yesone' da' güen, cheyała' neyoechone'. Na' še ba none' checho gwnežjwcho da' chyažje bene', cheyała' gwnežjwchon do yichj do laže'cho. Na' še ba none' checho gaccho bene' blao na' güia na' ljež chio' chonxenchone', cheyała' cue' yichjcho güia na'cho legaque'. Na' še ba none' checho yeyaše'cho no bene' yaše', no bene' gole o no bene' güe', cheyała' yebecho gaclenchone'.

Da' cheyała' gon chio' chejnilaže'cho Jesucriston'

⁹ Cheyała' gague ljež benachcho do yichj do laže'cho, na' cheyała' gue'echo da' malen' na' soaczcho goncho da' nac da' güen. ¹⁰ Ca chaque biše' goljcho, ca'cze cheyała' gaguecho note'teze bene' lježcho na' gonchone' bene' xench ca cuincho.

¹¹ Bi gaccho bene' xagüed, san goncho da' non Diosen' chio' goncho do yichj do laže'cho, le chonxencho Xancho Jesucriston' len dan' chonchon'.

¹² Cheyała' yebecho da' nezecho šjayzoacho len Diosen'. Cheyała' gwo gwchejcho cate' chyi chzaca'cho. Na' lecz cheyała' yol güižcho Diosen' zan ni'a yogo' ža.

¹³ Cheyała' gaclencho bene' lježcho bene' chesejnilaže' Diosen' še bi da' cheseyažjde' na' gwlebcchone' ližcho še zjanaque' bene' zito'.

¹⁴ Cheyała' nabcho lao Diosen' gac güen che bene' chosoči chososaca' chio'. Nabcho gac da' güen chegaque', gague da' mal.

¹⁵ Cheyała' yebecho txen len bene' chesyebe na' cuežcho txen len bene' chesebež.

¹⁶ Yogo'cho cheyała' goncho toze xbab. Bi cheyała' ga'laže'cho, san yol güižcho bene' yaše' bene' bibi chac na' bi gon cuincho bene' sina'.

¹⁷ Še bi da' mal chone bene' chio', bi nacho lecze da' mal yebi'icho len le'. Cheyała' cue' yichjcho goncho da' güen cont yesena bene' le naczen güen dan' chonchon'. ¹⁸ Cheyała' goncho bi da' gac goncho cont soacho binlo len yogo'lol bene'. ¹⁹ Chacda' le'e, nachen' chnia' cheyała' gwdecho to šla'ale bite'teze da' chesone bene' chio'. Diosen' gwoecze' nac gone' len bene' chosoči chososaca' chio'. Xtižen' nyojen žan: "Xancho Diosen' že': Neda' yoži'a che da' mal da' chesone', na' neda' gwnežjua'ne' castigw." ²⁰ Na' lecze žan: "Še chbil

chdon bene' chgue'ede' chio', cheyała' güe'chone' da' ye'ej gagüe'; le še goncho güen len le', guacbe'eljede' chone' da' mal." ²¹ Bi güe'cho latje nabia' da' malen' chio' na' yebi'icho mal len bene' chonde' chio' mal, san yebi'icho güen len legaue' cont yesyetinjde' che da' malen' chesonen'.

13

¹ To tocho cheyała' gwzenagcho che justis bene' chesenabia', le Diosen' bnite' legaue' chesenabi'e. ² Še bi chzenagcho che bene' chesenabia', bi choncho da' nžia bia' Diosen' goncho, na' lecze chyiljwze xtola'cho na' gaccho castigw da' bi chzenagcho chegaquen'. ³ Bi cheyała' žebcho bene' ca' chesenabi'e še zoacho choncho da' güen, san še zoacho choncho da' xinj, nachen' žebcho yesone' chio' castigw. Na' cont bi žebcho legaue', con soacho goncho da' güen da' yesyebede'. ⁴ Justis ca' chesone' xšin Dios cont soacho güen. Perw še choncho da' xinj, cheyała' žebcho legaue', le zjanape' yela' chnabia' cont yesone' castigw che note'teze bene' cheson da' mal, le Diosen' none' lo na'gaquen' yosonežjue' castigw che bene' cheson da' mal. ⁵ Da'n'an' cheyała' gwzenagcho chegaue' cont bi si'cho castigw na' lecze cont gacbe'echo lo' yichjlažda'ochon' choncho can' cheyała' goncho. ⁶ Lecze da'n'an' cheyała' chixjwcho no che bien na' bichle da' cheyała' chixjwcho, cont bene' ca' chesenabia' guac yesone' da' yo'o lo ne'e yesone', na' cheyała' gwzenagcho chegaue', le Diosen' ba bzoe' legaue' cont chesone' dan' cheyała' yesone'.

⁷ Chixjwcho še bi da' čala'cho che bene'. Še čala'cho che bien, chixjwchon. Še čala'cho che impuestw, chixjwchon. Na' gapcho bala'an' bene' cheyała' dap bala'an'. Na' gonxencho bene' cheyała' gacxen. ⁸ Cheyała' chixjwcho doxen bi da' čala'cho che bene', na' lecze cheyała' gaue yogo' ljež beňachcho, le še chaquecho legaue', ba choncho da' non ley che Diosen' mandadw goncho. ⁹ Leyna' žan: "Bi gata'lenle no'ole bi nac no'ol chele o bene' byo bi nac bene' chele, bi gotle bene', bi cuanle, bi güe'le diža' güenlaže' che bene' lježle, bi selaže'le bite'teze da' de che bene'." Na' dech da' ža leyna'. Na' yogo'cze da' nžia bia' leyna' goncho, bač chonchon še chzenagcho che dan' žanna': "Le gaue ljež beňachle ca chaque cuinle." ¹⁰ Še chaque lježcho, bibi da' mal gonechone'. Da'n'an' choncho doxen can' nžia bia' leyna' še ba chaque lježcho.

¹¹ Caten' gwzolaochi chejnilaže'cho Criston' gwnezecho gwžin ža yide' da' yoble. Na' na'a ba za' bagwze yide' da' yoble. Da'n'an' bich cheyała' gaccho ca bene' čtas, bene' bi chon xbab. ¹² Yežlio nga zaca'leben ca ga nac chol, le že'chgua bene' cheson da' xinj; san gan' zoa Diosen' naquen' ca ga yo'o be'ni'. Nach cheyała' cuejyichjcho bich goncho da' xinj na' goncho con da' chazlaže' Diosen', le ba zoa yide Criston' yedyexi'e chio'. ¹³ Cheyała' goncho da' güen, le ba yo'o be'ni' che Criston' lo' yichjlažda'ochon'. Bi cheyała' goncho txen lo lnin' ga chbe' žaš, bi cheyała' gaccho borrašw, bi cheyała' gata'lencho no'ole bi nac no'ol checho o bene' byo bi nac bene' checho o goncho bichle da' nac da' yela' zto', na' bi cheyała' tillen lježcho o gue'echo bene'. ¹⁴ Cheyała' gon cuincho lo na' Xancho Jesucriston' na' cue' yichjcho goncho da' chazlaže' cont da' malen' da' yo'o lo' yichjlažda'ochon' bi nabian' chio'.

14

Toz Diosen' nezde' še bene' lježcho nape' dola'

¹ Še zoa to bene' ba chejnilaže' Criston' na' biña' šejni'ide' nac cheyała' gone', con zoe' chacžejlaže', le gwlebe' gaue' txen len le'e, perw bi gacyožlenlne' che xbab čen'. ² Nita' bene' chesejnilaže' Diosen' chesacde' bi zjanape' dola' da' chesagüe' bite'teze yela' guagw, na' lecz nita' bene' yoble biña' yesejni'ide'

bite'teze da' ye'ej gagwcho naquen güen lao Diosen'. Da'nan' chesacde' bi cheyała' yesagüe' bela' na' chesagüe' yiçe' cuanze. ³ Ben' chagw bite'teze yela' guagw bi cheyała' gue'ede' ben' bi chagüe' bela', na' ben' bi chagw bela' bi cheyała' ne' che ben' chagüe' bela', le Diosen' ba none' chopte' ca xi'ine'. ⁴ ¿Noxe nac chio' gwlaže' checho še nac chon ben' ba gwlej Diosen' ca xi'ine'?

Diosen' naque' Xan xi'ine' ca', na' len' ne' che to tocho še choncho da' güen o še choncho da' xinj. Na' lecze len' gone' cont soacho goncho da' güen.

⁵ Nita' bene' cheson xbab nchoj to že xen da' zaca'ch len Diosen' ca yezica'chle že ca', na' lecze nita' bene' chesacde' toz ca zaca' yogo' že ca'. To tocho cheyała' soacho do yichj do laže'cho goncho da' chejni'icho cheyała' goncho.

⁶ Bene' cheson xbab de že da' zaca'ch ca že ca' yezica'chle, chesebeje' žan' cont chesonxene' Dios. Na' bene' chesacde' toz can' zaca' že ca', lecze chesonxene' Diosen' chesone' xbaben' ca'. Na' ben' chesagw bite'tez yela' guagw, chesonxene' Xancho Diosen' cate' chesagüen', le cheso'e yela' choxcen che Diosen' che dan' chese'ej chesagüen'. Na' ben' bi chesagw bela', chosožone' yesagüen' da' chesonxene' Diosen' na' lecze cheso'e yela' choxcen che'.

⁷ Ne tocho bi yo'o lo na'cho gwžičo bia' can' soa cuezcho šlaque mbancho, na' neca yo'o lo na'cho gwžičo bia' nac gatcho. ⁸ Šlac mbancho zoacho cont goncho da' chaclaže' Xancho Jesucriston', na' še gatcho lecze cate' chaclaže' len' gatcho. Can' naquen, mbancho o gatcho, yo'ocho lo na' Xancho'. ⁹ Cui Xancho Criston' goté' na' beyas bebane' ladjo bene' guat ca' cont naque' Xan yogo' bene' chesejnilaže'ne' bene' zjamban na' bene' ba gosat.

¹⁰ Bi cheyała' nacho che bene' lježcho zjanape' doła' še bi da' chesone', na' bi cheyała' gue'e lježcho. Yogo'czecho techo lao Criston' cont le' chogbi'en checho še de xtoła'cho o še bibi de. ¹¹ Nyojczy Xtiža' Diosen' žan:

Xancho Diosen' že':

Da' li naca' Dios, zoa' mbana',

na' yogo' bene' yedesezoa xibgaque' laguan',

na' yogüe' yesene' toz neda' zaca' yesonxen benach.

¹² Can' naquen, yogo'czecho yodecho cuent lao Diosen' che bite'teze da' ba bencho šlac mbancho.

Bi goncho da' gwžičan' bene' lježcho gone' da' mal

¹³ Da'nan' chnia', bi cheyała' necho che bene' lježcho neche bi da' chesone'. Da' cheyała' yechoglaže'cho goncho, cuejyichjcho bi da' choncho še len chžigan' note'teze bene' lježcho gone' da' xinj o še len chonen ca šjabix šjalažoe'.

¹⁴ Xancho Jesucriston' bzejni'ide' neda' cont nezda' bi napcho doła' še gagwcho bite'teze yela' guagw. Perw še bene' chone' xbab gape' doła' lagüe da' gagüe' to da' gagüe', naquen mal gagüen' še ca'. ¹⁵ Še bene' lježcho chaque' tole lagüe da' chagwcho to da' chone' xbab naquen mal len Diosen', bi chaquechone' še chagwtezchon. Criston' bnežjw cuine' gote' neche bene' lježchon', na' chio' bi cheyała' gagwcho bi da' gonen cont gac choplaže' bene' lježchon' cuejyichje' Criston' na' cuiaye'e. ¹⁶ Še choncho bi da' chaquecho naquen güen, perw na' bene' lježchon' chesacde' naquen mal, bi gonchon cont bi yesene' choncho da' xinj. ¹⁷ Še ba choe'cho latje chnabia' Diosen' chio' len xbab chechon', dan' che'ej chagwchon' bi naquen da' žialao xen len chio'. Da' nac da' žialao xen, goncho da' zej to licha, soacho binlo len Dios na' len bene' lježcho, na' soacho mbalaz da' yo'o Spiritw che Diosen' lo' lažda'ochon'. ¹⁸ Še choncho da' zej to licha, na' zoacho binlo len Diosen' na' len lježcho, na' zoacho mbalaz da' yo'o Spiriton' lo' lažda'ochon', da' li chzenagcho che Criston'. Nachen' chebe Diosen' can' chonchon', na' lecze yezica'chle bene' chesene' choncho güen.

¹⁹ Da'nan' cheyała' yeyiljwlaže'cho can' goncho soacho binlo tocho yetocho na' can' gaclen bene' lježcho ca' cont yesenita'chache' yesejnilaže' Criston'.
²⁰ Diosen' ba bnitlagüe' xtoła' bene' lježcho na' bi cheyała' gagwcho da' gonen gac choplaže' no bene' lježcho na' gone' da' chacde' naquen mal. Nežda' de latje gagwcho bite'teze yela' guagw, perw naquen mal gagwchon še len chonen choplaže' bene' lježcho. ²¹ Güenczen bi gagwcho bela' neca ye'ejcho vino na' neca goncho bichle da' goncho še len chonen cont bene' lježcho chacchoplaže' o gone' da' xinj o cuejyichje' bich šejnilaže' Criston'. ²² Še nezecho zoacho binlo len Diosen' da' chejnilaže'chone' na' chaquecho bi napcho doła' len bica' da' choncho, chopzcho len Diosen' nezecho. Mbalazen' zoacho še nezecho lo' yichjlažda'ochon' bi napcho doła' len bica' da' choncho. ²³ Na' de xtoła'cho še chagwcho to yela' guagw na' chacžejlaže'cho chaquecho bilja cheyała' gagwchon, le bite'teze da' choncho še chaquecho naquen mal gonchon, napcho doła' chonchon še ca'.

15

Cheyała' cue' yichjcho bene' lježcho

¹ Bałcho ba zoachachcho chejnilaže'cho Criston' na' nezecho de latje ye'ej gagwcho bite'teze. Perw cheyała' gapcho yela' chxenlaže' len bene' bina' yesejni'išagüe'de', na' bi goncho con da' žan checho. ² To tocho cheyała' goncho bi da' güen da' chazlaže' bene' lježcho ca' goncho, cont gaclenen legaque' yesejnilaže'che' Diosen'. ³ Goncho ca', le ne Criston' bi bene' con da' gwnazen che', san goc che' can' nyoj Xtiža' Diosen', žan gože' Xe' Diosen': "Bene' besegue'ede' le' na' gosene' diža' bya' chio', lencze chia' neda' gosene'." ⁴ Na' Xtiža' Diosen' da' bosozoj bene' cani' chzejni'in chio' cont gwyo gwchejcho šejnilaže'cho Diosen' cate' chzaca'zi'cho. Na' še goncho xbab can' žanna', na' gaclenchen chio' cont soacho lez gwžin ža gon Diosen' güen len chio'. ⁵ Diosen' chone' chio' yela' chxenlaže' cont chyo chchejcho cate' chzaca'zi'cho. Na' chnablaža' lecze gone' gac yichjlažda'ole toze tole yetole, con can' chazlaže' Cristo Jesúsén'. ⁶ Na' gone' ca' cont toze can' nale gonxenle Dios ben' nac Xa Xancho Jesucriston'.

Diosen' chaclaže' bene' bi zjanac bene' Israel yesonxene' le'

⁷ Da'nan' cheyała' le'e to to bene' lježcho binlo ca' Criston' chle'ede' to to chio' binlo, chio' chejnilaže'chone'. Goncho ca' cont gacxen Diosen'. ⁸ Can' goc len Cristo Jesúsén', bzejw yichje' ben cuine' ca' to bene' güen žin cont goclene' neto' bene' Israel. Blo'ede' diža' li be' Diosen' cate' gože' da' xozxta'oto' ca' gone' güen len legaque'. ⁹ Na' lecze bid Criston' cont le'e bi nacle bene' Israel lecze gonxenle Diosen' da' ba beyaše'laže'de' le'e. Chac ca' nyoj Xtiža' Diosen' dan' žan:

Da'nan' gua' yela' choxcen chio' gan' že bene' bi zjanac bene' Israel,
 goła' gonxena' le'.

¹⁰ Na' ga yoble žan:

Le'e bi nacle bene' Israel, le yebe txen len neto' bene' gwlej Diosen' nacto'
 nación che'.

¹¹ Na' lecze žan:

Yogo' le'e bi nacle bene' Israel, le gonxen Xancho Diosen'.

Yogo'lolle le güe' diža' che yela' gwnabia' che'.

¹² Na' da' Isaías ben' be' xtiža' Diosen' cani' bzoje' da' nga žan:

To bene' gualaž yide', bene' galje' lo diaža che da' Isaí.

Le' nabi'e bene' že' to to yež na' to to nación,

na' bene' ca' bi zjanac bene' Israel yesebeze' gaclene' legaque'.

¹³ Diosen' chone' cont chebecho dan' nezecho šjayzoacho len le'. Na' chnaba' gonšque' cont soale mbalaz juisyw na' soa cuezle binlo len xbab da' yo'o yichjlažda' olen' da' zoale chejnilaže' le Criston'. Gonšque' ca' cont Spiritw che Diosen' gaclenen le'e soachachle yebele da' nezele šjayzoale len le'.

¹⁴ Bene' migw, nezda' ba nacle bene' šagüe' bene' chon da' güen, na' nezda' chejni'ichgüele na' chac chneyoe lježle. ¹⁵ Pero le'e cart nga ba beyaxjda' gwdiła' le'e cont gonchle xbab, le Diosen' beži'ilaže'de' neda' gwleje' neda'. ¹⁶ Gwleje' neda' cont chyixjue'eda' xtižen' len bene' bi zjanac bene' Israel. Na' Diosen' yebede' da' ba goclena' legaque' cont bale' gosejle'e xtižen' na' gosaque' lo ne'e cate' Spiritw chen' benen lažda'ogaquen' xilaže'.

¹⁷ Chbeda' chona' xšin Diosen' da' ba goclen Cristo Jesúsén' neda' chona'. ¹⁸ Bi cheyaxjda' gua' diža' che bi da' ba ben bene' yoble, san choa' diža' che da' ba ben Criston', le chaclene' neda' choa' xtižen' na' bichle da' chona' cont zan bene' ca' bi zjanac bene' Israel chosozenague' che'. ¹⁹ Spiritw che Diosen' goclenen neda' cont bena' yela' guac na' bichle da' besyebane bene' gate'teze gwy'a'a be'lena' legaque' xtiža' Diosen', gwzolagua' Jerusalén na' bžintia' gan' nzi' Ilírico. Na' ba gwduxjue'eda' xtižen' doxen gan' gwsele' neda'. ²⁰ Na' ba bena' byen ba bia' diža' güen da' chzejni'in che Criston' gan' nono na' šejnilaže'ne', le bi chaclaža' tia' gwłana' xlatje bene' ba choszejni'ide' xtiža' Diosen'. ²¹ Da'nan' chac can' nyoj Xtiža' Diosen' žan:

Bene' ca' biņa' yesende' xtižen' yesombi'ene',
na' bene' ca' biņa' yesenezde' che' yesejni'ide' che'.

Pablon' šjeje' Roma

²² Da' chzejni'ida' bene' ga yoble xtiža' Criston', da'nan' bi goc yida' gan' zoalen' la'czla' zan ni'a ba goclaža' yida'. ²³ Cana'te zelaža' yedena'a le'e, perw na'ach ba beyož bena' da' gwlo'o Diosen' lo na' gona' do nga. ²⁴ Nach cate' ša'a España cana' chacda' tia' yedena'a le'e. Na' mbalaz soa' yeyož le'eda' le'e na' gaclenle neda' cate' ša'a Españan'. ²⁵ Na'a ša'a Jerusalén šjasana' mechw da' gaclenen bene' lježcho ca' že' na' bene' ca' ba gwlej Diosen' chesejnilaže'ne'. ²⁶ Le bene' lježchon' že' yež ca' zjachi' distritw Macedonia na' Acayan' bosotobe' mechw da' gaclenen bene' lježcho ca' chesejnilaže' Diosen' Jerusalén ben' zjanac bene' yaše'. ²⁷ Bene' ca' bosotoben' besyebede' bosonežjue' mechon', na' naquen to goclen da' cheyala' yesone' len bene' Israel gualaž cheto' ca', le la'czla' legaque' bi zjanaque' bene' Israel, ba zjanone' chegaque' yogo' da' güen da' ba bzejni'i Diosen' neto' bene' Israel, na' da'nan' cheyala'cze yesaclene' bene' gualaž cheto' ca' len da' cheseyažjde'. ²⁸ Cate' bačh beyož bena' lo na' bene' Jerusalén ca' mechon' bdooben', cana'ch sa'a ša'a Españan' na' tia' na'a le'e. ²⁹ Na' nezda' Criston' gaclene' neda' la'a gan' zoalen' cont güe'lena' le'e diža' güen che' da' gaclenen yichjlažda' olen' na' soachguacho mba.

³⁰ Bene' migw, nezda' chaquele Xancho Jesucriston' can' chacda'ne' neda', na' Spiritw che Diosen' chonen cont chaque lježcho tocho yetocho. Da'nan', bene' migw, chnaba' gacle neda' txen yol güižcho Diosen' cont gaclene' neda'. ³¹ Nabechone' bi gaca' lo na' bene' gualaž cheto' ca' bene' bi chesejnilaže' Criston' Judean', na' lecze nabechone' cont bene' lježcho ca' že' Jerusalén bene' yo'o lo na' Diosen' yesazlaže' ca' dan' güe'gaca'ne'. ³² Nach še Diosen' gone' latje, mbalaz yedena'a le'e na' yeyaclaža' soa' na' len le'e. ³³ Dios ben' chon chzoa chbezcho binlo len xbab da' yo'o lo' yichjlažda'ochon' gaclene' yogo'le len xbab chelen'. Ca'šcace gac.

16

Pablon' chguape' tiox bal bene' že' Roma

¹ Chņeyoeda' le'e le gon txen len bene' zanchó Febe cate' le'e gan' zoalen'. Ba benchgüe' xšin Diosen' len bene' ca' chesedop chesežag chesonxene' Jesucriston' lo yež Cencia. ² Le gwlebe' ca cheyala' gonle len ljež chio' yo'ochó lo na' Diosen'. Na' le gaclene' še bi da' chyažjde', le len' ba goclene' bene' zan na' lecze ba goclene' neda'.

³ Le gwguap tiox Priscila len bene' che' Aquila. Legaque' ba gosone' žin che Cristo Jesúsén' txen len neda'. ⁴ Besezanlaže' cuingaque' yesate' cont bososle' neda' lo na' yela' goten'. Choa' yela' choxclen chegaque' can' gosonen'. Na' lecze yogo' bene' ca' bi zjanac bene' Israel bene' chesedop chesežag chesonxene' Jesucriston' cheso'e yela' choxclen chegaque'. ⁵ Le gwguap tiox bene' ca' chesedop chesežag liž Priscilan' na' Aquilan' chesonxene' Jesucriston'. Na' le gwguap tiox bene' xmigua' Epeneto. Chacda'ne', le naque' bene' nechw bene' Acaya gwejnilaže' Criston'. ⁶ Nach le gwguap tiox María no'olen' ba benchgua xšin Diosen' gan' zoalen'. ⁷ Na' le gwguap tiox bene' gualaž cheto' Andrónico len Junias. Legaque' byobch gosejnilaže' Criston' clel ca neda' na' txen gota'to' ližya. Lecz ca' postlw ca' yezica'chle cheso'e diža' güen chegaque'.

⁸ Le gwguap tiox bene' xmigua' Amplias, le chacda'ne' da' ba chejnilaže' Xancho Criston'. ⁹ Na' le gwguap tiox Urbano ben' chon xšin Criston' txen len chio', na' lecze Estaquis, le chacda'ne'. ¹⁰ Lecze le gwguap tiox xmigua' Apeles. Da' zan ba bene' blo'e chejnilaže' Criston' do yichj do laže'. Na' le gwguap tiox bene' ca' že' liž Aristóbulo. ¹¹ Na' le gwguap tiox bene' gualaž chia' Herodión na' lecze bene' ca' že' liž Narciso, con noe' chesejnilaže' Criston'. ¹² Le gwguap tiox no'ole xmigwcho Trifena len Trifosa, no'ol ca' cheson xšin Xancho Jesucriston'. Na' lecze le gwguap tiox bene' zanchó Pérsida. Chaquechone' da' ba benchgüe' xšin Xanchon'. ¹³ Na' le gwguap tiox Rufo. Naque' bene' blao len chio' chejnilaže'cho Xancho Jesucriston'. Na' lecze le gwguap tiox xne'ena', le ba none' neda' ca xi'ine'. ¹⁴ Le gwguap tiox Asíncrito, Flegonte, Hermas, Patrobas na' Hermes len bene' lježcho zjanita' len legaque'. ¹⁵ Na' le gwguap tiox Filólogo na' Julia na' len Nereo na' bene' zanen', na' Olimpás na' yogo' bene' lježcho nita' len legaque'.

¹⁶ Na' cate' chežagle txen le gwnopa' na' lježle cate' chguap lježle tiox cont nacbia' chaque lježle. Na' bene' ca' chesedop chesežag chesonxene' Criston' yogo'te yež gan' ba gwya'a chosoguape' le'e tiox.

¹⁷ Bene' migw, chņeyoeda' le'e le gwsaca' cont bi gwzenagle che bene' zjanac bene' güetil, bene' chesaclaže' gonle da' xinj, le bi chesone' txen len dan' ba bsedle che Diosen'. ¹⁸ Bi chosozenague' che Xancho Jesucriston' san chosozenague' che da' mal da' yo'o lo yichjlažda'ogaquen' na' chesone' con can' žanna'. Na' cheso'e diža' xdan chosopede' bene' chesejle'daze cont chesexoayague' legaque'. ¹⁹ Yogo'ze bene' zjanezde' chzenagle che bene' choszejni'ide' le'e, na' danan' chbeda'. Perw chaclaža' gacle bene' sina' cont gwzenagle che da' nac da' güen, gague gwzenagle che da' nac da' mal. ²⁰ Nach Dios ben' chon cont chzoa chbezcho binlo lecze yob gone' cont Satanásen' dan' chnabia' da' xigüe' ca' bi soen nabi'an chio'. Na' Xancho Jesucriston' soašque' gaclenšcace' le'e.

²¹ Timoteo ben' chonlen neda' xšin Criston' nga chguape' le'e tiox, na' lecze ca' cheson bene' gualaž cheto' Lucio na' Jasón na' Sosípater.

²² Neda' Tercio chzoja' cart nga con can' ža Pablon', na' lecze chguapa' le'e tiox, le naccho txen chejnilaže'cho Xanchon'.

²³ Lecze Gayo chguape' le'e tiox. Neda' Pablo zoa' liže' na' lecze liže' nga chesežag bene' ca' chesonxen Criston'. Na' lecze Erasto ben' nac lo ne'e mechw che ciudan' chguape' le'e tiox na' len bene' biše' Cuarto.

²⁴ Soašca Xancho Jesucriston' gaclenšque' yogo'le. Na' ca'šcacze gac.

Chonxene' Diosen'

²⁵ Le gonxench Diosen'. Len' nape' yela' guac cont gaclene' le'e soachachle šejnilaže'lene' can' ža diža' güen da' chyixjue'eda' chzejni'ida' bene' che Jesucriston'. Na' chzejni'ida' xtiža' Diosen' da' nono na' neze cate' za' xete yežlion',
²⁶ perw na'a Diosen' ba bzejni'ide' chio' bi zejen da' ca' none' mandadw bosozoj bene' ca' bosozoj Xtižen' cani'. Na' Dios ben' zoa toli tocañe chaclaže' šej diža' chen' yogo' yež cont yogo' chio' beñach šejnilaže'cho Jesucriston' na' gwzenagcho che'.

²⁷ Toze Diosen' zaque' gonxen chio' beñach, na' tozen' napchgüe' yela' sina'. Na' da' gwsele' Xancho Jesucriston' chaclene' chio', da'nan' chac chonxenchone' toli. Ca'šcacze gac.

CART NECHW DAN' BZOJ POSTLW SAN PABLO CHE BEÑE' CA' ŽE' CORINTO

Pablon' chzoje' bene' chesedop chesežague' chesonxene' Jesucriston' Corinto

¹ Neda' Pablo chzoja' cart nga. Diosen' gwleje' neda' par naca' postlw che Jesucriston', le can' gwnalaže'. Na' chguapa' le'e tiox txen len bene' migw checho Sóstenes ben' lecze chejnilaže' Jesucriston'. ² Chzoja' cart nga par le'e chdop chžagle chonxenle Diosen' lo ciuda Corinto. Da' chejnilaže'le Jesucriston', da'nana' Diosen' ba gwleje' le'e cont yo'ole lo ne'e, can' gwleje' yogo' ben' chosol güiže' Xancho Jesucriston' na' zjanaque' le' txen gate'tezechle, le lecze naque' Xangaquen'. ³ Chnaba' lao Xacho Diosen' na' lao Xancho Jesucriston' yesaclene' le'e na' yesone' cont soa cuezle binlo len xbab da' yo'ole' yichjlažda'ole.

Diosen' chaclene' chio' chejnilaže'cho Criston'

⁴ Yogo' ni'a choa' yela' choxclen che Diosen' par le'e can' chaclene' le'e lagüe chejnilaže'le Jesucriston'. ⁵ Na' da' chejnilaže'lene' chaclenchgüe' le'e cont chejni'ile yogo' da' ba bzejni'i Diosen' le'e na' cont choe'le diža' chen. ⁶ Na' ba chonle cont nachia' xtiža' Criston' da' chejle'le naquen da' li. ⁷ Spiritw che Diosen' chonen cont chac chonle yogo' da' ca' chyažjen gonle šlac chbezcho yid Xancho Jesucriston' yeto. ⁸ Na' Diosen' gaclene' le'e soachachle gonle can' chazlažen' cont bibi doła' gaple caten' yid Xancho Jesucriston' yeto. ⁹ Diosen' zoacze' chone' can' ba gwne' gone', na' le'na' gwleje' le'e cont nacle txen len Xi'ine' Jesucriston' ben' nac Xancho.

Nža' nža'te chesena bene' chesonxen Jesucriston' Corinton'

¹⁰ Bene' migw, le'e chejnilaže'le Jesucriston'. Da'nana' chneyoeda' le'e, le gon txen len lježle na' bich gacle chople o šon taple len da' chonle xbab na' len da' žale. ¹¹ Chnia' ca' bene' migw, le bene' nita' liž Cloé ba gose'e neda' chdile chšašle. ¹² Chnia' chdile chšašle, le balle žale: "Naca' txen len da' chsed chlo'e Pablon'." Na' yeballe žale: "Naca' txen len da' chsed chlo'e Apolosen'." Na' yeballe žale: "Naca' txen len da' chsed chlo'e Pedron'." Na' yeballe žale: "Naca' txen len da' chsed chlo'e Criston'." ¹³ ¿Chaquele bid Criston' neche to chopzle? ¿Chaquele nedan' Pablo bnežjw cuina' gota' le'e yag cruz neche le'e? ¿Zsoale nis cont blo'ele chejnilaže'le neda'? Gague can'. ¹⁴ Choa' yela' choxclen che Diosen' bi bzoa' le'e nis, san Crispo na' Gayo na'zen' bzoa' nis. ¹⁵ Da'nana' noch no zoa len le'e bene' yesene' bzoa' legaque' nis, le bi chaclaža' no yesena gwzoe' nis cont blo'e chejnilaže' neda'. ¹⁶ Na' neda' lecze bzoa' nis bene' ca' že' liž Estéfanos, na' bi za'laža' še zoa nochle bene' bzoa' nis. ¹⁷ Nezda' Criston' bi gwsele' neda' cont gwzoe' bene' nis san cont chixjue'eda' diža' güen chen'. Na' bi cheyiljua' no diža' da' chaque benachen' diža' sina' choa' cate' chyixjue'eda' diža' güen chen', le še bene' yesone' xbab che yela' sina' chia', nach bi yesone' xbab che dan' ben Criston' bnežjw cuine' gosote'ne' le'e yag cruzen', na' lenna' nshan' yela' guac che Diosen'.

Criston' bedelo'ede' yela' guac che Diosen' na' yela' sina' che'

¹⁸ Bene' ca' yesebiaye'e lagüe bi chesejnilaže' Jesucriston', chesacde' bibi zaca' xtiža' Criston' da' choe'cho che'cho legaque' bnežjw cuine' neche xtoła'gaque' le'e yag cruzen'. San chio' chejnilaže'chone', chio' ba de yela' mban

checho toli tocanē, nezecho diža' nan' naquen da' zaca'chgua, le nshan' yela' guac che Diosen'. ¹⁹ Chac can' nyojen žan:

Neda' gona' cont nachbia' gague da' li zjansina' bene' ca' chesene' zjanaque' bene' sina'.

Na' gona' cont bene' ca' chesejni'i da' zan yežlio nga, bibi de gon ca dan' chesejni'ide'.

²⁰ Chacljele ĵchixe bene' ca' zjansed yela' sina' che benachen'? na' ĵchixe bene' chososed chosolo'ede' ley che Diosen'? na' ĵchixe bene' chac chesene' diža' xdan diža' sina' che dan' chac yežlio nga? Quinga nac chegaque', Diosen' ba blo'e yela' sina' chegaquen' bi naquen da' sina'. ²¹ Diosen' naque' bene' sina' na' ba bene' cont yela' sina' che benachen' bi chaclenen legaque' yesombi'ene'. Le Diosen' chazlaže' con bene' yesejle' xtiže' dan' choe'to' gata' yela' mban chegaque' toli tocanē, la'czla' yezica'chle bene' chesacde' bibi zaca' xtižen' dan' choe'ton'.

²² Bene' Israel gualaž cheto' chesenabe' yesele'ede' yela' guac cont yesejle'e bin' ža Diosen', na' bene' chesac diža' griego cheseyiljue' no diža' da' chesacde' naquen da' sina'. ²³ San neto' chyixjue'eto' xtiža' Criston' can' bnežjw cuine' gosote'ne' le'e yag cruzen'. Na' bene' Israel gualaž cheto' ca' bi chesazlaže' da' chyixjue'eto' na' bitw chesejle'en. Na' bene' bi zjanaque' bene' Israel lecze chesacde' bibi zaca' dižan' chyixjue'eton'. ²⁴ Perw chio' ba gwlej Diosen' naccho xi'ine', la'aczla' še naccho bene' Israel o še bi naccho bene' Israel, nezecho Diosen' blo'e yela' guac chen' na' yela' sina' chen' dan' gwsele' Criston' bnežjw cuine' neche chio'. ²⁵ Bene' ca' bi chesejnilaže' Diosen' chesacde' bi nac Diosen' bene' sina' lagüe da' be'e latje got Criston' le'e yag cruzen', na' chesacde' chlo'en bibi yela' guac nap Diosen'. Perw gague can', san xbab che Diosen' naquen da' sina'ch ca xbab che benachen', na' nape' yela' guac xench ca benachen'. ²⁶ Bene' migw chia', le gon xbab can' nacle cate' Diosen' gwleje' le'e cont nacle xi'ine'. Gague zanle nacle bene' sina' len xbab che benachen', gague zanle nacle bene' chnabia', gague zanle golje lo diaža che bene' blao. ²⁷ Diosen' ba gwleje' chio' naccho xi'ine' la'czla' bibi yela' sina' che yežlio nga napcho, na' chesaque benachen' bibi chac goncho; nach Diosen' chaclene' chio' len yela' guac che' na' yela' sina' che' cont bene' zjanac bene' sina' len xbab che benachen' yesacbe'ede' na' yesacde' zto'. ²⁸ Diosen' ba gwleje' chio' naccho xi'ine', zanchi naccho no bene' yixe', no bene' chesegue'e benach, na' gwleje' chio' cont gwlo'ede' bene' zjanaque' blao len benachen' bibi zjazaque' len le'. ²⁹ Diosen' bene' cont nono gac gonxen cuine' lagüen'. ³⁰ Diosen' ba none' chio' txen len Cristo Jesúsēn', na' Criston' nse'e yela' sina' che Diosen' na' naque' la'zelagüe bene' güen bene' laždao' xilaže'. Na' dan' naccho txen len Criston', chone' chio' yela' sina' chen', na' yela' bene' güen chen', na' yela' bene' laždao' xilaže' chen', na' ba beque'e xtoła'chon'. ³¹ Da'nān' Xtiža' Diosen' nyojen žan: "Bi cheyała' gonxen cuincho san gonxencho Xanchon'."

2

Pablo be'e xtiža' Criston' ben' gosote' le'e yag cruz

¹ Bene' migw, cate' bedetixjue'eda' xtiža' Diosen' len le'e, bitw bia' diža' zdebe da' bi gwejni'ile na' gague bia' diža' xdan cont gaquele naca' bene' sina'. ² San bechoglaža' be'lēna' le'e diža' che Jesucriston' can' bnežjw cuine' gosote'ne' le'e yag cruz neche xtoła'chon', na' bi be'lēna' le'e bichle diža'. ³ Na' cate' gwzoa' len le'e goebe'eda' bibi chac gona', na' leca bžeba' na' goła' gwxyzā' bena' xbab še bi gwzenagle xtižan'. ⁴ Na' diža' da' be'lēna' le'e gague bian' len yela' sina' che benachen' cont co'oyela' le'e gwzenagle chia', san Spiritw

che Diosen' goclenen neda' len yela' guac chen na' benen cont bzenagle.
⁵ Goclaža' šejnilaže'le Criston' gague neche yela' sina' che benachen', san neche da' gwša' Diosen' xbab chelen' len yela' guac chen'.

Spiritw che Diosen' chonen yela' chejni'i

⁶ Na' len bene' ba zjayolagüe' chosozenague' che Diosen' choe'cho diža' sina' da' za' che Diosen', bi zan' che yežlio nga ne che bene' blao o bene' gwnabia' zjanita' na'a, le te che bene' ca' na' te che yela' sina' chegaquen'. ⁷ Diosen' ba bzejni'ide' neto' to yela' sina' da' nono gwyejni'i cani', to da' bi'e xnezen' gac cate' bina' xe yežlion', le cana'te bi'e xnezen' yid Criston' yeque'e xtoła'chon' cont soacho mbalaz toli tocañe. ⁸ Na' ne toze bene' gwnabia' bene' že' yežlio nga bi gosejni'ide' yela' sina' che Diosen', le šaca' gosejni'iden', bi bosode'e Xancho Jesucriston' ben' nac bene' zaca' juisyw le'e yag cruzen' še ca'. ⁹ Na' Xtiža' Diosen' da' nyojen žan:

Nono zoa bene' ba ble'ede' da' güen da' gon Diosen' len bene' ca' chesacde' le'.
 Nono na' yende' diža' can' gone',
 neca na' yesone' xbab lo' lažda'ogüen' can' gaquen'.

¹⁰ Perw Diosen' ba bene' cont Spiritw chen' bzejni'in chio' can' gone', le Spiriton' chejni'in tcho'a yogo' da' chon Diosen', na' nezen da' ngaše' len benachen'.

¹¹ Can' naquen len benachen', nono neze bi xbab chon bene' yoble, con to tocho nezecho bi xbaden' choncho. Na' ca'cze naquen len Diosen', con Spiritw che' na'zen' nezen bi xbab chone'. ¹² Na' Diosen' ba bene' chio' Spiritw chen' cont nezecho yogo' da' güen da' chon Diosen' len chio' lagüe nži'ilaže'de' chio'. Da'n'an' bi choncho xbab can' cheson bene' bi chosozenag che Diosen'. ¹³ Na' cate' choe'lento' le'e xtiža' Criston', gague choe'to' diža' len yela' sina' cheton', san choe'to' diža' da' bzejni'i Spiritw che Diosen' neto', na' bene' ba yo'o Spiritw che Diosen' lo' yichjlažda'ogaquen', legacze' chesejni'ide' da' chsed chlo'eto'ne'.

¹⁴ Na' bene' bi yo'o Spiritw che Diosen' lo' yichjlažda'ogaque' bi chesejle' che diža' da' chon Spiritw che Diosen' neto' da' choe'to' len legaque', san chesacde' naquen to da' bibi zaca'. Na' bi chesejni'ide', le bi yo'o Spiriton' lo' yichjlažda'ogaque' cont gaclenen legaque' yesejni'iden'. ¹⁵ Na' cate' yo'o Spiritw che Diosen' lo' yichjlažda'ochon' chacbe'echo che bite'teze še naquen da' zaca', perw bene' bi yo'o Spiritw chen' lo' lažda'ogaquen', bi zaca' yesene' še da' choncho naquen da' zaca'. ¹⁶ Na' Xtiža' Diosen' da' nyojen žan: "Nono zoa chejni'i xbab che Diosen' cont gwzejni'ide' Diosa'." Perw Diosen' ba bene' chio' Spiritw che' cont šejni'icho xbab che Criston'.

3

Gaccho txen len nochle bene' cheson xšin Diosen'

¹ Bene' migw, bi goc gua' xtiža' Diosen' len le'e can' chona' len bene' chosozenag che Spiritw che Diosen', le ne' chzenagle che xbab chezle. Da'n'an' zaca'leble ca' bidao'. ² Cate' gwzola' be'lena' le'e xtiža' Diosen' žinten ža' na'aža, bina' šejni'ile da' ca' chaclaže' Diosen' šejni'ile. Da'n'an' ba bsd blo'eda' le'e da' bi naquen zdebe šejni'ile. ³ Chzenagle che xbab chezle na' da'n'an' bi chac šejni'ile xtiža' Diosen' da' naquen zdebe. Da' chgue'e lježle na' chdile chšaše, nacbia' chzenagle che xbab chezle can' cheson bene' bi chesejnilaže' Criston'. ⁴ Chnia' chonle ca' bene' bi chesejnilaže' Diosen', le balle žale: "Nacto' txen da' chsed chlo'e Pablo", na' yeballe žale: "Nacto' txen da' chsed chlo'e Apolos."

⁵ Le gon xbab chia' neda' Pablo na' che Apolosen', con nacto' bene' güen xšin Dios. Na' Diosen' bene' cont gwyejni'laže'le Xancho Criston' cate' be'lento'

le'e xtižen', na' lecze gwleje' to to neto' cont gonto' con da' chnalaže'. ⁶ Neda' zaca'leba' ca to bene' goz, le be'lena' le'e xtiža' Diosen' da' nechw, na' Apolosen' zaca'lebe' ca' bene' chyilen, le bsed blo'ede' le'e gwdechle. Na' toz Diosen' chone' cont chac cosešen'. Ca'cze goc len le'e, Diosen' bene' cont gwyejle'le xtižen' da' be'lento' le'e. ⁷ Bitec bi zaca' neda' da' be'lena' le'e xtiža' Diosen' da' nechw, na' neca Apolosen' da' bsed blo'echde' le'e, san Diosen' zaca'chgüe' da' bene' cont gwyejle'le xtižen'. ⁸ Bene' chyixjue'ede' xtiža' Diosen' da' nechw na' bene' chyixjue'eden' da' gwchope txen chesone' xšin Diosen'. Na' Diosen' gone' cont to toe' yesenite' mbalaz con can' gosone' xšine'na'. ⁹ Neto' chzejni'ito' le'e xtiža' Diosen', guac nacho nacto' bene' goz go'oñ che Diosen' na' le'e nacle yežlio gan' chac žinna'.

Na' le'e chdop chžagle chonxenle Criston' lecze zaca'leble ca to yo'o che Diosen'. ¹⁰ Na' guac nacho neda' naca' to bene' chac chon yo'o na' neda' bxia' len yo'ona', le Diosen' goclene' neda' cont bxia' xšinen' gan' zoalen'. Na' na'a nita' bene' yoble choszejni'ide' le'e, na' guac nacho chesebeque' ze'en. Na' note'teze bene' chacde' gone' xšin Diosen' cheyala' gonyane' xbab še xšinen' gonen txen len lene yo'o dan' ba gwlecan'. ¹¹ Na' nono gac cuec bichle lene yo'o, le ba gwlecan', na' Jesucristo bene' chejnilaže'cho, len' nacho naque' lene yo'ona'. ¹² Na' bite'teze ze'e da' chozoa bene' lo lene yo'ona', chchejen con nac nonen', še nonen' de oro, de plata, de yej da' zaca', de yag o de yix o de dod. Na' ca'cze nac bite'teze da' choncho chaquecho chonchon par Diosen', chchejen še naquen da' zaca'. ¹³ Na' cate' žin ža yid Criston', gone' cont gacia' che da' ben to tocho še naquen da' zaca' o še bitw naquen. Na' yogo' da' bencho da' bi naquen da' zaca', Diosen' yonitlagüen' len yi' che'na' can' chac che to yo'o de yag, de yix o de dod cate' cheyen. ¹⁴ Na' še bencho da' naquen da' zaca', lenna' bi yeniten, na' Diosen' gone' cont soacho mbalaz da' benchon. ¹⁵ Na' še dan' benchon' bi naquen da' zaca', da' ca' benchon' yesebiayin' lo yi' che Diosen' na' bitec soacho mbalaz, con nacchguaze gac yechojcho bi šeycho.

¹⁶ ¿Ba beyanlaže'le chio' chdop chžagcho chonxencho Jesucriston' yogo'cho txen zaca'lebcho ca to yodao' gan' chesonxene' Diosen'? ¿Ba beyanlaže'le zoa Spiritw che Diosen' len chio'? ¹⁷ Na' še no gone' cont chio' chdop chžagcho chonxencho Criston' cuejyichjcho diža' li chen', Diosen' gwnežjue' castigw toli tocañe che bene' gon ca', le Diosen' zoe' len chio' na' naccho lo ne'e.

¹⁸ Bi siye' cuinle. Note'tezle še chaquele nacle bene' sina' len yela' sina' che yežlio nga, cheyala' gache'ele yela' sina' chelen' bi gaclenen le'e len Diosen'. Na' cheyala' gacle ca to bene' bibi chejni'i cont Diosen' gone' le'e yela' sina' chen'. ¹⁹ Bene' bi chesejnilaže' Diosen', yela' sina' chegaquen' bi naquen da' zejen len Diosen'. Na' Xtiža' Diosen' nyojen žan: "Bene' ca' chesacde' zjanaque' bene' sina', Diosen' gone' cont yela' sina' chegaquen' gwžiayin' legaque'." ²⁰ Na' yeto gan' nyojen žan: "Xancho nan' nezde' da' yesede che xbab che bene' sina' ca'." ²¹ Da'nan' bi cheyala' ga'laže'le da' nacle txen len note'teze bene' chsed chlo'ede' le'e, le yogo'lol bi da' de zjanaquen chele cont yesaclenen le'e. ²² Neda', len Apolosen', na' len Pedron', gwse'la' Diosen' neto' cont chaclento' le'e. Na' yežlio nga na' yela' mbanna', na' yela' goten', na' da' de na'a na' da' gata' bate'teze, yogo' da' ca' zjaden cont yesaclenen le'e. ²³ Na' nacle lo na' Criston' na' Criston' naque' lo na' Diosen'.

4

Da'yo'o lo na' postlw ca' yesone'

¹ Cheyala' gache'ele neto' ba gwduxjue'eto' xtiža' Diosen' len le'e nacto' bene' güen xšin Diosen'. Diosen' ba bzejni'ide' neto' da' nono gwneze cani' cont

gwšed gwlo'eton' bene'. ² Na' chonen byen gonto' con can' ngüe'e lo na'to' gonto'. ³ Na' ca naca' neda', bibi nonen len neda' še no justis che yežlio nga o še le'e nale bi chona' can' cheyała' gona'. Na' neca chnia' che cuina' še chona' can' cheyała' gona'. ⁴ Lo' lažda'ogua' chacda' bibi doła' napa' len bite'tez da' chona', perw gague da'nana' na Diosen' chia' bibi xtoła' de. Xancho Jesucriston' ne' še chona' can' cheyała' gona' o še bi chonan'. ⁵ Da'nana' bi cheyała' žialaole nale che note'teze bene' še chone' can' cheyała' gone' o še bi chone'. Caten' yid Xancho Criston' yeto, canan' gone' cont nezecho da' nono neze na'a, na' gone' cont gache'echo can' nac xbab da' yo'o lo' yichjlaždao' benachen'. Na' cana' na Diosen' še nocho chon güen.

⁶ Bene' migw, ba be'lena' le'e xtiža' Apolosen' na' xtiža' cate' bzejni'ida' le'e, cont soale gonle can' ža Xtiža' Diosen', le bi cheyała' ga'laže'le da' nacle txen len to bene' chsedde' le'e na' gue'ele yetoe'. ⁷ Na' žbixchen' chaquele zaca'chle ca yezica'chle bene'? Diosen' bene' yogo' da' de chele, na' da' ben Diosen' yogo' da' de chele, bi cheyała' ga'laže'le. ⁸ Chacljele bibi chyažjele na' chacljele ba nacle bene' zaca'chgua len Diosen' na' guac nabia'le ca no rey, na' chaquele bi chyažjele neto'. Yebeto' šaca' da' li nacle ca no rey can' chaquelen' cont soato' mbalaz txen len le'e. ⁹ Chacda' Diosen' ba bene' cont bene' že' yežlion' yesele'ede' neto' postlw ca bene' zjanac la'zelagüe bene' bibi zaca', ca bene' nchoglaon chegaque' yesate'. Na' benachen' len angl ben' že' gan' zoa Diosen' chesene'e can' chac cheto' ca to bene' chne'e to da' yežejde'. ¹⁰ Na' da' chonto' xšin Criston' da'nana' bene' zan chesacde' bibi zaca'to', perw le'e, dan' ba chejnilaže'le Criston' chaclaže'le yesacde' nacle bene' sina'. Chesacde' bibi chac gon neto', perw le'e chaclaže'le yesacde' guac gonle bite'teze. Chesonxen bene' le'e na' chesegue'ede' neto'. ¹¹ Ža na'aža zan ni'a chdeto' gwbin chbil chdonto', bibi xalana'to' de, chesebaže' bene' neto' na' bibi ližto' de. ¹² Len ni'a na'to' chonto' žin cont chacbanto'. Cate' chesezi'diža' bene' neto', con chnabto' nite' mbalaz, na' cate' chosoči chososaque' neto', chyo chchejto' bi da' chesonde' neto'. ¹³ Cate' chesene' cheto', chol güižto' legaque' diža' šagüe'. Na' ža na'aža nita' bene' zan chesonde' neto' ca to no beb dao' o to no da' naquen zban da' ba becho'onen.

¹⁴ Chzoja' da' nga gague cont gaquele zto' san cont gwzejni'ida' le'e, le nacle ca xi'ina' na' chacda' le'e. ¹⁵ Na' la'czla' bene' zan yesaclaže' yososed yosolo'ede' le'e che Criston', bi yesenita' zane' yesacde' le'e ca xale. Perw neda' naca' ca xale, le neda' gwžialagua' gwduxjue'eda' le'e diža' güen che Jesucriston' cont chejnilaže'lene'. ¹⁶ Na' da'nana' chneyoeda' le'e gonle can' chonan'.

¹⁷ Da'nana' chsela' Timoteon' gan' zoalen'. Lecze ba nona'ne' ca xi'ina', le bzejni'ida'ne' cont chejnilaže' Xancho Jesucriston', na' zoacze' chone' can' cheyała' gone'. Na' chsela'ne' cont šjayse'ede' laže'le can' gwzoa gwleza' šlac bzejni'ida' le'e che Criston', na' da' bzejni'ida' le'e naquen lebe len da' chzejni'ida' bene' gate'teze chesedop chesežague' chesonxene' Criston'. ¹⁸ Na' balle cha'laže'le chaquele bich yida' gan' zoalen'. ¹⁹ Perw chacda' yob yida' gan' zoalen' še Diosen' gonšque' latje. Na' cate' yida', cana'ch yedena'a bene' ya'laže' ca' še yesone' can' chesenen'. ²⁰ Cate' Diosen' chnabi'e yichjlaždao' bene', dan' chesonen' chlo'en yela' guac chen', gague xtiža'gaque' na'zen' gwlo'en še chnabi'e yichjlažda'ogaque'. ²¹ žNac chaclaže'le gona'? žYida' gan' zoalen' na' gona' le'e castigw, še yida' gwlo'a chacda' le'e na' yedeya' diža' šagüe' len le'e? Le gon xbab naquen' chaclaže'le yedeyena'.

To bene' gwzoalene' xna'zie' ca xo'ole'

¹ Chesene' to le'e zoalenle xna'zile ca xo'olle. Da' nga naquen to yela' zto' xen, ne bene' ca' bi chesonxen Diosen' bi chžinlaže' yesone' ca'. ² Na' la'czla' tole chonle da' malen' nac ca', chaquele güenchgua chonle lao Diosen'. Cheyala' yegüine'le na' cheyala' yebejle ben' chon ca' len le'e. ³ La'czla' bi zoa' na' len le'e, zoaczcho txen na' ba gwchoglagua' can' cheyala' gonle len ben' chon da' malen', can' gonle la'czla' ca zoa' len le'e. ⁴ Nach cate' ndop nžagle chonxenle Xancho Jesucriston', le gon xbab naccho txen, na' zoacze Xancho Jesúsén' chaclene' le'e len yela' guac chen'. ⁵ Nach le cuej ben' ca'ale na' le gone' lo na' Satanás dan' chnabia' da' xigüe' ca' cont gonen can' chaclažen' len le'. Le gon ca' cont še yoša'šca yichjlažda'ogüe' na' bi cuiaye'e toli tocanē cate' žin ža yid Xancho Jesúsén' yeto.

⁶ Bi cheyala' gaquele chonchguale güen lao Diosen'. ¿Bi chacbe'ele chcha'o da' malen' cate' cho'echo latje, can' ža diža' dan' chesene': "Late'ze levadura da' chosočhine' cate' chesone' yetextil chonen cont cheyas doxen cuazin"?" ⁷ Bene' Israel gualaž cheto' bi chesagüe' yetextil da' nchixen levadura lo lni pascw cheto' na' bi cheso'e latje yega'an ne late'ze levaduran' lo ližgaque' lo lni'. Na' ca'cze chio' chejnilaže'cho Criston' bi cheyala' güe'cho latje šo' da' malen' yichjlažda'ochon'. Cheyala' cuejyichjcho yogo' da' malen' cont gaccho ca to bene' cobe, le Criston' bnežjw cuine' gote' cont bocobe' yichjlažda'ochon', na' len chio' Criston' zaca'lebe' ca to be gosot bene' Israel gualaž cheton' lo lni pascon'. ⁸ Da'nan' cheyala' cuejyichjcho bite'teze da' mal, cont gaccho ca to bene' cobe, soacho do yichj do laže'cho na' goncho da' zej to li.

⁹ Cana' bzoja' to cart gwnia' bi cheyala' soacho binlo len bene' chosoza xtoe' na' bene' cheson bichle da' nac da' yela' zto' len cuerp chegaque'. ¹⁰ Gwnia' bi gac soacho binlo len bene' cheson da' nac yela' zto', na' bene' chesezelaže' bi da' de che bene', na' bene' cheseque'e da' de che bene' na' bene' chesonxene' l gua'a lsaca'. Na' can' gwnia' bi gac soacho binlo len legaque', cho'a diža' che ljež chio' chejnilaže'cho Criston'. Le šaca' choa' diža' bi gac soacho binlo len note'tez bene' cheson ca', bich gac bi goncho lo yežlio nga še ca'. ¹¹ San da' žia' cheyala' goncho, bi soacho binlo len to bene' lježcho bene' chejnilaže' Criston' še nzoa xtoe' o še chone' bichle da' nac da' yela' zto' len cuerp che', o še chzelaže' da' de che bene', o chejnilaže' l gua'a lsaca', o chzi'diže' bene', o naque' bene' borrašw o bene' gwban. Neca cheyala' gagwlencho bene' lježcho bene' cheson ca'. ¹² Bi naquen checho chogbi'acho che bene' bi chesejnilaže' Criston' še da' chesone' naquen güen o naquen mal, san chio' chdop chžagcho chejnilaže'cho Criston' cheyala' chogbi'acho che lježcho še chesontez da' mal. ¹³ Na' Diosen' chogbi'e che xtoła' bene' ca' bi chesejnilaže' Criston', san le'e, le yebej bena' gwnia' chon da' malen' ladjwle.

6

Bene' Corinto chesejnilaže' Criston' chesagüe' xya che lježgaque' lao justis ca'

¹ Chebanda' chele can' chonle da' chagwle xya tole yetole na' chjana'le bene' bi chosozenag che Diosen' cont chesone' yela' justis chele. Cheyala' nabe lježle le'e ba gwlej Diosen' nacle lo ne'e cont legaque' yesone' yela' justis chele. ² ¿Bi nezele žin ža cate' chio' naccho lo na' Diosen' goncho yela' justis che yezica'chle bene' že' yežlio nga? Na' še goncho yela' justis chegaque', guac goncho yela' justis che bi da' dao' da' bitec zjazaca'. ³ Na' lecze žin ža goncho yela' justis che angl ca'. Na' naquechxe goncho yela' justis che bi da' cheson bene' lo yežlio nga. ⁴ Na' cate' gagwle xya che lježle, bi šejle lao bene' bi chesejnilaže' Criston' cont yesone' yela' justis chele, le xbab chegaquen' bi naquen da' zaca'chgua

len chio' chejnilaže'cho Criston'. ⁵ Žia' ca' cont yeto'ele che dan' chonle na' bich gonle ca'. ¿Ne tole bi nacle bene' sina' cont gon yela' justis che lježle cate' bi chac chele? ⁶ ¿Da'nan' chjatagwle xya che lježle len justis ca' bene' bi chesejnilaže' Criston'?

⁷ Da' chacyož len lježle na'zen' chlo'en leca clelen' chonle. Mbalazech zoale šaca' chdele ca'ale še bi da' chone bene' lježlen' le'e. Yejni'a güe'le latje yeseque'e bi da' de chele. ⁸ Perw le'e chca'ale bi da' de che lježle na' da' zan da' chone lježle.

⁹ ¿Bi nezele bene' ca' zjanaque' bene' mal lao Diosen' bi yesyežine' yaban' gan' zoa Diosen' chnabi'e? Bi güe'le latje no gonle le'e. Nita' bene' chosozoa xtoe' na' bene' cheson bichle da' yela' zto' da' nac ca'. Na' nita' bene' chesonxen l gua'a lsaca'. Na' nita' bene' chesata'lene' no'ole bi nac no'ol chegaque' o bene' byo bi nac bene' chegaque', na' nita' bene' byo bxej. ¹⁰ Nita' bene' chesebane' na' bene' chesezelaže' bi da' de che bene', na' bene' borrašw, na' bene' chesezi'diža' lježgaque' na' bene' cheseziye'e bene' yoble cont yeseque'e da' de chegaque'. Na' ne to bene' chon da' mal dan' zjanac ca' bi yesyežine' yaba gan' zoa Diosen' chnabi'e. ¹¹ Balle benle da' mal dan' zjanac ca', perw na'a da' chejnilaže'le Xancho Jesúsen', Spiritw che Diosen' ba benen cont beyac lažda'olen' xilaže', na' benen cont nacle lo na' Diosen' na' cont nacle bene' güen len le'.

Cheyalá' goncho da' güen len cuerp chechon'

¹² Da' li can' chesena bene', de latje goncho bite'teze, perw nezecho gague yogo' da' gonchon' naquen güen. Na' la'czla' še de latje goncho bite'teze, bi cheyalá' güe'cho latje nabia' bi dan' gonchon' chio'. ¹³ Na' da' li can' chesena yebale', chesene': "Nsa' le'echon' par yela' guagw na' decze yela' guagw par gagwchon žinten lo' le'echo." Perw na' le'echon' len yela' guagon', chopten žin ža te chegaquen. Na' cuerp chechon' bi nsa'chon cont gata'len xtocho o goncho bichle yela' zto' nac ca'. San nsa'chon cont gonxencho Xancho Jesucriston'. Na' Xancho Jesucriston' lecze chaclene' chio' len cuerp chechon'. ¹⁴ Diosen' bosbane' Xancho Jesucriston' ladjo bene' guat ca', na' lecze žin ža cate' yosbane' chio' ladjo bene' guat ca' len yela' guac chen'.

¹⁵ ¿Bi nezele naccho txen len Criston' na' cuerp chechon' zjanaquen che'? Na' bi cheyalá' goncho cuerp chechon' da' nac che Criston' lo na' no no'ole zle'. ¹⁶ Note'tezle še chata'le len no'ole bi nac no'ol chele o bene' byo bi nac bene' chele, cuerp chelen' gaquen toze len cuerp chen', can' ža Xtiža' Diosen' da' nyojen žan: "Bene' ca' chope yesaque' toze cuerp." ¹⁷ Perw note'tezcho cate' chon cuincho lo na' Xancho Jesucriston', yichjlažda'ochon' chaquen toze len yichjlažda'ogüen'.

¹⁸ Da'nan' bi cheyalá' gata'lencho no'ole bi nac no'ol checho o bene' byo bi nac bene' checho o goncho bichle yela' zto' da' nac ca'. Yezica'chle da' mal ca' bitec chosožiyin' cuerp chechon', perw da' ca' zjanac ca' chosožiyin' cuerp chechon'. ¹⁹ ¿Bi chacbe'ele Spiritw che Diosen' zoan lo' yichjlaždao' to tocho ca' zoa to bene' liže'? le Diosen' ba gwsele' Spiritw chen' zoan lo' yichjlaždao' chio' chejnilaže'cho Criston', na' bi gac goncho con bi žan checho. ²⁰ Na' da' zaca' xen da' ben Xancho Criston' cont bechojcho lo na' gwxiyen'. Da'nan' cheyalá' goncho can' chazlaže' Diosen' len cuerp chechon' na' len yichjlažda'ochon', le chopten zjanaquen che'.

7

Pablon' cho'e diža' che yela' güešagna'

¹ Na' che dan' chñabele neda' le'e cart chelen', še bene' byon' bi chaclaže' si'e no'olen' gaque' xo'ole', güenna' chone'. ² Perw na' že' chgua bene' chesedalene' no'ole bi nac no'ol chegaque', na' bene' cheson bichle da' nac da' yela' zto' len cuerp chegaquen', na' da'nan' yejnī'a gwšagna'le na' to to bene' byo soa xo'ole' na' to to no'ole soa bene' che'. ³ Na' to to bene' byo cheyała' gone' da' naquen gone' len no'ol che' na' to to no'ole cheyała' gone' da' naquen gone' len bene' che'. ⁴ No'olen' bi gac ne' to gualaze' nac gone' len cuerp chen' na' neca bene' byon' bi gac ne' to gualaze' nac gone' len cuerp chen', san cheyała' yosozenag che lježe'. ⁵ Na' le'e nšagna'le bi gwžonle gonlen lježle da' cheyała' gonle len cuerp chelen', perw še naquen yela' güexi'a che choptele guaccze bi gonlen to term dao' cont soatezle yoł güižle Diosen'. Na' te termen' yezoalen lježle da' yoble, le Satanás dan' chnabia' da' xigüe' ca' co'oyelan' le'e gonle da' mal še leca žan soalen lježle.

⁶ Ba gwnia' yogo' da' ca' cont nezele de latje soa xo'olle, perw gague nacho chon Diosen' mandadw gwšagna'le. ⁷ Chebeda' šaca' soa yogo'le can' zoa' neda' nono xo'ola' zoa. Perw nža'le grasyw da' non Diosen' to tocho che bi da' goncho.

⁸ Na' le'e nac to gualazle, chacda' güench bi gwšagna'le, na' lecze le'e ba got bene' chele bi yošagna'le, san soale to gualazle can' zoa' neda'. ⁹ Perw še leca žan soalenle no'ole o soalenle bene' byo, yejnī'a gwšagna'le cont bi nabia' yela' chzelažen' le'e.

¹⁰ Na' le'e no'ole le'e nšagna'le, chona' mandadw bi yela'ale len bene' chelen'. Na' gague neda'ze žia' ca', le naquen da' chon Xancho Criston' mandadw. ¹¹ Na' še no'olen' yele'e len bene' che', cheyała' soa to gualaze' bi yeque'e bene' yoble o cheyała' yeyeje' šjayzoalene' bene' che' da' yoble. Na' lecze le'e bene' byo le'e nšagna'le, bi yela'ale len xo'ollen'.

¹² Na' le'e bene' yezica'chle, nia' can' chona' xbab cheyała' gonle, la'czla' Xancho' bibi gwne' che da' ca'. To to le'e bene' byo še ba nšagna'lenle no'ole bi chejnilaže' Criston' na' chaclaže' soalencze' le', bi cheyała' yela'ale len le'. ¹³ Na' to to le'e no'ole še ba nšagna'lenle bene' bi chejnilaže' Criston' na' chaclaže' soalene' le', bi yela'ale len le'. ¹⁴ Bi naquen mal lao Diosen' soalenle bene' chele o no'ol chele bene' bi chejnilaže' Criston', le Diosen' chi' yichje' choptele dan' chejnilaže'lene' tole. Šaca' bi naquen ca', xi'inle ca' zjanacbe' ca' xi'in bene' bi chesejnilaže' Diosen', perw gague can', le lente legacbe' chi' yichj Diosen' dan' chejnilaže'lene' tole. ¹⁵ Perw še bene' chele o no'ole chele bi chejnilaže' Criston' na' bich chaclaže' soalene' le'e, le yela'a, le Diosen' chaclaže' soacho binlo len lježcho. ¹⁶ Na' le'e no'ole še gonle güen len bene' chele na' le'e bene' byo še gonle güen len no'ol chelen', guacte gonen cont yesejnilaže' Criston'.

¹⁷ To tocho cheyała' soacho goncho da' non Xancho Diosen' lo na'cho goncho cate' gwleje' chio' naccho xi'ine'. Chona' mandadw yesone' ca' gate'teze chesedop chesežague' chesonxene' Criston'. ¹⁸ Še ba zoale señw dan' že' circuncisión cate' gwlej Diosen' le'e nacle xi'ine', bi gonle cont yenit señoñ'. Na' še bina' soale señoñ' cate' gwlej Diosen' le'e nacle xi'ine', bi nable yosozoe' le'e señoñ'. ¹⁹ Bibi nonen len Diosen' še nsa'cho señw che circuncisión o še bi nsa'chon. Da' naquen da' zeje, cheyała' goncho con bi chaclaže' Diosen'. ²⁰ Con can' naccho caten' gwlej Diosen' chio' naccho xi'ine', ca'tezeczen' cheyała' soa cuzcho. ²¹ Še nacle esclavo cate' Xancho Diosen' gwleje' le'e, bibi sa'laže'le che dan'. Perw še guata' latje chixjwle cont chojle lo na' xanlen', le chixjon na' yechojle. ²² Na' la'czla' še nacle esclavo che bene' cate' Xancho Criston' gwleje' le'e, Criston' ba naque' Xanle na'a, gague beñachen'. Na' chio'

bi_{na}' gaccho esclavo che bene', nac Criston' X_{an}cho, na' guac nacho naccho esclavo che'. ²³ Da' zaca' xen da' ben X_{an}cho Criston' cont bechojcho lo na' gwxiyen'. Da'nan' bi cheya_{la}' goncho xbab no be_{na}ch naque' x_{an}cho. ²⁴ Bene' migw, da' yoble žia' le'e, con can' naccho cate' gwlej Diosen' chio' naccho xi'ine', can' soa cuezcho, le lao Diosen' chzoa chbezcho.

²⁵ Na' can' cheya_{la}' gac che no'ol güego' ca', X_{an}cho Criston' bi bene' mandadw can' gac chegacbe', perw neda' n_{ia}' can' chacda' cheya_{la}' gac, na' ba beyaše' beži'ilaže' X_{an}chon' neda', na' da'nan' diža' da' choa' zaca'czen gwzenagle chen. ²⁶ Ba za' da' saca'zi'cho na'a, na' da'nan' chacda' güen_{ch} soa cuezcho con can' ba zoacho. ²⁷ Le'e nšagna'le, bi yela'ale len xo'olle, na' le'e bi_{na}' soa xo'olle, bi chiljw xo'olle. ²⁸ Perw bi nacho naquen mal še gwšagna'le, na' n_{eca} naquen mal še no no'ol güego' gwšagna'. Con da' zan da' zed de yežlio nga che bene' zjanšagna', na' chaclaža' bi gac chele ca'.

²⁹ Bene' migw, chaclaža' n_{ia}' le'e da' nga: Bich chega'an yezan iz cont goncho dan' ngüia Diosen' goncho. Da'nan' le'e zoa xo'olle cheya_{la}' soale gonle xšin Diosen' ca bene' nono xo'ole' zoa. ³⁰ Na' še de da' yegüine'le, cheya_{la}' soale gonle xšin Diosen' ca bene' bi chegüine'. Na' še zoale mbalaz, cheya_{la}' soale gonle xšine' ca bene' bi zoa mbalaz. Na' še si'le bi da' si'le, cheya_{la}' soale gonle xšin Diosen' ca bene' bibi gwxi'e. ³¹ Na' še bi da' chchinle da' de yežlio nga, bi cheya_{la}' cue' yichjle che len, le da' te che yogo' da' chle'echo yežlio nga.

³² Na' chaclaža' bi cue' yichjle che da' ca' chac yežlio nga. Bene' nono xo'ole' zoa nlatje' gone' xbab che xšin X_{an}cho Diosen' na' che bi da' chaclaže' X_{an}chon' gone'. ³³ Perw bene' nšagne'e chi' yichje' che da' chac yežlio nga, le chone' xbab che bi da' chaclaže' xo'olen' gone', na' gague gac gone' xbab che toz Diosen'. ³⁴ Na' lecze nža' can' chac che no'ole nšagna' na' che no'olen' bi nšagna'. No'ole bi nšagna' mbec yichje' che xšin X_{an}cho Diosen' na' chon cuine' lo ne'e do yichj do laže'. Na' no'ole nšagne'e chbec yichje' che da' chac yežlio nga na' bi da' chaclaže' bene' che' gone'.

³⁵ Ba gwnia' ca' gague cont gwžona' gwšagna'le san cont gaclena' le'e. Con chaclaža' gaquele X_{an}cho Diosen' do yichj do laže'le sin cbi gwžonen gonle can' chazlaže'.

³⁶ Na' še to bene' chacde' cheya_{la}' güe'e latje gwšagna' xi'ine' no'ole, na' še no'olen' ba ngole' na' chaclaže' gwšagne'e, nacczen güen gone' can' ba gwchoglaže' gone' na' güe'e latje gwšagna' xi'inen'. Bi naquen mal gwnežjue' xi'ine' no'olen' bene' chnabe' le'. ³⁷ Perw še zoa to bene' chacde' güen_{ch} nono si' xi'ine' no'olen' na' bi nacho chonen byen gwšagna'be', nacczen güen gone' can' chazlažen' na' bi gwnežjue' bi' chen' gwšagna'be'. ³⁸ Can' naquen, bene' chnežjue' bi' chen' chšagna'be' chone' güen, na' bene' bi chnežjue'be' chone' güen_{ch}.

³⁹ Na' note'teze no'ole nšagna', cheya_{la}' soe' len bene' che'. Perw še ba got bene' che', guac yeque'e bene' yoble, con še bene' chejni_{la}že' X_{an}cho Criston'. ⁴⁰ Perw chacda' neda' soache' mbalaz še yega'ane' to gualaze', na' chacda' xbab chian' naquen toze len xbab che Spiritw che Diosen'.

8

Yela' guagw da' chosožia bene' lao l gua'a lsaca' chesejni_{la}že'

¹ Na' gwñable nac cheya_{la}' goncho len yela' guagw da' chosožie' lao l gua'a lsacan' chesejni_{la}že'. Da' li yogo'cho chejni'icho bibi zjazaca' l gua'a lsaca' ca'. Na' cate' choncho xbab che da' chejni'icho, con chonxen cuincho, perw cate' chaque lježcho, cheyiljwlaže'cho nacle goncho cont gaclen lježcho. ² Na' še chaquecho ba gwejni'icho to da' zejen, cheya_{la}' gacbe'echo bibi de da'

chejni'icho ca cheyała' šejni'ichon. ³ Perw cate' chaquecho Diosen', nachle Diosen' nombi'e chio'.

⁴ Gwnable še guac gagwcho yela' guagw da' chosožia bene' lao l gua'a lsacan' chesejnilaže'. Nezecho l gua'a lsaca' ca' bibi zjazacan', na' toz Diosen' zaque' šejnilaže'chone'. ⁵ Da' li de da' zan da' chesena benachen zjanaquen xangaque' da' chesejnilaže'. Na' la'czla' nita' bene' chesejnilaže' da' de yaba na' yežlion' chesene' da' ca' zjanaquen xangaque', ⁶ chio' nezecho toze Xacho Diosen' zaque' gonxencho, na' le' bene' cont gwxe yogo'te da' zjade na' zoacho cont gonxenchone'. Na' nezecho toze Jesucriston' naque' Xancho, na' le' bene' yogo' benach, beyixe' na' bichle da' zjade, na' le' chone' yela' mban checho.

⁷ Gague yogo' bene' lježcho bene' chesejnilaže' Criston' chesejni'ide' da' nga nezecho. Bale' zjayolagüe' chesone' xbab bene' zaca' l gua'a lsaca' ca', na' cate' chesagüe' yela' guagw da' ba bžia bene' lao l gua'a lsacan', chesacde' chesagüe' da' naquen che l gua'a lsacan'. Da'nana' lo' yichjlažda'ogaque' chesacde' malen' chesone', le bina' yesejni'išagüe'de' naquen' naquen. ⁸ Na' yela' guagon' bibi zaca' gonen cont yebe Diosen' chio', neca chžonen yebede' chio' še bi gagwcho to yela' guagw o še gagwchon'. ⁹ Perw bal bene' bina' yesejni'išagüe'de' gague bi nonen len Diosen' še bin' ye'ej gagwcho. Na' neche legaque' cheyała' gwsaca'cho can' goncho cont bi goncho ca yeselažoe' lo da' malen' neche dan' che'ej chagwchon'. ¹⁰ Le'e nezele nono nac l gua'a lsaca' ca', na' da'nana' guac cue'le ye'ej gagwle ga chesone' lni che l gua'a lsacan' sin cbi bi doła' gapple. Na' bene' bina' šejni'ide' cate' le'ede' che'ej chagwle da'na', nach gacde' lecze guac gone' ca', perw lo' yichjlažda'ogüe' gacde' da' malen' chone'. ¹¹ Na' guacte gwžiai'cho bene' lježcho yela' chejni'i checho, la'czla' Criston' bnežjw cuine' gote' neche le'. ¹² Cate' choncho cont bene' lježcho chesone' to da' ža yichjlažda'ogaque' naquen da' mal, choncho contr Criston' še ca'. ¹³ Da'nana' chnia' še dan' chagua' bela' chonen cont bene' lježa' lažoe' lo da' mal, gwbatech gagua'ba' cont ca lažoe' lo da' malen'.

9

Pablon' že' naque' dogualje postlw

¹ Nezele neda' naca' postlw na' guac naba' gonele neda' ca chonle len yezica'chle postlw ca'. Neda' ble'eda' Xancho Jesúsena' na' bena' xšine' gan' zoale na' da'nana' chejnilaže'lene'. ² Na' la'czla' še yezica'chle bene' bi chesejle'e naca' postlw, perw le'e chejle'le chia', le da' chejnilaže'le Xanchon' ben' gwsela' neda', chlo'en da' li naca' postlw.

³ Quinga choži'a xtiža' bene' ca' chesene' bi gwsela' Diosen' neda' naca' postlw: ⁴ Guac naba' yeson bene' da' ye'ej gagua' šaca' chaclaža' gona' ca'. ⁵ Na' guac gwšagna'lena' no'ole chejnilaže' Criston', na' yechi'ane' gan' šjena' xšin Diosen', can' chon Pedron', na' can' cheson yezica'chle postlw ca' na' can' cheson bene' biše' Xanchon'. ⁶ Bixchen' neda' len Bernaben' lao yogo' postlw ca' chonto' žin len ni'a na'to' cont si'to' da' ye'ej gagwto' na' chixjwto' bichle gastw cheto' da' de šlac chyixjue'eto' xtiža' Diosen'?

⁷ Nono soldadw zoa bene' nacho cuinze' chyixjue' gastw che'. Na' nono gaz yag uvas še bi gagüe' uvasen' cate' chbian. Na' lecze ca' nono bene' chyoe šib xila' ca' nacho bi che'eje' late' xiže'ba' cate' chsien'. ⁸ Na' dan' žia' nga bi naquen con xbab cheza', le lez can' ža ley dan' bzoj da' Moisésena'. ⁹ Quinga bzoje' le'e ley: "Bi gwseyjwle cho'a go'n ca' šlac chosolej chosošošjba' trigon' cont choj xen." Na' gague da' chi' yichj Diosen' che go'n ca' bene' cont byojen žan ca'. ¹⁰ San že' ca' chzejni'icзде' chio' che bene' ca' cheson xšin Diosen'. Da'nana' že' bene' chgua'ane' go'n na' bene' chonšagüe' trigw cheyała' yesenite'

lez yesezi'e late' güeje cosešen'. ¹¹ Na' ca neto' ba bzejni'ito' le'e xtiža' Diosen', le gon xbab Źnaquen da' zcha'och ca da' cheyala' gonle šaca' gonle da' ye'ej gagwto' na' bichle da' chyažjeto'? ¹² Naquen da' cheyala'cze gonle dan' choe'le da' cheseyažje yezica'chle bene' chososed chosolo'ede' le'e, perw nacchen da' cheyala' gonle gonle neto' da' chyažj chchine neto' clel ca legaque'.

Perw bi gwñabto' gonle neto' da' chyažj chchineto'. Chyo chchejlaže'to' bite'teze da' chac cheto' cont bibi gwžon šanch le'e gwzenagle diža' güen che Criston'. ¹³ Nezele bene' cheson mandadw lo' yodao' che neto' bene' Israel chesachane' len da' chosonežjw bene' Israel gualaž cheton' che yodaon', chosyocua'ane' late' güeje beyixe' ca' chesote' lao Diosen' chesagüe'ba'. ¹⁴ Na' ca'czen' non Xancho Criston' mandadw, bene' chosozenag xtižen' cheyala' yosonežjue' da' cheseyažje ben' cheseyixjue'ede' diža' güen chen'. ¹⁵ Perw neda' bi gwñaba' gonle da' chyažj chchinda', na' gague chzoja' da' nga cont gonle ca'. Yejni'acle gata' clel ca naba' gonle da' chyažjda', le chebechgüeda' dan' bibi gan chona' chyixjue'eda' xtiža' Criston'.

¹⁶ Bi gac ñia' chona' to goclen cate' chyixjue'eda' diža' güen che Jesucriston', le Diosen' gwleje' neda' chyixjue'edan' na' chonen byen gona' can' že'na'. Nyaše'chguaze naca' neda' še bi chixjue'edan'. ¹⁷ Šaca' chona' to da' ža xbab chia' chyixjue'edan', guac ñia' zaca'czen sia' bi da' gonle neda' ca laxjua'. Perw chona' da' gwlo'o Diosen' lo' na' gona', na' gague chona' to da' ža xbab chezan'. ¹⁸ Na' še ñable bi hcua'añen len neda' da' chyixjue'eda' xtiža' Diosen', nach ñia' hcua'añen da' chbechgüeda' bibi laxjua' chzia' chyixjue'eda' xtižen', la'czla' zaca'cza' si' laxjua'.

¹⁹ Bi naca' xmos bene', perw chzexjw yichja' chon cuina' ca xmos yogo'te bene' cont šanch bene' yesejnilaže' Criston'. ²⁰ Cate' zoa' len bene' Israel gualaž cheton', chona' can' cheson legaque' na' chona' ca nac costumbr che ley dan' bzoj Moisés cont yosozenague' cate' güe'lena' legaque' xtiža' Diosen', la'czla' ñezda' bi chonen byen ga'oguan' cont soa' binlo len Diosen'. ²¹ Na' cate' zoa' len bene' bi zjanombia' ley dan' bzoj Moísesen', bi na'ogua' costumbr da' non leyna' mandadw, le chaclaža' yosozenag bene' ca' bi zjanombia' leyna' cate' choe'lena' legaque' xtiža' Diosen'. Perw bi ñacho chzoa' ca'ale dan' ža Diosen', le chzenaga' can' ža Criston'. ²² Na' cate' zoa' len bene' chesacde' da' zan bi de lsens goncho, bi chona' da' ca' chesacde' naquen mal goncho, la'czla' ñezda' bi naquen mal. Chona' ca' cont gac gwzejni'ichda' legaque'. Chon cuina' lebe len yogo'lol bene' cont gaclena' legaque' na' bale' yesejnilaže' Criston'. ²³ Chi' yichja' yosozenague' diža' güen che Criston' cont soa' mbalaz txen len yezica'chle bene' chosozenague' xtiža' Criston'.

²⁴ Nezecho cate' chosoxonj zan bene' cont choj to bene' gon gan, yogüe' chesa'acsese', la'czla' tozen' gon gan na' si'e premio. Na' ca chesa'acsese' bene' ca' do yichj do laže', ca' to to chio' cheyala' soacho gwzenagcho che Diosen' do yichj do laže'cho cont gone' soacho mbalaz cate' yežincho gan' zoen'. ²⁵ Bene' güitj ca' chosochejlaže' bi chesone' con can' ža cuerp chegaquen' cont chesaque' bene' gual, le chesaclaže' yesone' gan cate' yeseyitje' na' yesezi'e premio, la'czla' dan' chesezi'en naquen to da' te che. Na' chio', chzenagcho che Diosen' cont si'cho to da' güen da' bi te chen. ²⁶ Da'nan' bi gona' ca to bene' chxonj, to bene' bi ñezde' ga cheyala' yežine', o ca to bene' chdile' len ponet, bene' bi ñezde' ga cuaže'. ²⁷ Bi chzenaga' che da' mal cate' žan gona' da' mal len cuerp chian', san chona' con ga zelao chzoeda' cont chona' can' chazlaže' Diosen'. Le ñezda' še gwzenaga' che da' malen', bi yebe Diosen' neda' la'czla' ba gwdixjue'eda' xtižen' len bene' yoble.

10

Cheyala' na'yañe'cho cont bi goncho da' malen'

¹ Bene' migw, chaclaža' nezele Diosen' gwzoe' len yogo'lol da' xozxtao' neto' bene' Israel cate' besyechoje' Egipto, le yogüe' gosenite' xan to bejw gan' gwyo'o Diosen', na' Diosen' bene' cont yogüe' gosedie' nisdao' da' nzi' Nisdao' Xña. ² Na' yogüe' gosaque' txen len da' Moisésen' cate' gwche'e legaque' gan' gwžialao bejon' laogaque' na' cate' gosedie' nisdan'. ³ Na' yogüe' gosagüe' toze yela' guagw da' bnežjw Diosen' legaque'. ⁴ Na' yogüe' gose'eje' toze nis da' bnežjw Diosen' legaque'. Na' nis da' gose'eje' bchojen lo yej, na' guac nacho Criston' goque' yej gan' bchoj nisen', le Criston' gwyejlene' legaque'. ⁵ Na' la'czla' Diosen' goclene' yogüe', zane' bi gosone' cont yebe Diosen' legaque', na' da'n'an' gosebiaye'e latje dašen'.

⁶ Na' yogo' da' goc chegaque' chzejni'in chio' bi cheyala' selaže'cho goncho bi da' mal can' goson legaque'. ⁷ Da'n'an' chnia' le'e, bi šejnilaže'cho l gua'a lsaca' can' goson bal da' xozxta'oto' ca'. Le nyoj Xtiža' Diosen' žan: "Gosebi'e gose'ej gosagüe' na' gosenite' gosone' lni." ⁸ Na' lecze bi cheyala' gata'lencho no'ole bi nac no'ol checho o bene' byo bi nac bene' checho. Can' goson zan da' xozxta'oto' cani', na' da'n'an' šonechoa mile' gosate' yela' güen da' xinj chegaquen' lao toze ža. ⁹ Bi cheyala' goncho Xancho Criston' prueba še gone' can' ba gwnen'. Cani' bal da' xozxta'oto' ca' bi gosejle'e Diosen' gaclene' legaque' can' gwnen', na' Diosen' gwsele' bel znia gosotba' legaque'. ¹⁰ Na' lecze bi cheyala' bixjwcho len Diosen' can' goson bal da' xozxta'oto' ca' cani', na' Diosen' gwsele' to angl che' bene' betue' legaque'.

¹¹ Yogo' da' ca' gosac chegaque' zjanyojen le'e Xtiža' Diosen' cont chosozejni'in chio' nac cheyala' goncho zoacho na'a, le ba zoa yeyož yežlion'. ¹² Da'n'an' note'tezcho še chaquecho ba zoachachcho chejnilaže'cho Jesucriston', cheyala' na'yañe'cho naquen' goncho cont bi lažo'cho lo da' malen'. ¹³ Bite'teze da' mal da' žan goncho o da' chac checho, bi nacho zdebechle chac checho can' chac che note'teze bene'. Diosen' zoacze' chaclene' chio' can' žen', bi cho'e latje gac checho da' bi soecho. Na' chzejni'ide' chio' nac goncho cont soecho bi goncho da' malen'.

¹⁴ Da'n'an' bene' migw ben' chacda', le cuejyichj yogo' bi da' cheson bene' chesejnilaže' l gua'a lsaca' ca'. ¹⁵ Ba chejni'ile na' guac gonle xbab che da' quinga chzejni'ida' le'e cont šejni'ile choa' diža' da' zaca'. ¹⁶ Na' da' ca' che'ej chagwcho chjayze'echo bi zejen len chio' da' got Criston', choe'cho yela' choxclen che Diosen' cate' che'ej chagwchon. Na' dan' che'ejcho zejen chio' chejnilaže'chone' naccho txen len Criston' can' blalj xchene' cate' gosote'ne'. Na' dan' chagwcho late' güeje, zejen naccho txen len cuerp che Criston'. ¹⁷ Na' can' nac toze yetextil da' chzoxjcho chagw yogo'cho late' güejen, lecze ca' yogo' chio' chejnilaže'cho Criston' naccho toze len lježcho, le toze yetextilen' chagwcho txen.

¹⁸ Le gon xbab can' cheson bene' Israel gualaž cheto' ca', chesote' beyixe' cate' chesonxene' Diosen', na' note'tez bene' chesagüe' xpela' ben' chesoten' zjanaque' txen chesonxene' le'. ¹⁹ Bi chaclaža' gonle xbab žia' l gua'a lsaca' ca' zjanaquen da' zaca' o yela' guagw da' chjasežia bene' laogaquen naquen nža'le len bite'teze yela' guagw. ²⁰ Gague can', le cate' bene' chosožie' bi da' chosožie' lao l gua'a lsacan' dan' chesejnilažen', chosožien' lao da' xigüe' ca', gague lao Diosen', na' bi chaclaža' gacle txen len da' xigüe' ca'. ²¹ Bi gac ye'ej gagwcho da' che'ej chagwcho chjayze'echo bi zejen da' got Xancho Criston' na' lecze ye'ej gagwcho gonxencho da' xigüe' ca'. Bi gac ye'ej gagwcho chopten. ²² Ža'a

Diosen' chio' še goncho ca'. Na' bi naccho bene' gual ca Diosen' cont soecho bi da' gone' gac checho.

Bi goncho da' chaque bene' lježcho naquen mal

²³ Chesene': "De latje goncho bite'teze", perw nezecho gague yogo' da' choncho naquen güen, na' la'czla' še de latje goncho bite'teze, gague yogo' da' choncho chaclenen chio'. ²⁴ Ne tocho bi cheyala' goncho da' naquen güen len chio'ze, san goncho xbab še naquen güen len bene' lježcho.

²⁵ Bite'teze bela' chesote' lagüe' ya'a le gagon' na' bi nable še bosožien' lao l gua'a lsacan' chesejnilaže', cont bi gacžejlaže'le še naple doła' gagwlen. ²⁶ Le Xtiža' Diosen' nyojen žan: "Che Xancho Dios yežlio nga, benach, beyixe' na' yogo'te da' zjade lo yežlion'."

²⁷ Na' cate' bene' bi chesejnilaže' Criston' chesaxe' chio' gagwcho ližgaque', še šejcho nach guac gagwcho bite'teze da' yesone' gagwcho sin cbi nabcho še bosožien' lao l gua'a lsacan', le Diosen' bi che'nde' gacžejlaže'cho še napcho doła' che'ej gagwchon. ²⁸ Perw še no ye' chio': "Da' nga bosožie' lao l gua'a lsacan'", bi gagwchon cont bene' gwna ca' bi gacde' lenczcho chejnilaže'cho l gua'a lsacan', o gacde' napcho doła' chagwchon. ²⁹ Bi nacho naquen da' mal len Diosen' gagwchon, con naquen da' mal len ben' gwna ca'.

Na' chnable ĵbixchen' cheyala' cuejyichjcho bich goncho bi da' choncho še bene' lježcho chesacde' napcho doła' chonchon? ³⁰ Na' chonle xbab ĵbixchen' ža bene' lježcho choncho da' mal chagwcho to yela' guagw še choe'cho yela' choxclen che Diosen' neche len? ³¹ Quinga naquen, cate' che'ej chagwcho o bite'teze da' choncho, cheyala' gonchon cont gacxen Diosen'. ³² Na' bi cheyala' goncho bite'teze da' choncho še gonen cont bene' yoble yeselažoe' lo da' mal, la'czla' še zjanaque' bene' Israel gualaž cheton', o še bene' bi zjanaque' bene' Israel, o še ljež chio' chdop chžagcho chonxencho Diosen'. ³³ Can' chona' neda', bite'teze da' chona' cheyljwlaža' nacle gona' cont to to bene' soe' mba. Na' bi cheyljwlaža' nacle gona' da' gaclen cuina' san da' gaclen bene' zan cont gata' yela' mban chegaque' toli tocanē.

11

¹ Neda' chona' con can' ben Criston', na' chneyoeda' le'e gonle can' chonan'.

Can' cheyala' yeson no'ol ca' cate' chdop chžagcho chonxencho Diosen'

² Na' na'a chnia' le'e chonle güen zoale chjayze'ele neda' na' chonle ca ba bzejni'ida' le'e. ³ Na' chaclaža' šejni'ile da' nga. Yogo' bene' byo cheyala' yosozenague' che Criston', le Criston' naque' blaoch ca legaque', na' yogo' no'ole cheyala' yosozenague' che bene' che', le bene' chen' naque' blaoch ca no'olen'. Ca'cze chon Criston', chzenague' che Xe' Diosen', le lecze naque' blaoch ca le'. ⁴ Note'teze bene' byo še nzoa xlape' cate' chol güiže' Diosen' šlac ndop nžagle txen o cate' chyixjue'ede' bi da' ža Diosen', naquen da' yela' zto', le zejen bi nac Criston' bene' blao len le'. ⁵ Na' note'teze no'ole še chol güiže' Diosen' o chyixjue'ede' xtiža' Diosen' sin cbi gwcuāše' yichje' cate' chdop chžagle txen, naquen yela' zto' par bene' che', le naque' blaoch ca le'. Na' no'olen' chon ca' naque' lebe len no'ol ca' nšibdi yichjgaque', no'ole ca' bibi yela' zto' zjanombi'e. ⁶ Na' še no'olen' bi chaclaže' gwcuāše' yichje' can' ba gwnian', yejni'a gwšib doxen yichjen'. Da'nān' še chaquele zto' gwšiblen, nach gwcuāše'czlen can' cheson yezica'chle no'ol ca'. ⁷ Na' le'e bene' byo, bi cheyala' gwcuāše' yichjlen' cate' yol güiže' Diosen' o cate' chixjue'ele bi da' ba gwna Diosen' le'e, le Diosen' gwleje' le'e cont gwlo'ele bene' nacchgüe' bene' zaca'. Na' le'e no'ole, Diosen' gwleje' le'e cont gwlo'ele nac bene' che to tole bene'

zaca'. ⁸ Diosen' bi bene' bene' byo len žit costiy che no'olen', san gwleje' žit costiy che bene' byo nechon' benen' no'ole. ⁹ Na' Diosen' bi bene' bene' byon' cont gaclene' no'olen', san bene' no'olen' cont gaclene' bene' byon'. ¹⁰ Da'nan' no'ol ca' cheyala' yosocuaše' yichjgaque' cont yosolo'e nac bene' byon' blaoch ca legaque', le angl ca' chosocuaše' laogaque' lao Diosen'. ¹¹ Perw naccho txen len Xancho Jesucriston' la'czla' še naccho bene' byo o še no'ole, na' bi cheyala' yeson no'olen' xbab bi cheseyažjde' bene' byo na' neca bene' byo yesone' xbab bi cheseyažjde' no'olen'. ¹² Naquen da' li Diosen' gwleje' žit costiy che bene' byo na' benen' no'ole, na' lecze naquen da' li yogo' bene' byo zoa no'ole gwxa le', na' Diosen' bene' yogo' beñach len bica'chle da' zjade.

¹³ Le gon xbab chele na' gacbe'ele bi chazlaže'cho cate' to no'ole chol güiže' Dios sin cbi chcuase' yichje', le can' nac costumbr chechon'. ¹⁴ Na' lecze bi chazlaže'cho še bene' byo bi gwšib yichjen' na' con chosožien' ca cheson bene' bxej. ¹⁵ Perw no'olen' xdanchgua nac yiša' yichjgaquen' cate' žian' da' tone, na' Diosen' none' yiša' yichjgaquen' gaquen to da' gwcuasen' yichjen'. ¹⁶ Še nole chaquele gwšašle che da' nga ba gwnia', cheyala' nezele neto' postlw bi choe'to' latje yesone' nža'le gate'teze chesedop chesežag bene' chesejnilaže' Diosen'.

Bi chjasyeze'ede' Criston' cate' chese'ej chesagüe'

¹⁷ Na' de yeto da' nia' le'e, le bi chonle güen cate' chdop chžagle chonxenle Criston' na' bi chaclenen le'e, san chonen mal. ¹⁸ To da' bi chonle güen, chesene' cate' chdop chžagle chonxenle Criston' bi chonle txen len lježle, na' chacda' nacljan' li can' chesenen'. ¹⁹ Na' ca'ljan' cheyala'cze gac da' bi chon lježle txen, le chlo'en non' chejnilaže' Criston' do yichj do laže' na' non' gague da' li chejnilaže'ne'. ²⁰ Na' cate' chežagle chagwle txen, bi chonle xbab bnežjw cuin Xancho Jesucriston' neche xtoła'chon', la'czla' chdop chžagle cont šjayze'elen. ²¹ To tole che'ej chagwle da' chyob chdoxe'le, neca chbez lježle. Da'nan' balle ne' chdonle cate' chedagwle na' yeballe che'ej chagwˆxattele na' chzože'le. ²² Yejni'a yega'an ližle ye'ej gagwle clal ca gagwle lao bene' yaše' bene' bi de chegaque'. Da' chonle ca', nacia' chgue'e lježle bene' cheyala' yesaque' txen len le'e da' chonxenle Diosen', na' chonle cont chesaque' tole da' bi de chegaque'. Na' naquen malchgua da' chonle ca', bi gac ni'a chonle güen.

Chjayze'echo bnežjw cuin Xancho Criston' neche xtoła'chon'
(Mt. 26:26-29; Mr. 14:22-25; Lc. 22:14-20)

²³ Xancho Jesús en' bzejni'ide' neda' can' šjayze'echo da' bnežjw cuine' neche xtoła'chon'. Na' neda' ba bzejni'ida' le'e can' goquen', že' cate' Judasen' bdie'ne' lo na' ben' besegue'ede' le', Xancho Jesús en' beˆxue' to yetextil. ²⁴ Na' be'e yela' choˆxclen che Diosen' na' beyož be'e yela' choˆxclen che' na' bzoxjen', na' gwne': "Le gagw yetextil nga. Lenˆna' naquen cuerp chia' da' chnežjua' neche xtoła'le. Na' quinga gonle šjayze'ele bi zejen len le'e dan' gwnežjw cuina' yesote' neda'." ²⁵ Na' lecze ca' bene' cate' beyož gosagüe' xše', beˆxue' to vas nis uvas na' gwne': "Dan' yože lo vas nga zejen da' cobe dan' gwna Diosen' gone' gaclene' le'e. Na' lalje xchenan' cont gac can' gwne' gonen'. Na' bate'teze ye'ejle ca da' nga chona' che'ejle na'a, le šjayze'e bi zejen len le'e dan' gwnežjw cuina' yesote' neda'." ²⁶ Nachen' yogo' ni'a cate' chagwcho yetextilen' na' cate' che'ejcho nis uvasen' chjayze'echo can' bene'na', na' chyixjue'echo can' bnežjw cuine' gote' neche xtoła' beñachen'. Na' can' gonchczcho ślac biˆna' yide' da' yoble.

Naquen' goncho cate' chjayze'echo yela' got che Xancho Jesús en'

²⁷ Can' naquen, še chagwcho yetextilen' na' che'ejcho nis uvasen' cont chjayze'echo yela' got che Xancho Jesúsén' perw še bi chonxenchone' cate' choncho ca', napcho dola', le chonchon ca da' bibi zaca' cuerp che' dan' bnežjue' na' xchene' da' blalje' neche xtoła'chon'. ²⁸ Da'nán' cheyała' gonyane'cho xbab še choncho can' chazlaže' Diosen' cate' za' gagwcho yetextilen' na' ye'ejcho nis uvasen' cont šjayze'echo yela' got che Xancho Jesúsén'. ²⁹ Le še ye'ej gagwcho sin cbi gonxencho Xancho Jesúsén' da' bnežjw cuine' gote' neche xtoła'chon', Diosen' gone' chio' castigw. ³⁰ Na' zanle bi zoale güen na' chacšenele na' bal bene' ba gosate' da' bi gose'ej gosagüen' do laže'. ³¹ Na' še gacbe'echo na' goncho byen soacho binlo len Xancho Diosen', bi gone' chio' castigw cate' che'ej chagwchon. ³² Na' cate' napcho dola' can' che'ej chagwchon, Xancho Diosen' chone' chio' castigw cont yetinjecho da' malen' choncho na' bi si'cho castigw toli tocanē can' yesezi' bene' bi chesejnilaže'ne'.

³³ Da'nán' bene' migw chia', cate' chdop chžagle txen che'ej chagwle, le cueze lježle na' ye'ej gagwle txen. ³⁴ Na' še chbił chdonle, yejni'a yega'an ližle ye'ej gagwle, clēl ca gon Diosen' le'e castigw can' chonle caten' chdop chžagle. Na' che bichle da' chaclaža' gwzejni'ida' le'e, cate' yida' gan' zoalena' nach nia' can' gonlen'.

12

Spiritw che Diosen' chaclenen to tocho cont choncho bi da' choncho

¹ Na' bene' migw, chaclaža' nezele ca chon Spiritw che Diosen' chaclenen to to chio' chejnilaže'cho Jesucriston'.

² Nezele cate' bina' šejnilaže'le Criston' gwyejle'le diža' güenlaže' na' da'nán' gwyejnilaže'le l gua'a lsaca' da' bibi biš grasyw nye'. ³ Na' da'nán' chaclaža' šejni'ile da' nga na'a. Note'teze bene' že': "Chgue'eda' Jesúsén'", bi zoa Spiritw che Diosen' len le', perw bene' že': "Jesúsén' naque Xana'", že' ca' da' zoa Spiritw che Diosen' chaclenen le'.

⁴ Toz Spiritw che Diosen' zoa, perw nža' nža' da' chaclenen to tocho choncho o nezecho. ⁵ Toz Xancho Jesucriston' chonxencho la'czła' nža' nža' ca chon to tocho xšinen'. ⁶ Na' la'czła' nža' nža' da' chon to tocho, toz Diosen' chone' cont to tocho chac choncho xšinen'. ⁷ Nacbia' zoa Spiritw che Diosen' len chio', le chonen cont to tocho chac choncho da' chaclenen yogo'cho. ⁸ Diosen' ba nsi'e xnezen' chon Spiritw chen' cont balcho chac chzejni'icho bene' yoble xbab sina' chen', na' lecze Spiriton' chonen cont yebalcho nezecho to da' nezecho na' chzejni'ichon bene'. ⁹ Na' lecze toz Spiritw chen' chonen cont balcho chejnilaže'chguacho Diosen' na' chac bite'teze da' chnabechone'. Na' da' chaclen Spiriton' chio', balcho chac choncho cont chesyeyaque bene' chesacšene. ¹⁰ Na' lecze Spiritw nan' chonen cont balcho chac choncho yela' guac, na' balcho chac chyixjue'echo bi da' ba gwna Diosen' chio'. Na' Spiritw che Diosen' chonen cont balcho chache'echo che da' chesena bene' o da' cheson bene' še zan' che Diosen' o še zan' che da' xigüe' ca', na' Spiriton' chonen cont balcho choe'cho gwde gwdele diža' da' bi nsedcho, na' yebalcho chac che'cho bene' lježcho bi zeje diža' ca'. ¹¹ Toz Spiritw che Diosen' chaclenen yogo'cho cont choncho yogo' da' chaclažen' gon to tocho.

Yogo' chio' chejnilaže'cho Criston' naccho toze can' nac cuerp chechon'

¹² Cuerp chechon' nsan' zan part, perw zjangoden' txen na' naquen toze. Na' lecze ca' chio' chejnilaže'cho Criston' naccho toze len le' na' len bene' lježcho ca'. ¹³ Bal chio' naccho bene' Israel na' yebal chio' bi naccho bene' Israel. Balcho naccho esclavo na' yebalcho bi naccho. Perw yogo'czcho gwzoacho

nis par blo'echo ba ben Spiritw che Diosen' cont naccho txen len Criston', na' lecze toze Spiritw che Diosen' zoan lo' yichjlaždao' yogo'cho.

¹⁴ Cuerp chechon' nsan' zan part, na' nža' can' nac to to parten'. ¹⁵ Ni'acho guac nan: "Bi naca' toze len cuerpen', le bi naca' ne'en." Perw la'czla' še nan ca', naquen toze len cuerpen'. ¹⁶ Na' nagcho guac nan: "Bi naca' toze len cuerpen', le bi naca' yejlagüen'." Perw la'czla' še nan ca', naquen toze len cuerpen'. ¹⁷ Šaca' doxen cuerp chechon' naquen yejlaocho, bi gac yenecho. Na' šaca' doxen cuerpen' naquen nagcho, bi gac le'echo. ¹⁸ Perw Diosen' bžie' bia' nsa' cuerp chechon' zan part da' cheson žin con can' gwyazlaže'. ¹⁹ Na' bi nya' cuerp chechon' šaca' nsan' toze part. ²⁰ San cuerpen' nsan' zan part da' naquen txen cont naquen toze cuerp.

²¹ Da'n'an' yejlaochon' bi gac yen' na'chon': "Bi chyažjda' le'." Na' neca gac ye' yichjchon' ni'achon': "Bi chyažjda' le'." ²² Na' la'czla' bal part cuerp chechon' chaquecho bitec naquen da' gual, perw chyažjehon. ²³ Na' la'czla' bal part cuerp chechon' chaquecho bitec bi zacan', perw chi' yichjchon, da'n'an' cheyacw xacho. Na' part che cuerp chechon' da' bi chaclaže'cho le'e bene', hcuaše'chon len xacho. ²⁴ Perw part da' nsa' cuerp chechon' da' naquen xdan, bi hcuaše'chon. Na' Diosen' none' cont chi' yichjcho che part ca' da' bi zjanaquen xdan. ²⁵ Na' none' cuerp chechon' toz cont to to parten' chapši'i lježen lebze na' chesonen žin txen. ²⁶ Na' še guecho chac, bi zoa güen doxen cuerp chechon' še ca'. Na' še to parten' chaquecho xdan o chac chonen güenchgua, doxencho chebecho.

²⁷ Na' chio' chejnilaže'cho Criston', yogo'cho ngode'cho txen len le' na' yogo'cho txen naccho cuerp chen', na' guac nacho to tocho naccho ca to part güeje cuerp chen'. ²⁸ Na' ca nac chio' chdop chžagcho chonxencho Criston', da' nechw Diosen' gwleje' neto' nacto' postlw, na' da' gwchope gwleje' bal bene' cont cheseyixjue'ede' da' ba gož Diosen' legaque'. Na' da' gwyone gwleje' yebal bene' chososed cheselo'ede' xtižen'. Na' lecze gwlej Diosen' bene' cheson yela' guac, na' gwleje' bene' cheson cont chesyeyaque bene' chesacšene, na' gwleje' bene' chesaclene' bene' yoble cate' bi da' chesyajžde'. Na' gwleje' bene' chesenabia' chio' chdop chžagcho chonxencho Criston', na' gwleje' bene' chac cheso'e gwde gwdele diža' da' bi zjansede'. ²⁹ Gague yogo'cho naccho postlw. Gague yogo'cho chac chyixjue'echo bi da' ba gwna Diosen'. Gague yogo'cho chac chsed chlo'echo bene' xtižen', na' gague yogo'cho chac choncho yela' guac. ³⁰ Gague yogo'cho chac choncho cont chesyeyaque bene' chesacšene. Gague yogo'cho chac choe'cho gwde gwdele diža' da' bi nsedcho. Gague yogo'cho chac chozejni'icho bi zejen diža' ca'. ³¹ Le yeyiljwlaže' gaclen Spiritw che Diosen' le'e cont gac gonle da' ca' zjanacch da' zaca'.

Na' de yeto da' zaca'ch naquen' cheyala' soa cuezcho.

13

Cheyala' gague lježcho

¹ La'czla' še chaccho gwde gwdele diža' da' chesac benachen' na' da' chesac angl ca', perw še bi chaque ljež benachcho, bibi zaca'cho. Zaca'lebcho ca ya da' chonen sšag cate' chososižen' o ca platiy da' chososiž bene' güecuež. ² Na' la'czla' še ba goclen Spiritw che Diosen' chio' cont chac chyixjue'echo bi da' ba gwne' chio', bibi zaca'cho še bi chaque ljež benachcho. Na' la'czla' še nezecho yogo'lol da' nono na' neze, na' la'czla' še chejni'icho yogo'lol da' naquen da' zaque', bibi zaca'cho še bi chaque ljež benachcho. Na' la'czla' še leca chejnilaže'cho Diosen' cont chone' bite'teze da' zdebe cate' chnabechone' gonen', bicze bi zaca'cho še bi chaque lježcho. ³ Na' še gwnežjwcho bene' yaše'

yogo' bi da' de checho na' gwnežjw cuincho yosozey bene' chio', bi gaclenen chio' lao Diosen' še bi chaque lježcho.

⁴ Še chaque lježcho, chapcho yela' chxenlaže' len legaque', na' choncho güen len legaque', bi chgue'echo legaque' še chac güen chegaque', na' bi chonxen cuincho len xtiža'cho, na' bi cha'laže'cho. ⁵ Na' cate' chaque lježcho bi choncho nacteze len legaque', bi choncho xbab che cuinzcho, bi chbixjwcho, na' bi chgo'olaže'cho. ⁶ Na' cate' chaque lježcho bi chbecho še chon bene' lježcho da' mal, san chbecho še chone' da' zej to li. ⁷ Na' cate' chaque lježcho, chapcho yela' chxenlaže' bite'teze da' chesonde' chio', na' choncho xbab güen che yogo'lol bene', na' zoacho lez yesone' güen yogo' las, na' chyo chchejlaže'cho bite'teze da' chesone bene' chio'.

⁸ Gwbat te che da' cheyala' gaque ljež benachcho. Perw gwžin ža cate' noch no chixjue'e bi da' ba gož Diosen' le', na' gwžin ža cate' bich yesoe' bene' gwde gwdele diža' da' bi zjansede', na' gwžin ža cate' bich yaže bichle da' šejni'icho. ⁹ Bina' nezecho na'a yogo' da' za' nezecho, na' bina' gac chixjue'echo binlo yogo'lol da' ba gož Diosen' chio'. ¹⁰ Perw gwžin ža cate' gon Diosen' cont yogo' da' de gaquen can' cheyala' gaquen. Cana' te che da' bi naquen ca cheyala' gaquen.

¹¹ Cate' goccho bidao' be'cho diža' can' chesoe' note'teze bidao' diža', bencho xbab can' cheson note'teze bidao' xbab, na' gwzejni'icho can' chesejni'i bidao'. Na' na'a ba gwcha'ocho na' ba gwlejyichjcho bich choncho can' cheson bidao'. ¹² Na'a bina' nezecho binlo da' nac che Diosen'. Zaca'lebcho ca bene' chne'e to lo spejw da' bitec chlo'e binlo. Perw gwžin ža cate' le'echo binlo na' nezecho doxen da' nac che Diosen', na' canan' gombia'chone' binlo ca binlo nombi'e chio'. ¹³ Nachen' da' quinga šone non Diosen' mandadw goncho toli tocanē: šejnilaže'chone', soacho lez gone' ga gacch güen checho, na' gaquecho Diosen' na' ljež benachcho. Na' da' zejehen goncho lao da' ca' šone, gaquecho Diosen' len ljež benachcho.

14

Bene' ca' chesoe'lene' Diosen' diža' da' bi zjansede'

¹ Cheyala' cue' yichjle gaquele Diosen' na' len ljež benachle, na' lecze cheyala' selaže'le gaclen Spiritw che Diosen' le'e gonle con bi da' chaclažen' gonle. Na' lao da' ca' chaclenen bene' bi da' chesone', da' zaca'chen da' cheseyixjue'ede' bi da' ža Diosen'. Lenna' cheyala' selaže'chgualē gonle. ² Balcho chon Spiritw che Diosen' cont chac choe'lencho Diosen' gwde gwdele diža' da' bi nsedcho. Na' cate' choe'lenchone' dižan' nac ca', bi choe'lencho benachen' diža', le notno chejni'i xtiža'chon', con naquen diža' da' chon Spiritw che Diosen' choe'lenchone' la'czla' bi chejni'ichon. ³ Perw bene' chyixjue'ede' bi da' ba gwna Diosen', chaclene' bene' yoble yesenita'chache' yesejnilaže' Diosen', na' yesenite' mbalazech, na' chesyeyacxenlaže' še bi da' chesac chegaque'. ⁴ Cate' choe'cho gwde gwdele diža' da' bi nsedcho, yichjlažda'ocho na'zen' chaclenen. Perw še chyixjue'echo bi da' ba gwna Diosen', chaclenen yogo' chio' chdop chžagcho chonxencho Criston'. ⁵ Yebeda' šaca' yogo'le gac güe'lenle Diosen' gwde gwdele diža' da' bi nsedle, perw yebechda' juisyw šaca' yogo'le gac chixjue'ele bi da' ye' Diosen' le'e. Lenna' zejehen clel ca güe'lenchone' gwde gwdele diža' šlac ndop nžagcho chonxencho Diosen'. Le še nono zoa no gwzejni'i bi zejen gwde gwdele diža' dan' chon Spiriton' nacho, bitw gaclenen bene' ljezcho yesenita'chache' yesejnilaže'ne'. ⁶ Bene' migw, nezda' bi gaclenen le'e še güe'lēna' Diosen' gwde gwdele diža' da' bi chejni'ile caten' yedēna'a le'e. Perw gaclenen le'e še gwzejni'ida' le'e bi da' ba bzejni'i Diosen' neda'. Na'

gaclenczen še gwzejni'ida' le'e bichle da' nezda' che Diosen', o bi da' ba gože' neda' cont chixjue'eda' le'e, o še gwsed gwlo'eda' le'e bi zeje xtižen'.

⁷ Ca nac bžejo, bi mbanen perw zoa ši'in cate' chcuež beñe' len, na' lecze ca' arpan' cate' chyin beñe' len. Na' še toz nota da' chcuež ben' len bžejoa' o toz nota da' chyin ben' cate' chyine' arpan' bate'teze, nono gacbe'e bin' chosocueže' še bi yosoše'e güeltze nota dan' chosocuežen'. ⁸ Cate' zoa to beñe' chcueže' trompeta cont cheseneze soldadw ca' naquen' yesone', še bi gwcuežen' binlo, bi yesejni'ide' cheyala' šja'aque' lo gwdile. ⁹ Ca'cze naquen len chio', še güe'lencho Diosen' diža' da' bi chesejni'i beñe', bi gaclenen legaue', le len legaue' naquen ca' che beñe' chšalj toze'. ¹⁰ Nezecho beñe' že' doxen yežlion' gwde gwdele diža' da' chesaque', na' to to beñach chesejni'ide' dižan' goljelene'. ¹¹ Na' še chio' bi chaccho diža' da' chac yeto beñe', nezecho naque' beñe' zito' len chio' na' naccho beñe' zito' len le'. ¹² Na' dan' chi' yichjle gaclen Spiritw che Diosen' le'e cont gac gonle bi da' chaclaže'le gonle, ca'czen cheyala' cue' yichjle gaclenen le'e gonle da' gaclen lježle cont yogo'le soachachle šejnilaže'le Diosen'.

¹³ Na' še Spiritw che Diosen' gonen cont güe'lencho Diosen' gwde gwdele diža' da' bi nsedcho, cheyala' nabcho lecze gaclenen chio' gwzejni'icho beñe' bi zeje diža' dan' choe'lencho Diosen'. ¹⁴ Le cate' Spiriton' chonen cont chol güiža' Diosen' len diža' da' bi nseda', con nezda' lo' yichjlažda'ogua' choe'lena' Diosen' diža', perw bi chona' xbab chen, le bi chejni'idan'. ¹⁵ Quinga cheyala' goncho cate' chol güižcho Diosen', cheyala' güe'lenchone' bite'teze diža' da' chon Spiritw chen' chio' la'czla' še bi chejni'ichon, na' lecze cheyala' güe'lenchone' diža' da' chejni'icho. Na' cheyala' golcho bite'teze da' chon Spiritw che Diosen' golcho la'czla' še bi chejni'ichon, na' lecze cheyala' golcho da' chejni'icho. ¹⁶ Le še chonxencho Diosen' o choe'cho yela' choxclen che' len diža' da' bi chejni'i beñe' yoble, beñe' bi chesejni'i dižan' choe'chon' bi gac yesonxene' Diosen' txen len chio'. ¹⁷ La'czla' še choe'cho yela' choxclen che Diosen' binlo, perw bi chaclenen beñe' yoble še bi chesejni'ide' xtiža'chon'. ¹⁸ Choa' yela' choxclen che Diosen' da' choe'lencha'ne' gwde gwdele diža' da' bi nseda' cnel ca' le'e. ¹⁹ Perw cate' ndop nžagcho chonxencho Criston' yejni'a gua' gayo'ze diža' da' yesejni'i beñe' cont gwzejni'ida' legaue', cnel ca' gua' ši mil diža' da' bi yesejni'ide'.

²⁰ Beñe' migw, bi cheyala' šo'cho xbab che bidao' biña' šejni'i, san šo'cho xbab che beñe' chejni'i. Perw len da' malen' cheyala' gaccho ca' bidao' bi' biña' gon da' mal. ²¹ Xtiža' Diosen' nyojen žan: "Neda' Dios gona' cont beñe' zito' yesoe'lene' beñe' Israel quinga xtiža', perw ne ca'cze bi yosozenague' chia'." Can' ža Xancho Diosen'. ²² Da'n'an' nezecho Diosen' chchine' gwde gwdele diža' da' choe'lenchone' cont beñe' bi yesejnilaže'ne' yesache'ede' zoacze' len chio'. Na' chio' chejnilaže'chone', Spiritw che Diosen' chonen cont beñe' cheseyixjue'ede' chio' bi da' ba gož Diosen' legaue'. Can' chone' chzejni'ide' chio'. ²³ Le gon xbab nac gac še šlac ndop nžag yogo'cho txen chonxencho Criston' yogo'cho güe'lencho Diosen' gwde gwdele diža' da' bi nsedcho, na' yesela' bal beñe' bi chesejni'i naquen' choncho chonxenhone' o beñe' bi chesejnilaže'ne', legaue' yesene' chactontcho. ²⁴ Perw še beñe' ca' bi chesejnilaže' Diosen' o beñe' ca' bi chesejni'i naquen' chonxenhone' yesela'aque' šlac yogo'cho chzejni'i lježcho bi da' ba gož Diosen' chio', nach yesache'ede' zjade xtole' cate' yesende' xtiža' yogo'cho, na' yesyetinjde' da' malen' chesonen'. ²⁵ Le yesache'ede' Diosen' nombi'e xbab da' chesone' lo' yichjlažda'ogüen', nach yosozoa xibe' yesonxene' Diosen' na' yesene': "Da' licze zoa Diosen' len beñe' quinga."

Cheyała' gonxencho Diosen' binlo na' bi gonchon nacteze

²⁶ Bene' migw, cate' chežagle chonxenle Diosen' quinga gonle: Balle de to da' golle gonxenle Diosen', na' balle de da' gwsed gwlo'e lježle, na' balle de da' ba gož Spiritw che Diosen' le'e, na' balle de gwde gwdele diža' da' güe'le da' bi nsedle, na' yeballe chaclaže'le chixjue'ele bi zejen gwde gwdele dižan' ba gwna bene' lježlen'. Naquen güen gonle yogo' da' ca' con še gonlen ga gaclenen lježle. ²⁷ Na' še nole güe'lenle Diosen' gwde gwdele diža' da' bi nsedle, le güen', perw do chopzle o še šonžle na' tgüejje tgüejle, na' tena' choj bene' yozejni'ide' bi zejen diža' dan' ba be'le. ²⁸ Na' še nono zoa no yozejni'i bi zeje dižan', bi cheyała' güe'le dižan' zižje gan' ndop nžaglen', con lo' lažda'ole na'zen' güe'lenle Diosen' diža', še ca'. ²⁹ Na' še chixjue'ele bi da' ba gwna Diosen', lecze do chopzle o šonžle chojle chixjue'elen šlac ndop nžagle na' yezica'chle bene' yosozenague' na' yesone' xbab še dan' žalen' naquen lebze len Xtiža' Diosen' dan' nyoj. ³⁰ Na' še šlac tole choe'le diža', Diosen' gwzejni'ide' yetole to da' chixjue'ele, cheyała' cuezle na' güe'le latje chixjue'e ben' yeto dižan'. ³¹ Yogo'le guac chixjue'ele da' gož Diosen' le'e, perw gonlen tgüejje tgüejle cont yogo'le šejni'ichle na' gaclenen le'e. ³² Na' le'e chyixjue'ele bi da' ba gwna Diosen', cheyała' chixjue'elen con baten' naquen güen chixjue'elen. ³³⁻³⁴ Le Diosen' chaclaže' gwsa'le binlo da' chonle caten' chdop chžagle chonxenle' na' bi gonlen nacteze.

Na' caten' chdop chžagle chonxenle Criston', cheyała' gwžonle yesoe' no'ol ca' diža' šlac ndop nžagle, can' chesežone' gate'teze chesedop chesežague' chesonxene'ne'. Cheyała' yesenita' no'ol ca' yosozenague', le can' ža leyna'. ³⁵ Na' še bi da' chesaclaže' no'ol ca' yesenezde', guac yesenabde' bene' čegaque' cate' yesyežin ližgaque', le naquen da' yela' zto' še no no'ole güe'le diža' šlac ndop nžagcho.

³⁶ Le gon xbab, gague le'e gogle bene' nechw bene' gwyejnilaže' xtiža' Criston', na' bi nacho nezechle ca' bene' chesedop chesežag ga yoble chesonxene'ne'. ³⁷ Še nole chaquele chac chyixjue'ele bi da' ba gwna Diosen' o še chaquele chaclen Spiritw che Diosen' le'e len bichle da' chonle, nachen' cheyała' gacbe'ele da' quinga chzoja' le'e naquen da' non Xancho Criston' mandadw goncho. ³⁸ Na' note'teze bene' bi chejle'e še Xancho Criston' bene' cont bzoja' da' quinga, bi zaca' šejle'cho che' bite'teze da' že'.

³⁹ Na' quinga naquen bene' migw, le cuec yichjle gaclen Spiritw che Diosen' le'e cont chixjue'ele bi da' na Diosen', na' bi gwžonle yesoe' bene' gwde gwdele diža' da' chnežjw Spiritw che Diosen' yeso'e. ⁴⁰ Perw binlo gonle yogo' da' chonle cate' chdop chžagle na' bi gonlen nacteze.

15

Beban Criston' ladjo bene' guaten'

¹ Bene' migw, chaclaža' gonle xbab che diža' güen che Criston' da' ba be'lena' le'e. Ba bzenagle chen na' zoachačhle chejle'len. ² Na' nezele šjayzoale len Diosen' še soatezle gwzenagle che diža' güen chen'. Na' še bi gwzenagle chen, bibi zejen da' žale chejle'len'.

³ Diosen' bzende' neda' da' quinga da' zjanaquen la'zelagüe' da' zejen na' bač gwduxjue'edan' le'e. Criston' bnežjw cuine' gote' cont beque'e xtoła'chon' con can' nyoj Xtiža' Diosen'. ⁴ Nach bosocuaše'ne', na' beyon ža beyas bebane' ladjo bene' guat ca' con can' nyoj Xtiža' Diosen'. ⁵ Nach jaylo'elagüe' Pedron' na' gwdechle jaylo'elagüe' yezica'chle postlw ca'. ⁶ Beyoža' jayezlo'elagüe' gwdele gayo' gayoa bene' to ši'ize, bene' chesonxene' le'. Na' zan bene' ca'

ne' zjamban, la'czla' bale' ba gosate'. ⁷ Nach jayzlo'elagüe' Jacobo. Gwde na' jayzlo'elagüe' yogo' postlw ca'.

⁸⁻⁹ Bzēbte bedyelo'elagüe' neda', zaca'leba' ca' bi' golje cate' bina' žin ža, le cana' bchi bsaca' bene' ca' chesedop chesežag chesonxene' Criston'. Na' da'nān' chacda' bicze zaca' yososi'e neda' postlw. ¹⁰ Perw Diosen' nži'ilaže' de' neda' na' gwleje'nda' naca' postlw che', na' choncha' xšinen' clēl ca' bene' lježa' ca' yezica'chle. Na' nezda' gague chonan' neda', san Diosen' chaclene' neda' cont chonan'. ¹¹ Da'nān' bibi nonen še xtiža' nedan' ba bzenagle o še xtiža' nochle postlw ca', le toze can' chyixjue'eto' che Criston' na' can' nac dan' ba chejle'le chen'.

Yesyeban bene' guat ca'

¹² Yogo' neto' chyixjue'eto' beban Criston' ladjo bene' guat ca'. Da'nān' ĵbixchen' ža balle bi yesyeban bene' guat ca'? ¹³ Šaca' naquen diža' li dan' žale bi chosban Diosen' bene' guat ca', zejen bi beban Criston' še ca'. ¹⁴ Na' šaca' Criston' bi bebane' ladjo bene' guat ca', bibi zaca' xtižen' da' be'lento' le'e na' bibi zejen da' chejnilaže'lēne' še ca'. ¹⁵ Ba be'lento' le'e diža' güenlaže' gwnato' Diosen' bosbane' Criston' ladjo bene' guaten' šaca' naquen diža' li dan' žale bi chosbane' bene' ba gosat. ¹⁶ Le šaca' bi chosbane' bene' ba gosat, lecze bi bosbane' Criston'. ¹⁷ Šaca' naquen da' li Diosen' bi bosbane' Criston', bibi zejen da' chejnilaže'chone' na' bi nacho beque'e xtoła'chon'. ¹⁸ Šaca' naquen da' li bi bosbane' Criston', ba gosebiayi' yogo' bene' ba gosat bene' gosejnilaže' Criston' še ca'. ¹⁹ Na' šaca' da' zoacho lez šjayzoalencho Criston' cate' yeza'cho yežlio nga naquen da' güenlaže', yela' zi' xench chac che chio' chejni'ilaže'cho Criston' clēl ca' che yezica'chle bene' še ca'.

²⁰ Perw na' da' li Diosen' bosbane' Criston' ladjo bene' guat ca', na' da'nān' nezecho žin ža yosbane' yezica'chle bene' chesejnilaže'ne' še ba gosate'. ²¹ Gwxē yela' goten' yežlio nga da' gwzoa' to bene' bene' da' mal, na' lecze ca'czen' goc, to bene' bene' cont žin ža yebancho ladjo bene' guat. ²² Le gwxē yela' goten' cate' Adanna' bene' da' malen', da'nān' yogo' beñachen' chesate'. Nach Criston' bene' cont yogo' bene' yesaque' txen len le' yesenite' toli tocañe. ²³ To tocho yebancho ladjo bene' guaten' cont soalencho Criston' con caten' ba bsi'e xnezena'. Criston' gwžialagüe' bebane' ladjo bene' guat ca' na' cate' yide' da' yoble chio' chejnilaže'chone' lecze yebancho ladjo bene' guat še ba gotcho. ²⁴ Nach te che yežlio nga. Na' Criston' gwnitlagüe' yela' chnabia' che yogo' bene' chesegue'ede' Diosen' na' yeque'e yela' chnabia' che yogo' da' xigüe' ca'. Na' yeyožen' Criston' gone' lo na' Xe' Diosen' yogo' da' nlane' chnabi'e na' yogo' non' chnabi'e. ²⁵ Diosen' bžie' bia' zoa Criston' chnabia'che' ca' yogo' bene' ca' na' bichle da' ca', na' Diosen' gone' cont žin ža cate' gwlej gwšošje' bene' ca' na' bichle da' ca' bi cheson txen len le'. ²⁶ Na' cate' yeyož gwlej gwšošje' yogo' bichle da' bi chon txen len le', nach gwcueze' yela' goten'. ²⁷ Diosen' ba nsi'e xnezen' cont yogo'lol da' zjade zjanaquen lo na' Criston'. Perw bi nacho zejen Diosen' naque' lo na' Criston', san Diosen' nsi'e xnezen' cont yezica'chle bene' na' bica'chle da' zjade yesaquen lo na' Criston'. ²⁸ Nach cate' ba ben Diosen' cont yogo' da' zjade ba zjanaquen lo na' Criston', nach Criston' gwlo'e lecze le' naque' lo na' Xe' Diosen'. Can' gac cont yogo' benach na' yogo' angl yesache'ede' Diosen' naque' Xangaque', na' lecze yesache'e da' xigüe', beyixe' na' bichle da' zjade.

²⁹ Nita' bene' chesezoe' nis gualaz bene' ba gosat. Na' bibi zejen da' chesone' ca' šaca' bi žin ža yesyeban bene' guat ca'.

³⁰ Na' neto' yogo' ža nita' bene' chesaclaže' yesote' neto' da' choe'to' xtiža' Criston', na' bibi zejen zoa chbezto' ca' šaca' bi yesyeban bene' guat ca'. ³¹ Bene' migw, choa' diža' li chnia' chbechgüeda' ba chejnilaže'le Xancho Jesucriston', na' lecze ca' choa' diža' li chnia' yogo' ža chzanlaže' cuina' gac bi da' gac chia'. ³² Guac nacho bež znia ba gwdillena' Efeso nga ga ba gosedabaga'chgua bene' neda'. Na' bibi zejen ba bchejda' yogo' da' ba gosonde' neda' šaca' bi yesyeban bene' guat ca'. Na' šaca' bi yesyeban bene' guat ca', yejni'a goncho can' ža dižan' žan: "Ye'ej gagwtezcho, le gwxezen' gatcho."

³³ Bi güe'le latje yesonlede' le'e. Da' li can' ža to diža' da' de, žan: "Bene' chejlen bene' cheson da' mal lecze solao gone' can' chesone'na'." ³⁴ Le yeyon xbab šagüe' na' cuejyichjle xbab mal dan' chonlen', le balle biña' šejni'ile che Diosen'. Chnia' ca' da' chaclaža' gaquele zto' che da' malen' chonle.

Cuorp che bene' yesyeban ladjo bene' guat ca'

³⁵ Balle nabljale nac gac yesyeban bene' guat ca' o nac gac cuorp chegaquen' cate' yesyebane'. ³⁶ Nchol yichjlažda'olen' še chaquele bi gac yesyebane' ladjo bene' guat ca'. Nezecho to to xoa' dao' da' chazcho cheyala' yexinjen cont la' yel dao'. ³⁷ Na' caten' chazcho, bi chazcho yel daon', san chazcho xoa', nach chexinjen cont la' yel daon'. Na' can' chac len bi da' chazcho, con xsen' chazcho na' chla' yag dao' chen. ³⁸ Diosen' chone' cont chla' yag dao' dan' chazchon', bi chla' yag yoble da' bi gozcho. ³⁹ Na' gague toze ca' nac cuorp che chio' benach len cuorp che be žia tap ni'a na'ba'. Nža' cuorp che benach na' nža' cuorp che be žia xil, na' lecze nža' cuorp che be chesaš lo' nis. ⁴⁰ Nža' cuorp che benach, nža' cuorp che beyixe', na' nža' da' ca' chle'echo le'e yaban', gwbiž, bio' na' beljw ca'. Na' nža' yela' xdan che gwbiž, bio' na' beljw ca', na' nža' yela' xdan che benach na' che beyixe' ca' chesaš lo' yežlion'. ⁴¹ Na' nža' ca' chseni' gwbiž, nža' ca' chseni' bio' na' lecze nža' ca' chseni' to to beljw ca'. ⁴² Nach cate' yesyeban bene' ca' ba gosat, cuorp chegaquen' bi gaquen ca' cuorp da' gosape' cate' gosebane'. Cuorp chegaque' da' bosocuaše' lo' ban' ba beyožon', perw cuorp cobe chegaquen' gague da' te chen. ⁴³ Bibi zaca' cuorp che bene' guat ca', zjanaquen cuorp šen, na' cheyožon', da'nan' hcuaše'chon lo' ba. Perw bene' gosejnilaže' Criston', cate' yesyebane' ladjo bene' guat ca' yesyeyac cuorp chegaque' da' güen juisyw na' da' gual. ⁴⁴ Cuorp chegaquen' zjanaquen de bela' chen cate' chosocuašen' perw cate' yesyebane' ladjo bene' guat ca' nža' ba zjanac cuorp chegaquen', le yesyeyaquen cuorp cobe da' yeson con can' ža Spiritw che Diosen'. Nezecho cuorp chechon' da' de na'a naquen de bela' chen, na' lecze cheyala' nezecho žin ža cate' yeyaquen da' cobe na' gonon con can' ža Spiritw che Diosen'.

⁴⁵ Xtiža' Diosen' nyojen žan Adán bene' goc bene' nechw gwzoe' gwbane' cani'. Na' na'a zoa Criston' zaca'lebde' ca' Adánna', le Criston' chone' yela' mban toli tocañe. ⁴⁶ Na'a cuorp chechon' bi naquen to da' chzenag che Spiritw che Diosen', perw žin ža yeyaquen da' cobe na' gwzenaguen che Spiriton'. ⁴⁷ Diosen' bene' bene' nechw len bište yo cont gwzoe' lo' yežlio nga, perw Xancho Criston' ben' zaca'lebde' ca' bene' nechon' ze'e yaba. ⁴⁸ Na' chio' benach, cuorp chechon' naquen ca' cuorp che bene' nechon' da' ben Diosen' len bište yo, da'nan' naccho che yežlio nga. Na' chio' chejnilaže'cho Criston', žin ža cate' cuorp chechon' yayaquen da' cobe can' nac cuorp che Criston' bene' za' yaba. ⁴⁹ Na'a šlac zoacho yežlion' naccho ca' bene' ben Diosen' len bište yo, perw cate' žin ža šjayzoacho yaban', gaccho ca' Cristo ben' za' yaba.

⁵⁰ Bene' migw, chnia' le'e bi gac yežincho yaba gan' zoa Diosen' len cuorp chechon' de bela' chen. Da' te che cuorp checho quinga, da'nan' bi gac šjayzoalenchon len Diosen' toli tocañe. ⁵¹ Chnia' le'e to da' nono gwneze cani',

gague yogo'chon' gatcho, perw yogo'chon' yeža' can' gaccho. ⁵² Bedao'nez, ca bedaon' chžode' yejlaochon', yeža' can' gaccho cate' cuež trompeta che Diosen'. Cuež trompetan' na' yesyeban yogo' bene' ba gosat bene' gosejnilaže' Criston'. Na' cuerp chegaquen' yesyeyaquen da' cobe da' bi yesat na' lecze ca' chio' ne' mbancho yeža' cuerp chechon'. ⁵³ Le cuerp chechon' da' mbancho yežlio nga da' te chen. Naquen da' chat, na' cheyała' yayaquen da' cobe da' bi gat, da' bi gožo' na' da' bi te che. ⁵⁴ Cate' ba beyac cuerp chechon' da' cobe da' bi gat na' bi te chen, cana' ba goc can' nyoj Xtiža' Diosen' gan' žan: "Diosen' gwzoede' bcueze' yela' goten', na' chone' yela' mban toli tocanē. ⁵⁵ Bich soe yela' goten' chio' da' yoble. Gwbatech gatcho šo'cho lo' ba." ⁵⁶ De yela' got checho na'a le chio' beñač choncho da' mal. Da' neze chio' beñač can' ža ley che Diosen' cheyała' goncho na' bi chzenagcho gonchon, da'nan' chnabia' da' malen' chio'. ⁵⁷ ChoχcLen Diosen' gwsele' Xancho Jesucriston' beque'e xtola' chio' chejnilaže' chone'. Da'nan' bi soe yela' goten' chio', san de yela' mban toli tocanē checho.

⁵⁸ Da'nan' bene' migw chia', chacda' le'e na' chneyoeda' le'e le soačhač len toze xbab. Na' le gonchgua xšin Xancho, le nezczecho cate' choncho xšinen' chejnilaže' chone', gague da' chondadzchon'.

16

Bene' Corinto chosotobe' mechw cont yesaclene' bene' Jerusalén ca'

¹ Nach nia' naquen' gonle cate' gwtoble mechw da' gaclenen bene' ca' chesejnilaže' Diosen' Jerusalénna'. Le gon can' bena' mandadw yeson bene' ca' chesedop chesežag chesonxene' Criston' to to yež da' zjachi' distritw Galacia. ² Yogo' ža dmigw to tole cheyała' cuejle late' güeje mechw según gaca'te' benle gan lagüe' xman. Na' co'ošagüe'le mechon' cont den cate' yida' gan' zoale na' gague za' gwtoblen cate' yedena'a le'e. ³ Nach cate' la'a gan' zoalen', cana' gwzoja' cart da' yesože' bene' ca' chaclaže'le šjasesane' xmechwlen' Jerusalénna'. ⁴ Na' še chonen byen ša'a, cuina' chi'a legaque' Jerusalénna'.

Pablon' chone' xbab šjane'e bene' Corinto ca'

⁵ Na' yida' gan' zoale cate' yeyož yedia' Macedonia, le cheyała' šjayna'a bene' lježcho ca' nita' na'. ⁶ Na' chacda' yega'ana' le'e do tbio' do chop bio' o še yega'ana' doxen tiemp zag, nach gaclenle neda' cate' yeza' ša'a gate'teze ša'a. ⁷ Bi chaclaža' yedena'a le'e na'a, le con teza' še ba za'a, na' chaclaža' soa' sša len le'e cate' yida' še Xancho Diosen' gonšque' latje. ⁸ Chaclaža' yega'ana' Efeso nga žinch ža gała' lni dan' že' Pentecostés. ⁹ Le bene' zan že' nga bene' chesaclaže' yosozenague' che Criston' na' lecze že' bene' zan bene' bi chesaclaže' chixjue'eda' xtižen'.

¹⁰ Na' še la' Timoteon' gan' zoalen', le gwlebe' na' le gwzenag che' cont bi žebe' gwsed gwlo'ede' le'e, le can' chona' xšin Xancho Diosen', leczechon' chonen'. ¹¹ Ne tole bi cheyała' gonle xbab bibi zaca' da' chsed chlo'ede', san soale güen len le' na' gaclenle' cate' yeze'e cont yeyede' gan' zoa' nga to šagüe' to güen, le chbeza'ne' txen len yezica'chle bene' lježcho ca'.

¹² Na' ca nac Apolosen', gota'yoeda'ne' lecze šejlene' Timoteon' gan' zoalen', txen len yezica'chle bene' lježcho ca' yesaclene' le'. Perw bi chaclaže' šeje' na'a, na' šeje' cate' soe' to latje.

Yeto chope diža' da' chole'len Pablon' bene' Corinto ca'

¹³ Le soa le na' can' chonlen', na' le soa len toze xbab šejnilaže'le Criston'. Bi žeble, san le soachach gonle can' chazlaže' Diosen'. ¹⁴ Na' le gaque lježle bite'teze da' chonle.

¹⁵ Bene' migw chia', nezele bene' ca' že' liž Estéfanos gosaque' bene' nechw gosejnilaže' Criston' distritw Acayan' na' ba gosaclenchgüe' yezica'chle bene' lježcho bene' chesejnilaže'ne'. ¹⁶ Da'nan' chneyoeda' le gwzenag chegaque' na' gonle can' chesenen', na' le gwzenag che nochle bene' cheson xšin Diosen' na' chesaclene' bene' lježcho ca' can' chesone'na'. ¹⁷ Chebeda' ba besela' Estéfanos, Fortunato, na' Acaico gan' zoa' nga. Legaque' ba gosaclene' neda' cont bich chacyaše'da' dan' bi zoale nga len neda'. ¹⁸ Ba gosone' cont beyaclaža' can' ba gosoncze' len le'e cana', na' da'nan' cheyala' güe'cho yela' choxclen chegaque' che dan' ba gosonen'.

¹⁹ Bene' ca' chesedop chesežag chesonxene' Criston' doxen distritw Asian' chosoguape' le'e tiox. Na' Aquila na' Priscila na' bene' ca' chesežag ližgaque' chesonxene' Criston' lecze chosoguapchgüe' le'e tiox. ²⁰ Nach yogo' bene' lježcho že' nga chosoguape' le'e tiox. Na' cate' chdop chžagle txen, le gwnopa' na' lježle cate' gwguap lježle tiox cont gacbia' chaque lježle.

²¹ Cuinca' neda' Pablo chzoja' late' dao' le'e cart nga chguapa' le'e tiox.

²² Na' še ne' nchixe balle bi chaquele Xancho Jesucriston', Diosen' gone' cont cuiaye'e toli tocañe. Xancho Jesucristo, yidšco' da' yoble.

²³ Gaclenšca Xancho Jesucriston' le'e. ²⁴ Chacda' yogo'le da' naccho txen chejnilaže'cho Cristo Jesúsén'. Da' na'zen' žia' le'e.

CART GWCHOPE DAN' BZOJ POSTLW SAN PABLO CHE BENE' CA' ŽE' CORINTO

Postlw Pablo chzoje' bene' chesonxen Jesucriston' ciuda Corinto

¹ Neda' Pablo naca' postlw che Jesucriston', le can' chaclaže' Diosen'. Chzoja' cart nga che le'e chdop chžagle chonxenle Diosen' lo ciuda Corinto, na' che note'tezechle bene' že' doxen distritw Acaya bene' ba gwlej Diosen' cont zjanaque' lo ne'e. Neda' len bene' migw checho Timoteo chguapto' le'e tiox. ² Na' chnabeto' Xacho Diosen' na' Xancho Jesucriston' yesaclene' le'e na' yesone' cont soa cuezle binlo len xbab da' yo'o lo' yichjlažda' olen'.

Da' ca' gwdi gwxaca' Pablon'

³ Cheyala' soacho gonxenko Diosen', le naque' Xa Xancho Jesucriston', na' Jesucriston' lecze chonxene' le'. Xacho Diosen' cheyaše' cheži'ilaže'de' chio' na' len' cheyoe'xene' chio' cate' chac bi da' chac checho. ⁴ Ba cheyoe'xene' neto' len yogo' da' chzaca'zi'to' cont chac cheyoe'xento' yezica'chle bene' cate' bi da' cheseyi chesezaque'. Can' cheyoe'xen Diosen' neto', lecze can' cheyoe'xento' bene'. ⁵ Leca chyi chzaca'to' can' gwdi gwxaca' Criston', na' ca'cze leca cheyoe'xen Diosen' neto' da' chejnilaže'to' Criston'. ⁶ Da' zan da' chac cheto' da' chsed chlo'eto' xtiža' Diosen', perw zaca'czen' cont cheyoe'xento' le'e len da' chzaca'zi'le na' chaclenen le'e cont šjayzoale len Diosen'. Na' cheyoe'xen Diosen' neto' cate' bin' chac cheto', cont lecze neto' cheyoe'xento' le'e len bi da' chac chele. Na' cheyoe'xento' le'e cont chzoele cate' chzaca'zi'le can' lecze chzaca'zi' neto'. ⁷ Chbezto' gwyo gwchejle da' chac chele, le nezeto' caten' chzaca'zi'le can' chzaca'zi' neto', Diosen' lecze cheyoe'xene' le'e can' cheyoe'xene' neto'.

⁸ Bene' migw, chaclaža' nezele can' gwdi gwxaca'to' caten' gwzoato' distritw Asia. Gwdi gwxaca'chguato', con bich bi goc gonto' na' bento' xbab gatzeto'. ⁹ Da' li bento' xbab lo' yichjlažda'oto' ba za' yela' goten'. Na' goc cheto' ca' cont goebe'eto' bi soeczeto' gwyo gwchejto' dan' chzaca'zi'ton' san cheyala' šejnilaže'to' Diosen' cont gone' chač laže'to', Dios ben' chosban bene' guat ca'. ¹⁰ Na' caten' bento' xbab gatzeto' catec da' gosonde' neto', Diosen' bosle' neto' cont bi gotto' na' ne' choslacze' neto' na'a. Na' zoato' lez yoslache' neto' bate'teze. ¹¹ Zoato' lez yoslacze' neto' con še gaclenle neto' yol güižlene' cheto'. Na' še zanle gonle ca', nach lecze zanle güe'le yela' choxclen che' cate' ba goclene' neto'.

Pablon' gwžede' šje' ciuda Corinto

¹² Chbeda' choa' diža' can' chonto', le nezeto' lo' lažda'oto' chonto' güen len le'e do yichj do laže'to' na' lecze len note'tezechle bene'. Bi nacho chonto' güen neche da' nacto' bene' sina', san da' nži'ilaže' Diosen' neto', da'nan' chaclene' neto' chonto' güen len yogo'lol bene'. ¹³ Cart quinga chzojto' le'e, bi gonle xbab še naquechle zejen, san šejni'ilen con can' nyojen, na' zoa' lez šejni'ilen binlo. ¹⁴ Na' zoa' lez žin ža cate' gacbe'eyane'le cont yebele güe'le diža' nacle neto' txen, can' ba chacbe'ele late' dao' na'a. Na' cate' žin ža yid Xancho Jesúsena' da' yoble, yebele güe'le diža' nacle neto' txen na' neto' yebeto' güe'to' diža' nacto' le'e txen.

¹⁵ Cana' godca' yedena'a le'e cont da' yechop ni'a soacho txen, le bena' xbab yebele yedena'a le'e. ¹⁶ Goclaža' tia' yedena'a le'e caten' gwya'a Macedonia na' lecze goclaža' yedia' gan' zalna' cate' beza' Macedonian'. Na' godca' yeyoža'

gaclenle neda' yeya'a Judean'. ¹⁷ Do laža' gocda' gona' ca', gague chona' con can' žan chia' ca cheson bal bene' bi chesejnilaže' Diosen', to chesene' yesone' to da' yesone' na' to chesene' bi yesonen'. ¹⁸ Ca Diosen' chone' con can' že', lecze ca' neto' chnato' do laže'to' cate' chnato' to da' gonto'. ¹⁹ Na' lecze Jesucriston' bene' naque' Xi'in Diosen', toz can' naque' bate'teze, na' nac da' li yogo' can' gwnen', con can' gwduxjue'eto' xtižen' len le'e, neda', Silvano na' Timoteo. ²⁰ Na' yogo' da' güen da' ba gwna Diosen' gone', nezecho gonen' da' gwsele' Jesucriston'. Da'nan' len yela' chaclen che Jesucriston' chonxencho Diosen' che'chone': "Gacšca ca'." ²¹ Na' Diosen' chone' cont neto' na' le'e zoachachcho chejnilaže'cho Criston'. Na' bene' chio' Spiritw che'na' cont gac goncho xšinen'. ²² Na' lecze zoa Spiriton' lo' yichjlažda'ochon' cont nezecho Diosen' ba gwque'e chio' ca xi'ine' na' cont nezecho yogo' da' güen da' gwne' gone', žin ža cate' gonen'.

²³ Da' bina' yida' da' yoble Corinto gan' zoalen' yedena'a le'e can' gwnia' gona', bina' yida' cont bi yedetila' le'e che da' malen' chonle. Diosen' nombi'e yichjlažda'ogua' na' nezde' choa' diža' li chnia' ca'. ²⁴ Nezeto' gague neto' ye'to' le'e da' ni da' na' šejle'le. Ba zoachachle chejnilaže'le Criston', na' neto' con chaclento' le'e cont soachle mbalazch.

2

¹ Ca' goquen' bechoglaža' bi yedena'a le'e, le gocbe'eda' šaca' bedena'a le'e gocyas'e'cho. ² Na' šaca' bena' cont gocyas'e'le, nono zoa no yeyon cont yezoa' mbalaz, le ba bena' cont gocyas'e'laže'le še ca'. ³ Bzoja' carten' ca' cont cate' yida' gan' zonalna' bich gonle da' mal da' gonen gacyas'e'da', le cheyala' gonle cont yebeda'. Na' zoa' lez lecze mbalaz soa le'e cate' gonle soa' neda' mbalaz. ⁴ Bzoja' le'e do chegüine'laža', da' gwzoachgua' gocyas'e'da' che dan' chonlen', na' gwchežchgua' chele. Na' da' bzoja' carten' ca', gague gwzelaža' yegüine'le, san gwzelaža' gacbe'ele leca chacda' le'e.

Gwne' cheyala' yesyezi'xene' che bene' ben da' malen'

⁵ Da' li gocyas'e'da' can' ben bena' ben da' malen', perw gague neda'zen' gocyas'e'da'. Yogo'czle ba gocyas'e'laže'le late' güeje can' ba goquen'. Chnia' gocyas'e'le late' güeje cont bi nia' benche' chio' zi'ch ca cheyala' nia'. ⁶ Ndog nžagle txen gwchoglaole castigw che', na' da' na'zen' cheyala' si'e. ⁷ Bich güe'ln'e' castigw, san yezi'xenle che' na' le gon chach laže' cont soede' yela' chacyas'e'laže' chen' na' bi cuejyichje' Diosen'. ⁸ Da'nan' chneyoeda' le'e le gon cont gacbe'ede' chaquelene'. ⁹ Ba bzoja' le'e cana' cont gwnezda' naquen' chonle, še chzenagle chia' len yogo' dan' gwnia' gonle. ¹⁰ Na' na'a chaclaža' nezele note'teze bene' chezi'xenle che', lecze neda' chezi'xena' che'. Na' cate' chezi'xena' che bene', še zoa da' cheyala' yezi'xena', chezi'xenan' lao Criston', na' ba bezi'xena' che bena' cont chaclena' le'e. ¹¹ Na' chezi'xencho che bene' cont Satanás dan' chnabia' da' xigüe' ca' bi soen gonen chio' gan, le nezecho can' chaclažen' siye'czen chio'.

Pablon' goclaže' yežague' Titon'

¹² Cate' bžina' Troas gan' gwduxjue'eda' diža' güen che Criston', nabilia' Diosen' ba bene' cont bene' že' na' gosaclaže' bosozenague'. ¹³ Perw benchgua' xbab che bene' migw checho Titon' da' bi bžine' na'. Da'nan' goša' bene' ca': "Nayežagcho", na' beza' beya'a distritw Macedonian'.

Zoacho mbalaz da' nombia'cho Criston'

¹⁴ Choχclen Diosen', none' cont Jesucriston' ba bebeje' chio' lo' na' gwxiyen' na' mbalaz cheche'e chio' soacho len le'. Na' gate'teze zoacho, Diosen' chone' cont chesache'e bene' naquen da' güen juisyw nombia'cho Criston'.

15 Diosen' chebede' choncho cont chesacbe'e bene' naquen da' güen juisyw yesejnilaže' Criston'. Na' bale' chesejnilaže'ne' na' de yela' mban čhegaque' toli tocaņe, na' yebale' bi chesejnilaže'ne' na' chesebiaye'e. 16 Na' bene' ca' chesebiayi' bi chesyebede' can' chonchon', le che'chone' yesebiaye'e. Na' bene' chesejnilaže'ne' chesyebede', le ba goclenchone' cont ba de yela' mban čhegaque' toli tocaņe. Perw chio' bi chaccho to gualazcho gwlo'echo bene' ca güenna' naquen yesejnilaže' Criston'. 17 Bene' zan chosoše'e diža' da' cheso'e che Diosen' cont chesyebe bene' len xtiža'gaque' na' chosonežjue' legaque' mechw. Neto' bi chonto' ca', san do laže'to' choe'to' diža' lao Diosen' da' nacto' Criston' txen, le Diosen' gwsele' neto' choe'to' xtižen'.

3

Da' cobe da' gwna Diosen' gone' cont gaclene' beñačen'

1 Bi gonle xbab chonxen cuinto' choe'to' diža' quinga. Nezele chonto' xšin Diosen' do laže'to', na' bi chyažjen goxe'to' cart cont nezele nac nacto', na' neca chyažjen gwzojle cart da' goxe'to' cate' šejto' ga yoble. 2 Chaqueto' le'e da' gwduxjue'eto' xtiža' Criston' len le'e cont gwyejnilaže'lene'. Na' yogo'ze bene' guac yesele'ede' can' ba boša' yichjlažda'olen' na' guac yeseņezde' can' chonto' xšin Diosen'. 3 Gwyejnilaže'le Criston' caten' be'lento' le'e xtižen', na' Spiritw che Diosen' bocoben yichjlažda'olen'. Na' da' nachia' becobe yichjlažda'olen' zaca'chen ca no cart da' nyoj to le'e yiš o ca ley che Diosen' da' nyoj to le'e yej.

4 Cheyaxjeto' žato' ca' le Criston' zoe' chaclene' neto' cont nezetot' chonto' can' chazlaže' Diosen'. 5 Nezetot' bi chac bi gonto' to gualazto', na' nezetot' gague neče bi da' ba ben neto' bchoj xšin Diosen' güen, le Diosen' chone' cont chac bite'teze da' chac. 6 Na' Diosen' ba bene' cont chac chyixjue'eto' da' coben' da' gwne' gone' gaclene' chio' beñač. Na' da' coben' bi naquen ca ley che' dan' byoj cani' chzejni'in chio' beñač cuiayi'cho yela' güen da' mal chechon', san na'a Spiritw čhen' čonēn yela' mban toli tocaņe che chio' chejnilaže'chone'.

7 Cate' Diosen' bnežjue' da' Moisésen' ley che' dan' byoj le'e yej ta'a ca', bene' cont bene' Israel ca' gosacbe'ede' ley čhen' naquen da' zaca'. Na' cana' catec goctitechgua cho'alao Moisésen', bi goc yeseņa' bene' Israel ca' cho'alagüen', la'czla' gwdechle bega'a yela' chactiten' šolaže'. Na' ley nan' con bzejni'in beñačen' cuiayi'cho yela' güen da' mal chechon'. 8 Da'nān' nezecho leca zaca'ch da' chon Spiritw che Diosen' na'a cont gata' yela' mban checho toli tocaņe. 9 Diosen' blo'e yela' zaca' che ley čhen' la'czla' bzejni'in chio' beñač si'cho castigw da' bi choncho can' žanna'. Na' zaca'ch xtiža' Diosen' da' de na'a da' chzejni'in cheyone' chio' bene' güen. 10 Da' naquen da' zaca'chgua cani', bič naquen da' zaca' na'a, le ba de yeto da' zaca'chgua da' xench. 11 Na' da' blo'e Diosen' yela' zaca' che da' ben žin šložze cani', cheyała' gacbe'echo leca da' xench zaca' da' coben' da' bi te che.

12 Na' da' nezetot' gague da' te che da' cobe da' ba gwduxjw Diosen' cont chaclene' beñačen', da'nān' bi chedi'ito' chyixjue'eto' xtižen' sin cbi chžebto'. 13 Da' Moisésen' bcuaše' cho'alagüen' len to lache' bxin cont bene' Israel ca' bi besele'ede' čhenit late' güeje yela' chactit che cho'alagüen'. Perw na'a gague hcuaše'to' yela' zaca' che da' chon Diosen'. 14 Bene' Israel gualaž četo' ca' bi gosejni'ide', ne ža na'aža bi chesezejni'ide' cate' chosolabe' ley dan' byoj cani' gan' nyoj da' ca' gwna Diosen' gone' gaclene' legaque'. Con bene' ca' chesejnilaže' Criston' chesejni'ide' bi zejen. 15 Ža na'aža cate' bene' Israel gualaž četo' ca' chosolabe' da' ca' bzoj Moisésen', zjanaquen ca to da' ngaše' len legaque' yela' bi chejle' čhegaquen'. 16 Perw note'teze' cate' chesejnilaže' Xancho Criston', da' ca' zjanyoj bich chesaquen ca to da' ngaše'

len legaque'. ¹⁷ Xancho Criston' naque' toze len Spiritw che Diosen'. Na' cate' ba zoa Spiritw che Xanchon' lo' yichjlaždao' bene', bač zoe' binlo len Diosen'. ¹⁸ Yogo' chio' chejnilaže'cho Criston', yela' zaca' juisyw che Xancho Criston' bich ngašen' len chio', na' ba zejech cheyaquechcho bene' güen can' nac le', le zoa Spiritw che Xancho Criston' lo' lažda'ochon' chocoben xbab chechon'.

4

¹ Diosen' beyaše' beži'ilaže'de' neto' na' gwleje' neto' cont chyixjue'eto' xtižen'. Da'nan' bi cheche'eto' chyixjue'eton'. ² Na' bibi chonto' bagaše'ze ca no da' nac da' yela' zto'. Bi chonleto' bene' na' neca choša'to' xtiža' Diosen' cont yesyebe bene' chosozenag xtiža'ton'. San chle'ecze Diosen' chyixjue'eto' xtižen' con can' naquen cont yogo' bene' yesene xtiža'ton' yesenezde' lo' lažda'ogaquen' choe'to' diža' li. ³ Con bene' ca' ba zjambiayi' yela' bi chejle' chegaquen', legacze' bi chesejni'ide' diža' güen dan' choe'lento' legaque'. ⁴ Le bene' bi chesejle' xtiža' Diosen' chosozenague' che Satanás dan' chnabia' da' xigüe' ca' latje da' yosozenague' che Diosen', na' Satanásen' chonen cont nchoł yichjlažda'ogaquen'. Da'nan' diža' güen che Criston' bi chseñin' lo' yichjlažda'ogaquen' ca to be'ni' cont yesenezde' Criston' naque' bene' zaca' juisyw. Cayañe' nac yichjlaždao' Diosen' nac yichjlaždao' Criston', na' toz can' chesone'. ⁵ Na' ca' nac diža' da' chyixjue'eto', chyixjue'eton' gague cont gwzenagle che neto', san cont gwzenagle che Jesucriston' ben' naque' Xancho. Na' da' chaqueto' Jesucriston', zoato' chonto' bite'teze da' chaclenen le'e. ⁶ Na' Dios ben' gwne' gata' be'ni' yežlio nga gan' goc choł, ba gwlo'e be'ni' chen' lo' yichjlažda'ochon' cont nombia'cho Jesucriston' ben' nac bene' zaca' juisyw, na' cate' ba nombia'chone' chacbe'echo can' nac yela' bene' zaca' che Diosen'.

Pablo cho'e xtiža' Diosen' lagüe' da' chejnilaže'ne'

⁷ Cuerp checho quinga da' chesat zjazaca'leben ca to che'e nis da' naquen de gona'. Perw Diosen' ba gwlo'e be'ni' chen' lo' yichjlažda'ochon' na'a šlac ne' mbancho len cuerp checho quinga cont gacbe'echo bibi chac goncho še bi gone' yela' guac xen chen' cont gac bi da' goncho. ⁸ Na' neto', da' zan da' chyí chzaca'to', perw bi chbejyichjto' xšin Diosen'. Zan ni'a bi chežellaže'to' nacle gonto', perw nezeto' Diosen' chaclene' neto'. ⁹ Chosolagšibe' neto', perw Diosen' bi chbejyichje' neto'. Chosochi chososaque' neto', perw Diosen' bi cho'e latje yesote' neto'. ¹⁰ Gate'teze chejto', con yogo' ni'a chosochi chososaca' bene' neto' na' chesaclaže' yesote' neto' can' gosote' Jesúsén'. Na' Diosen' cho'e latje chac cheto' ca' cont nacbia' zoacze Jesúsén' chaclene' neto' šlac mbanto' len cuerp cheto' quinga. ¹¹ Na' šlac ne' mbanto', yogo' ža nita'cze bene' chesaclaže' yesote' neto' lagüe' da' chyixjue'eto' xtiža' Jesúsén'. Na' chac cheto' ca' cont nacbia' zoacze Jesúsén' chaclene' neto' šlac mbanto' len cuerp cheto' quinga da' yesat. ¹² Can' chac, tža tža chesaclaže' yesote' neto', san le'e ba de yela' mban chele toli tocañe.

¹³ Xtiža' Diosen' nyojen žan: "Chejnilaža' Diosen' na' da'nan' choa' diža' che'." Na' ca' ben' bzoj da'na' gwwejnilaže' Diosen', ca'czen' chejnilaže'to'ne' na' da'nan' choe'to' xtižen'. ¹⁴ Le nezeto' Dios ben' bosban Xancho Jesúsén' ladjo bene' guat ca' lecze žin ža yosbane' chio' še ba gotcho, na' neto' txen len le'e šjayzoacho gan' zoe'na'. ¹⁵ Nече le'e bžaglaoto' yogo'loł da' ba goc cheto'. Le chaclaže'to' gac zanchó gaclenchgua Diosen' chio' cont šejnilaže'cho Xancho Jesúsén', na' lecze gac zanchó güe'cho yela' choxcen che' catec bene' zacan' naque'.

¹⁶ Da'nan' bi chjaxe'laže'to'. La'czla' tža tža zej chaxo'ch cuerp cheto' quinga, lecze tža tža Diosen' chocobche' yichjlažda'oto'. ¹⁷ Yob te che bite'teze da' dao' da' chžaglaecho yežlio nga. Na' da' ca' chyi chzaca'cho chesacenen chio' cont soacho mbalaz juisyoch cate' šjayzoacho len Diosen' toli tocañe, na' lenna' da' zaca'ch ca bite'tezchle. ¹⁸ Nachen' bi chi' yichjcho che da' chle'echo yežlio nga, san chi' yichjcho che da' bi chle'echo. Le yesede che da' ca' zjade yežlio nga da' chle'echo, na' da' ca' bi chle'echo, gague da' yesede chegaquen, nita'czen toli tocañe.

5

¹ Cuerp chechon' zaca'leben ca to yo'o da' bi chzibia'. Na' nezecho še ba byinjen, Diosen' ba none' to yo'o güen checho yaban' da' soa toli tocañe; na' lenna' gague naquen to da' ben benach. ² Na' šlac ne' zoacho mbancho yežlio nga, chbežyaše'cho lo' lažda'ocho zelaže'chguacho šjayzoacho lo' yo'o da' non Diosen' checho yaban'. ³ Chona' xbab cuerp cobe da' gone' zaca'leben ca to xacho da' chyažjen chazcho cate' yežincho yaba. ⁴ Da' li chio' ne' chžaglaecho len cuerp checho quinga chbežyaše'cho lo' lažda'ochon'. Gague da' chaclaže'cho gatcho, san chaclaže'cho yeža' cuerp checho quinga da' te chen len to da' soa toli tocañe. ⁵ Na' Diosen' gwleje' chio' cont šjayzoacho len le' na' gwsele' Spiritw chen' zoan lo' yichjlažda'ochon' cont nezecho dech da' gone' checho.

⁶ Da'nan' bi chacžejlaže'cho, le nezecho šlac mbancho len cuerp checho quinga biña' šjayzoacho len Xancho Criston'. ⁷ Na' la'czla' biña' le'echo da' ca' gone' checho, zoacho chejnilaže'chone'. ⁸ Na' da'nan' bi chacžejlaže'cho, le chaclaže'cho cuejyichjcho cuerp checho quinga cont šjayzoacho len Xancho Criston'. ⁹ Nachen' zoacho choncho da' chazlaže' cont yebede' chio' šlac ne' mbancho na' cate' ba gotcho. ¹⁰ Le to tocho cheyala' techo lao Criston' gan' chone' yela' justisen' cont chogbi'en checho na' gone' soacho mbalaz o saca'zi'cho con can' ba bencho šlac mbancho, še bencho da' güen o da' mal.

Benachen' guac yesenite' binlo len Diosen'

¹¹ Na' dan' nezeto' yogo'cho yodecho cuent lao Xancho Criston' che yogo'lo' da' ba bencho, da'nan' chneyoeto' bene' yosozenague' che'. Diosen' nezde' do laže'to' chneyoeto' bene' yosozenague' che', na' zoa' lez lecze le'e chache'ele lo' lažda'olen' zoato' chonton' do laže'to'. ¹² Bi nacho chonxen cuinto' da' yoble dan' chnia' ca', san chnia' ca' cont yebele' can' chonton' na' nezele naquen' yoži'ile xtiža' bene' ca' chesenelagüe' cheto'. Bene' ca' chesa'laže' da' ba zjansede' na' da' zjanaque' no zjanaque'. Bibi xbab chesone' che can' nac yichjlažda'ogaquen'. ¹³ Še chaquele chactontto' can' ba benton', le gon xbab bento' con can' gwna Diosen'. Na' še chaquele zoašagüe'cze yichjlažda'oto', le gon xbab chonto' bi da' chonto' cont chaclento' le'e. ¹⁴ Leca chaque Criston' chio' na' da'nan' chonto' xšinen'. Na' nezecho toz Criston' bnežjw cuine' gote' neche yogo'cho, na' da' naccho txen len le' guac nacho yogo'cho ba gotcho len le'. ¹⁵ Bnežjw cuine' gote' neche yogo' chio' benach, cont soa cuezcho goncho can' chazlaže' na' bich soa cuezcho goncho con ca žan checho. Gote' na' bebane' ladjo bene' guaten' neche chio'. ¹⁶ Neto' cate' biña' šejnilaže'to' Criston' goqueto' bibi zaque', le bento' xbab zaca' bene' še no naque' lo' yežlio nga o še bi da' de che'. Perw na'a bich chonto' xbabben' ca' che Criston' o che note'teze bene'. ¹⁷ Na' note'tezcho še naccho Criston' txen, Diosen' ba bocobe' yichjlažda'ochon'. Na' bich chebecho da' ca' bebecho cana' na' bich choncho can' bencho cana'. Zoacho ca bene' cobe.

¹⁸ Diosen' bozoe' chio' binlo len le' na' bene' cont beyaccho ca bene' cobe cate' gwyejnilaže'cho Criston'. Na' gwlo'e lo' na'cho ye'cho bene' can' yesenite'

binlo len Diosen'. ¹⁹ Ye'cho legaue' Diosen' gwsele' Criston' cont note'teze bene' yesejnilaže' le' yesenite' binlo len Diosen', na' Diosen' bich gone' cuent che da' xinj dan' ba gosone'. Can' cheyala' ye'cho bene' cont yesenite' binlo len Diosen'. ²⁰ Criston' gwsele' chio' ca cuine' na' Diosen' chaclaže' neyoecho bene' ca cuincze Criston' chneyoede' legaue', ye'chone': "Le soa binlo len Diosen'." ²¹ Criston' bibi da' mal bene'. Perw na' Diosen' bene' cont Criston' gwxaca'zi'e neche xtolā'chon' cont none' chio' bene' güen da' chejnilaže'chone'.

6

¹ Neto' chonto' xšin Diosen' txen len le'. Da'nān' chneyoeto' le'e, le gon can' chazlaže' Diosen' cont gwlo'ele naquen to da' zaca'chgua da' beyaše' beži'ilaže'de' chio'. ² Nyoj can' gwne':

Cate' bžin ža goc da' bžia' bia', cana' bzenaga' chio'.

Na' cate' bžin ža benan', cana'chen' goclena' le'.

Na' dan' nyojen ca' zejen na'a bach bžin žan' chaclen Diosen' beñachen', le ža na'aža chnežjue' yela' mban toli tocanē che bene' chesejnilaže' Jesucriston'.

³ Bi chonto' bite'teze da' gwžon cont bene' bi yesejnilaže'ne', le chaclaže'to' bibi gata' da' yesenelagüe bene' che xšin Diosen' da' chonto'. ⁴ Da'nān' bite'teze da' chonto' chlo'eto' chonto' xšin Diosen' ca cheyala'. Chyo chchejto' cate' chosoči chososaca' bene' neto', cate' chzaca'zi' chzaca'yaše'to', na' cate' za'ac bichle da' mal len neto'. ⁵ Zoa cate' goseyine' neto', cate' goseyixjue' neto' ližya, na' cate' gosebeque' žaš che xtiža'ton'. Zan las bento' žin gual, na' gwlejšto' bišgal na' gwbił gwdonto'. ⁶ Na' da' chi' yichjšto' chonto' xšin Diosen' can' chazlažen', bitw bi da' yela' zto' chonto'. Chzejni'ito' bene' len yela' chejni'i che Diosen', naptō' yela' chxenlaže' len yogo'lol bene' na' chonto' güen len yogo'lole'. Chonto' con can' chzejni'i Spiritw che Diosen' neto', na' do laže'to' chaqueto' yogo'lol bene'. ⁷ Zoato' chzejni'ito' bene' diža' li, na' chonto' yogo'lol da' chonto' len yela' guac che Diosen'. Na' da' zoato' chonto' da' zej to licha, chaclenen cont soeto' tillento' da' malen' na' cont bi gwzenagto' che gwxiyen'. ⁸ Zoato' chonto' xšin Diosen' can' chazlaže' cate' chesonxen bene' neto' na' cate' chesegue'ede' neto', cate' chesene' güen cheto' na' cate' chesene' mal. Choe'to' diža' li, cate' bene' chesejle'e cheto' na' cate' bene' chesacde' chonlaže'to'. ⁹ Bał bene' bi chesejle'e chonto' da' zaca', perw yebale' zjanēzde' chonto' da' zaca'. Zan las chonto' xbab gatczto', perw ne' mbanto'. Na' la'czla' yogo' da' ca' chac cheto', bina' yesote' neto'. ¹⁰ Da' zan da' chac cont gacyaše'to', perw chbeto' lo' lažda'oton'. Nga'anyaše'to', perw chonto' cont bene' zan nite' mbalaz. Na' la'czla' bibi de cheto', yogo'lol bi da' de naquen cheto' da' nacto' Criston' txen.

¹¹ Le'e bene' Corinto, bach be'lento' le'e yogo' diža' da' yo'o lo' lažda'oton', le chacchgüeto' le'e. ¹² Nži'ilaže'to' le'e, perw le'e bitec nži'ilaže'le neto'.

¹³ Chata'yoeda' le'e ca chon to bene' len xi'ine', le gaque neda' ca chacda' le'e.

Spiritw che Diosen' zoan lo' yichjlaždao' chio' chejnilaže'chone'

¹⁴ Bi cheyala' gaccho txen len bene' bi chesejnilaže' Criston'. Še Diosen' ba none' chio' bene' güen len le', bich gac goncho txen len bene' cheson da' malen'. Chio' yo'o be'ni' che Criston' lo' yichjlažda'ochon' bi cheyala' goncho txen len bene' bi yo'o be'ni' chen' lo' yichjlažda'ogaue'. ¹⁵ Criston' bi chac gone' txen len Satanás dan' chnabia' da' xigüe' ca', na' ca'cze bene' chejnilaže' Criston' bi cheyala' gone' txen len bene' bi chejnilaže' Criston'. ¹⁶ Nezecho bi gac še' l gua'a lsaca' da' chesejnilaže' bene' lo' yodao' gan' chejnilaže'cho Diosen', na' ca'cze bi chac soa Diosen' len chio' chejnilaže'chone' še zoa bichle da' chejnilaže'cho. Chac can' gwna Diosen':

Soa' len legaue' na' talena' legaue'.

Neda' Dios naca' ben' yesejnilaže' na' legaue' yesaque' yež chia'.

¹⁷ Da'nan' cheyała' goncho can' gwna Xancho Diosen':

Le yechoj len beņe' bi chesejnilaže' neda' na' bi gacle toze len legaue'.

Na' bi gonle da' xinjen'.

Nachen' yebeda' soa' len le'e.

¹⁸ Na' gaca' Xale, na' le'e gacle xi'ina'.

Can' ža Xancho Dios ben' nape la'zelagüe yela' guac xen.

7

¹ Le'e beņe' chacda', ba nezecho can' gwna Diosen' gone' güen len chio'. Da'nan' cheyała' cuejyichjcho bich goncho bite'teze da' xinj da' gwchenen cuerp chechon' o yichjlažda'ochon'. Na' cheyała' gapcho Diosen' bala'an gwzenagcho che' tža tža na' šejch gaccho beņe' güen can' chaclaže'.

Ba bža' xbab che beņe' Corinto ca'

² Le gaque neto'. Ne tole bibi beneto'. Ne tole bi bzejni'ito' clele, na' ne tole bi gwziye'to'. ³ Gague žia' ca' cont tila' le'e, le can' ba gwnia' cana', chacda' le'e na'a šlac mbancho na' lecze ca' gacda' le'e cate' ba gota'. ⁴ Nezda' lo' lažda'ogua' gonle can' chazlaže' Diosen', na' chbeda' choe'lena' beņe' diža' ca' güen na' chonle. Ba beyacxenlaža' da' gwnezda' chonle güen, na' zoa' mbalaz la'czla' da' zan da' chac chia'.

⁵ Cate' bežinto' Macedonian' bibi latje gota' cont yezi'laže'to' len da' gwdi gwxcaca'to'. Gwnita' beņe' bososašlene' neto' na' lecze bžebto' lo' yichjlažda'oto' goqueto' nac gacto'. ⁶ Na' Dios ben' cheyoe'xene' beņe', beyoe'xene' neto' da' bela' Titon'. ⁷ Na' beyacxenlaže'to' gague da' bele'e na'zen' san da' bedeye'e diža' chebede' can' chonlen'. Na' be'e diža' zelaže'le yedeņa'to' le'e da' yoble. Na' že' chegüine'le che dan' ba goquen' na' chi' yichjle gonle can' gwnian'. Nachen' leca bebechda' gwnezda' da' ca'.

⁸ Chache'eda' gocyase'le can' gwnia' le'e carten' bzoja' le'e. Na' gwdechle betinjda' da' bena' cont gocyase'le, perw na'a bich chetinjda' da' gwsela' carten', le šložzen' gocyase'le. ⁹ Chbeda' na'a, le goclenen le'e cont begüine'laže'le che da' xinjen' benle na' betinjle chen, can' goclaže' Diosen'. Na' can' goquen' bi bchojen mal dan' gocyase'len'. ¹⁰ Cate' ba bencho da' xinj, Diosen' chaclaže' yegüine'cho che dan' benchon' na' yetinjechon. Na' chone' yela' mban toli tocaņe che chio' chetinje xtoła'chon', na' leca mbalazch soacho še ba betinjecho xtoła'chon'. Perw beņe' zan cate' chesegüine'laže' bi chesyetinjde' xtoła'gaquen', nach yesebiaye'e. ¹¹ Chebe Diosen' can' begüine'len', le goclenen gwzelaže'le benle can' gwna Diosen'. Goclaže'le gwlo'ele bich chonle txen len ben' ben da' xinjen', san bža'ale che da' xinjen' benen'. Bžeble yedeyena' le'e castigw na' gwzelaže'le gonle ca' yebeda'. Nach be'le castigw che ben' ben da' xinjen'. Nacia' bich bi xtoła'le de can' benlna'. ¹² Na' ca' nac carten' bzoja' le'e, gague gwche' yichja' che ben' ben da' xinj na'ze, o che ben' bende' ca', san gwche' yichja' che le'e cont gache'ele lao Diosen' ne' chaquele neto' na' ne' chaclaže'le gonle can' che'to' le'e. ¹³ Na' na'a ba beyacxenlaže'to' da' bzenagle cheto'.

Na' lecze chebechgüeto' ca' mbalaz zoa' Titon', le yogo'le benle ga bezoa' Titon' binlo len xbab da' yo'o lo' yichjlažda'ogüen'. ¹⁴ Goša' Titon' nezda' gonle güen. Na' bi cheto'eda' da' goša'ne' ca', le ca' da' li zjanac yogo' da' chzejni'ito' le'e, lecze ca' da' li bchoj dan' gožto' Titon', na' nacia' be'to' diža' li. ¹⁵ Na' ba chacchde' le'e cate' chjayze'ede' da' bzenagle che' na' da' bžeble caten' gwnezele benle da' xinjen'. ¹⁶ Da'nan' chebeda' na' nezda' yeyož gonle can' chazlaže' Diosen'.

8

Besezande' da' gota' chegaque' gosaclene' bene' yoble

¹ Bene' migw, chaclaže'to' nezele can' ba goclen Diosen' to cuen to cuen bene' ca' chesedop chesežag chesonxene' Criston' to to yež gan' mbane distritw Macedonian'. ² Gocchgua yela' yaše' yela' zi' chegaque', perw Diosen' bene' cont gwnita'chgüe' mbalaz lo' yichjlažda'ogaquen' na' besyebchgüede' bosotobe' mechw xen cont gosaclene' bene' yoble. ³ Nezda' na' choa' diža' bosonežjochgüe' da' beseyažje bene' yoble la'czla' bibi gota' chegaque', na' con xbab chegaczen' gosone' ca'. ⁴ Goseneyoede' güe'to' latje yosonežjue' mechw cont yesaclene' bene' ca' chesejnilaže' Diosen'. ⁵ Na' gosonche' can' bento' xbab yesone', le zgua'tec goson cuingaque' lo' na' Xancho Criston' na' lecze goson cuine' lo' na' neto' dan' gosaclaže'chgüe' yesone' can' chazlaže' Diosen'. ⁶ Da'nan' ba gota'yoeto' Titon' yeyede' yeto gan' zoale cont gaclene' le'e yeyož gwtoble mechw dan' goclene' le'e gwzolaobto'ble cana'. ⁷ Güenchgua chonle chejnilaže'chguale Criston' na' choe'chguale xtižen', da' zan da' chejni'ile che Diosen', chonchguale xšinen', na' chaquechgüele neto'. Lecze le gon güenchgua na' le gwtobe da' cheseyažje bene'.

⁸ Bi chona' byen gwnežjwle mechon', san chaclaža' gonle xbab še chaquele Diosen' na' še chaque lježle do laže'le can' goson bene' Macedonian' da' chesacde' Diosen' na' lježgaque'. ⁹ Nezele leca nži'ilaže' Xancho Jesucriston' chio'. Da' chacde' chio' bcua'ane' yogo'lol da' šagüe' da' de che' gan' zoe' len Diosen' na' bide' golje' bene' yaše' yežlio nga, bedeyene' cont yogo' dan' de che' gaquen checho naccho txen len le'.

¹⁰ Nachen' gwzejni'ida' can' chacda' naquen güen gonle. Godgüiz goclaže'le gaclenle bene' yaše' ca' na' gwzolaole btoble mechon' do yichj do laže'le. ¹¹ Na' chacda' güen yeyož gwtoblen na'a do yichj do laže'le can' gwzolaole, na' gwnežjwle con ca' zelao saque'le. ¹² Note'tezcho še do laže'cho chaclaže'cho gwnežjwcho bi da' gwnežjwcho, Diosen' yebede' la'czla' late'ze da' de da' gwnežjwchone'. Bi chnabe' gwnežjwchone' da' bi de checho.

¹³ Bi žia' gonle cont bich bi yega'an chele na' gata' che bene' yoble. ¹⁴ Con chaclaža' gata' da' chyažje yogo'le. Šlac na'a de che le'e, cheyala' gaclenle bene' ca' cheseyažjde'. ¿Chixe še gwžin ža cate' gata' chegaque' na' le'e chyažjele? Cana'chen' yesaclene' le'e cont gata' da' chyažje yogo'le. ¹⁵ Nach gac can' nyoj Xtiža' Diosen' žan: "Bene' botobe' da' zcha'o, bitw nacho becho'onen che', na' bene' botobe' late'ze, gota'cze da' byažjde'."

Titon' na' bene' lježe' ca'

¹⁶ Choxcnen Diosen' bene' cont Titon' zelaže'chgüe' gaclene' le'e con can' zelaža' neda'. ¹⁷ Na' cate' goša'ne' yedene'e le'e da' yoble cont gaclenche' le'e, bebede', le to gualaze' bene' xbab yeyede' gaclenche' le'e.

¹⁸ Na' chsela'to' yeto bene' lježcho len Titon'. Na' to cuen to cuen bene' ca' chesedop chesežag chesonxen Jesucriston' cheso'e diža' che bengal chsela'to', chesene' binlo chyixjue'ede' diža' güen che Jesucriston'. ¹⁹ Nachen' lecze gosebeje' le' cont sa'lene' neda' cate' ša'a gan' že' bene' lježcho ca' šjasana' mechw dan' chtobcho. Na' gwnežjwcho mechon' cont gacxen Xancho Jesucriston' na' cont gwlo'ele chbele chaclen bene' lježle. ²⁰⁻²¹ Yo'o yichjto' gonto' da' nac güen lao Xancho' na' lao beñachen', le mechw xenna', na' bi chaclaže'to' yesene' chonto' clele len len.

²² Na' lecze chsela'to' yeto bene' lježcho len legaue'. Zan ni'a ba ble'eto' chone' xšin Diosen' do yichj do laže' na' na'a leca žan yide' gan' zoalen' da' nezde' zelaže'chguale gonle can' chazlaže' Diosen'. ²³ Na' ca' nac Titon', chone'

xšin Diosen' txen len neda' cont chaclento' le'e. Na' bene' ca' yechope, zjanite' chesone' cont Criston' chaxene', na' bene' ca' chesedop chesežag chesonxene' Jesucriston' gosebeje' legaue' na' chesesele' legaue'. ²⁴ Da'nān' chnia' le gon güen len legaue' cont bene' ca' chesonxene' Criston' to to yež yesenezde' chaquele legaue', na' le gwlo'e chonle güen can' gwnato' cate' be'to' diža' güen chele.

9

Bosotobe' mechon'

¹ Bi chonen byen gwzoja' le'e nia' cheyała' gwnežjwle mechw da' gaclen bene' chesejnilaže' Criston' ga yoble. ² Nezda' chaclaže'le gaclenle legaue'. Na' ba be'lēna' bene' Macedonia ca' diža' cont yesenezde' le'e zoale distritw Acaya chaclaže'le gaclenle bene' yaše' ca' na' gwzolaole btoble mechon' godgüiz. Da'nān' bene' ca' že' zan yež distritw Macedonia lecze ba chesone' ca'. ³ Perw bia'cze chsela' bene' ca' len Titon' cont diža' dan' ba bia' chele catec güenna' chonle bi gaquen ca da' güenlaže'. Chaclaža' yeyož gwtoble mechua' cont ba den cate' yida'. ⁴ Le še sa'len no bene' Macedonia neda' cate' yedēna'a le'e da' yoble, na' yeto'eda' chele še biņa' gata' mechua', na' lecze le'e yeto'ele da' bi benle can' gwnia' gonle. ⁵ Da'nān' godca' güen yesebialao bene' lježcho ca' šone yeside' gan' zoalen' cont yesaclene' le'e yeyož gwtoble mechw dan' gwnale gwnežjwle. Nachen' gwnežjwlen do yichj do laže'le, gague gwnežjwche'elen.

⁶ Le gon xbab can' chesene': "Bene' chaz late'ze, late'ze chelape', na' bene' chaz da' zcha'o, da' zcha'o chelape'." ⁷ Da'nān' to tole cheyała' gwnežjwle gaca'te' da' chebele gwnežjwle, na' bi gwnežjwche'elen, san gwnežjwlen do laže'le, le chebe Diosen' bene' zoa mbalaz chzande' bi da' chnežjue'. ⁸ Diosen' nape' yela' guac cont chaclenchgüe' chio' len bite'teze da' chyažjecho. Na' chac chone' cont chata' yogo'lol da' chyažjecho bate'teze neche gac gwnežjwcho da' chyažje bene' yoble na' goncho bichle da' güen. ⁹ Quinga nyoj Xtiza' Diosen' che bene' chzande' da' de che', žan:

Ba bnežjue' da' beseyažje zan bene' yaše'.

Na' bi ganlaže' Diosen' da' güen dan' benen'.

¹⁰ Diosen' chone' cont chata' no xoa' biņ na' bichle da' chazcho; chone' cont chata' da' che'ej da' chagwcho. Lecze le' gone' cont gata' bichle da' chyažjele na' cont cha'o xenchen, na' gone' cont šejchle gonchle da' güen. ¹¹ Bite'teze da' chac chele, Diosen' gone' cont gata' da' zcha'o da' gwnežjwle bene' yoble. Nach cate' šjanežjwto' bene' yaše' ca' dan' ba btoble, yeso'e yela' choxcen che Diosen'. ¹² Le da' gwnežjwle da' cheseyažje bene' chesejnilaže' Jesucriston' ga yoble, bene' zan yeso'e yela' choxcen che Diosen'. ¹³ Na' cate' bene' yaše' ca' yesezi'e mechon' chtoble, gwlo'en chzenagle diža' güen che Criston' do yichj do laže'le. Nach legaue' yeso'e yela' choxcen che Diosen' da' gwseła'le da' zcha'o mechw da' gaclenen legaue'. Lecze yeso'e yela' choxcen che' da' chaclenle yogo' bene' chesejnilaže' Criston'. ¹⁴ Na' do chesacde' le'e yosol güiže' Diosen' yesenabe' gaclenche' le'e, le nachia' ba nži'ilaže'chgua Diosen' le'e. ¹⁵ Choxcēn Diosen' gwsele' Xancho Jesucriston' len chio'. Bibi diža' de da' nācho catec zaca' goclēnna' da' bene' len chio' gwsele'ne'.

10

Diosen' gwleje' Pablon' cont bzejni'ide' bene'

¹ Chesena bal bene' chžeba' tila' le'e cate' zoa' len le'e na' con cate'ze zoa' zito' chzoja' cart chdila' le'e. Bi naquen ca', san chneyoeda' le'e diža' šagüe' ca' Criston' gwneyoede' bene' diža' šagüe' da' goque' bene' xenlaže' na' bene'

šagüe'. ² Chneyoeda' le'e gonle da' güen cont bi tila' le'e caten' yedetila' bene' chesacde' chona' con can' žan chia'. ³ Na' la'czla' zoato' lo yežlion' na' nacto' benačze, cate' chdillenton' da' malen' bi chdillenton' ca benačze. ⁴ San Diosen' none' neto' yela' guac cont chzoeto' chlej chšoštjo' yogo' da' chon gwxiyen', le bi soeto' tillenton' to gualazto'. ⁵ Can' chac, Diosen' chaclene' neto' chonto' cont chosozexjwyichj bene' chosozenague' che Criston' na' chesebejyichje' xbab mal čhegaquen' na' bichle da' cheseza'laže' da' chžonen yesombi'e Diosen'. ⁶ Na' cate' yeyož gata'bia' še yogo'le gwzenagle che Diosen', cana' ngüiato' gonto' castigw che nole bi chzenagle che'.

⁷ Le gon xbab che dan' chle'ele chonto'. Še nole chaquele nacle txen len Criston', le yeyon xbab lecze neto' nacto' txen len le'. ⁸ Na' bi yeto'eda' güe'cha' diža' yelate' can' ba bian', le chebeda' gwsela' Xancho Criston' neto' cont bzejni'ito' le'e diža' da' goclenen le'e, gague da' bžiyain' le'e. ⁹ Bi chaclaža' no gacde' še chzoja' cart quinga cont gwšeba' le'e. ¹⁰ Bene' ca' chesenelagüe' chia' chesene' cate' zoa' zito' chzoja' cart znia ca che no bene' gwnabia', na' chesene' bi chac bi gona' cate' zoa' len le'e na' bi choa' diža' da' zaca' gwzenagle. ¹¹ Bene' ca' chesenelagüe' chia' cheyala' yesenezde' can' žato' le'e cart da' chzojto' le'e cate' zoato' zito', lecz ca' gonto' cate' yedesoato' len le'e.

¹² Bi chaclaže'to' gonlebeton' bene' ca' chesonxen cuingaque'. Chesacde' güenchgua chesone', le to toe' con chesena' lježe' cont chesene' chesonche' güench clcl ca cheson bene' lježe', na' bibi zejen chesone' ca'. ¹³ Neto' bi gonxen cuinto'. Con güe'to' diža' che da' ca' goclen Diosen' neto' bento' gan' ba gwsele' neto', le lecze gan' zoalen' ba gwsele' neto'. ¹⁴ Da'n'an' bi chonlaže'to' cate' choe'to' diža' che da' ba bento' gan' zoalen', le nacto' bene' nechw bzejni'ito' le'e diža' güen che Criston'. Šaca' bi bento' žin gan' zoalen' chonlaže'to' choe'to' dižan' ca', perw benton'. ¹⁵ Na' bi güe'to' diža' che da' ben bene' yoble, bi nato' neto' benton'. Zoato' lez šejnilaže'chle Criston' cont gaclenle neto' gonchto' xšin Diosen' gan' zoalen'. ¹⁶ Na' chaclaže'to' chixjue'eto' diža' güen che Criston' ga naquen zito'ch ca gan' zoale na'. Chaclaže'to' chixjue'eton' ga nono na' chixjue'eden' cont güe'to' diža' che xšin Diosen' da' ba bento' na' bi güe'to' che da' ba ben bene' yoble.

¹⁷ Bi cheyala' gonxen cuincho, san cheyala' gonxencho Xancho Dios. ¹⁸ La'czla' še to bene' ne' chone' güen, bi naquen da' šejle'cho. Perw še Xancho Diosen' ne' chone' güen nachen' nezecho da' li chone' güen.

11

Pablon' na' bene' ca' cheson cuingaque' postlw

¹ Chaclaža' gwzenagle yeto' chop diža' güen da' gua' che cuina' la'czla' še chaquele naquen diža' da' bibi zaca'. Le gwzenag chia'. ² Neda' bzejni'ida' le'e xtiža' Criston' da' nechw cont gwyejnilaže'lene', na' Diosen' chone' cont chacda' le'e do yichj do laža'. Na' chaclaža' gaquele toze Criston' cont zaca'le gona' le'e lo ne'e, gacle ca to no'ol güego', no'ole napši'i cuine' da' chacde' toz bene' byo bene' si' le'. ³ Chxožda' yeseziye' bene' le'e cont bich šejnilaže'le Criston' do laže'le na' bich gaquele toz le'. Can' gwziye' belen' da' no'ole nechon', no'olen' gože' Eva, da' nacba' be xigüe'. ⁴ Cate' chesela'ac bene' gan' zoale na' chosozejni'ide' le'e che Jesúsen' nža'le can' ba bzejni'ito' le'e, o chosozejni'ide' nža'le che Spiritw che Diosen' o che diža' güen čhen', la' chzenagtele čhegaque'. Da'n'an' chxožda' yeseziye'e le'e. ⁵ Ba nonle bene' ca' ca postlw chele na' chonxenle legaque'. Na' neda' zaca'cha' ca legaque'. ⁶ La'czla' bi choa' diža' xdan ca chesoe' legaque', ba ble'eczele yogo' dan' ba bento' na' nezzele chejni'ito' xtiža' Diosen' binlo.

⁷ ¿Chaquele malen' bena' bibi laxjua' gwxia' cate' be'lena' le'e diža' güen che Diosen'? Ben cuina' ca to bene' bibi zaca' da' bibi laxjua' gwxia' cont bena' ga zoachle mbalaz. ⁸ Gwxia' mechw da' goson bene' ca' chesedop chesežag chesonxene' Criston' ga yoble cont be'lena' le'e xtiža' Diosen'. ⁹ Na' cate' gwzoo' len le'e, la'czla' bi gota' da' byažjda', bi gwnabdan' le'e. Bene' ca' zeya'ac Macedonia gosone' da' byažjda' cont bi benda' le'e zed, na' bate'teze gwbatech gonda' le'e zed gonle da' chyažj chchinda'. ¹⁰ Chebeda' chac chnia' bibi gan chona' chyixjue'eda' xtiža' Diosen' len le'e o len bene' že' yež yoble ga mbane distritw Acayan'. Na' can' nezda' chaclen Criston' neda' choa' diža' li, can' nezda' gwbat gonda' le'e zed cont gonle da' chyažj chchinda'. ¹¹ Perw gague da' bi chacda' le'e bi gonda' le'e zed. Diosen' nezde' chacda' le'e.

¹² Na' gonchcza' can' chona' bibi laxjua' chzia' cont bi žel bi yosode'e bene' ca' yesene' toz can' chesone' len da' chon neto', le can' chesaclaže' yesene'. ¹³ Legaque' bi zjanaque' dogualje postlw. Con chosozejni'ide' diža' güenlaže' na' chesonlede' le'e cont gaquele gwseła' Criston' legaque'. ¹⁴ Bi yebanele can' chesonen', le ca'czen' chziye' Satanásen' chio', cheyon cuinen ca to angl bene' chactitchgua cont gaquecho naquen to angl güen bene' za' gan' zoa Diosen'. ¹⁵ Na' ca'czen' cheson bene' ca' chosozenag chen, chesonlede' le'e cont gaquele chosozejni'ide' diža' güen. Perw žin ža yezezaca'zi'e toli tocaņe yela' güen da' mal chegaquen'.

Da' ca' gwdi gwxaca' Pablo da' naque' postlw

¹⁶ Da' yoble žia' le'e, bi gaquele chona' xbab da' bibi zaca' can' chon bene' bi chejni'i. Perw la'czla' še chaquele chona' xbab da' bibi zaca', le gwzenag chia' šlac gua' to chope diža' güen che cuina'. ¹⁷ Gua' diža' güen che cuina' la'czla' nezda' Xancho Criston' bi be'e diža' güen che cuine'. Guan' ca bene' chon xbab da' bibi zaca', bene' bi chejni'i. ¹⁸ Bene' zan cheso'e diža' güen che cuingaque' che bi da' ba gosone' o bi da' ba goc chegaque', na' ca'czen' gona' neda'. ¹⁹ Ba non cuinle bene' sina' na' da'na'ljan' chbele chzenagle che bene' cheson xbab da' bibi zaca'. ²⁰ Chzenagle che bene' ca' ba gosone' le'e ca xmosgaque'. Choe'le latje cheseziye'e le'e cont chnežjwle legaque' bi da' de chele na' chontezle bi da' chesene'. Chesonxen cuingaque' na' chesebaže' le'e cont chzenagle chegaque', na' bia'cze choe'le latje chosozejni'ide' le'e. ²¹ Chonljale xbab bžebo' le'e dan' bi beneto' le'e ca'.

Na' da' yoble gua' diža' ca bene' chon xbab da' bibi zaca', le bite'teze diža' güen da' cheyaxje bene' güe'e che cuine' note'teze naque', lecze cheyaxjda' gua' dižan' nac ca' che cuina'. ²² Chesonxen cuingaque' da' gosalje' gan' že' bene' chesaque' diža' hebreo. Nezczele lecze goljelena' bene' chesaque' diža' hebreo. Na' chesonxen cuingaque' da' zjanaque' bene' Israel. Nezczele lecze bene' Israel neda'. Na' chesonxen cuingaque' da' gosalje' lo diaža che da' Abraham. Na' nezeczele lecze diaža che da' Abrahanna' neda'. ²³ Chesene' Criston' gwsele' legaque' cont yesone' xšine'. Nezczele Criston' gwsele' neda' na' ba bencha' xšinen' ca legaque'. Si'xenle dan' choa' diža' ca bene' chon xbab da' bibi zaca', ca bene' bi chejni'i. Ba bencha' žin gual ca legaque', zan ni'ach ba goseyin justis ca' neda' da' choa' xtiža' Diosen' clal ca da' ba goc che legaque'. Na' zan ni'ach bene' ca' chesegue'ede' neda' ba goseyixjue' neda' ližya clal ca dan' ba goc che bene' ca' chosozejni'ide' le'e. Na' zan ni'a ba bela' cbi gota'. ²⁴ Gayo' ni'a goseyin bene' Israel gualaž chia' neda' tašjw de yid togaljechoa ni'a güeje. ²⁵ Šone ni'a bene' justis ca' goseyine' neda' xis. Na' tni'a bosotacue' neda' yej yelate'ze ca gosote' neda'. Na' cate' zya'a yež zito' to lo' barcw, šon ni'a bochinj nesdaon' barcon', na' caņe bžina' yo biž. Na' lo šon ni'an beyinjenna', tni'a gwdeła' nesdaon' tža tyel. ²⁶ Zan ni'a ba gwy'a

yež zito' jatixjue'eda' xtiža' Criston'. Zan ni'a cane goc gwdia' yegw ca'. Zoa cate' goca' lo na' bene' gwban. Zoa cate' bene' Israel gualaż chia' gosaclačže' yesote' neda', na' zoa cate' bene' bi zjanaque' bene' Israel gosaclačže' yesote' neda'. Na' zan ni'a do lo ciuda, do ga nono bene' že' na' do lo nisdaon' yelate'ze bi gota'. Na' yogo' ža chaš bene' chesonlaže' chesene' zjanaque' chio' txen na' chxožda' yosožiaye'e xšin Diosen' dan' chonan'. ²⁷ Zan ni'a ba bena' xšin Diosen' benten ga jaxaque'chgüeda', na' zan ni'a bchejda' bi gwtasa'. Nombi'a yela' chbił chdon, le zan ni'a bi gota' da' ye'ej gagua'. Na' lecze zan ni'a beyaga' bi gota' xa' da' byažjda'.

²⁸ Da' zanch da' ba gwdi gwxaca' da' bi choa' diža', na' lecze yogo' ža chi'chgua yichja' nac chac che le'e chdop chžagle chonxenle Criston' to to yež. ²⁹ Note'tezle cate' bi zoachachle len Criston' o bi chzoele gonle can' chazlaže' Diosen', chacyaše'chgüeda' cacze nacho nedan' chona' ca'. Na' lecze cate' bene' chesego'oyele' le'e cont chonle da' mal, leca chacda' lo' yichjlažda'ogua' na' chža'a dan' ba chonle can' že'na'. ³⁰ Na' da' chonen byen güe'cha' diža' che cuina', nach gua' diža' che da' ca' chlo'en bi chac bi gona' to gualaza'. ³¹ Dios bene' cheyala' gonxencho toli tocanē nezde' choa' diža' li. Len' naque' Xa Xancho Jesucriston' na' chonxen Jesucriston' le'. ³² Na' yeto da' goc chia', cate' gwzoo' ciuda Damasco, bene' goc gobernador šlac gwnabia' rey Aretas bnite' bene' gosape' cho'a puert da' zoa le'e ze'e da' nyečhj ciudan' cont yesezene' neda' cate' yechoja'. ³³ Perw bene' lježcho ca' gosegüe'e neda' to lo' žome xen na' besyeletje' neda' to cho'a ventan le'e ze'e da' nyečhje ciudan' cont bi gosezene' neda'.

12

Da' ble'edagüe' Pablon'

¹ Bi chazlaža' güe'cha' diža' güen che cuina', san gua' diža' che da' ca' da' ba ble'edagüe'da' na' da' ca' ba bzejni'i Xancho Criston' neda'. ²⁻³ Ba chejnilaža' Criston' cate' goc chia' quinga ba goc žta' iz. Diosen' bene' neche gwya'a yaban' gan' zoen'. Bi nezda' še gwya'a len cuerp chia', Dios nan' nezde'. ⁴ Con nezda' bžina' gan' zoa Diosen' na' benda' bene' ca' že' na' cheso'e diža' zaca' da' bi chac nia', diža' zaca' da' bi de latje güe' beňach yežlio nga. ⁵ Šaca' žan gonxen cuina', yejni'a gonxen cuina' che da' ca' ba blo'e Diosen' neda', perw bi žan gonxen cuina' che bi da' ba bena' neda'. Con gua' diža' che da' ca' ba goc chia' da' chosolo'en bi chac bi gona' to gualaza'. ⁶ Šaca' žan gonxen cuina', da' zan da' güen ba bena' da' gac gua' diža' chen, diža' da' naquen da' li, gague da' güenlaže'. Perw bi gua' diža' che bi da' güen da' ba bena', le bi chaclaža' no gonxench neda' ca' cheyala'. Yejni'a yesone' xbab še zaca' con ca' nac da' chesele'ede' chona' na' can' chesende' choa' xtiža' Diosen'.

⁷ Cont bi ga'laža' che da' ble'edagüe'da' na' da' ba bzejni'i Xancho Criston' neda', Diosen' be'e latje chžaglagua' len to da' zoa cha'an ca' cha'a yeše' lo cuerp chia' nga, na' leca chaclaže' Satanásen' gacda' tole da' chac chia' ca'. ⁸ Šone ni'a ba gwnabda' Xancho Criston' yeque'e dan' chžaglagua' len cuerp chian'. ⁹ Nach Xancho' gože' neda': "Bi yeca'a dan' chžaglaguon', san soacza' gaclena' le'. Lezen da' chyažjdo'. Cate' bi chac bi gono', canan' gacbe'edo' chaclena' le' cont gono' bi da' cheyala' gono'." Da'nan' chbeda' güe'cha' diža' che da' ca' chosolo'en bi chac bi gona' še Criston' bi chaclene' neda' len yela' guac chen'. ¹⁰ Na' da'nan', cont gacxen Criston', chbeda' bite'teze da' chac chia' da' chlo'en chyažjda' gaclene' neda'. Chbeda' cate' chesezi'diža' bene' neda', cate' bi de da' chyažjda', cate' bene' chosolagšibe' neda', na' cate' bichle da' chžaglagua', le cate' chac chia' ca', cana'ch chaclench Criston' neda' len yela' guac chen'.

Pablon' gwche' yichje' che bene' chesonxen Criston' Corinto

¹¹ Ba bia' diža' benxen cuina' ca chon bene' bi chejni'i. Le'e cheyala' güe'le diža' chia' naca' bene' zaca', perw bi chonle ca'. Da'nan' benen byen bia' dižan' ca'. Da' juisyw chonxenle bene' ca' ba nonele ca postlw chele. Na' neda' ne late'ze bi chyažjen cont gaca' bene' zaca' ca leaque'. Žia' ca' la'czla' chache'eda' bibi zaca' šaca' bi zoa Diosen' len neda'. ¹² Ba ble'ele naca' dogualje postlw, le cate' gwzoo' len le'e, Diosen' blo'e zoa yela' guac chen' len neda' na' bene' cont goc bichle da' zaca' yesyebane bene', na' goclene' neda' bchejda' yogo' da' goc chia' šlac bena' xšinen' gan' zoalen'. ¹³ Toze ca güenna' bena' len le'e na' can' bena' len bene' yež yoble ga chesedop chesežague' chesonxene' Criston', con da' bi bia' latje gonle da' chyažj chchinda'. Le si'xen da' malen' bena' bi benda' le'e zed.

¹⁴ Chaclaža' yida' deña'a le'e da' gwyone ni'a. Na' bi gonda' le'e zed cate' yida'. Bi chaclaža' gonle neda' bi da' de chele, con chaclaža' gwzenagle chia' na' gon cuinle lo na' Criston'. Ca no bidao' bi cheyala' gwnežjwbe' bi da' chyažje xaxna'be', san xaxna'be' cheyala' gwnežjue' da' chyažje lebe', ca'czen' naquen len le'e na' len neda'. ¹⁵ Chbeda' chzanda' bite'teze da' de chia' na' lente cuina' cont gaclencha' le'e, la'czla' šlac neda' chaquechda' le'e, le'e bi chaquetecle neda'.

¹⁶ Na' balle, la'czla' chache'ele bi benda' le'e zed len da' byažj bchinda', žale gwziya'a le'e. ¹⁷ ¿Bi nezele bi gwziya'a le'e cate' gwsela' note'teze bene' ca' ba gwsela' gan' zoale na'? ¹⁸ Gwneyoeda' Titon' bedene'e le'e na' gwsela' yeto bene' lježcho len le'. ¿Bi nezele bi gwziye' Titon' le'e? Le' len neda', toz can' chonto', na' toz can' chaclaže'to' gaclento' le'e.

¹⁹ ¿Chaquele ba bia' diža' quinga cont nezele bibi da' xinj chonto'? Gague da'nan' ba bia' dižan' ca'. Ba gwnia' yogo' da' ba gwnia' cont chaclena' le'e gonchle xbab can' chazlaže' Diosen', le chacda' le'e. Diosen' nezde' yogo' da' ba gwnia' le'e, na' naca' Criston' txen chzejni'ida' le'e. ²⁰ Con chžeba' cate' yedena'a le'e še gata'bia' bi chonle güen can' chaclaža' gonlen', na' še ba chonle da' mal, bi šolaže'le can' gona' len le'e. Chacda' chixe še chdile chšašle na' chgue'e lježle o chloc lježle o chazlaže'le gac güen che cuinze. Chixe še chne che lježle, še chhitjle diža', še cha'laže'le o še de da' zed chele. ²¹ Chžeba' cate' yedyena'a le'e še gata'bia' zanle biña' cuejyichjle da' malen' ba benle, na' biña' yetinjele che da' yela' zto' chonle, che da' nzoa no xtole, o da' chata'lenle no bene' bi nac bene' chele o no'ole bi nac xo'olle. Na' Diosen' gone' yeto'eda' chele na' yegüine'da' chele še naquen ca'.

13

Pablon' že' gone' castigw che no chon da' malen'

¹ Na'a gac šone ni'a yedena'a le'e. Cate' gagwcho xya che note'teze bene', guata'bia' nape' dola' še yotilen can' chesena chope o šone bene' cheso'e diža' can' goquen'. ² Goša' le'e šlac gwzoo' len le'e caten' bedena'a le'e da' gwchope, bi yeyaše'da' bene' ca' goson da' xinjen' še bi yesyetinjde', na' gona' castigw che yogo' nochle chon da' xinjen'. Na' da' yoble žia' ca' na'a šlac zoa' zito' len le'e. ³ Chaclaže'le gona' to da' gwlo'en chne Criston' len neda'. Da'nan' gona' castigw che nole chon da' xinjen'. Na' Criston' gwlo'e yela' guac xen che' cont saca'zi'le che da' xinj da' nonle. ⁴ Na' la'czla' Criston' ben cuine' ca bene' bibi chac gon cate' gosote'ne' le'e yag cruzen', zoe' na'a da' nape' yela' guac xen che Diosen'. Na' lecze neto' nacto' txen len Criston' ben cuinto' ca bene' bibi chac gon, perw gwlo'eto' le'e zoa yela' guac che Diosen' len neto'.

⁵ Le gonyane' xbab chelen' še da' li chejnilaže'le Jesucriston'. Nach gacbe'ele zoe' len le'e še da' li chejnilaže'lene'. ⁶ Na' zoa' lez lecze gacbe'ele zoe' len neto' na' nacto' postlw che'. ⁷ Chol güižto'ne' chele chnabto' bich bi da' mal gonle, gague cont gacbe'ele zoa Jesucriston' len neto', san cont soale gonle da' güen. Le toze ca nonen še chesacbe'e bene' zoe' len neto' o še bi chesacbe'ede'. ⁸ Na' bibi castigw gonto' le'e še chzenagle diža' li che Jesucriston', con gacento' le'e, še ca'. ⁹ Yebeto' gonto' ca bene' bibi yela' chnabia' nape', con še le'e ba chnabia'le chonle can' cheyala' gonle. Na' zoaczo' chol güižto' Diosen' chnabto' gaclene' le'e gonle doxen can' cheyala' gonlen'. ¹⁰ Ba bzoja' da' quinga za' yedena'a le'e cont yetinjele xtoła'len' na' bi yažjen gona' znia len le'e. Diosen' gwsele' neda' naca' postlw che' na' bene' neda' yela' chnabia' cont gaclena' le'e, gague cont gwžiaya'a le'e.

¹¹ Bene' migw chia', chnaba' gacšca güen chele. Le cuec yichjle gonyane'le yogo' da' chaclaže' Diosen' gonle. Le gon chach laže'le len bi da' chac chele. Le gac toze len ljež le'e chejnilaže'le Criston', na' le soa binlo tole yetole. Diosen' chacde' chio' na' chone' cont chzoa chbezcho binlo len xbab da' yo'o lo' yichjlažda'ochon', nachen' chnaba' soaščacze' len le'e. ¹² Le gwnopa' na' lježle gwguap lježle tiox cate' chežagle txen, cont gacbia' chaque lježle tole yetole. ¹³ Yogo' bene' ca' chesejnilaže' Criston' do nga chosoguape' le'e tiox.

¹⁴ Na' chnaba' Xancho Jesucriston' gaclenščacze' le'e. Na' Diosen' gonšque' gacbe'echle chacde' le'e, na' gonšca Spiritw che Diosen' cont xbab chele gaquen toze len xbab chen. Da' na'zen' chzoja'.

CART DAN' BZOJ POSTLW SAN PABLO CHE BENE' GALACIA CA'

Pablon' chguape' tiox bene' ca' chesonxene' Criston' Galacia

¹⁻² Neda' Pablo chzoja' le'e chdop chžagle chonxenle Criston' yež ca' zjachi' distritw che Galacia. Neda' len yogo' bene' lježcho ca' nite' nga chguapto' le'e tiox. Gague benach gwlej neda' cont gona' xšine', san Jesucriston' txen len Xe' Diosen' ben' bosban le' ladjo bene' guat ca', legaque' gosebeje' neda' cont naca' postlw chegaque'. ³ Na' chnaba' lao Xacho Diosen' len Xancho Jesucriston' yesaclene' le'e na' yesone' cont soa cuezle binlo len xbab da' yo' o lo' yichjlažda'ole. ⁴ Jesucristnan' bnežjw cuine' neche xtolachon' cont bich goncho txen len da' malen' chac lo yežlio nga. Bene' ca' le can' gwyazlaže' Xacho Diosen' ⁵ ben' cheyala' gonxencho toli tocañe. Na' ca' šcacze goncho.

Bich bi yeto diža' de da' gac nacho diža' güen che Diosen'

⁶ Diosen' gwleje' le'e cont Xi'ine' Criston' gaclene' le'e. Na' chebanda' can' chonlen' bedao'nez ba chbejyichjle Diosen' na' chzenagle che yeto da' chaquele naquen diža' güen. ⁷ Perw bi naquen diža' güen. Con nita' bene' chososed chosolo'ede' xtiža' Diosen' clele na' chesone' cont chacžejlaže'le che diža' güen che Criston' dan' bsed blo'eto' le'e. ⁸ Šaca' neto' chixjue'eto' yeto da' bi naquen diža' güen che Criston', chnabda' Diosen' gone' cont cuiayi'to'. Na' la'czla' to angl bene' za' gan' zoa Diosen' chixjue'ede' yeto da' bi naquen diža' güen che Criston', lecze chnaba' gon Diosen' cont cuiaye'e. ⁹ Can' ba gwnian', lecze can' žia' da' yoble na'a: še note'teze bene' ba chyixjue'ede' xtiža' Criston' nža'le can' ba nsedlen, chnaba' gon Diosen' cont cuiaye'e toli tocañe.

¹⁰ Chnia' ca' cont na Diosen' chona' güen, gague cont yesena benachen' chona' güen, na' gague cont yebe benachen' neda'. Šaca' chi' yichja' nacle gona' cont yebe benachen' can' chonan', bi chzenaga' che Criston' šaca'.

Diosen' gwleje' Pablon' na' gwsele'ne' cont goque' postlw

¹¹ Bene' migw, che'nda' nezele diža' güen che Criston' dan' ba be'lena' le'e bitw naquen xbab che benach. ¹² Gague benachen' bzenden' neda', na' neca nacho benachen' bene' cont gwyejni'idan', san cuin Jesucriston' bzejni'ide' neda' diža' güen chen'.

¹³ Ba beneczele diža' can' ba bena' cate' ne' na'ogua' costumbr che neto' bene' Israel. Leca bchi bsaca' bene' ca' chesonxene' Criston', go-claža' yesyenite'. ¹⁴ Na' gwche'chgua yichja' che costumbr dan' gosa'o da' xozxta'ogua' ca' na' bsedchan' clel ca' zan bene' l gualja' bene' lecze zjanac bene' Israel. ¹⁵ Perw cate' biña' galjtia', Diosen' bžie' bia' gona' xšinen'. Gwleje' neda' cont gonan', le nži'ide' neda'. Na' cate' bžin ža ben Diosen' can' gwchoglagüen' gone', ¹⁶ nach bene' cont bembia' Xi'ine' Jesús. Na' bzejni'ide' neda' cont chyixjue'eda' xtiža' Jesús'en' len bene' ca' bi zjanac bene' Israel. Na' cate' ben Diosen' ca' len neda' notno gwnabda' gwzejni'ide' neda'. ¹⁷ Na' neca gwy'a'a Jerusalénna' cont postlw ca' yososed yosolo'ede' neda', bene' ca' gwlej Diosen' cont chesone' xšine' cate' neda' za' gonan'. San la' gwy'a'atia' gan' nzi' Arabia, na' gwdechle beza' Arabia bežina' Damasco.

¹⁸ Na' gocch šon iz gwy'a'a Damascon', nach beza' beya'a Jerusalénna' cont bembia' Pedron' na' jaso'a' len le' žta'gwbiž. ¹⁹ Perw bitw bšaga' yezica'chle

postlw ca' san toze Jacobo bene' biše' Xanchon'. ²⁰ Nezece Diosen' da' nga chzoja' naquen diža' li.

²¹ Nach gwy'a'a yež ca' zjachi' gan' nzi' Siria na' Cilicia. ²² Na' bene' ca' chesedop chesežag chesonxene' Criston' yež ca' zjachi' distritw Judean', legaue' biña' yesombi'e neda' ca hora'. ²³ Con ba gosende' chesena bene' chia': "Ben' bchi bsaue' neto' bich chone' ca'. Ba chyixjue'ede' cheyała' šejnilaže'cho Criston', la'czła' cana' goclaže' gone' cont nono yesejnilaže' Criston'." ²⁴ Na' bene' Judea ca' chesejnilaže' Criston' gosonxene' Diosen' cate' gosende' can' chonan'.

2

Yezica'chle postlw gosazlaže' can' chon Pablon'

¹ Na' gocch žta' iz gwy'a'a Jerusalénna' nach da' yoble gwy'a'a len Bernabén', na' lecze gwchi'a Titon'. ² Diosen' bzejni'ide' neda' cheyała' ša'a, na' da'nana' gwy'a'a. Na' btoba' bene' ca' zjanaue' blao len bene' ca' chesonxen Criston' Jerusalénna' na' legacze' bzejni'ida' bin' chyixjue'eda' len bene' ca' bi zjanaue' bene' Israel cate' choe'lena' legaue' diža' güen che Criston'. Bzejni'ida' legaue' bin' chsed chlo'eda', le goclaža' yesenezde' cont bi yesene' bibi zaca' dan' chona' na' da' ba bena'. ³ Ca' goquen' bitw chole gosone' byen soa bene' lježa' Titon' señw dan' nzi' circuncisión la'czła' bi naue' bene' Israel. ⁴ Goc ca' la'czła' gwnita' bał bene' gosaue' txen len bene' lježcho ca' Jerusalénna' ca hora', bene' gague do laže' gosejnilaže' Criston', con bedeseñe'e še na'oto' costumbr ca' zjanyoj le'e ley che neto' bene' Israel. Legaue' gosacłaže' yesone' byen ga'oto' costumbr ca', la'czła' nezecho chebe Diosen' chio' dan' chejnilaže'cho Criston', gague dan' choncho can' ža leyna'. ⁵ Perw neto' ne late'ze bi bzenagto' che legaue', le goclaže'to' bi gata' da' gwžon gwzenaguechle diža' güen che Criston' da' naquen da' li. ⁶ Na' ca' nac bene' ca' gosac bene' blao len bene' ca' chesejnilaže' Criston' Jerusalénna', bitw gosazlaže' gwša'a can' chsed chlo'eda' che Criston'. (Žia' ca' la'czła' bitw bi nonen len neda' še gosaue' bene' blao o še bi gosaue', le len Diosen' tozce can' zjazaca' yogo'lol bene'.) ⁷ Gosacbe'ede' Diosen' ngüe'e lo na' chyixjue'eda' diža' güen che Criston' len bene' ca' bi zjanaue' bene' Israel can' ngüe'en lo na' Pedron' chyixjue'eden' len bene' Israel gualaž cheto' ca'. ⁸ Le Diosen' ben' chaclene' Pedron' len yela' guac chen' cont chyixjue'ede' xtiža' Criston' len bene' Israel gualaž cheto', leczen' chaclene' neda' len yela' guac chen' cont chyixjue'eda' xtiža' Criston' len bene' bi zjanaue' bene' Israel.

⁹ Can' goquen', Jacobon' len Pedron' len Juanna', bene' zjanacch blao len bene' ca' chesejnilaže' Criston' Jerusalénna', cate' legaue' gosacbe'ede' can' chaclen Diosen' neda' chona' xšinen', nach gosoxe' taca' len taca' Bernabén' cont bosolo'e zjanaue' txen len neto' na' gosazlaže' can' chonto'. Le gosacde' güencze gonto' xšin Diosen' len bene' ca' bi zjanac bene' Israel na' legaue' yesonen' len bene' Israel gualaž cheto' ca'. ¹⁰ Toze dan' gose'e neto' gonto', gaclento' bene' yaše' ca'. Na' da' licze chi'chgua yichja' chona' ca'.

Pablon' gwdile' Pedron' gan' nzi' Antioquía

¹¹ Na' gwdechle gwy'a'a gan' nzi' Antioquía. Na' šlac zoa' na' bid Pedron', na' gwdila'ne' can' chone', le bla'alaon chone' da' mal. ¹² Cate' za' bžine' Antioquían', gwzologüe' che'ej chagüe' txen len bene' ca' chesejnilaže' Criston' la'czła' bi zjanaue' bene' Israel; perw gwdechna' cate' besežin bene' Jerusalén ben' gwseła' Jacobon', bich goclaže' ye'ej gagüe' txen len bene' ca' bi zjanaue' bene' Israel. Bžebe' še bi yesena bene' ca' cheson xbab note'teze bene' chejni-laže' Criston' cheyała' soe' señw dan' že' circuncisión. ¹³ Nach yezica'chle

bene' Israel ca' chesejnilaže' Criston' lecze besyebixē' bich gose'ej gosagüe' txen len bene' ca' bi zjanaque' bene' Israel, na' gosego'oyele' Bernabén' cont lencze' bebixē'. Na' gosone' ca' cont yesebe bene' Jerusalén ca' legaque', la'czla' gosenezde' bi naquen mal yese'ej yesagüe' txen len bene' ca' bi zjanaque' bene' Israel. ¹⁴ Gocbe'eda' bi chesone' can' cheyala' gon chio' nombia'cho diža' li che Criston'. Na' da'nán' gwdila' Pedron' lao yogo' bene' ca' chesedop chesežag chesonxene' Criston', goša'ne': "Le' naco' bene' Israel, perw ba gwlejyichjo' costumbr che chio' bene' Israel cont chono' txen len bene' ca' bi zjanaque' bene' Israel. Da'nán' bitw cheyala' gono' byen yeson bene' ca' bi zjanaque' bene' Israel can' nac costumbr che chio' bene' Israel."

Con bene' chesejnilaže' Jesucriston' zjanaque' bene' güen len Diosen'

¹⁵ Neto' goljto' nacto' bene' Israel na' bitw goljto' ladjo bene' ca' cbi chesonxen Diosen'. ¹⁶ Perw ba nezeto' Diosen' bitw že' nacto' bene' güen len le' neche da' chonto' can' ža ley dan' bzoj da' Moisésen'. Con bene' chesejnilaže' Jesucriston' zjanaque' bene' güen len Diosen'. Da'nán' lencze neto' chejni-laže'to' Criston' cont Diosen' že' cheto' ba nacto' bene' güen lagüe'na'; že' ca' gague neche dan' chonto' can' ža leyna'. Le bi nacho zoa bene' nac bene' güen len Diosen' neche chone' bi da' ža leyna'.

¹⁷ Ba! neto' bene' Israel ba chejnilaže'to' Criston' cont Diosen' none' neto' ca' bene' güen. Da'nán' chache'eto' toz ca' bene' güen da' xinj nacto' len bene' bi zjanac bene' Israel. Perw bi nacho Criston' chone' cont nacto' bene' mal. Leca clelen' cheson bene' xbab še chesacde' ca'. ¹⁸ Nezecho bi chyažjen ga'ocho costumbr che da' xozxta'o neto' bene' Israel cont gaccho bene' güen len Diosen'. Na' še ba gwlejyichjo' costumbr ca' na' yezolaocho yeya'ochon da' yoble, gwlo'elaon naccho bene' güen da' xinj. ¹⁹ Ley dan' bzoj da' Moisés ba bzejni'in neda' bi naca' bene' güen len Diosen', le bi chona' can' žanna'. Perw dan' bi gwzoen yeyonen neda' bene' güen len Diosen', da'nán' bich chonxenan', san yo'o yichja' soacza' gwzenaga' che Diosen'. ²⁰ Criston' bnežjw cuine' gote' neche xtolan', na' dan' chejnilaža'ne' da'nán' ba none' neda' ca' to bene' guat len da' xinjen' cont bich gonan'. Na' bich zoa' to gualaza', san Criston' zoalene' neda'. Na' dan' chona' na'a chonan' con can' ža' Xi'in Diosen' ben' chejnilaža'. Len' chacde' chio' na' bnežjw cuine' gote' neche chio'. ²¹ Diosen' nži'ilaže'de' chio' na' da'nán' gwsele' Criston', perw chzoacho to šla'ale dan' bnežjw cuine' gote' še chaquecho naccho bene' güen len le' neche choncho dan' ža leyna', le bitw byažjen bnežjw cuin Criston' neche chio' šaca'.

3

Naccho bene' güen len Diosen' dan' chejnilaže'cho Criston'

¹ Le'e bene' Galacia, nchol yichjlažda'olen'. ¿No gwziye' le'e cont chaquele cheyala' gonxenle costumbr che da' xozxta'oto' ca'? Ba bzejni'iyane'da' le'e che dan' got Criston' le'e yag cruzen' neche chio'. ² Da' ngazen' chnabda' le'e: ¿Zoa Spiritw che Diosen' lo' yichjlažda'ole neche dan' chonle can' ža ley dan' bzoj da' Moisésen'? Bitw naquen ca', san zoan len le'e neche dan' chejnilaže'le Criston'. ³ Spiritw che Diosen' gwyo'on lo' yichjlažda'olen' caten' gwzolao chejnilaže'le Criston'. ¿Da' leca nchol yichjlažda'olen' chaquele chyažjen gonle can' ža leyna' cont yeyož gacle can' chazlaže' Diosen'? ⁴ Da' zan da' bosochi bososaca' bene' le'e dan' chejnilaže'le Criston'. ¿Na' bixe zacan' byo bchejele len da' ca' še na'a chaquele cheyala' gonle can' ža leyna'? ⁵ Nezele Diosen' ba bene' Spiritw chen' zoan len le'e na' chone' yela' guac da' chle'ele neche chejle'le xtiža' Criston' dan' bzeneto' le'e, gague chac ca' neche dan' chonle bi dan' ža leyna'.

⁶ Da' Abrahanna' gwyejnilaže' Diosen', na' da'n'an' Diosen' gwne' naque' bene' güen lagüen'. ⁷ Da'n'an' cheyala' nezele yogo' bene' chesejnilaže' Diosen', Diosen' none' legaque' ca xi'in diaža che da' Abrahanna'. ⁸ Diosen' bžie' bia' gone' len le'e bi nacle bene' Israel can' chone' len neto' bene' Israel, con note'tezcho chejnilaže' chone' none' chio' bene' güen lagüen'. Da'n'an' Xtižen' dan' nyojen žan gože' da' Abrahanna' diža' güen qui cate' biña' žin ža gaquen': "Dan' chejnilažo' neda' gona' güen len bene' ca' že' yogo' nación." ⁹ Na' can' naquen, Diosen' chone' güen len bene' ca' chesejnilaže' le' can' bene' güen len da' Abrahanna' ben' gwyejnilaže'ne'.

¹⁰ Na' note'tez bene' chon xbab gaque' bene' güen len Diosen' lagüe' chone' bi dan' ža ley dan' bzoj da' Moisésen', da' mal juisyw gac che' še ca', le nyoj Xtiža' Diosen', žan': "Da' mal juisyw gac che note'tez bene' še bi nita'teze' yesone' yogoloj can' ža leyna' bate'teze." ¹¹ Na' Xtiža' Diosen' nyojen, žan': "Bene' chesejnilaže' Diosen' zjanaque' bene' güen lagüe', na' da'n'an' guata'cze yela' mban chegaque' toli tocañe." Na' da' žan ca' nezecho bitw že' che note'tezcho naccho bene' güen lagüen' neche choncho bi dan' ža leyna' goncho. ¹² Na' leyna' bi žan cheyala' šejnilaže'cho Diosen', san con žan: "Note'teze bene' chon doxen can' ža leyna' gac bane' toli tocañe."

¹³ Perw Criston' bnitlagüe' xtoła'chon' cont bi gac da' mal juisyw checho dan' bi chzoecho goncho doxen can' ža leyna'. Bnežjw cuine' goc da' mal juisyw che' laz chio'. Goc che' can' nyojen, žan: "Da' mal juisyw chac che note'tez bene' chesote' chosode'ene' le'e yag." ¹⁴ Goc ca' cont lencze le'e bi nacle bene' Israel šejnilaže'lene' na' soale mbalaz ca mbalazen' gwzoa da' Abrahanna' dan' gwyejnilaže' Diosen'. Nachen' da' chejnilaže'cho Cristo Jesúsén', Diosen' gwsele' Spiritw chen' zoan len chio' can' gwne' gone'.

Ley dan' bzoj da' Moisésen' na' dan' gwna Diosen' gone' len da' Abrahanna'

¹⁵ Bene' migw, gwzejni'ida' le'e len da' nga chac yežlio nga: Cate' to bene' chze'e yiš o chone' testament, bi nacho cate' beyož bosochele' can' gwne' gone' cbi gone' can' žanna' o gwzanche' can' žanna', la'czla' naquen to da' chon benačze. ¹⁶ Na' ca nac dan' gož Diosen' Abrahanna' gone' da' güen len le' na' len xi'in diaža che', Xtiža' Diosen' dan' nyojen bi choen' diža' che zan diaža che da' Abrahanna', san choen' diža' che toze', na' zejen Cristo. ¹⁷ Na' dan' gož Diosen' Abrahanna' gone' gac da' güen che', chzaca'leben ca to yiš dan' chosoza' bene', le Diosen' bitw gwše'e can' gwne' gone'. Na' ba gwde tap gayoa šichoa iz gož Diosen' da' Abrahanna' gone' gac da' güen che' cate' bene' cont bzoj da' Moisésen' ley chen'. Perw la'czla' Diosen' bnežjue' leyna', bitw nacho cbi chone' can' gwne' gone' len Abrahanna' na' len xi'in diaža che' ca'. ¹⁸ Šaca' Diosen' že' con bene' cheson doxen can' ža leyna' zjanaque' bene' güen, bitw chone' da' güen che xi'in diaža che da' Abrahanna' can' ba gwne' gone' šaca'. Perw Abrahanna' goque' bene' güen len le' da' gwyejle'e gon Diosen' can' gože'ne'.

¹⁹ Še naquen ca' žbixchen byažje ley dan' bzoj da' Moisésen'? Diosen' bnežjuen' da' xozxta'oto' bene' Israel cate' ba gwde tiemp che da' Abrahanna' cont gosache'ede' bi chesone' can' non Diosen' mandadw yesone'. Na' bžie' bia' gonen žin šlac biña' yid Criston' ben' gwna Diosen' galje' lo diaža che da' Abrahanna', na' che le' be' Diosen' diža' caten' gwne' gone' güen len xi'in diaža che da' Abraham. Na' ca nac leyna', Diosen' bene' cont angl ca' bosonežjuen' da' Moisésen'. Na' Diosen' bchine' Moisésen' bzejni'ide' xozxta'oto' bene' Israel ca' can' žanna'. ²⁰ Perw cate' Diosen' gože' da' Abrahanna' gone' güen che',

cuincze' bzejni'ide' da' Abrahanna', na' bi byažjde' bene' yoble gwzejni'ide' le' can' gone'.

Da' chzejni'i leyna' chio'

²¹ Na' bitw cheyala' gaquecho ley dan' bzoj da' Moisésen' chonen clele len da' gwna Diosen' gone' la'czla' leyna' bitw gac yocoben yichjlažda'ochon'. Šaca' gac yocoben yichjlažda'ochon' guac goncho can' ža leyna' nach gaccho bene' güen len Diosen' šaca'. ²² Perw Xtiža' Diosen' dan' nyojen žan yogo'lol benachen' yesezi'e castigw toli tocanē neche xtoła'gaquen', na' con bene' yesejnilaže' Jesucriston' nitlao xtoła'gaque' can' bsi Diosen' xnezen', cont gac güen chegaque' can' gwne' gac che xi'in diaža che da' Abrahanna'.

²³ Ca nac neto' bene' Israel, cate' biña' nezeto' cheyala' šejnilaže'to' Criston', nchoglaon cheto' si'to' castigw toli tocanē dan' nombia'to' leyna' na' bitw chonto' can' žanna'. ²⁴ Len neto' leyna' zaca'leben ca to bene' chgüia chne'e xi'in bene', da' zan da' chi'ebe' gombe' na' da' zan da' chi'ebe' bi gombe'. Perw na'a ba bid Criston', na' note'tezcho chejnilaže'chone', Diosen' že' naccho bene' güen len le'. ²⁵ Na' dan' ba bid Criston' leyna' bich naquen ca bene' chgüia chne'e neto' bene' Israel, neto' chejnilaže'to'ne'.

²⁶ Yogo' chio' chejnilaže'cho Cristo Jesúsén' naccho xi'in Dios. ²⁷ Na' note'tezcho še ba gwzoacho nisen' cont blo'echo naccho txen len Criston', ba chzolao chac yichjlažda'ochon' can' nac yichjlažda'ogüen'. ²⁸ Na' tozeczce can' zaca'cho lao Diosen' še naccho bene' Israel o še bi naccho, na' še naccho bene' esclavo o še bi naccho, na' še naccho bene' byo o še naccho no'ole. Yogo'cho ba naccho ca toze bene' neche dan' naccho txen len Cristo Jesúsén'. ²⁹ Na' dan' naccho txen len Criston', lao Diosen' naccho xi'in diaža che da' Abraham, na' gon Diosen' güen len chio' can' gwne' gone' len xi'in diaža che da' Abrahanna'.

4

¹ To bene' gwni'a še zoa xi'ine', bi'nan' gac lo na'be' da' de che'. Perw na' šlac ne' nacbe' bidao' bitw nacho mbalazech chac chebe' clel ca che to bene' güen žin la'czla' žin ža gac lo na'be' yogo' dan' de che xaben'. ² Bene' güen žin ca' nite' lo' yo'o chosogüia chesene'ebe' na' chesenabi'ebe' šlac biña' cha'obe' na' šlac žin ža co'o xaben' lo na'be' dan' de chen'. ³ Can' goc len neto' bene' Israel šlac biña' yid Criston', gwxcac'lebo' ca xi'in bene' gwni'an'. Na' leyna' gwzaca'leben ca bene' ca' chesenabia' xi'in bene' gwni'an' šlac biña' žin ža si'be' dan' de che xaben'. ⁴ Perw cate' bžin ža bžia Diosen' bia' gwseła' Xi'inen' yežlio nga, gwxcan to no'ole le'. Na' Xi'in Diosen' lecze benen byen bzenague' che leyna'. ⁵ Na' len' bedeyene' cont yogo' chio' chejnilaže'chone' ba non Diosen' chio' ca xi'ine' na' zoacho mbalaz dan' nezecho bich chonen byen gonxencho costumbr ca' da' zjanyoj le'e ley che neto' bene' Israel.

⁶ Na' cont nezecho ba non Diosen' chio' ca xi'ine', ba gwsele' Spiritw chen' dan' lecze naquen Spiritw che Xi'ine' Criston', zoan lo' lažda'ochon'. Na' Spiriton' chaclenen to tocho cont choł güižcho Diosen' che'chone': "Xa". ⁷ Nachen' dan' ba non Diosen' chio' ca xi'ine' bich cheyala' soacho ca to esclavo len dan' non leyna' mandadw goncho. None' chio' ca xi'ine' na' chone' güen len chio' doxen can' gwne' gone' len xi'in diaža che da' Abrahanna'.

Pablon' chi'yichje' nac cheson bene' ca' chesejnilaže' Criston'

⁸ Cate' biña' gombia'le Diosen', gwejnilaže'le da' ca' bi cheyala' šejnilaže'cho, na' legaquen gosenabian' xbab chele. ⁹ Perw na'a ba nombia'le Diosen', o še güench nacho Diosen' ba nombi'e le'e. Na' chebanchgüeda' chele dan' chebiga'le cosxanle na' da' yoble chonxenle costumbr ca' ca no che da' ye'ej gagwcho, che ža ca', na' che cuerp chechon', na' cho'ele latje chesenabian'

xbab chele la'czla' bitw zjazacan' cont yesaclenen chio'. ¹⁰ Ba chonxenle costumbr che no ža lni, che bio' ca', che tiemp ca' na' che iz ca'. ¹¹ Chžeba' še bich chzenagle che dan' ba bsd blo'eda' le'e, le še bich chzenagle chen, ba gwžiai' dan' bena' len le'e.

¹² Bene' migw, chata'yoeda' le'e gacbe'ele costumbr che neto' bene' Israel dan' zjanyoj le'e leyna' bi yesaclenen le'e lao Diosen' ca' chacbe'eda' bi yesaclenen neda' lao Diosen'. Na' caten' bedesoa' len le'e cana', bitw nacho ba benle mal len neda'. ¹³ Nezecele bega'anlena' le'e da' nechw dan' gocšenda' na' gwđixjue'eda' diža' güen che Criston' len le'e. ¹⁴ Na' dan' gocšenda' ca' hora' zacan' gue'ele neda', perw bitw bgue'ele neda', san do yichj do laže'le bleble neda' ca' šale bleble to no angl che Dios o ca' šale cuin Jesucriston'. ¹⁵ Mbalaz gwzoale cate' gwzoa' len le'e cana'. ¿Bixchen' bich chebele xtižan' na'a? Nežda' da' leca goquele neda' bzanele bite'teže da' de chele na' goclaže'le lente cuinle zanele gaclenle neda'. ¹⁶ Na' na'a ¿ba chaquele chgue'eda' le'e dan' choe'lena' le'e diža' lin'?

¹⁷ Bene' ca' chososed chosolo'ede' le'e na'a leca zjachi' yichjgaque' le'e, perw gague cont yesone' güen len le'e, san cont yesyebeje' le'e bich gonle txen len neto', na' cont cue' yichjle legacze'. ¹⁸ Naqueczen güen yesebe' yichj bene' le'e bate'teže, gague cate'zen' zoa' len le'e, con še yesone' güen len le'e. ¹⁹ Xi'indagua', da' yoble chžaglagua' lo' lažda'ogua' neče le'e can' chžagla' to no'ole bene' chzan, na' bich žaglagua' ca' cate'ch gac yichjlažda'olen' can' nac yichjlaždao' Criston'. ²⁰ Yebechgüeda' šaca' netec na'a zoa' len le'e na' šaca' gac nia' chonle güen, perw leca chacžejlaža' chele.

Da' Agar na' da' Saran'

²¹ Le'e chaclaže'le gonxenle costumbr che neto' bene' Israel dan' zjanyoj le'e ley dan' bzoj da' Moisésen' ¿biña' yenele can' ža dan' nyojen? ²² Žan gwnita' chope xi'in da' Abrahanna' bi' byo, tobe' gwzan to no'ol ben' goque' esclava che' na' yetobe' gwzan no'ol checze', no'ole nga bi goque' esclava. ²³ Na' bin' gwzan no'ole esclavan' goljbe' dan' gwzoalen da' Abrahanna' le', perw bi' gwzan no'ol checze', goljbe' neče Diosen' gože'ne' san no'ol chen' la'czla' naque' no'ol güiž. ²⁴ Na' dan' goc che no'ol ca' chzejni'in chio' che chop dan' gwna' Diosen' gone' cont gaclene' bene' Israel ca'. No'ole esclava ben' le' Agar zaca'lebde' ca' ley dan' ben Diosen' mandadw bzoj da' Moisésen'. Bzojen' par da' xozxta'o neto' bene' Israel lo' ya'a Sinaí, na' bene' ca' zjazaca'lebde' ca' esclavos. ²⁵ Na' doxen nación Israelen' zaca'leben ca' da' Agaren' no'ole esclava che da' Abrahanna'. Diosen' bnežjue' da' xozxta'oto' ca' leyna' lo' ya'a Sinaín' gan' nzi' Arabia, na' ža na'aža bene' Israel gualaž cheto', bene' guac nacho bene' Jerusalén, ne' zjanaque' ca' esclavos neče chesacde' chonen byen yesa'ogüe' costumbr ca' dan' ža leyna'. ²⁶ Perw chio' chejnilaže'cho Criston' naccho txen len yogo' bene' šjaya'aque' yaba gan' zoa Diosen' gan' lecze nzi' ciuda Jerusalén. Na' nezecho bitw chonen byen ga'ocho costumbr ca' dan' ža leyna'. ²⁷ Quinga ža Xtiža' Diosen' dan' nyojen:

Bebe no'ole güiž, no'ole cbi chzan,

bosya'a yela' chbe chio', le' biña' gaco' bes che yela' sanna'.

Chacdo' bi chaque Diosen' le' da' nono xi'ino' zoa,

perw nita' zanch xi'ino' cled ca' nita' che no'olen' ba gwzan xi'in bene' byon gwzoalene'.

²⁸ Bene' migw, xi'in da' Abrahanna' bin' le' Isaac goljbe' neče gož Diosen' Abrahanna' san no'ol chen' la'czla' goque' no'ole güiž. Na' ca'cze chio' chejni-laže'cho Criston', Diosen' none' chio' ca' xi'in diaža che da' Abrahanna' bin' goljbe' neče goc dan' gož Diosen' le'. ²⁹ Bi' che da' Agaren', bin' goljbe' neče

gwzoalen da' Abrahanna' le', b̄chi bsaca'be' Isaaquen' bin' ben Spiritw che Diosen' cont gwzan da' Saran'. Ca'cze naquen ža na'aža, bene' ca' chesa'o costumbr ca' dan' ža leyna' chosochi chososaque' chio' chejnilaže'cho Criston'.³⁰ Na' Xtiža' Diosen' dan' nyojen žan Diosen' gože' da' Abrahanna': "Bebej no'ole esclavan' len bi' chen', le bitw gwnežjua'be' dan' gwnia' gwnežjua' bi' gwzan no'ol chio'na'." ³¹ Da'nan' bene' migw, nezecho zaca'lebcho ca xi'in da' Saran', gague ca xi'in da' no'ole esclavan'.

5

Bi cheyala' yesa'ogüe' costumbr da' bi zjazaca'

¹ Caten' gwejnilaže'cho Criston', le' bebeje' chio' lo yogo' da' choncho chaquecho chebe Diosen' chio' lagüe dan' chonchon̄na'. Da'nan' bi cheyala' yeyonxencho costumbr da' bi zjazacan' len Diosen'.

² Neda' Pablo žia' le'e to da' žialao. Še soale señw dan' nzi' circuncišión na'a ba chejnilaže'le Criston', bibi zacan' dan' ba gwzolao chejnilaže'lene' še ca'. ³ Da' yoble žia' le'e, note'teze bene' soe' señw dan' nzi' circuncišión, lecze cheyala' gone' yogo'lol bite'teze dan' ža ley dan' bzoj da' Moisésen'. ⁴ Na' še chaquele gonle doxen can' ža leyna' cont gacle bene' güen len Diosen', ba chzoale Criston' to šla'ale še can' chaquele, na' bich chonle xbab catequen' nži'ilaže' Diosen' chio'. ⁵ Da' chejnilaže'cho Jesucriston' zoa Spiritw che Diosen' lo' lažda'ochon', na' chonen ga chebecho nezecho Diosen' ne' naccho bene' güen len le' cate' yežincho gan' zoe'na'. ⁶ Ca nac chio' chejnilaže'cho Cristo Jesúsén', bitw bi nonen len Diosen' še ba zoacho señw da' nzi' circuncišión o še cbi zoachon. Le dan' naquen da' žialao xen len Diosen', soateze soacho šejnilaže'cho Criston' na' gague lježcho cont gacbia' chejnilaže'chone'.

⁷ Cana' gwzoale chonle can' chebe Diosen', perw na'a žnon' ba ben cont bich chzenagle che diža' li che Diosen'? ⁸ Dios ben' gwleje' le'e nacle xi'ine', bitw nacho le'na' chone' cont chzenagle che diža' yoble. ⁹ Le gon xbab can' ža diža' nga: "Late'ze levadura chonen cont chas doxen cuazina'." ¹⁰ Perw na' zoa' lez gon Xancho Jesucriston' cont gwzenagle chia'. Na' Diosen' gwnežjue' castigw che bene' chon cont chacžejlaže'le, note'teze naque'.

¹¹ Bene' migw, ca nac neda', šaca' ne' chsed chlo'eda' n̄ia' yogo' bene' byo cheyala' yesezoe' señw dan' že' circuncišión cont yesenite' binlo len Diosen', bilja chosochi chososaca' bene' Israel gualaž chian' neda' šaca', le can' chososed chosolo'e legaque'. Perw dan' žia' Criston' bnežjw cuine' gote' le'e yag cruzen' cont soacho binlo len Diosen', da'nan' bi chesazlaže' xtižan'. ¹² Na' ca nac bene' ca' cheson cont chaquele bilja chebe Diosen' le'e še bi zoale señon', yebeda' šaca' yesechog cuingaque' yelate'.

¹³ Bene' migw, Dios ben' gwleje' chio' cont naccho xi'ine' chaclaže' nezecho bich chonen byen ga'ocho dan' ža ley cont soacho binlo len le'. Perw bitw cheyala' goncho bite'teze da' mal dan' ža lažda'ochon' goncho. Dan' cheyala' goncho, cheyala' gaclen lježcho lagüe dan' chaque lježcho tocho yetocho. ¹⁴ Na' ba zoaczcho choncho yogo'lol can' ža leyna' še choncho can' nyojen žan: "Cheyala' gague lježcho ca chaque cuincho." ¹⁵ Perw še chacyožlen lježcho o chdillen lježcho, chžiayi'cho dan' non Diosen' cont naccho toze.

Can' goncho še gwzenagcho che Spiritw che Diosen'

¹⁶ Chnia' le'e to da' zejen, cheyala' soateze soacho goncho can' chaclaže' Spiritw che Diosen'. Na' še goncho ca', bitw gwzenagcho che da' mal dan' yo'o lo' yichjlažda'ochon'. ¹⁷ Cate' chzenagcho che da' mal dan' yo'o lo' lažda'ochon', bitw choen' latje gwzenagcho che Spiritw che Diosen'. Na' cate' chzenagcho che Spiritw che Diosen', bi choncho con can' žan checho. Na' dan' zoa

Spiriton' len chio', da'nan' bitw choncho da' mal dan' ža lažda'ochon' goncho.
¹⁸ Na' še chzenagcho che dan' chsed chzejni'i Spiritw che Diosen' chio', bich chonxencho costumbr ca' dan' ža ley dan' bzoj da' Moisésen'.

¹⁹ Nacbia'cze bene' ca' chosozenag che da' malen' dan' yo'o lo' lažda'ogaque' chesone' bite'teze da' mal quinga: chesata'lene' no'ol bi zjanac no'ol chegaque' o bene' byo bi zjanac bene' chegaque'; chesebede' chesone' bichle da' yela' zto' len cuerp chegaque'; ²⁰ chesejnilaže' l gua'a lsaca'; chosozenague' xtiža' bene' ca' chesenelen da' xigüe'; cheseague'e lježe'; bitw nite' binlo len lježe'; chesacxi'a lježe'; cheseloque'; zjachi' yichje' gac güen che cuingacze' sin cbi yesone' xbab nac gac che lježe'; bitw chesone' txen len lježe'; ²¹ chesezelaže' bi da' de che bene' yoble; chesote' bene'; zjanaque' bene' borrašw; zjalene' no lni gan' chac žaš; na' chesone' bichle da' mal dan' zjanac ca da' mal quinga ba gwnia'. Na' da' yoble chnia' le'e can' ba gwnicza', nono yežin yaban' gan' zoa Diosen' chnabi'e še chone' da' xinj ca' zjanac ca'.

²² Perw na' še chzenagcho che Spiritw che Diosen', goncho yogo' da' quinga: gaquecho ljež benachcho; soacho mbalaz dan' nombia'cho Diosen'; soacho binlo len xbab dan' yo'o lo' yichjlažda'ochon'; gapcho yela' chxenlaže' len ljež benachcho bite'teze da' chesonde' chio'; goncho güen len bene' yezica'chle; gaccho bene' šagüe' len yogo'lol bene'; goncho bi da' si' lo' na'cho goncho; ²³ gaccho bene' gwzexjwlaže'; bitw soacho goncho con can' žan checho. Na' še choncho da' güen can' chaclaže' Spiritw che Diosen', bitw bibi ley de da' nan choncho da' mal. ²⁴ Na' chio' ba naccho txen len Cristo, bich choe'cho latje nabia' da' malen' chio' cont goncho can' žanna'. ²⁵ Spiritw che Diosen' ba benen yela' mban toli tocañe checho, na' da'nan' cheyala' soacho goncho can' chaclažen'.

²⁶ Na' bi cheyala' ga'laže'cho gaquecho leca bene' güen naccho, le še goncho ca', chonen cont yeseža'a bene' lježcho chio' na' yeseague'ede' chio'.

6

Cheyala' gaclen lježcho

¹ Bene' migw, še to bene' lježchon' ba blažoe' bene' da' mal, chio' chzenagcho che Spiritw che Diosen' cheyala' gaclenchwne' yetinjden' cont yezoe' binlo len Diosen'. Na' cheyala' gwsaca'cho, le xož lecze chio' lažo'cho goncho da' malen'.

² To tocho cheyala' gaclen bene' lježcho ca' bite'teze da' chesac chegaque', le can' gwna Criston' chaclaže' goncho.

³ Na' še goncho xbab naccho bene' güen cate' bi naccho, chziye'ze cuinchon' še ca'. ⁴ To tocho cheyala' goncho xbab še dan' ba benchon' naquen da' güen o da' mal. Na' yebecho še ba bencho da' nac güen, perw bitw goncho xbab güench ba ben chio' cnel ca' bene' yoble. ⁵ Le to tocho choglaos Diosen' checho še bencho güen o še bencho mal.

⁶ Še no chsed chlo'e chio' xtiža' Diosen', cheyala' gwnežjwchone' late' bi da' šagüe' da' güen da' de checho.

⁷ Bitw güe'le latje no si'ye' le'e, bitw gac gwcuša'cho da' choncho len Diosen'. Le še goncho da' mal, gone' cont si'cho castigw; na' še goncho da' güen, gone' cont soacho mbalaz. Can' zeje diža' dan' žan: "Con dan' chazcho, lenna' yelapcho." ⁸ Ben' chon con can' ža da' mal dan' yo'o lo' lažda'ogüe', gwžin ža cuiaye'e toli tocañe; perw ben' chon can' chazlaže' Spiritw che Diosen', Spiriton' gonen cont bane' toli tocañe. ⁹ Na' bitw cheyala' yeche'echo goncho da' güenna', le gwžin ža cate' Diosen' gone' cont soacho mbalaz juisyw, con še bi cuejyichjcho choncho can' chaclažen'. ¹⁰ Da'nan' cheyala' goncho güen

len yogo'lo' bene' bate'teze de latje, na' chonchen byen goncho güen len bene' chesejnilaže' Criston' clél ca len yezica'chle bene'.

Yeto chope dan' che' Pablon' legaque'

¹¹ Le na'šc letr cha'o quinga, le cuina' chzoja' le'e. ¹² Bene' ca' chesaclaže' yesone' byen soale señw dan' že' circuncisión chesacde' yesyebe bene' Israel gualaž cheto' ca' legaque' še ba bosozoe' le'e señon'. Chesyejiljwlaže' nacle yesone' cont nono yosoči yososaca' legaque' da' chesejle'e Criston' bnežjw cuine' neče chio' cate' gote' le'e yag cruzen'. ¹³ Bene' ca' chesene' cheyala' soale señon' zjachi' yichjgaque' ley dan' bzoj da' Moisésen' perw ne legaque' cbi chesone' can' žanna'. Con chesaclaže' soale señon' cont yesonxen cuingaque' lao bene' Israel gualaž cheton'. ¹⁴ Ca nac neda', bitw gonxen cuina', san gonxena' Xancho Jesucriston' dan' bnežjw cuine' gote' le'e yag cruzen' neče chio'. Bitwbi nonen len neda' še benachen' yesyebede' neda', le neda' bich chebeda' da' ca' chesena benachen'. ¹⁵ Na' len chio' chejnilaže'cho Cristo Jesúsén' nezda' bibi nonen še zoacho señw dan' že' circuncisión o še bi zoachon, perw zaca'chgua dan' ba bocob Diosen' yichjlažda'ochon'. ¹⁶ Lao Diosen' naccho dogualje bene' Israel še ba chejnilaže'cho Jesucriston'. Na' chnaba' gaclen Diosen' yogo'le ba zoale chzenagle che' cont soa cuezchle binlo len xbab chele, na' lecze chnaba' yeyaše' yeži'ilaže'de' le'e.

¹⁷ Na' na'a chnabšca' bich gonle güedenag len xtižan', le cuerp chia' nga nsan' yiž che dan' bosochi bososaca' bene' neda' neče chyixjue'eda' xtiža' Xancho Jesúsén'.

¹⁸ Bene' migw, chnaba' soašca Xancho Jesucriston' gaclenšque' le'e len xbab dan' yo'o yichjlažda'olen'. Da' na'zen' chzoja' na'a.

CART DAN' BZOJ POSTLW SAN PABLO CHE BENE' CA' ŽE' EFESO

Pablon' bzoje' bene' chesejnilaže' Criston' ciuda Efeso

¹ Neda' Pablo naca' postlw che Jesucriston' con can' gwnalaže' Diosen'. Na' chzoja' le'e zoale Efeso le'e nacle lo na' Diosen' da' chejnilaže'le Criston'.
² Chnabda' Xacho Diosen' na' Xancho Jesucriston' yesaclene' le'e na' yesone' cont soa cuezle binlo len xbab chelen'.

Diosen' chaclenchgüe' chio' da' ngode'cho txen len Criston'

³ Cheyala' gonxencho Diosen' ben' nac Xa Xancho Jesucriston' na' le' lecze chonxene' Diosen'. Chio' naccho txen len Criston', Diosen' ba bene' chio' yogo' da' chyaže yichjlažda'ochon' cont šjayzoacho len le' yaban'.
⁴ Na' da' bnežjw cuin Criston' neče chio', da'nan' Diosen' gwleje' chio' cate' bina' xe yežlion' cont gaccho bene' laždao' xilaže' na' bibi doła' gapcho lagüen'.
⁵ Diosen' chacde' chio' cate' bina' soacho. Da'nan' bsi'e xnezen' none' chio' ca xi'ine' con can' gwnalaže', na' da'nan' gwsele' Jesucriston' neče chio'.
⁶ Cheyala' soaczcho gonxencho Diosen' catec nži'ilaže'de' chio', le gwsele' Jesucriston' ben' chacde' cont le' goclenchgüe' chio'.
⁷ Caten' got Criston', blalj xchene' neče da' xinjen' ben chio' chejnilaže'chone'. Da'nan' Diosen' bezi'xene' xtola'chon', le nži'ilaže'chgüede' chio'.
⁸ Na' chonchgüe' güen len chio', chone' chio' doxen yela' sina' na' yela' chejni'i da' chyažjecho.
⁹ Na' bzejni'ide' chio' da' gwnalaže' da' nono gwneze cani' da' bžie' bia' gac.
¹⁰ Le Diosen' bžie' bia' žin ža cate' yogo' bene' že' yaba len bene' že' yežlion' yosozenague' che Criston' na' yesaque' txen len le'.

¹¹ Ca nac chio' naccho txen len Criston', Diosen' bsi'e xnezen' none' chio' ca xi'ine' cont gac lo na'cho da' chaclaže' gone' chio'. Na' Diosen' chone' cont chac dan' chsi'e xnezen' na' chone' da' nezde' naquen güen.
¹² Cani'te neto' bene' Israel ba chbezto' yid Criston', le zgua'tec gwlej Diosen' neto' cont gonxento'ne' da' naque' bene' zaca' juisyw.
¹³ Na' lecze ca' le'e, cate' benele diža' güen che Criston' dan' nac da' li na' gwnezele chaclaže' gone' yela' mban checho toli tocanē, nach gwyejnilaže'lene'. Da'nan' lecze le'e ba nacle txen len Criston', na' Spiritw che Diosen' bžinen zoan lo' yichjlažda'olen', can' gwne' soan. Na' Spiriton' zoan len chio' cont nezecho ba non Diosen' chio' ca xi'ine'.
¹⁴ Lecze zoan lo' yichjlažda'ochon' cont nezecho žin ža gac lo na'cho yogo' da' ca' za' gonch Diosen' chio' naccho xi'ine' cate' gone' cuerp cobe chechon'. Na' gonche' chio' da' ca' cont gonxenchone' da' naque' bene' zaca' juisyw.

Pablon' gwnabe' gwnežjw Diosen' bene' chesejnilaže'ne' yela' sina' che'

¹⁵ Da'nan' cate' benda' diža' can' chejnilaže'le Xancho Jesúsēn' na' can' chaquele yezica'chle bene' chesejnilaže'ne', gwzolagua'
¹⁶ choa' yela' choxclen che Diosen' neče le'e cate' chol güiža' Diosen', na' bi chezi'laža' chona' ca'.
¹⁷ Dios ben' chonxen Xancho Jesucriston', ben' nac Xe' na' ben' nac bene' zaca' juisyw, len' chol güiža'. Na' chnabda'ne' cue' yela' sina' chen' lo' yichjlažda'olen' na' gaclene' le'e cont gombia'chlēne'.
¹⁸ Na' chnaba' šo' be'ni' che' lo' yichjlažda'olen' cont nezele bi da' güenṅa' zoacho lez gone' len chion' ba gwleje' naccho xi'ine'. Na' chnaba' gone' cont nezele catec güen juisyw nac yogo' da' ca' za' gone' yesaquen che chio' chejnilaže'chone'.
¹⁹ Na' lecze chnaba' šo' be'ni' che' lo' yichjlažda'olen' cont nezele leca nape' yela' guac xen cont gaclene' chio' chejnilaže'chone'. Blo'e yela' guac xen juisyw che'

20 cate' bosbane' Criston' ladjo bene' guaten'. Na' gwde bosbane'ne' nach nzoe'ne' cuite' yaban' gan' chesenabi'e txen. 21 Le Criston' chnabia'che' ca note'teze angl. Chnabia'che' ca beñach, na' ca da' xigüe', na' ca bi da' chesejnilaže' bene', na' ca note'tezechle chesenabia' na'a na' tiemp da' za' za'. 22 Diosen' ba gwlo'e lo na' Criston' yogo' bene' na' bica'chle da' zjade cont le' chnabi'e. Na' Diosen' bzoe' Criston' ca Xancho cont chnabi'e yogo' chio' chejnilaže'chone'. 23 Da'nan' chio' chejnilaže'chone' zaca'lebcho ca to cuerp, na' Criston' zaca'lebe' ca yichj cuerpen'. Guac nacho nya' Criston' neche chio' chejnilaže'chone'. Na' Criston' zoe' chnabi'e doxen.

2

Diosen' chacde' chio'

1 Na'a Diosen' ba bocobe' yichjla'ažda'olen' da' chejnilaže'le Criston'. Cana' gwzoale bentezle da' malen' na' gwdaple dola' lao Diosen'. Da'nan' gogle ca bene' guat da' bi bzenagle che'. 2 Con gwzacze benle da' mal can' cheson yezica'chle bene' bi chesejnilaže' Diosen', na' bzenagle che Satanás dan' chnabia' da' xigüe' ca' dan' zjanyechjen beñachen'. Na' ža na'aža Satanásen' ne' chnabian' yichjlaždao' bene' bi chosozenag che Diosen'. 3 Na' ca'cze gwzoa yogo'cho, gwzoatezcho bencho bi da' mal can' gwnan checho na' bi da' mal da' gwzelaže' yichjlažda'ochon'. Na' da' bebecho da' malen' lo' yichjlažda'ochon', da'nan' gwchoglaon checho si'cho castigw che xtoła'chon' toli tocanē, can' gac len yezica'chle bene' bi chosozenag che Diosen'. 4-5 Goccho ca bene' guat len yichjlažda'ochon' da' gwzoacho bentezcho da' malen'. Na' šlac ne' naccho ca', Diosen' leca beyaše' beži'ilaže'de' chio' na' gocchgüede' chio'. Na' lagüe da' nži'ilaže' Diosen' chio', da'nan' bocobe' yichjlažda'ochon' cate' gwyejnilaže'cho Criston', na' bene' yela' mban checho toli tocanē. 6 Na' da' bocobe' yichjlažda'ochon', guac nacho bene' len chio' can' bene' len Cristo Jesúsén' cate' bosbane' le' ladjo bene' guat ca'. Na' da' naccho txen len Criston', mbalaz bach zoacho chbezcho len le' na'a can' soacho cate' yežincho yaban' gan' chi'ena'. 7 Diosen' goclene' chio' ca' cont tiempen' za' za' gwlo'echde' catequen' nži'ilaže'chgüede' chio', le gonchgüe' zanch da' güen len chio' naccho txen len Cristo Jesúsén'. 8 Da' nži'ilaže' Diosen' chio', ba bene' yela' mban checho toli tocanē cate' gwyejnilaže'cho Criston'. Con bene' to goclen, gague neche bi da' güen da' ben chio'. 9 Le Diosen' bi chaclaže' güe'cho diža' o gaquecho bnitlagüe' xtoła'chon' neche bi da' güen da' ba bencho. 10 Diosen' bene' chio' na' cate' gwyejnilaže'cho Cristo Jesúsén' bocobe' yichjlažda'ochon' cont soacho goncho da' güen. Cate' bina' soacho, bsi'e xnezen cont soacho goncho da' güen.

Bene' Israel na' bene' bi zjanaque' bene' Israel, Criston' bozoe' legaque' binlo toe'yeto'

11 Da'nan' le gon xbab can' goc len le'e cana', le'e goljle bi nacle bene' Israel can' nac neto'. Canan' neto' che' lježto': "Chio' zoacho señw da' že' circuncisión", na' che'to' le'e: "Bi zoale señw da' že' circuncisión" (señw da' chosozoa bene' Israel gualaž cheto' ca' lo cuerp che bi' byo dao' ca'). 12 Na' le gon xbab can' gwzoale cana', bi nombia'le Criston', bi nacle nación che Diosen' ca neto' bene' Israel nacto', na' Diosen' bi gwne' gaclene' le'e can' gwne' gaclene' neto' bene' Israel. Bi gwzoale lez šjayzoale len Diosen' na' neca gwyejnilaže'le Diosen' lo yežlio nga. 13 Perw Criston' bnežjw cuine' gosote'ne' na' blalj xchene' neche chio'. Na' na'a da' chejnilaže'lene' ba nacle txen len Cristo Jesúsén'. Na' ba nacle toze len neto' bene' Israel, la'czla' cana' gogle bene' zito' len neto' na' len Diosen'. 14 Cana' neto' bene' Israel na' le'e bi nacle bene'

Israel bgue'e lježcho. Perw Criston' ba bene' cont naccho toze na' ba bozoe' chio' binlo tocho yetocho. ¹⁵ Caten' bnežjw cuine' gote', bzoe' ca'ale ley da' bzoj da' Moisésen' len yogo' da' žan cheyala' goncho. Na' bzoen' ca'ale cont bozoe' chio' chejnilaže'chone' binlo tocho yetocho na' beyone' chio' to yež cobe che', chio' naccho bene' Israel lente chio' bi naccho bene' Israel. ¹⁶ Da' bnežjw cuine' gote' le'e yag cruzen', zoacho binlo len Diosen', chio' naccho bene' Israel na' chio' bi naccho bene' Israel, na' lecze naccho toze na' bich chgue'e lježcho.

¹⁷ Na' Criston' caten' bide' yežlion' bedeye'e diža', gwne' benachen' guac yesenite' binlo len Diosen', gwdixjue'eden' len le'e bi nacle bene' Israel, le'e bi nombia'le xtiža' Diosen' cana', na' lente neto' nacto' bene' Israel, neto' nombia'to' xtižen'. ¹⁸ Le chio' chejnilaže'cho Criston', chio' naccho bene' Israel na' len chio' bi naccho bene' Israel, toz Spiritw che Diosen' chaclenen chio' cont choe'lencho Diosen' diža'. ¹⁹ Da'n'an' le'e bi nacle bene' Israel bich nacle ca bene' zito' len Diosen'. San yogo' chio' chejnilaže'cho Criston' ba naccho txen, le Diosen' ba none' chio' ca bene' lo' yo'o che'. ²⁰ Chio' chejnilaže'chone' zaca'lebcho ca to yo'o de yej. Na' neto' postlw na' yezica'chle bene' chesoe'lene' le'e xtiža' Criston' zaca'lebo' ca lene yo'ona'. Na' Jesucriston' zaca'lebe' ca yej squin che yo'ona'. ²¹ Na' chio' naccho txen len Criston' lecze zaca'lebcho ca yej da' zjancua' zjangoden' gan' chac yo'o de yeja'. Zjangoden' txen na' zej cha' yo'ona'. Ca'cze chio' naccho txen len Xancho Criston' na' len lježcho, na' naccho ca to yo'o gan' zoa Diosen'. ²² Le'e txen len neto' na' len note'teze bene' chesejnilaže' Criston' naccho ca to yo'o gan' zoa Diosen', le zoa Spiritw chen' lo' yichjlažda'ochon'.

3

Diosen' gwleje' postlw Pablon' cont jatixjue'ede' xtižen' len bene' bi zjanac bene' Israel

¹ Na' da' naquen ca', neda' Pablo chol güiža' Diosen' neče le'e. Dia' ližya nga da' chyixjue'eda' xtiža' Cristo Jesúsén' len le'e bi nacle bene' Israel. ² Chacda' ba nezeliēle nži'ilaže' Diosen' neda' na' bsi'e xnezen' chzejni'ida' le'e xtižen'. ³ Ba bzejni'ide' neda' da' nono gwneze, can' ba bzoja' le'e to chope diža' le'e cart nga. ⁴ Cate' gwlable cart nga gacbe'ele chejni'ida' da' nono gwyejni'i cana' che Criston'. ⁵ Cana' Spiritw che Diosen' bi bzejni'in bene' da' nono gwneze che Criston', perw na'a ba bzejni'in neto' postlw che Diosen', na' ba bzejni'in nochle neto' gwleje' cont choe'to' xtižen', neto' nacto' lo' na' Diosen'. ⁶ Da' nga bzejni'in neto', le'e bi nacle bene' Israel txen len neto' nacto' bene' Israel si'cho da' gwna Diosen' gone' che chio' naccho xi'ine' neče da' chejnilaže'cho Cristo Jesúsén', na' txen naccho ca toze bene', na' txenna' chaclen Diosen' chio' can' gwne' gone'.

⁷ La'czla' bitec bi zaca', Diosen' gwleje' neda' len yela' guac chen' cont chyixjue'eda' diža' güen chen'. ⁸ Chacda' ne late'ze bibi zaca' ladjo yogo' bene' ba gwlej Diosen' zjanaque' lo' ne'e. Bia'cze nži'ilaže'de' neda' na' gwleje' neda' cont chyixjue'eda' len bene' bi zjanac bene' Israel catec da' zan da' güen juisyw gone' len yogo' chio' chejnilaže'cho Criston'. ⁹ Na' Diosen' gwlo'e lo' na' chzejni'ida' yogo'lol bene' da' nžie' bia' gac. Gwzolaoten cate' gwxe yežlion', nono gwneze da' nžie' bia' gac, con toz Diosen' gwnezde', Dios ben' bene' yogo'lol bene', yogo' beyixe' na' yogo' bichle da' de. ¹⁰ Le Diosen' nžie' bia' bene' ca' zjanac angl blao che' na' angl gwnabia' zjanita' yaban' yesele'ede' can' chone' len chio' chdop chžagcho chonxencho Jesucriston', cont yesache'ede' nape' yela' sina' len yogo'lol da' chone'. ¹¹ Chone' can' bžie' bia' gone' caten' bina' xe yežlion', le cani'te bsi'e xnezen' sele' Xancho Jesucriston'. ¹² Na' naccho txen

len Criston' da' chejnilaže'chone'. Da'n'an' bi chžebcho Diosen', san chbecho nezecho chac choe'lenchwne' diža'. ¹³ Nachen' chņeyoeda' le'e bi gacžejlaže'le che da' chac chia' nga chyi chzaca' lagüe da' chyixjue'eda' xtiža' Jesucriston' len le'e. Naquen da' yebele, gague da' gacžejlaže'le.

Criston' chacde' chio' chejnilaže'chone'

¹⁴ Na' da' naquen ca', chzoa xiba' chol güiža' Xa Xancho Jesucriston'. ¹⁵ Le' bxie' yogo' diaža che chio' zoacho yežlio nga na' che bene' že' yaba. ¹⁶ Diosen' naque' bene' zaca' juisyw na' nape' la'zelagüe' yela' guac xen. Nachen' chņabda'ne' gone' ga soa Spiritw chen' lo' lažda'olen' cont soa chach laže'le len yela' guac chen. ¹⁷ Chņaba' soateze soa Criston' len le'e da' chejnilaže'lene'. Na' chņaba' soaczle gaquele Diosen' na' gaque lježle do yichj do laže'le, ¹⁸ cont gac šejni'ile txen len yezica'chle bene' zjanaque' lo' na' Diosen' catec chaquechgüe Criston' chio'. Da' xen chaquechgüede' chio', con bi cheyož yedo ca chacde' chio'. ¹⁹ Le biņa' šejni'icho catec chaquechgüede' chio'. Na' lecze chņaba' zej gacchle bene' güen doxen can' nac Diosen'.

²⁰ Na' Diosen' chac chone' yogo'lol, na' chone' da' gualch ca da' chņabechone' o da' choncho xbab gone'. Na' chone' cont Spiritw chen' zoan lo' yichjlažda'ochon' chaclenen chio' len yela' guac chen'. ²¹ Na' chio' chdop chžagcho chonxencho Criston', cheyala' gonxencho Diosen' na'a na' toli tocaņe da' gwsele' Cristo Jesúsēn' neche chio'. Na' can' gonščaczcho.

4

Naccho toze len yogo' bene' chesejnilaže' Criston'

¹ Neda' dia' ližya nga da' chyixjue'eda' xtiža' Xancho Jesucriston'. Nachen' chņeyoeda' šejšscale gonle güen can' cheyala' goncho da' gwlej Diosen' chio' naccho xi'ine'. ² Na' chata'yoeda' le'e bi gonxen cuinle, san le gon xbab bitec bi zaca'le; na' gacle bene' šagüe' na' gaple yela' chxenlaže' len bene' lježle na' le gacde' bite'teze yesone'. ³ Spiritw che Diosen' ba nonen chio' toze da' chejnilaže'cho Criston', na' le gon con ga zelao saque'le cont soaczle gonle toze xbab len bene' lježle, le Diosen' ba bozoe' le'e binlo tole yetole. ⁴ Yogo' chio' chejnilaže'cho Criston' naccho ca toz bene', na' toz Spiritw che Diosen' zoan lo' yichjlaždao' yogo'cho. Na' cate' Diosen' gwleje' chio' cont naccho xi'ine', lecze bene' cont toz can' zoacho lez gone' güen len chio'. ⁵ Toz Jesucriston' naque' Xancho, na' toz can' chejnilaže'chone', na' toz ca zejen cate' chzoacho nis. ⁶ Na' toz Diosen' chonxencho ben' nac Xa yogo'cho. Len' chnabi'e yogo'cho, na' chchine' yogo'cho choncho xšinen', na' zoacze' len yogo'cho.

⁷ Na' Criston' chaclene' to tocho na' none' checho gwde gwdele da' gon to tocho. ⁸ Da'n'an' nyoj Xtiža' Diosen' žan: Cate' beyepe' yaban' bebeje' bene' zan lo' na' gwxiyen' cont bechi'e legaue'. Na' bi'e che beņachen' da' gac gon to toe'.

⁹ Na' can' žan: "Beyepe' yaban'", zejen betje' golje' beņach yežlio nga na' gwden' gote' bgaše'. ¹⁰ Na' ben' betj golje' beņach, lecze len' beyepe' yaban' gan' zoa Diosen', na' na'a zoe' chnabi'e doxen. ¹¹ Na' lecze len' none' che balcho naccho postlw, na' none' che balcho chyixjue'echo bi da' ba gwne', na' none' che yebalcho chje'cho diža' güen chen' len bene' biņa' yesenden', na' yebalcho none' checho chgüia chņa'cho bene' chesonxene' le' na' chsed chlo'echo legaue'. ¹² Can' chon Criston' cont chio' naccho lo' ne'en chac choncho xšinen'. Na' chonchon cont to to chio' naccho toze len le' zejch gacchcho can' chazlažen'. ¹³ Diosen' chaclaže' yogo'cho gaccho toze šejnilaže'cho Xi'inen' do yichj do laže'cho na' gombia'chone' binlo. Chaclaže' gacyaņe'cho can' cheyala'

gaccho, na' gaccho bene' güen can' nac Criston'. ¹⁴ Na' še gaccho ca', bich šo'cho xbab ca che to bidao', šejcho qui šejcho ca'ale na'ocho to to yela' chejnilaže' da' chesaljlaže' bene' güenlaže' na' bene' gwxiye' cont chesonlede' chio'. ¹⁵ Na' cheyala' güe'lencho bene' diža' li, perw gaccho bene' šagüe' len leaque' cont yesache'ede' le chaquechone'. Goncho ca' cont zejch gacchcho bene' šagüe' bene' güen can' nac Criston' ben' chnabi'e chio'. ¹⁶ Cate' to to cuen cuerp chechon' ngoden' na' noxe' lježen len bela' na' len žit na' len bechj bnia ca' da' ncan', na' to to cuenen chesonen ž'in, nach doxen cuerp chechon' chonen žin ca cheyala'. Na' ca'cze chio' chejnilaže'cho Criston' ngode'cho txen cont to tocho goncho da' non Diosen' checho goncho, na' yogo'cho txen zej gacchcho bene' šagüe' na' zej gaquech lježcho.

Diosen' ba bocobe' yichjlaždao' chio' chejnilaže' chone'

¹⁷ Da' nga chnia' le'e, Xancho Criston' none' mandadw gwzejni'idan' le'e: bi cheyala' soacho goncho xbab ca cheson bene' bi chesejnilaže' Diosen', le bibi zacan'. ¹⁸ Nchol yichjlažda'ogaque'. Na' bi zjanape' yela' mban toli tocanē ca da' non Diosen' chio', neca chesejni'ide' che Diosen', le zjanaque' bene' güedenag len le'. ¹⁹ Bibi zto' zjanombi'e che da' malen' chesone', na' con chesonteze' yogo' yela' zto', na' chesezelaže' yesenite' yesonche' da' malen'. ²⁰ Le'e ba nsedle can' ža Criston' na' nezele bi cheyala' goncho ca', ²¹ le chacda' ba benele dižan' gwne' lo' yichjlažda'olen', na' neto' lecze ba bzejni'ito' le'e diža' li chen'. ²² Nezele bich cheyala' gwzenagcho che da' malen' da' chzelaže' lažda'ochon' goncho, can' bencho cana' cate' yela' gwzelaže' chechon' ne' chonlen chio' cont bentezcho da' malen'. ²³ San na'a cheyala' gwša'cho xbab da' choncho lo' yichjlažda'ochon'. ²⁴ Cheyala' güe'cho latje yocobech Diosen' yichjlažda'ochon' cont soacho goncho da' zej to li can' chon le', na' gaccho bene' laždao' xilaže' can' chazlaže' le'.

²⁵ Da'n'an' bich gonlaže'cho, san güe'len lježcho diža' li, le ngode' lježcho naccho ca toze bene'.

²⁶ Na' cate' chža'acho bi cheyala' goncho da' xinj. Cheyala' yob yeyacxenlaže'cho na' bich ža'acho do ža. ²⁷ Na' bi güe'cho latje cont Satanás dan' chnabia' da' xigüe' ca' nabian' xbab chechon' cont goncho da' xinj.

²⁸ Na' nole še ba yolaole chbanle, bich cheyala' cuanle. Cheyala' gonle žin da' nac güen len ni'a na'le cont gata' da' gwnežjwle bene' chyažj chchine.

²⁹ Na' bi cheyala' güe'cho bite'teze diža' zban, san güe'cho diža' šagüe' len yogo'lol bene', con can' chyažje to toe' cont gaclenen le'. Goncho ca' cont xtiža'chon' gaquen da' zaca' gwzenag bene'. ³⁰ Na' bi goncho cont yeyaše'laže' Spiritw che Diosen', le Diosen' ba bene' ga zoan lo' yichjlažda'ochon' cont nezecho naccho xi'ine' na' nezecho žin ža yedyexi'e chio'.

³¹ Cheyala' cuejyichjcho yogo' da' mal, bich gonchon. Bich co'olaže'cho, bich ža'acho, na' bich güe'cho diža' loc diža' lžej. Bi necho che bene', neca gaccho bene' xi'a. ³² San cheyala' gaccho bene' šagüe' na' yeyaše' lježcho tocho yetocho. Na' cheyala' yezi'xen che lježcho bite'tez da' chesonde' chio' con can' bezi'xen Diosen' checho cate' gwyejnilaže'cho Criston'.

5

Cheyala' goncho can' chon Diosen'

¹ Nachen' cheyala' soacho goncho can' chon Diosen', le naccho xi'ine' na' chacde' chio'. ² Cheyala' soacho gaque lježcho ca Criston' chacde' chio' na' bnežjw cuine' gote' neche chio'. Na' chebe Diosen' da' bene' ca', can' chebe bene' to da' chla' zix.

³ Da' naccho lo na' Diosen' cheyała' gue'echo da' malen'. Gwbatech cheyała' gata'lencho no'ole bi nac no'ol checho o bene' byo bi nac bene' checho o goncho bichle da' nac da' yela' zto' len cuerp chechon'. Na' bi cheyała' selaže'cho da' de che bene'. ⁴ Bi cheyała' güe'cho diža' da' naquen da' yela' zto' o bite'teze diža' le'e, diža' da' bibi zaca' da' bi nca' xneze, le bi zejen güe'cho dižan' zjanac ca'. San cheyała' soacho güe'cho yela' choxcen che Diosen'. ⁵ Nita' bene' byo ben' chesata'lene' no'ole bi nac xo'olgaque' na' nita' no'ole ben' chesata'lene' bene' byo bi nac bene' chegaque', na' nita' bene' chesyebede' dan' naquen da' yela' zto'; na' nita' bene' chesezelaže' bi da' de che bene'. Ba nezezele bene' ca' cheson da' malen' zjanac ca' bi yesyežine' yaban' gan' chnabia' Criston' len Diosen'. (Na' ca nac bene' chesezelaže' bi de che bene', toz ca malen' chesone' len da' cheson bene' chesejnilaže' l gua'a lsacan'.) ⁶ Bi güe'le latje no siye' le'e len diža' güenlaže'. Diosen' chnežjue' castigw toli tocanē che bene' ca' bi chosozenag che', bene' cheson da' mal ca' ba gwnia'. ⁷ Da'nān' bi cheyała' gaccho txen len bene' cheson ca'.

⁸ Cana' nchol yichjlažda'ochon', perw na'a ba yo'on be'ni' che Xancho Criston', na' cheyała' soacho goncho da' güen can' chaclaže' Diosen' gon chio' nombia'chone'. ⁹ Na' še ba gwyo'o be'ni' che Criston' lo' yichjlažda'ochon', nach gaccho bene' šagüe' na' goncho da' güen da' zej to licha. ¹⁰ Cheyała' gwsedcho cont nezecho can' chaclaže' Xancho Criston' goncho. ¹¹ Bi cheyała' goncho txen len da' malen' cheson bene' ca' zjancho l yichjlažda'ogaque', le chesone' da' bibi zaca'. San cheyała' gwzejni'icho legaque' da' malen' chesone', ¹² le naquen da' cheto'echo güe'cho diža' che da' ca' chesone' do bagaše'ze. ¹³ Na' cate' be'ni' che Criston' šon' lo' yichjlaždao' bene', nach yesacbe'ede' che bite'teze da' chesone' še naquen da' mal, le be'ni' chen' chzejni'in benachen' che xbab chegaque' na' bi da' chesone' še naquen güen o še naquen mal. ¹⁴ Da'nān' nyojen quinga che note'teze bene' chon da' malen':

Naco' ca bene' chtas na' ca bene' guat da' bi chzenago' che Diosen'.

Bzenag che' cont Criston' cue'e be'ni' lo' yichjlažda'oguo'.

¹⁵ Nachen' cheyała' soacho na'cho dan' choncho. Cheyała' goncho da' naquen da' sina', gague goncho ca bene' bi chejni'i. ¹⁶ Na' yogo' ža cheyała' goncho can' chazlaže' Diosen', le na'a že'chgua bene' chesone' da' malen'. ¹⁷ Bi goncho ca bene' bibi xbab nye'. Cheyała' šejni'icho can' chaclaže' Diosen' goncho cont gonchon. ¹⁸ Na' bi cheyała' gaccho bene' borrašw, le bene' chesezožde' chosožiyai' cuine'. San chio' cheyała' güe'cho latje soachgua Spiritw che Diosen' lo' lažda'ochon' nabian' chio' len da' choncho. ¹⁹ Cheyała' gwšaljlen lježcho no salmos na' gollen lježcho no himnos o bichle da' ža Spiritw che Diosen' golcho. Na' cheyała' nechon na' golchon do yichj do laže'cho gonxencho Xancho Jesucriston'. ²⁰ Yogo' ni'a cheyała' güe'cho yela' choxcen che Xacho Diosen' che yogo' da' chone' chaclene' chio'. Na' Xancho Jesucriston' zoe' chaclene' chio' cont güe'cho yela' choxcen che'.

Can' cheyała' soalen bene' lo' yo'o chechon'

²¹ Da' chapcho Diosen' bala'an cheyała' gwzexjw yichjcho gwzenagcho tocho yetocho.

²² Na' le'e no'ole, le'e nšagna'le, to tole cheyała' gwzenagle che bene' chele, le chzenagle che Xancho Criston' cate' chzenagle chegaque'. ²³ Diosen' nzoe' bene' chele cont zjanacche' blao ca le'e, can' nzoe' Criston' nacche' blao ca chio' chdop chžagcho chonxenchone'. Le chion' guac nacho naccho cuerp che Criston', na' le' none' chio' yela' mban toli tocanē. ²⁴ Na' ca chio' chonxencho Criston' cheyała' gwzenagcho che', ca'czen' le'e no'ole le'e nšagna'le, to tole cheyała' gwzenagle che bene' chele yogo' bin' chese'e le'e.

25 Na' le'e bene' byo le'e nšagna'le, to tole cheyała' gague no'ol chelen' con can' chaque Criston' chio' chonxenchwne' na' bnežjw cuine' neche chio' cate' gosote'ne'. 26 Na' cont gwlo'e chio' lo na' Diosen', beyone' lažda'ochon' xilaže' cate' gwyejle'cho xtižen'. 27 Na' bene' ca' cont yebede' chio' cate' yežincho lagüen', bibi xtoła'cho gata' na' ne bichle da' mal yo'o nyaz lo' yichjlažda'ochon', san gac lažda'ochon' xilaže' lagüen'. 28 Na' con can' nži'ilaže' Criston' chio', can' cheyała' ži'ilaže' to to bene' byo no'ol chen'. Le'e bene' byo, to tole cheyała' ži'ile no'ol chelen' can' nži'ile cuerp chelen', le nži'icze cuinle cate' chonle ca'. 29 Nono zoa no chgue'e cuerp che', san yogo'cho nži'icho cuerp chechon' na' chapši'ichon. Na' can' chon Criston' len chio' chonxenchone', nži'ide' chio' na' chapši'e chio'. 30 Na' chone' ca' da' naccho ca to cuen güeje cuerp chen', ca žit da' yo'e na' ca xpele'. 31 Na' Xtiža' Diosen' nyojen žan: "Da'nan' bene' byo le'e len xaxne'e na' si'e no'olen' gwšagna'lene' le' na' yesaque' toze." 32 Diža' quinga ba bzoja' naquen to da' nono gwyejni'i cani', perw chnia' naquen to da' chzejni'in chio' chdop chžagcho chonxencho Criston' cont nezecho can' cheyała' soacho len le'. 33 Na' lecze ca' le'e bene' byo le'e nšagna'le, to tole cheyała' gague no'ol chele can' chaque cuinle, na' le'e no'ole nšagna'le, to tole cheyała' gaple bala'an bene' chele.

6

1 Na' le'e bidao', le gwzenag che xaxna'le, le can' cheyała' gon chio' naccho txen len Xancho Criston'. 2 Cate' Diosen' bnežjue' xozxta'oto' ca' ley chen', gwne': "Le gap bala'an xaxna'le." Na' goquen da' nechw da' bžie' bia' yesone' da' nsa' to da' güen da' gone' len legaque' še yosozenague' chen, gwne': "Le gap bala'an xaxna'le 3 cont gac güen chele na' cont banle sša lo yezlio nga."

4 Na' le'e nita' xi'inle, le yosgol le yoscha'o bi' chele ca' binlo, diža' šagüe' gwzejni'ile legacbe' cont yosozenagbe' che Xancho Criston' na' gague con gonle ga yeseža'a yeselocbe'.

5 Na' le'e mos, le gwzenag che xan žin chelen' do laže'le na' le yeyiljwlaže' naquen' gonle da' yesazlaže' to toe', le lecze chzenagle che Criston' caten' chzenagle chegaque'.

6 Le gwzenag chegaque' do yichj do laže'le, gague cate'zen' chesene'e can' chonlen', le nacle bene' güen xšin Criston', na' can' chaclaže' Diosen' goncho. 7 Na' cheyała' güe'laže'cho goncho žin che bene' cont yebe Xancho Criston' chio', gague cont yebe bene' nac xan žin na'ze. 8 Goncho ca', le nezecho bite'teze da' güen da' choncho, Xancho Criston' gone' cont žin ža yebi'in güen len chio', chio' naccho esclavos na' len chio' bi naccho esclavos.

9 Na' le'e nacle bene' xan žin, le gon güen len bene' ca' cheson xšinle. Bitw co'ole legaque' šeb, le Xancho Diosen' zoe' yaban' chna'cze' can' chonlen', na' lecze chna'cze' can' cheson bene' güen žin chelen', na' toz can' chone' len yogo'lol bene' note'teze zjanaque'.

Can' goncho cont Satanásen' bi gonen chio' gan

10 Nachen' bene' migw, da' naccho txen len Xancho Criston', cheyała' soachachcho šejnilaže'chone', le nape' yela' guac xen cont chaclene' chio'. 11 Cheyała' gon cuincho gual doxen can' chaclaže' Diosen' goncho, cont soachachcho bi šejle'cho che Satanás dan' chnabia' da' xigüe' ca' cate' chyiljwlažen' siyen' chio'. 12 Le gague bene' nac bela' chenna' chdillencho, san chdillencho da' xigüe' ca', da' ca' besyeyaquen da' mal, na' bichle da' chesenabia' bene' že' yežlio nga bene' nchol yichjlažda'ogaque' len da' malen'. Chdillencho yogo'lol spiritw mal ca' gate'teze chesašen. 13 Da'nan' cheyała' gon cuincho gual doxen can' chaclaže' Diosen', cont Satanásen' bi soeczen

chio' ža cate' tillenen chio'. Na' cate' ba bencho can' chazlaže' Diosen', nach cheyała' soačhačcho len le'. ¹⁴ Na' cont soačhačcho bi siye' Satanásen' chio', cheyała' güe'cho diža' li yogo' ni'a. Na' še goncho ca', gaclenen chio' ca da' chčhej soldadon' cho'a li'e. Na' cheyała' goncho da' nac güen yogo' ni'a, le še goncho ca', gwcue'ejen chio' ca xa soldadon' da' naquen de ya chcue'ejen cho'alčo'e. ¹⁵ Na' cheyała' soacho probnidw güe'lencho bene' diža' güen che Criston' da' chzejni'in can' guac soacho binlo len Diosen'. Na' še soacho probnidw güe'lenchon bene', gaclenen chio' can' chaclen xel soldadon' le'. ¹⁶ Na' da' zejehen ca bichle da' goncho, cheyała' soačhačcho šejnilaže'cho Diosen'. Na' še soačhačcho šejnilaže'chone', nach gaclenen chio' cont bi gwzenagcho che Satanásen'. Gaclenen chio' ca escudo da' chčhin soldadon' chaclenen le', chosolen yi' che flechas ca' da' chesala'ninen zja'aquen gan' zien', na' chcue'ejen le' len da' ca' zja'ac yeseyidjon cuerp chen'. ¹⁷ Na' cheyała' yosa'laže'cho Criston' ba bene' yela' mban checho toli tocanē, cont gaclenen chio' ca chaclen lapa' de ya da' chčhin soldadon'. Na' lecze Xtiža' Diosen' da' ben Spiritw che Diosen' cont nyojen, le gonchgua xbab chen cont gaquen len le'e ca to spada da' chčhin soldadon'. ¹⁸ Na' do tiemp cheyała' yol güižcho Diosen' nabcho yogo' da' chzejni'i Spiritw chen' chio'. Na' cheyała' gaccho bene' banlaže' na' yol güižchone' sin cbi yeche'echo, nabcho gaclene' yogo' bene' ba gwleje' cont zjanaque' lo ne'e. ¹⁹ Na' le nab gon Diosen' latje gua' xtižen', na' le nab bi žeba' gua' diža' tcho'a gwzejni'ida' bene' diža' güen che Criston' da' nono gwneze cani'. ²⁰ Le Diosen' gwsele' neda' ca gualaze' cont bia' xtižen', na' da'n'an' dia' ližya nga. Nachen' le nabe Diosen' gaclene' neda' bi žeba' gua' xtižen' tcho'a can' cheyała' guan'.

Pablon' chone' chač laže'gaque'

²¹ Chsela' bene' migw checho Tíquico güe'e diža' doxen can' chac cont nezele can' chac chia' na' yogo' da' chona'. Chaquecho Tíquicon' da' naque' txen len chio' chonxencho Criston' na' zoateze' chone' xšin Xancho Criston' can' cheyała' gone'. ²² Nachen' chsela'ne' cont nezele can' chac cheto' na' cont gone' chač laže'le.

²³ Chnaba' lao Xacho Diosen' len Xancho Jesucriston' yesonšque' cont yogo'le chonxenle Criston' soa cuezle binlo len yichjlažda'olen', na' lecze yesonšque' cont yogo'le gaque lježle na' soačhačhle šejnilaže'lene'. ²⁴ Soaščacze Diosen' gaclene' yogo' bene' chesacde' Xancho Jesucriston' sin cbi yesebeze'. Da' na'zen' chzoja'.

CART DAN' BZOJ POSTLW SAN PABLO CHE BENE' CA' ŽE' FILIPOS

Pablo bzoje' carten' šlac die' ližya

¹ Neda' Pablo chselā' cart nga txen len bene' lježa' Timoteo. Chopte neto' gwlej Diosen' cont chonto' xšinen', bite'tezen' že'. Na' chzoja' cart nga che yogo' le'e zoale ciuda Filipos, le'e yo'ole lo na' Diosen' lagüe chejnilaže'le Cristo Jesúsēn'. Na' le'e nchojle chgüia chna'le bene' lježle chesejnilaže'ne', na' le'e nchojle chonle žin bixjw da' chata' ladjo le'e chdop chžagle chonxenlne', decze da' nia' le'e len cart nga. ² Chnabšca' lao Xacho Diosen' na' Xancho Jesucriston' yesaclenšque' le'e na' yesone' cont soa cuezle binlo len xbab da' yo'o lo' yichjlažda'olen'.

Pablo chnabde' Diosen' gaclene' bene' ca' chesejnilaže' Criston' Filipos

³ Yogo' ni'a cate' chjayze'eda' le'e, choa' yela' choxcen che Diosen' ba naccho txen chejnilaže'chone'. ⁴ Na' yogo' ni'a cate' choļ güiža' Diosen', chbeda' chnaba' gaclene' le'e. ⁵ Na' choa' yela' choxcen chen' naccho txen chejle'cho diža' güen che Jesucriston', gwzolaoten cate' za' gwejnilaže'lne'. ⁶ Na' da' nga nezda', Diosen' gwzolağüe' chone' to da' güen lo' yichjlažda'olen' cana', na' gone' cont yeyož yeyac yichjlažda'olen' can' chazlažen' cate' žin ža yid Jesucriston' da' yoble. ⁷ Da' cheyała'cze gona' xbab chele ca', le chacchgüeda' le'e. Na' nezda' Diosen' ba goclene' le'e can' ba goclene' neda' šlac dia' ližya nga, na' šlac ba gwduxjue'eda' diža' güen che Criston' len bene' bi gosejle'e chen, bzejni'ida' legaque' naquen diža' li. ⁸ Diosen' nezde' chacchgüeda' yogo'le, le Cristo Jesúsēn' chone' cont chacda' le'e. ⁹ Na' chnabda' Diosen' gonšque' cont gaquechlne' na' gaqueche lježle na' lecze šejni'ichle yogo'loļ da' chaclaže' Diosen' šejni'ile na' gache'ele bi da' naquech güen gonle cont gaclen lježle. ¹⁰ Chnaba' da' ca' cont gache'ele bin' chazlaže' Diosen' gonle, na' lecze cont soaczle do laže'le na' bibi dola' gaple cate' žin ža yid Criston' da' yoble. ¹¹ Nach gaclen Jesucriston' le'e gonchguale da' nac güen, na' Diosen' si'e yela' bala'an na' yezica'chle bene' yesonexene' Diosen' can' chonlen'.

Pablon' chacde' Criston' do yichj do laže'

¹² Bene' migw, che'nda' nezele yogo' dan' ba goc chia' ba gosaclenen cont bene' zanch gosende' diža' güen che Criston'. ¹³ Le yogo'loļ soldadw gop ca' cheson žin che bene' gwnabia' nga, na' yezica'chle bene' že' do nga zjanezde' dia' ližya neche choa' xtiža' Criston'. ¹⁴ Na' bene' zan bene' lježcho že' nga lecze ba chesejnilaže'chgüe' Xancho Criston' da' ba besele'ede' can' chaclene' neda' šlac dia' ližya nga. Da'nān' legaque' lecze ba chesyeyaxjchde' cheso'e xtiža' Diosen' sin ca chesežebe'.

¹⁵ Da' li baļe' chesyixjue'ede' xtiža' Criston' da' chesacxi'ede' neda' na' da' chesaclaže' yesacche' blaoch ca neda', perw yezica'chle bene' ca' chesyixjue'eden' do laže'. ¹⁶ Na' bene' ca' to cuen chesyixjue'ede' xtiža' Criston' cont yesacxen cuine', gague chesyixjue'eden' do laže'gague'. Chesone' xbab zoayaša' da' chesyixjue'eden'. ¹⁷ Na' bene' ca' yezica'chle chesyixjue'eden' lagüe chesacde' Criston' na' chesacde' neda', le zjanezde' neda' dia' ližya nga neche chzejni'ida' bene' bi chesejle'e diža' güen che Criston', chape'gaca'ne' naquen da' li. ¹⁸ Perw bibi nonen len neda' še chesyixjue'eden' do laže' o še gague do laže', con chebeda' cheso'e diža' che Criston' da' nac diža' li.

Na' dehcze da' chebeda', ¹⁹ le nezda' yechoja' güen len da' quinga chac chia' lagüe dan' chñable gaclen Diosen' neda' na' lagüe dan' zoa Spiritw che Jesucriston' len neda' chonen chaçh laža'. ²⁰ Da'nana' zoa' lez gaclen Diosen' neda' gua' xtiža' Criston' sin cbi žeba'. Na' la'czla' še soacha' o la'czla' še gata', chaclaža' si' Criston' yela' bala'an' na'a len da' gona' na' len da' gac chia' con can' ba gwxi'e yela' bala'an'. ²¹ Chzelaža' gacxen Criston' len bite'tez da' chona' šlac ne' mbana', na' lecze nezda' soa' mbalazchgua cate' ba gota', le šjayzoalena'ne'. ²² Perw še soacha' yežlio nga na' goncha' xšin Xancho Criston' cont šanch bene' yesejnilaže'ne', o še gata', bi nezda' non' nac güen. ²³ Naquen zdebe ñia' non' naquech güen, še soacha' o še gata', le yebeda' gata' na' šjayzoa' len Criston', na' mbalazech soa' neda', še ca'. ²⁴ Perw lecze chona' xbab le'e chyažjele soacha' banča'. ²⁵ Na' da' chacbe'eda' chyažjele soacha', nezda' soacha' len le'e cont gaclena' soachle mbalaz da' chejnilaže'le Criston' na' soachachle šejnilaže'ne'. ²⁶ Na' cate' yechoja' nga soacha' len le'e da' yoble, yebele güe'le diža' can' ben Cristo Jesúsena' cont bechoja' ližyan'.

²⁷ Na' bite'teze gac, le soa le gon da' güen can' cheyała' gon chio' ba bzenagcho che diža' güen che Criston'. Le gon ca' cont še yedena'a le'e o še bi yedena'a le'e, con che'nda' yenda' rson chele zoachachle len toze xbab, chonle txen len bene' lježle, na' chonle con ca zelao chzaque'le cont yezica'chle bene' yosozenague' xtiža' Criston' da' ba chejnilaže'le, ²⁸ neca žeble še bi yesone bene' le'e neche chesegue'ede' le'e. Še bi žeble da' yesonde' le'e, gonen cont yesache'ede' ba zoa yesebiaye'e toli tocanē; lecze gonen cont yesache'ede' Diosen' gone' cont šjayzoale len le'. Yogo' da' ca' zjanaquen da' gon Diosen'. ²⁹ Na' Diosen' ba bsi'e xnezen' gacxen Criston', gague lagüe da' chejnilaže'lene' na'zen', san lecze gacxene' da' yosoçi yososaca' bene' le'e neche chejnilaže'lene'. ³⁰ Le'e len neda', toz can' chosoçi chososaca' bene' chio'; na' ba ble'ele can' bchejda' len da' ba gosonde' neda' cana', na' ba nezele can' chac chia' na'a.

2

Criston' chaxene' da' bzande' yela' zaca' che' cont bide' golje' beñach

¹ Nezda' zoale mbalaz da' chejnilaže'le Criston', nezda' chaclaže'le gonle da' güen lagüe dan' chaque Criston' le'e, nezda' zoa Spiritw chen' len le'e, na' nezda' chaque lježle na' cheyaše'laže'lene' cate' bi da' chesac che'. ² Da'nana' chñeyoeda' le'e, le gon cont yebechgüeda' nezda' lecze yogo'czle nacle toz len lježle, na' yogo'czle toz can' zoale chaquele Criston', toz can' chonle xbab, na' toz can' chaclaže'le gac. ³ Bibi cheyała' goncho cont gac güen che cuinzcho na' bibi goncho cont gacxen cuincho, san cheyała' gwzexjwlaže'cho na' goncho xbab zaca'ch bene' lježcho clel ca chio'. ⁴ Ne tocho bi cheyała' cue' yichjcho che cuinzcho, san cheyała' cue' yichjcho che dan' gaclenen bene' lježcho ca'.

⁵ Cheyała' goncho xbab ca xbab da' ben Cristo Jesúsena'. ⁶ Le la'czla' naque' Dios, bzande' yela' chnabia' che' na' yela' bala'an' xen che' dan' nape' lagüe da' naque' toz len Xe' Diosen' cont bide' golje' beñach. ⁷ Bzoe' to šla'ale yogo' da' zaca' dan' gota' che', na' ben cuine' bene' güen xšin Diosen' cate' golje' beñach. ⁸ Na' ba naque' beñachen' bzexjwlaže' cont bene' con can' gwna Xe' Diosen'. Bzenague' che' cont bnežjw cuine' gosote'ne' le'e yag cruz ca chesote' bene' malchgua. ⁹ Da'nana' Diosen' benxengüe' le' na' bsi'e xnezen' cont Jesucriston' naque' Xan beñach, angl, da' xigüe' na' yogo' bichle da' de, na' cont Jesucriston' chnabia'che' ca note'tezechle. ¹⁰ Na' žin ža cate' yogo'lol beñach na' yogo'lol angl ca' yosoza xibgaque' lao Jesucriston', bene' že' yaba, yežlion' na' gate'tezechle. Na' lecze ca' yeson da' xigüe' ca'. ¹¹ Yogo'lol bene'

yo'o biš grasyw yosozexjwyichje' yesene' le Jesucriston' nape' la'zelagüe yela' gwnabia' xen. Na' Xancho Diosen' gacxene' cate' yogüe' yesene' ca'.

Beñe' chesejnilaže' Criston' zjazaca'lebde' ca be'ni'

¹² Da'n'an' beñe' migw, con can' ba gwzoale bzenagle chia' cate' gwzoa' len le'e, ca'czen' chonchen byen gwzenagle chia' na'a bi zoa' len le'e. To tole le gon cont nachia' Diosen' ba beñe' le'e yela' mban toli tocanē, na' le soa cueze gwsaca'le gonle can' chazlaže' Diosen'. Le gon ca' do chžeble, le nezecho bi soečo da' malen' še ba chzenagčo čhen. ¹³ Na' Diosen' chone' cont che'nele gonle can' chazlažen', na' chaclene' le'e chonlen.

¹⁴ Le gon yogo' dan' chazlaže' sin cbi gacyožlen'ne', neca žeše'le che'. ¹⁵ Le gon ca' cont yesacbe'e beñe' chonle can' chazlaže' Diosen' sin cbi doła' gaple. Bibi da' xinj gonle. Bi gonle ca cheson beñe' laždao' mal ben' chesonchgua clele. Nach gacle ca to da' chseni' len yezica'chle beñe že' yežlio nga, ¹⁶ güe'lenle legaque' xtiža' Criston' da' nsa' yela' mban toli tocanē. Še gonle ca', nach cate' yid Criston' da' yoble, yebechgüeda' can' benlen' na' nezda' dan' bžaglagua' bena' xšin Diosen' gan' zoalen', gague bendadzan'na'. ¹⁷ Le'e chzane cuinle chonle xšin Diosen' lagüe dan' chejnilaže'lene', na' da'n'an' zaca'leble ca to beyixē' be ba gosot beñe' cont bosozeye'ba' gosonxene' Diosen'. Na' neda', chebeda' chzanda' yela' mban chia' cont gac doxen can' chazlažen', na' da'n'an' zaca'leba' ca to vino da' chosolalje beñe' lao Diosen' cate' chesonxene'ne'. ¹⁸ Le yebe len neda' da' chzane cuina' gac da' gac chia', na' le soa mbalaz can' zoa' neda'.

Timoteo na' Epafrodito

¹⁹ Zoa' lez gon Xancho Jesúsēn' latje yob seła' Timoteo gan' zoalen', le yebechgüeda' yenda' can' ba chonlen'. ²⁰ Le nono nochle zoa beñe' seła' beñe' chi'chgua yichje' gac güen chele can' chi' yichj Timoteon'. ²¹ Yezica'chle beñe' con zjachi' yichjgaque' che dan' chac čhegaque', na' bi zjachi' yichje' can' chaclaže' Jesucriston' gac. ²² Perw nezecele ca zoacze Timoteon' chone' da' zaca', na' nezele can' ba goclene' neda' cont gwduxjue'eda' xtiža' Diosen' zan yež. Ca beñe' chaque xe' zoe' chaclene'ne' len xšinen', can' zoa Timoteon' chaclene' neda'. ²³ Da'n'an' zoa' lez guac seła'ne' gan' zoalen' cate' la' neztēda' nac gac chia' nga, ²⁴ na' seła'ne' la'czla' chejli'a gon Xancho Criston' cont lecze neda' yob yedēna'a le'e.

²⁵ Na' lecze chacda' chonen byen yesēla' beñe' lježcho Epafrodito gan' zoalen', ben' gwseła'le nga cont chaclene' neda' len bi da' chyažjda'. Ba bene' xšin Diosen' txen len neda', na' lecze ba gwdi gwxaca'to' txen. ²⁶ Che'nchgüede' yele'ede' le'e, na' leca da' chacde' gwnezele gocšende'. ²⁷ Na' da' li gocšenchgüede', yelate'ze ca gote', perw Diosen' beyaše'de' le', na' bi nacho toz le' beyaše'de', san lecze beyaše'de' neda' cate' beyone' le', le da' zan da' ba goc chia' na' nyaše'chgua goc chia' šaca' gote'. ²⁸ Da'n'an' zelaže'cha' yesēla'ne' gan' zoalen' cont soale mbalaz yežagle da' yoble na' cont bich soayaše'le che'. ²⁹ Le gwlebe' binlochgua da' naque' txen len chio' chejnilaže'cho Xancho Criston', na' le gon xbab ba bene' to da' zaca', na' lecze ca' le gon xbab che nochle beñe' chon can' ba benen'. ³⁰ Le yelate'ze ca gote' da' bzane cuine' goclene' neda' nga len xšin Criston', can' goncze le'e šaca' zoale nga len neda'.

3

Soa cuezcho goncho can' chazlaže' Diosen'

¹ Na' na'a beñe' migw, cheyala' soacho mbalaz da' chejnilaže'cho Xancho Criston'. Bi chacda' zed chozoja' che da' ca' ba bzoja', le chyažjen gonchle

xbab chen. ² Le gwsaca' cont bi gwzenagle che bene' ca' chesene' cheyala' soale señw dan' že' circuncisión da' yesechogue' lo cuerp chelen', le zjanaque' bene' zban na' chesyelalde' chesone' da' mal. ³ Le de to señw checho cont nezecho naccho xi'in Dios. Señwna' naquen da' ba ben Diosen' chio' Spiritw chen' cont chaclenen chio' chonxenchone'. Chebechgüecho chejnilaže'cho Cristo Jesúsén', na' bi zoacho lez gata' bichle da' gaclenen chio' lao Diosen', ca no señw da' zoa lo cuerp chechon' o bichle da' goncho. ⁴ De da' zan da' guac gona' xbab gaclenen neda' lao Diosen' šaca' chacda' yebe Diosen' neda' neche da' ba bena' o nac naca'. Nono zoa no nacho ba benche' da' zan da' yebe Diosen' ca neda'. ⁵ Le naca' bene' Israel na' golja' lo diaža che da' Benjamín, na' bosozoe' neda' señw che circuncisión to xmanzda'. Na' goljlena' diža' hebreo da' nac xaxna'a bene' chesaque' diža' hebreo. Na' bsedyana' ley dan' bzoj da' Moisésén' con can' chosozejni'i bene' fariseo ca' len. ⁶ Na' leca gwche' yichja' diža' gole che bene' Israel gualaž chia'. Da'nán' bchi bsaca' bene' ca' chesejnilaže' Criston'. Na' con ga zelao gwzoeda' bzenaga' che yogo' dan' ža ley cheton' cheyala' gonto' o bi cheyala' gonto'. ⁷ Na' cana' bena' xbab yogo' da' ca' yesaclenen neda' cont yebe Diosen' neda', perw na'a ba chache'eda' bi yesaclenen. Ba bchojyichja' da' ca' cate' gwyejnilaža' Criston', le gocbe'eda' bi yesaclenen neda' lao Diosen'. ⁸ Na' na'a da' nombi'a Xana' Cristo Jesúsén' naquen da' zaca'chgua len neda'. Bibi zaca' yogo' da' ca' gocda' cana' yesaclenen neda' lao Diosen'. Yogo' da' ca' bebeda' cana' ba zjanaquen ca to da' bibi zaca' len neda', na' nonan' ca to beb da' ba gwcho'ona' cont gombia'cha' Criston'. ⁹ Le zelaže'chgua' gaca' toz len Criston', na' zelaža' na Diosen' naca' bene' güen len le'. Na' nezda' ne' naca' bene' güen len le' da' chejnilaža' Criston', gague lagüe da' chona' bi da' ža ley dan' bzoj Moisésén' cheyala' goncho. Le con bene' chesejnilaže' Criston' none' legaque' ca bene' güen. ¹⁰ Chaclaža' gombia'cha' Criston' na' gombi'a yela' guac che' dan' nape' lagüe bebane' ladjo bene' guaten', na' chzanlaže' cuina' saca'zi'a can' gwdi gwxcaca' le'. Na' ca Criston' gote' neche xtołan', chaclaža' gaca' ca to bene' guat len da' malen', bich gonan'. ¹¹ Zoa' chbeza' ca', le cheyiljwlaža' nacle gona' cont yechis yosban Diosen' neda' ladjo bene' guat ca' cate' ba gota'.

Pablo chaclaže' gac yichjlažda'ogüe' can' nac yichjlaždao' Criston'

¹² Bi nia' bačh nac yichjlažda'ogua' can' cheyala' gaquen, le biña' gaquen can' nac yichjlaždao' Cristo Jesúsén'. Perw chona' con ga zelao saqueda' cont gaguech yichjlažda'ogua' can' nac che le', le ba gwleje' neda' naca' xi'ine'. ¹³ Bene' migw, nezda' biña' gac yichjlažda'ogua' can' cheyala' gaquen, perw ba bchojyichja' yogo' da' ca' gosac da' zaca' len neda' cana' na' yogo' bin' ba bena', na' chi' yichja' da' mbalaz da' chbeza' gac. ¹⁴ Chona' con ga zelao saqueda' cont Diosen' yebede' neda' cate' yežina' gan' zoen'. Le Diosen' gwleje' neda' cont gac yichjlažda'ogua' can' nac yichjlaždao' Cristo Jesúsén' lagüe da' chejnilaža'ne'.

¹⁵ Na' yogo'cho še ba zej chaccho can' chaclaže' Diosen' gaccho, cheyala' goncho xbabén' ca', na' še yo'ocho bichle xbab yoble, Diosen' gwzejni'iden' chio'. ¹⁶ Perw na' cheyala' soaczcho goncho can' ba bzejni'i Diosen' chio'.

¹⁷ Bene' migw, le gon can' chona' neda', na' le na' can' cheson yezica'chle bene' cheson can' ba bzejni'ida' le'e, cont gonle can' chesonen'. ¹⁸ Da' yoble žia' can' ba gwnia' zan las, can' zjanita' bene' zan, nachia' chesegue'ede' Criston' ben' bnežjw cuine' gote' le'e yag cruzen' neche xtołachon'. Na' chbeža' da' chesone' ca'. ¹⁹ Žin ža yesebiayi' bene' ca' toli tocanē, le chesyebchde' chese'ej chesagüe' clel ca yesonxene' Diosen'. Chesaclaže' cheso'e diža' che bi da' yela' zto' da' chesone', na' zjachi' yichje' tloaze da' chac yežlio nga. ²⁰ Perw chio',

bich choncho xbab nac lažcho yežlion', le nezecho naquen gan' zoa Xancho Jesucriston' ben' non chio' yela' mban toli tocane, na' chbezcho batcan' yide' da' yoble. ²¹ Na' caten' yide' da' yoble, gone' cont cuerp checho quinga da' bitec bi zaca' yesyeyaquen da' cobe, na' yesaquen leca güen can' ba nac cuerp che le'. Gone' ca', le nape' yela' guac neche gone' cont yogo'lol da' zjade yosozenaguen che'.

4

Cheyala' soacho mbalaz da' chejnilaže'cho Criston'

¹ Na' na'a bene' migw, chacda' le'e na' che'nchgüeda' le'e lježcho da' yoble. Chbechgüeda' da' chejnilaže'le Criston', na' zoa' mbalaz neche le'e. Le'e bene' chacda', le soachach šejnilaže'le Xancho Jesucriston'.

² Na' chneyoeda' le' Evodia, na' lecze ca' le' Síntique, le soašca binlo na' le gac txen tole yetole da' chejnilaže'le Xancho'. ³ Na' ca' nac le' bene' lježa', len' beno' xšin Diosen' do yichj do lažo' txen len neda' cana', na' chneyoeda' gacleno' no'ol quinga yesyenite' binlo len lježe' da' yoble, le legaque' ba gosone' xšin Diosen' txen len neda' na' len Clemente na' len yezica'chle bene' lježcho ca', na' zjanyoj la yogo' bene' ca' le'e libr che Diosen' gan' zjanyoj la bene' ba zjanape' yela' mban toli tocane.

⁴ Le yebe yogo'te ža da' chejnilaže'le Xancho Jesucriston'. Da' yoble žia', le yebe. ⁵ Le gon cont yogo'lol bene' yesenezde' nacle bene' šagüe', le ba zoa yid Xancho' da' yoble.

⁶ Bi gacle tole bite'teze da' chac chele, san le yol güiž Diosen', nable gaclene' le'e bite'teze da' chac, na' le güe'e yela' choxclen cate' bi da' nabelene'. ⁷ Nachen' Diosen' gone' soa cuezle binlo len xbab da' yo'o lo' yichjlažda'olen' lagüe da' chejnilaže'le Cristo Jesúsén', cont bi gacle tole. Na' cate' le' ba chone' cont zoa chbezcho binlo len xbab chechon', neca gacbe'echo bixchen' zoachguacho binlo.

Cheyala' cue' yichjcho che da' zjanac güen

⁸ Na' da' la'zelagüe dan' chaclaža' neyoeda' le'e bene' migw, cue' yichjle che diža' li, che dan' nac da' zaque', che dan' zej to licha, che dan' bibi da' mal nsa', che dan' naquen binlo, na' che da' zaca' yebecho. Bite'teze da' naquen da' güenchgua na' bite'teze da' chazlaže' Diosen', le cuec yichjle che dan' zjanac ca'.

⁹ Da' ca' bzejni'ida' le'e, yogo' dan' benele gwnia' cate' bsed blo'eda' le'e can' cheyala' gonle, na' da' ca' ba ble'ele chona' neda', da' ca' le gon. Na' Dios ben' chon cont chzoa chbezcho binlo len xbab da' yo'o lo' yichjlažda'ochon' soacze' gaclene' le'e.

Can' gosaclen bene' Filipos ca' Pablon'

¹⁰ Chbechgüeda' lao Xancho Cristo Jesúsén' da' ba chi' yichjle chaclenle neda' da' yoble. Nezda' gwzoale chonle xbab chia', perw bi benen gaclenle neda'. ¹¹ Na' žia' da' qui gague neche byažjda' da' ca' byažjda', le Diosen' ba bzejni'ide' neda' cont zoa' mbalaz cate' de da' chyažjda' na' cate' bibi de. ¹² Ba yolagua' yela' yaše' yela' zi', na' yolagua' yela' šagüe'. Diosen' ba bzejni'ide' neda' cont zoa' mbalaz bite'teze chac chia', cate' de da' che'ej chagua' na' cate' chbil chdona', cate' de bichle da' chyažjda' na' cate' bibi de. ¹³ Chac chona' bite'teze da' cheyala' gona', le zoa Criston' len neda' chaclene'nda'. ¹⁴ Perw benle güen gwseła'le da' goclenen neda' cont naccho txen len dan' chy chzaca' nga.

¹⁵ Na' le'e zoale Filipos, nezele caten' beyož gwyejle'le diža' güen che Criston' dan' bia' len le'e, benle txen len neda' cate' beza' distritw Macedonian',

gwsela'le da' byažjda', na' nono nochle bene' ca' chesedop chesežag chesonx-ene' Criston' yež yoble goson ca'. ¹⁶ Le cate' ne' zoa' Tesalónica gwsela'le da' byažjda' zan ni'a. ¹⁷ Perw gague chzelaža' bi da' gonle neda', san chzelaža' soaczle gonle güen cont yebe Diosen' le'e. ¹⁸ Ba bene' doxen da' cheyała' gonle na' da' zcha'och ca'te' da' cheyała' gonle. Ba decze da' zcha'o chia' na'a. Bibi chyažjda', le ba ben Epafrodito da' gwsela'le chia'. Na' da' gwsela'le zaca'leben ca to yal da' chla' zix da' chzey bxozen' lao Diosen', le Diosen' chebede' can' benlen'. ¹⁹ Na' Dios chia' nan' goncze' yogo'te bi da' chyažjele lagüe chejniłaže'le Cristo Jesúsén', le yogo' da' de yo'on lo ne'e. ²⁰ Cheyała' gonxencho Xancho Diosen' toli tocañe. Can' gonšcaczcho.

Pablon' zelagüe' bzedē' legaque' diža'

²¹ Le gwguap tiox yogo'lol bene' Filipos ca' yo'o lo na' Diosen' da' chesejni-łaže' Jesucriston'. Bene' lježcho ca' nita' nga len neda' chguapto' le'e tiox. ²² Na' lecze yogo' bene' Roma quinga ba yo'o lo na' Diosen' chosoguape' le'e tiox, lente bene' ca' cheson žin che rey ben' nac la'zelagüe' bene' gwnabia' ben' chi' Roma.

²³ Xancho Jesucriston' soašque' gaclenšque' le'e len xbab da' yo'o lo' yichjlažda'olen'. Da' na'zen' chzoja'.

CART DAN' BZOJ POSTLW SAN PABLO CHE BENE' CA' ŽE' COLOSAS

Pablon' chzoje' bene' chesonxen Jesucriston' ciuda Colosas

¹ Jesucriston' gwleje' neda' Pablo cont naca' postlw che', le can' chazlaže' Diosen'. Neda' txen len bene' lježcho Timoteon' chguapto' le'e tiox. ² Chzoja' le'e zoale Colosas, le'e chejnilaže'le Criston' na' nacle lo na' Diosen'. Chnaba' gaclenšca Xacho Diosen' le'e na' gone' cont soa cuezle binlo.

Pablo chnabde' Diosen' gaclene' bene' ca' že' Colosasen'

³ Yogo' ni'a cate' choj güižto' Dios ben' nac Xa Xancho Jesucriston' choe'to' yela' choxclen che' can' chonlen'. ⁴ Le ba beneto' diža' can' chejnilaže'le Cristo Jesús'en' na' can' chaquele yogo' bene' ca' yezica'chle zjanaque' lo na' Diosen'. ⁵ Na' nezeto' chejnilaže'lene' na' chaquele legaue' lagüe da' zoale lez šjayzoale len Diosen'. Caten' gwzolao bzenagle che xtiža' Diosen' da' naquen da' güen na' da' li, gwyejni'ile gac chele ca'. ⁶ Na' xtiža' Diosen' da' ba bzenagle ba goslasen doxen, na' bene' zan ba chosozenague' chen. Na' legaue' lecze chesone' güen ca gwzolao le'e chonle caten' gwyejni'ile diža' li da' chzejni'in nži'ilaže' Diosen' le'e, na' ne' chonle güen ža na'aža. ⁷ Chaqueto' Epafras ben' bzejni'ide' le'e xtiža' Criston'. Chone' xšin Diosen' can' chon neto', na' zoateze' chone' can' ža Criston' da' chaclaže' gaclene' le'e. ⁸ Len' ba gože' neto' ba ben Spiritw che Diosen' cont chaquele Diosen' na' chaquete lježle.

⁹ Da'n'an' caten' gwnezeto' ca güenna' chonle, gwzolaoto' yogo' ni'a cate' choj güižto' Diosen' chnabeto'ne' gaclene' le'e. Chnabto' gon Spiritw chen' le'e yogo' cuen yela' sina' na' yela' chejni'i cont nezele nacyanen' chaclaže' gonle. ¹⁰ Chnabto' soale gonle can' cheyala' gon chio' nombia'cho Xanchon', cont yebede' yogo' dan' chonle. Na' chnabto' gaclene' gonle zan cuen da' güen na' gaclene' šejch gombia'lné'. ¹¹ Chnabto' gaclen Diosen' le'e len yela' guac xen che' cont soatezle šejnilaže'lene' na' gaple yela' chxenlaže' bite'tezen' chac. ¹² Na' chnabto' soale mbalaz güe'le yela' choxclen che Xacho Diosen', le le'na' ba gwleje' chio' ba naccho lo ne'e cont šjayzoacho len le' gan' yo'o be'ni' juisyw. ¹³ Bebeje' chio' lo na' gwxiyen' cate' da' cholen' ne' chnabian' yichjlažda'ochon', na' gwlo'e chio' lo na' Xi'ine' Jesucriston' ben' chacde', cont na'a gwzenagcho che le'. ¹⁴ Na' Xi'in Diosen' bnežjw cuine' gote' cont beque'e xtol'a'chon' na' chezi'xen Diosen' checho.

Criston' bozoe' chio' binlo len Diosen'

¹⁵ Criston' naque' cayanen' nac Xe' Dios ben' nono chle'e. Ba zoacze Criston' cate' bina' xe yežlion' na' cate' bina' gata' yogo'lol da' de le'e yaban' na' lo yežlion'. ¹⁶ Criston' bene' yaban' na' yežlion', bene' bene' že' yaba na' yežlio, len bica'chle da' zjade yaban' na' yežlio nga. Bene' da' ca' chle'echo na' da' ca' bi chle'echo. Bene' cont nita' angl gwnabia' ca' na' da' ca' besyeyac da' xigüe' ca' na' bichle da' ca' chesenabia' yichjlaždao' bene' ca' bi chosozenag che Diosen'. Na' Criston' bene' cont nita' bene' ca' na' yogo' da' ca' cont gacxene'. ¹⁷ Criston' ba zoacze' cate' bina' nita' yogo'lol da' de le'e yaban' na' lo yežlion'. Na' yogo' bite'teze da' zjade zjanaquen con can' zjanaquen, le Criston' zoacze' chone' cont zjanaquen ca'. ¹⁸ Na' Criston' chnabi'e chio' chdop chžagcho chonxenchone'. Len' bxie' yela' mban toli tocané che bene' chesejnilaže'ne', na' naque' bene' nechw bebane' ladjo bene' guaten' ben' bich nabia' yela' goten' le'. Da'n'an' naque' la'zelaogüe bene' blao na' chnabi'e yogo'lol bene'

na' bica'chle da' zjade. ¹⁹ Na' Diosen' chazlaže' dan' nac yichjlaždao' Criston' cayanen' nac yichjlaždao' le' na' dan' nac yela' guac che Xi'ine' Criston' doxen can' nac yela' guac che le'. ²⁰ Na' lecze chazlaže' yozoe' binlo len le' yogo' bene' že' yaban' na' yežlion', le Xi'ine' Criston' bnežjw cuine' blalj xchene' le'e yag cruzen' cont gac yesenite' binlo len le'.

²¹ Cana' bi nombia'le Diosen'. Bgue'elne' na' gwzoale benle da' malen'. Perw na'a ba bozoa Criston' le'e binlo len Diosen', ²² le bnežjw cuine' neche chio' caten' gosote'ne'. Na' beyone' lažda'ochon' xilaže' cont bibi doła' gapcho cate' yežincho lao Diosen', na' bibi de da' zaca' yosocuiše' chio' lagüen'. ²³ Na' še soacho šejnilaže'cho Criston' na' soačhačcho len toze xbab, na' soateze soacho lez šjayzoacho len Diosen' can' gwzelaže'cho gac checho cate' bzenagcho xtižen' da' nechw, nachen' bibi doła' gapcho cate' yežincho lao Diosen'. Na' diža' güen chen' ba bžinen doxen yežlion' cont benachen' chesenden', na' Diosen' gwleje' neda' Pablo chyixjue'edan'.

Diosen' gwleje' Pablon' cont bsd blo'ede' bene' chesonxen Criston'

²⁴ Da' zan da' chy chzaca' lagüe da' chyixjue'eda' xtiža' Diosen' len le'e bi nacle bene' Israel. Na' le'e chdop chžagle chonxenle Criston' nacle ca cuerp che'. Na' chbeda' chžaglagua' yogo' da' chaclaže' Criston' žaglagua' da' gaclenen le'e. Na' cate' chžaglagua' neda', guac nacho cuin Criston' chžaglagüe'. ²⁵ Diosen' gwleje' neda' chyixjue'eda' xtižen' len le'e chdop chžagle chonxenle Criston', cont gwzejni'ida' le'e doxen can' zeje xtižen'. ²⁶ Cani' nono na' neze da' güen da' chon Diosen' len bene' chesejnilaže'ne', perw na'a Diosen' ba bzejni'iden' chio', chion' naccho lo ne'e. ²⁷ Diosen' chaclaže' nezecho leca güen juisyw chone' len note'tezcho chejnilaže'chone', la'czla' bi naccho bene' Israel. Cana' nono gwneze gone' da' güen juisyw len note'tezcho, perw na'a Diosen' ba bzejni'ide' chio' zoacze Criston' len chio' chejnilaže'chone' na' da'n'an' zoacho lez šjayzoacho len Diosen' gan' yo'ochgua be'ni'. ²⁸ Choe'lena' yogo' bene' diža' che Criston', chata'yoeda' yogüe' yosozenague' che', na' chzejni'ida' yogüe' xtižen' cont yesejni'iden' binlo, le chaclaža' yogo' bene' chesejnilaže' Criston' yesaque' cayanen' chaclaže' Diosen'. ²⁹ Da'n'an' chona' con ga zelao chzoeda' chyixjue'eda' bene' xtižen', na' chaclenchgüe' neda' len yela' guac xen chen'.

2

¹ Chaclaža' nezele chonchgua' ga zelao chzoeda' cont chaclena' le'e na' bene' lježcho že' Laodicea na' yezica'chle bene' lježcho bina' yesele'ede'nda'. ² Chaclaža' gona' chač laže'le cont yichjlažda'olen' yesaquen toze lagüe da' chaque lježle. Na' chaclaža' nezeyane'le can' cheyala' gonle xbab cont šejni'ile da' ba bzejni'i Diosen' chio' che Criston' da' nono gwneze cani'. ³ Criston' nse'e doxen yela' sina' na' yela' chejni'i che Diosen' cont gwzejni'iden' chio'. ⁴ Chnia' ca' cont nono siye'e le'e len diža' da' chaquele naquen xdan. ⁵ Na' la'czla' bi zoa' na'le len le'e, zoa' chona' xbab chele na' chebeda' nezda' chonle can' cheyala' gonle na' zoačhačhle chejnilaže'le Criston'.

⁶ Na' na'a, con can' ba gwzolaole chejnilaže'le Criston' na' ba nonlene' Xanle, con can' soačhačhle len le'. ⁷ Le soačhač le šejnilaže'ch Criston' can' ba bsdlena', cont gacle ca to yag da' ba gwyaz loen sitjw. Na' le soa le güe'chgua yela' choxcen che Diosen' can' chaclene' le'e.

Criston' ba bocobe' yichjlažda'ochon'

⁸ Le gwsaca' cont nono co'oyele' le'e gwzenagle che diža' sina' che yežlio nga da' naquen da' güenlaže'. Bene' že' yežlion' chosozejni'ide' da' zan da' chesene' cheyala' goncho da' bibi zjazaca', na' bitw chosozejni'ide' che Criston'.

9 Yichjlaždao' Criston' naquen' cayanen' nac yichjlaždao' Diosa', na' nac yela' guac che Criston' doxen can' nac yela' guac che le'. 10 Na' Criston' chnabia'che' ca note'teze angl blao na' ca note'teze da' xigüe', na' chio', da' chejnilaže'chone', bich bi chyažjecho cont soa cuezcho binlo. 11 Na' lecze da' naccho txen len Criston' de to checho da' zaca'leben ca señw da' že' circuncisión, perw bi naquen señw da' bzoa bene' lo cuerp chechon', san da' ba bocob Criston' yichjlažda'ochon' cont da' malen' bich chnabian' chio'. 12 Na' da' gwzoacho nis caten' gwyejnilaže'chone', zejen con can' got Criston' neche xtoła'chon', lecze ca' chio' ba naccho ca to bene' guat len da' malen' cont bi gonchon. Zejen bgaše'cho can' bgašen', na' lecze zejen bechis bosban Diosen' chio' ladjo bene' guat ca' can' bene' len Criston'. Zejen ca' le chejle'cho Diosen' bosbane' Criston' len yela' guac chen'. 13 Cana' gwxcaca'lebcho ca to bene' guat len yichjlažda'ochon' da' bi bzenagcho che Diosen' na' gwzoacho bzenagcho che da' malen'. Nach Diosen' bene' len chio' can' bene' bosbane' Criston' ladjo bene' guat ca', le bocobe' yichjlažda'ochon' na' bezi'xene' xtoła'chon'. 14 Bi bencho yogo'lol can' ža ley che Diosen' cheyala' goncho, na' bencho da' žan bi cheyala' goncho. Da'nan' gota' xya checho len leyna' na' nchoglaon checho saca'zi'cho toli tocanē. Perw Criston' bnežjw cuine' bosode'ene' le'e yag cruza' neche doła' xya chechon', na' da'nan' nezecho Diosen' ba bnitlagüe' xtoła'chon'. 15 Criston' cate' gote' le'e yag cruza' beque'e yela' gwnabia' che da' xigüe' ca' na' blo'ede' benachen' ba blej bšošen'.

Cue' yichjcho che da' ca' zjazacan' len Diosen'

16 Bi gwzenagle che bene' ca' chesena chonle mal che'ej chagwle bi da' che'ej chagwle, o bene' chesene' chele da' bi chonle no ža lni, o bene' chesena qui ca' goncho cate' naquen bio' che'en, o bene' chesena ža ni ža na' nac ža che Dios. 17 Yogo' da' ca' con bosozejni'in late'lasze che Criston', perw na'a da' bid Criston' bich chyažjecho da' ca', le ba nombia'chone'. 18 Bi gwzenagle še no bene' chzejni'ide' cheyala' gon cuinle ca to da' bibi zaca' cont soale binlo len Diosen', o bene' chzejni'ide' cheyala' gonxenle no angl o gonle bi da' že' ble'edagüede', le bi chebe Diosen' bene' cheson da' ca'. Bene' ca' chosozejni'ide' ca' chesacde' xbab da' chesaljlaže' zaca'chgvan, len bitw bi zacan', 19 le bi chosozenague' che Criston'. Perw chio' chdop chžagcho chonxenchone', Diosen' none' cont Criston' chnabi'e chio' ca yichjchon' chnabian' cuerp chechon'. Na' naccho txen len le' na' len bene' lježcho ca to cuen güeje cuerp chechon' ngoden' txen, le xpela'chon' na' bechj bnia' ca' zjanoxen' len con ca non Dios chegaquen.

20 Chio' naccho txen len Criston', guac nacho Criston' ba none' chio' ca to bene' guat len da' xinjen' cont bi gonchon, ca bene' guaten' goc le' le'e yag cruzen'. Da'nan' bi cheyala' gwzenagcho cate' chesena bene' da' zan da' goncho cont soacho binlo len Diosen', le bi naccho bene' che yežlion'. ¿Bixchen' chzenagle che yela' sina' che yežlio nga da' ca' chesene' cheyala' gonle na' da' ca' chesene' bi cheyala' gonle? 21 Chesene': "Bi goxe'le da' nga", "Bi ye'ej gagwle da' na'", "Bi canle da' na'". 22 Na' yogo' da' ca' chesene' bi goxe'cho, bi ye'ej gagwcho na' bi cancho, da' chesede chen cate' chchinchon, na' dan' chesene' cheyala' goncho len da' ca', con xbab chegaczen'. 23 Guacte goncho xbab nac da' sina' da' chesene' cheyala' goncho, na' goncho xbab gaclenen chio' gonxencho Diosen', le chesene' cheyala' gwchi gwsaca' cuincho na' gon cuincho ca to da' bibi zaca'. Perw bibi zejen goncho ca', le bi chaclenen chio' cont bitw gwzenagcho che da' malen'.

3

¹ Can' bechis bosban Diosen' Criston' ladjo bene' guat ca', lecze can' bocobe' yichjlažda'ochon'. Da'nan' cheyała' cuec yichjcho goncho can' chazlaže' Diosen' na' cuec yichjcho gac can' chebe Criston' ben' zoa yaba chnabi'e txen len Diosen'. ² Na' cheyała' yebecho da' naquen da' zaca' len Diosen', gague da' naquen da' zaca' len benachen'. ³ Le guac nacho Criston' ba none' chio' ca to bene' guat len da' malen' cont da' malen' bich nabian' chio', na' mbancho len Criston' na'a cont naccho txen len Diosen'. ⁴ Criston' none' chio' yela' mban toli tocaņe. Na' cate' le' yide' da' yoble, šjayzoacho txen len le' gan' yo'ochgua be'ni'.

Can' bencho cana' na' can' cheyała' goncho na'a

⁵ Da'nan' cheyała' cuejyichjcho da' mal da' žan goncho len cuerp chechon' dan' nac che yežlio nga. Bitw gata'lencho no'ole bi nac no'ol checho o bene' byo bi nac bene' checho. Bitw goncho bichle da' yela' zto' len cuerp chechon' neca yebecho bi da' nac da' yela' zto'. Bitw selaže'cho goncho bite'teze da' mal, neca selaže'cho da' zan da' gata' checho, le toz ca malen' nac yela' chzelažen' len da' cheson bene' chesejnilaže' l gua'a lsaca' ca'. ⁶ Žin ža cate' Diosen' gone' cont bene' cheson da' ca' yesezaca'zi'e toli tocaņe. ⁷ Le'e lecze gwzoale cana' benle da' mal ca' ba gwnia'. ⁸ Perw na'a cheyała' cuejyichjle yogo' da' mal. Bitw ža'a lježle, bitw locle, bitw gacle bene' xi'a len lježle, bitw nele che lježle, na' bitw güe'le diža' zban. ⁹ Na' bich güe'len lježle diža' güenlaže'. Ba gwlejyichjle da' mal da' gwnabia' yichjlažda'olen' cana' na' bich cheyała' gwzenagle chen da' yoble. ¹⁰ Ba chzenagcho che Dios ben' ben chio', le ba bocobe' yichjlažda'ochon'. Na' tža tža chzejni'ide' chio' cont zej chacch xbab chechon' can' nac chen'. ¹¹ Na' chio' ba bocob Diosen' yichjlažda'ochon', bibi nonen še naccho bene' Israel o še bi naccho. Bibi nonen še zoacho seņw da' že' circuncisión o še bi zoachon, na' bibi nonen še naccho bene' zito', la'czla' še za'cho gan' že' bene' bi chesejni'i, na' bibi nonen še naccho esclavo o še bi naccho. Da' naquen da' zeje, ba chejnilaže'cho Criston' na' len' zoe' len yogo'cho.

¹² Diosen' gwleje' chio' cont naccho lo ne'ena' na' chacde' chio'. Da'nan' cheyała' yeyaše'cho bene' na' gaccho bene' šagüe' len yogo'lol bene'. Bi cheyała' ga'laže'cho, san gaccho bene' chzexjwlaže' na' gapcho yela' chxenlaže' len yogo'lol bene'. ¹³ Na' cheyała' gwdecho ca'ale še bi chac checho len bene' lježcho na' yezi'xencho še bi da' ba gosonde' chio', yezi'xencho con can' ba bezi'xen Xancho Criston' checho. ¹⁴ Na' yeto da' zejechen goncho ca yogo' da' ca', cheyała' gague lježcho, le še chaque lježcho gaclenen goncho yogo' da' ca' can' cheyała' gonchon. ¹⁵ Diosen' gwleje' chio' cont soa cuezcho binlo, na' cheyała' gwzenagcho che Criston' na' gacbe'echo yogo'cho naccho toze cont soa cuezcho binlo. Na' lecze cheyała' soacho güe'cho yela' choxclen che Diosen'.

¹⁶ Cheyała' soacho goncho xbab che xtiža' Criston' na' gwzenagcho chen, na' lecze soacho gwzejni'i lježcho na' neyoe lježcho len doxen yela' sina' che Diosen' cont yogo'cho goncho da' güen. Na' cheyała' golcho no salmos, no himnos, na' bichle da' ža Spiritw che Diosen' golcho, na' güe'cho yela' choxclen che Diosen' lo' yichjlažda'ochon'. ¹⁷ Na' bite'teze da' goncho na' bite'teze diža' güe'cho, cheyała' nabcho gaclen Xancho Jesús en' gonchon can' chazlaže', na' güe'cho yela' choxclen che Xacho Diosen' con can' chaclen Xancho Jesús en' chio' chonchon'.

Can' cheyała' goncho len lježcho

18 Le'e no'ole nšagna'le, to tole le gwzenag che bene' chele, le can' cheyała' gon chio' chejnilaže'cho Xancho Criston'. 19 Na' le'e bene' byo nšagna'le, to tole le gaque no'ol chele na' bi gonle znia len legaue'. 20 Na' le'e bi' bixjw, le gwzenag che yogo'lol bi da' yesena xaxna'le, le can' chazlaže' Xancho Criston' gonle. 21 Na' le'e nacle xaxna' bi' bixjw, bi gonle cont yeseloc bi' chele ca', le še gonle ga yeselocbe', yesaquebe' zdebe yosozenagbe' chele. 22 Na' le'e chonle xšin bene', le gwzenag yogo'lol can' ža xan žinna' gonle. Bitw gonlele xan žinna' gonle ca bene' chonchgua žin cate'zen' chne'e le'e, san le gon žinna' do yichj do laže'le da' chejnilaže'le Diosen'. 23 Na' bite'teze da' gonle, le gonen do yichj do laže'le cont yebe Xancho Criston', gague contze yebe bene'. 24 Nezczele Xancho Criston' gone' cont yežincho gan' zoen' še soacho goncho can' chazlažen'. Na' zoacho cont goncho con can' ža Xancho Criston'. 25 Na' note'tezcho še bi choncho can' cheyała' goncho, Xancho Diosen' gone' saca'zi'cho neche dan' ba bencho. Na' toz can' chon Diosen' len yogo'lol bene'.

4

1 Na' le'e nacle xan žin, le gon güen na' le gac bene' šagüe' len bene' cheson xšinlen', le nezczele Criston' ben' zoa yaban' naque' Xanle.

2 Yogo'te ža cheyała' nabcho gaclen Diosen' chio' len da' choncho na' len bichle da' chac checho, na' cheyała' güe'cho yela' choxcen che', na' bi cheyała' güedcho yol güižcho Diosen'. 3 Na' le nabe Xancho Diosen' gone' cont gac güe'lento' bene' xtiža' Criston' da' bina' yesejni'ide', le neche dan' ba bia' xtiže'nan' dia' ližya nga. 4 Na' le nabe Diosen' gaclene' neda' gwzejni'ida' bene' diža' güen che Criston' binlo cont yesejni'iden'.

5 Cheyała' soacho goncho güen len bene' bina' yesejnilaže' Criston' na'a šlac de latje. 6 Na' cheyała' güe'cho diža' šagüe' diža' da' zejen len yogo'lol bene', na' cheyała' goncho xbab nac yoži'icho xtiža' yogüe'.

Pablo chguape' bene' migw che' ca' tiox

7 Bene' lježcho Tíquico ye'e le'e yogo'lol can' chac chia'. Chaquechone', le zoacze' chaclene' neda' can' cheyała' gone' na' chone' xšin Xancho Criston' txen len neda'. 8 Ba gwsela'ne' gan' zoalen' cont nezele can' chac cheto' na' cont gone' chach laže'le. 9 Na' txen len le' zeza' bene' lježcho Onésimo ben' nac bene' gualaž chele. Zoacze' chejnilaže' Criston' can' cheyała' gone' na' chaquechone'. Legaue' yese'e le'e yogo' da' ba chac nga.

10 Aristarco die' ližya nga txen len neda', na' le' chguape' le'e tiox. Na' lecze Marcos ben' nac biše' ljež Bernabé chguape' le'e tiox. Ba gwnia' can' cheyała' gonle güen len le' cate' le'e gan' zoalen'. 11 Nach Jesús ben' lecze le' Justo lecze chguape' le'e tiox. Šonze bene' Israel ca' chesaclene' neda' len da' chona' cont bene' zan yosozenague' che Diosen' na' nabi'e yichjlažda'ogaquen'. Ba gosonchgüe' chach laža' can' ba gosaclene' neda'. 12 Nach lecze bene' gualaž chele Epafra chguape' le'e tiox. Chone' xšin Criston' na' yogo' ni'a cate' chol güiže' Diosen' chnabchgüe' gwzejni'i Diosen' le'e yogo'lol da' chaclaže' gonle cont soachachle gonlen na' gacle cayanen' chazlaže' Diosen'. 13 Che'nda' nezele zoateze' chol güiže' Diosen' neche le'e chejnilaže'le Criston' le'e nita'le Colosas, Laodicea na' Hierápolis. 14 Nach Lucas ben' chon rmed, ben' chaquecho, chguape' le'e tiox na' lecze ca' Demas.

15 Le gwguapšca tiox bene' lježcho ca' že' Laodicea, len Ninfas na' bene' ca' chesedop chesežag chesonxene' Diosen' ližen'. 16 Na' cate' yeyož gwlabable cart nga, le gwnežjon bene' ca' chesedop chesežag chesonxene' Diosen' Laodicean' cont yosolaben'. Na' lecze le gwlab dan' gwsela' che bene' Laodicean'. 17 Na'

le ye' Arquipo chneyoeda'ne' gwza'lagüe' gone' dolol xšin Diosen' da' gwlo'o Xancho Criston' lo ne'e gone'.

¹⁸ Cuzca' neda' Pablo chzoja' late' dao' da' nga le'e carten'. Bi ganlaže'le can' dia' ližya nga. Diosen' soašque' gaclenšque' le'e. Da' na'zen' chzoja' ņa'a.

CART NECHW DAN' BZOJ POSTLW SAN PABLO CHE BENE' CA' ŽE' TESALÓNICA

Pablo bzoje' bene' Tesalónica ca' ben' chesonxene' Jesucriston'

¹ Neda' Pablo chzoja' le'e chdop chžagle chonxenle Xancho Jesucriston' Tesalónica na' nacle txen len le' na' len Xacho Diosen'. Na' neda' len Silvano na' Timoteo chñabto' lao Xacho Diosen' na' lao Xancho Jesucriston' yesaclene' le'e na' yesone' ca' soa cuzle binlo len xbab dan' yo'o lo' yichjlažda'olen'.

Bene' Tesalónica bosolo'ede' chesejle'e che Jesucriston'

²⁻³ Yogo' ni'a cate' chol güižto' Xacho Diosen' choe'to' yela' choxcen che' par yogo'le. Na' cate' chol güižto'ne' chjayza'laže'to' yogo'lol da' güen dan' chonle dan' chejnilaže'le Diosen' na' chaquelne'. Na' chjayza'laže'to' can' zoachachle chbezle yid Xancho Jesucriston' yeto. ⁴ Nezeto' bene' migw, Diosen' chacde' le'e na' ba gwleje' le'e cont nacle lo' ne'e. ⁵ Na' diža' güen da' bzejni'ito' le'e che Jesucriston' gague naquen con to' diža'ze. Spiritw che Diosen' goclenen neto' bzejni'ito' le'e len yela' guac chen na' nezeto' diža' dan' bzejni'ito' le'e naquen da' li. Na' nezele can' bento' da' güen šlac gwzoato' len le'e cont gocleno' le'e.

⁶ Na' le'e zoale chonle da' güen can' ba ben neto' na' can' ben Xancho Jesucriston'. Bzenagle dan' gwdixjue'eto' le'e che Jesucriston', na' Spiritw che Diosen' chonen cont chbele chzenaglen, la'czla' da' zan da' ba gwdi gwzaca'le dan' ba bzenagle chen'. ⁷ Na' da' zoale chonle da' güenna', bene' ca' chesejnilaže' Jesucriston' distritw Macedonia na' distritw Acaya ba zjanežde' naquen cheyala' yesone'. ⁸ Doxen ba bzenele bene' xtiža' Xancho Jesucriston', gague bene' že' Macedonia na' Acaya na'zen'. Na' ca'cze yogo'ze bene' ba zjanežde' can' chejnilaže'le Diosen', na' da'nan' bi chyažjen güe'to' diža' chele. ⁹ Na' bene' zan cheso'e diža' ca' güen benle len neto' caten' bedena'to' le'e na' cheso'e diža' can' benle gwlejyichjle cbich chejnilaže'le l' gua'a lsaca' chele ca', san na'a ba chejnilaže'le ben' nac dogualje Dios ben' zoa toli tocanē. ¹⁰ Na' cheso'e diža' can' chbezle yetj Xi'ine' Jesús'en' yaban' yide' yežlio nga yeto, ben' bosban Diosen' ladjo bene' guaten'. Na' dan' chejnilaže'cho Jesús'en' ba bosle' chio' cont bi saca'zi'cho cate' žin ža bene' bi chosozenague' che Diosen' yesale'chgüede' toli tocanē.

2

Pablon' gwzoe' Tesalónican'

¹ Bene' migw, le'e nezele dan' bedena'to' le'e goclenchguan le'e. ² Na' nezele can' gwdi gwzaca'to' cate' gwyejto' Filipos, na' can' gosezi'diža' bene' ca' neto' dan' gwdixjue'eto' che Jesucriston'. Perw Diosen' goclene' neto' cont bi bžebto' gwdixjue'eto' diža' güen che' len le'e la'czla' bene' zan bosožone' chixjue'eton'. ³ Dan' gota'yoeto' le'e gwzenagle che Diosen' bitw nacho bzejni'ito' le'e clele, neca goclaže'to' gonto' da' mal, na' neca bento' xbab gonleto' le'e. ⁴ San zoato' choe'to' diža' can' chazlaže' Diosen' ben' ba gwleje'nto' par chyixjue'eto' diža' güen che'na'. Na' chyixjue'eton' gague cont yebe bene', san cont yebe Diosen' ben' neze bin' yo'o lo' yichjlažda'ochon'. ⁵ Nezele can' bento', ne tni'aze biña' gwpeto' le'e len xtiža'ton', na' neca benleto' le'e cont gonle cheto' bi da' de chele. Cuin Diosen' nezde' can' naquen. ⁶ Na' neca cheyiljwlaže'to' nacle gonto' cont yesonxen bene' neto'. Neca nacho chaclaže'to' gonxenle neto', na' neca chaclaže'to' yezica'chle bene' yesone' ca'.

Zaca'to' gonto' ga gwzenagle cheto' la fuers da' gwsela' Criston' neto' choe'to' xtiže'na', perw bitw chonto' ca'. ⁷ Nži'ito' le'e cacze no'ole šagüe' nži'ide' xi'ine' bi' chosgol choscha'ogüe'. ⁸ Na' dan' chaqueto' le'e, be'lento' le'e diža' güen che Diosen'. Na' gague da' na'zen' bento', lecze bzanlaže' cuinto' bento' ga zelao gwzaque'to' cont goclento' le'e, le chaqueto' le'e. ⁹ Za'laže'czle bene' migw, cate' gwzoato' len le'e benchguato' žin con ga zelao gwzoeto'. Bento' žin do ža do yel cont cbi bi gastw bzoato' le'e. Can' bento' gwdixjue'eto' le'e diža' güen che Diosen'.

¹⁰ Txenczen' nezele len Diosen' gwzoato' do laže'to' cate' gwzoato' len le'e chejnilaže'le Jesucriston'. Benczto' con can' chazlaže' Diosen' cont ne to cono gwna naptó' dola'. ¹¹ Nezele can' gota'yoeto' le'e gonle da' güen na' can' bento' chach laže' to tole gonlen. Bento' can' chon to bene' byo len xi'ine'. ¹² Bento' mandadw gonle da' güen ca cheyala' gon chio' naccho lo na' Diosen', le ba gwleje' chio' par nabia'cho txen len le' na' par gone' gac da' mba juisyw checho cate' šjayzoacho len le'.

¹³ Bate'teze choe'to' yela' choxcen che Diosen' dan' bzenagle xtiže'na' caten' gwdixjue'eton' le'e. Zache'ele bi naquen xtiža' benach, san naquen xtiža' Dios dan' choe'to'. Na' xtiža' Diosen' dan' chejle'le chša'an xbab dan' yo'o lo' yichjlažda'olen'. ¹⁴ Na' bene' migw, ba goc chele can' goc che bene' chesedop chesežag chesonxene' Jesucriston' zan part Judean'. Bene' Israel gualaž chegaque' bosochi bososaque' legaque', na' lecze can' bosochi bososaca' bene' gualaž chelen' le'e. ¹⁵ Na' bene' Israel ca' gosote' Xancho Jesucriston' con can' gosote' da' bene' gosoe'lene' legaque' xtiža' Diosen' cani'. Na' lecze can' gosone' bosolagšibe' neto'. Na' ža na'aža ne' nite' chesone' da' bi chazlaže' Diosen' na' chesegue'ede' yogo'lol benachen', ¹⁶ le chosožone' gwzejni'ito' yezica'chle bene' bi da' cheyala' goncho cont gata' yela' mban checho toli tocanē. Can' chesone' do tiemp chosozanch xtola'gaquen' na' Diosen' ba chža'achgüe' legaque'.

Pablo goclaže' šjayne'e bene' nita' Tesalónica

¹⁷⁻¹⁸ Na' neto' bene' migw, cate' zoato' ga bi chle'e lježcho, chjayze'eto' le'e. Da'nana' cate' ba goc sša bina' le'e lježcho ba chacžejlaže'to' chele na' goclaže'to' yedena'to' le'e. Na' to chop ni'a godca' yida', perw Satanás dan' chnabia' da' xigüe' ca' bi benen latje. ¹⁹⁻²⁰ Chebeto' chonchguale güen na' da'nana' zoato' lez soachguato' mbalaz cate' yid Xancho Jesucriston' da' yoble, le yebede' bzjeni'ito' le'e cont chzenagle che'. Da' li le'e chonle cont chbeto' na' cont zoato' mbalaz.

3

¹⁻² Na' bich gwzoeto' dan' bi chle'e lježchon'. Da'nana' bechoglaže'to' gwsela'to' bene' lježcho Timoteon' gan' zoalen' na' neto' bega'anto' Atenas. Timoteon' chone' xšin Diosen' na' chone' txen len neto' chyixjue'eto' diža' güen da' chzejni'in bene' che Criston'. Gwsela'to'ne' bedeyata'yoede' le'e bi soayaše'le na' bedeyene' chach laže'le cont zoachachle chejnilaže'chle Criston'. ³ Gwsela'to'ne' gan' zoalen' cont ne tole bi gacžejlaže'le bixchen' chyi chzaca'le. Ba nezele chio' chejnilaže'cho Criston' cheyala' saca'zi'cho lo yežlio nga. ⁴ Caten' gwzoalento' le'e bzeneto' le'e leca yosoči yososaca' bene' chio'. Na' nezele ba chac can' gwnato'na'. ⁵ Na' dan' bi gocxenlaža' dan' bina' la' rson chelen', nachen' gwsela' Timoteon' gan' zoalen' cont nezda' še do laže'le chejnilaže'le Criston'. Le bena' xbab godca' še ba gwzoe gwxiyen' benlen le'e. Le še ba benlen le'e, con bendadzeto' xšin Diosen' len le'e še ca'.

⁶ Perw na' bela' Timoteon' dan' bide' gan' zoalen' na' be'lene' neto' diža' güen, gwne' zoale chejnilaže'le Criston' na' chaquele yogo'loł bene'. Na' lecze gwne' chjayze'ele neto' na' zelaže'le yežagcho da' yoble lecze can' chaclaže' neto'. ⁷ Ca'czen' bene' migw, chžaglaoto' na' chyi chzaca'to', perw ba beyacxenlaže'to' gwnezeto' can' zoateze zoale chejnilaže'le Criston'. ⁸ Da' li ba beyacxenlaže'to' na' zoato' mbalaz dan' zoachachle chejnilaže'le Xancho Criston'. ⁹ Na' da'nan' leca chbeto' lao Diosen' can' chonle na' leca choe'chguato' yela' choxclen che' can' chonlen'. ¹⁰ Leca chol güižto'ne' do ža do yel chnabeto'ne' gone' ga yele'e lježcho da' yoble cont gwzejni'ichto' le'e na' šejchle šejnilaže'chlene'.

¹¹ Chnabeto' Xacho Diosen' len Xancho Jesucriston' yesone' latje yedena'to' le'e. ¹² Na' chnabeto' Xanchon' gone' cont gaquech lježle tole yetole na' gone' ga gaquechle yogo' benachen' con catezen' chaqueto' le'e. ¹³ Chnabeczeto'ne' gone' cont soachachle šejnilaže'lene' na' gac lažda'olen' xilaže' lao Xancho Diosen' sin cbibi doła' gaple cate' yid Xancho Jesúsena' da' yoble nche'e yogo'loł bene' ba gwlej Diosa' cont zjanaque' lo ne'e.

4

Pablon' bzejni'ide' can' che'ne Diosen' yesezoa yesebeze'

¹ Na'a bene' migw, bach bsd blo'eto' le'e gonle can' chazlaže' Diosen', na' bach zoale chonle ca'. Na' can' ža Xancho Jesucriston' chata'yoeto' le'e na' chonto' mandadw šejchle gonchle dan' chazlaže' Diosen'.

² Ba nezczele bica' da' ca' bento' mandadw gonle na' zjanaquen con ca' ža Xancho Jesúsena'. ³ Diosen' chaclaže' soatez soacho gaccho bene' laždao' xilaže'. Bi chazlaže' gata'lencho no'ol bi nac no'ol checho o bene' byo bi nac bene' checho. ⁴ Chaclaže' neze to tole naquen' cheyala' soalen xo'ollen' sin cbi gaple doła' na' gonelene' ca' bene' zaca'. ⁵ Bitw gonle can' cheson bene' bi zjanombi'e Diosen', con chesezoalene' no'olen' contze yesone' can' chzelaže' lažda'ogaquen'. ⁶ Ne tole bitw gonle da' bi cheyala' gonle na' siye' bene' lježle na' soalenle no'ol che'. Ba be'czto' diža' bosnseto' le'e can' gon Xancho Diosen' cont yezezaca'zi'chgua bene' cheson bite'tez da' xinjen' zjanac ca'. ⁷ Diosen' gwleje' chio' cont gaccho bene' laždao' xilaže', gague cont goncho bi da' xinj da' zjanac ca'. ⁸ Da'nan' note'tez le'e še bi chzenagle che da' qui ba bzejni'ito' le'e, gague xtiža' benachen' chzoale ca'ale, san Diosa' chzoale ca'ale. Len' bene' chio' Spiritw chen' na' Spiriton' naquen laždao' xilaže'.

⁹ Bitw chyažjen gwzoja' le'e can' cheyala' gague ljež chio' chejnilaže'cho Jesucriston'. Dios nan' ba bsdde' le'e cont chaque lježle tole yetole. ¹⁰ Na' da' li ba chaquele yogo' bene' lježcho ca' nita' doxen Macedonian'. Na' chata'yoeto' le'e bene' migw, le gaquech legaque'. ¹¹ To tole le yeyiljwlaže' bi žin gonle cont soa cuezle binlo can' nonto' mandadw na' bitw tale gwgüia na'le bi cheson bene' yoble. ¹² Le gon can' ba gwnia' cont bene' bi zjanaque' txen len chio' yesacbe'ede' chonle güen, na' lecze cont bibi gac falt še bi dan' chyažj chchinele.

Can' gac cate' yid Criston' da' yoble

¹³ Bene' migw, chaclaže'to' nezele can' yesac che bene' gosejnilaže' Jesucriston' na' ba gosate'. Chaclaže'to' nezelen cont bi yegüine'le ca' cheson bene' bi nita' lez šjasyezoe' len Jesucriston'. ¹⁴ Nezecho gosot bene' Jesúsena' na' bebane' ladjo bene' guat ca'. Lecze nezecho Diosen' gone' cont yid Jesúsena' da' yoble nche'e bene' ca' ba gosat con bene' gosejnilaže' le'.

¹⁵ Na' diža' nga chzeneto' le'e naquen dan' non Xancho Jesúsén' mandadw gwzeneto'. Chio' mbancho na'a chejnilaže'chone', še ne' mbancho cate' yide' da' yoble, bitw nacho yobch yežagchone' clél ca bene' ca' ba gosat. ¹⁶ Na' ca nac Xancho Jesúsén', cuine' yetje' le'e yaban', na' ne' zižje gone' mandadw yesyeban bene' guaten', na' to angl blaona' ne', na' yenecho cuež trompeta che Diosen'. Nach bene' ca' ba gosat bene' gosejnilaže' Criston', legaque' zgua'tec yesyebane' ladjo bene' guaten'. ¹⁷ Na' ca yeyoža', chio' chejnilaže'chone' še ne' mbancho yežlio nga, gon Diosen' cont yeyepcho txen len legaque' le'e yaban' to lo' bejw na' yežagcho Xancho Jesúsén' le'e yaban'. Nach šjayzoacho len le' toli tocañe. ¹⁸ Da'nán' le gon chach laže' lježle tole yetole güe'le diža' can' gaca'.

5

¹⁻² Bene' migw, bitw chyažjen gwzoja' cont gwzenda' le'e bi ža bi hor yid Xancho Jesúsén' yeto. Nezele con yalzelaže'le žin ža žin hor can' chžin bene' gwban bene' chda šeže'le. ³ Na' šlac chesena bene': "Mba zoacho, bibi chac checho", cate' concze žin ža yesebiaye'e. Can' chac che no'ole cate' yalzelaže' chaque' bes che yela' san, ca'czen' zjayalzelaže' yesebiayi' bene' ca' bi chesejnilaže'ne'. Bitw gac yosoxonje'. ⁴ Perw chio' bene' migw, bi nchole yichjlažda'ochon', da'nán' bitw gac checho can' chac che bene' chzenyal gwban'na' le'. ⁵ Diosen' ba bzejni'ide' chio' nombia'chone' na' be'ni' chen' ba chsenin' len chio'; da'nán' bitw nchole yichjlažda'ochon'. ⁶ Cheyala' gonyane'cho xbab naquen' chaclaže' Diosen' goncho na' nabia' cuincho goncho can' chazlaže'na'. ⁷ Bene' ca' cbi chosozenag che Diosen' zjazaca'lebe' ca bene' zjantas na' ca bene' chesezože. ⁸ Perw ba bzejni'i Diosen' chio' cont bi goncho can' chesone'na'. Da'nán' cheyala' nabia' cuincho goncho can' chazlažen'. Cheyala' šejnilaže'cho Diosen' na' gague lježcho na' yebecho dan' nezecho šjayzoacho len Diosen'. Še goncho yogo' da' ca' gaccho ca soldadw ben' nyaze' to de ya da' chcue'ejen le' cont bibi chac che' cate' chdile' len bene'. ⁹ Gague gwlej Diosen' chio' cont saca'zi'cho che xto'la'chon'. Gwleje' chio' cont šejnilaže'cho Xancho Jesucriston' na' šjayzoacho len le'. ¹⁰ Na' Jesucriston' bnežjw cuine' neche chio' cate' gosot bene' le' cont šjayzoacho len le' la'czla' še mbancho o še ba gotcho cate' yide' da' yoble. ¹¹ Da'nán' le gonch can' ba chonle, le gon chach laže' lježle tole yetole na' le gaclench lježle cont soachachle šejnilaže'le Jesucriston'.

Pablon' bzejni'ide' bene' chesejnilaže' Jesucriston' can' cheyala' yesone'

¹² Chata'yoeto' le'e bene' migw, gapple bala'an' bene' ca' cheson xšin Xancho Jesucriston' chosogüia chesene'e le'e na' chosozejni'ide' le'e naquen' cheyala' soa cuezle. ¹³ Gapchgualne' bala'an' na' gaguechgüele legaque' dan' chesone' xšin Diosen' do laže'. Na' le soa binlo len lježle tole yetole.

¹⁴ Ca'cze bene' migw, le tile bene' bi chesaclaže' yeson žin, le gon chach laže' bene' chesacde' zdebe chosozenague' che Jesucriston', na' le gaclen bene' bi'na' yesejni'ide' naquen' cheyala' yesone'. Le soa le gap yela' chxenlaže' len yogo'lol' bene'.

¹⁵ Še bi da' mal cheson bene' len le'e, le gon byen bi yoži'ile da' mal len legaque'. Le yeyiljwlaže' naclen' gonle güen len lježle tole yetole na' len note'tez bene'.

¹⁶ Do tiemp le yebe. ¹⁷ Le soateze le soa le yol' güiž Diosen'. ¹⁸ Le güe' yela' choxcen che Diosen' bite'tez da' chac chele, le da'nán' chaclaže' gon chio' chejnilaže'cho Cristo Jesúsén'.

¹⁹ Bitw gwžonle gon Spiritw che Diosen' can' chaclažen' gonen len le'e o len bene' yoble. ²⁰ Bi gwzoale ca'ale dan' chesena bene' cheso'e diža' dan' ba gož

Diosen' legaque'. ²¹ Na' le gonyane' xbab che yogo'lo' diža' da' cheso'e cont soale gwzenagle che da' nac güen. ²² Na' bitw gonle bite'tez da' nac da' mal.

²³ Diosen' chone' ca chzoa chbezcho binlo len xbab dan' yo'o lo' yichjlažda'ochon'. Na' chnabda'ne' gone' cont lažda'olen' gacyanen' xilaže'. Na' lecze gonšque' cont bibi da' mal gonle len yichjlažda'olen' neca len cuerp chelen' cont bibi doła' gaple caten' yid Xancho Jesucriston' yeto. ²⁴ Diosen' ben' ba gwleje' chio' cont naccho xi'ine' chone' con da' že' gone', na' da'nan' gone' cont gac lažda'ochon' xilaže'.

Pablon' gwnabe' gaclen Diosen' bene' Tesalónican'

²⁵ Bene' migw, le soa le nab gaclen Diosen' neto'.

²⁶ Na' cate' chežagle le gwnopa' na' lježle cont nacbia' chaque lježle.

²⁷ Chona' mandadw gwlabl cart nga ga yesene yogo'lo' bene' lježcho ca nita' gan' zoalna', le can' chaclaže' Xancho Jesucriston' gonle.

²⁸ Na' soateze Xancho Jesucriston' gaclenšque' le'e. Da' na'ze chzoja' na'a.

CART GWCHOPE DAN' BZOJ POSTLW SAN PABLO CHE BENE' CA' ŽE' TESALÓNICA

Pablon' bzoje' bene' Tesalónican' bene' chesonxen Jesucriston'

¹⁻² Neda' Pablo chzoja' le'e chdop chžagle chonxenle Xancho Jesucriston' Tesalónica na' nacle txen len le' na' len Xacho Diosen'. Na' neda' len Silvano na' Timoteo chñabto' lao Xacho Diosen' na' lao Xancho Jesucriston' yesaclene' le'e na' yesone' cont soa cuezle binlo len xbab dan' yo'o lo' yichjlažda'olen'.

Cate' yid Criston' da' yoble Diosen' gwnežjue' da' yesezaca'zi' bene' bi chosozenag che'

³ Bene' migw, neto' cheyala' soateze soato' güe'to' yela' choxclen che Diosen' che dan' chonlen'. Cheyala' gonto' ca' da' zejle chejnilaže'chle Diosen' na' zej chaquech lježle. ⁴⁻⁵ Da'n'an' chbeto' choe'to' xtiža'len' len yezica'chle bene' ba gwlej Diosen' na' chesežague' chesonxene' Jesucriston' ga yoble. Choe'to' diža' ca güen chonle dan' chy chchejele chejnilaže'le Jesucriston' la'czla' da' zan da' chac chele na' chosoči chososaca' bene' le'e. Da'n'an' nezecho Diosen' zejcze' to licha da' nchogbi'e zaca'le par yeyejle yaban' gan' zoe' chnabi'e.

⁶ Na' Diosen' zeje' to licha da' gone' cont yesezaca'zi' bene' ca' chosoči chososague' le'e. ⁷ Na' lecze zeje' to licha da' gwcueze' yogo'te dan' chyi chzaca'chon'. Gwcuezen' cate' le'echo yetj Xancho Jesús'en' le'e yaban' len angl che' ca' bene' zjanse'e yela' guac che'. Yetje' nychjde' yi' bel. ⁸ Na' gwnežjue' da' yesezaca'zi' bene' ca' bi zjanombi'e Diosen', na' neca chosozenague' che diža' güen dan' chzejni'in che Xancho Jesucriston'. ⁹ Legaque' yesezaca'zi'e toli tocañe. Gwbat šjasyenite' len Xancho Jesucriston' ben' nac bene' zaca' juisyw na' nape' yela' guac xen. ¹⁰ Cate' žin žan' yid Jesucriston' da' yoble, chio' chejnilaže'chone' na' naccho lo' ne'e gwlo'echo naque' bene' zaca' juisyw na' yebanecho catec bene' güen naque'. Nacto' txen len le'e da' ba chejle'le che diža' dan' be'lento' le'e.

¹¹ Da'n'an' zoatez zoato' chñabeto' Diosa' gaclene' le'e gonle güen cont yebede' ba gwleje' le'e par nacle xi'ine'. Na' chñabeto'ne' gaclene' le'e len yela' guac chen' cont yeyož gonle yogo' da' güen da' ba gwchoglaole gonle na' len bica'chle dan' che'nele gonle dan' chejnilaže'lene'. ¹² Chñabto' gonle cont Xancho Jesucriston' gacxene', na' le' gone' ga gacxenle txen len le', le Dios chechon' na' Xancho Jesucriston' nita'cze' chesaclene' le'e.

2

Choj ben' gonchgua güedenag len Diosen'

¹ Bene' migw, da' yoble chnia' le'e ca gac cate' yid Xancho Jesucriston' yeto, yotobe' chio' šjayzoacho txen len le'. ² Chñeyoeto' le'e bitw gacžejlaže'le o žeble še no yid yedezejni'ide' le'e, ne' Spiritw che Diosen' žan ba bžin ža yid Jesucriston' da' yoble. Na' neca gacžejlaže'le še bi da' yenele o še la' no cart güenlaže' da' chesena bene' gwsela' neto', žan ba bžin ža yid Jesucriston'. ³ Bi güe'le latje no siye' le'e še bi yesene' o še bi da' yesone'. Le cate' za' yid Xancho Jesús'en' da' yoble, bene' zan yesase' yesyedabague' Diosen'. Lecze cana' choj to bene' blao bene' gonchgüe' güedenag len Diosen'. Benan' ba naquen yeyeje' lo' yi' gabilen'. ⁴ Gaque' bene' ya'laže' na' gue'ede' Diosen' na' lecz ca' gue'ede' bite'tezech da' chesejnilaže' bene'. Na' cui'e lo' yodao' blao gan' chesonxene' Diosen', gon cuine' ca Dios cont yesonxen bene' le'.

⁵ ¿Bi za'laže'le cate' gwzóa' len le'e bzejni'ida' le'e can' gac cate' yid Jesucriston' da' yoble? ⁶ Na' na'a nezeczle bi dan' chžon choj bene' blaon ben' gonchgua güedenag len Diosen', perw cate' ba bžin ža bžin hor, cana' choje'. ⁷ Ba nita' bene' chesonchgüe' güedenag len Diosen' na'a, perw ne' ngaše' can' chesone'. Na' gwžin ža cate' bich soa dan' gwžon yesyedabaga'chgüe' Diosen'. ⁸ Cana'chen' choj bene' blaon' ben' gonchgua güedenag len Diosen'. Nach Xancho Jesúsén' yide' nyechjchgüede' be'ni', na' cate' bene' blaon' le'ede' le' nach Xancho'n' güe'e diža' na' ši'en goten le'. Can' gone' yonitlagüe'ne'. ⁹ Na' cate' choj bene' blaon' ben' gonchgua güedenag len Diosen', Satanás dan' chnabia' da' xigüe' ca' gonen cont gapchgüe' yela' guac, na' gone' da' yesyebane bene' contze gonlede' legaue'. ¹⁰ Yogo'te da' mal gone' gonlede' bene' ba naquen yesebiaye'e toli tocané. Yesebiaye'e da' bi chesejle'e diža' lin', le lenna' zaca' yesejle'e cont gata' yela' mban chegaue' toli tocané. ¹¹ Na' da'nán' Diosen' güe'e latje yeseziye'e legaue' cont yosozenague' diža' güenlaže'. ¹² Nach yezaca'zi'e toli tocané da' bitw gosejle'e diža' li che Xancho'n' san besyebede' da' malen'.

Diosen' chbeje' bene' na' chone' cont gac šjasyenite' len le' toli tocané

¹³ Bene' migw, chaque Xancho Jesucriston' le'e. Na' neto' cheyala' soatez soato' güe'to' yela' choxcen che Diosen' da' gwleje' le'e cate' bina' xe yežlion' cont šjayzoale len le'. Na' cate' gwzolao chejle'le diža' li che Diosen' nach gwsele' Spiritw chen' chonen cont nacle bene' laždao' xilaže'. ¹⁴ Neche da'nán' gwlej Diosen' le'e, na' dan' gwyejle'le diža' güen che Jesucriston' da' be'lento' le'e, žin ža gon Diosen' cont soale mba juisyw can' zoa Xancho Jesucriston'.

¹⁵ Da'nán' bene' migw, le soa chačh le gwzenag do yichj do laže'le che dan' bzejni'ito' le'e, diža' dan' ba be'lento' le'e na' dan' ba bzojto'. ¹⁶⁻¹⁷ Xacho Diosen' chacde' chio'. Gague da' te che dan' bene' cont beyone'xenlaže'cho, na' zoacho lez gonche' güen len chio', le nži'ilaže'de' chio'. Na' chnabda' cuin Xancho Jesucriston' len Xacho Diosen' yesone' chačh laže'le na' yesaclenšque' le'e cont yogo' da' gonle na' diža' da' güe'le yesaquen güen.

3

Gwnab Pablon' yosol güiže' Diosen' gaclene' le' len bene' lježe' ca'

¹ Na'a bene' migw, yol güižscale Diosen' gaclene' neto' cont yob šjadixjue'eto' che Xancho Jesucriston' doxen, na' cont bene' yezica'chle yesebede' yosozenague' can' ba ben le'e. ² Lecze nabšquele Diosen' yosle' neto' lo na' bene' mal bene' cheson clele, le gague yogo' bene' chesejnilaže' Jesucriston'. ³ Xancho Jesucriston' zoatez zoe' chone' can' že' gone', na' gaclene' le'e cont soačachle šejnilaže'lene'. Na' lecze gwcuas gwcue'eje' le'e len da' malen'. ⁴ Na' nezeto' chaclencze' le'e cont chonle da' ba bento' mandadw gonle na' cont nita'czle gonlen. ⁵ Chnabda' Xancho Jesucriston' gone' cont nezele catec chaque Diosen' chio'. Na' lecze chnabda'ne' gone' cont gwyo gwchejle len da' chyi chzaca'le can' gwzóa' Criston' byo bcheje' len da' gwdi gwxaque'.

Pablon' bene' mandadw yesone' žin

⁶ Bene' migw, chzeneto' le'e can' chon Xancho Jesucriston' mandadw, bi cheyala' gonle txen len note'tez bene' lježchon' bene' bi chesaclaže' yesone' žin, le bi chesone' ca' nac da' bsd blo'eto' legaue'. ⁷ Neto' benczto' žin cate' gwzoato' len le'e, na' da'nán' nezele can' cheyala' gonle. ⁸ Cuent cheto' güe'ej gwdagwto'. Bžaglaoto' bento' žin do ža do yel cont güe'ej gwdagwto', na' bi gwñabeto' le'e da' byažje bchineto'. ⁹ Zaca'czto' ša gwñabeto' le'e da' ye'ej gawto' cate' bento' xšin Diosen' gan' zoalen', perw bi goclaže'to' gonto' ca',

le goclaže'to' gwlo'eto' le'e ca cheyała' gonle. ¹⁰ Caten' gwzoato' len le'e bžiato' bia' gwnato': "Še no bi gon žin, bi cheyała' gagüe'." ¹¹ Perw na' ba beneto' diža' chesene' balle bitw bi žin chonle, con chdale chacle diža'. ¹² Na' še nole chonle ca', chata'yoeda' le'e na' chona' mandadw gonle can' ža Xancho Jesucriston', bich tale ca', san le yezolaošaze le yeyon žin cont gac si'le da' ye'ej gagwle.

¹³ Na' le'e bene' migw, bitw yeche'ele gonle da' güen. ¹⁴ Na' še no bene' chon güedenag len dan' ba bzojto' nga, le gon xbab non' chon ca' na' bich gonle txen len le' cont gacde' zto' che dan' chone'na'. ¹⁵ Perw bitw gue'elne', san gwzejni'ilne' diža' šagüe', le naque' bene' lježcho.

Pablon' gwnabde' Diosen' gaclene' bene' Tesalónica

¹⁶ Na' chnabda' Xancho Jesucriston' ben' chone' cont soa cuezcho binlo len xbab da' yo'o lo' yichjlažda'ochon', gonščacze' cont soa cuezle ca' yogo'te ža bite'teze da' chac. Len' soaščacze' len yogo'le.

¹⁷ Na' cuincza' neda' Pablo chzoja' late' dao' le'e cart nga chguapa' le'e tiox. Can' choncza' len yogo' cart dan' chsel'a' cont nachbia' nedan' chselan', le ba nombia'le letr chian' can' chzojan'. ¹⁸ Xancho Jesucriston' gaclenšque' yogo'le. Da' na'zen' chzoja' na'a.

CART NECHW DAN' BZOJ POSTLW SAN PABLO CHE TIMOTEO

Pablo chzoje' cart che Timoteo

¹ Neda' Pablo chzoja' cart nga chio' le' Timoteo. Naca' postlw che Jesucriston', le Diosen' len Xancho Jesucriston' gosone' mandadw chona' xšinen'. Dios nan' none' chio' yela' mban toli tocanē na' Xancho Jesucriston' chone' cont zoacho lez šjayzoacho len le' toli tocanē. ² Chzoja' le' Timoteo, le naco' ca dogualje xi'ina' da' bzejni'ida' le' cont chejnilažo' Criston'. Na' chnablaža' nita' Xacho Diosen' len Xancho Jesucriston' yesyeyaše' yesyeži'ilaže'de' le' na' yesaclene' le', na' yesone' cont soa cuezo' binlo len xbab da' yo'o lo' yichjlažda'oguoñ'.

Nita' bene' chosozejni'ide' diža' güenlaže'

³⁻⁴ Caten' gwza'a Efeson' gwya'a Macedonian' gwneyoeda' le' cont bega'ano' Efeson' neche nita' bal' bene' chosozejni'ide' bene' Efeso ca' diža' güenlaže'. Con bi cheyož yedo chesonchgüe' xbab che diaža che da' xozxta'ocho ca' na' cheso'e zan cuent che legaque'. Na' da' yoble chneyoeda' le' gono' mandadw bich yosozejni'ide' che da' ca'. Dan' chosozejni'ide' chonen ga yesacžejlaže' bene', na' bi chaclenen yesone' dan' gwlo'o Diosen' lo' na'cho gon chio' ba chejle'cho xtižen'.

⁵ Na' gono' mandadw yesone' güen, le chaclaža' yesenite' yesaque lježe'. Na' cont bibi gwžon yesaque lježe', cheyała' yesaque' bene' laždao' xilaže', cheyała' yesone' dan' nezecho naquen güen yogo' ni'a, na' cheyała' yesejli'e diža' li che Diosen' do yichj do laže'. ⁶ Bene' ca' chosozejni'ide' diža' güenlaže' bi chesone' ca', na' da'nān' cheso'e diža' da' bibi zaca'. ⁷ La'czla' chesaclaže' yosozejni'ide' ley dan' bzoj Moisésen', bi chesejni'ide' dižan' cheso'e na' neca chesejni'ide' da' ca' chesene' cheyała' goncho.

⁸ Nezecho ley nan' naquen güen con še gwchinchon can' cheyała' gwchinchon. ⁹ Na' lecze nezecho ley nan' gague chosbagan' bene' cheson da' güen, san chosbagan' bene' cheson da' mal na' bene' cheson güedenag len dan' nonen mandadw goncho. Chosbagan' bene' bi chosozenag che Diosen', na' bene' chesonteze' da' malen', na' bene' bi chesape' Diosen' bala'an' neca chesonxene'ne', na' bene' chesot no xaxña'gaque', na' len nochle bene' güet bene'. ¹⁰ Lecze chosbagan' bene' chesata'lene' no'ole bi nac xo'olgaque' o bene' byo bi nac bene' chegaque', na' no bene' byo bene' chesata'lenteze' ljež bene' byoe' gualaz no'ole, na' bene' cheseche'xoxje' bene' yoble cont chesote' legaque' chesezi'e mechw, na' bene' ca' chesonlaže', na' bene' ca' cheso'e diža' güenlaže' lao justis, na' note'teze bene' cheson da' zej clele len diža' güen da' ba bzejni'i Diosen' chio'. ¹¹ Na' diža' güen da' ba bzejni'i Diosen' chio' zaca'chguan, na' Dios ben' zoa mba juisyw, le'na' ba gwlo'en lo' na' chyixjue'edan' bene'.

Pablon' cho'e yela' choxclen che Diosen' na' che Jesucriston'

¹² Choa' yela' choxclen che Xancho Jesucriston' ben' chon cont chac chyixjue'eda' xtiže'na'. Choxclenen' chacde' gona' xšinen' can' chazlaže' na' da'nān' gwleje'nda' gonan'. ¹³ Gwleje' neda' la'czla' cana' bia' diža' bya' che' na' bgue'eda'ne' na' bchi bsaca' bene' ca' chesonxene' le'. Na' la'czla' bena' ca', Diosen' beyaše' beži'ilaže'de' neda', le biña' šejnilaža'ne' ca' hora' na' biña' gacbe'eda' chona' clele. ¹⁴ Nach Xancho Jesucriston' nži'ilaže'chgüede' neda'

na' goclene'nda' cont gwyejnilaža'ne', na' na'a chacda'ne' na' lecze chacda' yezica'chle bene'.

¹⁵ Da' nga naquen to diža' li da' zaca' šejle'cho: Jesucriston' bide' yežlio nga cont beque'e xtoła' chio' bene' güen da' xinj. Na' chacda' neda' naca' bene' la'zelagüe gwyanch xtoła'. ¹⁶ Na' la'czła' naca' bene' la'zelagüe gwyanch xtoła', Jesucriston' beyaše'de' neda' na' bezi'xene' chia' cont blo'e napchgüe' yela' chxenlaže'. Bene' ca' cont bene' za' za'ac yesacbe'ede' nape' yela' chxenlaže' xen na' yesejnilaže'ne' na' gata' yela' mban čhegaque' toli tocañe. ¹⁷ Cheyala' gonxencho Diosen' ben' nac Rey čhechon' toli tocañe. Gague da' te čhen'. Zoacze' la'czła' bi chle'echone' na' naque' la'zelagüe bene' sina'. Totc le' zaque' gonxencho na' gapchone' bala'añ toli tocañe. Na' can' gonšcaczcho.

¹⁸ Xi'ina' Timoteo, ben xbab čhe dižan' gosoe' bene' ca' bosozende' le' can' gwna Diosen' chio' cana'. Na' can' ba gose'e le' gono' xšin Diosen', lecze can' chneyoeda' le' gonon' do yichj do lažo', la'czła' še gacdo' zdebe gonon'. Soačhačo' šejnilažo' Diosen', na' soatezo' gono' cont nezdo' lo' laždaguo' bibi da' mal chono'. ¹⁹ Bał bene' chesonteze' da' malen' la'czła' zjanetzede' lo' lažda'ogüe' bi cheyala' yesonen', na' da'nan' ba gosebejyichje' bich chesejni-laže' Diosen'. ²⁰ Can' goc čhe Himeneo na' che Alejandro. Da'nan' ba gwnabda' Diosen' yesaque' lo' na' Satanás dan' chnabia' da' xigüe' ca', na' gonen con ca' chaclažen' len legaue' cont yesacbe'ede' bi cheyala' yeseneye'e čhe Diosen'.

2

Dan' cheyala' nabecho Diosen' gone'

¹ Na' dan' nac da' žialao xen gon chio' chonxencho Diosen': cheyala' nabecho Diosen' gone' bi dan' chyažje chio' lente dan' cheseyažje yogo'lol bene', na' nabechone' gaclene' yogo'lol bene', na' güe'cho yela' choxclen čhe Diosen' čhe bi da' güen da' chesac čhe yogüe'. ² Cheyala' nabecho Diosen' gaclene' bene' gwnabia' ca', no rey, no gobernador na' nochle bene' ca' chesenabia', cont soa cuzcho binlo na' bibi gwžon gonxencho Diosen', neca gata' da' gwžon goncho bichle da' cheyala' goncho. ³ Naquen güen nabecho Diosen' gaclene' yogüe' na' naquen da' chazlaže' Diosen', Dios ben' none' chio' yela' mban toli tocañe. ⁴ Le chaclaže' gwnežjue' yela' mban toli tocañe čhe yogo'lol bene' na' chaclaže' yesejni'ide' diža' li čhe'. ⁵ Toz Diosen' zoa bene' zaca' yesonxen yogo'lol bene', na' lecze toz ben' chozoe' chio' binlo len Diosen', le'na' Jesucriston' ben' golje beñač. ⁶ Jesucristw nan' bnežjw cuine' gote' neče da' mal da' goson yogo'lol beñač, na' cate' bžin ža Diosen' bžie' bia', cana' bene' cont goseneze beñačen' čhe'. ⁷ Na' Diosen' gwleje' neda' cont naca' postlw čhe' na' cont chyixjue'eda' xtiže'. Choa' diža' li, bi chonlaža', le naca' Criston' txen, gwleje'nda' cont chzejni'ida' bene' ca' bi zjanac bene' Israel diža' li čhe' cont yesejnilaže'ne'.

⁸ Na' dan' che'nda' gac gate'teze chesedop chesežague' chesonxene' Diosen', chaclaža' bene' ca' yosol güiže' Diosen' yesaque' bene' laždao' xilaže' cont yeselis na'gaquen' laogüen' sin cbi yeseže'e bene' o yosošašlene' bene'. ⁹ Na' ca' nac no'ol ca' chesonxen Jesucriston', bi cheyala' yesebec yichjgaque' še nite' xdanchgua, še yosoguale' bga o ret de oro o de perlas dan' naquen da' zaque', še nac yiša' yichjen' xdanchgua, na' še nac xagaque' da' chzaca' la'ay. ¹⁰ San cheyala' yesebec yichjgaque' yesone' da' güen ca' chaclaže' Diosen' yeson yogo' bene' chesejnilaže'ne'. ¹¹ Na' no'ol ca' lecze cheyala' nite' šize yosozenague' čhe bene' ca' chososed chosolo'ede' xtiža' Diosen', na' yesone' con da' yese'ene'. ¹² Neda' bi chona' latje cont no'ol ca' yosozejni'ide' bene' byo latje lagüe', na' neca chona' latje yesenabi'e bene' byo. Cheyala' yesenite' šize, ¹³ le cate' Diosen' bene' beñačen' zgua'tec bene' Adánna' na' gwdechle bene'

Evan'. ¹⁴ Na' cate' Satanás dan' chnabia' da' xigüe' ca' gwxoayaguen bene' nechw ca', gague gwxoayaguen Adánna', san gwxoayaguen Evan' cont bene' dan' gwna Diosen' bi gone', na' da'nan' beyaque' bene' güen da' xinj. ¹⁵ Perw na' la'czla' no'ol ca' chesežaglagüe' chesezan xi'ingaque', žin ža šjasyenite' len Diosen' še zjanite' chesejnilaže'ne' na' še zjanite' chesacde'ne' na' chesacde' yezica'chle bene', na' še zjanite' chesone' can' chazlaže' Diosen' len yela' sina' da' ba bnežjue' legaque'.

3

Can' yeson bene' ca' yosogüia yesene'e yezica'chle bene' chesonxene' Diosen'

¹ De to diža' da' zaca' šejle'cho da' žan: "Bene' chesaclaže' yosogüia yesene'e yezica'chle bene' chesonxene' Diosen', chesaclaže' yesone' to da' güen, še ca'."

² Na' bene' gwłane' gone' žin dan' nac ca' cheyala' soateze' gone' da' güen yogo' ža sin cbi gone' da' zaca' tilchone'. Cheyala' soa toz no'ol che', na' cheyala' gague' bene' yo'o xbab, na' gague' bene' chnabia' cuine' chone' da' güen, na' gague' bene' chon da' zej toli cont bene' yoble yesape' le' bala'an. Cheyala' yebede' gwlebe' bene' liže', na' cheyala' gague' bene' chac chzejni'ide' xtiža' Diosen' binlo. ³ Bene' chzože bi gac gwłane' žinna'. Bi cheyala' gague' bene' yolao chdile chšaše'. Cheyala' gague' bene' šagüe' bene' chon güen len yezica'chle bene', na' bi cheyala' gague' bene' chon znia, neca selaže'chgüe' gone' gan mechw. ⁴ Na' cheyala' gague' bene' neze can' gone' cont xi'ine' ca' na' nochle bene' nita' liže' yosozenague' che' na' yesape' le' bala'an. ⁵ Le še bi nezde' nac gone' cont xi'ine' ca' yosozenagbe' che' na' yesapbe' le' bala'an, bi gac gone' cont bene' chesedop chesežag chesonxene' Diosen' yosozenague' che'. ⁶ Bi cuejle bene' za' chzolao chejnilaže' Diosen' cont gwgüia ne'e bene' ca' chesonxene' Diosen', le bene' coben' xož gonxen cuine' na' tena' Diosen' güe'e le' castigw še gone' ca'. Can' goc che Satanásen' cani'te cate' benxen cuinen na' Diosen' bebejen' gan' zoe'na'. ⁷ Na' bene' cuejle cheyala' soe' gone' cont bene' ca' bi zjanac txen yesenezde' chone' güen, le še gone' da' malen' yesene' bene' che' na' Satanásen' co'oyelan' le' gonche' da' malen'.

Bene' ca' yeson žin bixjw

⁸ Na' lecze cate' cuejle bene' yeson žin bixjw da' chata' len bene' ca' chesonxene' Diosen', le cuej bene' cheson güen cont gapcho legaque' bala'an. Lecze cheyala' yesaque' bene' chesoe' diža' li da' šejle'cho, bene' bi zjayolagüe' chesezožde', na' bene' bi yesezelaže' yeseni'e che xšin Diosen' dan' yesone'na'. ⁹ Cheyala' yesaque' bene' chesejle'e cayanen' ba bzejni'i Diosen' chio' che Jesucriston' dan' nono gwneze cana', na' bene' cheson da' güen cont yesenezde' lo' yichjlažda'ogüe' chesone' can' chazlaže' Diosen'. ¹⁰ Na' cate' za' cuejle bene' ca' yeson žin bixjwna', le na'yañe' can' chesonen', na' še gata'bia' chesonen' binlo bibi chesechoe', nachen' cuejle legaque'. ¹¹ Na' no'ol ca' yeson xšin Diosen' lecze cheyala' yesone' cont gapchone' bala'an. Bi cuejle no'ole chnie' che bene' o no'ole yolagüe' sožde', san cuejle no'ol ca' yesenite' yesone' can' chazlaže' Diosen'. ¹² Na' cate' cuejle bene' byo yeson žin bixjw da' chata' ladjo bene' ca' chesonxene' Diosen', le cuej bene' zoa toze no'ol che', na' bene' chon cont bi' che' ca' na' nochle bene' nita' liže' chosozenague' che'. ¹³ Le še bene' ca' cheson žin bixjon' yesone' binlo dan' yo'o lo' na'gague' yesone', nach yesejnilaže'chgüe' Jesucriston' sin cbi yesežebe', na' yezica'chle bene' yesape' legaque' bala'an.

Da' chejni'icho che Diosen' dan' nono gwneze cana'

¹⁴ Chzoja' le' da' quinga da' cheyała' gonle la'czła' zoa' lez yob yida' gan' zon',
¹⁵ cont še šeda' ba nezdō' nac cheyała' yeson bene' ca' zjanac diaža che Diosen',
 le chio' chdop chžagcho chonxencho Jesucriston' naccho diaža che Diosen'
 ben' zoa toli tocaņe. Na' chio' chdop chžagcho chonxenchone' yo'o lo na'cho
 choncho cont chesombia' bene' diža' li che Diosen'. ¹⁶ Da' licze da' zaca'chgua
 dan' ba bzejni'i Diosen' chio'. Cana' nono gwņeze da' quinga dan' bzejni'ide'
 chio' che Jesucriston', žan:
 Diosen' bide' golje' benach,
 na' Spiritw che Diosen' blo'en naque' bene' güen juisyw.
 Na' bene' ca' zjanac angl che Diosen' bedeseņe'e le'.
 Na' bžin ža Diosen' bene' cont beyepe' yaba gan' yo'ochgua be'ni'.
 Na' bene' ca' cheso'e xtižen' ba goseyixjue'eden' len bene' že' nación zito',
 na' zan bene' že' lo yežlion' ba chesejle'e che'.

4

Žin ža bal bene' yesebejyichje' diža' li che Diosen'

¹ Na' Spiritw che Diosen' ba ben' diža' li cont šejni'icho žin ža cate' bal bene'
 yesebejyichje' diža' li che Diosen' dan' chejle'cho na' yesejle'e che bi da' yeson
 da' xigüe' ca' cont yesexoayaguen legaque'. ² Da' xigüe' ca' yesonen cont nita'
 bene' yosozejni'ide' diža' güenlaže' da' siyen' bene', na' bene' ca' yosozejni'ide'
 diža' güenlažen' bibi yesacde' lo' yichjlažda'ogüe' caten' yeseziye'e bene'.
³ Yosožone' yosožagna' bene' na' yosožone' ye'ej gagwcho bal yela' guagw,
 la'czła' Diosen' bene' cont zjade yela' guagw ca' cont chio' chonxencho Criston'
 na' nombia'cho diža' li chen' gagwchon na' güe'cho yela' choxcen che'. ⁴ Yogo'
 dan' ben Diosen' naquen güen na' bi naquen da' gue'echo, con še güe'cho yela'
 choxcen che' caten' gagwchon. ⁵ Na' nezecho guac gagwcho bite'teze yela'
 guagw, le ba gwna Diosen' naquen güen, na' güe'cho yela' choxcen che' cate'
 gagwchon.

Can' gon Timoteo xšin Diosen'

⁶ Ca nac bene' ljež chio' chonxencho Jesucriston', cheyała' gwzejni'ido'
 legaque' da' quinga ba gwnia' le' cont gacleno' legaque' can' chazlaže' Je-
 sucriston', le gwleje' le' cont gwzejni'ido' bene'. Lecz gonen chachlažo' še
 gwzejni'ido' bene' xtiža' Diosen' dan' chejle'cho, le naquen to diža' güen,
 na' ba bzenago' chen do yichj do lažo'. ⁷ Bi gwzenago' che diža' güenlaže'
 dan' chesaljaže' bene' bi chesonxene' Diosen'. Ben byen soaczo' gono' can'
 chazlaže' Diosen'. ⁸ Nezecho cate' chda ni'a na'cho chaclenen cuerp chechon'
 late'. Perw na' cate' choncho can' chazlaže' Diosen', chaclenchen chio' cont
 zoa chbezcho binlo na'a na' lecz ca' cate' šjayzoacho len le' toli tocaņe. ⁹ Can'
 ža to diža' dan' zaca' šejle'cho na' dan' zaca' gwzenagcho chen do yichj do
 laže'cho. ¹⁰ Na' cont choncho can' chazlaže' Diosen', da'nān' chonchguacho
 xšinen' na' chyo chchejlaže'cho cate' chzi'diža' bene' chio', le nezecho Diosen'
 zoe' toli tocaņe na' zoacho lez gone' güen len chio'. Le' chaclaže' gwnežjue'
 yela' mban toli tocaņe che yogo' benach, na' can' nacczen gone' len bene'
 chesejnilaže' Jesucriston'.

¹¹ Da'nān' bzejni'i bene' da' ca' ba gwnian' na' ben mandadw yosozenague'
 che yogo'czen. ¹² Bi go'o latje yosozaa bene' le' šla'ale lagüe da' naco' bene'
 xcuide'. Len xtižo' na' len da' chono' ben güen cont yogo' bene' chesejnilaže'
 Criston' yesape' le' bala'aņ. Len xtižo' na' len da' chono' blo'e legaque' ca
 cheyała' yesacde' Diosen' na' bene' lježgaque', ca cheyała' yesenita'chache'
 yesejnilaže'ne' na' ca cheyała' yesaque' bene' laždao' xilaže'. ¹³ Na' na'a
 šlac biņa' yida' da' yoble, gwlec yichjo' gwlabo' Xtiža' Diosen' dan' nyojen

len bene' ca' chesedop chesežag chesonxene' Jesucriston'. Na' gwneyoede' yosozenague' chen na' bzejni'ide' bi zejen. ¹⁴ Bi gatlažo' dan' gwlo'o Diosen' lo nao' gono' caten' gosexoa na' bene' blao ca' yichjon', bene' ca' chosogüia chesene'e ljež chio' chonxencho Diosen', bosozende' le' gwlej Diosen' gono' xšinen'.

¹⁵ Cheyala' cuec yichjo' do yichj do lažo' gono' da' ca' gwlej Diosen' le' gono' cont yogo' bene' yesele'ede' zejcho' chono' da' güen. ¹⁶ Na' gwsaco' can' soa cuezo' cont soachacho' gono' con can' chazlaže' Diosen' na' soachacho' gwzejni'ido' bene' xtiža' Diosen' con can' naquen. Ben ca' cont gaclenen le' na' lecze gaclenen bene' ca' chosozenag xtižon' cont šjayzoalenle Diosen' cate' žin ža.

5

Can' cheyala' gon Timoteo len yezica'chle bene' chesejnilaže' Criston'

¹ Še no bene' byo gole chone' bi da' mal, bi tilo'ne', san gwneyoede' cuejyichjen', con ben xbab naque' xao'. Na' še no bene' xcuide' chone' bi da' mal, gwneyoede' cuejyichjen', con ben xbab naque' bene' bišo'. ² Na' še no no'ol gole chone' bi da' mal, gwneyoede' cuejyichjen', con ben xbab naque' xnao'. Na' še no no'ol xcuide' chone' bi da' mal, gwneyoede' cuejyichjen', con ben xbab naque' bene' zano'. Cheyala' gwsaco' cont gaco' bene' laždao' xilaže' len legaque'.

³ Chio' chdop chžagcho chonxencho Criston' cheyala' gwnežjwcho da' cheseyažje no'ol ca' ba gosat bene' chegaque' še da' li zjanaque' bene' chyažj chchine. ⁴ Perw še nita' no xi'ingaque' no xesoagaque', bzejni'ide' legaque' cheyala' yosonežjue' da' cheseyažje no'ol ca', le no'ol ca' ba bososgole' legaque', na' Diosen' chaclaže' yesone' güen len legaque' cont yosolo'e chesejnilaže'ne'. ⁵ No'ol ca' nono' zoa bene' gwnežjw legaque' da' cheseyažjde' na' zjanaque' dogualje güezebe, yesenite' lez gaclen Diosen' legaque' na' do ža do yel yesenite' yesenabde'ne' gaclene' legaque'. ⁶ Perw no'ol güezeb ca' chesacde' yesone' con ca' žan chegaque', len Diosen' yichjlažda'ogaquen' naquen ca' che to bene' ba got la'czla' ne' zjambane'. ⁷ Ben mandadw neche bene' ca' chesedop chesežag chesonxene' Jesucriston' yesone' can' žia' nga na' bibi da' mal yesone' da' zaca' no tile legaque'. ⁸ Še no bene' bi chaclene' cont gata' da' chyažje bene' zjanac diaža che', ba bzoe' šla'ale xtiža' Diosen' dan' chejle'cho chen, na' malech chone' ca' bene' bi chesejnilaže' Jesucriston'. Na' leca da' mal chone' še bi chaclene' bene' lo' yo'o che'.

⁹ Quinga nezdō' no no'ol güezeb ca' cheyala' gwchelo' le'e yiš cont bene' ca' chesedop chesežag chesonxene' Jesucriston' yosogüe'ej yosoguagüe'ne' na' yosonežjue' bichle da' cheseyažjde'. Cuejle no'ol gol ca' bene' ba gwde gayon iz, no'ole goc toze bene' che'. ¹⁰ Cuejle con no'ol ca' zjaneze bene' ba gosonchgüe' da' güen, ca' no da' quinga: še bosgole' bi' che' binlo, še blebe' bene' liže', še goclene' yezica'chle bene' chesonxene' Diosen', še goclene' bene' ca' cheseyi chesezaque', o še ba bene' bite'tezechle da' güen.

¹¹ Bene' ca' chesedop chesežag chesonxene' Jesucriston' bi cheyala' yesežo' lo' na'gaque' yosogüe'ej yosoguague' no'ol güezeb xcuide' ca'. Le no'ol ca', gwžin ža yesaclaže' yosyošagne'e da' yoble, ¹² na' yesape' doła' še yesebejyichje' xšin Criston' dan' gosechebe' yesone'. ¹³ Na' lecze no'ol güezeb xcuide' ca' bi naquen güen gwco'olaochwne' yeselaže' to to liž bene', cont bi yesaque' bene' xagüed, na' cont bi yesaque' bene' güetob diža'. Bi yeselaže' to to liž bene' yesezi'diže' bi chac, le bi cheyala' yesone' dan' nac ca'. ¹⁴ Da'nan' chaclaža' no'ol güezeb xcuide' ca' yosyošagne'e da' yoble na' yesezanche' cont

yosyosgole' xi'ingaque' na' yosogüia yesena' ližgaquen' binlo, na' bi yesone' cont bene' ca' chesegue'ede' chio' yesene' chesone' da' mal. ¹⁵ Chnia' ca' le nita' bal no'ol güezeb xcuide' ca' ba gosebejyichje' Criston' na' chosozenague' che Satanásen'.

¹⁶ Note' tez bene' chejnilaže' Criston', še nita' no'ol güezeb lo diaža čhegaque', cheyala' yosonežjue'ne' da' yese'ej yesagüe' cont bibi da' zed yesone' len bene' ca' chesedop chesežag chesonxene' Criston'. Nach con no'ol ca' nono zoa yesaclen legaque', legacze' cheyala' yesego'o lo na' bene' ca' chesedop chesežag chesonxene' Criston'.

¹⁷ Na' ca' nac bene' blao ba zjanchoj chosogüia chesene'e bene' ca' chesedop chesežag chesonxene' Criston' to to yež, še chesene'e bene' ca' binlo, da' xen cheyala' yesacxene', na' cheyala' gwnežjwchone' da' yesacbande'. Na' zaca'che' yesacxene' še cheseyixjue'ede' xtiža' Diosen' na' chosozejni'ide' bene' bi zejen. ¹⁸ Cheyala' yesacxene' na' gwnežjwchone' da' yesacbande', le nyoj Xtiža' Diosen' žan: "Bitw gwseyjwle cho'a go'ñ cont ca' gagwba' cate' chlej chšošjba' trigon' neče choj xen'." Na' lecz nyojen žan: "Bene' güen žin cheyala' si' laxjue'."

¹⁹ Bi gono' cuent cate' no' bene' gagw xya che to bene' blao bene' nchoj chgüia chne'e bene' lježe' chesonxene' Criston' še bi zoa yeto bene' o yechope bene' co' da' bali. ²⁰ Na' še da' li ba bene' da' malen', cheyala' tilo'ne' lao bene' ca' chesedop chesežag chesonxene' Criston' cont yezica'chle bene' ca' yesežebe' yesone' da' malen' nac ca'. ²¹ Na' toze can' cheyala' gono' len note'teze bene', bitw nacho bal bene' gonxenchguachone' na' yebale' gonchone' nacteze. Na' Diosen' len Xancho Jesucriston' na' len angl bene' ca' zjanchoj chesone' mandadw che' zjanezde' chona' mandadw gono' yogo' da' ca' ba gwnia' nga. ²² Bitw yob cuejo' bene' güia ne'e lježe' cont gague leno' gapo' doła' še ben' gwlejon' gone' da' mal. Gwsaco' cont bibi doła' gapo'.

²³ Na' dan' tolize chac li'o, bi ye'ej toze nis, san güe'ej late' güeje vino.

²⁴ Bal bene' nacia' chesone' da' mal na' yogo'ze bene' zjanezde' can' chesonen' la'czla' biña' žin ža yesezi'e castigw chen. Na' bal bene' chesone' da' malen' dan' ngaše' na' da' bi nacia', perw žin ža gwlo'elaon. ²⁵ Na' lecz ca' naquen len bene' ca' cheson da' güen, nacia' še da' güenna' chesone', na' la'czla' gague nla' da' güenna' chesone', bi nacho yega'ancze bagaše'ze dan' chesonen'.

6

¹ Na' bene' ca' chesejnilaže' Criston', bene' zjanac esclavos, cheyala' yesache'ede' bene' ca' zjanaque' xan žin čhegaquen' zjazaque' cont yosozenague' čhegaque'. Cheyala' yesape' legaque' bala'an cont nono ne yela' ya' che Diosen', neca no ne che dan' chzejni'ichon'. ² Bene' ca' zjanac esclavos, še xangaque' lecze chesejnilaže' Criston', bi cheyala' yesone' xbab bi yosozenague' čhegaque' neče zjanaque' txen chesonxene' Criston', san nachle cheyala' yesone' žinna' do laže'che' na' cheyala' yesacde' xan žin ca' ca' bene' biše', lagüe zjanaque' txen chesejnilaže' Criston'. Bzejni'i da' ca' ba gwnia' cheyala' yesone' na' gwneyoe bene' yosozenague' chen.

Cheyala' soacho mbalaz len da' de checho

³ Nita' bene' chosozejni'ide' xbab čhegacze' na' bi chososed chosolo'ede' diža' li che Xancho Jesucriston' dan' ba blo'eda' le', na' chosozejni'ide' clele, chesene' bi chonen byen soacho goncho can' chazlaže' Diosen'. ⁴ Bene' ca' chosozejni'ide' dan' zej clele chesonxen cuingaque', chesacde' zjanezde' da' zan, len bibi chesejni'ide'. Chosošaše' che no diža' o che bichle da' bi naquen da' zaque', chesacxi'e lježe', chesacyože' len lježe', chesezi'diža' lježe', na'

chesacde' chesacxi'a bene' legaue'. ⁵ Con bi cheyož chedo chesedił chosošaše', le ba yo'o da' malen' lo' yichjlažda' ogüe' na' bi zjanombi'e diža' li che Diosen'. Con chesacde' yososed yosolo'ede' xtiža' Diosen' cont yesaque' bene' gwñi'a. Bi gono' txen len ben' cheson ca'. ⁶ Da' li zoachguacho binlo cate' choncho can' chazlaže' Diosen' na' cate' zoacho mbalaz len bi da' dao' de checho. ⁷ Ga'alcho bla'cho yežlion' na' ga'alcho cate' yeza'cho. ⁸ Na' še de da' che'ej chagwcho na' še de xalana'cho da' chyažjecho, cheyala' soacho mba len da' ca'. ⁹ Bene' ca' chesezelaže' yesaque' bene' gwñi'a chosozenague' che da' malen' na' cheselažoe' lo' na' gwxyien'. Chesezelaže' da' zan da' gata' chegaue' da' yesede chen, na' da' ca' chesezelaže' chesonen mal len legaue' na' žin ža yesebiaye'e. ¹⁰ Bene' chzelaže' mechw nach chzenague' che bite'teze da' mal. Na' nita' bene' ba gosebejyichje' diža' li che Diosen' dan' chesezelaže' mechon', na' da' zan dan' chosožaglaochgüe' yela' güen da' mal chegaue'na'.

Cheyala' cuec yichj Timoteon' gone' xšin Criston'

¹¹ Na' ca' nac le' Timoteo, bi gono' can' cheson bene' ca', le Diosen' gwleje' le' cont gono' xšinen'. Cuec yichjo' gono' da' zej to licha, ben con can' chazlaže' Diosen', soachacho' šejnilažo'ne', goque bene', byo bchejlaže' cate' de da' saca'zi'o, na' goc bene' šagüe'. ¹² Gwlec yichjo' ben con ga zelao saquedo' cont gono' yogo' dan' chazlaže' Diosen'. Na' bebe dan' šjayzo' len Diosen' toli tocanē, le Diosen' gwleje' le' šjayzo' len le', na' ba bi'o diža' lao bene' zan žo' chejnilažo'ne'. ¹³ Dios ben' chnežjo yela' mban che yogo' benachen', che beyixē' ca' na' che bica'chle da' zjamban, na' Jesucristw ben' be' diža' li lao Poncio Pilato, gwne' Diosen' gwsele'ne', legaue' zjanezde' chona' mandadw ¹⁴ gwzenago' che yogo' dan' ba gwnia' le', na' bi go'o latje ten ca'ze, cont bi gono' da' zaca' no tile le'. Bzenag che yogo' dan' bena' mandadw gono' žinte ža yid Xancho Jesucriston' da' yoble. ¹⁵ Le cate' žin ža gwžia bia' Diosen', nach yide' da' yoble. Toz Dios nan' chnabi'e doxen na' zoachgüe' mba. Len' naque' Rey ben' chnabi'e yezica'chle rey ca', na' naque' Xancho ben' chnabi'e yezica'chle bene' gwnabia'. ¹⁶ Totec Dios nan' bi nacho žin ža gate'. Na' catec yo'ochgua be'ni' gan' zoen', nono gac bigue' gala'ze gan' zoe'na'. Nono zoa yežlio nga bene' ba ble'ede' Diosen' na' nono gac le'e le'. Cheyala' gonxenchone' le chnabi'e toli tocanē. Na' can' gonšcaczcho.

¹⁷ Na' ca' nac bene' ca' chesejnilaže' Criston', bene' zjanac bene' gwñi'a lo yežlio nga, gože' bi yesaque' bene' ya'laže'. Na' yo'o legaue' bi yesone' xbab yesenite' mba lagüe zjanaue' bene' gwñi'a, le yob te che bite'tez da' de chegaue'. Yo'o legaue' yesezoe' lez yesenite' mbalaz len Dios ben' zoe' toli tocanē. Toga le' chone' chio' yogo' da' güen da' chyažjecho na' da' chbecho. ¹⁸ Na' yo'one' yesenite' yesonchgüe' da' güen, yesone' yogo' cuen da' güen can' chazlaže' Diosen', nach lecze yo'one' yesezande' da' de chegaue' cont yesaclene' bene' na' yesebede' yesone' ca'. ¹⁹ Še yesone' ca', na' gaquen ca to yela' gwñi'a da' bi te chen, le Diosen' chaclaže' yesaclene' bene', na' gone' cont yesenite' mba cate' šjasyenite' len le' toli tocanē še yesone' ca'.

Pablon' chzože' carten'

²⁰ Timoteo, gwlecchgua yichjo' che yogo' dan' ba bzejni'i Diosen' le'. Bi gwzenago' che bene' chosošalj diža' da' bibi zaca', ne che dan' chesene bene' dan' bi zej lebe len diža' li che Diosen'. Chesonlaže' chesene' cheso'e diža' sina'. ²¹ Bene' bosozenague' che dižan' nac ca' ba gosebejyichje' diža' li che Diosen' da' chejle'cho na' bich chesejnilaže'ne'.

Chnabšca' gaclen Diosen' le'. Da' na'zen' chzoja'.

CART GWCHOPE DAN' BZOJ POSTLW SAN PABLO CHE TIMOTEO

Pablon' chzoje' Timoteon'

¹ Neda' Pablo naca' postlw che Jesucriston', le Diosen' gwnalaže' gwsele' neda' chyixjue'eda' can' gwne' gone' cont note'teze bene' yesejnilaže' Jesucriston' gata' yela' mban chegaque' toli tocañe. ² Na' chzoja' le' Timoteo, ba nona' le' ca xi'ina'. Chnaba' lao Xacho Diosen' na' lao Xancho Jesucriston' yesaclenšque' le' na' yesyeyaše' laže' de' le', na' yesonšque' ca so' binlo len xbab da' yo'o lo' yichjlažda' oguon'.

Cheyała' güe'cho diža' che Jesucriston'

³ Chonxena' Diosen' do yichj do laža' can' goson da' xozxta'ogua', na' nezda' lo' yichjlažda'ogua' chona' can' chazlaže' Diosen'. Na' yogo' ni'a cate' chol güiža' Diosen', lagüe ža na' šeže'le, choa' yela' choxcen che dan' chonon'.

⁴ Chjaza'laža' gwchežo' cate' beza' gan' zon', na' zelaža' le'e lježcho da' yoble, le yebechgüeda' še ca'. ⁵ Na' chona' xbab can' chejnilažo' Diosen' do yichj do lažo' can' zgua'tec goson taguo' Loida na' xna'o Eunice, na' nezda' lecz ca' chono' le' na'a.

⁶ Da'nan' chneyoeda' le' da' yoble, güe'lažo' gono' da' gwlo'o Diosen' lo' nao' gono' caten' gwxo'a na'ton' yichjon'. ⁷ Diosen' bene' chio' Spiritw chen' zoan lo' lažda'ochon', na' Spiriton' chaclenen chio' cont bi žebcho, na' chonen chio' yela' guac cont goncho can' chazlaže' Diosen'. Lecze chaclenen chio' cont chaque lježcho na' cont choncho da' zejen na' güe'cho diža' da' zaca'.

⁸ Da'nan' chneyoeda' le', bi yeto'edo' chixjue'edo' xtiža' Xancho Jesucriston', na' neca yeto'edo' chia' la'czla' dia' ližya nga da' chzenaga' che Jesucriston' na' chyixjue'eda' xtižen'. Cheyała' gono' can' chonan' na' gwyo gwchejlažo' bi da' gac chio' cate' chixjue'edo' diža' güen chen', le zoa Diosen' chaclene' chio' len yela' guac chen'. ⁹ Diosen' ba none' chio' yela' mban toli tocañe na' gwleje' chio' cont naccho lo' ne'en. Na' bene' ca' da' nži'ilaže' de' chio', gague neche bi da' güen bencho. Cate' bina' xe yežlion' bsi'e xneze sele' Jesucriston' cont gaclene' chio'. ¹⁰ Na' na'a Diosen' ba blo'e nži'ilaže' de' chio', le ba gwsele' Jesucriston' ben' chon yela' mban chechon' toli tocañe. Na' žin ža gwcuez Jesucriston' yela' goten' na' gone' cont chio' chejle'cho diža' güen chen' šjayzoacho len le' toli tocañe.

¹¹ Na' Diosen' gwleje' neda' naca' postlw che' na' gwsele'nda' cont chyixjue'eda' diža' güen che Jesucriston' na' chsed chlo'eda' bene' bi zjanac bene' Israel. ¹² Na' dan' chona' ca', chžaglagua' da' quinga chac chia', perw bi cheto'eda' chen, le nombi'a Diosen' ben' chejnilaža'. Ba ben cuina' lo' ne'e, na' nezda' nape' yela' guac gone' cont ne' soachacha' šejnilaža'ne' caten' žin ža yid Jesucriston' da' yoble.

¹³ Soachacho' gwzejni'ido' bene' diža' zaca' can' ba bendo' chzejni'idan', na' soatezo' šejnilažo' Jesucriston' na' gacdo'ne' do yichj do lažo'. ¹⁴ Be' latje gaclen Spiritw che Diosen' le' cont soatezo' gwzejni'ido' bene' diža' li da' bsd blo'eda' le'e, le zoa Spiriton' lo' lažda'ochon'.

¹⁵ Nezdó Figelo na' Hermógenes len yezica'chle bene' migw chia' ca' že' distritw che Asia ba gosebejyichje'nda'. ¹⁶ Na' chnaba' gaclenšca Xancho Diosen' Onesíforo len bene' lo' yo'o che', le bi beto'ede' chia' da' dia' ližya nga, san zan ni'a bedetipe' laža' nga. ¹⁷ Cate' bide' Roma nga, bene' byen beyiljue'

neda' con cate'ch beželde'nda'. ¹⁸ Nezd' lecze da' zan bene' goclene' neda' cate' gwzoa' Efeso. Chnaba' lao Xancho Diosen' gacšca güen che' cate' žin ža yid Xancho Jesucriston' da' yoble.

2

Cheyala' gwyo gwchejcho len da' saca'zi'cho

¹ Xi'indagua', chnaba' soachach'o šejnilažo' Jesucriston' lagüe' da' nži'ilaže'de' le'. ² Na' yogo' da' ba bendo' gwduxjue'eda' lao bene' zan, da' ca' bsed blo'en bene' yosozenag chen do yichj do laže'gaque', bene' ca' guac yosozejni'iden' bene' yoble.

³ Na' byo bchej len da' saca'zi'o šlac chono' xšin Jesucriston'. Goc ca to soldadw bene' bi chžeb bi gac che'. ⁴ Nezecho bene' zej yela' soldadon' bi chac gon xšine' šlac zeje' lao gwdila', san chbejyichjen' cont gone' bin' ža ben' nac xan soldadw ca'. ⁵ Na' nezecho bene' chja'ac lo güitj cheyala' yesone' cayanen' ba bosoxi'e yesone' cate' yeseyitje', cont gac yesezi'e da' yesone' gan. ⁶ Na' leze nezecho bene' chelale chone' žin yixe' chzi'e da' nechw da' chbia lao coseš chen'. ⁷ Ben xbab che da' quinga ba gwnia' le', na' Xancho Jesucriston' gaclene' le' šejni'ido' yogon'.

⁸ Ben xbab che Jesucristw ben' beyas bebane' ladjo bene' guaten', ben' nac xi'in diaža che da' rey Davin'. Che len' chzejni'ida' cate' chyixjue'eda' diža' güen che'. ⁹ Na' da' chyixjue'eda' diža' güen chen' chosochi chososaque'nda' na' dia' ližya nga ca to no bene' mal juisyw. Perw nezda' bibi gac yesone' cont bi gas lalje xtiža' Diosen' lo yežlion'. ¹⁰ Da'n'nan' chzanlaže' cuina' gac bi da' gac chia' lagüe da' chyixjue'eda' xtiža' Diosen', le chaclaža' yezica'chle bene' ba gwleje' cont gata' yela' mban chegaque' toli tocanē yesejnilaže' Jesucriston', na' žin ža šjasyezoe' len le' toli tocanē gan' chac da' güen juisyw. ¹¹ Diža' quinga zjanaquen da' li:

Še chejnilaže'cho Criston' ben' got neche xtoła'chon', chio' lecze naccho ca to bene' guat len da' xinjen' cont bich gonchon.

Na' con can' bosban Diosen' Criston' ladjo bene' guaten', lecze ca' bocobe' yichjlaždao' chio' cont šjayzoacho txen len le'.

¹² Na' še soachachcho šejnilaže'chone' bite'teze chac checho, lecze gone' cont nabia'cho txen len le'.

San še cuejyichjcho Criston', lecze le' cuejyichje' chio'.

¹³ Na' la'czla' še chio' bi goncho can' gwnacho goncho, Diosen' zoe' chone' con da' ba gwne' gone', le Diosen' bi gac gwše'e da' ba nžie' bia' gone'.

Ben' chon xšin Diosen' binlo

¹⁴ Bi go'o latje yesanlaže' bene' ca' chesejnilaže' Jesucriston' da' ca' ba bzejni'ida'. Na' yosnisdo' legaque' naquen mal len Xancho Diosen' yesedil yosošašlen lježe' che bize diža'. Bibi zejen yesone' ca', le cate' bene' chesende' chesedil chosošaše', chonen cont bi yesejle'e che xtiža' Diosen'. ¹⁵ Ben con ga zelao saque'do' cont yebe Diosen' can' chonon' na' cont bi gacdo' zto' lagüen' can' chono' xšinen'. Gwsed gwlo'edo' xtižen' to licha. ¹⁶ Bi gono' txen len bene' chesoe'chgüe' bite'teze diža' da' bibi zaca', diža' da' bibi zejen len Diosen', le dižan' zjanac ca' chziyen' bene' yesonche' da' mal. ¹⁷ Dižan' nac ca' chžiyin' bene' ca' to yižgüe' mal. Can' ba goc che Himeneo na' Fileto, ¹⁸ gosebejyichje' diža' li da' chzejni'in che Criston'. Chososed chosolo'ede' chesene' bi soacho lez žin ža yebancho ladjo bene' guaten', le chesene' ba gwde che da' ca'. Na' bal bene' ba chesejnilaže' Criston' chesacžejlaže' na'a neche xtiža' bene' ca'. ¹⁹ San chio' zoachachcho chzenagcho diža' li che Criston' na' Diosen'

chone' cont bi chbejyichjchon. Da'nan' zaca'lebcho ca to lene yo'o da' nac da' gual. Na' nyojczye Xtiza' Diosen' žan: "Diosen' nezde' no bene' zjajo'o lo ne'e." Na' ľecze nyojen žan: "Note'tez bene' že' chejnilaže' Xancho Diosen', cheyala' cuejyichje' bich gone' da' mal."

²⁰ Nezecho to liž bene' gwni'a de no tas platw na' no yeso' xguag de oro de plata da' zjazaca'chgua. Lecze de yeso' xguag de gona', na' de no batia na' bichle de yag da' chesonen žin da' bitec zjazaca'. ²¹ Can' naquen len chio', note'tezcho še cuejyichjcho da' malen', nach Xancho Diosen' gwchine' chio' neče goncho da' zan da' güen da' chaclaže' goncho. Na' še goncho ca', saca'lebcho ca to tas o to xguag de oro da' zaca'chgua.

²² Na' ca nac le', cheyala' cuejyichjo' bite'teze da' mal da' chzelaže' lažda'oguo' gono', da' ca' chesezelaže' note'teze bene' güego' yesone'. Bey-lijwlaže' nac gono' cont gaco' bene' güen len Diosen' na' cont soachacho' šejnilažo'ne', cont gacdo' Diosen', na' cont soa cuezo' binlo len bene' lježo' ca'. Ben ca' txen len yogo' bene' chesenab goclen lao Xancho Diosen', bene' zjanac bene' laždao' xilaže'. ²³ Bi gono' txen len bene' bi chesejni'ide', bene' chosošaše' cheso'e diža' da' bibi zejen, le xtiza'gaquen' chonen ga chesacyož bene'. ²⁴ Chio' choncho xšin Diosen' bi cheyala' tile gwšašlencho bene'. Cheyala' gaccho bene' šagüe' len yogo'ze bene', cheyala' nezecho naquen' gwzejni'icho ľegaque' che Diosen', na' cheyala' gapcho yela' chxenlaže' len ľegaque'. ²⁵ Na' cate' güe'cho consejw che bene' bi chesaclaže' yosozenague' diža' li che Criston', cheyala' güe'lencho ľegaque' diža' šagüe', na' cuezcho gaclen Diosen' ľegaque' yosoša' xbab čhegaquen' cont yosozenague' che diža' li čhen'. ²⁶ Can' goncho cont Diosen' gwnežjue' ľegaque' to xbab šagüe' na' yesyechoje' lo na' Satanás dan' chnabia' da' xigüe' ca', le chonen cont nite' chesone' con can' chazlažen'.

3

Naquen' yeson bene' cate' ba zoa yid Xancho Jesucriston' da' yoble

¹ Na' che'nda' šejni'ido' da' nga, cate' žin ža ba zoa yid Xancho Jesucriston' da' yoble, da' zan da' mal gac. ² Bene' zan yesonxen cuingaque', na' zane' yesebec yichje' gata' da' zcha'o xmechwgaque'. Zane' yeso'e diža' ca güenna' chesone' na' yesaque' bene' ya'laže'. Yesene'e che Diosen'. Bi yosozenague' che xaxna'gaque'. Bi yeso'e yela' choxcclen che Diosen' na' bi yesape' le' bala'an'. ³ Bi yesacde' bene', bi yesyezi'xen che lježe', yesene' mal che bene' yoble, con yesontezte' bite'teze da' mal da' žan čhegaque', yesacchgüe' bene' znia, na' yesegue'ede' bite'tez da' nac da' güen. ⁴ Yosode ľežgaque' lo na' bene' chesegue'ede' ľegaque', bi yesežebe' yesone' bite'ze da' mal, yesone' xbab zjazaca'chgüe', na' yesaclaže' yesone' con da' chpe ľegacze' na' bi yesaclaže' yesone' xbab che Diosen'. ⁵ Lecze da' zan da' yesone' cont yesaque' bene' chesonxenchgüe' Diosen', perw bi soa yela' guac che Diosen' len ľegaque'.

Bi gono' txen len bene' ca' cheson da' ca' ba gwnian'. ⁶ Bene' ca' cheson ca' chja'aque' liž no'ole bene' chesejle'daze', na' chesonlede' ľegaque' len diža' da' cheso'e. No'ol ca' zjadchgua xtoła'gaque', le chesontezte' da' mal can' ža lo' lažda'ogaquen'. ⁷ No'ol ca' chosozenague' che note'teze' že' gwzejni'ide' ľegaque', perw na' bi chžin ža yesejni'ide' diža' li che Diosen'. ⁸ Cani'te da' Janes na' da' Jambres besegue'ede' Moisésen' na' bi gosaclaže' yosozenague' diža' li da' be'len da' Moisésen' ľegaque', na' ca'czen' nita' bene' gwxiye' na'a chesegue'ede' diža' li che Diosen'. Nčhol' yichjlažda'ogaque' yela' güen da' mal čhegaquen', na' gague' da' li chesejnilaže' Diosen'. ⁹ Bi gac yesonlede' bene' sša, le yob gac čhegaque' can' goc che da' Janes na' da' Jambres, žin ža cate' yezica'chle bene' yesacbe'ede' chosozejni'ide' clele yela' bi chejni'i čhegaque'.

Consejw da' zelagüe' da' bnežjw Pablon' Timoteon'

10-11 Na' le' Timoteo, nezeczedo' can' ba bzejni'ida' le' na' can' zoa' chona' da' güen. Nezdo' chi' yichja' gona' yogo'lol da' ža Diosen'. Nezdo' zoachacha' chejnilaža' Diosen' bite'tez da' chac chia'. Na' nezdo' napa' yela' chxenlaže' len ljež benacha' na' zoacza' chacda' legaue'. Nezdo' bi chbejyichja' xšin Diosen' da' chona', la'czla' da' zan da' ba bosochi bososaca' bene' neda'. Na' nezdo' da' ca' gosonde' neda' cate' gwzoo' ciuda Antioquía na' cate' gwya'a yež Iconio len yež Listra, na' can' gwdi gwxaca'. Na' nezdo' Xancho Jesucriston' bosle' neda' lo yogo' da' ca' da' goc chia'. ¹² Da' li yesenita' bene' yosochi yososaque' note'tez chio' chejnilaže'cho Cristo Jesúsén', chio' chi' yichjcho chzenagcho che'. ¹³ Bene' mal bene' güexoayag ca' šja'acze' yesonche' da' xinjen', yeseziye'e bene' na' lecze yeseje'e che diža' güenlaže' da' yesoe' bene' yoble.

¹⁴ Na' le' Timoteo, cheyala' soachacho' gwzenago' che da' ca' chejni'ido' che Criston'. Nezdo' naquen diža' li, le bzejni'iton' le'. ¹⁵ Cate' nactio' bidao' ba nombi'o Xtiža' Diosen' da' nyojen. Na' Xtiže' nan' chzejni'in chio' cheyala' šejnilaže'cho Cristo Jesúsén' cont gata' yela' mban checho toli tocañe. ¹⁶ Cuiñ Diosen' bzejni'ide' bene' ca' bosozoj Xtižen' cont bosozoje' xbab chen'. Da'nan' doxen Xtiža' Diosen' dan' nyojen zaca'chguan da' chzejni'in chio' che Diosen', chdilén chio' cate' choncho da' xinj, na' chzejni'in chio' nac goncho cont na Diosen' choncho da' güen. ¹⁷ Na' chio' chejnilaže'cho Diosen', Xtižen' chzejni'in chio' yogo'lol da' cheyala' nezecho cont soacho goncho yogo' da' güen.

4

¹ Yid Xancho Jesucriston' da' yoble cont gone' yela' justis che yogo' benach, bene' ne' zjamban lente bene' ba gosat, na' caten' yide' da' yoble nach solao nabi'e yežlio nga. Na' Timoteo, Diosen' len Xancho Jesucriston' zjanezde' chona' mandadw gono' da' quinga: ² Chixjue'edo' xtiža' Diosen' cate' nlatjo' na' cate' chacdo' bi nlatjo'. Be'len bene' diža' cont yesenezde' chesone' da' xinj, gwdiñ legaue' che da' malen' chesone' cont yesyetinjden', na' gwda'p yela' chxenlaže' bzejni'ide' da' cheyala' yesone'. ³ Gwžin ža cate' bi yesaclaže' bene' yosozenague' xtiža' Diosen' da' chzejni'icho da' naquen da' li, na' yosotobe' bene' yosozejni'ide' legaue' diža' yoble da' yesazlaže' legacze'. ⁴ Yesebejyichje' bich yosozenague' che diža' lin' na' yosozenagche' che diža' da' chesaljaže' bene'. ⁵ Perw ca' naco' le', cheyala' gaco' bene' yo'o xbab, na' gwda'p yela' chxenlaže' len yogo'te da' sacazi'o, na' soatezo' go'o diža' güen che Jesucriston' do yichj do lažo'. Ben yogo' da' gwlo'o Diosen' lo nao' gono'.

⁶ Na' ca' nac neda', ba zoa' yesote' neda', da' li ba chžin ža šjayzoa' len Diosen'. ⁷ Na' chebeda' guac nia' do yichj do laža' ba gwdiñlana' da' chgue'e Diosen'. Ba bena' yogo'lol da' gwlo'o Diosen' lo na' gona' na' ba gwzoachacha' chejnilaža' Jesucriston' na' ne' zoachachca'. ⁸ Na' cate' šjayzoa' len Diosen', gone' cont soa' mba da' bena' güen šlac mbana'. Xancho Jesucriston' zeje' to licha, na' cate' žin ža choglagüe' nac gac che yogo'lol bene', gague neda'zen' gone' soa' mba, san yogo' nochle bene' chesyebede' chesebeze' baten' yide' da' yoble, lecze gone' cont legaue' yesenite' mba.

Da' chaclaže' Pablon' gon Timoteon'

⁹ Ben byen con ga zelao saque'do' yob yido' nga. ¹⁰ Ben ca', le Demas ba gwlejyichje'nda' na' ba zjayde' yež Tesalónica da' chi'chgua yichje' bin' gata' che' lo yežlio nga. Na' Crescente ba zeje' Galacia na' Titon' ba zeje' Dalmacia. ¹¹ Yetoga Lucas nga'anlen neda' nga. Na' che'sco' Marcos cate' yido', cont gaclene' neda' len xšin Dios da' chona'. ¹² Ca' nac Tíquicon', ba gwselane' ciuda

Efeso. ¹³ Na' chaclaža' goxo' xadoṅ chia' da' bocua'ana' yež Troas liž Carpo cate' yido', na' lecz goxo' libr ca', na' da' žialaoch goxo' yid ca' da' ba zjanyoj.

¹⁴ Alejandro bene' güechach yan' ba benchgüe' mal len neda'. Xancho Diosen' gwnežjue' le' castigw che da' malen' bene'. ¹⁵ Na' gwsaco' len le', le chonchgüe' clele len xtiža' Diosen' da' chyixjue'echo.

¹⁶ Cate' bosodie' neda' lo na' justis ca' da' nechw, nono gwzoa no gaclen neda', yogo' bene' ca' goda' yesaclen neda' gosebejyichje'nda'. Diosen' yezi'xene' chegaque' da' bi gosaclene'nda'. ¹⁷ Bia'cze Xancho Jesucriston' gwzoalene' neda' na' goclenchgüe' neda' cont bia' xtižen' len yogo' bene' ca' že' na', bene' bi zjanac bene' Israel. Na' bosle' neda' lo na' yela' goten'. ¹⁸ Na' nezda' yoslacze Xancho Jesucriston' neda' lo yogo' da' mal da' gac chia', na' guaclencze' neda' šlac žin ža šjayzoalena'ne' gan' zoe' chnabi'e. Cheyala' gonxenchwne' toli tocaṅe. Can' gonščaczcho.

Pablo chguape' tiox yeto chope' na' chnablaže' gaclen Diosen' legaque'

¹⁹ Gwguapšco' tiox Prisca na' Aquila na' lecz ca' bene' lo' yo'o che Onesíforo. ²⁰ Erasto bega'ane' ciuda Corinto, na' bocua'ana' Tróximo yež Mileto, le gocšende'. ²¹ Ben con ga zelao saque'do' cont yido' cate' za' žin tiemp zag. Eubulo, Pudente, Lino, Claudia na' len yezica'chle bene' chesejnilaže' Jesucriston' nga chosoguape' le' tiox.

²² Chnaba' soašca Xancho Jesucriston' len le' na' gaclenšca Diosen' yogo'le. Da' na'zen' chzoja'.

CART DAN' BZOJ POSTLW SAN PABLO CHE TITO

Pablon' bzoje' cart nga

¹ Neda' Pablo chona' xšin Diosen' na' naca' postlw che Jesucriston' cont gaclena' bene' ca' gwlej Diosen' yesejnilaže'ne', cont yesenezde' can' ža diža' li che Diosen'. Na' diža' li chen' chzejni'in can' goncho da' chazlaže', ² na' chzejni'in zoacho lez šjayzoacho len Diosen' toli tocaņe. Za' xe yežlion' Diosen' gwne' bene' yesejnilaže' le' šjasyenite' len le' toli tocaņe, na' Diosen' bi chonlaže' bite'teze da' že'. ³ Na' na'a ba chac da' bžie' bia' gac da' ba chzejni'ida' bene' xtižen', le Dios ben' none' yela' mban checho toli tocaņe gwlo'e lo na' chyixjue'eda' bene' xtižen'. ⁴ Chzoja' le' Tito, naco' ca dogualje xi'ina' da' bzejni'ida' le', na' naccho txen chejnilaže'cho Jesucriston'. Xacho Diosen' na' Xancho Jesucriston' ben' none' yela' mban checho toli tocaņe yesaclenšque' le'e na' yesyeyaše'de' le'e na' yesone' cont soa cuezle binlo len xbab chelen'.

Da' chon Titon' gan' nzi' Creta

⁵ Cate' bocua'ana' le' gan' zoa yežlio da' nzi' Creta dan' chi' lo nisdaon', gwnia' gwzožo' gono' dan' chona' cate' gwzoa' na', to to yež cuejo' bene' blao bene' yosozejni'i na' yosogüia yesene'e yezica'chle bene' chesejnilaže' Jesucriston'. ⁶ Na' še zoa bene' zoacze' chone' da' güen cont bibi de da' yosode'e bene' yesene' da' xinjen' chone', še naque' bene' zoa toz no'ol che', še xi'ine' ca' chesejnilaže' Criston', na' še bi zjanaque' bene' chesyedabaga', san chosozenague' cont bi zjalaže' chesone' da' xinj, ca bene' nac ca' cheyala' cuejo' güia na' lježe'. ⁷ Cate' cuejo' bene' co' Diosen' lo ne'e güia ne'e yezica'chle bene' chesejnilaže' Jesucriston', cuejo' bene' zoacze' chone' güen. Bi cuejo' bene' ya'laže', bene' naque' bene' loc, na' bene' borrašw. Bi cuejo' bene' chebede' cueque' žaš, na' neca cuejo' bene' zelaže' gone' da' xinj cont gone' gan mechw. ⁸ Bene' cuejo' cheyala' gaque' bene' chbede' chlebe' bene' zito' ližen'. Cheyala' gaque' bene' zoateze' chone' da' güen na' bene' chon xbab, bene' chon da' zej to licha, bene' chon da' chazlaže' Diosen' na' bene' chon con ga zelao chzaque'de' cont chone' bi da' ža Diosen'. ⁹ Cheyala' gaque' bene' zoachache' do laže' chzenague' diža' li che Diosen' da' bzejni'ida' cont gac gwzejni'ide' bene' yoble diža' güenna', na' gone' chachlaže' cont yesenite' yesejle'e da' naquen da' li, na' gac gwlo'ede' bene' ca' chesene' contr diža' li che Diosen' cont yesenezde' clelen' chesone'.

¹⁰ Chnia' gono' ca', le nita' bene' zan bene' Israel gualaž chia' na' yebal bene' yoble chesene' zjanaque' chio' txen, perw bi chosozenague' che Diosen'. Bibi zaca' xtiža'gaque' da' chosozejni'ide', con chesonlede' bene'. ¹¹ Na' da' zjachi' yichjgaque' yesone' gan mechw, da'nan' chosozejni'ide' da' zej cele. Cheyala' gonle cont yesenite' šize bich yosozejni'ide' diža' güenlažen', le clelen' chesone'. Na' bene' zan len bene' lo' yo'o chegaque' chesacžejlaže' che xtiža' Diosen' neche xtiža'gaquen'.

¹² Cana' gwzoa to bene' gwneya'a, goque' bene' Creta, na' gwne' che bene' gualaž che' ca': "Bene' Creta bate'teze zjanaque' bene' güenlaže' na' zjanaque' ca bež znia' yela' güen da' xinj chegaquen'. Lecze zjanaque' bene' lia na' bene' xagüed." ¹³ Na' da' li can' gwnen'. Da'nan' tilo' legaque' che da' xinjen' chesonen' cont nita'chache' yesejle'e xtiža' Criston'. ¹⁴ Gono' ca' cont bich

yosozenague' che diža' güenlažen' chesaljlaže' bene' Israel gualaž chia' ca', na' neca yosozenague' che nochle bene' ba gosebejyichje' diža' li che Diosen'.

¹⁵ Diosen' ba none' yichjlažda'ochon' xilaže', na' ne da' chagwcho ne da' choxe'cho bi chžonen gac yichjlažda'ochon' xilaže'. San ca nac bene' yichjlaždao' mal ca', bene' bi chesejnilaže' Criston', bibi de da' naquen da' xilaže' len legaque'. Chesone' xbab mal, na' bibi de cheseza'laže' cate' chesone' da' xinjen'. ¹⁶ Chesene' zjanombi'e Diosen', perw nachbia' bi zjanombi'ene', le chesonteze' da' xinjen'. Chesone' da' chgue'e Diosen'; zjanaque' bene' güedenag len xtižen' na' bi chesac yesone' da' güen.

2

Xtiža' Diosen' da' chsed chlo'echo bene' naquen güen

¹ Na' le', cheyała' gwzejni'ido' bene' yesone' can' ža diža' li che Diosen'. ² Bzejni'i bene' byo gol ca' bi yesezožde', san yesenite' cont bene' yezica'chle yesape' legaque' bala'an. Bzejni'i legaque' to toe' cheyała' yesenabia' cuine' cont yesenite' yesone' da' güen, na' bzejni'i legaque' cheyała' yesenita'chache' yesejnilaže' Diosen'. Cheyała' yesacde' bene' na' yesape' yela' chxenlaže' bite'teze da' chac. ³ Lecze ca' bzejni'i no'ol gole ca' cont yesenite' yesonxene' Diosen', na' bi yesene' che bene', neca yesezožde'. Cheyała' yesenite' yesone' da' güen cont yeseneze bene' yezica'chle can' cheyała' yesone'. ⁴ Na' no'ol gol ca' cheyała' yosozejni'ide' no'ol xcuide' ca' yesenite' binlo len bene' che to toe' na' yesacde' legaque' len bi' chegaque' ca'. ⁵ Na' yosozejni'ide' legaque' cont to toe' yesenabia' cuine' na' yesone' da' zaca' yesone' cont yesaque' bene' laždao' xilaže' len yogo' da' chesone', na' yosogüia yesena' ližgaque' binlo, yesaque' bene' šagüe' na' yosozenag to toe' che bene' chegaque'. No'ole xcuide' ca' cheyała' yesone' güen can' ba gwnian' cont nono ne mal che xtiža' Diosen'.

⁶ Na' lecze cheyała' neyoedo' bene' byo xcuide' ca' cont to toe' yesenabia' cuine' na' yesone' da' cheyała' yesone'. ⁷ Na' le', bite'teze da' gono', ben con da' nac güen cont yesacbe'e bene' yoble naquen' cheyała' yesone'. Cate' chsed chlo'edo' bene', bzejni'i legaque' do lažo', benen cont nachbia' chapo' Diosen' bala'an. ⁸ Bsed blo'e diža' li cont nono na xtižon' naquen mal. Na' še soatezo' gwsed gwlo'edo' diža' li, nachen' bene' ca' chesexi'a chio' yesyeto'ede' da' bi chesyēzede' bi da' mal yesene' checho.

⁹ Gož bene' güen žin ca' yosozenague' che xangaquen' na' yesone' bite'teze da' yese'ene' sin cbi yosyoži'e xtiža'gaquen'. ¹⁰ Bi yesebane' bi da' de che xangaquen', san yesenite' do laže' cont yezica'chle bene' yesele'ede' chesone' güen na' yesacbe'ede' güenna' nac xtiža' Diosen', Dios ben' none' yela' mban checho toli tocanē.

¹¹ Diosen' nži'ilaže'de' chio' benach na' ba blo'e chaclaže' gone' yela' mban toli tocanē che yogo'cho. ¹² Na' da' none' ca' chzejni'in chio' cheyała' cuejyichjcho yogo' da' choncho da' bi chazlaže' na' yogo' da' chzelaže'cho gata' checho o da' chzelaže'cho goncho da' bi naquen güen lagüen'. To tocho cheyała' soa cuezcho nabia' cuincho cont goncho da' nac da' zaca'. Na' cheyała' goncho da' zej to licha; na' cheyała' soacho gonxencho Diosen' yežlio nga. ¹³ Le šlac zoacho yežlio nga zoacho mbalaz nezecho žin ža yid Jesucriston' da' yoble nse'e be'ni' juisyw. Naque' Dios checho ben' chonxencho na' ben' none' yela' mban checho toli tocanē, na' zaca'chgüe'. ¹⁴ Len' bnežjw cuine' neche chio' cate' gosote'ne' cont bnitlagüe' xtoła'chon', na' beya' beyibe' yichjlažda'ochon' len da' malen' cont none' chio' ca' xi'ine'. Na' bene' ca' cont yebecho goncho da' güen.

¹⁵ Can' cheyała' gwzejni'ido' bene'. Na' cheyała' gono' chach laže' yesone' da' güen na' tilo' bene' cheson da' xinj, le Diosen' ba gwsele' le' na' ba bene' le' yela' chnabia' cont gwzejni'ido' legaue'. Bi go'o latje yosozoe' le' to šla'ale.

3

Can' cheyała' gon chio' chejnilaže'cho Jesucriston'

¹ Da' yoble yozzendo' bene' chesejnilaže' Jesucriston' cheyała' yosozexjwyichje' yosozenague' che justis ca' na' che bene' gwnabia' chegaue' ca' na' bate'teze cheyała' yesone' da' güen. ² Yozzendo' legaue' bi cheyała' yesene' mal che note'teze bene'. Bi cheyała' yesedił yosošaše', san cheyała' yesaque' bene' šagüe' na' yesape' yela' chxenlaže' len yogo'loł bene'.

³ Chio' lecze bi gwzejni'icho cana' na' bencho güedenag len Diosen'. Gwyejle'cho diža' güenlažen' na' bentezcho bi da' xinj da' gwzelaže' lažda'ochon'. Gwdacho bencho con da' bebecho. Gwzoacho bxi'a lježcho. Besegue'e bene' chio' na' bgue'e lježcho. ⁴ Perw bžin ža Dios ben' none' yela' mban checho toli tocanē blo'ede' chio' catec bene' šagüe' naque' na' catec chacde' chio' benach. ⁵ None' chio' yela' mban toli tocanē gague neche bi da' güen benchon', san da' beyaše'de' chio'. Nachen' beya' beyibe' yichjlažda'ochon' len da' malen' cate' gwzolao chejnilaže'chone', na' Spiritw chen' bocoben yichjlažda'ochon'. ⁶ Diosen' gwsele' Spiritw chen' zoan lo' yichjlažda'ochon' chaclenchguan chio', le Jesucristw ben' none' yela' mban checho toli tocanē gwñabde'ne' selen'. ⁷ Na' ca' ba beyaše' beži'ilaže'de' chio' cont beyone' chio' bene' güen lagüen' na' cont soa cuzcho nezecho žin ža šjayzoacho len le' toli tocanē.

⁸ Da' ca' ba gwnia' nga zjanaquen da' li, na' gono' byen yosozenag bene' ca' gwzejni'ido' chen. Le bene' ca' ba chesejnilaže' Diosen' cheyała' yesebec yichjgaue' yesone' da' güen. Na' da' quinga ba gwnia' zjazaca'chguan na' yesaclenen note'teze bene'. ⁹ Perw bi gono' txen len bene' chesedił chosošaše' che bize diža' da' bi zejen. Na' bi cuec yichjo' che diaža che da' xozxta'ocho ca'. Bi gono' txen len bene' chesedił chosošaše' che bi zejen dan' nyoj le'e ley da' bzoj da' Moisésen', le da' chesone' ca' bi chaclenen bene' na' bi naquen da' zaca'.

¹⁰ Na' bene' ca' cheson cont bene' ca' chesedop chesežague' chesonxene' Jesucriston' chesechoje' chople, neyoedo' legaue' bich yesone' ca'. Na' še ba gwñeyoedo' legaue' to chope ni'a na' bi chosozenague', yebejo' legaue' ca'ale.

¹¹ Le da' bi chosozenague' nachen' nezecho zjambiaye'e na' zjanape' dola' che da' xinjen' chesone'.

Can' cheyała' gon Titon'

¹² Cate' sela' Artemas o Tíquico gan' zon', ben con ga zelao saque'do' cont yido' yežagcho lo' ciuda Nicópolis, le ba bechoglaža' yega'ana' na' tiemp zag.

¹³ Na' ben yogo' da' gac gono' par gacleno' Zenas ben' nsed ley, na' Apolos, cate' yesa'aque' gan' zon' cont bibi yeseyažjde' chanez. ¹⁴ Bene' lježcho ca' chesejnilaže' Criston' cheyała' yesoe'laže' yesone' da' nac güen na' yesaclene' bene' chyažj chchine. Le cheyała' gaccho bene' chon da' zaca'.

Bene' ljež Pablon' chosoguape' Titon' tiox

¹⁵ Yogo' bene' cheson xšin Diosen' txen len neda' nga chosoguape' le' tiox. Na' chnaba' gwguapšco' tiox bene' ca' zoaleno' na', bene' ca' chesacde' chio' da' naccho txen chejnilaže'cho Criston'. Diosen' gaclenšque' yogo'le. Da' na'zen' chzoja'.

CART DA' BZOJ POSTLW SAN PABLO CHE FILEMÓN

Pablo chzoje' carten'

¹ Neda' Pablo dia' ližya nga da' chyixjue'eda' xtiža' Cristo Jesúsén'. Chzoja' le' Filemón, na' txen len bene' lježcho Timoteon' chguapto' le' tiox. Chaqueto' le' da' naccho txen choncho xšin Diosen'. ² Na' lecze chguapto' tiox bene' ca' chesedop chesežague' chesonxene' Jesucriston' ližo'. Na' le' Apia, naco' ca' bene' zanto', na' le' Arquipo, chono' neto' txen choncho xšin Diosen', lecze chguapto' le'e tiox. ³ Chnabeto' Xacho Diosen' na' Xancho Jesucriston' yesaclenšque' le'e na' yesone' cont soa cuezle binlo len xbab chelen'.

Filemónna' chejnilaže' Jesucriston' na' chacde' bene' lježe'

⁴ Na' le' Filemón, yogo' ni'a cate' chjayze'eda' le' šlac choł güiža' Diosen', choa' yela' choxcen che' can' ba chono'. ⁵ Ba benda' diža' can' chejnilažo' Xancho Jesucriston' na' can' chacdo' lježcho bene' lecze chesejnilaže' Jesucriston'. ⁶ Na' chnaba' gaclen Diosen' bene' ca' ba gosejnilaže' Jesucriston' lagüe be'leno' legaque' diža' can' chejnilažo'ne'. Chnaba' gaclene' legaque' cont yesache'ede' yogo' da' güen juisyw da' chon Diosen' lo' yichjlaždao' chio' chejnilaže'chone'. ⁷ Bene' migw, leca chbeda' na' chac chach laža' nezda' chacchgüedo' bene' lježcho ca' chesejnilaže' Jesucriston', le chacleno' legaque' cont nita'che' mbalaz.

Gwnabe' yezi'xen Filemónna' che Onésimo

⁸⁻⁹ Dan' chacdo' Criston' na' chacdo' bene' lježo' ca', da'nán' chneyoeda' le' gono' to da' chaclaža' gono'. Da' naca' postlw che Criston' guac gona' byen gono' da' gwžia' bia' gono' šaca' žan gwchina' yela' chnabia' da' yo'o lo na'. Perw bi žan gona' ca'. Neda' Pablo ba naca' bene' gole na' lecze na'a ba dia' ližya nga da' chyixjue'eda' xtiža' Jesucriston'. ¹⁰ Na' chnaba' goclen laguon' par Onésimo ben' ba nona' ca' xi'ina'. Le šlac dia' ližya nga bsd blo'eda'ne' cont chejnilaže' Jesucriston'.

¹¹ Cana' bi goque' mos güen chio', san na'a ba naque' mos güen chio' na' lecze ca' chia' neda'. ¹² Ba chezselane' laguon', na' chneyoeda' le' yolebo'ne' na' yezi'xeno' che', le leca chacda'ne'. ¹³ Zelaža' yega'anlene' neda' cont gaclene' neda', gone' da' cheyala' gono' šlac dia' ližya nga da' chyixjue'eda' xtiža' Jesucriston'. ¹⁴ Perw bi chaclaža' nabda'ne' bi gone', le naquen chio' le' nao' nac gone', cont do lažo' gono' bi da' güen da' gono' na' gague gonchi'on. ¹⁵ Diosen' be'e latje beza' Onésimon' ližon' šlož cont soale txen toli tocanē. ¹⁶ Na' na'a bich naque' mos chio' na'ze san naque' ca' bene' bišo' da' naque' txen len chio' chejnilaže'cho Xancho Jesucriston'. Leca chacda'ne', na' le' cheyala' gacchdo'ne', gague con ca' chacdo' note'teze benach, san can' chacdo' bene' lježo' chesejnilaže' Xanchon'.

¹⁷ Da'nán' še da' li naccho txen chejnilaže'cho Jesucriston', yolebo'ne' cacze chlebo' neda' cate' chedena'a le'e. ¹⁸ Na' še bi da' mal bende' le' o še bi da' chale' chio', neda' chixjuan'. ¹⁹ Cuincza' neda' Pablo chzoja' da' nga, neda' chixjua' bi da' chale'. Na' bibi chnia' che da' chalo' le' chia' neda' da' ba de yela' mban chio' toli tocanē. ²⁰ Bene' migw, da' chaquecho Xancho Jesucriston' chaclaža' gono' dan' chnaba' nga ca' to goclen chia'. Benšca ca' soa' mbalaz, le naccho txen len Criston'.

²¹ Zoa' lez gwzenago' chia' na' goncho' güen clel ca dan' žia' le', da'nān' chzoja' le'. ²² Na' yeto dā' chṇaba', chaclaža' yedesoa' ližon' cate' yida' gan' zoalen'. Le zoa' lez yob gac yedyeṇa'a le'e can' chṇable lao Diosen' cate' chol güižlene'.

Beṇe' ca' nita' len Pablon' chosoguape' Filemónṇa' tiox

²³ Epafra die' ližya nga txen len neda' da' chyixjue'ede' xtiža' Cristo Jesúsen'. Na' le' chguape' le'e tiox. ²⁴ Na' lecz ca' beṇe' ca' chesaclene' neda' len xšin Diosen' nga, Marcos, na' Aristarco, na' Demas, na' Lucas, chosoguape' le'e tiox.

²⁵ Xancho Jesucriston' soašque' len le' gaclenščacze' le'. Da' na'zen' chzoja'.

CART DAN' NYOJ CHE BENE' HEBREO CA'

Diosen' gwsele' Xi'ine' cont be'lene' benachen' diža'

¹ Cani' Diosen' be'lene' da' xozxta'ocho ca' diža' len bene' gwsele' gosoe' xtižen'. Zan las gosoe' da' bene' ca' xtižen' na' nža'te ca gosoen to toe'.
² Perw na'a ba zoa žin ža yeyož yežlion' na' Diosen' ba be'lene' chio' diža' dan' gwsele' Xi'inen' bedezejni'ide' chio'. Na' Xi'in Dios nan' bene' yaba na' yežlio nga len yogo' bichle da' de nga na' gate'teze. Na' bengaquen' con can' gwnalaže' Diosen'. Na' gwžin ža gac lo na' Xi'in Diosen' yogo' benach, beyixe', na' bica'chle da' bene'.
³ Na' Xi'in Diosen' chlo'e catec bene' zaca' nac Diosen', le cayanē' nac yichjlaždao' Xe' Diosen' nac yichjlažda'ogüen'. Na' Xi'in Diosen' chone' cont yaban', yežlion' na' da' ca' chle'echo le'e yaban' na' yežlion' chesonen žin, le nape' yela' guac cont chac con can' že'. Len' bzanlaže' cuine' gote' cont bexi beyach chio' len xtoła'chon'. Na' beyož bene' ca' beyepe' yaban' zjaychi'e cuit Xe' Diosen' ben' nac bene' zaca' juisyw na' chnabi'e txen len le'.

Xi'in Diosen' zaca'che' ca angl ca'

⁴ Naque' bene' zaca'chgua ca angl ben' cheson žin che Diosen', na' Diosen' bene' cont leca ba chacxenche' ca angl ca'.
⁵ Diosen' biņa' ye'e ne to angl ca dan' gože' Xi'inen', gože'ne':

Len' naco' Xi'ina';

na'aža ba blo'a zoaczo'.

Na' biņa' güe'e diža' che note'teze angl can' bi'e diža' che Xi'inen', gwne':

Neda' gona' cont gachia' naca' Xe',

na' gona' cont gachia' naque' Xi'ina'.

⁶ Na' da' nac Xi'in Diosen' la'zelagüe bene' zaca', da'nan' cate' Diosen' gwsele'ne' yežlio nga gwne':

Yogo'lol angl chia' cheyała' yesonxene' le'.

⁷ Na' che angl ca' gwne':

Chona' cont angl chia' ca' bene' chesone' žin chia' chesaque' ca be' dan' chechj na' chesaque' ca yi' bel.

⁸ Perw che Xi'inen' be'e diža', gwne':

Len' naco' Dios na' nabi'o toli tocanē.

Na' leca güen chnabi'o, chono' con da' zej to licha.

⁹ Chebedo' da' zej to licha na' chgue'edo' da' malen'.

Da'nan' neda' Dios ben' chonxeno' ba bena' cont zoacho' mbalazech ca note'teze bene'.

¹⁰ Na' da' yoble gozna Diosen' che Xi'inen':

Xana' Dios, beno' yežlion' ža gwlaste,

na' yogo' da' chle'echo le'e yaban' lecze le' benon'.

¹¹⁻¹² Na' gwžin ža cate' te che yogo' dan' chle'echo le'e yaban' na' lo yežlion', perw le' bi te chio'; soaczo' toli tocanē.

Na' gwša'a le'e yaban' na' yežlion' ca to bene' chša' xe' cate' ba beyoen na' chaze' yeton.

Na' le'e yaban' na' yežlion', gono' len len can' chon to bene' cate' chotob xe'.

Perw le', tozecz can' gaco' toli tocanē, gwbat žin ža te chio'.

¹³ Diosen' biņa' ye'e ne to angl ca dan' gože' Xi'inen', gože'ne':

Gwche'edo' cuita' nga nabia'cho txen,

na' gona' cont yogo' no chesegue'e le' yosozexjw yichje' yosozenague' chio'.

14 Na' ca nac angl ca', yogue' zjanaque' bene' cheson xšin Diosen', na' chsele' legaque' chesaclene' chio' ba gwleje' šjayzoacho len le'.

2

Cheyalā' gwzenagcho che Diosen' cont yeque'e xtolā'chon'

1 Na' da' nac Xi'in Diosen' bene' zaca'ch ca angl ca', do yichj do laže'cho cheyalā' gwzenagcho xtižen' da' ba benecho. Le še bi gwzenagcho chen do yichj do laže'cho, guanlaže'chon na' cuejyichjchon. 2 Diosen' goclaže' yosozenag da' xozxta'ocho ca' che ley che' dan' goseyixjue'e angl ca'. Da'nan' Diosen' bnežjue' castigw da' cheyalā' si' to toe' bate'tez bi bosozenague' chen, con ca nac da' mal da' gosone'. 3 Gague da' yelacho bi si'cho castigw še bi gwzenagcho xtiža' Xancho Jesúsēn' da' gwduxjue'ede' že' chaclaže' gone' yela' mban checho toli tocanē. Da' zaca'chgua da' ben Xancho Jesúsēn' cont gata' yela' mban checho toli tocanē. Cuine' gwduxjue'eden' da' nechw, na' bene' ca' gosadalen le' bosolo'ede' chio' le naquen da' li. 4 Diosen' bene' cont gosone' da' zaca' yebanecho, na' bnežjue' legaque' zan yela' guac, na' Spiritw chen' benen cont gosone' da' zan da' güen len yela' guac chen. Na' yogo' da' ca' goc con can' gwnalaže' Diosen'. Na' Diosen' bene' ga gosac da' ca' cont nezecho xtiža' Xancho Jesuscriston' naquen da' li.

Jesucriston' goque' can' nac chio' benach

5 Na' gague angl can' yesenabia' cate' žin ža gata' yežlio cobe dan' choe'cho diža' chen. 6 Na' de late' Xtiža' Diosen' gan' nyoj diža' da' be'len to bene' Diosen', gwne':

¿Bixchen' nži'ilažo' neto' benach? le bitec bi zaca'to'.

Na' ¿bixchen' chi' yichjo' chacleno' neto'?

7-8 Beno' cont benachen' zjanaque' blao, na' con angl ca'ze zjanaquech blao ca benach.

Na' beno' cont benachen' naque' bene' zaca' na' cont chacxene'.

Beno' cont yogo'lol da' zjade yesaquen lo na' benach, na' len yogo'lol beyixe' yesacba' lo na'gaque'.

Na' da' ben Diosen' cont yogo'lol da' de yesaquen lo na' benachen' na' yogo' beyixe' yesacba' lo na'gaquen', bibi bocua'an Diosen' da' bi gwlo'e lo na' benachen', la'czla' na'a bina' le'echo yesac yogon' na' yogo'ba' lo na' benachen'.

9 Perw yogo'lol ba yo'ocze lo na' Jesúsēn', la'czla' šlac gwzoe' yežlio nga angl ca' gosacche' blaoch ca le'. Perw na'a da' bzanlaže' cuine' gote', da'nan' Diosen' bene' cont chacxenche' ca legaque' na' cont nacbia' naque' bene' zaca' juisyw. Le da' nži'ilaže' Diosen' chio' benach, da'nan' bžie' bia' got Jesúsēn' cont gac yeque'e xtolā' to to benach.

10 Diosen' bene' benach, bene' beyixe' ca' na' bite'tezechle da' zjade cont chacxene'. Na' Diosen' chaclaže' bene' zan yesaque' xi'ine' na' šjasyezoe' len le' gan' yo'ochgua be'ni', na' güenna' bene' bžie' bia' gwxaca'zi' Jesúsēn' cont gac gone' yela' mban toli tocanē che chio' benach. 11 Jesúsēn' ba gwlo'e chio' lo na' Diosen' na' txen len Jesúsēn' naccho xi'in Dios. Da'nan' bi cheto'e Jesúsēn' ne' naccho biše' lježe'. 12 Quinga gwna Jesúsēn' gože' Diosen':

Gwzejni'ida' bene' biše' lježa' ca' can' nac yichjlažda'oguo'n,

na' txen len bene' ca' zjandop zjanžag chesonxene' le' goła' gonxena' le'.

13 Nach Jesúsēn' gwne':

Neda' soacha' šejnilaža' Diosen'.

Nach da' yoble gozne':

Nga zoa' txen len bene' ca' gwlo'o Diosen' lo na', bene' ca' ba gwque'e ca xi'ine'.

¹⁴ Chion' ba gwca'a Diosen' ca xi'ine' naccho bene' bela' chen, na' da'nan' Jesúsen' lecze golje' goque' bene' bela' chen cont bnežjo cuine' gosote'ne'. Na' da' got Jesúsen', da'nan' gwzoede' bzoe' šla'ale Satanás dan' chnabia' da' xigüe' ca' na' dan' chonen yela' got che benachen'. ¹⁵ Jesúsen' bene' cont bich chžebcho gatcho, can' chesežeb yezica'chle benach šlac de yela' mban chegaque', chesežebe' yesate'. ¹⁶ Jesúsen' bide' yežlion', gague cont gaclene' angl ca', san cont goclene' chio' naccho xi'in diaža che da' Abrahanna'. ¹⁷ Na' da'nan' benen byen goc Jesúsen' doxen can' nac chio' benach cont naque' bχoz blao checho lao Diosen'. Na' bnežjw cuine' bñitlagüe' xtoła'chon' na' zoe' cheyaše'de' chio' con can' chazlaže' Diosen'. Na' da' bnežjw cuine' bñitlagüe' xtoła'chon', zaca'lebde' ca bχoz blao che nación Israel chechon' ben' gwyej lao Diosen' beχue' chen che beyixe' cont gwnabe' yezi'xen Diosen' xtoła'gaquen'. ¹⁸ Na' da' bžaglao Jesúsen' cate' gwlo'oyela' gwxiyen' le' gone' da' mal, perw bibi da' mal bene', da'nan' nezde' naclen' gaclene' chio' cate' chgo'oyela' gwxiyen' chio' goncho da' mal.

3

Jesúsen' zaca'che' ca da' Moisésen'

¹ Bene' migw, Diosen' ba gwleje' chio' naccho lo ne'e, na' cheyala' goncho xbab che Cristo Jesús ben' gwsele'. Naque' bχoz blao checho na' ben' chejnilaže'cho. ² Jesúsen' bene' cayanen' gwna Dios ben' gwseła' le' šlac gwde' yežlion', ca'cze ben da' Moisésen' cate' le' goclene' da' xozxta'ocho ca' cani', bene' ca' gosac diaža che Dios. ³ Perw Jesúsen' zaca'che' ca da' Moisésen', le len' bxie' diaža che Diosen', na' da' Moisésen' naque' con to bene' za' lo diaža che Diosen'. ⁴ Gwnita' benach bene' bxie' to to diaža yežlio nga, san ca nac Diosen', len' bxie' yogo'te da' zjade. ⁵ Da' Moisésen' goque' ca xmos Diosen' cate' bene' con can' gwna Diosen' cont goclene' da' xozxta'ocho bene' ca' gosaque' diaža che Diosen'. Na' da' Moisésen' be'e diža' che da' za' gac da' za' chixjue'e Diosen' benachen' ca tiempa'. ⁶ Perw Criston' bi goque' ca to mos dan' gwzoe' bene' can' gwna Diosen', san da' naque' Xi'in Diosen' da'nan' bene' can' gwnen', na' naque' Xan yogo' chio' naccho diaža che Diosen'. Na' da' li naccho diaža che Diosen' še zoachachcho chejnilaže'chone' na' chebecho nezecho gac güen checho.

Guac soacho mbalaz len Diosen'

⁷ Da'nan' cheyala' gwzenagcho can' ža Spiritw che Diosen' len da' nga da' nyojen, žan:

Še Diosen' nie' le'e na'a,

⁸ bi gonle güedenag can' goson da' xozxta'ole cani' cate' besyedabague' Diosen' latje daš gan' chesaše'.

⁹ Nach Diosen' gwne':

Bi gosejle'e še leda' dan' goša' legaque' gwnežjua' da' yezaca'zi'e neche xtoła'gaquen'.

Bi gosejle'e chia' cate' gosaše' latje dašen', la'czla' choa iz besele'ede' can' bena' len legaque'.

¹⁰ Da'nan' bža'a bene' ca' gwnitan' na' gwnia':

“Yogo' las chesejle'e diža' güenlaže',

na' bi chosozenague' chia' cont yesone' can' chazlažan'.”

¹¹ Nachen' bža'a legaque' na' da' bałi gwlo'a gwnia':

“Gwbat nite' mbalaz yesyezi'laže' can' chezi'laža' neda'.”

¹² Bene' migw, bi güe'le latje nabia' da' malen' yichjlažda'ole na' gonen cont cuejyichjle bich šejnilaže'le Diosen' ben' zoa toli tocaņe. ¹³ Na' šlac na'a ne'

decze latje gwzenagcho che Diosen', le neyoe lježle tža tža cont ne tole bi gonle xbabem' clele, gaquele bibi nonen gontezle da' xinj. ¹⁴ Da' li naccho Criston' txen še ne' zoacho chejnilaže'chone' cate' žin ža gatcho, con can' gwzolaicho chejnilaže'chone'.

¹⁵ Nyoj Xtiža' Diosen' che chio', žan:

Še Diosen' nie' le'e na'a,

bi gonle güedenag can' goson da' xozxta'ole cani' cate' besyedabague' Diosen'.

¹⁶ Na' da' žan ca', choen' diža' che da' xozxta'ocho ca' bebej da' Moisésen' nación gan' nzi' Egipto. Gosende' can' gož Diosen' legaue', perw bi bosozenague', besyedabague' Diosen'. ¹⁷ Da'n'an' choa iz Diosen' bže'e legaue' neče gosone' da' xinjen', na' gosat ben' besyedabague' Diosen' šlac ne' zjalaže' latje dašen'. ¹⁸ Na' legaue', da' bi bosozenague' che Diosen', da' baļi gwlo'e, gwne' bi güe'e latje yesenite' mbalaz yesyezi'laže' can' chezi'laže' Diosen'. ¹⁹ Na' nachia' da' bi gosejle'e che Diosen', da'n'an' bi goc nite' mbalaz yesyezi'laže' can' chezi'laže' le'.

4

¹ Na' ca' nezecho lecze neče chio' Diosen' gwne' bene' yesejle' xtiže' yesenite' mbalaz yesyezi'laže' can' chezi'laže' le'. Da'n'an' cheyala' gwsaca'cho cont bi goncho güedenag len le'. ² Chio' ba benecho diža' güen cont gac soacho mbalaz ca diža' dan' gosene da' xozxta'ocho ca' cani', perw diža' da' gosende' bi goclenen legaue', le bi gosejle'en. ³ Na' chio', še chejle'cho da' ža Diosen', ba zoacho mbalaz chezi'laže'cho can' chezi'lažen'. Na' nyoj da' gwne' che da' xozxta'ocho ca', žan:

Nachen' bža'a legaue' na' gwlo'a da' baļi, gwnia':

“Gwbat nite' mbalaz yesyezi'laže' can' chezi'laža' neda'.”

Na' nezecho Diosen' gwzolaģüe' chezi'laže' cate' beyož bxie' yaban' na' yežlion' na' bichle da' bene' ža gwlaste. ⁴ Na' zoa late' gan' nyoj Xtiža' Diosen' can' bene' ža gažen', žan:

Xop ža ben Diosen' yaban', na' bichle da' bene' cate' bxie' yežlion'.

Na' bžin ža gaže, bich bi bene', con gwzoe' mbalaz bezi'laže'.

⁵ Na' lecze nyojen can' gwne', žan:

Gwbat nite' mbalaz yesyezi'laže' can' chezi'laža' neda'.

⁶ Na' ne' naquen da' li baļi bene' yesejle'e xtiža' Diosen' na' nite' mbalaz yesyezi'laže' can' chezi'laže' le', na' bene' ca' gosende' diža' güen chen' cani' bi gosejle'en, na' bi goc yesenite' mbalaz yesyezi'laže' yela' güedenag chegaquen'.

⁷ Na' gwdechle gwne' Diosen' da' yoble gwne': “Na'a guac nita'le mbalaz yezi'laže'le.” Na' bene' cont da' rey David bzoje' da' nga, žan:

Še Diosen' nie' le'e na'a,

bi gonle güedenag.

⁸ Da' Josué gwchi'e da' xozxtao' chio' bene' Israel gan' gosezi'e yežlion' da' bnežw Diosen' legaue', perw bi bene' cont yesenita' bene' ca' mbalaz yesyezi'laže'. Da'n'an' Diosen' be'e diža' gwdele, gwne' gwžin ža yesenite' mbalaz yesyezi'laže'. ⁹ Na' da'n'an' bene' ba gwlej Diosen' cont yesaque' lo ne'e, legaue' guac yesenite' mbalaz yesyezi'laže' ca' mbalazen' gwzoa le' cate' gwzolaģüe' chezi'laže'. ¹⁰ Na' bene' ca' ba nita' mbalaz chesyzezi'laže' can' chezi'laže' Diosen', bich chesone' can' ža xbab chegaquen', san chesone' can' ža Diosen'. Da'n'an' žacho zjanite' mbalaz chesyzezi'laže' can' zoa Diosen' mbalaz chezi'laže' da' beyož bxie' yogo' da' zjade. ¹¹ Da'n'an' cheyala' güe'laže'cho šejle'cho xtiža' Diosen' do yičhj do laže'cho cont soacho mbalaz

yezi'laže'cho can' chezi'laže' Diosen' na' cont bi cuiayi'cho can' gac checho še goncho güedenag len xtižen' can' goson da' xozxta'ocho ca'.

¹² Xtiža' Diosen' chazen lo' yichjlaždao' bene' chesenden' na' chaclenen bene' chosozenag chen. Na' zaca'leben ca to spada da' nlachgua chop la'a. Perw chonch Xtiža' Diosen' ca to spada, le chlo'en chio' še chzenagcho che Diosen' o še che cuincho, na' chzejni'in chio' che xbab da' yo'o lo' yichjlažda'ochon' na' len yogo' da' chzelaže'cho še naquen güen o naquen mal.

¹³ Bibi de da' bi neze nle'e Diosen', ne to benach, angl, da' xigüe' o bi da' zjade. Diosen' nezde' yogo'te da' yo'o lo' yichjlažda'ochon'. Na' gwžin ža nabyožde' chio' che yogo'te da' ba bencho.

Jesúsen' naque' b̄xoz gwnabia' checho

¹⁴ Jesús ben' naque' Xi'in Diosen' ba beyepe' yaban' na' zoe' gan' zoa Diosen'. Na' naque' b̄xoz blao checho bene' la'zelagüe zaca'. Da'n'an' cheyala' soachachcho šejnilaže'chone' can' ba be'cho diža' goncho. ¹⁵ Jesúsen' ben' nac b̄xoz blao chechon' chache'ede' bi da' naquen zdebe len chio', le gwxiyen' goclažen' co'oyelan' le' gone' da' mal, na' bžaglagüe' cayanen' chžaglao chio', perw bibi da' mal bene'. ¹⁶ Na' dan' zoe' naque' b̄xoz blao chechon' ben' cheyaše'de' chio', da'n'an' cheyala' yol güižcho Diosen' gan' chi'e chnabi'e, na' bi žebcho güe'lenchone' diža', nabechone' yezi'xene' checho na' gaclene' chio' bate'teze chache'echo chyažjecho gaclene' chio', le nži'ilaže'de' chio'.

5

¹ Yogo' bene' ca' ba gosaque' b̄xoz blao che nación Israel chechon' gosac lo ne'e šjasesane' bi da' šjasesane' lao Diosen' na' gosote' beyixe' bosolalje' xchengacba' cont Diosen' bezi'xene' xtoła' da' xozxta'ocho ca'. ² Na' b̄xoz ca' gosape' yela' chxenlaže' len bene' bina' yesejni'i can' cheyala' yesone' na' len bene' ba n̄xoayag da' malen' legaque', le lecze benach bene' güen da' xinj legaque'. ³ Da'n'an' benen byen b̄xoz ca' gosote' beyixe' na' bosolalje' xchemba' cont gosenabe' yezi'xen Diosen' xtołen' lente xtoła' yezica'chle bene'.

⁴ Na' ne to b̄xoz ca' bi benxen cuine' n̄eca gwlej cuine' cont gaque' b̄xoz blao, san Diosen' gwleje' to toe' gosaque' b̄xoz blao can' gwleje' da' Aarón. ⁵ Na' ca'cze goc len Criston', bitw beyiljue' nac gone' cont gacxene', n̄eca gwlej cuine' cont naque' b̄xoz blao checho, san Diosen' gwleje'ne' na' gože'ne':

Len' naco' Xi'ina',

na'aža ba bena' cont nacbia' zoaczo'.

⁶ Na' ga yoble nyoj yeto da' gwne':

Naco' b̄xoz toli tocan̄e can' nac b̄xoz ben' le' Melquisedec.

⁷ Na' Criston' šlac gwzoe' yežlion' bol güiže' Xe' Diosen' ben' nape' yela' guac cont yosle' le' bi gate', gwne' zižje na' gwcheže' gw̄nabe' gaclene' le'. Na' da' bzexjw yichj Criston' bene' con can' gwna X̄en', na' Xe' Diosen' bzenague' na' goclene'ne' cont bi bžebe' yela' goten'. ⁸ Na' la'czla' Criston' naque' Xi'in Dios, bžaglagüe' yogo'lol da' ca' goc che' cate' bzenague' che Diosen' cont gwyejni'ide' can' chac che chio' benach. ⁹ Na' beyož goc che' yogo'lol da' goclaže' Diosen', nach ba guaque' gwnežjue' yela' mban toli tocan̄e che yogo' bene' yosozenague' che'. ¹⁰ Can' naquen, Diosen' gwleje' le' cont naque' b̄xoz blao checho, na' naque' ca b̄xoz Melquisedec.

Gwsaca'cho cont bi cuejyichjcho xtiža' Diosen'

¹¹ Na' ne' de da' zan da' chaclaža' n̄ia' le'e che da' ngan', perw naquen zdebe nian' ca šejni'ilen, le bich chebele šejni'ilen. ¹² Ba gole' gwzejni'ile bene' xtiža' Diosen', perw gualaz da' gonle ca', chyažjele no yozejni'i le'e da' yoble da' ca' bsedle da' nechw. Da'n'an' zaca'leble ca to bidao' bina' gac gagw na' con

chaže'be'. ¹³ Na' bene' zjanac ca to bidao' ne' chaže', bina' yesejni'ide' xtiža' Diosen' binlo cont yesone' da' zej to licha len Diosen'. ¹⁴ Na' dan' ža xtiža' Diosen' da' naquech zdebe, zaca'leben ca yela' guagw da' chagw bene' gole. Na' bene' chesejni'i lenna' chesacbe'ede' še to da' yesende' o to da' yesone' naquen güen o naquen mal, le ba zjayolagüe' chosozenague' che Diosen'.

6

¹⁻² Cana' betinjecho xtoła'chon', gwyejnilaže'cho Criston', na' bsdcho diža' güen che'. Goccho ca to bene' guat len yichjlažda'ochon' neche da' choncho da' xinj, perw ba betinjecho xtoła'chon' na'a. Bich chyažjen yezolaocho šejnilaže'cho Diosen'. Bich chyažjen gwsedchcho che dan' chesezoa bene' nis o che dan' chxoa na'cho yichj bene' na' chnabcho gaclen Diosen' legaue'. Bich chyažjen gwsedchcho can' gac cate' yechis yosban Diosen' bene' guat ca' o caten' chogbi'en yesezaca'zi' bene' ca' ba goson da' xinj. Ba nsedcho da' ca', na' na'a bach cheyala' gwsedcho xtiža' Diosen' da' nacch zdebe cont gacch yichjlažda'ochon' can' nac yichjlaždao' Criston'. ³ Lenna' goncho na'a še Diosen' gonšque' latje.

⁴ Nita' bene' ba gwo'o be'ni' che Criston' lo' yichjlažda'ogaue', na' ba chesacbe'ede' can' nac yela' mban da' chon Criston', na' ba zoa Spiritw che Diosen' lo' yichjlažda'ogaue'. ⁵ Ba zjanezde' xtiža' Diosen' naquen güen na' ba zjanombi'e yela' guac che Diosen' da' za' gwlo'echde' benachen'. ⁶ Na' še žin ža bich yesejni'laže' Criston' na' yesebejyichje' xtižen', bich gac yesyetinjde' che dan' ba gosebejyichje'ne', le lo' yichjlažda'ogaue' chesone' txen len bene' ca' bosode'e Xi'in Diosen' le'e yag cruzen', na' chesone' cont nochle bene' yesegue'ede' le'. ⁷ Cheyala' gac yichjlažda'ochon' ca to yežlio güen gan' chesaz bene'. Cheyož chac yejon' zan ni'a, nach chac cosešen'. Na' chata' dan' cheseyaže' bene' chesazen'. Na' nacbia' Diosen' chebede' yežlion' nac ca'. ⁸ Bi gaccho ca to yežlio gan' chla' yag yeše' na' bichle yixe' da' nono chagw. Yežlion' nac ca' bibi zacan', na' ba zoa cuejyichj xanen len na' yixe' da' chla' lagüen žin ža šeyen.

Nezecho šjayzoacho len Diosen'

⁹ Le'e bene' migw, chacda' le'e, na' la'czla' ba bia' dižan' ca', nezda' bilja gonle can' cheson bene' chesebejyichje' xtiža' Diosen'. Chacda' gonle güen da' ba gwlej Diosen' le'e cont šjayzoale len le'. ¹⁰ Diosen' zeje' to licha, na' bi ganlaže' can' ba benle xšinen' na' can' ne' chonlen na'a chaclenle yezica'chle bene' chesejni'laže'ne'. Na' chonle ca' da' chaquele Diosen'. ¹¹ Na' chaclaža' to tole soatezle gonchle ca' do yichj do laže'le šlac bina' žin ža gatle, cont nezele šjayzoale len Diosen'. ¹² Chaclaža' bi gacle bene' xagüed len da' ža Diosen'. Na' chaclaža' gonle can' ba goson bene' zan bene' gosenite' gosejni'laže' Diosen' cani', gosejle'e gon Diosen' can' gože' legaue' gone', na' gosape' yela' chxenlaže' cate'ch bžin ža benen'.

¹³ Cate' Diosen' gože' da' Abraham xi'in diaža che' yesaque' bene' zan, bzoa cuine' gwlo'e da' baļi gac can' gwnen', le nono zoa bene' napch yela' gwnabia' ca Diosen'. ¹⁴ Gwne': "Da' li goncza' cont gac güen chio' na' cont yesac xi'in diaža chio' bene' zan." ¹⁵ Na' Abrahanna' gwdape' yela' chxenlaže' šlac gwleze', nach bžin ža gwzolao chac can' gwna Diosen'. ¹⁶ Benachen' zjayolagüe' chosozoe' Diosen' cue'e da' baļi che bi dan' chesene', le Diosen' chnabia'che' ca legaue'. Chesone' ca' cont bene' ca' chesacyože' len legaue' yesejle'e na' yesyeyacxenlaže'. ¹⁷ Na' Diosen' bzoa cuine' cue'e da' baļi cont neze bene' ca' zjanac xi'in diaža che da' Abrahanna' gague da' te che dan' gwne' gonen'. ¹⁸ Diosen' bene' chope da' qui: gwne' can' gone' na' lecze bzoa cuine' cue'e da'

ba_{li} gac can' gwnen', na' gague da' te bi gac can' gwnen'. Chaclaže' chio' ba betinje xtola'chon' yebecho nezecho šjayzoacho len le'. Na' Diosen' bi chac güe'e diža' güenlaže'. ¹⁹⁻²⁰ Na' da' nezecho šjayzoacho len Diosen', bi soa xbab chechon' quile ca'le. Jesúsén' ba gwžialagüe' gwyo'e gan' zoa Diosen' gan' nono benach goc šo', na' bene' cont chio' gac šo'cho. Le naque' b_xoz blao checho to_{li} toca_{ne}, na' naque' ca b_xoz Melquisedec.

7

Jesúsén' naque' ca b_xoz Melquisedec

¹ Na' Melquisedequen' goque' rey na' gwnabi'e gan' nzi' Salem, na' Dios ben' nac la'zelagüe bene' blao gwleje' le' cont goque' b_xoz. Na' goquen' Abrahanna' zeze'e lao gw_dile gan' bene' gan' gayo' rey, na' Melquisedequen' jašague'ne' na' gw_dixjue'ede' gac da' güen che da' Abrahanna'. ² Ca horen' Abrahanna' zeze'e zonse'e yogo'lo_l da' jaytobe' da' bene' gan' lo yela' gw_dilen', na' gwlequen' ši cuen na' bnežjue' to cuen che b_xoz Melquisedequen'. Na' Melquisedec zejen diža' "rey bene' zej to licha". Na' goque' rey che bene' zjanite' bin_{lo}, le Salem gan' gwnabi'e zejen diža' "zjanite' bin_{lo}". ³ Bi nyojen še no goc da' xaxna' Melquisedequen'. Neca nyojen še no goc xozxta'ogüe', na' neca nyojen baten' golje' na' baten' gote'. Da'nan' žacho Melquisedequen' zaca'lebde' ca Xi'in Dios ben' zoa to_{li} toca_{ne} naque' b_xoz checho, le bi golje Melquisedequen' lo diaža che nochle b_xoz, na' neca gwzoa nochle bene' lo diaža che' bene' tie' gw_lane' xlatje'.

⁴ Le gon xbab catec bene' blao goc b_xoz Melquisedequen'. Da'nan' da' xozxta'ocho Abrahanna' gwleje' to cuen lo ši cuen da' ca' jaytobe' lo na' rey ca' na' bnežjue' b_xoz Melquisedequen'. ⁵ Na' da' xozxta'ocho bene' ca' gosanje lo diaža che da' Leví, ben' besyeyale' gosaque' b_xoz che nación Israel chechon', gosone' con can' nyojen le'e ley da' bzoj Moisés, na' bosochixjue' to cuen lo ši cuen yogo' bi da' gota' che yezica'chle bene' gualaž chegaque' ca'. Na' yogo'cze' gosaque' diaža che da' Abrahanna', b_xoz ca' na' bene' yezica'chle. ⁶ Perw Melquisedequen' la'czla' bi golje' lo diaža che da' Leví, Abrahanna' bnežjue'ne' to cuen lo ši cuen da' ca' jaytobe', na' Melquisedequen' gw_nabde' Diosen' gac güen che da' Abrahanna' ben' gw_na Diosen' yesac xi'in diaža che' bene' zan. ⁷ Na' nezecho bene' chac ch_nabde' Diosen' gac güen che bene' yoble zaca'che' ca' ben' gac che' da' güenna'. ⁸ Na' bene' ca' zjanac b_xoz can' ža ley dan' bzoj Moisésen' chesezi'e to cuen güeje lo ši cuen yogo' bi da' de che bene' Israel gualaž chechon', na' b_xoz ca' zjanaque' con ljež benachcho bene' chesat. Na' che b_xoz Melquisedequen' ben' gw_xi' to cuen lo ši cuen da' jaytob da' Abrahanna', Xtiža' Diosen' choen' diža' che' ca' to bene' ne' zoacze. ⁹⁻¹⁰ Na' da' bnežjo Abrahanna' le' da' ca', guac n_acho da' Leví bnežjue' Melquisedequen' to cuen güeje lo ši cuen da' ca', le gwdechle Levín' golje' lo diaža che da' Abrahanna', na' Leví nan' goque' xozxtao' bene' ca' gosac lo na'gaque' bosotobe' da' ca' bosonežjo bene' Israel gualaž checho ca' che Diosen'.

¹¹ Na' Diosen' bnežjue' bene' Israel gualaž checho ca' ley chen' cani' cont benen žin txen len da' goson b_xoz ca' bene' gosanje lo diaža che da' Levín'. Perw b_xoz ca' bi goc yesone' cont yichjlaždao' benachen' yesaquen xilaže' len Diosen'. Da'nan' byažjecho bid Jesúsén' naque' b_xoz checho to_{li} toca_{ne}, na' le' naque' ca b_xoz Melquisedequen', gague ca da' b_xoz Aarón. ¹² Na' cont goc zoa Jesúsén' naque' b_xoz chechon', byažjen bža' ley da' nonen mandadw non' gac b_xoz. ¹³ Le Xancho Jesúsén' ben' nac b_xoz chechon' bi golje' lo diaža che da' Leví, na' noch no n_a' choj lo diaža che Jesúsén' bene' naque' b_xoz. ¹⁴ Nezczecho

Xancho Jesúsén' golje' lo diaža che da' Judá, na' da' Moisésén' bi bzoje' le'e leyna' ga nan bene' galje' lo diaža che da' Judán' guac yesaque' b̄xoz.

¹⁵ Na' nacia' ba b̄za' leyna', le ba zoa Jesúsén' naque' b̄xoz cobe chechon' na' naque' ca b̄xoz Melquisedequen'. ¹⁶ Bito golje' lo diaža che da' Leví can' gosac b̄xoz ca' bene' goson žin can' ža ley da' bzoj da' Moisésén', san naque' b̄xoz da' bi gwzoe yela' goten' le' na' zoe' toli tocañe. ¹⁷ Quinga nyoj da' gwna Diosen' che', žan:

Naco' b̄xoz toli tocañe, can' nac b̄xoz ben' le' Melquisedec.

¹⁸ Na' b̄xoz ca' gwna Diosen' nita' cana', bich nžie' bia' nite' na'a, le dan' bžia bia' leyna' yesone' bi goc yeca'an xtoła' beñachen' to ši'i. ¹⁹ Na' leyna' lecze bi goc gonen cont yesac yichjlaždao' beñachen' xilaže' len Diosen'. Perw na'a ba chaquech güen checho, le ba zoa b̄xoz checho bene' ba beca'a xtoła'chon' to ši'i cont zoacho binlo len Diosen' na' chac chñelenchone'.

²⁰ Na' cont nezecho Jesúsén' naque' b̄xoz checho, Diosen' bzoa cuine' gwlo'e da' bali le soacze Jesúsén' gaque' b̄xoz chechon'. ²¹ Bene' ca' gosaque' b̄xoz can' bzoj da' Moisésén', Diosen' bitw bzoa cuine' cue'e da' bali cont šejle'cho zjanaque' b̄xoz. Perw nyoj can' gože' Jesúsén', žan:

Diosen' bzoa cuine' gwlo'e da' bali na' bi gwše'e can' ba gože'ne' gone':

“Naco' b̄xoz toli tocañe can' nac b̄xoz ben' le' Melquisedec.”

²² Na' da'nan' zoa Jesúsén' chone' cont nezecho Diosen' gaclene' chio' toli tocañe can' gwne' gone'. Na' can' za' gwne' gaclene' chio' na'a, zaca'chen ca da' gože' da' xozxta'ocho ca' cani'. ²³ Na' bene' ca' gosaque' b̄xoz can' ža ley dan' bzoj da' Miosésén', gosaque' bene' zan, le cate' gosat tgüeje tgüeje', la' benita'te bene' yoble. ²⁴ Perw Jesúsén' zoe' toli tocañe, na' da'nan' naque' b̄xoz checho toli tocañe. ²⁵ Da'nan' chac chone' yela' mban toli tocañe che chio' chñabcho yezi'xen Diosen' checho, le zoacze' toli tocañe chñabe' goclen lao Diosen' che chio' chejnilaže'chone'.

²⁶ Na' Jesúsén' nacyañe' bene' chyažjecho gaque' b̄xoz blao checho cont gaclene' chio', le naque' bene' laždao' xilaže'. Bibi da' xinj none' na' neca none' bi xbab mal, con bibi doła' nape'. Nža'le naque' len beñach bene' cheson da' xinj. Jesúsén' ba beyepe' zoe' gan' zoa Diosen', na' chnabi'e txen len le'. ²⁷ Nža'le naque' len b̄xoz blao ca' gosenita' cani'. Legaque' tža tža byažjen gosote' beyixe' bosolalje' xchemba' cont gosenabe' bezi'xen Diosen' xtoła'gaque', na' gwdechle gosote' beyixe' yoble bosolalje' xchemba' cate' gosenabe' bezi'xen Diosen' xtoła' yezica'chle bene' Israel gualaž checho ca'. Perw Jesúsén' šni'aze bnežjw cuine' neche xtoła' beñachen' cate' gosote'ne' le'e yag cruzen', na' bi byažjde' gote' beyixe' can' goson b̄xoz ca' tža tža neche xtoła'gaque' na' neche xtoła' bene' yezica'chle. ²⁸ Bene' gosac b̄xoz blao can' ža ley da' bzoj da' Moisésén' gosaque' bene' güen da' xinj can' zjanac yezica'chle bene'. Na' cate' ba goc zan iz bzoj Moisésén' leyna', Diosen' bzoa cuine' gwlo'e da' bali zoacze Xi'ine' Jesúsén' naque' b̄xoz blao checho. Na' Xi'ine' Jesúsén' zoacze' toli tocañe na' nac yichjlaždagüen' cayanen' chazlaže' Diosen'.

8

Jesúsén' bene' cont gwzolao chac da' cobe da' gwna Diosen' gone' cont gaclene' chio'

¹ Da' nga zejechen lao yogo' da' ba gwnia': zoa b̄xoz blao chechon' ben' nac cayanen' chazlaže' Diosen', na' ba chi'e yaban' chnabi'e txen len Diosen' ben' nac la'zelagüe bene' zaca'. ² Chone' žin gan' zoa Xancho Diosen', gague lo' yo'o dan' goson beñach cont yesonxene' le'. ³ Na' yogo' b̄xoz blao che bene' Israel gualaž chechon' nite' chosonežjue' Diosen' bi da' chosonežjue'ne' na'

chesote' beyixe' chosolalje' xchemba' lao Diosen'. Na' dan' nac Jesúsen' b̄xoz blao checho, benen byen bnežjw cuine' blalj xchene' neche xtolá'chon'. ⁴ Na' šaca' ne' zoe' yežlio nga bi naque' b̄xoz, le nita' b̄xoz che bene' Israel gualaž chechon' chjasesane' bi da' chjasesane' lao Diosen' con can' ža ley dan' bzoj da' Moisésen'. ⁵ Na' bene' ca', chesone' bi da' chesone' lo' yodao' da' naquen ca l̄ gua'a lsaca' che yaban' gan' zoa Diosen'. Na' nezecho naquen ca l̄ gua'a lsaca' che yaban' gan' zoa Diosen', le cate' za' gon Moisésen' yodao' dan' chacte chedobe gan' goson b̄xoz ca' žin che Diosen' cani', Diosen' gože'ne': "Yogo' da' ba gwnia' gonle, le gonen cayanen' blo'eda' le' caten' gwzoacho lo' ya'an." ⁶ Na' da' chon Jesúsen', da' xen zaca'chen ca da' cheson b̄xoz che bene' Israel gualaž chechon', na' can' gwna Diosen' gaclene' chio' lagüe da' bnežjw cuin Jesúsen' neche xtolá'chon', lecze da' xen zaca'chen ca dan' gože' da' xozxta'ocho ca' cani'.

⁷ Le Diosen' gože' da' xozxta'ocho ca' gac güen chegaque' še yesone' can' ža ley chen', perw bi bosozenague', na' da'nan' byažjen gwduxjue' to da' cobe.

⁸ Na' Diosen' bi bebede' legaque', san gwne':

Gwžin ža cate' nia' to da' cobe da' gona' gaclena' le'e nacle xi'in diaža che bene' ca' gosenite' Israel,

na' len le'e nacle xi'in diaža che bene' ca' gosenite' Judá.

Neda' naca' Xanle Dios žia' ca'.

⁹ Nža' can' goša' da' xozxta'ole gona' gaclena' legaque' cani',

bži'ilaže'da' legaque' na' bena' cont besyechoje' lo' na' bene' nación Egipto.

Legaque' bi gosone' can' goša'ne' cont gac güen chegaque'.

Na' da'nan' gwleza' bich goclena'ne', neda' Xanle Dios žia' ca'.

¹⁰ Na' quinga gona' gaclena' xi'in diaža che le'e nacle bene' Israelen' cate' žin ža:

Neda' Xanle Dios gona' cont šo' yichjgaque' da' nona' mandadw yesone',

na' gona' cont yesyebeden' lo' yichjlažda'ogaquen',

na' toza' neda' yesejnilaže',

na' legaque' yesaque' nación chia'.

¹¹ Na' bi yažjen yosozejni'i lježe' cont yesombi'e neda',

neca yažjen yosozejni'i no bene' biše' lježe',

le cana' yogo'lole' yesombi'e neda',

bi' bixjw lente bene' nac bene' gole.

¹² Canan' yezi'xena' xtolá'gaquen', na' bich gona' cuent še bi da' malen' ba gosonen'.

¹³ Na' Diosen' be'e diža' che da' cobe da' gwne' gone' gaclene' nación chechon', na' da'nan' nezecho ba bzoe' to šla'ale da'na' gože' da' xozxta'ocho ca' cani'. Na' da' gole da' ba bzoe' to šla'ale ba zoa yeniten.

9

Yodao' da' zoa yežlion' na' dan' zoa yaba gan' zoa Diosen'

¹ Cani' Diosen' gože' da' xozxta'ocho ca' gaclene' legaque' na' gac güen chegaque' še yesone' can' ža ley chen'. Na' šlac ne' chon žin da' nechw da'na' gože' legaque' cani', Diosen' bžie' bia' nacle yesonxene' le' na' nacle yesone' yodao' gan' yesonxene' le' yežlio nga. ² Gosone' yodao' da' nsan' chope quart. Na' lo' quart nechon' bosozoe' to candeler na' to mes gan' bosocue'e yetextil da' naquen che Dios. Na' quartna' bososi'en Latje che Dios. ³ Na' bosozie' to lache' lo' yo'ona' cont bchojen chope quart, na' quart gwchopen' bososi'en Latje ga Zoa Dios. ⁴ Na' lo' quart gwchopen' bosozie' yeto mes de oro gan' bosozeye' yal. Na' goseyixjue' to caj da' bosoguazje' oro doxenen. Na' lo' cajan' gosegüe'e to yeso' de oro gan' gosegüe'e late' yela' guagw da'

nzi' maná, na' gosegüe'e carrot che da' Aarón dan' bexje. Lecze lo' caj nan' gosego'ošagüe' yej ta'a ca' gan' byoj yogo' dan' bžia bia' Diosen' yesone' cont gaclene' legaque'. ⁵ Na' cože' cajen' bosonite' chope l gua'a lsaca' bene' gosone' ca angl bene' bososi'e querubines, cont nacbia' zoa Diosen' gan' žia cajen' na' naque' bene' zaca' juisyw. Na' cože' cajen' ladjo angl ca' gan' nžiljo xilgaquen', bosoži'e xchen beyixe' cate' gosenabe' yezi'xen Diosen' xtoła' bene' Israel gualaž checho ca' to to iz. Perw bi chonen byen güe'cho diža' na'a doxen can' goca'.

⁶ Na' beyož gosone' yodaon' na' bosonite' yogo' da' ca' lo'enna', nach yogo' ža bxož ca' goso'e lo' quart nechon' na' gosone' can' bžia bia' Diosen' gosone' gosonxene' le'. ⁷ Na' quart gwchopen', toz bxož blao goc gwyo'e lo'enna' tni'a tгүйz. Na' cate' gwyo'ena' benen byen bexoe' chen che beyixe' bži'en lo' cajen' cont Diosen' bezi'xene' xtole' na' bezi'xente' xtoła' yezica'chle bene' Israel gualaž checho neche da' xinj da' gosone' sin cbi gosacbe'ede'. ⁸ Na' da' bi de lsens šo' nochle bene' lo' quart gwchopen', Spiritw che Diosen' chzejni'in chio' biņa' gac šo' benachen' gan' nac latje ga zoa Diosen' šlac ne' chon žin yodao' nechua' lo' yežlion'. ⁹ Na' yodaon' len yogo' da' cheson bxož ca' lo'enna' chlo'en chio' zoacho na'a can' chac yaban' gan' zoa Diosen'. Na' la'czła' da' zan chesoe' bene' Diosen' na' be zan beyixe' chesote' chesonxene' le', bibi yela' guac zjansa' da' ca' cont yesenezde' bibi doła' zjanape' len Diosen'. ¹⁰ Na' da' ca' cheson bene' gualaž chechon' lo' yodaon' naquen costumbr che no nis yela' guagw, no beyixe' chesote', na' nacle cha' chyib cuingaque', na' bichle da' zjazacan' par cuerp chegaque' na'ze. Na' ba gosonen žin šlac Diosen' biņa' gwše'e costumbr ca' len da' coben'.

¹¹ Na' na'a Criston' naque' bxož blao checho na' ba bžin ža bxie' costumbr güen ca'. Na' zoe' yaban' naque' bxož checho lao Diosen', na' gan' zoen' zaca'chen ca' yodao' da' goson benachen' yežlio nga. ¹² Na' bi bexoe' chen che no šib no go'ņ dao' cate' gwyo'e gwñabe' cont Diosen' bezi'xene' xtoła'chon', san da' bnežjw cuine' gosote'ne' na' blalj xchene' neche xtoła'chon' tni'aze le'e yag cruzen', da'nan' goc gwyo'e gan' zoa Diosen' na' ba beque'e xtoła'chon' toli tocaņe. ¹³ Na' ley da' bzoj da' Moisésen' nyojen žan da' zan da' cheson bene' da' chonen cont bi chesaque' xilaže' len Diosen'. Na' cont yesyeyaque' xilaže' len Diosen' da' yoble, chyažjen gwže'e bxožen' legaque' xchen no šib no go'ņ na' nchixen len de da' chega'añ cate' chosozeye' to vaca' dao'. ¹⁴ Na' xchen Criston' da' bedelalje' neche xtoła'chon' zaca'chen ca' xchen beyixe' ca', le' xchenen' cheyonen yichjlažda'ochon' xilaže' len da' xinj da' ba bencho. Da'nan' bich nchoglaon checho gatcho neche xtoła'chon', san soaczcho gonx-encho Diosen' ben' zoa toli tocaņe. Spiritw che Diosen' goclenen Criston' bnežjo cuine' beque'e xtoła'chon', na' bibi xtoła' Criston' gota'.

¹⁵ Criston' bedelalj xchene' cont gwzolao chac da' coben' dan' gwna Diosen' gone' cont soacho binlo len le'. Na' ba bxie' da' coben' cont bałteze bene' ba gwlej Diosen' šjasyenite' len le' toli tocaņe. Na' da' got Criston' bedelalj xchene', da'nan' gwnitlao xtoła' bene' ca' gosejnilaže' Diosen' šlac ne' chon žin dan' gwđixjue' da' nechw dan' gwne' gone' cont chio' bene' Israel soacho binlo len le'. ¹⁶ Cate' to bene' ba bene' testament, cate'ch ba gota'bia' ba got bena' ben testamenta', cana'ch gac can' žanna'. ¹⁷ Le to testament bi gac can' žan šlac ne' mban ben' ben len. Cate'ch ba gote' canan' gac can' žanna'. ¹⁸ Na' goc ca' len da' nechon' da' gož Diosen' da' xozxta'ocho ca' gone' gaclene' legaque'. Da'nan' bžie' bia' bosolalje' xchen beyixe' cont gwxen. ¹⁹ Cate' da' Moisésen' beyož be'lene' da' xozxta'ocho ca' diža' che yogo' dan' bžia bia' Diosen' yesone' can' ža ley chen', nach Moisésen' bži'e legaque' xchen go'ņ dao' na' xchen šib dao'

na' nis. Bži'e legaque' da' ca' len late' yiša' xa xila' da' mben color xna' na' len to xis yixe' dao' da' nzi' hisopo. Lecze bži'en lao libren' gan' nyoj ley chen'. ²⁰ Na' da' Moisésen' gože' legaque': "Chen ni ben Diosen' mandadw gwžia' le'e cate' gože' chio' nac goncho cont gaclene' chio' gac güen checho can' gwnen'." ²¹ Na' lecz ca' bene' bži'e chenna' yodaon' na' yeso' ša' ca' bosochine' gan' gosonxene' Diosen'. ²² Ley dan' bzoj Moisésen' nžian bia' gwže'e bxozen' chen lo yogo'ze bi da' chosochine' cont yesyeyaquen xilaže' lao Diosen'. Na' leyna' lecze žan še bina' lalj chen, Diosen' bi yezi'xene' xtoła' beñachen'.

Criston' gote' blalj xchene' cont beque'e xtoła' bene' chesejnilaže'ne'

²³ Can' goc benen byen bosožie' xchen beyixe' lo' yodaon' na' lo da' ca' bosochine' yodaon' cont gosonen žin lao Diosen', na' yodaon' naquen con to l gua'a lsaca' da' chzejni'in can' nac yaban'. Perw da' de yaban' byažjen to chen da' zaca'ch. ²⁴ Na' gan' gwyo'o Criston' gague naquen to yodao' da' naquen con to l gua'a lsaca' cont nezecho can' nac yaban'. Le' beyepe' yaban' na' gwyo'e gan' zoa Diosen' cont chne' gualaz chio' lagüen'. ²⁵ Bxoz blao che bene' Israel gualaz checho ca' cheso'e yodaon' tni'a tgüiz gan' nzi' Latje gan' Zoa Dios na' chosoži'e chen che beyixe', perw Criston' bi bnežjw cuine' zan ni'a gosote'ne'. Tni'aze blalj xchene' neche xtoła' beñachen'. ²⁶ Šaca' byažjen blalj xchene' zan ni'a, ba gote' zan ni'a gwzolaon cate' gwxete yežlion', perw bi benen byen gac che' ca'. Bedelalj xchene' tni'aze cate' gwna Diosen' ba bžin ža che', cont chac cheque'e xtoła' beñach. ²⁷ Na' can' chac che beñachen', žin ža gat to toe' na' te yesate' nach na Diosen' che to toe' še yezezaca'zi'e o še yesenite' mbalaz. ²⁸ Na' can' yesat beñachen' tni'aze, ca'cze bnežjw cuin Criston' tni'aze gosote'ne' cont chac cheque'e xtoła' beñachen'. Nach žin ža yide' da' yoble perw gague cont yeque'e xtoła' beñachen', san cont yeche'e bene' ca' chesebeze' batcan' yide' nach nite' mbalaz len le'.

10

¹ Ley da' bzoj da' Moisésen' len costumbr da' nžian bia' goncho cate' gonx-encho Diosen' bzejni'in chio' late'lasze che da' güen da' ba chac checho na'a ba bid Criston'. Perw leyna' bi goc yocoben yichjlaždao' bene' ca' gosejnilaže' Diosen' la'czla' gosote' beyixe' yogo' iz. ² Šaca' yichjlažda'ogaque' beyaquen güen cate' gosote' beyixe' ca' na' cate' bxoz ca' bosožie' legaque' xchemban' neche xtoła'gaquen', ba gwnitlao xtoła'gaquen' to ši'ize šaca', na' bich bi yesacde' lo' yichjlažda'ogüen' che da' xinjen' chesonen'. ³ Perw da' chesote' beyixe' ca' na' bichle da' chesone' neche xtoła'gaquen' to to iz, bi chac yesanlaže' zjanape' dola'. ⁴ Le xchen no go'n dao' no šib dao' bi gac yeca'an xtoła' beñach.

⁵ Da'n'an' cate' Criston' bide' yežlio nga gože' Diosen':

Dan' chesote' beyixe' na' dan' chjasesane' bichle da' chjasesane' laguo', gague da' can' zelažo'.

Zelažo' gwnežjw cuina' gona' can' chazlažo', le da'n'an' beno' cont golja beñach.

⁶ Da' chesote' beyixe' chosozeye'ba' laguo' na' yogo' da' ca' chesone' cont yezi'xeno' xtoła'gaquen', gague da' can' chbedo'.

⁷ Da'n'an' gwnia' can' nyoj le'e libr gan' žan: "Dios chia', za'a nga zedeyena' con can' chazlažo'."

⁸ Zgua'tec Criston' gože' Diosen': "Dan' chesote' beyixe' na' dan' chjasesane' bichle da' chjasesane' laguo', na' dan' chosozeye' beyixe' cont yezi'xeno' xtoła'gaquen', gague da' can' zelažo' na' gague da' can' chbedo'", la'czla' leyna' nžian bia' yogo' da' ca'. ⁹ Nach Criston' gože' Diosen': "Za'a nga zedeyena' con can' chazlažo'". Da'n'an' nezecho ba bzoe' to šla'ale dan' bžie' bia' gotcho beyixe' cont yezi'xene' xtoła'chon', na' gualaz len, blalj xchen Criston' cont

beque'e xtoła'chon'. ¹⁰ Na' da' ben Jesucriston' con can' gwyazlaže' Diosen' cate' bnežjw cuine' gosote'ne' tni'aze cani', da'nan' ba beyac yichjlažda'ocho xilaže' lao Diosen', chio' chejnilaže'chone'.

¹¹ To to bꝛoz che bene' Israel gualaž checho ca' con nita'cze' chesotcze' beyixen' tꝛa tꝛa na' chosoži'e xchemba' can' ža leyna' cheyala' yesone', la'czla' xchen beyixen' bi gac yeca'an xtoła' benachen'. ¹² San Criston' tni'azen' bnežjw yela' mban che' na' zaca'czen cont yeca'an xtoła' benachen' toli tocanē. Na' beyož bnežjw cuine' zjaychi'e gan' chnabi'e txen len Diosen'. ¹³ Na' zoe' chbeze' žin ža yosozexjw yichj yogo' bene' chesegue'e le' na' yosozenague' che'. ¹⁴ Na' da' bnežjw cuin Criston' tni'aze cani', bene' cont chio' naccho lo na' Diosen' beyac lažda'ochon' xilaže' toli tocanē. ¹⁵ Na' Spiritw che Diosen' lecze benen cont nezecho naquen ca', le nyojen, žan:

¹⁶ Quinga gona' gaclena' legaue' cate' žin ža,
gona' cont šo' yichjgaue' da' nžia' bia' yesone',
na' gona' cont yesyebeden' lo' yichjlažda'ogaquen',
can' ža Xancho Diosen'.

¹⁷ Na' nyoj yeto da' ža Spiritw che Diosen', žan:

Na' bich gona' cuent še bi da' malen' ba gosonen' o še bi xtoła'gaue' ba gota'.

¹⁸ Na' cate' ba gwnitlao xtoła'chon' bich chyažjen gotcho no beyixe' neche xtoła'chon'.

Cheyala' soacho gonxencho Diosen' neca žebcho

¹⁹ Bene' migw, nezecho gac šo'cho gan' zoa Diosen' neca žebcho, le Jesucriston' blalj xchenen' na' beque'e xtoła'chon'. ²⁰ Guac nacho gwsaljue' to nez cobe, to da' chonen chio' yela' mban toli tocanē, le da' bnežjw cuine' gote' neche chio', guac šo'cho gan' zoa Diosen' na' bich naquen ca' part yodaon' da' ngaše' len lache' da' ze gan' nono gac šo'. ²¹ Na' zoa bꝛoz blao chechon' naque' bene' zaca'chgua, na' naque' Xan yogo' chio' gwlej Diosen' cont chejnilaže'chone'. ²² Da'nan' cheyala' soacho gonxencho Diosen' do yichj do laže'cho neca žebcho, na' cheyala' soacho šejle'cho xchen Jesucriston' ba beca'an xtoła'cho, le nezecho ba gwzoacho nis da' chejnilaže'chone'. ²³ Na' can' gwzolaocho be'cho diža' gwnacho šjayzoacho len Diosen', ca'cze cheyala' goncho bate'teze, na' da' li šjayzoaczcho len Diosen', le zoacze' chone' con can' gwnen'. ²⁴ Lecze cheyala' yeyiljwlaže'cho nacle gaclen lježcho cont gaquech lježcho tocho yetocho na' gonchcho da' güen. ²⁵ Na' bi cuejyichjcho da' chdop chžagcho txen chonxencho Diosen' ca' chesebejyichj bal' bene'. Cheyala' neyoe lježcho soaczcho šejnilaže'cho Criston', na' gonchcho ca' na'a ba nacbia' ba zoa te che yežlion'.

²⁶ Še ne' chontezechcho da' xinj la'czla' ba nombia'cho diža' li che Criston', bibi de bichle da' gon žin cont nitlao xtoła'chon'. ²⁷ Na' cheyala'cze žebcho gon Diosen' cont saca'zi'cho še ca', na' yeyejcho lo yi' gabilen' gan' cuiayi' yogo' bene' chesegue'e Diosen'. ²⁸ Cani' da' xozxta'ocho ca' gosote' note'teze bene' bi bzenague' che ley da' bzoj da' Moisésen', bi besyeyaše'de' legaue', con še gwnita' chope o šone bene' toz can' goso'e diža' che da' xinjen' none'. ²⁹ Na' da' mal juisyoch gac che chio' še gue'echo Xi'in Diosen' na' gaquecho bibi zaca' xchen Criston' da' blalje' cont beque'e xtoła'chon' na' še necho che Spiritw che Dios ben' nži'ilaže'de' chio'. Le da' blalj xchen Criston' gwzolao chac da' cobe da' gwna Diosen' gone' gaclene' bene' yesejnilaže'ne'. ³⁰ Nombia'cho Diosen' na' nezecho len' gwne': "Neda' yoži'a che da' mal da' chesone' na' neda' gona' cont yesezaca'zi'e." Na' lecze nyojen žan: "Xancho Diosen' chogbi'e nac gac che bene' ca' ba gwque'e ca' xi'ine'." ³¹ Na' leca naquen da' žebcho še cuejyichjcho Diosen' ben' zoa toli tocanē, le gone' cont saca'zi'cho toli tocanē.

³² Perw le šjayza'laže' can' bchejele da' zan da' gwdi gwxaca'le cate' beyož gwyo'o be'ni' che Criston' lo' yichjlažda'olen'. ³³ Tgüejje gosezi'diže' le'e lao yogo' bene' yež na' tgüejje cate' gosotlate' le'e na' bichle da' bosochi bososaque' le'e, na' da' juisyw da' goquele cate' gosonde' bene' lježle ca'. ³⁴ Beyaše'le bene' lježcho ca' bene' gosata' ližya na' goclenle legaque', na' gwzoale mbalaz la'czla' bene' besegue'e le'e goseque'e bi da' gota' chele, le nezele de da' zaca'ch chele yaban' da' bi te chen. ³⁵ Da'nan' bi cuejyichjle da' chejnilaže'le Diosen', neca žeble, le žin ža cate' soachguale mbalaz. ³⁶ Cheyala' gwyo gwchejle cont yeyož gonle yogo'lol da' chnalaže' Diosen', na' tena' gone' cont soale mbalaz toli tocaņe can' gwne'. ³⁷ Can' nyoj Xtiža' Diosen', žan:

La' žinte ža yid ben' sela' gan' zoalen', bich šede'.

³⁸ Na' xi'ina' bene' zjanac bene' güen len neda' yesata' yela' mban che' toli tocaņe da' chesejnilaže' neda'.

Na' še bich yesejnilaže' neda', bich yebeda' legaque'.

³⁹ Perw chio' bi naccho ca' bene' ca' bich yesejnilaže'ne', bene' yesebiayi'. Chio' zoaczcho chejnilaže'chone' na' šjayzoacho len Diosen' toli tocaņe.

11

Da' chejnilaže'cho Diosen' naquen to da' zejen

¹ Še chejnilaže'cho Diosen' nezecho gac da' güen da' chbezcho gac, na' nezecho gon Diosen' gac can' že' da' biņa' le'echo. ² Bal' bene' gwlas ca' bebe Diosen' legaque' da' gosejnilaže'ne'.

³ Da' chejnilaže'chone' chejle'cho con gwņie' na' goc yaban' len yežlion'. Na' bibi bchine' da' le'echo cate' bene' yogo' da' ca' chle'echo.

⁴ Cani' da' xoxxta'ocho Abel gwejnilaže' Diosen' na' da'nan' bnežjue' Diosen' to da' gocch da' güen ca' da' bnežjw bene' biše' Caín. Na' dan' bebe Diosen' dan' bnežjw Abelen' le', da'nan' gwneze Abelen' naque' bene' güen len Diosen'. Na' la'czla' ba got Abelen', da' gwzoe' gwejnilaže' Diosen', naquen ca' to da' chņeyoen chio' soaczcho šejnilaže'cho Diosen'.

⁵ Na' lecze da' xoxxta'ocho Enoc gwzoe' gwejnilaže' Diosen', na' da'nan' Diosen' bezi' beque'ene' šlac ne' mbane'. Bi gote', con noch no ble'e le'. Na' nyoj Xtiža' Diosen', žan Diosen' bebede' Enoquen' šlac gwzoe' yežlion'. ⁶ Na' Diosen' bi chebede' note'teze bene' bi chejnilaže'ne'. Le note'tez bene' yol güiže' Diosen' cheyala' šejle'e zoacze Diosen' na' šejle'e gwnežjue' yela' mban toli tocaņe che note'tez bene' nabden' le' do yichj do laže'.

⁷ Na' ca' nac da' Noé, lecze gwejnilaže' Diosen', na' cate' Diosen' bosņisde' le' can' za' gac, gwejle' Noén' can' gož Diosen' le', na' do bžebe' bene' to barcw gan' gwyo'e len bene' lo' yo'o che' ca' cont bi gosate' lo' nisen'. Na' da' gwejle' Noén' can' gwna Diosen', blo'ede' yezica'chle bene' že' na' zjanape' dola' da' bi bosozenague' che Diosen'. Na' lecze da' gwejnilaže' Diosen', goc gwna Diosen' naque' bene' güen len le'.

⁸ Da' Abrahanna' lecze gwejnilaže' Diosen'. Da'nan' bzenague' cate' bol güiž Diosen' le' na' gože'ne' šeje' ga de to yežlio zito' da' gaquen che'. Na' gweje' la'czla' bi nombi'e latjen'. ⁹ Na' Abrahanna', da' gwejnilaže' Diosen' jasoe' laž bene' zito' da' gwna Diosen' gac che' na' gac che xi'in diaža che'. Gwzoe' lo' yo'o de lache'ze na' lecz lo' yo'o de lache'ze gwnita' xi'ine' Isaaquen' na' xi'in xesoe' Jacob bene' lecze gož Diosen' gac yežlion' chegaque'. ¹⁰ Abrahanna' gwzoe' gwleze' ca' lo yežlion', le gwnezde' žin ža šjayzoe' gan' zoa Diosen' gan' naquen to ciuda güen da' bi te chen, ciuda da' ben Diosen'.

¹¹ Na' Saran' no'ol nac no'ol che Abrahanna', la'czla' naque' bene' güiž na' naque' bene' gole par soa xi'ine', Diosen' bene' to yela' guac cont gwzoe' xi'ine',

le gwyejle'e gon Diosen' con can' gwne' gone'. ¹² Ca' goquen' gwzoa bi' che da' Abrahanna' la'czla' goque' bene' gole par soa xi'ine', nachen' xi'in diaža che' gosaque' bene' zan can' zjanac beljw ca' na' can' nac yox da' chi' cho'a nesdaon' da' nono chac gwlab.

¹³ Yogo' bene' ca' ne' chesejnilaže' Diosen' cate' bžin gosate'. Na' la'czla' bina' gac lo na'gaque' dan' gože' legaque' gac chegaquen', bi gosacžejaže', san gwnite' mbalaz gosejle'e gwžin ža gon Diosen' can' gwnen'. Goso'e diža' zjanaque' ca bene' zito' len bene' že' lo yežlion' na' bibi lažgaque' de lo yežlion'. ¹⁴ Na' da' goso'e diža' bibi lažgaque' de yežlion', nacia' gosezelaže' yesyežine' ga yoble gan' gac lažgaque'. ¹⁵ Šaca' gosone' xbab che yežen' gan' gosaljen' naquen lažgaque', gota' latje jaya'aque' šaca', perw bi gosone' xbaben' ca'. ¹⁶ Gosezelaže' yesyežine' yaban', le gosejle'e na'len' nac lažgaque', na' gosenezde' nacchen güench ca yežlion'. Da'nan' Diosen' bi cheto'ede' chegaque' že' naque' Dios ben' chesonxene', na' ba benšagüe' to ciuda gan' zjanite'.

¹⁷ Na' Abrahanna' da' gwyejnilaže' Diosen' da'nan' bzenague' cate' Diosen' bene' le' prueba gože'ne' cheyala' got xi'ine' Isaaquen' lao Diosen' cont gonxene'ne'. Ba zoa gote' xi'inen' la'czla' gwnezde' Diosen' gože'ne': ¹⁸ "Gona' cont nita' xi'in diaža chio' bene' yesac xi'in diaža che Isaaquen'." ¹⁹ Da' Abrahanna' bechoglaže' gote'be', le gwnezde' Diosen' chac chosbane' bene' guat. Perw na' Diosen' bi be'e latje gote'be'. Da'nan' guac nacho bosbane'be' ladjo bene' guaten', la'czla' gague gotbe'.

²⁰ Gwdechle Isaaquen' gwyejnilaže' Diosen'. Da'nan' gwñabde' Diosen' gone' güen len xi'ine' Jacob na' Esau. ²¹ Lecze da' Jacoben' gwyejnilaže' Diosen'. Da'nan' cate' ba zoa gate', gwñabde' Diosen' gone' güen len xi'in xesoe' ca' bin' gosac xi'in da' José. Na' bcheque' yichje' benxene' Diosen' nchiše'teze' carrot che'. ²² Na' da' Josén' gwyejnilaže' Diosen', na' gwyejle'e žin ža yesyechoj bene' gualaž che' ca' Egipton' can' gwna Diosen'. Nachen' cate' ba zoa gate' bžie' bia' yesyeyo'e žit beñat chen' cate' yesyeya'aque'.

²³ Cate' golje da' Moisésen', da' leca gosejnilaže' xaxne'en Diosen', bi be-sežebe' yesyedabague' dan' bžia bia' reyen' yesone', gwne' cheyala' yesote' bi' byo chegaque' ca'. Šone bio' bosocuaše'be' ližgaquen', le gosacde' nacchguabe' xdan. ²⁴ Nach bi' no'ol che rey beque'ebe' boscha'ogüe'be'. Perw cate' ba gwcha'o da' Moisésen' bžone' yesone' le' ca' xi'in bi' no'ol che rey che Egipton', le gwyejnilaže' Diosen'. ²⁵ Da'nan' gwyazlaže'che' bžaglagüe' txen len bene' gualaž che' ca' yogo' dan' bososaca'zi' bene' Egipto ca' legaque', clal ca' gone' txen len bene' Egipto ca', le gocbe'ede' yob te che yela' chebe che da' xinj ca' cheson legaque'. ²⁶ Goclaže' bžaglagüe' can' bžaglao Criston' cont bene' can' gwyazlaže' Diosen', bi gwzelaže' gac che' yogo' yela' gwñi'a da' de che bene' Egipto ca', le gwnezde' gwžin ža gon Diosen' cont soe' mbalaz. ²⁷ Na' da' gwyejnilaže' Diosen', bi bžebe' rey cate' bžin ža besyechoje' Egipton' la'czla' reyna' bža'achgüe' legaque', con gwzoacze' bzenague' che Diosen'. Gwnezde' zoacze Diosen' la'czla' bi chle'echone'.

²⁸ Nach Moisésen' da' gwyejnilaže' Diosen' bžie' bia' da' xozxta'ocho ca', bene' že' to to yo'o gosote' to xila' dao' na' bosoži'e xchemban' ližgaquen', cont angl bene' nsa' yela' got bibi goc gonde' bi' byo nechw lo' to to yo'o. ²⁹ Na' da' xozxta'ocho ca' gwnita' cani', da' gosejnilaže' Diosen' da'nan' Diosen' bene' cont Nisdao' Xnan' goquen' chople, na' bla' yo biž gacholen cont goc goselaguen'. Perw bene' Egipto ca' cate' gosaclaže' leze yeselague' nesdaon', bocuaše' nisa' gan' chesedien', na' gosate' gose'eje' nisen'.

³⁰ Lecze da' gosejnilaže' da' xozxta'ocho ca' Diosen', da'nan' Diosen' bene' cont bebix ze'e da' gwyechj doxen ciuda Jericó cate' gosechje' ze'en yogo' ža lao gaže ža. ³¹ Na' da' no'olen' le' Rahab, no'olen' goque' no'ol zle', lecze gwejnilaže' Diosen', na' da'nan' bi gwžiaye'e txen len yezica'chle bene' Jericó bene' bi bosozenague' che Diosen', le blebe' chop da' xozxta'ocho ca' ližen' cate' jasegüia jaseñe'e lažen'.

³² Ba gwnita'ch bene' zan bene' gosejnilaže' Diosen', perw bi de tiemp gua' diža' che da' ben' gože' Gedeón, che da' ben' gože' Barac, che da' ben' gože' Sansón, che da' ben' gože' Jefté, che da' rey David, che da' Samuel, na' che yezica'chle bene' goso'e xtiža' Diosen' cani'. ³³ Da' gosejnilaže' Diosen' besechoje' gosone' gan cate' gosedile' len no rey, na' bale' gosaque' bene' gwnabia' na' gosone' byen goson bene' yoble da' güen, yebale' besele'ede' ben Diosen' bi da' güen da' gwne' gone' len legaque', yebale' Diosen' bene' cont bež znia bi gosagwba' legaque' na' bi gosoneba' legaque' zi' cate' gosegüe'e legaque' gan' že'ban'. ³⁴ Lecze da' gosejnilaže' Diosen', bale' bi goseye' cate' bene' bosozale' legaque' lo yi', yebale' besyele' cate' bene' gosaclaže' yesote' legaque' len spada, yebale' beyon Diosen' legaque' bene' gual cate' bich zjanale', yebale' goclene'ne' gosaque' soldadw gual cont gosone' gan cate' soldadw bene' zito' gosedillene' legaque'. ³⁵ Na' gwnita' no'ol ca' da' gosejnilaže' Diosen' da'nan' Diosen' boshane' no bene' lo' yo'o chegaque' ladjo bene' guat ca'.

Na' gwnita' bene' yoble, da' gosejnilaže' Diosen' da'nan' gosate', bi gosaclaže' yesyele' lo na' bene' mal ca'. Goso'e latje bosochi bososaque' legaque', le gosenezde' gwžin cate' Diosen' yechis yosbane' legaque' ladjo bene' guat ca' cont yesenite' len le'. ³⁶ Gwnita' yebal bene' leca gosezi'diža' bene' legaque' na' leca goseyine' legaque', na' bosochije' legaque' gden na' goseyixjue' legaque' ližya. ³⁷ Na' bene' ca' besegue'e legaque' gosote' legaque', bale' bosochele' legaque' yej, yebale' bosozoxje' cuerp chegaquen' len sier, yebale' gosote' len spada. Na' bal bene' ca' gosejnilaže' Diosen' benen byen gosaše' yixe' zjanyaze' no xa xila' no xa šib. Bibi gota' chegaque', leca nyaše' gosac chegaque' catec bosochi bososaca' bene' legaque'. ³⁸ Gosaš goselaže' do latje daš, do ya'adao', do ga ze bloj na' ga zoa no liž beyixe'. Yogo' da' ca' goc che bene' ca' gosejnilaže' Diosen', la'czla' zjazaca'chgüe' na' bene' že' yežlio nga bi zjazaque' yesenite' txen len legaque'. ³⁹ Diosen' bebede' yogo' bene' ca' da' gosejnilaže' le', perw šlac gosenite' bina' gone' yogo' da' güen da' gwne' gone' che xi'in diaža che da' Abrahanna'. ⁴⁰ Le goclaže' gone' ga gac che chio' zoacho na'a yogo' da' güen da' gwne' gone', cont txen len bene' ca' gosejnilaže'ne' cani', yeyož gaccho can' chazlažen'.

12

Cheyała' soacho goncho xbab che Jesúsén'

¹ Nezecho ba gwnita' bene' zan gosone' da' güen neche da' gosejnilaže' Diosen', na' dan' gosonen' chzejni'in chio' can' cheyała' goncho. Da'nan' cheyała' gwzoacho ca'ale še bi da' chžonen goncho can' chazlaže' Diosen' na' cuejyichjcho bi da' xinj da' choncho, le da' xinjen' chziye'czen chio'. Na' cheyała' soatezcho goncho can' ža Diosen' sin cbi yeche'echo. ² Jesúsén' bene' cont gwzolao chejnilaže'cho Diosen' na' gaclene' chio' cont soaczcho šejnilaže'chone' yežintecho gan' zoe'na'. Na' cheyała' soacho goncho xbab ca' Jesúsén' byo bcheje' len da' gwdi gwxaque' cate' gosote'ne' le'e yag cruzen'. Bi bžone' yesonde' le' da' zan da' naquen da' zban juisyw, le gwnezde' za' gon Diosen' cont soe' mbalaz len le'. Na' na'a Jesúsén' ba chi'e chnabi'e txen len Diosen'.

³ Cheyala' goncho xbab can' byo bchejlaže' Jesús'en' len yogo' da' ca' gosone bene' mal' ca' le' na' bene' can' gwna Diosen'. Na' ca'cze cheyala' gwyo gwchejlaže'cho goncho can' chazlaže' Diosen' la'czla' še chaquechon zdebe; bi cheyala' yeche'echo. ⁴ Da' zan da' ba bžaglaole chdillenle da' malen', perw bina' lalj xchenle na' bina' yesote' le'e. ⁵ ¿Ba gonlaže'le can' ža Diosen' chneyoede' chio' can' chon bene' chneyoe xi'ine'? Nyoj xtiže'na', žan:

Xi'indagua', bi gacdo' bibi zejen da' chnežjo Xancho Diosen' le' da' saca'zi'o' cate' chono' bi da' xinj,
na' bi gaco' tole cate' chdile' le'.

⁶ Le Xancho Diosen' chzejni'ide' yogo' bene' chacde',
na' chnežjue' da' saca'zi' yogo' bene' ba gwque'e ca xi'ine' cate' chesone' da' xinj.

⁷ Cheyala' gwyo gwchejlaže'cho cate' Diosen' chone' chio' da' saca'zi'cho, le chonde' chio' ca beñachen' chonde' xi'ingaque'. Le yogo'ze bidao' chnežjo xaben' lebe' castigw cate' chontezbe' da' xinj. ⁸ Na' še bi chon Diosen' da' saca'zi'cho cate' chontezcho da' xinjen', zeje diža' bi naccho xi'ine', le yogo' bene' ba gwque'e ca xi'ine' chnežjue' da' yesezaca'zi'e cate' chesontezbe' da' xinjen'. ⁹ Yogo' xaxna'cho bososgole' chio' yežlio nga na' gosone' castigw checho cate' bi da' xinj bencho, na' nezecho ca'cze cheyala' yesone'. Nacchxe cheyala' gwzenagcho che Xacho Diosen' bite'teze da' chzejni'ide' chio', cont šjayzoacho len le' toli tocanē. ¹⁰ Na' xaxna'chon' to chop izzen' šlac bososgole' chio' gosone' castigw checho con ca gosaclaže'. San Diosen' nezde' bi da' nac güen par chio', na' chdile' chio' na' chone' da' saca'zi'cho cont gaclenen chio' soacho goncho da' güen na' gac lažda'ochon' xilaže' can' nac lažda'ogüen'.

¹¹ Na' bite'tez da' chyi chzaca'cho, šlac chaquen bi chazlaže'chon, perw cate' ba gwden chaclenen goncho da' zej to licha na' chaclenen soacho binloch len xbab da' yo'o lo' yichjlažda'ochon'.

Diosen' gone' da' saca'zi'cho še bi gwzenagcho che'

¹² Da'n'an' le soa le gon can' chazlaže' Diosen' sin cbi yeche'ele. ¹³ Le soa le gon da' güen cont gaclenle bene' ca' ne' chesacžejlaže' naquen' yesone' cont legaque' yosozenagche' che Diosen' na' bi yesebejyichje' xtižen'.

¹⁴ Le yeyiljwlaže' nacle gonle soale binlo len yogo'cze bene', na' le gwzenag che Diosen' cont gac lažda'olen' xilaže', le nono yežin gan' zoa Diosen' še bi nac lažda'ogüen' xilaže'. ¹⁵ Le gaclen lježle cont ne tole bi ganlaže'le catequen' nži'ilaže' Diosen' chio', le cate' chzola'ochon' choncho güedenag len Diosen', bedao' chča'o chxenen na' guacte gonen cont bene' zan yesonche' da' xinj. ¹⁶ Bi gata'lenle bene' byo bi nac bene' chele o no'ole bi nac no'ol chele. Na' bi gue'ele da' naquen da' zaca' len Diosen' can' ben da' bene' gože' Esaú, ben' bše'ede' to platw yela' guagw da' cheyala' gwnežjo Diosen' le' dan' golje' goque' bene' nechw. ¹⁷ Nezele gwdechle goclaže' yeyac lo ne'e da' bdie' lo na' bene' biše', perw bich bi goc bi gone' cont yeyaquen lo ne'e la'czla' gwcheže' catec gwzelažen'.

¹⁸ Nža'le chac che chio' na'a na' can' goc che da' xozxta'ocho cani' cate' Diosen' bnežjue' legaque' ley chen'. Cate' betje' lo ya'a Sinaí gwyechj yi' bel' ya'ana', gwxoan žen, beyaquen chol, na' gwyechjchgua be'. ¹⁹ Gosende' gwchež to trompeta, na' gosende' be' Diosen' diža' len legaque'. Na' be-sežebchgüe' na' gosata'yoede' Moisés'en' bich güe'len Diosen' legaque' diža'. ²⁰ Besežebchgüe', le Diosen' ba gožle' legaque' še noe' yesebigue' lo ya'an cheyala' yesote'ne' yosochele'ne' yej, na' lecz ca' yesone' še len beyixe'. ²¹ Da' zaca' žebcho goc lo ya'an, lente da' Moisés'en' gwne': "Leca chaž chžeba' can' chaquen'."

²² Perw chio' chejnilaže'cho Criston' ba naccho txen len Diosen' ben' zoa toli tocaṇe na' len yogo' angl che' bene' že' yaban' chesonxene'ne', bene' zjanaque' bene' zan juisyw. Da'nān' guac ṇacho ba gwbiga'cho lo ya'a Sión dan' lecze nzin' ciuda Jerusalén da' chi' yaba gan' zoa Diosen'. ²³ Na' naccho txen len yogo'lolte bene' chesedop chesežag chesonxene' Jesucriston' gate'teze, bene' zjanyoj lagaque' le'e libr che Diosen' da' de yaban'. Na' yogo' chio' chejnilaže'chone' zaca'lebcho ca bi' nechw to lo' yo'o, bi' chzi' byen che xaxna'be', le si'cho da' güen da' gon Diosen' chio'. Na' naccho txen len Diosen' bene' choglaogüen' che yogo' beṇač še de xtolā'gaque'. Lecze naccho txen len bene' ca' ba gosat, bene' gosaque' bene' güen lao Diosen' da' gosejnilaže'ne', na' na'a ba beyož zjanacyaṇe' can' chaclaže' Diosen'. ²⁴ Na' naccho txen len Jesús ben' blalj xchene' cont gwzolao chac da' coben' da' gwna Diosen' gone' gaclene' beṇačhen'. Na' blalj xchene' cont ba bnitlao Diosen' xtolā' chio' chejnilaže'chone'. Da'nān' xchen Jesúsēn' zaca'chen ca xchen da' Abelen' da' gwllalj caten' betw bene' bišen' le'.

²⁵ Da' mal juisyw še goncho güedenag len Diosen' cate' chṇe' chio'. Bene' cont gosezaca'zi' da' xozxta'ocho ca' cate' gosone' güedenag len xtižen' da' gwṇelene' legaque' lo yežlion' cani', na' gonche' da' saca'zi' chio' še goncho güedenag len xtižen' da' choelene' chio' lo' lažda'ochon' zoe' yaba na'ate. ²⁶ Leca gwxo' cate' Diosen' betje' lo ya'a Sinaín' cont be'lene' da' xozxta'ocho ca' diža'. Na' na'a ba gwne': "Gwžin ža cate' gona' xo' yežlion' da' yoble, perw gague yežlio na'zen', san lente yogo' da' chle'echo le'e yaba." ²⁷ Na' da' gwne' gone' xo' da' yoble, zejen te che yogo' da' ca' ben Diosen' da' chle'echo, perw bi te che Diosen' na' che yogo' da' güen da' chone' da' bi chle'echo. ²⁸ Da'nān' cheyała' güe'cho yela' choxclen che Diosen' da' gone' cont šjayzoacho mbalaz txen len le' gan' chnabi'e, na' gague da' te che da' güen da' gac checho len le'. Nach leczecheyała' gache'echo bene' zaca'chgua nac Diosen' cont gonxenchone' do yichj do laže'cho can' chazlažen'. ²⁹ Cheyała' gwzenagcho chen', le Dios chechon' leca chgue'ede' da' malen', na' sele' lo yi' gabil bene' ca' bi yesyētinjde' che da' xinjen', da'nān' zaca'lebde' ca yi' bel.

13

Da' chazlaže' Diosen' goncho

¹ Bitw gwsanle gague lježle, le yogo'cho chejnilaže'cho Jesucriston' naccho ca biše' lježcho. ² Na' bi ganlaže'le cheyała' gwleble bene' za'ac zito' ližlen' bene' chesejnilaže' Jesucriston'. Bał xozxta'ocho ca' cate' bosolebe' bene' zito' ližgaquen' bosolebe' angl bene' gwseła' Diosen' nēca gosache'ede'.

³ Cheyała' gonle xbab che bene' lježcho ca' chesata' ližya cont gaclenle legaque'. Na' cheyała' gonle xbab can' gale'le šaca' chac chele can' chac che bene' ca'. Na' bi ganlaže'le bene' lježcho bi da' chosoči chososaca' bene' legaque', le šlac ne' mbancho, cuerp chechon' guac saca'zin' da' quinga. Na' cheyała' gonle xbab can' gale'le šaca' chac chele can' chac che bene' ca'.

⁴ Na' le'e nšagna'le, yogo'le le soa do laže'le len no'ol chele o bene' chele na' bi talenle bene' yoble, le Diosen' gone' saca'zi' bene' chesata'lene' no'ole bi zjanac no'ol chegaque' o bene' byo bi zjanac bene' chegaque'.

⁵ Bi cheyała' selaže'cho mechon', san cheyała' soacho becho bi da' dao' da' de checho, le Diosen' ba gwne' che to tocho: "Bi ganlaža' le' na' bi cuejyichja' le'." ⁶ Da'nān' bibi de da' žebcho, na' to tocho guac ṇacho:

Xāna' Diosen' zoe' chaclene' neda'.

Bi žeba' bi da' gone beṇačhen' neda'.

⁷ Le šjayze'e bene' gwnita' bosozejni'ide' le'e xtiža' Diosen'. Le gon xbab can' gosone' cont yogo'ze bene' gosache'ede' gosenite' gosejnilaže' Diosen', na' le nita' le šejnilaže' Diosen' can' gosonen'.

⁸ Na' can' nac yichjlaždao' Jesucriston' nej nase, ca'czen' naque' ža na'aža, na' ca'czen' gaque' toli tocanē. ⁹ Bi güe'le latje yeseziye' bene' le'e len bi diža' yoble da' chosozejni'ide', le nža' xen can' chososed chosolo'e bale'. Da' chon Diosen' lo' lažda'ochon' neche da' nži'ilaže'chgüede' chio', lenna' chaclenen chio', gague da' ca' chesena bene' cheyała' ye'ej gagwcho. Na' ca' nac da' ca' chesene' cheyała' ye'ej gagwcho cont yebe Diosen' chio', biņa' yesaclenen bene' ca' chesene' cheyała' gagwchon, na' neca gaclenen chio'.

¹⁰ Xancho Jesucriston' bnežjw cuine' gosote'ne' neche chio', na' da' chejni-laže'chone' ba gwnitlao xtoła'chon'; perw bene' ca' ne' chosolalje' xchen beyixē' na' chosozeye'ba' cate' chesenabe' yezi'xen Diosen' chegaque', da' got Jesucriston' bi chaclenen legaque'. ¹¹ Nezecho tni'a tgüiz bene' nac bχoz blao che bene' Israel gualaž checho ca' chesote' beyixē' na' chjasesane' xchemba' lo' yodao' gana' nzi' Latje ga Zoa Dios cont chnabde'ne' yezi'xene' xtoła' yogo'lol gaque'. Nach yezica'chle bχoz ca' chosozeye' cuerp che beyixē' ca' cho'a yežen'. ¹² Na' ca' ca'le goc che Jesúsēn' dan' gosote'ne' cho'a ciuda Jerusalēnna' cate' bnezjw cuine' cont beque'e xtoła'chon' len xchene' dan' blaljen'. ¹³ Da'nān' cheyała' šejnilaže'cho Jesúsēn' na' cuejyichjcho costumbr gol ca', la'czla' yeseque'e bene' chio' da' choncho ca'. ¹⁴ Gate'tez zoacho lo' yežlio nga da' te chen, perw chbezcho šjayzoalencho Diosen' lo' ciuda da' bi te chen. ¹⁵ Da' ba beca'a Jesucriston' xtoła'chon' cheyała' güe'cho yela' choxclen che Diosen' yešlale mbancho, gonxenchone' len xtiža'chon'. Lenna' da' chaclaže' Diosen' güe'chone'. ¹⁶ Na' cheyała' soacho goncho da' güen na' cheyała' gwnežjwcho con gaca'te da' saque' gwnežjwcho gaclencho bene' bi de chegaque', le chazlaže' Diosen' cate' chonxenchone' choncho ca'.

¹⁷ Le gwzenag che bene' chososed cheselo'ede' le'e xtiža' Diosen' na' le güe' latje yesene' naquen' gonle, le chosogüia chesene'e le'e cont chesaclene' le'e len yichjlažda'olen', na' legaque' cheyała' yosyodie' cuentlao Diosen' še naquen' ba gosone'. Le gwzenag chegaque' cont yesyebede' na' cont da' chesone' bi gaquen to da' zdebe, le še gonle güedenag len legaque', bibi da' güen chga'an chele še ca'.

¹⁸ Le nab cont gaclen Diosen' neto'. Nezeto' chonto' can' chazlaže' Diosen' na' chaclaže'to' gonto' con da' naquen güen. ¹⁹ Na' leca chata'yoeda' le'e yol güižle Diosen' nable yob gac yidcha' gan' zoalen'.

Chnabe' gaclen Diosen' legaque'

²⁰ Na' na'a zoa Diosen' chone' cont zoa chbezcho binlo len xbab da' yo'o lo' yichjlažda'ochon'. Len' bechis bosbane' Xancho Jesucriston' ladjo bene' guat, le da' blalj xchenen' le'e yag cruzen' gwzolao chac da' cobe da' gwna Diosen' gone' gaclene' bene' yesejnilaže'ne'; na' gague da' te che dan' gwne' gonen'. Na' da' nži'ilaže' Xancho Jesucriston' chio', zaca'lebde' ca' to bene' güeye' xila' bene' chon da' güen juisyw len be che' ca'. ²¹ Na' chnabda' Diosen' gaclene' le'e bite'tez da' chyažjele cont soale gonle yogo'te da' güen can' chazlažen', na' gone' cont gac yichjlažda'ochon' cayanen' chaclaže' lagüe da' nombia'cho Jesucriston'. Le gonxen Jesucriston' toli tocanē. Na' ca' gonšcaczcho.

²² Bene' migw, chnabšca' bi gaquele zed da' ba bzoja' le'e chneyoeda' le'e nga, le bitec naquen da' tone. ²³ Na' chzenda' le'e bene' migw checho Timoteon' ba bechoje' ližyan' na' chbeza'ne' nga. Na' še yob yele'e nach chi'ane' cate' yedeņa'a le'e.

²⁴ Ca nac neda', chguapa' tiox bene' blao ca' chosozejni'ide' le'e na' chosogüia chesene'e le'e, na' lecze chguapa' tiox yogo' nochle bene' chesejni-laže' Diosen'. Bene' lježcho ca' za'ac Italia lecze chosoguape' le'e tiox.

²⁵ Diosen' gaclenšque' le'e. Da' na'zen' chzoja'.

CART DAN' BZOJ SANTIAGO

Santiago'n' chguape' tiox bene' ca' zjanaslas zan yež

¹ Neda' Santiago naca' bene' güen žin che Diosen' na' che Xancho Jesucriston'. Chguapa' le'e tiox, le'e nacle šižinw cue' xi'in diaža che da' Israel, le'e chejnilaže'le Jesucriston' na' naslasle yežlion'.

Nac nezecho can' che'ne Diosen' goncho

² Bene' migw, cheyala' yebechgüecho cate' chac bite'teze da' chac checho. ³ Cate' chac bi da' chac checho chonen chio' prueba še gonchachlaže'cho šejnilaže'cho Diosen'. Na' nezecho cate' chonchachlaže'cho chejnilaže'chone', chaclenen chio' cont gapchcho yela' chxenlaže' len bite'teze da' chac checho. ⁴ Na' da'nan' cheyala' gaple yela' chxenlaže' bite'teze dan' chac chele na' gonchachlaže'le šejnilaže'le Diosen' cont gacle can' chaclaže' le'.

⁵ Note'tezcho cate' bi nezecho naquen' chaclaže' Diosen' goncho, cheyala' nabechone' gwzejni'iden' chio', na' gwzejni'iczeden'. Le chebede' chaclene' chio', na' bitw chdile' chio' cate' chnabechone' gaclene' chio'. ⁶ Perw cate' chnabechone' gwzejni'ide' chio', cheyala' šejle'cho chzenagcze' chechon' na' bitw gacžejlaže'cho. Bena' chacžejlaže' še chzenag Diosen' che', zaca'lebde' ca nisdao' dan' chas chata' cate' chechj be' lagüen' na' chjatan' nile na'le. ⁷ Ben' chacžejlaže' še chzenag Diosen' che', bitw cheyala' soe' lez gwnežjw Diosen' le' bite'teze da' chnabe'. ⁸ Na' ben' chon ca' bitw nezde' bi xbab chone', con šayichj šayen chaque' len bite'teze dan' chonen'.

⁹ Na' bene' migw, le'e chejnilaže'le Diosen', še nole nacle bene' yaše', le soa mbalaz, le nacle bene' zaque' len Diosen'. ¹⁰ Na' bene' migw, še nole nacle bene' gwni'a, le soa mbalaz dan' ba chache'ele lao Diosen' bitw zaca'chle clcl ca yezica'chle bene'; na' yob te che yela' gwni'an' can' chde che yej ca' zjaze yixe'. ¹¹ Cate' chna'chgua gwbižen' chesecquad yixe' ca', na' cheseyinj laga' che yejen' na' bich chosolo'en xdan. Can' chac len yej ca', lecze can' gac len bene' gwni'a ca', yeyol yenite' lao xšinen'.

Cheyala' soateze soacho šejnilaže'cho Jesucriston' bite'teze dan' chac checho

¹² Še chy chchejlaže'cho len da' chac checho na' chonchachlaže'cho chejnilaže'cho Diosen', nachen' leca mbalaz zoacho. Na' cate' te dan' chyi chzaca'chon', Diosen' gone' cont bancho len le' toli tocanē can' gwne' ban yogo'cho chaquechone'. ¹³ Na' note'tezcho cate' žan goncho da' malen', bitw gac nacho Dios nan' chgo'oyele' chio' goncho da' malen', le Diosen' bitw chgo'oyele' bene' yesone' da' mal. Lecze ca' le', bitw bi de da' chgo'oyela' le' cont gone' da' malen'. ¹⁴ Yela' chzelaže' checho dan' yo'o lo' yichjlažda'ochon chonen cont chzelaže'cho choncho da' mal. ¹⁵ Na' še ba choncho can' ža yela' chzelaže' dan' yo'o lo' yichjlažda'ochon' na' zoacho choncho da' malen', nach gwžin ža cate' cuejyichj Diosen' chio' na' bitw šjayzoacho len le'.

¹⁶ Bene' migw, bitw siye' cuinle gonle xbab Dios nan' chgo'oyele' le'e cont gonle da' malen'. ¹⁷ Dios ben' zoa yaba, le'na' chsele' da' güen da' chac checho na' da' de checho. Xacho Dios ben' ben gwbiž, bio' na' beljw ca' cont chososenin' len chio', chone' cont gac güen checho, na' bitw chše'e ca chone' len chio', bia'cze zoacze' chone' güen. ¹⁸ Gwyazlaže' Diosen' bocobe' yichjlažda'ochon' cate' gwyejle'cho che diža' li chen'. Na' ba bocobe' yichjlažda'ochon' cont žialaocho len bene' nechw ca' chesejnilaže'ne'. Na' da' ba bocobe' yichjlaždao' chio', nezecho za' gone' ca' len bene' zan.

Can' goncho cont yebe Diosen' chio'

¹⁹ Bene' migw, nezele cheyala' yebecho gwzenagcho che diža' güen, na' cheyala' goncho xbab cate' za' necho, na' neca la' ža'atecho. ²⁰ Cate' chža'acho, bitw chac goncho güen can' chaclaže' Diosen' goncho. ²¹ Da'nan' cheyala' cuejyichjcho yogo'lol da' xinjen' ba benchon' na' yogo'lol da' chgue'e Diosen' da' gwcha'o gw Xenen lo' yichjlažda' ocho cate' bina' šejnilaže' chone'. Cheyala' gwzewjw yichjcho na' gwzenagcho diža' li che Diosen' dan' ba yo'o lo' yichjlažda' ochon', cont gata' yela' mban checho toli tocanē.

²² Na' cheyala' goncho dan' ža diža' li che Diosen' goncho, gague con yenezcho can' žanna'. Le še con chenecho can' žanna' na' bi chonchon, chziye'ze cuincho še ca'. ²³ Ben' chene diža' li che Diosen' na' bi chone' can' žanna', zaca'lebde' ca to bene' chna' cho'alagüen' lo spejw, ²⁴ le con chne'e can' nac cho'alagüen' na' cate' ba beyož gwne'en la' cheyanlažtie' can' naquenna'. ²⁵ Perw bene' zoacze' chzenague' xtiža' Diosen' do yichj do laže' na' chone' can' žanna' sin cbi yeyanlažen', benan' soe' mbalaz, le xtiža' Diosen' chaclenen le' bite'tez da' chone'.

²⁶ Note'tezcho še choncho xbab choncho can' chazlaže' Diosen', perw bi chnabia' cuincho cont bi necho diža' mal, chziye'cze cuincho še ca'. Le še xtiža'chon' bi naquen güen lao Diosen', bitw chebede' bite'tez dan' choncho še ca'. ²⁷ Še goncho can' chebe Xacho Diosen', gaclencho no'ole güezeb ca' na' bi' güezeb ca' še bi dan' cheseyažjde', na' cuejyichjcho bich goncho da' xinj dan' cheson bene' ca' bi zjanombia' Diosen'.

2

Toze can' cheyala' goncho len yogo' bene'

¹ Bene' migw, Xancho Jesucriston' naque' la'zelagüe bene' zaca', na' še chejnilaže' chone', toze can' cheyala' goncho len note'teze bene', bitw nacho balze bene' gonxenchguachone' na' yebale' gonechone' nacteze. ² Še yesela' chope bene' gan' chdop chžagcho chonxencho Jesucriston', na' toe' naque' bene' gwni'a na' nyaze' lache' šagüe' lache' xdan, na' ngo'o xbenen' to niy de oro, na' ben' yeto naque' bene' yaše' na' nyaze' lache' de'exo', toze can' cheyala' goncho len chope'. ³ Bitw naquen güen še gonxencho bene' gwni'a na'ze na' ye'chone': "Gwche'edo' lo yag siy nga ga nac binlo", na' ye'cho bene' yaše'na': "Gwzechateze do dan' na'le", o še ye'chone': "Gwche'etezdo' lo yo". ⁴ Bitw naquen güen lao Diosen' še cuinzcho choglaochon nacho noen' zaque' na' noen' bi zaca'. Xbab chechon' naquen da' mal še goncho ca'.

⁵ Bene' migw, Diosen' ba gwleje' zan bene' yaše' zjanaque' xi'ine' na' chesejnilaže' chgüe' le'. Na' yesenite' mbalaz cate' yesyežine' gan' zoen' chnabi'e, can' gwna Diosen' gac che note'teze chio' chaquecho le'. ⁶ Perw na' chonle bene' yaše' ca' ca' bene' bibi zjazaca'. Na' bene' gwni'a ca' chongaclene' ca' bene' zjazaca'chgua; len legaquen' chosoči chososaque' le'e na' cheseče'xoxje' le'e lao justis ca'. ⁷ Lecze legaquen' chosožie' yela' ya' che Jesucriston' ben' naccho txen, ben' naque' bene' zaca'.

⁸ Ley dan' nac da' žialao lao yogo' da' ca' nyela' le'e Xtiža' Diosen' žan: "Le gague ljež benachle ca' chaque cuinle." Še da' licze chonle can' žanna' chonczele güen. ⁹ Perw ley che Diosen' chchoglaon chele napple doła' še chonxenle bal bene' na' yebale' chongaclene' ca' bene' bibi zaca'. ¹⁰ Can' naquen, note'teze bene' zoe' chone' dołol can' ža leyna', perw na' še ba gwchoe' to da' dao', len doxen leyna' chape' doła' še ca'. ¹¹ Diosen' ben' gwna: "Bitw gata'lenle no'ole bi nac no'ol chele o bene' byo bi nac bene' chele", leczen' gwne': "Bi gotle bene'". Na' la'czla' bitw chata'lencho no'ole bi nac no'ol checho o bene' byo

bi nac bene' checho, še ba naccho bene' güet bene', bia'cze napcho doła' len leyna'. ¹² Xtiža' Diosen' chaclenen chio' cont bi gwzenagcho che da' malen'. Na' cheyala' güe'cho diža' güen na' soacho goncho bichle can' žanna', le Diosen' gone' da' saca'zi'cho še bi choncho can' žanna'. ¹³ Diosen' gwnežjwchgüe' da' saca'zi' bene' ca' bi chesyeyaše' chesyezi'ilaže'de' ljež benače'. Perw bene' ca' chesyeyaše' chesyezi'ilaže'de' ljež benače', Diosen' yeyaše' yeži'ilaže'de' legaque'.

Bitwbi zejen še con žacho chejnilaže'cho Jesucriston'

¹⁴ Bene' migw, še to bene' že' chejnilaže' Jesucriston' perw bi chone' da' nac güen, bitwbi zejen že' ca'. Bitw chaclenen le' cont gata' yela' mban che' toli tocanē še con žaze' ca'. ¹⁵ Bal bene' lježcho bene' chesejnilaže' Jesucriston' bi de da' yese'ej yesagüe' na' bi de xalana'gaque'. ¹⁶ Na' še bitw gaclenchone' len dan' cheseyažjde', še con ye'chone': "Le šjaya'ac to šagüe' to güen na' Diosen' gaclene' le'e cont želele dan' chyažjelen'", bitwbi zejen dan' con nacho ca'. ¹⁷ Da'nān', še con žacho chejnilaže'cho Jesucriston' perw bitw choncho da' nac da' güen, bitwcze bi zejen dan' žacho chejnilaže'chonen'.

¹⁸ Nita' bene' chesene' guac yesejnilaže' Jesucriston' la ca yesone' da' nac da' güen. Na' lecze nita' bene' chesene' še chejnilaže'cho Jesucriston' cheyala' goncho da' nac güen. Na' žia' le'e, še nacho chejnilaže'cho Jesucriston' perw bitw choncho da' güen, bitw nacbia' še chejnilaže'chone'. Perw še da' li chejnilaže'chone' nach soacho goncho da' güen na' yesache'e bene' le chejnilaže'chonen'. ¹⁹ Chejle'cho toze Diosen' zaque' gonxenchone', na' ca'czen' cheyala' šejle'cho. Perw gague da' ca'zen' cheyala' goncho. Da' xigüe' ca' lecze chesejlen' toze Diosen' naque' bene' zaca' na' chesexizen chesežeben. ²⁰ Chnecho diža' da' bi zejen še con žacho chejnilaže'cho Jesucriston' na' bitw choncho da' güenna', le bi gaclenen chio' še con žazcho chejnilaže'chone'. ²¹ Da' xozxta'ocho Abrahanna' blo'e le gwyejnilaže' Diosen' dan' bzenague' che Diosen'. Da'nān' bzande' xi'ine' Isaaquen' gote'be' cont gonxene' Diosen'. Na' dan' bzenague' che Diosen', da'nān' Diosen' gwne' che' le naque' bene' güen len le'. ²² Na' nezecho can' ben da' Abrahanna', gague con gwyejnilaže'ze Diosen', san lecze bzenague' che'. Na' dan' bene' ca' blo'e le gwyejnilaže' Diosen'. ²³ Da'nān' goc can' nyoj Xtiža' Diosen' che', žan: "Abraham gwyejnilaže' Diosen' na' da'nān' Diosen' gwne' naque' bene' güen len le'." Na' lecze nyojen che Abrahanna' goque' bene' xmigw Dios.

²⁴ Can' naquen, gague dan' žacho chejnilaže'cho Dios nan' že' naccho bene' güen len le', san dan' chzenagcho che', da'nān' že' naccho bene' güen len le'. ²⁵ Na' da' Rahab goque' no'ole zle' no'ol con gwyej len note'teze bene' byo, perw bzenague' che Diosen' cate' blebe' bene' ca' chope jasegüia jasene'e laže'na'. Na' blo'ede' legaque' yetole nez ga jaya'aque' cont bi jasyexen soldadw che rey legaque'. Na' dan' goclene' bene' ca', blo'e gwyejnilaže' Diosen'. Na' gwna Diosen' naque' bene' güen len le'. ²⁶ Quinga naquen: Še to bene' bich nye'e biš grasyw, nacbia' naque' bene' guat. Ca'czen' naquen, še bitw choncho da' güen nacbia' bitw chejnilaže'cho Diosen' la'czla' žacho chejnilaže'chone'.

3

Choncho da' xinj len xtiža'cho

¹ Bene' migw, nezecho neto' chsed chlo'eto' bene' yoble xtiža' Diosen' saca'zi'chto' še bi gonto' can' žanna'. Da'nān' žia' le'e, gague la' si'te lo na'le gwsed gwlo'ele bene' yoble xtiža' Diosen'. ² Zan ni'a yogo'cho choncho da' xinj. Perw še to bene' bitw chone' da' xinj len xtiže'na', nacchgüe' bene' güen

na' gwzoeczde' nabie' doxen cuerp chen' še ca'. ³ Caten' chgo'ocho freno cho'a cabayw ca' cont yosozenagba' checho, na' šja'acba' con gate'teze chaclaže'cho šejlenchoba'. ⁴ Na' ľecze bene' ca' chososa' barcw xen ca' chosochine' yag da'oze dan' chosose'eden' cont chejen con gate'teze chesende', la'czla' še chžiga' to be' gual ľegaquen'. ⁵ Ca'czen' naquen len ľože'chon'. Toze da' dao' rizen' naquen lao cuerp chechon', perw chac chnelenchon diža' da' zjazaca'. Na' ca' nac to yi' dao' riz, guac gwzeyen to ya'adao' xen, ca'czen' naquen len ľože'chon' cate' chnelenchon diža' mal. ⁶ Ľože'chon' naquen to da' chnabia' chonchguan da' xinj juisyw lao doxen cuerp chechon'. Ľože'chon' naquen ca' to yi' bel da' chla'an chca'an nile na'le chzeyen bite'teze da' de, ľe še choe'cho diža' malen' chyaľa'ch yogo'ľolte da' xinj dan' chonchon', na' chonen cont zoacho chonchguacho da' xinj yešlale mbancho. Na' che gwxiyen' chzenagcho caten' choe'cho diža' mal ca'. ⁷ Chac chnabia'cho yogo'te beyixe', be žia tap ni'a na', be žia xil, be chda nxobe ľe'e, na' be ca' že' ľo' nis. Ba gwnita' bene' gosnabi'eba'. ⁸ Perw ne to chio' bitw soecho ľože'chon' cont bi güe'lenchon diža' mal. Con zoacho choe'cho diža' malen', na' diža' mal dan' choe'chon' zaca'leben ca' venen che to bel znia. ⁹ Len xtiža'chon' chonxencho Dios ben' naque' Xacho. Na' ľecze len xtiža'chon' chžiacho yela' ya' che ľjež benačcho bene' ca' ben Diosen' can' nac ľe'. ¹⁰ Na' cho'acho na' chchoj diža' šagüe' cate' chonxencho Diosen' na' ľecze chchoj diža' mal cate' chžiacho yela' ya' che ľjež benačcho. Bene' migw, bitw choncho ca' cheyaľa' goncho. ¹¹ Nezecho ga chal nis bitw žia nis sia na' nis zbapj toz bej. ¹² Na' ľecze ca' bene' migw, nezecho to yag yixgüigw bitw chbian frut dan' nzi' aceituna, na' neca yag uvas chbian yixgüigw. Na' ľecze ca' ga chal nis, bitw chchoj nis sia to bej ga žia nis zbapj.

Can' goncho še Diosen' ba bene' chio' yela' sina' chen'

¹³ Še note'tezle žale nacle bene' sina' na' chejni'ile xtiža' Diosen', cheyaľa' gonľe yogo'ľol can' chazlaže' Diosen'. Cheyaľa' gonľe da' güen sin cbi gonxen cuinľe cont nacia' nacle bene' sina'. ¹⁴ Perw še chgue'e ľježle na' chzelaže'le gacchle bene' blaoch ca' bene' ľježle, bitw cheyaľa' nale nacle bene' sina', ľe con chonlaže'len' še ca'. ¹⁵ Na' še chgue'e ľježle na' chzelaže'le gacle bene' blaoch ca' bene' ľježle, bitw nacle bene' sina', san xbab chelen' zan' che Satanás dan' chnabia' da' xigüe' ca', na' con chonľe da' xinjen' can' ža lažda'olen' na' can' cheson bene' ca' bi zjanombia' Diosen'. ¹⁶ Še chgue'e ľježcho na' chzelaže'cho gaccho bene' blaoch ca' ľegaque', bitw zoacho binľo len ľegaque' še ca', na' choncho yogo'te da' xinj. ¹⁷ Cate' Diosen' chone' chio' yela' sina' chen', chaclaže'cho goncho yogo' da' nac da' güen. Chaclaže'cho soacho binľo len ľježcho na' naccho bene' xenlaže' na' chzexjw yichjcho cont chzenag che ľježcho. Na' ľecze cheyaše' cheži'ilaže' ľježcho na' choncho da' güen len ľegaque', na' toz ca' choncho len note'tez bene'. Na' bite'tez da' choncho, chonchon do laže'cho. ¹⁸ Nach še chebecho yesezoa yesebez bene' binľo na' chaclencho bene' yezica'chle cont yesezoa yesebeze' binľo, na' chaclenen cont yeson bene' da' güen.

4

Bitw gac goncho can' cheson bene' bi zjanombia' Diosen'

¹ Chdile chšašlen ľježle, na' chonľe ca' dan' yo'o nyaz da' malen' yichjlažda'olen' na' chnabian' le'e cont chonľe con ca' žan chele. ² Chzelaže'chguale bi da' gata' chele na' chdile chšašlen ľježle na' chaclaže'tele gotle bene' cont gata' chele dan' chzelaže'len'. Perw bitw gata' dan' che'nelen' lagüete chonľe da' xinj na' bi chnabele Diosen' gone' cont gata' dan' chyažjelen'.

³ Na' cate' chñabele Diosen' gone' cont gata' bi dan' gata' chele, bitw chonen', le con che'nele gata' dan' chzelaže'le lo' lažda'olen' cont gonle con nacteze žan chele. ⁴ Na' da' chzenagle che dan' ža xbab chelen' na' chonle can' chzelažen'na', chonle txen len bene' ca' bi zjanombia' Diosen', na' chonle contr Diosen'. Na' note'tezcho še chaclaže'cho goncho txen len bene' mal ca', choncho contr Diosen' na' bich chaquechone' ca cheyala'. Zaca'lebcho ca to no'ole nzoa xto, no'ole ben' bich chacde' bene' che'. ⁵ Chonljale xbab Xtiža' Diosen' bitw bi zacan' gan' nyojen žan: "Spiritw che Diosen' dan' zoan lo' lažda'ochon' chzelaže'chguan gwzenagcho che toz Diosen'." ⁶ Diosen' chaclenchgüe' chio' cont chzenagcho che toz le'. Da'n'an' nyoj Xtiža' Diosen' žan: "Diosen' chone' contr bene' ca' chesonxen cuingaque', perw chaclene' bene' ca' chesache'ede' bi chosozenague' che' ca cheyala'." ⁷ Da'n'an' cheyala' gon cuincho lo' na' Diosen' na' gwyo gwchejlaže'cho bi gwzenagcho che Satanásen'. Še goncho ca', gwcuaseczen ca'ale. ⁸ Le soa le yol güiž Diosen', nach soe' gaclene' le'e. Cheyala' cuejyichjle da' xinj da' chonle. Na' še chonle xbab guac gonxencho Diosen' na' gontezcho can' ža lažda'ochon', clelen' chonle xbaben' še ca', na' cheyala' güe'le latje yeyon Diosen' yichjlažda'olen' xilaže'. ⁹ Bi cheyala' yebele, san cheyala' yegüine'le neche da' xinjen' ba benlen' na' yeto'ele chen. ¹⁰ Cheyala' gwzexjw yichjle lao Xancho Diosen', nach Diosen' gone' cont gacxenle.

Bi cheyala' nacho che lježcho nape' doła'

¹¹ Bene' migw, bi cheyala' nelaocho che lježcho. Ben' chñelagüe' che lježe' o chosbague' lježe', benan' chñe' che ley che Diosen' na' chzoe' leyna' ca'ale. Na' nezecho ben' chon ca' bi chzenague' che leyna'. Na' dan' chon cuine' ca bene' zaque' cont že' che bene' lježe' nape' doła', chone' ley che Diosen' ca to da' bibi zaca'. ¹² Toz Dios nan' gwdixjue' leyna', na' toz le'na' zaque' choglagüe' che to tocho še napcho doła'. Na' toz le' zaque' gone' cont bi šjaya'ac bene' lo yi' gabilen', na' lecze zaque' cont yesele' bene' lo yi' gabilen'. Perw chio' bitw zaca'cho nacho che bene' lježcho zjanape' doła'.

Bitw nezecho bin' gac gwxe güižj

¹³ Na' le gwzenag da' nga: Balle chchogbia'len šejle to ga šejle gonle negosyw cont gonle gan. Na' chbejle to ža cate' šejle na' chchogbia'len yega'anle na' tgüiz, ¹⁴ neca chache'ele bi nezecho bin' gac checho o nac goncho gwxe güižj. Yela' mban chechon' zaca'leben ca to bejw, le bejon' šložze chle'echon na' cheyasen. ¹⁵ Cheyala' nacho: "Še Xancho Diosen' gone' latje bancho, na' goncho to da' goncho." ¹⁶ Perw da' xinjen' choncho še chonxen cuincho chžiacho bia' naquen' goncho sin cbi nabecho Diosen'. ¹⁷ Na' še nezecho cheyala' goncho da' nac güen na' bi chonchon, napcho doła' lao Diosen'.

5

Da' malchgua gac che bene' gwñi'a ca' bene' bi chosozenag che Diosen'

¹ Na' ca nac le'e bene' gwñi'a, le'e bi chzenagle che Diosen', le soayaše' na' le cuežyaše', le leca za' saca'zi'le. ² Lao Diosen' dan' de chele naquen ca to da' ba chbiayi', na' lache' šagüe' chelen' naquen ca to da' ba chle'e belzila'. ³ Na' mechw chelen' dan' nac de oro na' de plata, len Diosen' naquen ca to da' ba chzen xche'en. Da'n'an' žin ža žaglaochguale lo yi' gabilen'. Ba gwche' yichjle tlaoze btoble da' scha'o xmechwlen', la'czla' ba zoa gon Diosen' da' saca'zi'le. ⁴ Cheyala' gonle xbab can' benle len bene' güen žin chele ca', bene' yaše' ca' besyelap coseš chelen'. Benlele legaque' dan' bitw gwdixjwlene' ca cheyala'. Na' dan' bi bnežjwle laxjwgaquen' ca cheyala', chlo'en nacle bene' güen da'

xinj. Diosen' chzenague' che bene' güen žin ca' dan' chesyegüine'de', Dios ben' nape la'zelagüe yela' guac xen. ⁵ Zoatezle che'ej chagwšagüe'le na' chonditjele dan' de chele chonle con ca' žan chele, na' bi chache'ele ba zoa gon Diosen' da' saca'zi'le. Na' lagüe dan' chonle ca', zaca'leble ca' to beyixe' ben' chgüe'ej chguagwšagüe'cho cont ba chane'ba' cate' žin ža gotchoba'. ⁶ Na' gan' chi'le chonle yela' justisen', ba gwchoglaolen yesote' bene' goson da' güen, bene' bibi gosonde' le'e.

Cuezcho batcan' yid Xancho Jesucriston' da' yoble na' yol güižcho Dios

⁷ Ca nac le'e bene' migw, le gape yela' chxenlaže' len dan' chyi chzaca'le, le ba zoa yid Xancho Jesucriston' da' yoble. Bene' ca' chesaz, chesenite' chesebeze' cosešen', le cosešen' naquen da' zaca'. Na' chesape' yela' chxenlaže' chesebeze' chde timp yejon', le cate' chbeze yejon', cana'chen' chosyotobe' cosešen'. ⁸ Da'nan' bite'teze dan' chyi chzaca'le, cheyala' gape yela' chxenlaže' na' gonchachlaže'le šejnilaže'le Xancho Jesucriston', le ba zoa yide' da' yoble. ⁹ Bene' migw, bitw yosbaga' lježe' še bin' chac chele. Še bin' yosbaga' lježe', ba zoa yid Xancho' da' yoble na' choglagüen' chele nape doła'. ¹⁰ Le gon xbab che da' bene' ca' goso'e xtiža' Xancho Diosen' cani'. Leca bosochi bososaca' bene' leaque', perw bia'cze bosoyo bosochije', can' cheyala' gonle. ¹¹ Da' li mbalaz bene' ca' gwnita'teze' gosonchachlaže' gosejnilaže' Diosen' la'czla' besežaglagüe'. Na' ba benele xtiža' da' Job can' benchachlaže' gwyejnilaže' Diosen', la'czla' da' zan da' gwdi gwxaque'. Perw na' cate' gwde dan' gwdi gwxaquen', Diosen' bene' cont gwzoache' mbalazch clal can' gwzoe' cani'. Can' nac Diosen', leca chazlaže' chaclene' chio', na' leca cheyaše' cheži'ilaže'de' chio'.

¹² Bene' migw, da' naquen da' žialao, gwbat gwzoale no co' da' balı che bite'teze. Bitw nale yaban' co'on da' balı choe'le diža' li, neca nale yežlio nga co'on da' balı choe'le diža' li, neca bite'tezechle. Cheyala' güe'cho diža' li da' šejle' bene' cont Diosen' bi choglagüen' checho saca'zi'cho.

¹³ Note'tezcho cate' chac bi da' chac checho, cheyala' yol güižcho Dios. Na' note'tezcho cate' zoacho mbalaz, cheyala' golcho gonxenchone'. ¹⁴ Note'tezcho cate' chacšenecho, cheyala' gaxcho bene' ca' gwlejcho cont chosogüia chesene'e chio' chdop chžagcho chonxenchon Jesucriston'. Na' yosotope' yichjcho late' set, na' yosol güiže' Dios, yesenabe' yeyaquecho len yela' guac che Xancho Jesucriston' lagüe' da' chejnilaže'chone'. ¹⁵ Na' chio', cate' chol güižcho Xancho Diosen', cheyala' šejle'cho le chzenagcze' checho cont yeyone' ben' chacšenon', na' še ba bene' da' xinj, güezi'xencze Xancho' che'. ¹⁶ Da'nan' cheyala' xoadola'cho lao bene' lježcho na' yol güižcho Dios tocho yetocho cont ca' yezoacho güen še bin' chac checho. Na' še naccho bene' güen len Diosen', Diosen' chzenagcze' checho cate' chol güižchone' na' chone' da' zan da' güen dan' chnabechone' gone'. ¹⁷ Le gon xbab che Elías ben' be' xtiža' Diosen' cani'te. Goque' benach cayanen' nac chio'. Na' cate' bol güiže' Diosen' do yichj do laže' gwñabe' bi gac yejw, na' Diosen' bzenague' che' na' bitw goc yejon' lao šon iz yogašjo. ¹⁸ Na' yetni'a cate' bol güiže' Diosen' gwñabde'ne' sele' yejon' da' yoble, nach Diosen' gwselen'. Na' goc coseš che bene' ca' da' yoble.

¹⁹ Bene' migw, cate' to bene' lježcho ba gwlejjichje' dan' nac da' li dan' bzejni'i Diosen' chio', cheyala' gaclenchone' cont yetinjde' xtole'na'. ²⁰ Chaclaža' nezele, cate' choncho cont note'teze bene' chetinjde' xtole'na', chaclenchone' cont chosla Diosen' le' lo yi' gabil, le chezi'xene' xtole'na' la'czla' še naquen da' zan. Da' na'zen' chzoja' na'a.

CART NECHW DAN' BZOJ POSTLW SAN PEDRO

Pedro chzoje' cart nga che bene' ca' zjanaslas chesejnilaže' Criston'

¹ Neda' Pedro naca' postlw che Jesucriston'. Na' chzoja' cart nga che le'e chejnilaže'le Jesucriston', le'e naslasle distritw ca' gan' nzi' Ponto na' Galacia na' Capadocia na' Asia na' Bitinia. Chio' chejnilaže'cho Jesucriston' naccho ca bene' zito' len yezica'chle bene' že' yežlio nga. ² Con can' bsi'e xnezen' gwlahte, Xacho Diosen' gwleje' chio' cont Spiritw chen' bocoben yichjlažda'ochon' na' gwlo'on chio' lo' na' Diosen'. Bene' ca' cont chzenagcho che Jesucriston' na' cont Jesucriston' zoacze' cheyone' lažda'ochon' xilaže' dan' blalj xchenen' neche chio' le'e yag cruzen'. Chnaba' soacze Diosen' gaclenchgüe' le'e na' soacze' gone' cont soa cuezle binlochgua len xbab chelen'.

Zoacho lez šjayzoacho len Diosen'

³ Cheyala' gonxencho Diosen'. Le' naque' Xa Xancho Jesucriston', na' Xancho Jesucriston' lecze chonxene' le'. Leca cheyaše' cheži'ilaže' Diosen' chio', na' da'nan' bocobe' yichjlažda'ochon' na' bene' cont zoacho lez šjayzoacho len le', le Jesucriston' beyas bebane' ladjo bene' guat ca'. ⁴ Na' Diosen' gone' ga gac da' güen checho, to da' mbachgua da' bi yenit neca te chen, to da' ngo'ošagüe' cont gaquen checho cate' yežincho yaban'. ⁵ Na' Diosen' len yela' guac xen chen' chcuas chcue'eje' chio' len da' malen' lagüe chejnilaže'chone'. Chone' ca' šlac biña' žin ža le'echo da' mba da' gone' gac checho caten' šjayzoacho len le'.

⁶ Da'nan' zoachgualle mbalaz la'czla' chonen byen da' zan da' chyi chzaca'le šlož güeje na'a. ⁷ La'czla' da' te che oron', beñachen' chosozeyen' cont chesyebeje' bi da' nchixen da' bibi zaca'. Na' ca'cze zaca'lebe dan' choe' Diosen' latje chac chele, chaquen cont gwlo'ele še da' li chejnilaže'lene' cate' chac bi da' mal chele. Na' še soatezle šejnilaže'lene', leca zaca'chen clal ca no oro. Nach cate' Jesucriston' yide' da' yoble Diosen' güe'e diža' ne' benle güen na' gone' le'e yela' bala'an xen na' gone' soale txen len le' gan' yo'ochgua be'ni'.

⁸ Chaquele Jesucriston' la'czla' biña' le'elne'. Na' la'czla' bi chle'elne' na'a, chejnilaže'lene'. Da'nan' zoale mbalaz juisyw. Na' catec mbalaz zoale con bi chac gwzejni'ile bene' cayanen' chebele. ⁹ Na' da' chejnilaže'le Jesucriston', žin ža šjayzoale len Diosen'.

¹⁰⁻¹¹ Da' bene' ca' goso'e xtiža' Diosen' cani' gosene' yeyaše' yeži'ilaže' Diosen' chio' zoacho na'a. Spiritw che Criston' gwzoan len legaque' bzejni'in legaque' yid Criston' yežlion' na' saca'zi'e na' yeyoža' gwlo'e Diosen' naque' bene' zaca' juisyw. Da'nan' bososedyane' na' besyeyiljwyože' non' sela' Diosen' gaclene' chio' na' batcan' yide'. ¹² Na' Diosen' bzejni'ide' legaque' che da' ca' bosozoje' cont gosenezde' gaquen che chio' zoacho na'a na' gague che cuingaque'. Na' na'a Spiriton' dan' za' gan' zoa Diosen' ba benen cont gwnita' bene' goseyixjue'ede' le'e diža' güen che Criston', na' diža' güen chen' naquen lebe len dan' bosozoj da' bene' ca' goso'e xtiža' Diosen' cani'. Na' lente angl che Diosen' chesezelaže' yesejni'ide' naquen chaclen Diosen' chio'.

Cheyala' gac lažda'ochon' xilaže' len yogo' da' choncho

¹³ Da'nan' cheyala' soale len toze xbab na' gonle con ga zelao saque'le cont gonle can' chazlaže' Diosen'. Cheyala' soale yebele gon Diosen' gacchgua mba chele caten' yid Jesucriston' da' yoble. ¹⁴ Na' da' nacle xi'in Dios cheyala' gwzenagle che', na' bich gwzenagle che da' malen' can' gwna lažda'olen' gonle

cana' cate' bina' šejni'ile che Diosen'. ¹⁵ Dios nan' ba gwleje' chio' naccho xi'ine', na' le' naque' bene' laždao' xilaže'. Na' con ca nac le' bene' laždao' xilaže', lecze can' cheyala' gaccho bene' laždao' xilaže' len yogo' da' choncho. ¹⁶ Le Xtiža' Diosen' nyojen žan: "Cheyala' gacle bene' laždao' xilaže', le neda' Dios naca' bene' laždao' xilaže'."

¹⁷ Chio' chol güižcho Diosen' che'chone': "Xato' Dios". Na' Diosen' chchoglagüen' che to to chio' benach še nocho napcho dola' ca nac da' choncho, na' toz can' chone' len note'tezcho. Da'nana' cheyala' žebcho goncho da' bi chazlaže' Diosen' šlac zoacho yežlio nga. ¹⁸ Nezecho Diosen' ba bebeje' chio' lo da' ca' bosozejni'i da' xoxxta'ocho ca' chio' da' bibi zaca'. Na' nezecho ca nac no mechw de plata o de oro na' bichle da' ca' chesede chen, bi goc yesebejen chio' lo da' ca' choncho da' bibi zaca'. ¹⁹ San byažjen gwseła' Diosen' Criston' blalj xchene' da' zaca'chgua. Na' le' bnežjw cuine' gote' cont bebeje' chio' lo da' ca' bibi zaca'. Na' Criston' zaca'lebe' ca to xila' dao' be bibi yižgüe' da', be bibi naqueba'. Ben' nac ca' gosot bene' Israel gualaž cheton' cont bezi'xen Diosen' xtoła'gaque'. ²⁰ Za' xe yežlion' Diosen' gwleje' Criston' cont bnežjw cuine' neche xtoła'chon'. Na' Diosen' gwsele'ne' nga na'a ba zoa te che yežlion' cont chaclene' chio'. ²¹ Na' Criston' chone' cont zoacho chejnilaže'cho Diosen'. Na' Dios nan' bosbane' Criston' ladjo bene' guaten' na' blo'e nac Xi'ine' Criston' bene' zaca' juisyw. Nachen' zoacho chejnilaže'cho Diosen' na' zoacho lez gon Diosen' güen len chio'.

²² Na' da' chaclen Spiritw che Diosen' chio', ba chzenagcho diža' li che Diosen' na' choncho can' že'. Da'nana' ba beyac lažda'ochon' xilaže', na' da'nana' do laže'cho ba chaquecho yezica'chle bene' chesejnilaže' Jesucriston'. Na' ca'cze cheyala' goncho, cheyala' gague lježcho do yichj do laže'cho, gague gaguechone' de diža'ze. ²³ Xaxna' chio' zoacho yežlio nga zjanaque' bene' chesat, perw gague neche da' goljcho len legaque' naccho xi'in Dios, san naccho xi'ine' da' bocobe' yichjlažda'ochon' cate' gwyejle'cho xtižen'. Na' xtižen' zolan toli tocaņe, gague da' te chen. ²⁴ Chac can' nyojen, žan: Yogo' benach chesede che' ca chesede che no yixe' dao', na' yogo' da' chebe benachen' yežlio nga da' chesacde' zaca'chguan, zaca'leben ca yej da' žia yixe'.

Chesebiž yixe' ca' na' chesecquad chesebix yej da' zjažia yixe'.

²⁵ Perw xtiža' Diosen' zolan toli tocaņe, gague da' te chen.

Na' xtiže' nan' diža' güen da' ba gwdixjue'eto' len le'e.

2

¹ Da'nana' cheyala' cuejyichjcho yogo' bite'teze da' xinj da' choncho. Bi gonlaže'cho, bi goncho contze yesaque bene' naccho bene' güen, bi xi'acho bene', bi necho diža' mal che bene'. ² Na' ca bi' che'en dao' žan yesaže'be' xiže'gacbe', can' cheyala' selaže'cho yenecho xtiža' Diosen', le naquen da' güenchgua, na' cate' chzenagchon chaclenen chio' cont choncho can' cheyala' gon chio' ba de yela' mban checho toli tocaņe. ³ Le ba chacbe'echo na'a Xancho Criston' naque' bene' šagüe'.

Criston' zaca'lebde' ca to yej squin che yo'o

⁴ Cheyala' gwzenagcho che Xancho Jesucriston' ben' chon chio' yela' mban toli tocaņe. Bene' zan chesegue'ede' le' la'czla' Diosen' gwleje'ne' cont chaclene' chio' na' zaca'chgüe' len Diosen'. Da'nana' Jesucriston' zaca'lebde' ca to yej güen da' gwlej bene' cont gaquen yej squin ližen', perw bene' goson žinna' bi gosazlažen' na' gosebequen' šla'ale. ⁵ Na' chio' napcho yela' mban da' chejnilaže'cho Jesucriston'. Da'nana' yogo'cho txen zaca'lebcho ca yej ca'

da' zjancua' zjangoden' gan' chac yo'o de yejen'. Na' zaca'lebcho ca' liž Diosen' dan' zoe' len chio'. Lecze zaca'lebcho ca bꝛoz beņe' zjanac lo na' Diosen', le naccho lo na' Diosen' na' chaclen Jesucriston' chio' cont zoaczcho chonxencho Diosen' con can' chazlaže'. ⁶ Na' Xtiža' Diosen' nyojen, žan: Seļa' to beņe' ciuda Sión na' zaca'lebde' ca to yej da' zaca' da' gwlej beņe' cont gaquen yej squin liže'.

Na' note'teze ben' šejnilaže' le', gwbatech yetinjde' da' gwyejnilaže'ne'.

⁷ Nach len chio' chejnilaže'chone', Jesucriston' naque' leca beņe' zaca'. San beņe' bi chesejnilaže'ne', nyojczy da' nga čhegaque', žan:

Yej da' bi gosaclaže' beņe' güen yo'o ca' yosočhine',
len ba naquen yej squin.

⁸ Na' lecze ca' žan:

Zaca'lebde' ca to yej da' chčhego' beņe' na' ca to yej da' chgo'o ni'e na' chjasebixe'.

Nyojen žan chesečhegüe' le bi chosozenague' xtiža' Diosen'; na' Diosen' bžie' bia' yesac čhegaque' ca'.

Chio' chejnilaže'cho Diosen' naccho xi'ine'

⁹ Na' chio', Diosen' ba gwleje' chio' cont chejnilaže'chone'. Na' len Diosen' naccho ca rey na' ca bꝛoz. Gwleje' chio' cont naccho nación čhe', na' nactecho diaža' čhe', le chaclaže' čhixjue'echo catec da' güen juisyw chone'. Le'na' be-beje' chio' lo da' malen' bencho na' gwlo'e be'ni' xen čhen' lo' yičhjažda'ochon' cont soacho goncho da' güen. ¹⁰ Cana' le'e bi gwyejnilaže'le Diosen' na' bi gogle nación čhe', perw na'a ba nacle nación čhe'. Cana' biņa' yeyaše'de' le'e, san na'a Diosen' ba beyaše' beži'ilaže'de' le'e.

Cheyaļa' goncho can' chazlaže' Diosen'

¹¹ Chacda' le'e beņe' migw, na' chņeyoeda' le'e le gon xbab le yežlio nga bi naquen laže. Da'nān' bitw gonle bite'teze da' xinj da' žan gonle len cuerp čhelen', le še gonlen, gwžonen soa yičhjažda'olen' binlo len Diosen'. ¹² Le soa le gon da' güen cont beņe' ca' bi chesejnilaže' Diosen' yesele'ede' da' güen da' chonle, na' la'czļa' na'a chesezi'diže' le'e chesene' chonle clele, žin ža yesele'ede' chonle da' güen na' yesonxene' Diosen' cate' žin ža čhogbi'en nac gac čhe to toe'.

¹³ Da' chejnilaže'le Xancho Criston', le gwzenag čhe yogo' beņe' ba bosozoa benāchen' cont yesenabi'e le'e. Le gwzenag čhe rey ben' chnabia' doxen gan' zoachon', ¹⁴ na' lecze le gwzenag čhe beņe' gwnabia' ca' chselā' reyen'. Le nac lo na'gaque' yesone' castigw čhe beņe' ca' cheson da' xinj na' yesonxene' beņe' cheson can' cheyaļa' yesone'. ¹⁵ Diosen' chaclaže' goncho da' güen cont beņe' ca' bi chesejni'i čhe', ben' zjančhoļ yičhjažda'ogaque', bi žel diža' da' yesene' yosocuiše' chio'.

¹⁶ Cheyaļa' soa cuezcho mbalaz da' bich yo'ocho lo na' gwxiyen', perw bi goncho xbab guacte goncho bi da' xinj. San cheyaļa' soa cuezcho mbalaz da' yo'ocho lo na' Diosen', na' yo'ocho lo ne'en cont goncho con dan' chazlaže' goncho. ¹⁷ Cheyaļa' gapcho bala'aņ yogo'loļ beņe'. Na' cheyaļa' gague beņe' lježcho beņe' chesonxene' Jesucriston'. Cheyaļa' žebcho goncho da' bi chazlaže' Diosen'. Na' cheyaļa' gapcho beņe' gwnabia' čhechon' bala'aņ.

Criston' byo bcheje' dan' gwxcaci'ena'

¹⁸ Le'e chonle žin čhe beņe', le gwzenag čhe xan žin čhele da' chaple legaque' bala'aņ. Gague tlaoze gwzenagle čhe xan žin čhelen' še zjanaque' beņe' šagüe' beņe' yo'o xbab, san lecze le gwzenag čhegaque' še zjanaque' beņe' znia.

¹⁹ Še bibi da' mal nonle na' bia'cze chosočhi chososaque' le'e, chebe Diosen'

chyo chchejle len da' chesonde' le'e lagüe nezele chaclaže' Diosen' goncho ca'.
 20 Perw bibi zacan' še ba benle bi da' xinj na' chyo chchejle cate' chesebaže'
 le'e. San še chosoči chososaque' le'e cate' chonle da' güen na' chyo chchejle
 len da' chesonde' le'e, nachle chebe Diosen' le'e. 21 Le Diosen' gwleje' chio'
 cont gwyo gwchejcho len bi da' yosoči yososaca' bene' chio', na' Criston'
 gwxaca'zi'e neche chio' na' byo bchejde' len da' goc che' cont nezecho ca'czen'
 cheyala' goncho. 22 Bibi da' xinj ben Criston', ne to diža' güenlaže' bi be'e.
 23 Cate' gosezi'diža' bene' le', bi boži'e dižan' nac ca' len legaque'. Na' cate'
 bosochi bososaque'ne', bi gwne' yebi'e mal len legaque'. Ben cuine' lo na'
 Diosen', le gwnezde' Diosen' chogbi'en yesezaca'zi' bene' ca' con can' cheyala'
 gac chegaque'. 24 Criston' bnežw cuine' neche xtoła'chon' cate' gosote'ne' le'e
 yag cruzen'. Da'nan' cheyala' cuejyichjcho da' xinjen' choncho na' soacho
 goncho da' güen. Gwxaca'zi'e cont bozoe' chio' binlo. 25 Goccho ca' xila' be
 gosacžeje, perw na'a ba naccho ca' be yo'o lo na' xamba' cont chyoeba', le
 Criston' chgüia chne'e chio' na' yo'o lo ne'e lažda'ochon' chcuas chcue'ejen' len
 da' malen'.

3

Can' cheyala' yeson bene' zjanšagna'

1 Na' lecze le'e no'ole nšagna'le, to tole cheyala' gwzenagle che bene'
 chele. Bale' bina' yosozenague' xtiža' Diosen', na' še gwzenagle chegaque',
 yesache'ede' xtiža' Diosen' naquen da' güen la'czla' bibi ye'ine'. Na'
 yosozenague' che Diosen' 2 cate' yesele'ede' chaple legaque' bala'an' na' chi'
 yichjle soa cuezle cont lažda'olen' gaquen xilaže' len Diosen'. 3 Na' le'e
 no'ole, bi nacho naquen da' žialao gon cuinle xdan yopa'a no yichjle, gwguala'
 yenle no bga', gwguala'le no ret, co'ole no niy de oro, na' chazle lache'
 šagüe'. 4 Dan' nac da' žialao, gac lažda'olen' güen, la'czla' nono chle'e len.
 Zaca'chguan len Diosen' gaccho bene' nexjwlaže' na' bene' xenlaže', le bi te
 che yichjlažda'ochon'. 5 Gosenita' no'ole cani' no'olen' gosejnilaže' Diosen' na'
 goson cuine' lo ne'e. Legaque' gosaque' bene' nexjwlaže' na' bene' xenlaže' na'
 bosozexjwyichje' cont gosone' bin' gwna bene' che to toe'. 6 Da' Sara, no'ol
 che da' xozxta'oto' Abrahanna', gwzoe' bzenague' che bene' che' na' gože'ne':
 "Xana". Na' le'e še soatezle gonle da' güen na' bi žeble, nach yesena bene' nacle
 xi'in' da' Saran' lagüe chonle can' benen'.

7 Na' le'e bene' byo nšagna'le, lecze cheyala' gacle bene' šagüe' len no'ol chele
 na' gaplene' bala'an', le bi zjanaque' bene' gual can' nac chio' bene' byo. Na'
 lecze can' ba nži'ilaže' Diosen' chio' na' none' chio' yela' mban toli tocañe,
 ca'tezeczen' ba none' len legaque'. Nachen' cheyala' goncho güen len legaque'
 cont bibi gwžon gwzenag Diosen' checho cate' chol' güižchone'.

Can' goncho še yosoči yososaca' bene' chio' la'czla' choncho da' güen

8 Yogo'cho cheyala' goncho toze xbab na' cheyala' yeyaše'cho lo' lažda'ochon'
 še bi da' chac che bene' lježcho. Cheyala' gaque lježcho do laže'cho ca' bene' biše'
 lježcho, na' cheyala' gaccho bene' šagüe' len bene' lježcho na' bi gon cuincho
 bene' xen. 9 Še bi da' mal cheson bene' len chio', bi nacho lecze da' mal yebi'icho
 len legaque'. Na' še bene' chesezi'diže' chio', bitw yoži'icho dižan' nac ca' len
 legaque', san nabcho gac da' güen chegaque'. Le Diosen' ba gwleje' chio' cont
 goncho ca' na' cont gone' latje soacho mbalaz. 10 Goncho ca' le nyojen, žan:

Bene' chaclaže' soa cueze' mbalaz,
 cheyala' gwsaque' bich güe'e bite'teze diža' mal,
 na' gwsaque' bich güe'e bite'teze diža' güenlaže'.

11 Cheyala' cuejyichje' yogo' da' mal na' gone' da' güen.

Cheyała' cuec yichje' gone' con ga zelao saque'de' cont soe' binlo len bene' lježe'.

¹² Le Xancho Diosen' chgüia chne'e bene' ca' cheson da' zej to licha, na' chzenague' chegaque' cate' chosol güiže'ne'.

San bene' ca' cheson da' xinj, Diosen' ngüie' gone' cont yezezaca'zi'e.

¹³ Na' nono zoa no gone chio' mal še zoatezcho choncho da' güen do yichj do laže'cho. ¹⁴ Na' la'czla' še tgüej cate' yosochi yososaca' bene' chio' lagüe choncho da' zej to licha, Diosen' gone' soacho mbalaz. Na' bi cheyała' žebcho bene', neca gacžejlaže'cho. ¹⁵ San cheyała' gonxencho Criston' lo' lažda'ochon', le naque' Xancho. Na' bate'teze cheyała' soacho probnidw cont yoži'icho xtiža' bene' še yesenabde' chio' bixchen' zoacho lez šjayzoacho len Diosen' toli tocanē. Na' cheyała' gapcho legaque' bala'an na' güe'lenchone' diža' šagüe'. ¹⁶ Tža tža cheyała' goncho cont nezecho lo' yichjlažda'ocho bibi doła' napcho len Diosen'; nachen' cate' yesezi'diže' chio' da' chejnilaže'cho Criston', yesacbe'ede' le choncho güen na' yesacde' zto'. ¹⁷ Yejni'a saca'zi'cho neche choncho da' güen, še can' chaclaže' Diosen' gac checho, cnel ca saca'zi'cho neche choncho da' xinj.

¹⁸ Le Criston' lecze gwdi gwxaque'. La'czla' gwyejczē to licha len Diosen', bnežjw cuine' gote' neche xtola' benach tni'aze, na' da' bene' ca' zaca'czen' toli tocanē. Gote' cont ba bozoe' chio' binlo len Diosen'. Perw la'czla' gosote'ne', beyas bebane' ladjo bene' guaten', dan' ne' zoa spiritw chen'. ¹⁹ Na' len Spiritw chen' gwyeje' jatixjue'ede' xtiža' Diosen' len bene' ca' ba zjanyeyw gan' yezezaca'zi'e toli tocanē. ²⁰ Legaque' bi bosozenague' che Diosen' ža gwlaste, la'czla' gwdape' yela' chxenlaže' len legaque', gwleze' yosozenague' šlac da' Noén' bene' to barcw xen. Na' to chopga bene' goso'o lo' barcon' na' bi gosebiaye'e lo' nisen', con xonogüe' besyela. ²¹ Na' dan' goc ca' cani' zaca'leben can' ba gwzoacho nisen' lagüe dan' ba de yela' mban checho toli tocanē. Na' gague gwzoacho nisen' cont beyaccho xilaže' len cuerp chechon', san gwñabecho Diosen' beyone' lažda'ochon' xilaže' cont nezecho bibi doła' napcho. Na' ba nac lažda'ochon' xilaže' na'a lagüe beban Jesucriston' ladjo bene' guaten'. ²² Na' na'a Jesucriston' ba beyepe' yaban' gan' chnabi'e txen len Diosen', na' chosozexjw yichj yogo' angl na' yogo' nochle no nape yela' chnabia' chosozenague' che'.

4

Diosen' none' da' gon to tocho cont chaclen lježcho

¹ Criston' goque' bene' bela' chen na' gwxcaca'zi'e yežlio nga, da'nan' chio' cheyała' gonchačhlaže'cho bi gacžejlaže'cho cate' saca'zi'cho. Goncho ca', le cate' ba gwzaca'zi'cho chaclenen bich chzenagcho che da' malen'. ² Na' še bi chzenagcho che da' malen' šlac ne' mbancho, nach soa cuezcho bi goncho da' mal da' žan gon chio' benach, san soa cuezcho goncho con can' chazlaže' Diosen'. ³ Cana' gwzoale benle con can' cheson bene' bi chesejnilaže' Diosen'. Benle da' nac yela' zto', benle bite'teze da' mal da' gwzelaže' lažda'olen', gwzožele, benle no žaš len lni chelen' na' güe'ejchguale, na' gwyejnilaže'le l gua' lsaca' da' ca' gwna Diosen' bi cheyała' šejnilaže'chon. ⁴ Na' bene' ca' ne' cheson ca' chesyebande' bich chonle txen len legaque' can' chesaše' chosožiayi' cuingaque', nach chesezi'diže' le'e. ⁵ Perw žin ža cate' Diosen' nabyožde' legaque' che yogo'lol da' ba gosone', Dios ben' chbeze' chogbi'en nac gac che bene' zjamban len bene' ca' ba gosat. ⁶ Le da'nan' gwsele' bene' goseyixjue'ede' diža' güen che' len bene' ba gosat can' goseyixjue'eden' len chio'. Diosen' goclaže' yesenite' mbalaz toli tocanē' can' zoa le', la'czla' nchoglagüen' de yela' got che yogo' benach yežlio nga.

⁷ Ba zoa te che yežlion'. Da'nan' cheyała' soacho len toze xbab na' goncho byen goncho can' chazlaže' Diosen' cont bibi gwžon soacho yol güižchone'.
⁸ Na' da' nac da' žialaoch, cheyała' gaque lježcho do yichj do laže'cho, le cate' chaque lježcho chezi'xencho chegaque' bite'teze da' chesonde' chio'.
⁹ Na' cheyała' gwlebcho bene' lježcho cate' yeside' ližchon' sin cbi bixjwcho.
¹⁰ Con can' ba goclen Diosen' to tocho da' none' chio' grasyw che bi da' chac choncho, can' cheyała' gaclen lježcho len dan' choncho. Cheyała' gwčhincho bite'teze grasyw da' non Diosen' chio' con can' chaclaže' gwčhinchon, le nža' nža'te da' none' che to tocho choncho.
¹¹ Še Diosen' ba none' checho chixjue'echo xtižen', le xtiže' na'zen' cheyała' chixjue'echo. Na' še ba none' checho gaclencho bene', cheyała' gaclenchone' do yichj do laže'cho, le Diosen' chone' cont chac chaclenchone'. Cate' bi da' goncho, gonchon ca gacxen Diosen' da' gwsele' Jesucriston' len chio'. Zaca'cze' gonxenchone' toli tocaņe na' zaca'cze' nabi'e toli tocaņe. Can' gacšca.

Guata' da' saca'zi' chio' chejnilaže'cho Criston'

¹² Chacda' le'e bene' migw, na' chaclaža' bi yebanele can' chac chelen' chosoči chososaca'chgua bene' le'e. Bi naquen da' yebanele, san gwlo'en še da' li chejnilaže'le Diosen'.
¹³ Cheyała' yebele caten' chzaca'zi'le da' chejnilaže'le Criston', le chac chele can' goc che Criston' caten' gwxaca'zi'e. Le yebe caten' chzaca'zi'le cont lecze yebele na' soale mbalaz cate' žin ža le'ele yid Criston' ben' nac bene' zaca' juisyw.
¹⁴ Mbalaz chac chele na'a cate' chesezi'diža' bene' le'e da' chejnilaže'le Criston', le Spiritw che Dios ben' nac bene' zaca' juisyw zoan chaclenen le'e. Bene' ca' chosoči chososaque' le'e chesene' mal che Criston', san le'e chonxenlne'.
¹⁵ Na' še saca'zi'le, yejni'a gaquen neche chonle da' güen, gague neche da' betwle bene' o gwlanle da' de che bene' o benle bichle da' xinj o blaže' chele len bi da' chac che bene'.
¹⁶ Le še saca'zi'le neche chejnilaže'le Criston', bi cheyała' gaquele zto' can' chac chele, san cheyała' gonxenle Diosen' da' ba chejnilaže'lne'.

¹⁷ Ba bžin ža Diosen' ba chone' cont chy chzaca' chio' naccho xi'ine' neche bi da' xinj da' choncho. Na' dan' chone' ca' zgua'tec len chio' naccho ca bene' lo' yo'o che', nezecho leca gwnežjwche' da' yesezaca'zi' bene' ca' bi chosozenag diža' güen chen'.
¹⁸ Na' ca' nac bene' zja'ac to licha, nacchguaze yesyele' bi yesezaca'zi'e toli tocaņe, nach bene' bi chesejnilaže' Diosen' na' chesonteze' da' xinj, gague bi de da' yosla legaue'.
¹⁹ Da'nan' cate' chsi' Diosen' xnezen' chy chzaca'cho, cheyała' soacho gonczcho da' güen na' gon cuincho lo' na' Diosen', le len' bene' chio' beñač na' zoacze' chaclene' chio'.

5

Can' cheyała' gon chio' chejnilaže'cho Criston'

¹ Na'achen' de da' nia' le'e nchojle cont chgüia chna' ljež le'e chejnilaže'le Criston'. Neda' lecze nchoja' chona' ca'. Ble'eda' gwxaca'zi' Criston' na' choe'lena' bene' diža' can' goquen', na' lecze nezda' žin ža šjayzoa' len le' gan' yo'ochgua be'ni' ca' le'e šjayzoalenlne'.
² Le güia na' bene' ba gwlo'o Diosen' lo' na'le güia na'le, ca' no xan xila' chgüia chne'e xila' che' ca'. Le gonen do yichj do laže'le can' chazlaže' Diosen', gague gonlen žan ca' žan, neca gonlen cont gonle gan mechw, san le yebe gonlen.
³ Na' ca' nac bene' ca' güia na'le, bi gonle znia' cont yosozenague' chele, san soatezle gonle da' chazlaže' Diosen' cont yesele'ede' can' chonlen', na' yesache'ede' lecze can' cheyała' yeson legaue'.
⁴ Xancho Jesucriston' zaca'lebde' ca' to bene' güeyoe' xila' bene' chnabi'e nochle güeyoe' xila'. Na' cate' yide' da' yoble, cana'ch gone' soale mbalaz

juisyw še ba benle xšin Diosen' can' cheyała', na' gague da' te che yela' zoa mbalaz chelen' ca chde che no premio da' chesone' yežlio nga.

⁵ Nach lecze ca' le'e bene' xcuide', cheyała' gwzexjw yichjle gwzenagle che bene' ca' ba zjanchoj ben' chosogüia chosone'e le'e. Na' yogo'le le gwzexjw yichjle cont gwzenag che lježle, le:

Diosen' chdillene' bene' zjanac ya'laže',
san chaclene' bene' chosozexjwlaže' lagüen'.

⁶ Cheyała' gwzexjw yichjcho gwzenagcho che Dios ben' nape yela' guac xen, cont žin ža gone' ga gacxencho. ⁷ Na' cheyała' gwcua'ancho yogo'lol da' chi yichjcho chen lo na' Diosen', le len' chgüia chne'e chio'.

⁸ Cheyała' goncho byen goncho da' nac da' zaca', na' cheyała' gwsaca'cho cont Satanás dan' chnabia' da' xigüe' ca' bi co'on chio' to lo nez mal, le chgue'en chio' na' cheyljwlažen' nac gonen gwžiyin' chio', ca to bež znia chosya'aba' chdaba' chyljwba' be gagwba'. ⁹ Cheyała' soachachcho bi gwzenagcho che Satanásen' na' soachachcho šejnilaže'cho Jesucriston', le nezecho bene' lježcho ca' chesejnilaže'ne' gate'tezechle lo yežlion' lecze chesezaca'zi'e can' chac che chio'. ¹⁰ Perw cate' ba gwde da' chyi chzaca'cho šlož dao' na'a, cuin Diosen' gone' cont gacch yichjlažda'ochon' can' chazlažen', cont šejnilaže'chchone', cont soecho gonchcho can' chnalazen', na' cont soacho len toze xbab. Dios nan' nži'ilaže'de' chio' na' chaclene' chio' bite'teze da' chac checho, na' ba gwleje' chio' chejnilaže'cho Criston' cont šjayzoacho txen len le' gan' yo'ochgua be'ni'. ¹¹ Cheyała' soacho gonxenchone' toli tocañe da' naque' bene' zaca' juisyw, na' nabia'che' ca note'tezechle. Can' gonšcaczcho.

Pedron' chguape' tiox bene' ca' yosolab carten'

¹² Bene' migw checho Silvano, ben' chacda', zoateze' chone' can' cheyała' gone', na' ba bzoje' xtiža' le'e cart dao' nga. Na' le'e cart nga chneyoeda' le'e soaczle gonle da' güen na' chzejni'ida' le'e Diosen' ba goclene' le'e cont nezele da' li nži'ilaže'chgüede' le'e. Da'nan' cheyała' soaczle šejnilaže'ine'.

¹³ Bene' ca' ba gwlej Diosen' cont chesedop chesežague' chesonxene' Jesucriston' lo ciuda Roma nga chosoguape' le'e tiox, ciudan' da' nsi'a Babilonia. Na' lecze Marcos ben' nona' ca xi'ina' chguape' le'e tiox. ¹⁴ Cate' chdop chžagle txen le gwnopa' na' lježle cate' gwguap lježle tiox cont gachia' chaque lježle.

Na' chnaba' yogo'le chejnilaže'le Criston' soa cuezle binlo len xbab da' yo'o lo' yichjlažda'olen'. Da' na'zen' chnia'.

CART GWCHOPE DAN' BZOJ POSTLW SAN PEDRO

Pedron' bzoje' cart nga che bene' chesonxen Jesucriston'

¹ Neda' Simón Pedro chona' xšin Jesucriston', na' len' gwsele' neda' naca' postlw che'. Chzoja' le'e ba chejnilaže'le Jesucriston' can' chon neto'. Jesucriston' naque' Dios ben' chonxencho na' none' yela' mban checho toli tocaṇe le zejze' to licha. Na' da' zaca'chguan chejnilaže'chone'. ² Chnaba' gaclenchgua Diosen' le'e na' gone' cont leca soa cuezle binlo len xbab chelen' lagüe nombia'le' na' nombia'le Jesús ben' nac Xanchon'.

Can' cheyala' gon chio' chejnilaže'cho Jesucriston'

³ Dan' nap Diosen' yela' guac xenṇan', ba none' chio' yogo' da' chyažjecho cont de yela' mban checho toli tocaṇe na' cont goncho can' chazlažen'. None' chio' da' ca' lagüe nombia'cho Criston', na' Criston' ben' gwleje' chio' naque' bene' zaca' na' bene' šagüe'. ⁴ Na' da' naque' bene' zaca' bene' šagüe', da'nan' ba gwne' gaclene' chio' na' gone' da' güen juisyw len chio'. Na' zaca'chguan da' gwne' ca', le da' chaclene' chio' can' gwne', da'nan' yichjlažda'ochon' chesyeyaquen güen can' nac yichjlažda'ogüen', na' chac chbejyichjcho da' mal da' chžiyin' bene' bi chesejnilaže' Diosen', lagüe chesone' con ca žan chegaque'. ⁵ Na' da'nan' chio' chejnilaže'cho Jesucriston' cheyala' goncho con ga zelao saque'cho cont gonchcho da' güen, na' cont šejni'ichcho. ⁶ Na' cheyala' goncho con ga zelao saque'cho cont bi ṇabia' da' malen' chio'. Cheyala' soaḥaḥcho šejnilaže'cho Diosen' caten' chy chzaca'cho, na' cheyala' soaczcho gonxenchone'. ⁷ Na' cheyala' ži'icho bene' lježcho ben' chesejnilaže' Jesucriston', na' lecze cheyala' gaquecho yogo'ze bene'. ⁸ Le še zejcho chonchguacho yogo' da' ca', nachen' gaccho can' cheyala' gac chio' nombia'cho Xancho Jesucriston', na' xšinen' da' goncho chojen güen. ⁹ Na' note'tez bene' bi chon da' ca' ba gwnia' cheyala' goncho, nḥol' yichjlažda'ogüe' na' biṇa' šejni'išagüe'de' can' cheyala' gone'. Chlo'en ba gonlaže' ba beya' beyib Diosen' lažda'ogüe' len da' xinjen' bene' cana'. ¹⁰ Da'nan' bene' migw, cheyala' gonchcho con ga zelao saque'cho cont nezecho da' li ba gwlej Diosen' chio' cont šejnilaže'chone' na' ba bsi'e xnezen' gwque'e chio' ca xi'ine'. Na' še goncho ca', gwbat cuiayi'cho, ¹¹ na' mbalazchgua gwleb Diosen' chio' cate' šjayzoacho len Xancho Jesucriston' gan' chnabi'e toli tocaṇe, Jesucristw ben' none' yela' mban checho toli tocaṇe.

¹² Da'nan' ba gwchoglaža' yogo' ni'a güe'lena' le'e diža' che da' ca' ba gwnia' le'e cont šjayze'ele, la'czla' ba nezele can' gwnian' na' zoaḥaḥle chejnilaže'le diža' li che Diosen' dan' nombia'le. ¹³ Nan' chacda' šlac ne' mbana' cheyala' gona' cont šjayze'elen. ¹⁴ Le nezda' yob žin ža gata', con can' ba bzejni'i Xancho Jesucriston' neda'. ¹⁵ Da'nan' gona' con ga zelao saque'da' cont šjayze'ele can' gwnia' che da' quinga cate' ba gota'.

Postlw ca' besele'ede' cate' Diosen' blo'ede' yela' zaca' che Criston'

¹⁶ Ca nac da' bzejni'ito' le'e che yela' guac che Xancho Jesucriston' na' che dan' yide' da' yoble, bi ṇacho naquen diža' da' goljlaže' neto' postlw, le ble'eto' len yejlaoto' cate' Diosen' blo'e yela' zaca' che Jesucriston'. ¹⁷ Ble'eto'ne' cate' Xacho Diosen' bnežjue'ne' yela' bala'an xen na' cate' Dios ben' nac bene' zaca' juisyw bene' cont gwyeqhje' be'ni' juisyw na' gože'ne': "Benga Xi'ina' ben' chacda' na' chbe chezaquelaže'chgüeda' che'." ¹⁸ Neto' beneto' can' gwna Dios

ben' zoa yaba be'e diža' che', le gwzoato' lo ya'ana' len Xancho Jesucriston' caten' goc ca', ya'a dan' gwlej Diosen' cont goc ca' lagüen.

¹⁹ Napcho Xtiža' Diosen' dan' bosozoj beñe' ca' goso'e xtižen' cani' na' nezecho naquen da' li. Na' güen gonle še gwzenagle che dan' bosozojen', le gwseñin' lo' yichjlažda'olen' ca to yi' da' chseñi' ga nac chol. Bi cheyala' yeche'echo gwzenagcho chen tža tža šlac žin ža yid Criston' da' yoble na' co'oche' be'ni' chen' lo' yichjlažda'ochon'. Na' dan' yide'na' zaca'leben ca dan' chla' beljw xsilen' cate' cheni'. ²⁰ Na' naquen da' žialao xen šejni'icho da' nga: diža' dan' bosozoj beñe' ca' goso'e xtiža' Diosen' cani', ne tozen bi gac šejni'ichon to gualazcho, ²¹ le ne toz da' ca' bosozoje' bi zan' che xbab chegacze'. San beñe' gosaque' lo na' Diosen' gosenie' dan' gož Spiritw che Diosen' legaque' na' bosozojen'.

2

Beñe' ca' chosozejni'ide' xtiža' Diosen' clele

¹ Cani' lecze besechoj bal beñe' gualaž cheto' beñe' gosonlaže' gosene' cheseyixjue'ede' xtiža' Diosen', na' ca'czen' yesenita' beñe' yosozejni'ide' le'e diža' güenlaže' gwxe güižj. Na' yeseyiljwlaže' nacle yesone' cont yosozejni'ide' le'e diža' güenlaže' da' gwžiyin' le'e sin cbi gacbe'ele. Yosozoe' Xancho Jesucriston' to šla'ale, ben' bnežjw cuine' cont gata' yela' mban checho toli tocanē. Perw žin ža yesebiaye'e yalzelaže'. ² Beñe' zan yosozenague' chegaque' na' yesone' da' xinj dan' nac da' yela' zto' can' yeson legaque'. Na' neche yesone' ca', yesenita' beñe' yesene' bibi zaca' diža' güen che Diosen' da' chlo'en chio' dogualje nez güenna'. ³ Na' beñe' güenlaže' ca' yesezelaže' yeseque'e xmechwle. Da'n'an' yosozejni'ide' le'e diža' da' yesaljlaže' cont gwnežjwle legaque' mechw. Perw cani'te Diosen' ba nžie' bia' yesebiaye'e.

⁴ Nezecho Diosen' bi bezi'xene' che angl ca' cate' gosone' da' xinj, san gwsele' legaque' lo yi' gabilen' gan' nac leca chol, na' zjanite' zjancheje' gden šlac žin ža gone' yesezaca'zi'e toli tocanē. ⁵ Neca bezi'xen Diosen' che beñe' ca' že' lo yežlion' beñe' bi bosozenag che' caten' gwzoa da' Noé. Gwsele' yejw sio' juisyw da' bžiyin' legaque'. Na' Noén' gwzoe' gwduxjue'ede' can' cheyala' yesone' da' zej to licha. Da'n'an' Diosen' bosle' le' len yegaže beñe' lježe'. ⁶ Na' Diosen' lecze bechoglaže' bžiyi'tecze' ciuda Sodoma len ciuda Gomorra cani' yela' güen da' xinj che beñe' ca' že'na'. Bzeye' ciuda ca' na' yešinga de bega'an. Na' bene' ca' cont chosnisde' beñe' za' za'ac gwnežjue' castigw chegaque' še bi yosozenague' che'. ⁷ Na' cate' Diosen' bžiyaye'e ciuda ca', bosle' ben' le Lot ben' goc beñe' güen len le', le Loten' gocchgüede' zi' lo' lažda'ogüe' che da' yela' zto' goson beñe' mal ca' že' ciuda ca'. ⁸ Loten' goque' beñe' güen na' bžaglagüe' lo' lažda'ogüe' tža tža ble'ede' goson beñe' ca' da' bi cheyala' yesone' na' bende' diža' che da' malen' gosone'. ⁹ Can' naquen, Xancho Diosen' nezde' nac gone' yosle' chio' chejnilaže'chone' lao da' ca' yesonen cuejyichjchone', na' nezde' nac gone' cont beñe' ca' bi zjanac beñe' güen len le' yesenite' yesezaca'zi'e na'a na' cate'ch žin ža chogbi'en yesezaca'zi'e toli tocanē.

¹⁰ Diosen' gwnežjwchgüe' da' yesezaca'zi' beñe' ca' chesonteze' da' yela' zto' can' chesezelaže' lažda'ogaquen' yesone' len cuerp chegaquen'. Beñe' ca' bi chesape' Xancho Diosen' bala'an cont yosozenague' che'. Bitw chesežebe' chesone' con bi žan chegaque', na' neca chesežebe' chesezi'diže' no angl beñe' zaca' na' no da' xigüe'. ¹¹ San ca nac angl che Diosen', zjanaque' beñe' gualch ca chio' beñach na' zjanapche' yela' chnabia' xench ca chio', perw legaque' bi cheseyaxjde' yesezi'diže' no beñe' zaca' na' no da' xigüe', san cheso'e diža' šagüe' chosocuiše' beñe' ca' na' len no da' xigüe' lao Xancho Diosen'.

¹² Bene' ca' chosozejni'ide' diža' güenlažen', chesezi'diže' da' ca' bi chesejni'ide'. Zjanaque' ca beyixe' be bi chesejni'i. Le beyixen' con nsi' Diosen' xnezen' chesaljba' na' chesenita'ba' cont yesezen benachen' legačba' na' yesote'ba'. Na' ca'cze yesebiayi' bene' ca' chosozejni'i diža' güenlažen', ¹³ yesezaca'zi'e da' chosoči chososaque' bene' yoble. Chesazlaže' chesaše' chese'ej chesagwḡatteze' tža tža. Na' cate' chesedobe' txen len le'e cont che'ej chagwle, bi chesacde' zto' da' chesezožde' na' chesagwḡate' catec chziye' da' malen' legaque'. Da'nān' zjazaca'lebde' ca to da' bzigüe' da' dope to lo lache' šiš o ca to yiž xen da' žia cho' alao bene'.

¹⁴ Bate'teze chesele'ede' no'ole, chesezelaže' yesata'lenteze' legaque', na' bi chjasexaque'de' len da' xinjen' chesonen'. Chese'go'oyele' bene' biḡa' yesenita'čache' len Jesucriston' cont yesone' da' xinjen' txen len legaque'. Bene' ca' chosozejni'i diža' güenlažen' ba zjayolagüe' chesezelaže' bi de che bene'. Diosen' leca chgue'ede' yogo' da' chesone'. ¹⁵ Le ba gosebejyichje' xnez Diosen' da' zej to licha. Na' ba goseque'e nez malen' can' ben da' Balaam ben' be' xtiža' Diosen' cani', ben' nac xi'ḡn da' Beor. Balaanna' gwzelaže' yeseyixjue'ne' len mechw cont nabe' gac da' mal che bene' Israel. ¹⁶ Na' Diosen' bene' cont xpurren' be bi chac chneba' gwḡeczba' ca to benač na' gwḡdilba' le' che yela' tont chen', gožba' le' cueze' bich gone' da' xinjen' nac ca'.

¹⁷ Bene' ca' chosozejni'ide' diža' güenlažen' zjazaca'lebde' ca bej gan' bibi nis žia na' ca bejw da' nžiga' to be' gual. Ba nchoglaon čhegaque' yesezaca'zi'e gabil toli tocanē ga nacchgua čol. ¹⁸ Le chesoe'chgüe' diža' chesonxen cuingaque' na' chese'go'oyele' bene' za' besyechoj lo da' xinjen' cont da' yoble yesonteze' da' yela' zto' da' chesezelaže' yesone' len cuerp čhegaquen' can' chesoncze bene' ca'. ¹⁹ Bene' ca' chosozejni'ide' diža' güenlaže' chese'e legaque' guac yesenite' mbalaz yesone' bite'ze žan čhegaque', la'czla' zjanaque' ca to esclavo len da' nac da' yela' zto'. Le note'tezcho naccho ca to esclavo len da' xinjen' cate' choncho con can' žan goncho. ²⁰ Na' bene' ba zjanombi'e Xancho Jesucriston' ben' none' yela' mban čhecho toli tocanē, ba besyechoje' lo' da' xinj ca' dan' nac da' yela' zto' dan' gosone' cate' biḡa' yesombi'ene', na' še soe da' xinjen' legaque' na' da' yoble yeso'e latje nabian' legaque' cont yesonchen', da' malch gac čhegaque' clel ca caten' biḡa' yesyechoje' lo da' xinjen' da' nechua'. ²¹ Yejni'a šaca' bi gosombi'e xnez Diosen' da' zej to licha clel ca gosebejyichje' nez güen da' nžia bia' Diosen' šejlencho. ²² Ba goc čhegaque' can' ža to diža' li žan: "Beco'na' cheyagwba' dan' ba beyebba' na' cošen' cate' bačh bguazjchoba' cheyo'oba' lo gonan' da' yoble."

3

Yid Jesucriston' da' yoble

¹ Bene' migw chia', chacda' le'e, na' da' nga naquen cart gwchope da' chzoja' le'e. Na' ba bzoja' chopten da' chaclaža' gonle xbab che diža' güen da' ba nombia'le. ² Le šjayze'e diža' da' bosozoj bene' ca' gosac lo na' Diosen' ben' goso'e xtižen' cani'. Na' lecze le šjayze'e dan' nžia bia' Xancho Jesucriston' goncho, Jesucristw ben' none' yela' mban čhecho toli tocanē. Lenḡa' diža' da' ba bzejni'i neto' postlw le'e.

³ Naquen da' žialao šejni'ile da' nga. Na'a ba zoa te che yežlion', na' yesechoj bene' yesonle' che xtiža' Diosen' na' yesenite' yesone' con can' ža xbab mal čhegaquen'. ⁴ Na' yesonle' che Diosen' yesene': "¿Batxen' gac can' gwna Diosen' yid Criston' da' yoble? Bi naquen da' šejle'cho, le toz can' chac ža na'aža lecze can' goc cate' gwnita' da' xoxxta'ocho ca', na' lecze ca'czen' goc caten' gwẋete yežlion'." ⁵ Bene' chesena ca' bi chesaclaže' yesone' xbab can' ba ben

Diosen'. Caten' gwxe yaban' na' yežlion', con gwne' yesaquen na' goc can' gwnen'. Gocxe yežlion' lao nisdao' da' nyečhj mbi'in doxen, na' bchine' nisen' cate' benen'. ⁶ Nach bžin ža cate' da' ca' bene' bžiaye'en len yejw sio' juisyw da' goc cate' bexoa nisen' lo yežlion'. ⁷ Na' Diosen' lecze ba bžie' bia' yaban' na' yežlion' ne' zjanitan' can' zjanaquen na'a cate' žin ža gac juisyw. Cana' yeseyen cate' gone' yesezaca'zi' bene' mal ca' toli tocanē.

⁸ Na' le'e bene' migw chia', chacda' le'e, na' che'nda' bi ganlaže'le da' nga, len Xancho Diosen' toz ca' nac to ža o to mil iz, bi naquen sša len le'. ⁹ Bal bene' chesacde' ba chže Xancho Diosen' da' biņa' yid Jesucriston' da' yoble can' gwne' yide'. Perw bi nacho chžede', san da' nape' yela' chxenlaže' len chio' beňach na' chbeze' da' bi chaclaže' cuiayi' note'tezcho. Chaclaže' yogo'cho yetinje xtoła'chon'.

¹⁰ Na' Xancho Jesucriston' yide' da' yoble cate' bi nane'laže' bene', can' chac cate' cho'o gwban liž bene' šeže'le. Nach gac to sšag xen, na' te che yogo' da' ca' chle'echo le'e yaban', na' yogo' da' de le'e yaban' cuiayin' lo yi' gual, na' yežlion' na' da' de lagüen lecze yeseyen.

¹¹ Na' da' nezecho yesyenit yogo' da' ca' can' ba gwnia', cheyala' gon cuincho lo na' Diosen' na' soaczcho gonxenchone' do yichj do laže'cho. ¹² Na' cheyala' soa cuzcho batcan' žin ža gon Diosen' gac juisyw, na' goncho cont yob gaquen. Žana' šey le'e yaban' na' da' ca' chle'echo le'e yaban' yesyeyonan' lo yi' gual na' yesyeniten. ¹³ Perw chio' zoacho lez le'e yaban' na' yežlion' yesyeyaquen da' cobe can' ba gwna Diosen', na' con bene' cheson da' güen da' zej to licha yesenita' cana'.

¹⁴ Da'nana' bene' migw chia', šlac chbezcho gac da' ca', cheyala' goncho con ga zelao saque'cho cont soacho binlo len Diosen' cont bibi doła' de da' gwchenen yichjlažda'ochon'. ¹⁵ Na' cheyala' gacbe'echo nape Xancho Diosen' yela' chxenlaže' len chio' beňach cont gwzenagcho che' na' gone' yela' mban checho toli tocanē. Lecze can' ba bzoj postlw Pablon' checho ben' chaquecho, cho'e dižan' len yela' sina' da' bnežjw Diosen' le'. ¹⁶ Na' yogo' cart che' ca' chesoen' diža' che da' quinga ba bzoja', la'czla' bzoje' bal da' nac zdebe šejni'icho. Na' bene' biņa' yesejni'i xtiža' Diosen' binlo na' biņa' yesezoačache' yesejni-laže'ne' chesejni'ide' da' ca' clele, can' chesone' len bichle Xtiža' Diosen' da' nyoj, na' da'nana' zjangüe'e nez da' gwžiyin' legaque'.

¹⁷ Chacda' le'e bene' migw chia', na' ba nezele da' ca' ba bzoja' le'e. Na' le gwsaca' cont bi šejle'le xtiža' bene' bi chosozenag che Diosen', bene' cheson da' zej clele, san le soačach le gwzenag che Diosen'. ¹⁸ Na' zej gacbe'echle catec chaque Xancho Jesucriston' le'e na' zej gombia'chline', Jesucristw ben' none' yela' mban checho toli tocanē. Cheyala' soacho gonxenchwne' na'a na' toli tocanē. Can' gonšcaczcho.

CART NECHW DAN' BZOJ POSTLW SAN JUAN

Jesucriston' chenezjue' yela' mban toli tocanē che bene chesejnilaže'ne'

¹ Chyixjue'eda' le'e che ben' nzi' Xtiža' Dios, ben' chnezjue' yela' mban toli tocanē che bene' chesejnilaže'ne'. Ba zoacze' caten' gwxe yežlion'. Neto' postlw bzenagto' xtižen', ble'eto'ne' na' gwdanto'ne'. ² Len' golje' benačh na' ble'eto'ne' na' choe'to' diža' žato' mbancze'. Chyixjue'eto' le'e ba zoacze' len Xacho Diosen' caten' gwxe yežlion' na' bedesoalene' chio' benačh. ³ Chyixjue'eto' le'e che bena' ble'eto' na' che bena' bzenagto' xtižen' cont gonle' neto' txen. Na' ca nac neto', da' li ba nacto' txen len Xacho Diosen' na' len Xi'ine' Jesucriston'. ⁴ Chzojto' le'e cart nga cont soale yebechgüele.

Diosen' naque' la'zelagüe bene' güen

⁵ Neto' bzenagto' be' Jesucriston' diža' che Xe' Diosen' na' chyixjue'eton' le'e, bzejni'ide' gwne' Diosen' naque' ca to be'ni' da' naque' la'zelagüe bene' güen bene' laždao' xilaže'. Bibi da' xinj none'. ⁶ Na' še žacho choncho txen len Diosen' šlac choncho da' xinjen', con chonlaže'cho. Dan' chonchon' bi zejen to li. ⁷ Diosen' naque' la'zelagüe bene' güen bene' laždao' xilaže'. Na' še chio' zoacho choncho da' güenna' can' zoa Diosen' chone' da' güenna', nachen' naccho txen tocho yetocho na' yichjlažda'ochon' chega'anen xilaže' lagüete Xi'ine' Jesucriston' blalj xchene' cont beque'e yogo'lol' xtoła'chon'.

⁸ Še žacho bibi xtoła'cho de, chziye'ze cuinchon' na' bi choe'cho diža' li. ⁹ Perw na' še chxoadola'cho lao Diosen', chezi'xene' dola' chechon' na' chnitlagüe' yogo'te da' xinj da' choncho, le chone' con can' že' na' chone' da' zej to li. ¹⁰ Še žacho bibi da' mal na' goncho, choncho Diosen' ca to bene' güenlaže' na' biña' šejle'cho diža' li čhen'.

2

Criston' chñabe' gaclen Xacho Diosen' chio'

¹ Xi'inda'ogua', chzoja' le' cart nga cont cbi gonle da' xinj. Perw na' še no chio' goncho da' xinjen', zoa Jesucriston' ben' chon da' zej to li na' chñabe' yezi'xen Xacho Diosen' checho. ² Jesucriston' blalj xchene' neche xtoła'chon' cont yozoe' chio' binlo len Diosen', na' gague neche xtoła' chio'zen' blalj xchene' san neche xtoła' yogo'lol' benačh.

³ Na' še choncho can' ža Diosen' nachen' guac nacho ba nombia'chwne'. ⁴ Na' še žacho ba nombia'chwne' na' bi choncho can' že'na', naccho bene' güenlaže' na' diža' li che Diosen' biña' šon' yichjlažda'ochon'. ⁵ Ba chaquecho Diosen' ca cheyala' gaquechone' še choncho con can' že'na', na' še ba choncho ca', nezecho ba nacchone' txen. ⁶ Na' note'tezcho še žacho naccho Diosen' txen, cheyala' soacho goncho da' güen can' ben Jesucriston'.

Dan' ža Diosen' cheyala' goncho

⁷ Le'e bene' chacda', dan' chzoja' nga chona' mandadw naquen' gonle, bi naquen to da' cobe. Naquen to da' gole dan' gwnezele caten' gwzolaole chejnilaže'le Jesucriston', le naquen diža' da' ba benele. ⁸ Na' dan' chona' mandadw naquen' gonle, bia'cze naquen ca to da' cobe, le ba bla' diža' güen che Criston' len benachen' na' ba chzolao chde che yogo' da' ca' da' chgue'e Diosen'. Na' dan' chona' mandadw gonle, Criston' ba blo'ede' naquen da' zaque' na' lecz le'e ba chlo'ele naquen da' zaque'.

⁹ Note'tezcho la'czla' žacho ba noncho Diosen' txen, bi naquen ca' še chgue'e lježcho; nac chol lo' lažda'ochon'. ¹⁰ Note'tezcho še chaque lježcho nachen' da' li ba noncho Diosen' txen na' bibi de da' yoslažon' chio' lo da' xinjen'. Lo' yichjlažda'ochon' ba naquen ca to da' yo'o be'ni'. ¹¹ Na' note'tezcho še chgue'e lježcho nac chol lo' lažda'ochon' na' zejcho ca to bene' lchol bene' bi chacbe'e galen' yequ'e, le bi chacbe'echo can' cheyała' goncho.

¹² Ba bzoja' da' quinga par le'e xi'inda'ogua', le Diosen' ba bezi'xene' chele dan' chejnilaže'le Jesucriston' do yichj do laže'le. ¹³ Ba bzoja' da' quinga par le'e bene' gole, le ba nombia'le Jesucriston' ben' ba zoa cate' gwxe yežlion'. Ba bzoja' da' quinga par le'e bene' güego' chaban, le bač gwzoele bi chzenagle che Satanás dan' chnabia' da' xigüe' ca'.

Ba bzoja' da' quinga par le'e xi'inda'ogua' da' ba nombia'le Xacho Diosen'. ¹⁴ Ba bzoja' da' quinga par le'e bene' gole, da' ba nombia'le Jesucriston' ben' ba zoacze cate' gwxe yežlion'. Lecz ca' ba bzoja' da' quinga par le'e bene' güego' chaban da' ngo'o yichjle xtiža' Diosen' na' da'nan' ba gwzoele bi chzenagle che Satanásen'.

¹⁵ Bi selaže'le gacle toze len bene' ca' bi chosozenag che Diosen', na' neca selaže'le gonle can' chesonen'. Note'tezcho chzelaže'cho goncho can' chesonen', bi chaquecho Xacho Diosen'. ¹⁶ Bene' bi chosozenag che Diosen' chesone' da' mal dan' chzelaže' lažda'ogaquen', na' chesezelaže' bi dan' chesele'ede', na' lecz ca' chesa'laže'. Na' yogo' da' ca' chesone' bi naquen che Xacho Diosen', naquen che da' mal dan' de yežlio nga. ¹⁷ Na' da' te che yežlio nga len da' ca' chesezelaže' bene' ca' bi chosozenag che Diosen'. Perw še chio' choncho can' chazlaže' Diosen', soaczcho len Diosen' toli tocanē.

Nezecho bin' nac da' li

¹⁸ Xi'inda'ogua', ba zoa žin ža te che yežlio nga. Neto' ba bzeneto' le'e gwžin ža yid ben' gonchgua contr Criston', na' na'a bene' zan ba za'aque' chesone' contr Criston'. Da'nan' nezecho ba zoa žin ža te che yežlion'. ¹⁹ Ladjo chio' besechoj bene' ca' chesegue'ede' Criston'. Gague do laže' gosone' txen len chio' chejnilaže'chone'. Le šaca' do laže' gosone' txen len chio', ne' nite' chesonche' chio' txen še ca'. Na' dan' bač besyechoje' nacbja' bi zjanaque' chio' txen.

²⁰ Criston' ba bene' chio' Spiritw che Diosen' na' da'nan' yogo'cho nezecho can' ža diža' li che Diosen'. ²¹ Chzoja' le'e da' nga le bač nombia'le diža' li che Diosen', gague nacho bi nombia'lenna', na' lecz ca' nezele ne toz diža' güenlaže' ca nchixe diža' li che'na'.

²² Bene' güenlaže' ben' ža Diosen' bi gwsele' Jesucriston' golje' benač. Ben' že' ca' chgue'ede' Criston', le chzoe' Xacho Diosen' to šla'ale len Xi'ine' Criston'. ²³ Na' note'tez bene' cho'e diža' že' Diosen' bi gwsele' Jesucriston', bitw zoa Xacho Diosen' len le'. Perw note'tez bene' cho'e diža' že' Diosen' gwsele' Jesucriston', zoacze Xacho Diosen' lente Xi'ine' Jesucriston' len le'.

²⁴ Le soa le gwzenag che da' ca' ba bzeneto' le'e caten' gwzolaotele chejnilaže'le Criston'. Na' še soatezle gwzenaglen, nachen' soatezle len Xacho Diosen' na' len Xi'ine' Jesucriston'. ²⁵ Na' da' gwna Jesucriston' gone' checho, gone' yela' mban toli tocanē.

²⁶ Ba bzoja' le'e da' nga bia' diža' che bene' ca' chesaclaže' yesonlede' le'e. ²⁷ Na' Jesucriston' ba bene' chio' Spiritw che Diosen' zoan lo' lažda'ochon' chzejni'in chio' yogo'lol dan' cheyała' nezecho che cuine'. Na' Spiritw che Diosen' choen' diža' li, bi chonlažen'. Na' dan' zoan chzejni'in chio', bi chyažjecho nochle gwzejni'i chio' bi dan' nac da' li. Da'nan' le gwzenag dan' bzejni'i Spiriton' le'e na' le soa len Jesucriston'.

²⁸ Na' na'a xi'inda'ogua', cheyala' soatezcho gwzenagcho che Jesucriston' cont bi žebcho cate' yide' da' yoble na' cont bi yeto'echo na' cont bi nan gwcuase'chone' cate' le'echo ba ble'e. ²⁹ Na' nezecho Criston' zeje' chone' con can' cheyala' gone', lecze ca' nezecho yogo'czecho še zejcho choncho can' cheyala' goncho naccho xi'in Dios.

3

Naquen' goncho še naccho xi'in Dios

¹ Le gon xbab catec chaquechgüe Xacho Diosen' chio' da' chne' naccho xi'ine', na' da' licze xi'ine' chio'. Beñe' bi chesejnilaže' Diosen' bi chesejni'ide' naccho xi'in Dios, le bi chesacbe'ede' non' nac Diosen'. ² Xi'inda'ogua', chio' chejnilaže'cho Jesucriston' bačh naccho xi'in Dios. Na' biña' gata'bia' nac gaccho. Con nezecho caten' Jesucriston' yide' da' yoble canan' le'echwne' can' naque' na' yeyac yichjlažda'ochon' can' nac yichjlaždao' le'. ³ Na' note'tezcho še zoacho lez gaccho can' naquen', soacho gwsaca'cho cont lažda'ochon' gaquen xilaže', le nezecho laždao' Jesucriston' naquen xilaže'.

⁴ Note'tez beñe' zoe' chone' da' xinjen' chone' clele len ley che Diosen', le cate' choncho da' xinj choncho clele len da' ba bžie' bia' goncho. ⁵ Nezczecho Jesucriston' bide' yežlio nga cont beque'e xtoła' chio' beñach, na' ca nac Jesucriston', le bibi da' xinj none'. ⁶ Na' še chio' zoacho chzenagcho che', bi zoacho choncho da' xinj, san še zoacho choncho da' xinjen', biña' šejni'icho che' na' biña' gombia'chone'. ⁷ Xi'inda'ogua', bi güe'le latje no siye' le'e, še choncho da' güen can' cheyala' goncho, zejcho to licha can' zej Jesucriston'. ⁸ Na' še zoacho choncho da' xinj, naccho xi'in Satanásen', le Satanásen' zoaczen chonen da' xinj cate' gwmete yežlion'. Na' bid Xi'in Diosen' yežlio nga par gwcueze' dan' chon Satanásen'.

⁹ Note'tezcho še Diosen' ba gwque'e chio' ca xi'ine' bi zoacho choncho da' xinj, le ba bocobe' yichjlažda'ochon' na' bich žan goncho da' xinjen' da' zoa Diosen' len chio'. ¹⁰ Na' da' nga chlo'en non' nac xi'in Diosen' na' non' nac xi'in Satanásen': note'tezcho še bi zoacho choncho da' güen, bi naccho xi'in Dios, na' lecze ca' note'tezcho še bi chaque lježcho, bi naccho xi'in Dios.

Cheyala' gaque lježcho

¹¹ Na' da' nga ba beneczecho cate' gwzola'cho chejnilaže'cho Jesucriston': cheyala' gaque lježcho tocho yetocho. ¹² Bi gaccho ca goc da' Caín, goque' xi'in Satanásen' na' beyote' beñe' biše'. ¿Nezele bičen' betue' le'? Betue' le' le gwzoe' bene' da' xinj na' beñe' bišen' gwzoe' bene' da' güen.

¹³ Da'n'an' xi'inda'ogua', bi yebanele cate' beñe' ca' bi chosozenag che Diosen' chesegue'ede' le'e. ¹⁴ Nezecho bich mbiayi' yichjlažda'ochon', san ba de yela' mban checho toli tocañe le ba chaque lježcho. Na' še bi chaque lježcho, ne' mbiayi' yichjlažda'ochon'. ¹⁵ Note'tezcho še chgue'e lježcho, lao Diosen' naccho beñe' güet beñe'. Na' nezecho beñe' güet beñe' bi de yela' mban che' toli tocañe. ¹⁶ Bzane cuin Jesucriston' neche chio' gosote'ne' dan' leca chacde' chio', da'n'an' nezecho can' cheyala' gaque lježcho. Na' ca'cze chio' cheyala' zane cuincho gatcho cont gaclen lježcho še chonen byen. ¹⁷ Na' cate' de da' de checho na' nezecho beñe' lježcho chyažjden', še bi cheyaše'chone' bi gac nacho chaquecho Diosen'. ¹⁸ Xi'inda'ogua', bi cheyala' gaque lježcho de diža'ze. Cheyala' gaque lježcho do yichj do laže'cho na' soacho gaclen lježcho.

Nac goncho cont bi žebcho Diosen'

¹⁹ Na' nezecho naccho txen len Dios ben' choe' diža' li še chaque lježcho can' gwnia'na', na' še goncho ca', na' gacbe'echo zoacho binlo len Diosen'.

20 Na' še zoa cate' choncho xbab bi zaca'cho par na Diosen' xi'ine' chio', Diosen' zaca'che' ca xbab chechon' na' nezde' yogo'lol. Da'nan' cheyala' gwzenagcho can' žen', gague con can' ža xbab chechon'. 21 Le'e bene' chacda', še lo' yichjlažda'ochon' chache'echo bitw napcho doła', nachen' bich chžebcho Diosen'. 22 Na' bite'tez dan' chnabechone' choñczen', le choncho da' nžie' bia' goncho na' can' chaclažen'. 23 Na' da' nga Diosen' nžie' bia' goncho, šejnilaže'cho Xi'ine' Jesucriston' do yichj do laže'cho na' gague lježcho tocho yetocho, con can' nžie' bia'. 24 Na' še choncho can' nžie' bian', nach zoacho len Diosen' na' Diosen' zoe' len chio'. Na' quinga nezecho Diosen' zoe' len chio': ba bene' chio' Spiritw chen' zoan lo' lažda'ochon.

4

Spiritw che Diosen' na' dan' chon contr Criston'

1 Le'e bene' chacda', bi šejle'le che yogo' bene' chesene' cheso'e diža' dan' gož Spiritw che Diosen' legaque', san le gone' prueba še xtiža'gaquen' naquen' da' bzejni'i Dios o še cbi naquen. Le gone' prueba, le ba chaš bene' zan bene' chesonlaže' chesene' cheseyixjue'ede' dan' gož Diosen' legaque'. 2 Na' quinga guac nezecho še Spiritw che Diosen' bzejni'in legaque' dižan' cheso'e: yogo' bene' cheso'e diža' chesene' Jesucriston' naque' Dios golje' benač, nezecho yo'o Spiritw che Diosen' lo' yichjlažda'ogüe'. 3 Na' bene' cheso'e diža' chesene' Jesucriston' bi naque' Dios golje' benač, nezecho Spiritw che Diosen' bi yo'on lo' yichjlažda'ogüe'. Bene' ca' cheso'e diža' da' chonen contr Criston'. Na' ba bzeneto' le'e yid da' gon contr Criston' na' na'a ba blan' chonen contr le'.

4 Xi'inda'ogua', ba nacle Diosen' txen na' da'nan' bi chejle'le che bene' güenlaže' ca'. Chzoele cbi chejle'le chegaque' neche da' yo'o Spiritw che Diosen' lo' lažda'olen' chzejni'in le'e, na' Spiriton' chnabia'chen ca Satanásen' dan' zoa len bene' ca' bi chosozenag che Diosen' yežlio nga. 5 Bene' ca' bi chosozenague' che Diosen' cheso'e diža' che dan' chac yežlio nga, na' da'nan' bene' lježe' ca' chosozenague' chegaque'. 6 Ca nac chio', ba naccho Diosen' txen. Da'nan' yezica'chle bene' chosozenague' che Diosen' lecz chosozenague' xtiža'chon'. Na' bene' ca' cbi zjanaque' Diosen' txen bi chosozenague' diža' chechon'. Can' chac nezecho no bene' yo'o Spiritw che Diosen' lo' lažda'ogüe' chzejni'in le' diža' li na' no bene' chzenague' diža' güenlaže' dan' chzejni'i Satanásen' le'.

Diosen' chacde' benač

7 Le'e bene' chacda', cheyala' soacho gague lježcho tocho yetocho, le Diosen' zoacze' chone' cont chaque lježcho. Na' note'tezcho še chaque lježcho nachen' nacbia' naccho xi'in Dios na' nombia'chone'. 8 Na' note'tezcho še bi chaque lježcho bi nombia'cho Diosen', le chio' bi choncho can' chonen'. Len' zoacze' chacde' benačhen', le con can' nac yichjlažda'ogüe'. 9 Dan' ben Diosen' bzejni'ide' chio' can' chacde' chio', gwsele' laye'e Xi'ine' yežlio nga cont note'tezcho bancho toli tocañe še chejnilaže'chone' do yichj do laže'cho. 10 Bi goquecho Diosen'; lelen' gocde' chio' na' gwsele' Xi'ine' Jesucriston' cont bnitlagüe' xtoła'chon'.

11 Le'e bene' chacda', dan' chaque Diosen' chio' lecz ca' cheyala' gague lježcho tocho yetocho. 12 Nono zoa bene' ba ble'ede' Diosen'. Perw na' še zoacho chaque lježcho tocho yetocho, nacbia' Diosen' zoacze' len chio' na' ba chaquechone' can' cheyala' gaguechone'. 13 Nezecho zoacho len Diosen' na' le' zoacze' len chio' da' ba gwsele' Spiritw chen' zoan lo' yichjlažda'ochon'. 14 Na' neto' postlw ba ble'eto' na' choe'to' diža' nezeto' gwseła' Xacho Diosen' Xi'inen' cont gwnitlagüe' xtoła' note'tez bene' šejnilaže' le'. 15 Na' note'tezcho

še chejle'cho na' choe'cho diža' žacho Jesucriston' naque' dogualje Xi'in Dios, Diosen' zoe' len chio' na' lecz zoacho txen len Diosen'.

¹⁶ Chio' ba nezecho na' chejle'cho chaque Diosen' chio'. Diosen' zoacze' chacde' benachen', le con can' nac yichjlažda'ogüe'. Na' note'tezcho še zoacho chaquecho Diosen' na' lecze zoacho chaque lježcho, nachen' zoacho len Diosen' na' le' zoacze' len chio'. ¹⁷ Diosen' zoacze' chaclene' chio' cont chaquechone' can' cheyala' gaquechone' na' chaque lježcho can' cheyala' gaque lježcho, na' Diosen' chone' ca' cont bi žebcho cate' žin ža gone' yela' justis che yogo' benach. Na' bi žebcho še zoacho chaque lježcho yežlio nga can' chon Jesucriston'. ¹⁸ Še chaquecho Diosen' ca cheyala', bibi de da' žebcho. Caten' chžebchon' naquen ca to castigw len chio', na' še ne' chžebcho bina' gaquecho Diosen' can' cheyala' gaquechone'.

¹⁹ Chio' chaquecho Diosen' le len' gocde' chio' da' nechw. ²⁰ Note'tezcho še chgue'e lježcho, la'czla' žacho chaquecho Diosen', con chonlaže'chon'. ¿Nacxe goncho gaquecho Diosen' ben' bi chle'echo še bi chaque lježcho bene' chle'etecho? ²¹ Na' ba bene' mandadw can' cheyala' gon chio' chaquechone', že' lecz cheyala' gaque lježcho.

5

Gwcuascho da' malen'

¹ Note'tez chio' naccho xi'in Dios še chejle'cho Diosen' gwsele' Jesucriston' cont nabi'e. Na' še chaquecho Xacho Diosen', lecz can' gaque lježcho, le lecz xi'in Dios bene' lježchon'. ² Cate' chio' zoacho chaquecho Diosen' na' choncho da' bžie' bia' goncho, nezecho lecze zoacho chaquecho yezica'chle xi'in Dios. ³ Še chaquecho Diosen', choncho can' nžie' bia' goncho. Na' dan' nžie' bia' goncho, bi naquen zdebe gonchon. ⁴ Note'tezcho še ba bocob Diosen' yichjlažda'ochon', ba chzoecho chcuascho da' xinj dan' de yežlio nga. Na' dan' chejnilaže'cho Jesucriston', da'nan' chzoecho chcuascho da' xinjen' dan' de yežlion' bi chonchon. ⁵ Na' noch no chzoede' chcuase' da' xinj dan' de yežlio nga san bene' ca' chesejle'e Jesucriston' naque' dogualje Xi'in Dios, legaquen' chesezoede' chosocuase' da' xinjen'.

Diosen' cho'e diža' že' Jesucriston' naque' dogualje Xi'ine'

⁶ Quinga ben Jesucriston' šlac bide' yežlio nga, bnežjw cuine' gwzoe' nis na' blalj xchene'. Bi nacho con gwzoaze' nis, san lecz blalj xchene'. Na' Spiritw che Diosen' choen' diža' bene' ca', na' Spiriton' choen' pur diža' li. ⁷ Na' nita' šone bene' chesegüe'e da' bali yaban' cheso'e diža' che Jesucriston': Xacho Diosen', len Jesucriston' ben' nzi' Xtiža' Dios na' len Spiritw che Diosen'. Na' toz can' cheso'e diža' che Jesucriston'. ⁸ Lecz de šone da' chesego'on da' bali chesoen' diža' che Jesucriston' yežlio nga: Spiritw che Diosen', na' dan' gwzoe' nis na' dan' blalj xchene'. Na' toz ca chesoen' xtižen'. ⁹ Chejle'cho xtiža' benachen', na' nacch xtiža' Diosen' da' zaca'ch, na' Diosen' ba bi'e diža' che Xi'ine' Jesucriston'. ¹⁰ Na' še chejle'cho Jesucriston' naque' dogualje Xi'in Dios, nezecho lo' lažda'ochon' xtiža' Xacho Diosen' dan' bi'e che' naquen da' li. Na' še bi chejle'cho che Diosen', chonchone' ca to bene' gūenlaže' da' bi chzenagcho diža' dan' cho'e che Xi'ine'na'. ¹¹ Na' xtiža' Diosen' chzejni'in chio' guata' yela' mban che benachen' toli tocanē še yesejnilaže' Xi'ine' Jesucriston'. ¹² Quinga naquen, de yela' mban checho toli tocanē še chejnilaže'cho Jesucriston', na' bi de yela' mban checho toli tocanē še bi chejnilaže'chone'.

Can' beyož cart nga da' bzoj Postlw San Juan

¹³ Ba bzoja' le'e cart nga, le'e chejnilaže'le Xi'in Diosen', cont nezele de yela' mban chele toli tocanē.

¹⁴ Na' bitw chžebcho chol güižcho Diosen', le nezecho chzenague' checho cate' chnabcho lagüen' da' chazlaže'. ¹⁵ Na' cate' nezecho chzenague' checho bite'tez dan' chnabechone', lecz nezecho gone' da' ca' ba gwnabechone'.

¹⁶ Na' še chache'echo bene' lježcho chone' bi da' xinj da' bi zaca' sela' Diosen' le' lo yi' gabil, cheyala' nabecho Diosen' gaclene' le' cont yezoe' binlo len Diosen' da' yoble. Da' xinj da' cheson bal bene' zacan' sela' Diosen' legaque' lo yi' gabil. Bi žia' nable gaclen Diosen' bene' ca'. ¹⁷ Napcho dola' še choncho bite'tez da' xinj, perw gague yogo' da' xinj dan' chonchon' sela' Diosen' chio' lo yi' gabilen'.

¹⁸ Nezecho še ba bocob Xacho Diosen' yichjlažda'ochon' bi zoacho choncho da' xinjen' le zoa Jesucriston' ben' nac Xi'in Diosen' chcuase' chio' len dan' chon Satanásen', na' da'nan' bi soen gwžiayin' chio'.

¹⁹ Lecz nezecho Diosen' zoe' len chio', perw bene' ca' bi chosozenague' che', Satanásen' chnabian' yichjlažda'ogaquen'.

²⁰ Na' nezecho ba bid Xi'in Diosen', na' ba bzejni'ide' chio' cont nombia'cho Xe' ben' nac dogualje Dios. Nach zoacho toz len ben' nac dogualje Dios dan' zoacho toz len Xi'ine' Jesucriston'. Len' naque' dogualje Dios na' chnežjue' yela' mban toli tocanē che bene' chejnilaže' le'. ²¹ Xi'inda'ogua', gague nochle šejnilaže'le san ben' nac dogualje Dios. Da' na'zen' chzoja'.

CART GWCHOPE DAN' BZOJ POSTLW SAN JUAN

Chio' nombia'cho diža' li che Diosen' cheyala' gaque lježcho

¹ Neda' naca' beṇe' gole blao, na' chzoja' le' no'ole, len' ba gwlej Diosen' chzenago' xtižen', na' len xi'ino' ca'. Da' li chacda' le'e, na' gague nedaze' san lencze' yogo' beṇe' yezica'chle beṇe' zjanombia' diža' li che Diosen' chesacde' le'e. ² Chaqueto' le'e da' yo'o diža' li che Diosen' lo' lažda'ochon' na' soan lo' lažda'ochon' gaclenen chio' toli tocaṇe. ³ Xacho Diosen' na' len Xi'ine' Xancho Jesucriston' yesaclene' le'e, yesyeyaše' yesyeži'ilaže'de' le'e na' yesone' cont soa cuezle binlo len xbab dan' yo'o lo' yichjlažda'olen', le ba nombia'le diža' li che Diosen' na' ba chaque lježle tole yetole.

⁴ Leca gwbeda' cate' gwnezda' baḷ bi' chio' ca' ba nita'be' chesombe' can' ža diža' li che Xacho Diosen' can' bžie' bia' goncho. ⁵ Dan' cheyala' goncho, no'ole, cheyala' soacho gaque lježcho tocho yetocho. Na' dan' žia' goncho ca', bi naquen to da' cobe; naquen dan' ba bzeneto' le'e caten' gwzolaole chejnilaže'le Jesucriston'. ⁶ Še chaquecho Diosen' goncho da' nžie' bia'. Na' nezele nžie' bia' gaque lježcho, le cate' gwzolaole chejnilaže'le Jesucriston' bzejni'ito' le'e cheyala' gaque lježcho.

Chas'bene' chesonlede'

⁷ Beṇe' zan chesaše' lo yežlion' chosozejni'ide' clele, le cheso'e diža' che Jesucriston' chesene' bi naque' Dios ben' bide' golje' beṇač. Note'tez beṇe' chon ca' naque' beṇe' gwxiye' na' chone' contr Criston'. ⁸ Bi gwzenagle xtiža'gaque' san le soa le gon cont Diosen' gac gone' soale mbalaz juisyw da' chonle can' chazlaže' gonle.

⁹ Note'tezcho še chzoacho ca'ale dan' bsed blo'e Criston' cont chzenagcho bichle diža' dan' chzejni'i beṇe' chio', bi zoa Diosen' len chio' še ca'. Na' note'tezcho še zoacho chzenagcho che dan' bsed blo'e Criston', Xacho Diosen' len Xi'ine' Criston' nite' len chio'. ¹⁰ Na' še no beṇe' yide' gan' zoalen' chaclaže' gwzejni'ide' le'e da' bi nac xtiža' Criston', bi gwleblene' ližlen' na' bi gwguaplene' tiox. ¹¹ Cheyala' gonelene' ca', le še gwlebelene' zejen txen chonlen'ne' da' xinjen'.

Goclaže' šjane'e legaque'

¹² De da' zan da' nia' le'e perw bich chaclaža' gwzojan' le'e yiš. Zoa' lez yida' gana' zoale na' güe'lena' le'e diža' cho'a cont soacho mbalaz juisyw.

¹³ Xi'in' no'ole bilon', no'ole ben' lecze gwlej Diosen' cont chzenague' che', chosoguape' le'e tiox. Da' na'zen' chzoja' na'a.

CART GWYONE DAN' BZOJ POSTLW SAN JUAN

Postlw San Juanna' cho'e diža' güen che ben' le Gayo

¹ Neda' naca' beñe' gole blao, na' chzoja' cart nga par le', xmigua' Gayo. Da' li chacda' le'.

² Beñe' migw, chñaba' lao Diosen' gac güen chio' na' so' güen ca güenna' ba zoa lo' yichjlažda'oguo'. ³ Leca bebeda' cate' besela'ac to chope beñe' lježcho goso'e diža' can' zoaczo' chono' güen da' chzenago' diža' li che Diosen' do yichj do lažo'. ⁴ Len neda' le'e nacle ca xi'ina', na' bich bi de da' chbechda' ca chbeda' chnezda' chzenagle diža' li che Diosen' do yichj do laže'le.

⁵ Beñe' migw, chono' güen dan' chacleno' beñe' lježcho ca' beñe' zjanac beñe' zito'. ⁶ Legaque' ba goso'e diža' len neto' chdop chžagto' nga chonxento' Jesucriston' can' bži'ido' legaque'. Na' cate' yesele'e da' yoble güe'sco'ne' bi dan' yeseyažde' cont yesyegüe'e nez da' yoble, le legaque' chesone' xšin Diosen'. ⁷ Ba gosa'ac laže' cont cheso'e xtiža' Criston' na' bibi goclen chesezi'e che beñe' ca' bi chesejle'e che Criston'. ⁸ Da'nana' cheyala' gwlebcho beñe' ca', gaclenchwne' na' gonchone' txen cont yesombia' beñe' diža' li che Diosen'.

Diótrefes chone' da' mal

⁹ Bač bzoja' le'e chdop chžagle chonxenle Jesucriston', perw na' Diótrefes chaclaže' gague' la'zelaoze beñe' blao len le'e na' bi chzenague' cheto'.

¹⁰ Da'nana' caten' yida' dezna'a le'e na' yapa'ne' che yogo' dan' chone' contr neto' na' diža' güenlaže' dan' chñe' cheto'. Na' gague' da' na'zen' chone', lecz bi chlebe' beñe' lježchon' liže' beñe' za'ac zito', na' cate' no le'e chaclaže'le gwleble legaque' ližlen' nach chžone' gonle ca', na' chbeje' le'e ladjo lježle chdop chžagle chonxene' Jesucriston' cate' chleble legaque'.

¹¹ Beñe' migw, bi gono' txen len beñe' ca' cheson da' xinjen', san ben txen len beñe' ca' cheson da' güen. Note'tez beñe' zoateze' chone' da' güen, nachia' nombi'e Diosen', na' note'tez beñe' zoateze' chone' da' xinjen', nachia' biña' gombi'e Diosen'.

Demetrio' chone' da' güen

¹² Yogo'ze beñe' cheso'e diža' güen che Demetrio na' nachia' zejlene' diža' li che Diosen'. Lencze neto' choe'to' diža' žato' chone' da' güen, na' nezele choe'to' diža' li.

Can' beyož carten'

¹³ Dech da' zan da' goda' ñia' le'e, perw bich chaclaža' gwzojan' le'e yiš. ¹⁴ Zoa' lez yob yežagcho cont güe'cho diža' cho'a cate' soacho txen.

¹⁵ Soago' binlo len xbab dan' yo'o lo' yichjlažda'oguo'. Beñe' migw chion' nita' nga chosoguape' le' tiox. Na' chñaba' gwguapšco' tiox to to beñe' migw cheto' ca' nita' gan' zoalen'. Da' na'zen' chzoja' ña'a.

CART DAN' BZOJ SAN JUDAS

San Judas chzoje' bene' ca' zjanaque' lo na' Diosen'

¹ Neda' Judas naca' bene' güen žin che Jesucriston', na' naca' bene' biše' Jacobo. Chzoja' le'e ba gwlej Xacho Diosen' cont nacle lo ne'en nach zoale chcuas chcue'ej Jesucriston' le'e len da' malen'. ² Chnaba' gon Xacho Diosen' cont gache'echle cheyaše' cheži'ilaže'chgüede' le'e, na' gone' cont soa cuezechle binlo len xbab da' yo'o lo' yichjlažda'olen', na' gone' gache'echle chacchgüede' le'e.

Bene' ca' chososed chosolo'ede' diža' güenlaže'

(2 Pedro 2:1-17)

³ Bene' migw, chacda' le'e, na' ba goclaže'chgua' gwzoja' le'e gwzejni'ida' le'e can' ben Xancho Jesucriston' cont de yela' mban checho toli tocanē. Perw na'a ba chonen byen chzoja' chneyoeda' le'e soachachle šejle'le diža' li che Diosen' da' bzejni'ide' chio' to ši'ize, chio' naccho lo ne'en. ⁴ Nita' bal bene' cheseziye'e cont chaquele zjanaque' le'e txen. Bi chosozenague' che Diosen', san chesene' da' nži'ilaže' Diosen' chio' guacte goncho bite'teze da' yela' zto' len cuerp chechon', le chezi'xencze' checho. Na' chosozoe' to šla'ale toz ben' nac dogualje Dios ben' cheyala' yosozenag yogo' benachen' che', na' len Xancho Jesucriston'. Cana'te byoj Xtiža' Diosen' žan bene' cheson ca' yesežaglaochgüe' neche xtoła'gaquen'.

⁵ Na' la'czla' ba gwnezele yogo' can' goquen', chaclaža' gona' cont šjayza'laže'le Xancho Diosen' bosle' da' xozxta'o neto' bene' Israel lo na' bene' Egipto ca', perw gwdechle bžiaye'e balteze' bi gosejle'e che'. ⁶ Na' zan angl bi gosazlaže' yesone' da' gwlo'o Diosen' lo na'gaque' yesone', san gosaclaže' yesacche' bene' blaoch. Nachen' besyechoje' gan' bžia Diosen' bia' yesenite'. Nach Diosen' gwsele' legaue' gan' nacchgua' chol, na' zjancheje' gden toli tocanē cont yezezaca'zi'e cate' žin ža gac juisyw. ⁷ Na' lecze ca' bene' gwnita' ciuda Sodoma na' ciuda Gomorra len yezica'chle ciuda ca' zjanyechj zjambi'in legaquen, gosonchgüe' da' nac yela' zto' len cuerp chegaquen', le gosata'lene' ljež bene' byogaue' gosone' le' ca xo'ole' cont gosone' da' yela' zto' len legaue'. Nach Diosen' gwsele' yi' da' bzeyen ciuda ca' gosebiayi'tecczen'. Na' da' bene' ca', chosnide' chio' benach gata' castigw lo yi' gabil toli tocanē che bene' bi yosozenag che'.

⁸ Na' bia'cze bene' ca' chososed chosolo'ede' le'e diža' güenlaže', zjanite' chesone' da' mal na' chesene' besele'edagüede' nac güen dan' chesonen'. Chesone' da' yela' zto' len cuerp chegaquen' bi chesacclaže' yosozenague' che Xancho Diosen', na' chesezi'diže' angl ca' bene' zjazaca'chgua. ⁹ Perw nža'le cheson angl che Diosen', le cani' gwzoa to tiemp cate' angl blao ben' le Miguel gocyože' len Satanás dan' chnabia' da' xigüe' ca' da' goclažen' yeyoan' cuerp che da' Moisésen'. Na' la'czla' Miguelen' naque' angl blao che Diosen', bi beyaxjde' si'diže' Satanásen', san con gožen': "Xanto' Diosen' tile' le'." ¹⁰ Perw bene' quinga chesezi'diže' bite'teze da' bi chesejni'ide'. Na' chesonteze' da' ca' ža cuerp chegaquen' yesone', ca cheson beyixe' be bi chesejni'i, na' da' ca' chesonen' chosožaiyin' legaue'.

¹¹ Nyaše'chgua gac chegaue'. Zjanite' chesegue'e lježgaue' can' ben da' Caín, na' lecze chesoe'laže' chesone' da' mal cont yesone' gan mechw can' ben da' Balaam. Chesone' güedenag len bene' ca' gwlej Diosen' cont chesenabi'e legaue' cacze güedenag ben da' ben' gože' Coré cani', na' can' gwžiai' da'

Corén' neche yela' güedenag chen', lec ca' yesebiaye'e. ¹² Na' cate' le'e che'ej chagwle txen cont chlo'ele chaque lježle, legaue' chesagwxatteze' con nacteze žan chegaque' na' chese'ejchgüe' gualaz da' yesone' güen len bene' lježe'. Na' da' bibi zaca' can' chesone', da'nan' zjazaca'lebde' ca bzigüe' da' dope to le'e lache' šiš, na' lecze zjazaca'lebde' ca bene' güeye' xila' bene' chna' cuine' na' bi chne'e xila' ca'. Lecze zjazaca'lebde' ca bejw da' nžiga' be' da' bi cheyaquen yejw, na' ca to yag xen da' bibi chbian cate' ba bžin tiemp cuian, na' gualaz da' cuian chbižen na' chbixen lo yo. ¹³ Na' neche yela' zton' cheson bene' ca', zjazaca'lebde' ca nisdao' da' chas chata' na' checho'onen bžina' ga nac lo yo cho'a nisdaon'. Na' zjazaca'lebde' ca beljw da' bich zjažian xišne'en gan' cheyala' yesebian, le Diosen' bžie' bia' yesezaca'zi'e toli točane gan' nac leca chol.

¹⁴ Gwzolaon cate' gwzoa da' Adán bžinten cate' gwzoa da' Enoc goc gaže dia che Adánna'. Na' Enoquen' lecze be'e diža' da' bzejni'i Diosen' le' che bene' ca' chososed chosolo'ede' diža' güenlaže', cate' gwne': “Ble'eda' za' Xancho Diosen' len angl zan juisyw che' ca' ¹⁵ cont chogbi'en yesezaca'zi' yogo' bene' zjanape' dola'. Yogo' bene' ca' bi bosozenag che' yesezaca'zi'e toli točane neche da' gosone' da' mal juisyw yela' güedenag chegaquen' na' neche da' gosone' diža' ya' che'.” ¹⁶ Na' ca nac bene' ca' chososed chosolo'ede' le'e diža' güenlaže', bate'teze chesežeše' che Diosen', na' bibi chesazlaže'. Con chesonteze' bite'teze žan chegaque'. Len xtiža'gaquen' chesonxen cuingaque' na' chosopede' bene' yoble cont yesone' gan mechw o cont yesaclen bene' legaue'.

San Judas che'e bene' chesonxen Jesucriston' can' cheyala' yesone'

¹⁷ San le'e bene' migw, bene' chacda', cheyala' šjayze'ele diža' nga gosena postlw ca' bene' ca' gwlej Xancho Jesucriston'. ¹⁸ Gosene': “Tiempen' cate' ba zoa yid Xancho Jesucriston', nita' bene' bi yesejle' che Diosen' na' yesonle' che' na' yesonteze' con da' žan chegaque' da' nac yela' zto'.” ¹⁹ Na' na'a bene' ca' chesone' cont le'e chejnilaže'le Criston' bi chonle toze xbab, san nža' nža'te ca žale. Chesone' xbab che da' chnalaže' cuerp chegaque', le bi yo'o Spiritw che Diosen' lo' yichjlažda'ogaquen'.

²⁰ Perw le'e bene' migw, chacda' le'e, na' chneyoeda' le gonchach laže'le cont soachachle šejle'le diža' li che Diosen' da' zaca'chgua. Na' le yoł güiž Diosen' ye'lne' da' chzejni'i Spiritw chen' le'e. ²¹ Na' le soa le gon cont gacbe'ele chaque Diosen' le'e. Na' da' cheyaše' cheži'ilaže' Xancho Jesucriston' chio', gone' cont šjayzoalenchone' toli točane. Da'nan' le soa le cueze batcan' gone' ca'.

²² Bał bene' chesacžejlaže' še cheyala' yesone' can' ža Diosen'. Le gwzejni'i legaue'. ²³ Na' bene' ca' ba chesezolagüe' chosozenague' che diža' güenlažen', le gon con ga zelao saca'le cont yesyechoje' lo nez malen' na' le co'o legaue' nez güenna'. Na' yebał bene' chesonchgüe' da' xinj, na' lecze cheyala' yeyaše'cho legaue', perw do čaž chžebcho, do chgue'echo dan' chesonen' na' cheyala' gwsaca'cho cont bi goncho txen len da' xinjen' chesonen'.

Judasen' chonxene' Diosen'

²⁴⁻²⁵ Cheyala' gonxencho toz Dios ben' zaca' gonxencho, ben' none' yela' mban checho toli točane. Dios nan' naque' bene' sina' juisyw. Chac chone' cont bi lažo'cho goncho da' xinj, na' chac chone' cont bibi xtola'cho gata' cate' yežincho lagüen' gan' yo'ochgua be'ni'. Leca yebecho cana'. Diosen' naque' la'zelagüe bene' zaca' bene' blao, na' zaque' chnabi'e doxen. Naque' Xan yogo' beñach na' yogo' bica'chle da' de. Len' gocxene' cate' biña' xe yežlion' na'

cheyala' gonxenchone' toli tocanē dan' gwsele' Xancho Jesucriston' chaclene'
chio'. Ca'sca gac. Da' na'zen' chzoja'.

JESUCRISTON' BZEJNI'IDE' SAN JUANNA' CHE DA' CA' ZA' GAC

Diosen' bzejni'ide' Jesucriston' diža' quinga

¹ Diosen' bzejni'ide' Jesucriston' diža' quinga cont le' gwlo'ede' bene' ca' chesejnilaže'ne' can' ba zoa gac. Nach ba gwsele' to bene' nac angl che' cont bzejni'iden' neda' Juan, neda' naca' ben' chon xšine'. ² Na' chzoja' diža' li che yogo' da' ba ble'eda', na' nezda' da' li gwna Diosen' gac quinga, le Jesucriston' bzejni'iden' neda'.

³ Mbalaz bene' ca' yosolab da' nga chzoja' da' bzene Diosen' neda' na' bene' ca' yesende' yosolab bene' yoble len, še da' li yosozenague' chen, le ba zoa gac can' žanna'.

Juanna' chzoje' bene' ca' chesonxen Jesucriston' yež ca' gaže

⁴ Neda' Juan chzoja' le'e nita'le gaž yež che Asia chdop chžagle chonxenle Jesucriston'. Diosen' len Spiritw chen' yesenita'sque' yesaclene' le'e na' yesone' soa cuezle binlo len xbab chelen', Dios ben' ba zoacze' cate' biņa' xe yežlion', na' soacze' toli tocaņe. Na' Spiritw che Diosen' naquen ca gaže spiritw na' zoan lao Diosen' gan' chi'e chnabi'e. ⁵ Na' Jesucriston' lecze soašque' gaclene' le'e na' gone' soa cuezle binlo. Jesucriston' naque' ben' cho'e diža' li che Diosen'. Naque' bene' nechw bebane' ladjo bene' guaten' ben' bich nabia' yela' goten' le'. Na' le' chnabi'e yogo' nochle bene' gwnabia' že' yežlio nga. Dan' chacde' chio' bnežjw cuine' gosote'ne' na' blalj xchene' cont bnitlagüe' xtola'chon'. ⁶ Nach ba gwleje' chio' cont nabia'cho txen len le' ca no rey na' cont soacho gonxencho Diosen' ca no bxož, Dios ben' nac Xe' na' lecze naque' ben' chonxene'. Cheyala' gonxenchone' toli tocaņe, le zoacze' chnabi'e toli tocaņe. Can' gonšcaczcho.

⁷ Jesucriston' yide' da' yoble to lo' bejw, na' yogo'lol bene' yesele'ede' le', lente bene' ca' gosot le'. Na' bene' ca' že' to to latje lo yežlion', yesebežyaše' cate' yesele'ede' le'. Can' žia', na' can' gacšca.

⁸ “Neda' naca' Dios ben' ben yežlion' len yogo' bichle da' de, na' naca' ben' gon cont te chen. Da'nan' zaca'lebda' ca letr nechw da' nzi' A na' letr bzebe da' nzi' Z.” Can' ža' Xancho Dios ben' nape' yela' guac xen juisyw, ben' ba zoacze' cate' biņa' xe yežlion' na' soacze' toli tocaņe.

Juan ble'edaogüede' leca bene' zaca' juisyw nac Criston'

⁹ Neda' Juan naca' bene' lježle dan' naccho txen chzenagcho che Jesús'en cont Diosen' chnabi'e yichjlažda'ocho, na' toz can' chosoči chososaca' bene' chio' neche xtižen', na' txen chaclen Jesucriston' chio' cont chyo chchejcho len yogo' da' chac checho. Da' ba gwduxjue'eda' xtiža' Diosen' na' ba bia' diža' che Jesucriston', da'nan' gosezene' neda' na' gosesele' neda' pres gan' že' Patmos dan' nac to yežlio dao' lo' nisdaon'. ¹⁰ Na' to ža' dmigw Spiritw che Diosen' benen cont ble'edaogüeda', na' benda' Jesucriston' chņe' cožan' zižjehgua ca chbež trompeta. ¹¹ Na' gože' neda':

—Neda' naca' ben' ben yežlion' len yogo' bichle da' de, na' naca' ben' gon cont te chen. Da'nan' zaca'lebda' ca letr nechw da' nzi' A na' letr bzebe da' nzi' Z. Bzoj to le'e yiš da' quinga le'edo', na' seļon' lao bene' ca' nita' gaž yež che Asia chesedop chesežague' chesonxene' neda', yež ca' zjanzi' Efeso, na' Esmirna, na' Pérgamo, na' Tiatira, na' Sardis, na' Filadelfia na' Laodicea.

¹² Na' gwyechja' gwña'a non' chne na' ble'eda' gaže candeler de oro. ¹³ Na' gachol candeler ca' gaže, ble'eda' to bene' nac ca to benach perw gocbe'eda' bi naque' benachze. Nyaze' to lache' ton da' bžinte lo ni'e na' nchej cho'alcho'en ca to bant de oro. ¹⁴ Na' yiša' yichjen' naquen da' šiš ca xa xila' o ca no beye'. Na' yejlagüen' gosactiten ca to yi' da' chala'nin. ¹⁵ Ni'e ca' ble'edan' ca to de bronze da' nlachgua cate' naquen ya'alj xoan lo yi'. Na' ši'en nenen zižechgua ca chziž yegw cate' dechgua nis. ¹⁶ Na' noxe' gaže beljw len ne'e lican' na' lo' cho'en chchojen ca to spada da' nla chop la'an. Na' cho'alagüen' goctiten ca gwbiž cate' chña'chguan.

¹⁷ Na' cate' ble'eda'ne' gwbiža' xni'en gottia' šlat. Nach bli ne'e lican' gwxoen' yichja' na' gože'nda':

—Bi žebo'. Neda' naca' ben' ben yežlion' len yogo' bichle da' de, na' naca' ben' gon cont te chen. ¹⁸ Naca' ben' nsa' yela' mban. Cana' gota' perw bebana' ladjo bene' guat na' zoacza' toli tocañe. Na' naquen lo na' nia' bat yesat to to bene' na' nac gac chegaque' cate' bach gosate'. ¹⁹ Na' na'a bzoj diža' che da' ca' ba ble'edo' na' diža' che da' ca' chac na'a na' diža' che da' ca' za' gac. ²⁰ Na' da' nono na' neze che beljw ca' gaže dan' noxa' na' che candeler de oro ca' gaže, zejen quinga: beljw ca' zejen gaže bene' ca' cheso'e xtiža' len gaže cuen bene' ca' chesedop chesežag chesonxene' neda' gan' nzi' Asia. Na' candeler ca' gaže zejen gaž cuen bene' ca' chesonxen neda'.

2

Da' gwna Jesucriston' che bene' ca' chesonxen le' lo ciuda ca' gaže: Da' gože' bene' Efeso ca'

¹ 'Bzoj ben' choe' xtiža' len bene' ca' chesedop chesežag chesonxene' neda' lo ciuda Efeson', yo'one' neda' noxa' beljw ca' gaže len na' lican' na' chda' gachol candeler de oro ca' gaže, na' yo'one' nedan' chapa'ne' diža' quinga: ² "Neze nle'eda' ca güenna' chonle, can' chchejlaže'le zoale chonchguale xšinan'. Nežda' bi chleble bene' cheson da' xinj, le ba ble'ele can' cheson bene' güenlaže' ca' chesene zjanaque' postlw na' chacbe'ele bi zjanaque' dogualje postlw. ³ Ba byo bchejle len yogo' dan' ba goc chele na' ba benchguale xšinan' na' bi jaxaque'laže'le. ⁴ Perw da' nga bi chazlaža' can' chonle, da' bich chaquele neda' can' goquele neda' cana'. ⁵ Da'nana' le gon xbab can' gwzoale goquele neda' na' can' gwzoale bzenagle chia' na' yetinje xtoła'le cont da' yoble gonle güen can' benle cana'. Na' še bi yetinjele xtoła'len', yedeyena' cont bich gacle candeler chia'. ⁶ Perw la'czla' bi chontecle güen, chebeda' chgue'ele da' xinj da' cheson bene' ca' zjanzi' nicolaítas, bene' ca' chesene' guac gontezechle da' xinj, le neda' lecze chgue'eda' can' chesonen'. ⁷ Le'e žia nagle da' chene, le gwzenag che da' nga ža Spiritw che Diosen' chen' le'e chdop chžagle chonxenle neda' gate'teze: Note'tezle še soele bi cuejyichjle xtižan', neda' gona' da' gagwle da' chbia lo yag yela' mban da' zoa latje xdan che Diosen'."

Da' gože' bene' Esmirna ca'

⁸ 'Na' na'a bzoj ben' choe' xtiža' len bene' ca' chesedop chesežag chesonxen neda' ciuda Esmirna, yo'one' naca' ben' ben yežlion' na' len yogo' bichle da' de na' ben' gon cont te chen, ben' lecze gote' na' bebane' ladjo bene' guat ca', na' yo'one' nedan' chapa'ne' diža' quinga: ⁹ "Neze nle'eda' ca güenna' chonle. Nežda' chyi chzaca'le. Nežda' nacchguale bene' yaše', la'czla' de chele da' zaca'ch clel ca yela' gwni'an'. Na' ca nac bene' Israel bene' ca' chesene' ba gwlej Diosen' legaque' cont gone' güen len legaque', nežda' bale' chesenie' yela' ya' chele. Perw bi gwleje' ben' cheson ca', le bi chesejnilaže'ne', san zjanaque' dapa' txen chosozenague' che Satanás dan' chnabia' da' xigüe' ca'.

10 Bi žeble da' ca' za' gac chele, le Satanásen' gonen cont yeseyixjue' balle ližya cont gata'bia' še soen gonen cuejyichjle xtižan'. Na' lo to chope ža yosochi yososaque' le'e. Le soateze le gwzenag chia' la'czla' še yesote' le'e, na' gona' cont banle len neda' toli tocanē. 11 Le'e žia nagle da' chene, le gwzenag che da' nga ža Spiritw che Diosen' chen' le'e chdop chžagle chonxenle neda' gate'teze: Note'tezle še soele bi cuejyichjle xtižan', bi gac chele can' yesac che bene' yesezaca'zi' toli tocanē dan' žacho yela' got gwchope.”

Da' gože' bene' Pérgamo ca'

12 'Na' bzoj ben' choe' xtiža' len bene' ca' chesedop chesežag chesonxen neda' ciuda Pérgamo, yo'one' neda' napa' spada toše' dan' nla chop la'an, na' nedan' chapa'ne' diža' quinga: 13 “Neze nle'eda' ca güenna' chonle. Na' nezda' zoale lo ciuda gan' chnabia'chgua Satanásen', perw zoale chzenagle chia'. Nezda' bi chbejyichjle xtižan' dan' chejle'le na' neca gwlejyichjlen cate' gosote' Antipas ben' be'e xtižan' lo ciuda chelen' gan' že' bene' zan bene' chosozenag che Satanásen'. 14 Perw de to chope da' chonle da' bi chazlaža'. Le nita' balle chzejni'i lježle guac gontezle da' xinj. Ca'cze nac dan' bzejni'i da' Balaam da' rey Balac cani'. Da'nana' gwsele' no'ole gosego'oyele' bene' Israel ca' cont gosagüe' yela' guagw da' nac che l' gua'a lsaca' gosejnilaže' bene' zito' ca' na' cont gosone' da' yela' zto' len cuerp chegaque'. 15 Na' lecze nita' balle chzenagle che dan' chgue'eda' dan' chososed chosolo'e bene' ca' zjanzi' nicolaítas. 16 Da'nana' le yetinje che da' xinjen' chonle. Na' še bi yetinjele xtola'len', la' yidtia' yedetillena' nole chonle da' xinjen' len spada dan' chchoj choan'. 17 Le'e žia nagle da' chene, le gwzenag che da' nga ža Spiritw che Diosen' chen' le'e chdop chžagle chonxenle neda' gate'teze: Note'tezle še soele bi cuejyichjle xtižan', gona' le'e to yela' guagw da' zaca' da' nono na' le'e lo yežlion', to da' zaca'leben ca maná, na' gona' to yej šiš che to tole gan' yoj lale da' naquen to lale da' cobe da' nono nombia', lete le'e gaquen lo na'le gombia'len.”

Da' gože' bene' Tiatira ca'

18 'Na' bzoj ben' choe' xtiža' len bene' ca' chesedop chesežag chesonxene' neda' lo ciuda Tiatira, na' yo'one' naca' dogualje Xi'in Dios, na' chactit yejlagua' ca to yi' da' chala'nin na' ni'a ca' chesaquen ca bronce da' cheyac ya'alj cate' xoaan lo yi'. Yo'one' neda' chapa'ne' diža' quinga: 19 “Neze nle'eda' ca güenna' chonle, nezda' zoale chaquele neda', chejnilaže'lenda', chonchguale xšinan' na' chchejele bite'teze chac chele, na' nezda' chonchle güen na'a clel can' benle cana'. 20 Perw de to da' chonle da' bi chazlaža', le choe'le latje zoa to no'ole naque' txen len le'e, no'olen' zaca'lebe ca da' reina Jezabel. Že' chsed chlo'ede' xtiža' Diosen' perw len diža' güenlaže' chen' chziye'e bene' chesejnilaže' neda' cont bale' chesone' da' nac da' yela' zto' len cuerp chegaquen' na' lecze chesagüe' yela' guagw da' chesena bene' naquen che l' gua'a lsaca' chesejnilaže'. 21 Ba gwleza' cont yetinjde' che yela' zto' dan' chonen', perw bi chaclaže' yetinjden', na' biña' cuejyichje' yela' zton' chonen'. 22 Da'nana' gona' cont gacšende' na' gate' lo cam, na' gona' cont bene' ca' cheson yela' zton' txen len le' lecze yesale'chgüede' še bi yesebejyichje' da' ca' chzejni'ide' legaque' yesone'. 23 Nach bi che' ca', gona' cont yesatbe'. Nach yogo' cuen bene' ca' chesedop chesežag chesonxene' neda' gate'teze yesacbe'ede' nombi'a yogo'te xbab da' yo'o lo' yichjlaždao' benach, na' gona' cont to toe' soe' mbalaz o saca'zi'e con ca nac da' ba bene'. 24 Na' le'e zoale Tiatiran' le'e bi chonle can' chsed chlo'e no'ole güenlažen' na' neca nsedle dan' chesene' chesejni'ide' che Satanásen' dan' nono nombia', bi nia' bichle da'

cheyala' gonle. ²⁵ Con soaczle gonle da' güen can' chonle tža tža, cont ne' chonle güen caten' yida' da' yoble. ²⁶ Note'tezle še soele bi cuejyichjle xtižan', na' še soele ne' soatezle gonle can' nona' mandadw cate'ch yida' da' yoble, gona' cont nabia'le nación ca' txen len neda'. ²⁷ Ca Xan' ba bene' cont chnabi'a nación ca', lecze can' gona' cont bene' bi yesebejyichje' xtiža' yesenabi'e txen len neda'. Na' yesenabi'e nación ca' na' žan ca žan bene' nación ca' yosozenague' chegaque', na' bene' ca' bi chosozenag, yosožiaye'e legaque' ca to bene' chzoxj to no yeso' xguague. ²⁸ Na' gwnežjua' legaque' beljw xsilen'. ²⁹ Le'e žia nagle da' chene, le gwzenag che dan' ža Spiritw che Diosen' chen' le'e chdop chžagle chonxenle neda' gate'teze.”

3

Dan' gože' bene' Sardis ca'

¹ Na' lecze bzoj ben' choe' xtiža' len bene' ca' chesedop chesežag chesonxen neda' lo ciuda Sardis, yo'one' napa' Spiritw che Dios dan' nac ca gaže spiritw, na' noxa' beljw ca' gaže, na' neda' chapa'ne' diža' quinga: “Neze nle'eda' yogo'lol dan' chonle. Neza' nacle ca bene' guat la'czla' chze chele naple yela' mban toli tocañe. ² Le gon xbab can' chonle na' le šejnilaže'ch neda' na' le gwzenag chia' šlac biña' yeyož cuiayi'le, le dan' chonlen' bi naquen can' chebe Dios ben' chonxena'. ³ Le soa le gon xbab che xtižan' dan' bosozejni'i bene' le'e na' da' bzenagle chen cana'. Le gwzenag chen na'a da' yoble cont yetinjle xtola'len'. Na' še bi gonle xbab yetinje xtola'len', žin ža yedexenyala' le'e na' gona' castigw chele ca chzenyal to no bene' gwban cate' chbane'. Bi nezele bi ža bi hor. ⁴ Bia'cze nita' balle bene' Sardis biña' gonle da' malen' txen len bene' yezica'chle. Na' le'e nac lažda'olen' xilaže' len neda', žin ža gona' lache' šiš chazle na' talenle neda', le zaca'le cont gonle neda' txen. ⁵ Note'tezle še soele bi cuejyichjle xtižan', žin ža gona' lache' šiš chazle, na' gwbat yoxia' lalen' le'e libr chia' gan' nyoj la yogo' bene' zjanape' yela' mban toli tocañe, na' güe'lena' Xan' diža' na' len bene' zjanac angl che' ca' yapegaca'ne' nacle neda' txen. ⁶ Le'e žia nagle da' chene, le gwzenag che dan' ža Spiritw che Diosen' chen' le'e chdop chžagle chonxenle neda' gate'teze.”

Da' gože' bene' Filadelfia ca'

⁷ Na' lecze bzoj ben' choe' xtiža' len bene' ca' chesedop chesežag chesonxen neda' lo ciuda Filadelfia, yo'one' naca' bene' laždao' xilaže' juisyw, na' zoateza' chona' can' gwnia' gona'. Napa' xinya che da' rey David. Cate' chsaljua' cont yeso'o bene' gan' zoa Diosen' chnabi'e, nono gac yoseyjw, na' cate' chseyjua' cont bi yeso'e, nono gac saljw. Yo'one' neda' chapa'ne' diža' quinga: ⁸ “Neze nle'eda' ca güenña' chonle. Nach ba gwsaljua' ca to puert che le'e da' nono gac yoseyjw. Na' la'czla' bi nac zanle, ba chzenagle xtižan' na' bi gwlejyichjlen caten' bosochi bososaque' le'e. ⁹ Ba bene' Israel že' gan' zوالen' chesene' ba gwlej Diosen' legaque' cont gone' güen len legaque', perw bi gwleje' legaque', le bi chesejnlaže'ne'. Zjanaque' dapa' txen chosozenague' che Satanás dan' chnabia' da' xigüe' ca'. Na' ca nac legaque', gona' cont žin ža yesape' le'e bala'an cate' yesache'ede' chacda' le'e. ¹⁰ Ba byo bchejle len yogo' dan' gwdi gwxaca'le na' benle can' nona' mandadw, na' da'nan' gona' yechojle güen cate' žin ža saca'zi' yogo' beñač. Cana' gata'bia' che to to beñač še yosozenague' chia' o še bi yosozenague'. ¹¹ Ba zoa yida' da' yoble. Le soačač le šejnilaže'nda' na' gwzenagle chia' cont bibi gwžon soale mbalaz toli tocañe. ¹² Note'tezle še soele bi cuejyichle xtižan', žin ža gona' gacle ca bdope da' zjanita' lo' yodao' blao che Dios ben' chonxena', le yežinle gan' zoa Diosen' na' yega'anlen'ne' toli tocañe. Na' gwzoja' loxga to tole la Dios ben' chonxena' na' la ciuda che', ciuda

Jerusalén da' nac da' cobe da' chi' yaba na' yetjen lo yežlion'. Na' gwzoja loxga to tole la neda' da' nac da' cobe. ¹³ Le'e žia nagle da' chene, le gwzenag che dan' ža Spiritw che Diosen' chen' le'e chdop chžagle chonxenle neda' gate'teze.”

Dan' gože' bene' Laodicea ca'

¹⁴ 'Na' bzoj ben' choe' xtiža' len bene' ca' chesedop chesežag chesonxen neda' lo ciuda Laodicea, yo'one' chona' cont chac can' chnalaže' Diosen'. Cho'a diža' li da' nac cayanen' che' Diosen' neda'. Txen len neda' ben Diosen' benach na' yogo'lol bichle da' de le'e yaban' na' lo yežlion'. Yo'one' neda' chapa'ne' diža' quinga: ¹⁵ “Neze nle'eda' ca chonle, bi nacho chgue'ele neda' na' neca chaquele neda'. Yebechda' šaca' chgue'ele neda' o šaca' chaquele neda'. ¹⁶ Na' da' bi chonle cuent gaquele neda', da'nana' ba zoa cuejyichja' le'e bich gona' le'e ca xi'ina'. ¹⁷ Le'e žale zoale mbalaz, žale chonle da' güenchgua, žale bibi chyažjele le chebechgüe Diosen' le'e. Na' bi chacbe'ele leca bene' zban nacle len Diosen'. Bi chacbe'ele nacle ca to bene' bi chle'e o ca to bene' laže' ga'alyid da' bi chejni'ile xtižan' neca chzenagle chen. ¹⁸ Da'nana' chnia' le'e cheyala' si'le da' gona' le'e, le naquen da' zaca'ch ca oro dan' ba bosozeye' cont bega'an da' dogualje. Si'le da' gona' le'e cont da' li soale mbalaz. Na' le nab yezi'xena' xtoła'le cont gac lažda'olen' xilaže' can' chac xalana' bene' nyaz to lache' šiš xila'. Gonle ca' cont bich le'eda' le'e ca to bene' laže' ga'alyid, bene' cheyala' gaque zto'. Na' le güe' latje yocoba' xbab chelen' cont bich gacle ca to bene' bi chle'e, bene' chyažje rmed che yejlagüe' cont le'ede', san gache'ele da' chaclaže' Diosen' gonle. ¹⁹ Note'teze bene' chacda', chdila'ne' na' chnežjua'ne' castigw cate' chone' da' xinj. Da'nana' cheyala' cuec yichjle yetinjele xtoła'len'. ²⁰ Chnia' to tole ca to bene' zecha cho'a yo'o chelen' chnie' na' chsiže' le'e puerten'. Note'tezle še gwzenagle chia' na' še saljwle cont šo'a, yedesoa' len le'e na' gona' cont soale mbalaz txen len neda'. ²¹ Na' note'tezle še soele bi cuejyichjle xtižan', žin ža gona' cont cue'lenle neda' gan' chi'a chnabi'a. Can' bena' neda', gwzoeda' cont bena' can' gwna Xan' nach chi'lena'ne' chnabiato' txen. ²² Le'e žia nagle da' chene, le gwzenag che dan' ža Spiritw che Diosen' chen' le'e chdop chžagle chonxenle neda' gate'teze.”

4

Ben' že' yaban' chesonxene' Diosen'

¹ Beyož bzolja' da' ca' gwne' neda', ble'edaogüeda' nyaljo to puert yaban'. Nach da' yoble benda' gwne Jesucristw ben' gwne neda' da' nechw zižjehgua cacze ziže chbež to trompeta, gože'nda':

—Gwyep gan' zoa' nga cont gwlo'eda' le' da' ca' za' gac.

² Nach la' bente Spiritw che Diosen' cont ble'edaogüeda' yaban' gan' chi' Diosen' chnabi'e. ³ Na' ble'eda' ben' chi' chnabian' chactite' ca chactit yejese, yej da' nzi' jasje na' da' nzi' cornalina. Na' to da' nac ca to pita' gwyechjen gan' chi'e chnabi'en, na' chactiten ca chactit to yej da' nzi' esmeralda. ⁴ Na' cue'ej cuit Diosen' gan' chi'e chnabi'e zjachi' yetapechoa bene' gwlej Diosen' zjanaque' blao, bene' chesenabi'e txen len le'. Zjanyaze' lache' šiš na' zjazoa corona de oro yichj to togaque'. ⁵ Na' gan' chi' Diosen' chnabi'e chep yes na' chac sšag na' chašjw chtin. Na' lagüen' nita' gaže yi' da' čala'nin. Yi' ca' gaže zjanaquen Spiritw che Diosen', na' Spiritw che Diosen' naquen ca gaže spiritw. ⁶ Na' doxen lagüe' gan' chi'e chnabi'en nžiljw lo yon' to da' chactit ca vidrw na' nlan' ca to nis nyadi da' nla'xeje.

Na' nita' yetap bene' gan' zoa Diosen'. Tgüejje' nita' cuite' chop la'ate, yetoe' cože' na' yetoe' lagüe', na' zjažia da' zan yejlaogaque', žia da' žia laogaque' na' lente cože'gaque'. ⁷ Bene' nechw naque' ca to león, na' bene' gwchope ca

to go'ŋ, na' bene' gwyone nac cho'alagüe' ca che benach, na' bene' gwdape naque' ca to bsia be ze lo be'. ⁸ Na' dapte bene' ca' to toe' žia xop güeje xilgaque', na' zjažia zan yejlaogaque' lo xilen' lente cože' xilen'. Na' do ža do yel bi chososane' chesene':

Leca bene' laždao' xilaže' juisyw nac Xancho Diosen' ben' nape la'zelagüe yela' guac xen.

Ba zoacze' cate' za' xe yežlion', na' soacze' toli tocaŋe.

⁹ Na' yogo' ni'a cate' bene' ca' tap cheso'e diža' catec bene' zaca' nac Dios ben' chi' chnabia', ben' zoacze toli tocaŋe, yogo' ni'a cate' chesonxene' le' cheso'e yela' choxclen che', ¹⁰ bene' tapechoa ca' gwlej Diosen' cont zjanaque' blao chosozoa xibe' lao Dios ben' zoa toli tocaŋe chesonxene' le' gan' chi'e chnabi'e na' chosonite' corona chegaquen' xni'en, chesene':

¹¹ Xanto' Dios, zaco' gonxento' le',

na' soato' le' bala'an na' güe'to' diža' che yela' guac xen chion',

le len' beno' yogo' lol da' de,

na' beno' yogo' lolen con ca gwnalažo'.

5

Jesucristw ben' zaca'lebe ca xila' daon' gosot bene' Israel ca' neche xtoła'gaque'

¹ Na' ble'eda' Dios ben' chi' chnabia', len ne'e licha noxe' to yiš da' ndobyoyen na' nyoj chop la'aten na' nyeyjon nyišen' gaže seyw. ² Na' ble'eda' to angl gual gwne' zižje gwne':

—¿Non' zaca' gwzoxj seyw ca' cont šaš yišen'?

³ Na' nono bžel bene' zaca' gwzaše' yišen' neca yaban' na' ne yežlion' na' neca gan' že' bene' guat ca'. Ne to nono bžel bene' la'ch le'ezden' nac naquen. ⁴ Na' gwchežchgua' da' nono zoa bene' zaca' gwzaše' yišen' gwlaben' na' neca zaque' na'ze' nac naquen. ⁵ Nach to bene' gwlej Diosen' cont naque' blao gože'nda':

—Bitw cuežo'. Gwna'šc, na' zoa Jesucristw ben' golje lo diaža che da' Judá, naque' rey can' nac da' xozxta'ogüe' David, na' da' nape' yela' chnabia' xen zaca'lebde' ca to bež be nzi' león. Na' le' zaque' gwzoxje' seyw ca' gaže na' gwzaše' yišen', le ba gwzoede' bene' cont gac nitlao xtoła' benachen'.

⁶ Nach ble'eda'ne' zeche' gan' chi' ben' chnabian' na' ladjo bene' ca' tap ben' zjažia xil, do gachol bene' blao ca' tapechoa. Ble'eda'ne' ca to xila' dao' ben' ba gosote', ca xila' be žia gaže lozba' na' gaže yejlaoba'. Na' yejlaoban' gaže zejen zoa Spiritw che Diosen' doxen lo yežlion' chonen can' ža Diosen'.

⁷ Nach ben' ble'eda' ca to xila' dao' jaxi'e yiš dan' noxe' ben' len ne'e licha gan' chi'e chnabi'en. ⁸ Na' cate' jaxi'e yišen' bene' ca' tap lente bene' blao ca' tapechoa bosozoa xibgaque' lagüen'. Na' to to bene' blao ca' zjanoxe' to arpa na' to barser de oro gan' chey yal, na' yalen' zejen xtiža' bene' ca' zjanac lo na' Diosen', dižan' cheso'e'lene' le' caten' chosol güiže'ne'. ⁹ Nach bene' ca' gosole' to da' cobe dan' ža:

Zaco' jaxi'o yišen' cont gwzašon' na' gwzoxjo' seyw ca' nyišen',

le bnežjw cuino' gosote' le'.

Blalj xcheno' cont bnitlaguo' xtoła'to',

na' gwxi'o neto' cont nacto' lo na' Dios,

neto' nacto' bene' to to nación, to to yež, to to diaža na' chacto' gwde gwdele diža' da' de lo yežlion'.

¹⁰ Na' gwlejo' neto' cont nacto' ca rey,

na' zoato' chonxento' Dios cheton' ca bxoz,

na' žin ža nabia'to' lo yežlion'.

¹¹ Nach gwŋa'a na' ble'eda' bene' zan juisyw angl, neca gwzoeda' gwlabane'. Zjazecha angl ca' cue'ej cuit ben' chi' chnabian' na' gan' že' bene' ca' tap na' bene' blao ca' tapechoa. ¹² Na' benda' cheso'e dižan' zižje chesene': Jesucriston' bnežjw cuine' neche xtoła' benachen', na' da'nan' zaca'lebde' ca xila' daon' gosot bene' Israel cont gwnitlao xtoła'gaque'.

Na' Jesucriston' zaca'cze' gonxenchone', le chnabi'e doxen, na' yo'o lo ne'e yogo'te da' zjade. Naque' bene' sina' gual, na' nape' yela' guac xen. Cheyala' güe'chone' yela' bala'an, na' güe'cho diža' naque' bene' zaca' juisyw.

¹³ Na' lecze benda' yogo' bene' že' yaban' na' yežlion' na' bene' že' latje che bene' guat, na' bene' zjanita' lo nisdao', cheso'e diža' chesene': Tołi tocanē chonxencho Dios ben' chi' chnabia' na' Jesucriston' ben' zaca'lebde' ca xila' daon' gosot bene' Israel cont gwnitlao xtoła'gaque'.

Zjanape' yela' bala'an, na' zjanaque' bene' zaca' juisyw, na' zjanape' yela' guac xen juisyw tołi tocanē. Na' benda' lecze can' gosena be chaš yežlion' na' be chaš le'e yaban' na' lo' nis, na' len yogo' bichle da' zjade.

¹⁴ Nach bene' ca' tap ben' zjažia xil gosene': —Ca'šcaczē gac.

Na' bene' blao ca' tapechoa bosozoa xibgaque' gosonxene' Dios ben' zoa tołi tocanē.

6

Seyw ca' gaže

¹ Ca nac seyw ca' gaže, ble'eda' cate' ben' zaca'lebde' ca xila' daon' be gosot bene' gualaž cheto' neche xtoła'gaque' bzojje' seyw nechon'. Nach bene' ca' tap zjažia xil, toe' gwŋe' zižje, ca zižjen' chašjw chtin yi' gwzio', gwne':

—Da, na' gwŋa' da' nga.

² Na' cate' gwŋa'a, ble'eda' to cabayw be šiš na' ben' žie' cože'ban' noxe' to arcw. Ba bosozoe' to corona yichje' neche da' ba bene' gan lo gwdile, na' ŋa'a ba zeje' da' yoble cont tillene' nochle bene' chesegue'ede' le' na' gone' gan legaue'.

³ Na' ben' zaca'lebde' ca xila' dao' be gosot bene' gualaž cheto' neche xtoła'gaque', cate' bzojje' seyw gwchope benda' gwŋe yeto ben' žia xil, ben' nac bene' gwchope, gwne':

—Da, na' gwŋa' da' nga.

⁴ Nach bchoj yeto cabayw, na' bena' nacha' be xŋa. Na' ben' žie' cože'ban' gwo'o lo ne'e gone' cont bene' že' yežlion' bich yesenite' binlo len lježe' san yesot lježe'. Na' bosonežjue'ne' to spada xen.

⁵ Na' cate' ben' zaca'lebde' ca xila' daon' be gosot bene' gualaž cheto' neche xtoła'gaque' bzojje' seyw gwyone, benda' gwŋe bene' gwyone ben' žia xil, gwne':

—Da, na' gwŋa' da' nga.

Nach gwŋa'a na' ble'eda' to cabayw gasj na' ben' žie' cože'ban' noxe' to xigonz. ⁶ Na' benda' gwŋe to bene' do gan' že' bene' ca' tap ben' zjažia xil, gože' ben' žia cože' cabayw gasja', gwne':

—Gweyē jažiayi' trigw na' cebada cont yesaquen gwbin na' cont chop ya trigw saca' laxjue' da' yesone' gan tža žin na' xop ya cebada saca' laxjue' da' yesone' gan tža žin, perw bi gono' cont cuiayi' set na' vino.

⁷ Na' cate' ben' zaca'lebde' ca xila' daon' be gosot bene' gualaž cheto' neche xtoła'gaque' bzoخة' seyw gwdape, benda' gwne bene' gwdape ben' žia xil, gwne':

—Da, na' gwna' da' nga.

⁸ Nach gwna'a na' ble'eda' to cabayw be gaše, na' ben' žie' cože'ban' lie' Yela' Got. Na' yeto bene' zej cože', lie' Latje Gan' Že' Bene' Guat. Na' gosac lo na'gaque' bosoxie' gwdile gan' gosat bene' zan, na' gosone' cont gosat yezane' gwbin, na' gosone' cont yezan bene' gosate' len yižgüe', na' gosone' cont be znia gosotba' yezane', na' goc ca' lao to tlaw yežlion' dan' gosac lo ne'e.

⁹ Nach cate' ben' zaca'lebde' ca xila' daon' be gosot bene' gualaž cheto' neche xtoła'gaque' bzoخة' seyw gayo', ble'eda' mes gan' bene' ca' že' yaban' chosozeye' bi dan' chosozeye' cate' chesonxene' Diosen', na' xni'a mesen' ble'eda' bene' ca' ba gosot yezica'chle bene' legaue' lagüe dan' bosozenague' xtiža' Diosen' na' lagüe dan' goso'e diža' gosene' chesejnilaže' Jesucriston'.

¹⁰ Na' bene' guat ca' gosene' zižje gosene':

—Xanto' Dios, le' naco' bene' laždao' xilaže' juisyw na' zoaczo' chono' con ca žo'. ¿Batcan' gono' yela' justis che bene' ca' že' yežlion' ben' gosot neto'? ¿Batcan' gono' cont yezaca'zi'e da' bosolalje' xchenton'?

¹¹ Nach Diosen' bnežjue' to to bene' guat ca' tgüje xagaue' da' šiš da' gosaze'. Na' gože' legaue' yesyezi'laže'che' yeto chop ža šlac yezaza' bene' cheyała' yesat can' gosate' lagüe da' chesonxene' Criston', bene' zjanac ca biše' lježe'.

¹² Nach ben' zaca'lebde' ca xila' daon' be gosot bene' gualaž cheto' neche xtoła'gaque', cate' bzoخة' seyw gwxo, gwna'a na' leca gwxo'. Na' gwbižen' beyaquen gasj ca lache' gasj da' chesaz bene' chesegüine', na' doxen bion' beyaquen xna ca chen. ¹³ Na' beljw ca' beseyinjen besežinten lo yežlion' can' chyinj no yixgüigw da' žia lo xyaguen cate' chechj to be' gual da' chtan len. ¹⁴ Nach le'e yaban' benittecczen ca to no yiš da' chedoblolen. Na' yogo' ya'a ca' na' no yežlio dao' da' ca' zjachi' lo' nisdaon' bososa' xišnan'. ¹⁵ Nach yogo'lol bene' že' yežlion', yogo' bene' ca' chesenabia' lo yežlion', yogo' xan soldadw, yogo' bene' blao bene' gwni'a, yogo' bene' cheson xšin bene' yoble ca beyixe', na' len yezica'chle bene', yogo'cze' bosocuaše' cuingaque' do xan bloj, do ladjo yej xen da' zjažia lo ya'a ca'. ¹⁶ Na' gosene':

—Chešca bdiņj na' yej quinga na' ya'a quinga yesebixen yeseyenen chio' cont bi le'e Diosen' chio', Dios ben' chi' chnabia', na' yeseyenen chio' cont Jesucriston' ben' zaca'lebde' ca xila' daon' be gosot bene' neche xtoła'gaque' bi gone' saca'zi'cho. ¹⁷ Le ba bžin ža gac juisyw, na' Diosen' len Jesucriston' leca cheseže'e chio' bi chonxencho legaue', na' nono soe da' yesone' saca'zi'cho.

7

Bene' Israel ca' bene' zjanyiše' seyw che Diosen'

¹ Gwdena' ble'eda' tap angl zjazeche' tap squin che yežlion' bosozague' ben' cont bi gwyechjen lo yežlion', lo nisdaon' o gan' ze yag ca'. ² Na' ble'eda' yeto angl bene' za' gan' chla' gwbiž na' noxe' to da' gwchine' gwchiše'de' seyw che Dios loxga bene' ca' chesonxen le', Dios bene' zoa toli tocañe. Na' anglen' gwne' zižje bol güiže' angl ca' tap ben' zjanac lo ne'e yesone' gac yela' zi' lo yežlion' len lo nisdaon'. ³ Gože' legaue':

—Bi gwžiai'le yežlion', ne nisdaon', ne yag ca' šlac bina' gwchiša' seyw che Dios checho loxga bene' ca' chesonxen le'.

⁴ Na' benda' gwne' bal bene' bchiše' seyon' bene' za'ac lo yogo' diaža che bene' Israel, na' yogüe' gosac to gayoa tapeyon mile'. ⁵ Šižinw mile' za'aque'

lo diaža che da' Judá, šižinw mile' lo diaža che da' Rubén, šižinw mile' lo diaža che da' Gad, ⁶ na' šižinw mile' lo diaža che da' Aser, šižinw mile' lo diaža che da' Neftalí, šižinw mile' lo diaža che da' Manasés, ⁷ na' šižinw mile' lo diaža che da' Simeón, šižinw mile' lo diaža che da' Leví, šižinw mile' lo diaža che da' Isacar, ⁸ šižinw mile' lo diaža che da' Zabulón, šižinw mile' lo diaža che da' José na' šižinw mile' lo diaža che da' Benjamín.

Beñe' zan zjanyaze' lache' šiš

⁹ Na' gwdena' gwña'a da' yoble na' ble'eda' zjaze beñe' zan lao Diosen' gan' chi'e chnabi'e na' lao ben' zaca'lebde' ca xila' daon' be gosot beñe' Israel neche xtolá'gaque'. Na' nono goc yosolab bal beñe' že', le gosaque' beñe' zan juisyw, beñe' to to nación, to to yež, to to diaža, na' gosaque' beñe' chesac gwde gwdele diža' da' de lo yezlion'. Na' yogüe' zjanyaze' lache' šiš na' zjanoxe' zin. ¹⁰ Na' chesyebede' bososye'e gosene':

Xanto' Dios ben' chi' chnabi'a na' Jesucristw ben' zaca'lebde' ca xila' daon' be gosot beñe' Israel neche xtolá'gaque',

legaque' ba gosone' yela' mban checho toli tocanē.

¹¹ Nach yogo'lol angl ca' zjaze' cue'ej cuite' gan' chi'e chnabi'e, na' beñe' blao ca' tapechoa na' beñe' ca' tap zjažia xil, yogo'lole' jasechaze' coscho'ale lo yon' gosonxene' Diosen', ¹² gosene':

Chac can' cheyala' gac, Dios cheto'.

Zaca'czo' gonxento' le' toli tocanē,

le naco' beñe' zaca' juisyw,

naco' la'zelagüe beñe' sina',

zaco' güe'to' yela' choxclen chio' na' güe'to' yela' bala'an chio' toli tocanē,

chnabi'o doxen, na' napo' la'zelagüe yela' guac xen.

Can' nacczen.

¹³ Nach to beñe' blao ben' nac txen len beñe' tapechoa ca' gože'nda':

—¿Nezdo' no zjanac beñe' quinga zjanyaz lache' šiš na' ga za'aque'?

¹⁴ Na' boži'an goša'ne':

—Le' nezdo' beñe' gole, bi nezda' neda'.

Nach gože' neda':

—Beñe' quinga ba gosale'de' da' ba gosac chegaque' yežlion'. Na' bach gwnitlao xtolá'gaque' na' ba zjanyaze' lache' šiš, le chesejnilaže' Jesucristw ben' blalj xchene' ca xila' dao' be gosot beñe' Israel cont bezi'xen Diosen' xtolá'gaque'. ¹⁵ Da'nan' nite' lao Diosen' gan' chi'e chnabi'en chesonxene' le' do ža do yel. Na' Dios ben' chi' chnabi'e zoe' chape' legaque'. ¹⁶ Bich yesebil yesedone', na' gwbižen' bich gwzeyen legaque', neca yesacde' zeye'. ¹⁷ Le Jesucristw ben' zaca'lebde' ca xila' daon' ben' gosot beñe' Israel neche xtolá'gaque', len' chgüia chne'e legaque'. Ze' lao Diosen' gachol gan' chi'e chnabi'e na' gone' cont nita'chgüe' mbalaz. Gone' cont bich yesebeže' neca yesegüine'de'.

8

Seyw gažen'

¹ Gwde gože' neda' ca', nach Jesucristw ben' zaca'lebde' ca xila' daon' be gosot beñe' gualaž cheton' bzoxje' seyw gaže da' nyiše' yiša', na' cate' bzoxjen' gocži yaban' do gašj hor. ² Na' ble'eda' gaže angl ca' zjazeche' lao Diosen', na' bnežjue' legaque' tgüje trompeta. ³ Na' yeto angl bedeseche' cho'a mes de oro da' zoa lao Diosen' gan' chi'e chnabi'e, mesen' gan' beñe' ca' že' yaban' chosozeye' bi da' chosozeye' cate' chesonxene' Diosen'. Na' angla' noxe' to barser de oro gan' yo'o da' zcha'o yal na' bžien' lo yi' ya'alj da' žia lo mesen'.

Anglen' bene' ca' cont naquen txen len ši'i bene' ca' chesonxene' Diosen' bate'teze chosol güiže'ne'. ⁴ Nach gwyas žen che yala' noxe' anglen' gwloen lao Diosen' len xtiža' bene' ca' chesonxene' le'. ⁵ Nach anglen' gwxi'e ya'alj da' žia lo mesen' gwlo'en lo' barseren' na' bzalen' lo yežlion' na' gošj gwtinchgua, na' goc bichle sšag, gwyep yes na' gwxo'.

Trompeta ca'

⁶ Nach angl ca' gaže ben' zjanoxe' trompeta ca' bosozoan' cho'agaque' cont yosocuežen'.

⁷ Angl nechon' bcuež trompeta chen', na' gwche'chgua yej lo yežlion' na' nchixen yi' na' chen. Na' da' zcha'o yežlion' gwžiayi', yelate'ze ca' goc gašje yo da' de lo yežlion' gwyeyen, lente yag da' ze lagüen goseyen, na' lecze yeto ca'ate' yixe' ga' da' de lo yežlion' goseyen.

⁸ Nach angl gwchope bcuež trompeta chen', na' to da' nac ca to ya'a xen blažon' lo' nisdaon' čala'ninen. Na' yelate'ze ca' goc gašje nisdaon' beyaquen chen. ⁹ Na' yelate'ze ca' goc gašje be ca' že' lo' nisdaon' gosatba', na' leze yeto ca'te' barcw ca' čaš lo nisen' gosebiayin'.

¹⁰ Nach angl gwyone bcuež trompeta chen' na' to beljw xen blažon' le'e yaba čala'ninen ca to yi' yech. Jago'onen lo da' zan yegw na' da' zan ga' čal nis lo yežlion', yelate'ze ca' goc gašje yegw ca' na' ga' čal nis dan' zjade yežlion' gan' jago'onenna'. ¹¹ Na' beljon' nzin' Da' Zla', na' nisen' gan' jago'onenna' beyaquen zla' na' bene' zan gosat dan' gose'eje' nisen'.

¹² Nach angl gw dape bcuež trompeta chen' na' yelate'ze ca' goc gašje gwbižen' gwžiayin', lecze yeto ca'te' bion' gwžiayin' na' lecze yelate'ze ca' goc gašje beljw ca' gosebiayin'. Na' da' ca' gosebiayin' bich bososenin'. Da'nan' gwdena' goc čol yelate'ze ca' goc gašj ža' gašj yel, na' goc ca' yogo' ža' yogo' yel.

¹³ Nach gwna'a na' ble'eda' chda lo be' to angl do gachol le'e yaban' na' benda' gwne' zižje, gwne':

—iNyaše'chgua yesac che bene' ca' že' yežlion' yeyož yosocuež angl ca' yešone trompeta čegaquen'!

9

¹ Nach angl bene' gayo' bcuež trompeta chen' na' ble'eda' to beljw da' blažon' le'e yaban' jago'onen lo yežlion'. Na' beljon' goquen ca to bene' na' Diosen' bnežjue'ne' xinya cont saljue' yechw zitjwchgua dan' nac lo gabil.

² Nach gwsaljue' yechon' na' gwyaschgua žen can' chas žen cate' chesebeque' yi' gual to lo' horn. Na' goc čol le'e yaban' can' chac cate' čičhgua žendao', lao gwbižen' len lo be' goquen čol catec gwche' ženna'. ³ Gan' gwyas ženna' besežaš biše'zo zan gwyašba' lo yežlion', be yeseyižba' bene' can' cheson bexjoni' be čaš yežlio. ⁴ Diosen' gože'ba' bibi yesoneba' yixe' ga', ne da' zjanaze' na' neca yag ca' ze yežlion', san yeseyižba' bene' ca' bi nyiše' sey che Diosen' loxgagaque'. ⁵ Na' bi be'e latje yesotba' legaque', san šašba' gayo' bio' yosoči yososaca'ba' bene' ca'. Na' cate' yeseyižba' bene', yesežaglagüe' can' čžaglačo cate' čyžiž bexjonin' chio'. ⁶ Na' cate' žin ža' yesomba' ca', bene' že' yežlion' yesenablaže' yesate', perw bi yesate'; yesaclaže' bich yesenite', perw bi gac can' yesaclažen'.

⁷ Ca' nac biše'zo ca', ble'eda' zjanacba' ca' cabayw be šja'ac lo gwdile. Yichjgacban' zjazoa da' nac ca' corona de oro. Cho'alaoban' naquen ca' cho'alaoban' be nač. ⁸ Zjažiaba' yiša' da' nac ca' yiša' yichj no'ole. Layban' zjanaquen ca' lay bež znia be nzi' león. ⁹ Na' zjanyazba' to da' nac de ya da' hcue'ejen cuerp čegacban'. Na' sšag da' chesomba' len xilgacban' čhñinen ca' čhñin cate' chesa'aces cabayw zan zja'acba' lo gwdile zjanxobba'

carret. ¹⁰ Na' lo xban biše'zo ca' zjazoa liba' zjanaquen ca xban bexjoni' cont yeseyižba' bene', na' goc lo na'gacba' yosoči yososaca'ba' bene' že' yežlion' gayo' bio', yeseyižba' legaue'. ¹¹ Angl ben' beyac da' xigüe' dan' chnabia' gabilen' naquen xan biše'zo ca'. Lenña' nzi' Abadón diža' hebreo na' lecze nzin' Apolión diža' griego, na' zejen diža' Da' Chžiyin'.

¹² Ba gwde yela' zi' nechon' na' za' za'ac yechopen.

¹³ Nach bcuež angl gwxcopen' trompeta chen', na' benda' gwne to bene' do gan' zoa mes de oro dan' ze lao Diosen', mes da' žia lozen dapte squin, mesen' gan' bene' ca' že' yaban' chosozeye' bi da' chosozeye' cate' chesonxene' Diosen'. ¹⁴ Na' bol güiže' angl gwxcop ben' noxe' trompetan', gože'ne':

—Besež dap angl ca' ben' besyeyac bene' mal ben' zjanchej cho'a yegw da' nzi' Eufrates.

¹⁵ Nach beseže' angl ca' tap bene' ca' bnita' Diosen' cont yesaše' lo iz, bio', ža na' horen' nžie' bia' yesote' beňach, na' caten' gosaše', yelate'ze ca' goc gašje bene' že' yežlion' gosote'. ¹⁶ Na' gwnita' chop gayoa millón soldadw chegaue' zjažie' cože' cabayon'.

¹⁷ Quinga ble'edaogüeda' cabayw ca' na' angl ca' bene' besyeyac bene' mal zjažie' cože'gacba' zjanaque' soldadw. Angl ca' zjanyaze' to de ya da' chcue'ej cho'alcho'gaue' na' yana' chnan' ca' color che yi' na' chnan' da' azul na' da' gaše. Na' yichj cabayw ca' zjanaquen ca' yichj bež znia be nzi' león, na' chchoj yi' cho'agacba' len žen na' len azufre da' čala'nin. ¹⁸ Yelate'ze ca' goc gašje bene' že' yežlion' gosat len yi' na' len žen na' len azufre da' bchoj lo cho'agacba'. ¹⁹ Na' bosochin cho'agacba' na' len xbangacba' cont gosotba' beňach, na' xbangacban' gosaquen ca' bel' na' zjansa' yichjen cont gosey'i'nen bene'.

²⁰ Na' bene' ca' besyega'an bi gosat cate' gwyáš cabayw ca' lo yežlion', legaue' bi besyetiñjde' che da' mal ca' chesone', neca bososane' da' chesonxene' da' xigüe' ca' na' l' gua'a lsaca' chegaue' ca' da' zjanac de oro, de plata, de bronze, de yej o de yag, la'czla' l' gua'a lsaca' ca' bi chesele'en, neca chesenen, na' neca chac yesa'aquen. ²¹ Na' neca besyetiñjde' cont yesebejyichje' bichle da' mal da' chesone', ca' dan' chesote' bene', da' chesone' txen len no bene' guaža', da' chesone' da' yela' zto' len cuerp chegaquen', na' da' chesebane' da' de che bene'.

10

Angl bene' noxe' yiš dao' ndobyoyen

¹ Nach ble'eda' yeto angl gual gwze'e yaban' betje' lo yežlion'. To bejw nyechjen le' na' zoa to pita' yichjen'. Cho'alagüen' chna'titen ca' gwbiž, na' yeñi'e ca' ble'edan' zjanaquen ca' bdope da' čala'nin. ² Anglen' noxe' to yiš dao' da' ba beyašen. Na' bzoa šla'a ni'e licha lo nesdaon' na' yešla'an bzoe' lo yežlion'. ³ Na' bosye'e zižje ca' zižje chosya'a be nzi' león. Na' cate' bosye'e gwne gwzio' gaž ni'a na' to to gwzion' zoa da' gosenan. ⁴ Beyož goc ca' na' ba zoa gwzoja' diža' da' benda' šlac gwne gwzion' cate' to bene' zoa yaba gože'nda':

—Bi gwzojo' dižan' bendo' šlac gwne gwzion', san gwdapen lo' yichjlažda'oguo'.

⁵ Nach angl ben' zoa šla'a ni'en lo nesdaon' na' yešla'an lo yežlion' gwlis ne'e lichen' yabale. ⁶ Na' gwlo'e da' bal' gac can' ža Dios ben' zoa toli' tocanē, ben' ben' le'e yaba len yogo'te da' chle'echo le'enna', bene' yežlion', beňach, beyixe', na' bite'tezechle da' de lo yežlion', na' bene' nesdaon' len be' ca' na' da' ca' že' lo'enna'. Gwne':

—Bich cuez Diosen' gone' can' ba nžie' bia' gone'. ⁷ San cate' žin ža gwcuež angl gažen' trompeta chen', cana'ch gac da' nžia Diosen' bia' gac, can' ba gože' bene' ca' goso'e xtižen', da' nono gwneze cani'.

⁸ Nach da' yoble ben' zoa yaban' ben' ba benczeda' gwñie' neda', gwne':

—Gwyej jaxi' yiš dao' dan' ba beyaš dan' noxe' angl ben' zecha zoa šla'a ni'en lo nesdaon' na' yešla'an lo yežlion'.

⁹ Da'nan' gwy'a gan' zoa anglen' janaba' yišen'. Na' anglen' gože'nda':

—Bexon' gwdagon'. Lo' cho'on gacdon' zix ca šina' beser, perw lo' li'on yeyaquen zla'.

¹⁰ Nach bexo'a yišen' noxe' anglen' gwdaguan'. Na' lo' cho'an goquen zix ca šina' beser, perw cate' bedaguan' beyaquen zla' lo' li'an. ¹¹ Nach anglen' gože' neda':

—Da' yoble cheyala' go'o xtiža' Diosen' na' nao' can' gac che zan yež, che zan nación, che bene' chesac gwde gwdele diža' da' de yežlion', na' che zan bene' gwnabia'.

11

Chope bene' goso'e xtiža' Diosen'

¹ Nach anglen' bene' neda' to ya ca nac da' chosočhine' cate' chosochixe' yo'o, na' gože'nda':

—Gwyej jachixe yodao' blao na' mes gan' chosozeye' bi da' chosozeye' cate' chesonxene' Diosen', na' gwlabo' bal bene' že' chesonxene' le'. ² Perw bi gwchixo' chyo'on, le ba naquen lo na' bene' bi zjanac bene' Israel bene' bi chesejnilaže' Diosen' cont yesone' nacteze chesaclaže' lo ciuda che Dios lao chopeyon bio'. ³ Na' sela' chope bene' yeso'e xtiža', na' yesaze' lache' gasj ca to bene' chegüine' na' yeseyixjue'ede' xtižan' lao to mil chop gayoa gayon ža.

⁴ Bene' ca' chope zjazaca'lebe' ca yag olivos ca' chope na' ca candeler ca' chope da' zjazoa lao Diosen' ben' nac Xan yežlio. ⁵ Na' še no chaclaže' gonxi'e legaue', choj yi' cho'a bene' ca' yeso'e xtižan' na' gwzeyen bene' chgue'ede' legaue'. Can' gac yesat note'teze bene' chende' gonxi'e bene' ca' chope. ⁶ Na' bene' ca' yeseyixjue'ede' xtižan', gac lo na'gaque' yesone' cont bi gac yejw šlac yeso'e xtižan', na' gac lo na'gaque' yesone' cont nisen' yeyaquen chen, na' bate'teze yesaclaže', yesone' gac bite'tezechle da' yesežaglao bene' že' yežlion'. ⁷ Perw cate' yeyož yeso'e xtižan', nach choj lo' gabił gan' nac yechw zitjwchgua to bež xigüe' nizba' legaue' na' gotteba' legaue'. ⁸ Na' bene' ca' že'na' yosyocua'ane' cuerp chegaquen' gan' chesetolen la cay che ciuda blaon' gan' gosote' Xancho Jesucriston'. Ciudadan' zaca'leben ca ciuda Sodoma na' ca nación Egipto. ⁹ Na' šone ža yo gašje bene' za'ac zan yež na' zan nación, bene' zjanac zan diaža, bene' chesac gwde gwdele diža' da' de lo yežlion', yesene'e bene' guat ca' na' bi yeso'e latje yesegaše'. ¹⁰ Bene' ca' že' yežlion' yesyebede' da' gosat bene' ca' chope, na' yosonežjo lježe' bi da' yosonežjo lježe' da' chesyebede' dan' bich nita' bene' ca' yeso'e xtiža' Diosen' len legaue', le leca zed chesacden'. ¹¹ Na' ble'edaogüeda' gwde šone ža yogašje Diosen' bosbane' bene' ca' chope na' gosezeche' da' yoble. Na' yogo' bene' besele'e legaue' besežebchgüe'. ¹² Nach bene' ca' gosoe' xtiža' Diosen' gosende' gož Diosen' legaue' zižje:

—Le yeda, le yeyep nga.

Nach bene' ca' chesegue'e legaue' besele'ede' besyeyep'e yaban' to lo' bejw.

¹³ Šlac chesyeyepen' leca gwxo' na' gwžiayi' late' ciudadan', na' gaže mil bene' gosat caten' gwxon'. Na' bene' ca' besyega'an besežebchgüe' na' gosonxene' Dios ben' zoa yaba.

14 Ba gwde yela' zi' gwchopen' na' za' gac da' gwyone.

Can' goc cate' angl gaže bcueže' trompeta chen'

15 Nach angl bene' gažen' bcuež trompeta chen' na' benda' ba| bene' ca' že' yaban' gosene' zižje, gosene':

Doxen yela' chnabia' che yežlion'

bač naquen lo na' Xancho Diosen' na' lo na' Cristo ben' gwleje' cont chnabi'e. Na' Diosen' zoacze' chnabi'e toli tocaņe.

16 Nach bene' blao ca' tapechoa ben' zjachi' cue'ej cuit Diosen', jasechaze' coscho'ale lo yon' gosonxene' Diosen', 17 gosene':

Chonto' yela' choxclen chio' Xanto',

le naco' Dios ben' nap yela' guac xen.

Ba zoaczo' cate' biņa' xe yežlion',

na' soaczo' toli tocaņe.

Na' ba gwzolao chnabi'o len yela' guac xen chion' cont gac can' chazlažo' doxen.

18 Bene' nación ca' že' yežlion' beseže'e le',

perw ba bžin ža gono' yesezaca'zi'e.

Ba bžin ža choglaguo' che yogo' bene' ca' ba gosat še noe' nap do|a'.

Na' gono' cont bene' güen xšino' ca' bene' ca' goso'e xtižon' yesenite' mbalaz, len yogo' bene' gwlejo' cont zjanaque' lo nao', bene' gosonxen le'.

Con yogo' bene' gosonxen le' yesenite' mba, bene' gole len bene' xcuide'.

Lecze ba bžin ža yesebiayi' bene' ca' bosožiayi' ljež beņache' yežlion'.

19 Nach byaljo gan' chesonxene' Diosen' yaban' na' ble'eda' caj gan' že' yej ca' gan' nyoj da' ca' gož Diosen' bene' Israel gualaž cheto' ca' yesone' cont gaclene' legaque'. Na' šlac gwņa'a, gwyep yes, gocchgua sšag, gošj gwtin, gwxo' na' gwche'chgua yej.

12

No'olen' na' bel be zoa gaž yichj

1 Na' ble'edaogüeda' to da' yebanchgüecho le'e yaban', ble'eda' to no'ole na' nyaze' gwbižen' ca' xe'. Nleje' lo bion' na' zoa to corona yichje' da' žian šižinw beljw. 2 No'olen' no'e bdao' na' chosye'e, le chaque' bes che yela' sanņa'. 3 Na' ble'eda' yeto da' zaca' yebanecho le'e yaban', ble'eda' Satanás dan' chnabia' da' xigüe' ca', ba naquen ca' to bel be žia gaž yichj, be xen juisyw. Nacha' be xņa na' žia ši lozba' na' zoa tgüeje corona to to yichjban'. 4 Na' bta xbamban' cont bchijnjen zan beljw ca' žia le'e yaban' na' beselažon' lo yežlion', yelate'ze ca' goc gašje beljw ca' zjažia le'e yaban' bchijnj xbamban'. Na' gwlezba' xni'a no'olen' ba zoa sanņa' cont yebba' bdao' chen' cate' sane'be'. 5 Nach no'olna' gwxxane' to bi' byo bi' nabia' nación ca' na' žan ca' žan yosozenague' chebe'. Nach Diosen' beyo'ebe' gan' chi'e chnabi'e. 6 Nach no'olen' boxonjde' belen', na' gwyeje' to latje daš da' benšagüe' Diosen' che', gan' yeso'ene' da' ye'ej gagüe' lao to mil chop gayoa gayon ža.

7 Gwde na' goc to gwdile yaban', le angl blao ben' le' Miguel na' soldadw che' ca' gosedillene' bel ben' žia gaž yichj lencze angl che belen' bene' ca' besyeyac da' xigüe'. 8 Na' belen' len da' xigüe' ca' bi' gosezoen angl ben' zjanac bene' che Dios, na' bich bi' latje gota' che belen' yaba, neca che da' xigüe' ca' zjanac leba' txen. 9 Angl che Diosen' bosozale'ba' lo yežlion'. Na' lecze bosozale' da' xigüe' ca' lo yežlion'. Belnan' ben' zoa ža gwlaste nacha' gwxiye' na' leba' Satanás, na' ne' zoaczba' na'a chziye'ba' yogo' beņach.

10 Nach benda' to bene' zoa yaban' gwņe' zižje gwne':

—Bač bžin ža ben Dios chechon' cont bene' ca' chesejnilaže'ne' zjanite' len le'. Bač bžin ža nachia' Dios chechon' nape' yela' guac xen. Ba bžin ža chnabi'e cont gac con da' cheyala'cze gac. Na' ba bžin ža Criston' ben' gwleje' cont nabi'e bač chnabia'lene' le'. Gac da' cheyala'cze gac, le Satanás dan' ba gwzoa lao Diosen' do ža do yel bcuišen bene' chesejnilaže' Criston', bač besyebejen'.¹¹ Na' bene' gosejnilaže' Criston' na' ba gosate', gosezoede' bi bosozenague' che Satanásen', le gosejle'e Jesucriston' blalj xchene' neche xtola'gaque' na' goso'e diža' chesejnilaže'ne'. Bene' ca' ba gosat gosache'ede' vejni'a yesate' clal ca yesebejyichje' Jesucriston'.¹² Yaban' cheyala' gosya'an yela' chebe chen, na' le'e že'le gan' zoa Diosen' cheyala' yebele, perw nyaše'chgua gac che le'e zoale lo yežlion' na' lo' nisdaon', le Satanás dan' chnabia' da' xigüe' ca' ba betjen gan' zoalen' chaclocchguan, le nezen yešložga de latj chen.

¹³ Nach cate' belen' gocbe'eba' bosozale'ba' lo yežlion', blagsesba' no'olen' gwxa' bi' byo daon'.¹⁴ Perw Diosen' bnežjue' chop xile' da' xen ca xil bsiadao' cont gwyeje' latje daš gan' bi goc žin belen', latje gan' benšagüe' che' gan' yeso'ene' da' ye'ej gagüe' šon iz yo gašje.¹⁵ Na' bchoj nis zil cho'a belen' goquen to yegw cont bžinen gan' zoa no'olen' na' guan' le'.¹⁶ Perw Diosen' bene' cont yežlion' goclenen no'olen', byaljon güe'ejen nis dan' bchoj cho'a belen'.¹⁷ Nach belen' blocchguaba' no'olen' na' gwyejba' jatillemba' yezica'chle xi'ine' da' chosozenague' che Diosen', chesone' con da' že' na' zjanita'chache' chesejnilaže' xtiža' Jesucriston'.

13

Chope bež xigüe' be ble'e Juan

¹ Na' gwzia' cho'a nisdaon' na' ble'eda' bchoj to bež xigüe' lo' nisdaon'. Bežen' nita' gaž yichjba' na' žia ši lozba' na' žia tgüeje corona lao to to lozban'. Na' to to yichjban' nyoj to laba' da' chlo'en chon cuimba' ca Dios.² Ble'eda' bežen' nacba' ca to tigr, perw ni'ana'ban' zjanaquen ca ni'a na' oso na' cho'aban' naquen ca cho'a león. Nach bel ben' žia gaž yichj bnežjwba' bežen' yela' guac na' yela' chnabia' cheban' cont gwnabia'ba' na' cont gosenita' benač bosozenague' cheba'.³ Ble'eda' to yichj bežen' nacchguan güe', ca to da' gatlemba', perw beyacba'. Na' yogo'lol' benač besyebande' dan' beyacban' na' bosozenague' cheba'.⁴ Yogo'ze bene' gosonxene' belen' dan' bamba' cont gwnabia' bež xigüen', na' lecze gosonxene' bež xigüen', gosene':

—Nono zoa bene' nap yela' chnabia' xen ca bež nga, na' nono zoa bene' soede' tillene'ba'.

⁵ Lecze nono bžon gwna bežen' zaca'chba' ca Dios, na' gwnaba' yela' ya' che Diosen'. Na' goc lo na' bežen' gwnabia'ba' chopeyon bio'.⁶ Na' gwnechguaba' yela' ya' che Diosen' na' che yaba gan' zoe' na' len che yezica'chle bene' ca' že' yaban'.⁷ Na' gwyo'o lo na' bežen' gwdulemba' bene' ca' gosejnilaže' Diosen' na' bi gosezoede'ba'. Bibi goc yesone' cont yesyechoje' lo na'ba'. Gwnabia'ba' yogo' nación, yogo' yež, yogo' diaža na' bene' chesac gwde gwdele diža' da' de lo yežlion'.⁸ Na' yogo' bene' že' yežlion' bene' bi zjanyoj lagaque' le'e libr che Jesucriston', gosonxene' bežen'. Le cate' gwmete yežlion' Jesucriston' bzoje' le'e libr che' la yogo' bene' nezde' gata' yela' mban chegaque' toli tocañe, Jesucristw ben' zaca'lebde' ca xila' dao' be gosot bene' gualaž cheto' neche xtola'gaque'.

⁹ Note'tez le'e žia nagle da' chene, le gwzenag da' nga nia' le'e.¹⁰ Bene' yeseyixjue' ljež benače' ližya, decze de ližya yesata' legaque'. Na' bene' yesot ljež benače' len spada, decze de gac chegaque' ca'. Da'nan' chonen byen

soachach chio' ba gwlej Diosen' cont naccho lo ne'e, gwyo gwchejcho len bi da' gac checho na' soachachcho šejnilaže' chone'.

¹¹ Gwdena' ble'eda' yeto bež xigüen' be bchoj lo' yo. Na' žia chop lozba' da' nac ca loz xila', perw be'ba' diža' can' choe' bel' ben' žia gaž yichjen' diža'.
¹² Na' bež nechon' bamba' cont bež gwchopen' gwnabia'ba' par leba' na' bež gwchopen' bamba' cont yogo' bene' že' yežlion' gosonxene' bež nechon' ben' beyaque len güe' dan' naquen ze da' got leba'.
¹³ Na' bež gwchopen' bamba' zan da' bebanchgüe bene' len yela' guac cheban', na' bamba' cont besele'ede' yi' le'e yaban' na' beselažon' lo yežlion'.
¹⁴ Na' da' bamba' da' ca' gan' zoa bež nechon', gwziye'ba' bene' že' yežlion' cont bosozenague' cheba'. Nach bamba' mandadw gosone' to l' gua'a lsaca' da' nac ca bež nechon' da' gosonxene', bež ben' goc yichjban' güe' len spada, güe' da' naquen ze da' got leba' perw beyacba'.
¹⁵ Na' goc lo' na' bež gwchopen' bamba' cont l' gua'a lsacan' gwyo'on biš grasyw. Na' goc gwnen, benen mandadw gosote' yogo' bene' bi gosonxenen'.
¹⁶ Na' bež gwchopen' lecze bamba' byen gosezoa yogo' bene' señw che bežen' le'e na'gaque' licha o loxgagaque', bene' gole len bi' bixjw, na' bene' gwni'a len bene' yaše', na' bene' cheson xšin bene' yoble ca beyixe' len yezica'chle bene'.
¹⁷ Na' note'teze bene' še bi zoe' señw che bežen' o laba' o número da' zejen laba', bi goc bi si'e neca goc bi gote'.
¹⁸ Chyažjecho yela' sina' cont šejni'icho da' nga. Bene' chejni'i guac gwlabbe' número cheban', le naquen número da' chchin beñach, na' número cheban' naquen xop gayoa gayon xop.

14

Da' gosol' bene' ca' to gayoa tapeyon mil gosonxene' Diosen'

¹ Na' gwna'a na' ble'eda' Jesucristw ben' zaca'lebde' ca xila' dao' be gosot bene' gualaž cheto' neche xtoła'gaquen', zeche' lo ya'a Sión len to gayoa tapeyon mil bene' yoble. Na' zjanyoj la Jesucriston' len la Xe' Diosen' loxgagaque'.
² Na' benda' chesol' bene' zan bene' že' yaban'. Nenen ca chsiž ga zjadechgua yegw zan na' ca nen cate' chašjw chtin. Na' nenen ca nen cate' bene' zan chosogole' arpan' to ši'ize.
³ Na' gosole' to da' cobe lao Diosen' na' lao bene' ca' tap zjažia xil na' lao bene' blao ca' tapechoa gan' chi' Diosen' chnabi'e. Noch no bene' yoble goc gol' len, con bene' ca' to gayoa tapeyon mil na'ze gosac bososedē' dan' gosolen' cont gosonxene' Diosen', legacze' bebej Criston' lo na' Satanásen' šlac ne' nite' yežlion'.
⁴ Bene' ca' gosolen' zjanaque' bene' bi gosata'lene' no'ol bi nac xo'olgaque', na' gosapchgua cuingaque' cont gosac lažda'ogaquen' xilaže' len Diosen'. Na' zja'acteze' len Jesucriston' gate'teze zeje' chosozenague' che', le bebeje' legaque' lo na' Satanásen' cont zjanaque' lo ne'e na' lo na' Diosen'. Da'n'an' zjazaca'lebde' ca to tlacw coseš da' bnežjw bene' Israel gualaž cheto' ca' lo na' Diosen'.
⁵ Gwbat goso'e diža' güenlaže' na' bibi doła' zjanape' lao Diosen' ben' chi'e chnabi'e.

Da' gosena šone angl

⁶ Nach ble'eda' yeto angl le'e yaban' chde' lo be'. Na' gwduxjue'ede' diža' güen che Diosen' da' bi te chen len bene' že' yežlion', len bene' zjanac to to nación, to to yež, to to diaža, na' bene' chesac gwde gwdele diža' da' de yežlion'.
⁷ Gwne' zižje gože' legaque':

—Le žeb Diosen' na' le gonxene', le ba bžin hor gone' yela' justis che beñach. Le gonxen Dios ben' ben yaban', yežlion', nisdao' na' ga chal nis.

⁸ Yeto angl za' cožen' gwne':

—Bač bžin ža cuiayi' ciuda Babilonia da' nac da' blao. Bač bžin ža cuiayi' ciuda che bene' ca' bosozoe' Diosen' ca'ale na' gosebede' da' nac yela' zto', le ba gosego'oyele' bene' že' yogo' nación cont chesone' güedenag len Diosen'.

⁹ Nach yeto angl zej cože' bene' gwchopa' be'e diža' zižje gwne':

—Note'teze bene' chesonxen bež xigüen' len l̄ gua'a lsaca' cheba' na' cheso'e latje chesezoa señw che beža' loxgagaque' o taca'gaque', ¹⁰ Diosen' ba nžie' bia' yesesaca'zi'chgua bene' ca'. Yesezaca'zi'e gan' čala' yi' len azufre lao angl che Diosen' na' lao ben' zaca'lebde' ca xila' dao' ben' gosot bene' Israel neče xtola'gaque'. ¹¹ Tołi tocañe čhas žen che yi' gan' yesezaca'zi'en. Na' bene' ca' chesonxen bežen' len l̄ gua'a lsaca' cheban', na' bene' zjazoa señw che bežen' loxgagaque' o taca'gaque', bi gac yesyezi'laže' len da' yesezaca'zi'en ne chel ne lagüe ža. ¹² Da'nan' chonen byen soačhač chio' ba gwlej Diosen' cont naccho lo ne'en, gwyo gwčejcho len bi da' chac checho, chio' chzenagcho che da' non Diosen' mandadw goncho na' bi chbejyichjcho dan' chejnilaže'cho Jesúsen'.

¹³ Nach benda' to bene' zoa yaban' gwne':

—Bzoj da' nga: “Mbalaz bene' ca' ne' chesejnilaže' Xancho Jesucriston' žinte ža yesate'. Can' chac na'a na' can' gac bate'teze.”

Na' Spiritw che Diosen' žan:

—Da' li nite' mbalaz, le yesyezi'laže' len xšingaquen', na' gacbia' yogo' da' güen da' ba gosone'.

Yotob Diosen' bene' bi chosozenague' che' cont yesezaca'zi'e

¹⁴ Nach gwña'a da' yoble na' ble'eda' to bejw šiš le'e yaban' na' cože' bejon' chi' to bene' nac ca to beñach. Na' zoa to corona de oro yichjen' na' noxe' to da' nzi' hoz da' nlachgua. ¹⁵ Na' yeto angl bchoj lo' gan' chesonxene' Diosen' yaban' na' gwne' zižje gože' ben' chi' cože' bejon':

—Ba bžin hor yotobo' coseš che uvas dan' de yežlion', le ba golen.

¹⁶ Nach ben' chi' cože' bejon' noxe' hoz botobe' cosešen'.

¹⁷ Nach bezchoj yeto angl lo' gan' chesonxene' Diosen' yaban' na' lecze noxe' yeto hoz da' nlachgua. ¹⁸ Na' lecze bezchoj yetoe' ben' yo'o lo' ne'e yi' da' čala' lo mes gan' chesonxene' Diosen'. Na' angl nga gwne' zižje boł güiže' angl gwchopa' ben' lecze noxe' hoz, gože'ne':

—Ba güe uvas da' žia lo yežlion'. Bečoguen len hoz chion' dan' nlachgua cont yotobchon.

¹⁹ Nach anglen' bečogue' uvas da' žia yežlion' len hoz dan' noxen' na' botoben' bzalen' to lo' ša' xen ga yesesien' cont choj xisen'. Zeje diža', Diosen' botobe' bene' ca' bi bosozenag che' na' gwlo'e legaque' ga yesezaca'zi'e. ²⁰ Na' gan' gosezaca'zi'en naquen cho'a ciudan', na' lo' ša' xen gan' gwlo'e uvasen' belalje chen zil da' nac xčhengaque', bežinen ca sibe to xčhega' cabayw, na' bžiljon šone gayoa mil metr.

15

Angl ca' zjayo'o lo na'gaque' gaže yela' zi' da' zelao yesac

¹ Na' ble'eda' yeto da' leca zaca' yebanecho le'e yaban'. Ble'eda' gaže angl bene' zjanac lo na'gaque' yesone' yegaže yela' zi' cont yeyož gwlo'e Diosen' can' chone' da' chloque' bene' ca' cheson da' xinj.

² Lecze ble'eda' to da' nac ca to nisdao' de vidrw da' nchixen yi'. Na' cho'a nisdan' zjazecha bene' ca' gosezoede' bi gosonxene' bežen' na' l̄ gua'a lsaca' dan' nac ca leba', na' bi goso'e latje yosozoe' legaque' señw cheba' o número da' zejen laba'. Na' zjanoxe' tgüje arpa da' bnežjw Diosen' legaque'. ³ Na' ble'eda' legaque' chesonxene' Diosen' chesole' to da' bsede da' Moisésen' bene' Israel gualaž čheto' ca', Moisés ben' ben xšin Diosen' cani'. Lecze chesole' da' naquen to da' bsede Jesucriston' legaque', Jesucristw ben' zaca'lebde' ca xila' dao' be gosot bene' gualaž čheto' neče xtola'gaque'. Quinga žan: Xanto' Dios, yogo' da' ba beno' len yela' guac xen chio'

naquen da' güen juisyw na' da' zaca' yebanecho.

Yogo' da' chono' zejen to licha na' naquen da' zaca'.

Len' chnabi'o nación ca'.

⁴ Nono zoa bene' bi cheyala' žebe' le' Xanto', da' chono' castigw che da' malen'.

Nono zoa bene' bi cheyala' gonxene' le'.

Tozo' le' naco' bene' laždao' xilaže' juisyw.

Na' bene' že' yogo' nación yeside' laguon' yesonxene' le',

le ba besele'ede' da' ba beno' na' zjanezde' zejczen to licha.

⁵ Gwde benda' da' na' nach gwña'a da' yoble na' ble'eda' byaljo gan' chesonxene' Diosen' yaban', latje gan' ngo'ošagüe' ley che Dios da' nyoj. ⁶ Na' ble'eda' gaž angl ca' zjayo'o lo na'gaque' yesone' gac gaž yela' zi' lo yežlion', besechoje' gan' chesonxene' Diosen' yaban'. Angl ca' zjanyaze' lache' šagüe' da' nac šiš xila' da' chactiten, na' to toe' nchej cho'alcho'e to bant de oro. ⁷ Na' ble'eda' bene' ca' tap zjažia xil ben' nita' lao Diosen', na' toe' bnežjue' angl ca' gažen' tgüeje tas de oro da' zjanža'ten da' zjajožen da' chon cont chac yela' zi' ca' lo yežlion', na' zejen Diosen' ben' zoa toli tocanē chlocchgüe' da' cheson bene' bi chosozenag che'. ⁸ Na' doxen gan' chesonxene' Diosen' yaban' gwche'chguan ca' žen che be'ni' da' nsa' Diosen' na' che yela' guac xen che'. Nono goc šo' gan' chacxen Diosen' šlac biña' yeyož yesac yela' zi' ca' gaž da' zjanac lo na' gaž angl ca'.

16

Tas ca' gaže na' yela' zi' ca' gosac cate' bososcho'en

¹ Na' benda' gwne Diosen' zižjehgua, zoe' gan' chacxene', gože' angl ca' gaže:
—Le šja'ac le šjalalj dan' yože lo' tas chelen' lo yežlion', da' zejen leca chloca' da' xinj cheson bene' ca' bi chosozenag chia', na' gona' ga yesezaca'zi'chgüe'.

² Nach angl nechon' gwyeje' jalalje' da' yože lo' tas chen' lo yežlion' gan' nac yo biž, na' yogo' bene' ca' zjazoa señw che bežen' na' chesonxene' l' gua'a lsaca' da' nac ca' leba', gosebie' güe' xen güe' zban na' goselachgüe'.

³ Nach angl gwchopen' jalalje' da' yože lo' tas chen' lo nesdaon' na' nesdaon' beyaquen chen ca' chen che bene' guat, na' gosat yogo' be ca' že' lo' nisen'.

⁴ Nach angl gwyonen' jalalje' dan' yože lo' tas chen' lo yegw ca' na' gate'ze chal nis na' lecze besyeyaquen chen. ⁵ Nach benda' gwne angl ben' chape' nisen' da' de lo yežlion', gože' Diosen':

—Xanto' Dios, len' naco' bene' laždao' xilaže' juisyw. Ba zoaczo' le' cate' za' xe yežlion'. Zejczto licha can' ba gwchoglaguo' chac da' quinga, ⁶ le bene' že' yežlion' ba gosote' bene' ca' gosote' xtižon' na' gosote' nochle bene' gosac lo nao'. Da'nan' ba beno' cont yese'eje' chen neche da' bosolalje' xchen bene' ca'. Na' da' chac chegaque' naquen da' cheyala'cze gac.

⁷ Nach benda' gwne to bene' do cho'a mes gan' bene' ca' že' yaban' chosozeye' bi da' chosozeye' cate' chesonxene' Diosen', gwne':

—Xanto' Dios, len' napo' la'zelagüe yela' guac xen, chono' con can' žo' gono', na' chono' da' zej to licha cate' chchogbi'o che bene'.

⁸ Nach angl gwdapen' jalalje' dan' yože lo' tas chen' lo gwbižen', na' gwbižen' bzeyen beñach. ⁹ Yogüe' leca goseye', perw bi besyetiñde' xtoła'gaque' na' bi gosonxene' Diosen', con gosene' yela' ya' che Dios ben' be' latje goc da' ca' chesezaca'zi'e.

¹⁰ Nach angl gayon' jalalje' dan' yože lo' tas chen' gan' chi' bežen' chnabia'ba' na' beyac choł doxen gan' chnabia'ban'. Na' beñachen' gosagwxeje lože'gaquen' catec gosesezaca'zi'e. ¹¹ Na' gosene' yela' ya' che Dios ben' zoa yaban' neche dan' chesezaca'zi'en na' neche güe' xen dan' zjažia lo cuerp chegaquen', perw ne ca' bi besyetiñde' che da' mal dan' gosonen'.

¹² Nach angl gwɣopen' jalalje' dan' yože lo' tas chen' lo yegw xen da' nzi' Eufrates, na' bebiž nis yegon' cont beyaquen to nez ga yesede bene' gwnabia' ca' za'ac do gan' chla' gwbiž.

¹³ Nach ble'eda' šone da' xigüe' da' zjanac ca blož. Ton bchojen cho'a bel be zoa gaž yichj, yeton bchojen cho'a bež xigüen' na' yeton bchojen cho'a ben' cho'e diža' güenlaže' cont chesonxene' bežen'. ¹⁴ Na' da' xigüe' quinga gosonen yela' guac da' besyebane bene', na' jasetoben yogo' bene' gwnabia' ca' že' gate'teze lo yežlion' cont yesedillene' Dios ben' nap la'zelagüe yela' guac xen cate' žin ža gac ca'. ¹⁵ Na' benda' ben' nac Xi'in Dios gwne':

—Le gwzenag da' nga: ba zoa yida' da' yoble, yedexenyala' bene' bi chosozenag chia' can' chzenyal bene' gwban ga chjalane'. Mbalaz zjazoa note'teze bene' nita'teze' chesebeze' neda' cate' yida' na' chesezaquede' bibi da' mal chesone', le yesacde' zto' še bina' yesyetinjde' xtoła'gaquen' caten' yida', na' yogo'ze bene' yesacbe'ede' da' malen' ba gosonen' še ca'.

¹⁶ Nach bezle'eda' da' xigüe' ca' šone bosyotoben yogo' bene' gwnabia' ca' že' lo' yežlion' to latje ga nzi' Armagedón diža' hebreo.

¹⁷ Na' angl gažen' jalalje' dan' yože lo' tas chen' lo be', na' benda' gwne Diosen' zižje, gan' zoe' chesonxene' le' yaban' gan' lecze chi'e chnabi'e, gwne':

—Bač goc da' cheyala' gac.

¹⁸ Nach gwyep yes, goc sšag, na' gošj gwtin, na' leca gwxo'. Gwɣo'ch ca ba goc bate'tezechle šlac že' benachen' lo yežlion'. ¹⁹ Na' ciuda da' nac la'zelagüe blao lo yežlion' gwžiyain' bchojen šonle, na' lecze gosebiayi' yezica'chle ciuda da' zjachi' lo yežlion'. Diosen' bich gwleze' bene' cont goseyi gosezaca'chgua bene' že' ciuda Babilonia che da' mal da' ba gosontequē', le blocchgüe' yela' mal chegaquen'. ²⁰ Na' catequen' gwxo' besyenittecze yogo' yež da' zjachi' lo' nisdaon' na' yogo' ya'a ca'. ²¹ Na' gwche'chgua yej ži'a lo yežlion', yej zi'i da' cha'a do tapa rob güeje beselažon' cože' bene'. Na' bene' že' yežlion' gosene' yela' ya' che Diosen' neche dan' besežaglaochgüe' len yej dan' gwchen'.

17

Diosen' be'e castigw che ciuda blao da' zaca'lebe ca to no'ole zle'

¹ Na' ca nac angl gaž ca' gosoxe' tas de oron', toe' bedenie' neda', gože'nda':

—Da, gwlo'eda' le' can' gon Diosen' saca'zi' no'ole blaon' chi' lo nisdao' ca', no'olen' nac no'ol zle'. ² Yogo' bene' gwnabia' ca' že' yežlion' ba besyebede' bosozenague' che' gualaz che Diosen', na' da'nan' guac nacho zjanaque' xtoe'. Na' bene' že' yežlion' da' besyebchde' le' clel ca Diosen', guac nacho gosezožde' da' ba gose'eje' vino da' bnežjue' legaque'.

³ Nach šlac ben Spiritw che Diosen' cont ble'edaogüeda' da' quinga, anglen' gwche'e neda' to latje daš. Na' bžina' na' ble'eda' to no'ole žia cože' bež xna be nac gaž yichjba' na' žia ši lozba'. Na' doxen cuerp cheban' nyoj diža' da' chžiaba' yela' ya' che Dios. ⁴ No'olen' nyaze' lache' da' nac moradw na' xna, na' non cuine' xdan len oro, len yej zaca' na' len perlas. Na' noxe' to tas de oro da' nža'ten yožen vino. Na' vinon' zejen chbede' chone' da' yela' zto' na' bichle da' chgue'e Dios. ⁵ Na' loxgue' nyoj diža' da' žan naquen' naque', diža' da' bi gosejni'i benač, žan: "Naca' ciuda Babilonia na' nacchgua' blao. Naca' no'ole zle', le chona' cont bene' že' yežlion' bi chesonxene' Diosen', na' chgo'oyela' legaque' cont chesone' da' zan da' chgue'e Diosen'." ⁶ Na' ble'eda' chzože no'olen', le ba güe'eje' xchen bene' ca' zjanac lo na' Diosen', bene' gosoe diža' chesejnlaže' Jesúsen', na' da' nacho güe'eje' xchengaque' zeje diža' betue' zane'. Na' cate' ble'eda' no'olen' leca bebanda'. ⁷ Nach gož anglen' neda':

—Bi yebando'. Gwzejni'ida' le' bi zejen dan' ble'edo' no'olen' žie' cože' bež be gaž yichjen' na' žia ši lozba'. ⁸ Bežen' ble'edo' gwzoaba' gwnabia'ba' šlož na' bich zoaba' na'a, perw yechojba' lo' yechw zitjwchgua dan' nac lo gabilen' gan' yo'oba' na'a cont soaba' nabia'ba' yežlož, na' techle yeyo'oba' na' saca'zi'ba' toli tocañe. Cate' gwxe yežlion' Diosen' bzoje' la beñe' ca' zjanape' yela' mban toli tocañe le'e libr chen'. Na' beñe' ca' bi zjanyoj lagaque' le'e libr che Diosen' yesyebande' cate' yesele'ede' bežen' gwzoa, ben' bi zoa na'a perw soaba' da' yoble.

⁹ 'Chyažjecho yela' sina' cont šejni'icho da' nga: da' gaž yichj bežen' zjanaquen gaž ya'a gan' chi' no'olen'. ¹⁰ Na' lecze zejen gaž beñe' gwnabia'. Gayoe' ba gosenite' gosenabi'e na' ba gwnit yela' gwnabia' chegaquen'. Toe' chnabi'e na'a na' ben' yeto beñe' bzeben' za' yedenabi'e, na' cate' yide', šložze yedenabi'e. ¹¹ Na' bež ben' gwzoa cana' perw bich zoaba' na'a, zejen yeto beñe' gwnabia', beñe' xono'. Naque' to beñe' ca' gaže gosenabi'e na' nabi'e da' yoble, perw Diosen' gone' cont cuiaye'e na' chi saque' toli tocañe.

¹² 'Na' lozba' ca' ši dan' ble'edo', zejen ši beñe' gwnabia' beñe' za' za'ac cont yesenabi'e. Na' gac lo na'gaque' yesenabi'e txen len bežen', perw šložze. ¹³ Na' yogo'te beñe' ca' ši, toz ca yesone' yesegüe'e lo na' bežen' yela' gwnabia' chegaquen' na' bichle da' chac chesone' cont bežen' gacchba' blao. ¹⁴ Na' yesedillene' Jesucristw ben' zaca'lebde' ca xila' dao' ben' gosot beñe' gualaž cheto' neche xtoła'gaque', na' Jesucriston' gone' gan lo gwdilen', le len' naque' Rey ben' chnabi'e yezica'chle rey, na' naque' Xancho ben' chnabi'e yezica'chle beñe' gwnabia'. Na' beñe' ca' yeson txen len Jesucriston' zjanaque' beñe' ca' ba gwlej Diosen' cont zjanaque' xi'ine', beñe' ca' nezde' yesenita'chache' yesejnilaže'ne' bite'teze da' gac.

¹⁵ Nach anglen' gože' neda', gwne':

—Nisdao' ca' ble'edo' gan' chi' no'ol zlen' zejen yesenita' beñe' zan juisyw, beñe' yež zan na' nación zan, beñe' chesac gwde gwdele diža' da' de lo yežlion'. ¹⁶ Na' bežen' žia no'olen' cože'ban', ben' žia ši loz, gue'eba' no'olen' na' lecze ca' yeson lozba' ca' ši dan' zejen ši beñe' gwnabia'. Na' yesaque' txen yeseque'e da' de che no'olen' na' yosyocua'añe'ne' ga'alyide'. Tena' yesagüe' xpelen' na' yosozeye' bi da' yega'añ da' bi yesagüe'. ¹⁷ Le Diosen' güe'e latje yesaque' txen yesone' yogo' da' ca' na bežen', na' yesone' yela' chnabia' chegaque' lo na' bežen' cont yeyož gac yogo' dan' ba gwna Diosen'. ¹⁸ Na' no'olen' bach ble'edo', naque' ciuda blaochgua da' chnabian' beñe' gwnabia' ca' že' doxen lo yežlion'.

18

Can' gac cate' cuiayi' ciuda Babilonian'

¹ Gwdena' ble'eda' yeto angl beñe' gwza' yaban' betje' lo yežlion'. Goc lo ne'e yela' gwnabia' xen cont goc con can' gwne', na' gwyeni' lo yežlion' len be'ni' che' da' nse'e. ² Na' anglen' gwne' žižje, gwne':

—Ba bžin ža cuiayi' ciuda Babilonian' da' nac leca ciuda blao. Ba bžin ža yeyaquen xišna' da' xigüe' ca'. Na' ba bžin ža yeyaquen xišna' yogo'cze be zoa xil be chesegue'e beñach. ³ Cuiayin', le beñe' ca' že' ciudan' gosego'oyele' beñe' že' yogo' nación cont bosozoe' Diosen' ca'añe bi gosonxene' le'. Na' beñe' gwnabia' ca' že' yežlion' ba gosonchgüe' da' mal txen len beñe' Babilonia ca' catequen' besyebede' gosone' da' yela' zto', na' beñe' güen delgens ca' že' lo yežlion' ba gosaque' beñe' gwni'a, le beñe' Babilonia ca' gosonditjchgüede' dan' gota' chegaque' gosezi'en.

⁴ Nach benda' gwne' yeto beñe' zoa yaban', gwne':

—Le'e nacle xi'ina', le yechoj ciuda Babilonian' cont bi gonle da' mal txen len bene' ca' na' cont bi saca'zi'le txen len legaue', ⁵ le dechgua xtola' bene' Babilonia ca', na' bich cues Diosen' gwnežjue' castigw chegaue'. ⁶ Yesezaca'zi'sque' lagüe dan' bosochi bososaque' bene', na' yesežaglaosque' da' xench ca dan' bosochi bososaque' bene' yoble. Gacšca chegaue' castigw guallech ca da' gosone' che bene'. ⁷ Con can' gota'chgua da' šagüe' da' güen chegaue' na' gosone' con bi da' žan chegaue', chnablaža' gacchgua chegaue' yela' yaše' yela' zi' cont yesyegüine'chgüede'. Bene' Babilonia ca' ba gosone' xbab lo' yichjlažda'ogaue' gosene': "Gwbat te yela' chnabia' cheton'; gwbat soato' yela' güine', neto' že'to' ciuda blao nga." ⁸ Da'n'an' lo toze ža gac yogo' da' ca' gosacde' gwbat gac chegaue'. Bene' zan yesat, bene' zan yesegüine'de', na' yesebil yesedone', na' yeseye' len yi'. Gac ca' che bene' že' ciuda Babilonian', le Xancho Diosen' nape' yela' guac xen cont gone' yesezaca'zi'e neche xtola'gaue'.

⁹ Bene' gwnabia' ca' že' lo yežlion' bene' bosozenag che bene' Babilonia ca' cont bosozoe' Diosen' ca'ale na' gosone' bichle da' chgue'e Diosen', legaue' yesebeže' na' yesegüine'de' cate' yesele'ede' žen da' chas cate' šey ciudan'. ¹⁰ Na' yesyega'ane' zito'le yesene'e can' gac che bene' Babilonia ca', le yesežebchgüe'. Na' yesene':

—jNyaše'chgua chac che ciuda Babilonia nga da' nac blaoch ca yogo' ciuda! Ba chbiayi' ciuda da' gwnabia'ch lo yezica'chle ciuda da' zjachi' yežlion'. Ba bžin ža cuiayin' to ši'ize.

¹¹ Nach bene' güen delgens ca' že' yežlion'a yesebeže' na' yesegüine'de' cate' cuiayi' ciudan', le noch no si' dan' yesoten'. ¹² Nono žel bene' si' da' yesote' da' nac de oro, de plata, de yej zaca', na' de perlas. Nono žel bene' si' lache' la'ay da' chesote' de lino, de sed, na' lache' moradw na' lache' xna. Nono žel bene' si' da' yesote' da' nac de yag da' chla' zix o de bichle yag zaque', de marfil, de ya na' de mármol. ¹³ Nono žel bene' si' canel, no set zix, no yal, no mirra, no perfume, no vino, no set yela' guagw, no yezj šiš, no trigw, no burr bžina', no xila', no cabayw, no carret, na' no benačh bene' yesote' ca beyixe'. ¹⁴ Na' bene' güen delgens ca' yesene' che ciudan':

—Ba gwde che yogo' da' zix ca' na' yogo' bichle da' ca' gosazlaže' bene' Babilonia ca' yesezi'e lo yela' gwni'a chegaquen'. Gwbatech yesezi'e da' ca'.

¹⁵ Na' bene' güen delgens ca' bene' gosote' da' ca' gosezi' bene' Babilonian', ben' gosata' yela' gwni'a chegaue' neche bene' Babilonia ca', yeseze' zito'le yesežebchgüe' che dan' chesežaglaosque' bene' Babilonian'. Na' yesebeže' na' yesegüine'de', ¹⁶ na' zižje yesene':

—jNyaše'chgua ba goc che ciuda nga da' gocch blao ca yezica'chle ciuda ca' zjachi' yežlion'! Bene' gwže' ciudan' gosazchgüe' lache' šagüe' lache' zaque', no lache' moradw na' no lache' xna. Gosonchgua cuingaque' xdan len oro, len yej zaca' da' chesactiten, na' len perlas. ¹⁷ Perw na'a zejzenez gwžiai' yogo' da' šagüe' chegaquen'.

Yogo' xan barcw ca', yogo' bene' ca' chja'ac lo' barcw ca', len bene' ca' cheson žin lo' barcon' na' nochle bene' cheson žin lo' nisdaon', yogüe' yeseze' zito'le yesene'e. ¹⁸ Na' yesele'ede' chas žen cate' šey ciudan' na' yesene':

—Bina' gata' yeto ciuda yoble doxen lo yežlion' da' žinlaže' ca ciuda nga len yela' gwni'a yela' šagüe' chen.

¹⁹ Na' yosožia yo bište yichjgaue' da' yesyegüine'de', na' yesebežyaše', yesene':

—jNyaše'chgua ba goc che ciuda nga da' gocch blao ca yezica'chle ciuda ca' zjachi' yežlion'! Neche yela' gwni'a che bene' ca' gwže' lo ciudan' yogo' chio'

bencho gan xen len žin da' bencho len barcw checho quinga. Na' na'a zejzenez gwžiai' ciudadan'.

²⁰ Perw le'e že'le yaban', le yebe. Le'e gwseła' Diosen' gocle postlw che', na' le'e gwsele' be'le xtižen', na' yezica'chle le'e zoale lo na' Diosen', le yebe. Le Diosen' ba gwchoglagüe' yesebiayi' bene' Babilonia ca' neche dan' bosochi bososaque' le'e.

²¹ Nach to angl gual bcese' to yej xen ca dan' chon žin gan' chi' molin xen, na' bzalen' lo' nisdaon', gwne':

—Can' gac che ciuda Babilonian', yeniten can' benit yej xen dan' bzala' lo' nisdaon', na' gwbatech le'echon da' yoble. ²² Gwbatech yosogole' arpa lo ciudadan'; gwbatech yosocuež güecuež ca' no flauta no trompeta. Gwbatech žel bene' zjansed cont yesone' no xšinlaze' da' chosochine', neca yenecho sšag che bene' chesot len molin lo ciudadan'. ²³ Gwbatech le'echo be'ni' che lámpara, na' gwbatech yenecho bene' cheson lni che yela' güešagna'. Yesebiayi' bene' güen delgens che ciudadan' bene' zjanac bene' blao lo yežlion', le bene' Babilonia ca' ba goseziye'e bene' že' yogo' nación len yela' güaža' chegaquen'.

²⁴ Bene' Babilonia ca' gosote' bene' goso'e xtiža' Diosen' na' nochle bene' gwlej Diosen' cont gosaque' lo ne'e, na' bene' ciuda nan' zjanape' doła' che yela' got che yezica'chle bene' gosot bene' doxen lo yežlion'.

19

¹ Gwdena' benda' bene' zan juisyw bene' že' yaban' chesonxene' Diosen', na' nen zižje, chesene':

Bene' güen juisyw nac Dios chechon'.

Ba bene' cont chio' chejnilaže'chone' zoacho len le'.

Naque' bene' zaca' juisyw, na' nape' yela' guac xen.

² Zejcze' to licha na' chone' can' cheyala'cze gac dan' chchoglagüe' yesezaca'zi' bene' bi chosozenag che'.

Ba gwchoglagüe' cuiayi' ciuda xen da' zaca'lebe ca to no'ole zle',

le bene' lo ciudadan' gosego'oyele' bene' že' doxen lo yežlion'

cont bosozoe' Diosen' ca'ale bi gosonxene' le'.

Diosen' ba gwchoglagüe' cuiayi' laž bene' Babilonia ca',

le cheyala'cze yesezaca'zi'e da' gosote' bene' ca' gosonxen le'.

³ Nach da' yoble gosene':

—Bene' güen juisyw nac Diosen'. Tołi tocañe chas žen gan' šey ciudadan'.

⁴ Nach bene' blao ca' tapechoa na' bene' ca' tap bene' žia xil jasechaze' coscho'ale lo yon' gosonxene' Diosen' gan' chi'e chnabi'e, gosene':

—Can' cheyala' gac. Bene' güen juisyw nac Diosen'.

⁵ Na' benda' gwne to bene' do gan' chi' Diosen' chnabi'e, gwne':

Yogo' chio' naccho bene' güen xšin Diosen' cheyala' gonxenchone',

chio' chzenagcho che', chio' naccho bene' gole na' chio' naccho bene' xcuide' na' bi' bixjw.

Yela' güešagna' che ben' zaca'lebde' ca xila' daon' gosot bene' Israel neche xtola'gaque'

⁶ Nach benda' be xne che bene' zan juisyw chesonxene' Diosen'. Na' xtiža'gaquen' nenen ca chac ga chžiž yegon' cate' dechguan na' ca nen cate' leca chašjw chtin, chesene':

¡Bene' güen juisyw Xancho Diosen'!

Len' nape' la'zelagüe yela' guac xen na' len' chnabi'e.

⁷ Chebechgüecho na' zoachguacho mbalaz chonxenchone'.

Le ba bžin ža gac yela' güešagna' che ben' zaca'lebde' ca xila' dao' be gosot bene' Israel neche xtolā'gaque'.

Ba zoa no'olen' si'e gac xo'ole'.

⁸ Ba bnežjue'ne' lache' šagüe' da' nyaze', lache' šiš xila' juisyw.

Na' lache' šagüe' da' šiš xila' nyaze' zejen da' güen da' chon chio' ba gwlej Diosen' cont naccho lo ne'e.

⁹ Nach anglen' da' yoble gože'nda':

—Bzoj da' nga: “Mbalaz bene' ca' ba goxe' cont yesenite' cate' gac lni che yela' güešagna' che ben' zaca'lebde' ca xila' dao' be gosot bene' Israel neche xtolā'gaquen'.”

Nach anglen' gwne':

—Diosen' gože' neda' dan' ba gwnia', na' naquen da' li.

¹⁰ Nach bzoa xiba' cont gonxena' anglen', perw anglen' bi bene' latje, gwne':

—Bi gono' ca'. Neda' naca' con to bene' güen xšin Diosen' can' naco' le' na' bene' lježo' ca' bene' bi chesebejyichje' xtiža' Jesúsén' da' chesejle'e. Benxen Diosen'.

Na' note'teze bene' cheso'e diža' li che Jesúsén', zoa Spiritw che Diosen' chzejni'in legaque' cont cheso'e xtižen'.

Bene' žia cože' cabayw šiš

¹¹ Nach ble'eda' yaban' ca to da' nyaljo, na' ble'eda' to cabayw šiš na' žia to bene' cože'ba'. Na' ben' žia cože'ban' zjansi'ene' Ben' Chon Con Can' Že' na' Cho'e Diža' Li. Zejcze' to licha can' chchoglagüe' saca'zi' bene' bi chosozenag che' na' can' chdillene' da' malen'. ¹² Na' ble'eda' yejlagüe' ca' chesactiten ca to yi' da' chalā'nin, na' zjazoa zan corona yichje'. Na' ble'eda' nyoj yeto le' loxgwen' da' nombia' toze le'. ¹³ Ble'eda' nyaze' to lache' da' dope chen, na' le' Xtiža' Dios. ¹⁴ Na' ble'eda' bene' zan bene' zjanac soldadw che Diosen' zjana'ogüe'ne', zjanyaze' lache' šagüe' da' nac da' šiš na' da' naquen xilaže', na' to to bene' ca' zjažie' tgüeje cabayw šiš. ¹⁵ Cho'a ben' le' Xtiža' Dios chchoj to spada da' nlachgua da' gwchine' chine' nación ca' bi chosozenag che'. Le nabi'e nación ca' na' žan ca žan yosozenague' che'. Na' gone' yesezaca'zi'chgua bene' ba goson da' malen', le Dios ben' nap la'zelagüe yela' guac xen chlocchgüe' can' ba gosonen'. ¹⁶ Na' le'e xcamise' na' le'e xichje' nyoj diža' quinga žan: “Naca' Rey ben' chnabia' yezica'chle rey na' naca' Xan yezica'chle bene' gwnabia'.”

¹⁷ Nach ble'eda' to angl bene' zecha lo gwbižen', na' bosye'e bol güiže' yogo' cuen šod ca' chesaš le'e yaban', gože'ba':

—Le da, le yedobe nga gagwle to xše' xen da' gon Diosen' gagwle. ¹⁸ Gata' xpela' bene' gwnabia', xpela' xan soldadw, xpela' no bene' gual. Gata' xpela' cabayw na' xpela' bene' gosebie'ba'. Gata' xpela' yogo' cuen bene', bene' gosac esclavos na' bene' bi gosac esclavos, bene' gosac bene' xcuide' na' bene' gosac bene' gole.

¹⁹ Nach ble'eda' bež xigüe' nechon' len yogo' bene' gwnabia' ca' že' yežlion' na' soldadw chegaque' ca'. Ba besedobe' txen cont yesedillene' Jesús ben' žia cože' cabayw šišen' len soldadw che' ca'. ²⁰ Na' bež nechon' gocha' lo na' Jesúsén'. Na' lecze' ca' goc che bež xigüe' gwchope ben' choe' diža' güenlaže' na' bamba' yela' guac cont benachen' bosozenague' che bež nechon', cont gosonxene' l gua'a lsaca' cheba' na' cont gosezoe' señw cheba'. Chopteba' gosacha' lo na' Jesúsén', na' ca' zjambamba' bosozale'ba' lo' yi' gabil gan chalā'nin azufre, yi' xen da' nac ca to nisdao'. ²¹ Nach bene' ca' yezica'chle, Jesúsén' ben' žia cože' cabayw šišen' betue' legaque' len spada da' chchoj cho'en', na' yogo' šod ca' gosagwxatba' xpela'gaquen'.

20

Can' gac lo to mil iz

¹ Na' ble'eda' to angl bene' zoa yaban' betje' cont gwsaljue' yechw zitjwchgua dan' nac lo gabilen', na' noxe' to gden xen. ² Na' anglen' bexo'e beļ ben' zoa gaž yichj, be bla' da' nechw ža gwlaste. Leba' chnabia'ba' da' xigüe' ca' na' leba' Satanás. Anglen' bcheje'ba' gdenṇa' to mil iz. ³ Nach beyož bcheje'ba', na' bzale'ba' lo' yechw gabilen' na' la' bseyjwte' cho'a yechon' na' bchišen' to seyw. Bene' ca' cont bich siye'ba' beṇaḥ ślac biṇa' te to mil iz. Na' cate' ba gwde to mil izen', cana'ch yeseže'ba' gdenṇa' cont yechojba' yešlož dao'.

⁴ Nach ble'eda' bene' ca' gwlo'o Diosen' lo na'gaque' gosone' yela' justis che beṇaḥ zjachi'e gan' chesenabi'e. Na' lecze ble'eda' bene' bi gosonxene' bež xigüen' len l gua'a lsaca' cheba' neca goso'e latje yosozoe' señw cheba' loxgagaque' o taca'gaque'. Gosenita'chache' goso'e diža' chesejnilaže' Jesúsena' na' goseyixjue'ede' xtiža' Diosen'. Da'nana' bene' ca' besegue'ede' Diosen' gosote' legaque' gosechogue' yengaque'. Perw Diosen' bene' cont besyebane' ladjo bene' guat ca', na' t xen len Criston' gosenabi'e to mil iz. ⁵ Cate'ch ba goc to mil iz besyeban bene' ca' gosenita'chach gosejnilaže' Criston', ben' gosac bene' nechw besyebane' ladjo bene' guat ca', cana'ch yosbane' yezica'chle bene' guat. ⁶ Mbalaz nita' bene' ca' beļis bosbane' ladjo bene' guat ca' da' nechw, bene' ba gwlej Diosen' cont zjanaque' lo ne'e. Bi yesac chegaque' can' gac che bene' ca' yesežaglagüe' neche xtoła'gaque' toli tocaṇe, da'nana' žacho yela' got gwchope. San yesenite' yesonxene' Diosen' na' yesonxene' Criston', na' da'nana' guac nacho yesaque' bxoz. Legaque' yesenabi'e len Criston' to mil iz.

⁷ Na' cate' ba goc to mil izen', Diosen' güe'e latje yechoj Satanás dan' chnabia' da' xigüe' ca' lo' yechw zitjwchgua dan' nac lo gabil gan' bseyjuen'. ⁸ Na' yechojen na' da' yoble siyen' bene' že' yogo' nación ca' že' lo yežlion'. Na' siyen' bene' ca' zjanzi' Gog na' Magog, gwtoben legaque' cont yesedillene' Criston', na' yesaque' bene' zan juisyw ca' yox da' chi' cho'a nisdao' da' nono chac gwlab. ⁹ Nach ble'edagüe'da' bene' zan juisyw ca', gosa'aque' doxen lo yežlion', ja'aque' gan' chi' ciuda dan' chaque Diosen' gan' že' bene' ca' gwleje' cont zjanaque' lo ne'e. Na' cate' gosechje' ciudan', Diosen' bene' cont bchoj yi' le'e yaban' bzeytecczen legaque'. ¹⁰ Na' ca' nac Satanás dan' gwziye' bene' ca' že' yežlion', angl che Diosen' bosozalen' lo yi' gabil gan' chala' azufre, yi' xen da' nac ca' to nisdao' gan' ba bosozale' bež xigüe' nechon' na' bež xigüe' gwchopen' ben' be' diža' güenlaže' cont gosonxen beṇaḥen' bež nechon'. Na' yesežaglaon do ža do yel toli tocaṇe.

Goc yela' justis che bene' ca' ba gosat

¹¹ Nach ble'eda' chi' Diosen' to lo siy xen da' nac da' šiš, chi'e chnabi'e. Na' chna'tie' yežlion' len da' ca' chle'echo le'e yaban' na' besyeniten, noch no besele'e len, na' gach ga gosac xišne'en ga yoble. ¹² Na' ble'eda' bene' ba gosat, bene' gole len bene' xcuide' len bi' bixjw, zjazeche' lao Diosen'. Nach Diosen' bzaše' libr ca' gan' zjanyoj yogo'lol da' goson to toe'. Na' gwdena' bzaše' libr gan' zjanyoj la bene' ca' zjanape' yela' mban toli tocaṇe. Na' bene' yela' justis chegaque' con ca' gosone' ślac gosebane', le yogo' da' gosone' zjanyojen le'e libr ca'. ¹³ Yogo' bene' gosat lo' nisdan' besyechoje' zjazeche' lao Diosen', na' yogo' bene' gosat ga yoble lecze besyechoje' zjazeche' lagüe' cont bene' yela' justis che to toe' con ca' gosone' ślac gosebane'. ¹⁴⁻¹⁵ Nach Diosen' bcueze' yela' goten' nombia'cho, na' bene' cont noch no gwže' latje che bene' guat ca' na' bnitlagüen'. Na' bene' bi bosozenag che Dios, yogo' bene' bi nyoj lagaque' le'e libr gan' nyoj la bene' zjanap yela' mban toli tocaṇe, bosozale' legaque' lo yi'

gabil da' nac da' xen ca to nisdao'. Na' dan' goc chegaque', lenna' yela' got gwchope chegaque'.

21

Yežlion' na' le'e yaban' besyeyaquen da' cobe

¹ Gwdena' ble'eda' le'e yaban' ba beyaquen da' cobe na' lecze ca' yežlion', le yaba dan' goc da' nechw na' yežlio nechua' besyeniten. Na' lecze bich gota' nisdao'. ² Neda' Juan ble'eda' ciuda che Diosen', ciuda Jerusalén cobe da' chi' yaban' gan' zoa Diosen', betjen lo yežlion'. Ba nonen' xdan ca to no'ole bene' ba bpa'a cuine' cont naque' xdan cate' gwšagne'e. ³ Na' do gan' chi' Diosen' chnabi'e benda' gwne to bene' zižje, gwne':

—Gwna'šc, Diosen' ba betje' zoalene' beñach. Soateze' len legaque', le gwleje' legaque' cont zjanaque' yež che', na' yesonxene'ne'. ⁴ Na' Diosen' gone' cont bich gac da' yesyeyaše'laže'de', da' yesyegüine'de' o da' yesebeže' chen. Nono gat, nono šey la, le ba gwde che yogo' da' ca' gota' lo yežlio nechon'.

⁵ Nach Dios ben' chi' chnabi'e gwne':

—Da' li ba chocoba' yogo'lol da' de.

Lecze gwne':

—Bzoy diža' quinga ba bendo', le naquen diža' li na' gac can' gwnian'.

⁶ Nach gože' neda':

—Bač goc da' cheyala' gac. Neda' naca' ben' ben yežlion' len yogo' bichle da' de, na' naca' ben' gon cont te chen. Da'nan' zaca'lebda' ca letr nechw da' nzi' A na' letr bzebe da' nzi' Z. Note'teze bene' chaclaže' si'e da' gwnežjua'ne', gwnežjua'ne' yela' mban toli tocanē da' zaca'lebe ca nis ya'a da' che'ejcho cate' chbilecho, na' bi sia' laxjuen. ⁷ Na' bene' chesejnilaže' neda', še ba gosezoede' bi yesebejyichje' xtižan', gac chegaque' yogo' da' šagüe' da' ba bia' diža' chen, na' yesonxene' neda', na' gwlo'a zjanaque' xi'ina'. ⁸ Perw ca nac bene' ca' chesežeb yosozenague' chia', bene' bi chesejnilaže' neda', bene' cheson da' ca' chgue'eda', bene' chesot ljež beñache', bene' cheson da' nac da' yela' zto' len cuerp chegaque', bene' cheson txen len bite'teze yela' guaža', bene' chesejnilaže' l gua'a lsaca', na' yogo' bene' cheso'e diža' güenlaže', yogo' bene' ca' yesezaca'zi'e toli tocanē lo yi' xen da' nac ca to nisdao', yi' gabil gan' čala' azufren'. Na' da' gac chegaquen', lenna' žacho yela' got gwchope.

Ciuda Jerusalén da' nac da' cobe

⁹ Na' bezle'eda' to angl gažen' ben' gosoxe' tas ca' gaže dan' zjanža'te da' zjajožen da' bosolalje' cont gosac yela' zi' ca' la'zelagüe lo yežlion'. Gwbigue' gan' zoan' na' gože' neda':

—Da len neda' cont gwlo'eda' le' bene' ca' zjazaca'lebde' ca to no'ole za' gwšagna'. Na' Jesucristw ben' zaca'lebde' ca xila' dao' ben' gosot bene' Israel neče xtolā'gaque', guac nacho le' si'e no'olen'.

¹⁰ Nach Spiritw che Diosen' benen cont gwyala'na' anglen' to lo ya'a xen da' nac sibe, na' blo'ede' neda' ciuda Jerusalén da' nac ciuda che Dios. Ble'eda' gwzoan yaba gan' zoa Diosen' na' chetjen lo yežlion'. ¹¹ Na' ciudan' goctitchguan len be'ni' da' nsa' Diosen', na' ble'eda' chactiten ca to yej da' zaca'chgua, ca yej da' nzi' jasje da' chle'echo ca vidrw. ¹² To ze'e xen da' nac sibe nyečhjen ciudan', na' nita' šižinw puert chen, na' to to cho'a puerten' zecha tgüje angl. Na' le'e puert ca' zjanyoj la šižinw bene' ca' bosoxie' šižinw cuen diaža che neto' nacto' bene' Israel. ¹³ Na' le'e ze'e dan' zoa šla'a ciudan' gan' chla' gwbiž nita' šone puert, na' šla'a gan' chxoa gwbiž yešonen, na' šla'a zej yichjelen yešonen, na' šla'a zej xanelen yešonen. ¹⁴ Na' ze'e dan' nyečhje ciudan', lenenna' naquen de šižinw yej xen, na' zjanyoj le'e yej ca' la šižinw

neto' nacto' postlw che Jesucristw ben' zaca'lebde' ca xila' dao' ben' gosot bene' gualaž cheto' neche xtoła'gaquen'.

¹⁵ Na' angl ben' be'len neda' diža' noxe' to ya da' nac de oro da' bchine' gwxi'e medidw ciudan', che ze'e chen na' che puert ca'. ¹⁶ Ciudan' naquen da' cuadradw, toze ca naquen zлага' len ton. Anglen' bchixe' ciudan' len ya chen' na' goquen chope mil chope gayoa kilómetros to to šla'an, ca'te' ndonen, ca'te' zlagan' na' ca'te' siben'. ¹⁷ Nach bchixe' ze'e dan' nyechj ciudan' na' goquen gayontap metr yela' sib chen, metr da' nombia' benach, le lenna' bchin anglen' gwxi'e medidon'.

¹⁸ Ze'e da' nyechj ciudan' naquen de yej da' zaca' da' nzi' jaspe, na' doxen ciudan' naquen de oro na' nlan' ca to vidrw da' nac xilaže'. ¹⁹ Na' ze'e da' nyechj ciudan', zjanone' lenen xdan len yogo' cuen yej da' zaca' da' de da' zjanac beya color na' chesactiten. Da' nechon' naquen de jaspe; da' gwchope de zafiro; da' gwyone de ágata; da' gw dape de esmeralda; ²⁰ da' gayo' de ónice; da' gw xope de cornalina; da' gaže de crisólito; da' xono' de berilo; da' ga de topacio; da' ši de crisoprasa; da' šnej de jacinto; na' da' šižinw de amatista. ²¹ Na' puert ca' šižinw zjanaquen šižinw perlas, to ton zjanonen' de toze perla. Na' nez yo da' de lo ciudan' naquen de oro na' zjanlan' ca vidrw da' nac xilaže'.

²² Bibi yodao' ble'eda' lo ciudan', le bene' ca' že' ciudan' zjanite' lao Xancho Dios ben' nap la'zelagüe yela' guac xen na' lao Jesucristw ben' zaca'lebde' ca xila' dao' ben' gosot bene' gualaž cheto' neche xtoła'gaque'. Legaque' chesonxen bene' lo ciudan'. ²³ Bene' ca' že' ciudan' bi cheseyažjde' gwbižen' ne bion' yososenin' lo ciudan', le be'ni' da' nyechj Diosen' chsenin' len legaque' na' lecz ca' be'ni' da' nsa' Jesucriston'. ²⁴ Na' be'ni' che Diosen' gwsenin' len bene' za'ac yogo' nación bene' chesejnilaže' Diosen', na' bene' gwnabia' ca' že' yežlion' yesonxene' Diosen' yosonežjue'ne' bi da' zaca' da' šagüe' da' de chegaque', len no yela' bala'an da' de chegaque'. ²⁵ Bitw šeyjw puert ca' zjanita' ciudan' lagüe' ža, na' gwbat gac šeže'le. ²⁶ Can' ba gwnia', yela' zaca' yela' xdan da' zjade yogo' nación len yela' bala'an da' zjade che bene' gwnabia' che nación ca', yosonežjuen' Diosen' lo ciudan'. ²⁷ Lo ciudan' gwbat gac šo' bene' chon da' zban. Bi gac šo' bene' chon bite'tez da' chgue'e Diosen' o bene' choe' diža' güenlaže'. Con bene' zjanyoj lagaque' le'e libr che Jesucriston' gan' zjanyoj la bene' zjanape' yela' mban toli tocañe, legacze' gac yeso'e na'.

22

¹ Nach anglen' blo'ede' neda' yegw gan' yože nis da' chnežjon benachen' yela' mban toli tocañe. Nisen' nacten ca vidrw le nyadichguan. Yegwna' chchojen do gan' chi' Diosen' chnabi'e txen len Jesucriston' ben' zaca'lebde' ca xila' dao' ben' gosot bene' gualaž cheto' neche xtoła'gaquen'. ² Na' gachol nez yo xen che ciudan' na' chop la'a cho'a yegon' ze yag da' chnežjon benachen' yela' mban toli tocañe. Na' yogo' bio' chesebian frut, šižinw ni'a chesebian lao tgüiz, na' bene' nación ca' yosochine' xlaguenna' ca rmed cont yesenite' güen. ³ Gwbat gata' bi da' chgue'e Diosen' lo ciudan', le ciudan' cui'e nabi'e txen len Jesucristw ben' zaca'lebde' ca xila' dao' ben' gosot bene' gualaž cheto' neche xtoła'gaque', na' yogo' bene' že' ciudan' yesonxene' le'. ⁴ Yesenite' yesele'ede' cho'alao Diosen', na' yoj la Diosen' loxgagaque'. ⁵ Gwbatech gac šeže'le lo ciudan'. Na' bene' že' lo ciudan' bi yeseyažjde' be'ni' che no lámpara o che gwbiž, le be'ni' da' nyechj Xancho Diosen' gwsenin' len legaque'. Na' yesenabi'e len le' toli tocañe.

Ba zoa yid Jesucriston' da' yoble

⁶ Nach anglen' gože' neda':

—Yogo' diža' quinga ba bendo' zjanaquen da' li na' gac con can' ba gwnato'. Xancho Diosen' chbeje' bene' cheso'e xtižen' na' chzejni'ide' legaue' bin' yesene', na' len' ba gwsele' neda' chzejni'ida' le' len bene' lježo' ca' chesonxene' Diosen' cont gache'ele da' ca' za' gac.

⁷ Nach gwna Jesúsen':

—Da' li ba zoa yida' da' yoble. Na' mbalaz bene' chosozenag che da' ca' ba bzojo' le'e libr chio' choen' diža' che da' ca' za' gac.

⁸ Neda' Juan benda' na' ble'eda' da' quinga ba bzoja' nga, na' beyož bendan' na' ble'edan' jazoa xiba' xni'a angl ben' blo'e neda' da' ca', godca' gonxena'ne'.

⁹ Perw anglen' bi bene' latje, gwne':

—Bi gono' ca', le naca' con to bene' güen xšin Diosen' can' naco' le', can' zjanac bene' lježo' ca' ba gwleje' cheso'e xtižen', na' can' zjanac yogo' bene' yosozenag che da' ca' ba bzojo' le'e libr chion'. San benxen Dios.

¹⁰ Lecze gože' neda':

—Bi gwcuašo' diža' ca' ba bzojo', le ba zoa gac da' ca' bzojon'. ¹¹ Na' bene' cheson da' mal, yesonchcze' da' malen' chesonen'. Na' bene' cheson da' yela' zto', yesonchcze' da' yela' zton' chesonen'. Na' bene' cheson da' chazlaže' Diosen', yesonchcze' da' güenna' dan' chesonen'. Na' bene' ba gwlej Diosen' cont zjanaque' lo ne'e, lo ne'en yesyega'ancze'.

¹² Nach Jesúsen' gozne':

—Da' li ba zoa yida' da' yoble, na' yedeyena' gac güen che to to beñach o saca'zi'e con can' ba ben to toe'. ¹³ Neda' naca' ben' ben yežlion' len yogo' bichle da' de, na' naca' ben' gon cont te chen. Da'nan' zaca'lebda' ca letr nechw da' nzi' A na' letr bzebe da' nzi' Z. Ba zoa' cate' gwxe yežlion' na' soacza' cate' te chen.

¹⁴ Mbalaz bene' ca' nita'teze' chesenabe' yeca'a xtoła'gaue' cont yesaque' txen len bene' ca' ba ble'edo' ben' ba besyeyach xalana'gaue'. Legaue' gac yesagüe' frut dan' chbia yag yela' mban toli tocañe, na' gac yeso'e cho'a puert che ciudan'. ¹⁵ Perw ca nac bene' ca' cheson da' nac da' zban, bene' ca' cheson txen len no yela' guaža', bene' cheson da' nac da' yela' zto' len cuerp chegaue', bene' chesot ljež beñache', bene' chesejnlaže' l gua'a lsaca' o bi da' ca' ben Diosen', na' yogo' bene' cheso'e diža' güenlaže' o chesyebede' chosozenague' dan' zjanac ca', yogo' bene' ca' bi gac yeso'e lo ciuda chian'.

¹⁶ —Neda' Jesús ba gwseła' angl chian' cont ba bzende' le' yogo' da' ca' ba bzojon'. Na' cheyala' gwnežjon' bene' ca' chesedop chesežag chesonxene' neda'. Neda' naca' xi'in diaža che da' rey David na' naca' ben' gwseła' Diosen' yežlion' lo diaža che'. Na' zaca'leba' ca beljw xsil.

¹⁷ Spiritw che Diosen' na' lecze ca' chio' chonxencho Jesúsen' chñablaže'cho yob yidšca Jesúsen' da' yoble, chio' zaca'lebcho ca to no'ole si'e. Na' yogo' bene' yesene diža' quinga lecze yesenablaže'šque' yide' da' yoble.

Na' note'teze bene' chaclaže' si'e da' gwnežjw Jesúsen' le', cheyala' yedenaben', na' gwnežjue'ne' yela' mban toli tocañe da' zaca'lebe ca nis ya'a da' che'ejcho cate' chbilecho, na' bi si'e laxjuen.

¹⁸ Na' chosnisda' le'e chzenagle can' ža libr nga che da' ca' za' gac, note'tezle še gwzanchle ca dan' ža libr nga, Diosen' gone' gac chele yogo' yela' zi' dan' zjanyoj le'e libr nga. ¹⁹ Na' note'tezle še žale bi gac yogo' da' qui zjanyoj le'e libr nga, Diosen' yoxie' lale le'e libr chen' gan' nyoj la bene' ca' zjanape' yela' mban toli tocañe na' gone' cont bi gac šo'le lo ciuda chen', neca gac chele yogo' da' güen da' zjanyoj le'e libr nga.

²⁰ Nach Jesús, ben' bzejni'ide' neda' yogo' da' ca' ba bzoja', že':

—Da' li ba zoa yida' da' yoble.

Na' neda' chapa'ne':

—Ca' gacšca. Ýob yidšco', Xana' Jesús.

²¹ Xancho Jesucriston' soacze' gaclenščacze' yogo'le. Da' na'zen' chzoja'.